

廿二史考異

清 錢大昕撰

11.3/88
419993

清 錢大昕撰

廿二史考異上

RD56/11

商務印書館



廿二史攷異

(全二冊)

清 錢大昕撰

商 務 印 書 館 出 版

北京東總布胡同 10 號

(北京市書刊出版業營業許可證出字第 107 號)

新 華 書 店 總 經 售

商 務 印 書 館 上 海 廠 印 刷

統一書號 11017·42

1937 年 12 月初版

開本 787×1092¹/₃₂

1958 年 6 月重印第 1 版

字數 863,000

1958 年 6 月上海第 1 次印刷

印數 1-1,400

印張 50 8/16 插頁 8

定價(9) 5.60


11.3/88
419996

清 錢大昕撰

廿二史考異 下

RD36116

商務印書館



予弱冠時。好讀乙部書。通籍以後。尤專斯業。自史漢訖金元。作者廿有二家。反覆校勘。雖寒暑疾疢。未嘗少輟。偶有所得。寫於別紙。丁亥歲。乞假歸里。稍編次之。歲有增益。卷帙滋多。戊戌。設教鍾山。講肄之暇。復加討論。聞與前人闢合者。削而去之。或得於同學。啓示。亦必標其姓名。郭象何法盛之事。蓋深恥之也。夫史之難讀久矣。司馬溫公撰資治通鑑成。惟王勝之借一讀。它人讀未盡十紙。已欠伸思睡矣。況廿二家之書。文字頗多。義例紛糾。輿地則今昔異名。僑置殊所。職官則沿革迭代。冗要逐時。欲其條理貫串。瞭如指掌。良非易事。以予儂劣。敢云有得。但涉獵既久。啓悟遂多。著之鉛槧。賢於博奕云爾。且夫史非一家之書。實千載之書。祛其疑。乃能堅其信。指其瑕。益以見其美。拾遺規過。匪爲齟齬前人。實以開導後學。而世之考古者。拾班范之一言。擲沈蕭之數簡。兼有竹素爛脫。豕虎傳譌。易斗分作升分。更予琳爲惠琳。乃出校書之陋。本非作者之僞。而皆文致小疵。目爲大創。馳聘筆墨。夸耀凡庸。予所不能效也。更有空疏措大。輒以褻貶自任。強作聰明。妄生痕垢。不卅年代。不揆時勢。強人以所難行。責人以所難受。陳義甚高。居心過刻。予尤不敢效也。桑榆景迫。學殖無成。惟有實事求是。護惜古人之苦心。可與海內共白。自知槩燭之光。必多罅漏。所冀有道君子。理而董之。庚子五月廿有二日。嘉定錢大昕序。

廿二史考異總一百卷

史記五卷

漢書四卷

後漢書三卷

續漢書二卷

三國志三卷

晉書五卷

宋書二卷

南齊書一卷

梁書一卷

陳書一卷

魏書三卷

北齊書一卷

廿二史考異 目錄

周書一卷

隋書二卷

南史三卷

北史三卷

唐書十六卷

舊唐書四卷

五代史六卷

宋史十六卷

遼史一卷

金史二卷

元史十五卷

廿二史考異卷一

清 嘉定錢大昕撰

史記一

卷首題宋中郎外兵曹參軍裴駙集解。案索隱序稱外兵參軍。後序稱外兵郎。互有不同。考隋書經籍志。史記八十卷。宋南中郎外兵參軍裴駙撰。又宋書南史本傳。俱云南中郎參軍。蓋龍駒爲南中郎府之外兵參軍。宋齊之世。四中郎將皆以皇子爲之。得開府置官屬。外兵其一曹也。南中郎者。所仕府之名。外兵者。所署曹之名。參軍則其職也。中郎之上。當有南字。索隱後序稱外兵郎。則誤甚矣。

五帝本紀

幼而徇齊。索隱云。大戴禮作叡齊。一本作慧齊。今大戴禮作慧。蓋慧之省。

其色郁郁。其德嶷嶷。索隱云。大戴禮。郁作神。嶷作俟。今大戴禮亦作郁郁嶷嶷。與小司馬所見本不同。蓋後人據史記轉改。

東至于蟠木。予謂蟠木者。扶木也。呂覽爲欲篇。西至流沙。東至扶木。又求人篇。禹東至搏木之地。說文。搏桑神木。日所出也。搏與扶通。扶木卽扶桑。古音扶如酺。聲轉爲蟠也。漢書天文志。奢爲扶。鄭氏云。扶

當爲媼。

便程東作。程秩聲相近。詩秩秩大猷。說文作戢戢。程从呈聲。戢从戠。戠亦从呈聲。故程戢俱與秩通也。

說文引書作平黠。

便程南譌。索隱正義本皆作爲字。

試不可用而已。尙書云。試可乃已。古人語急。以不可爲可也。古經簡質。得史公而義益明。

嗟四嶽。尙書嗟爲咨。咨嗟聲相近。

舜飭下二女於媼。索隱云。二女長曰娥皇。次曰女英。系本作女瑩。大戴禮作女匣。瑩匣皆英之轉。

歸至于祖禰廟。說文無禰字。禰者爾也。考於七廟爲最近。故稱爾。後人因加市旁。尙書作藝祖。馬融云。

藝禰也。蓋用史公說。藝禰音亦相近。

徧告以言。古音敷如布。徧布聲相近。奏告亦聲之轉也。奏屬齒音。告屬牙音。均爲出聲。故亦得相轉。

堯二女不敢以貴驕事舜親戚。正義云。親戚謂父瞽叟。後母弟象。妹顛首等也。古人稱父母爲親戚。大

戴記曾子疾病篇。親戚旣沒。雖欲孝。誰爲孝。孟子盡心篇。人莫大焉。亡親戚。君臣上下。楚世家。楚人皆

憐之。如悲親戚。猶言如喪考妣也。孟嘗君列傳。使使存問獻遺其親戚。亦謂其父母也。正義兼弟妹言

之。非史公之旨。

誰能馴子工。馴與順同。易坤初象傳。馴致其道至堅冰也。其文言曰。履霜堅冰至。蓋言順也。可證順卽馴字。尙書。疇若子工。若訓順。故史公以馴代若。

教穉子。注尙書作胄子。孔安國曰。穉胄聲相近。案。穉胄聲相近。乃裴氏說。非孔安國注也。曰下當有脫文。

朕畏忌讒說殄僞。徐廣曰。一云齊說殄行。尙書云。朕聖讒說殄行。孔傳訓聖爲疾。疾齊聲相近。故又作

齊也。僞。讀如平秩南僞之僞。南僞見漢書王莽傳。僞卽爲字。行爲聲相近。

惟時相天事。案。釋詁。亮相皆訓導。故變亮言相。正義訓相爲視。失之。

息慎。注。鄭玄曰。息慎。或謂肅慎。息肅聲相近。

顧弟弗深考。注。徐廣曰。弟。但也。弟但聲相近。俗書弟但字作弟次。弟字作第。皆不合六書之旨。

夏本紀

鯀之父曰帝顓頊。案。隱據漢書律曆志。顓頊五代而生鯀。證鯀非黃帝之子。予考山海經。黃帝生駱明。

駱明生白馬。白馬是爲鯀。鯀生禹。山經所云黃帝。當是顓頊之譌。然亦無五世。

齊聲稷穆。司馬相如封禪文。旼旼穆穆。君子之能。旼旼卽齊聲也。古音齊如門。與旼相近。旼卽旻字。

濟河維沈州。沈州本以沈水得名。尙書作兗州。由隸變立水爲橫水在上。又誤三爲六耳。

汝嶧既蕪。正義云。括地志云。岷山在岷州溢洛南一里。洛當作樂。唐書地理志。岷州溢樂縣有岷山。益讓帝禹之子啓。史公書於漢諱皆回避。如恆山作常山。微子啓作微子開。盈數作滿數是也。亦有不

盡然者。周本紀。邦內甸服。邦外侯服。封禪書。五岳皆在天子之邦。犯高帝諱。殷本紀。盈鉅橋之粟。樂書。盈而不持。則傾。晉世家。萬盈數也。以從盈數。春申君列傳。盈滿海內。犯惠帝諱。天官書。壬癸。恆山以北。

恆山之北。氣下黑上青。封禪書。北岳。恆山也。至琅邪過恆山。田齊世家。以爲非恆人。張儀傳。獻恆山之尾五城。犯文帝諱。夏本紀。益讓帝禹之子啓。禹子啓賢。諸侯皆去益而朝啓。啓遂即天子位。是爲夏后

帝啓。殷本紀。帝乙長子曰微子啓。啓母賤。不得嗣。孝文本紀。夏啓以光。燕世家。禹薦益。已而以啓人爲吏。及老。而以啓爲不足任乎天下。啓與交黨攻益。奪之。犯景帝諱。此非史之駁文。後人以意改易耳。若

呂后諱雉。而殷本紀封禪書不避雉字。或史公本文如此。蓋呂氏傾危社稷。史臣未必爲避諱也。宋史

紹興二年禮部太常寺言漢法邦之字曰國盈之字曰滿止是謂曰國曰滿本字見於經傳者未嘗改易司馬遷作史記曰先王之制邦內畿服邦外侯服又曰盈而不持則傾於邦字盈字亦不改易此說然未

注。張敖地理記曰。濟南平壽縣。其地即古斟尋國。濟南當作北海。張敖未詳何代人。

斟氏戈氏。索隱本作斟戈氏。卽斟灌也。戈灌聲相近。上氏字衍。

殷本紀

予其大理女。注：尙書理字作賚。理賚聲相近。詩：釐爾圭瓚。鄭康成引作賚。釐理義亦通也。

至于泰卷陶。索隱云：鄒誕生卷作餉。又作洞。則卷當爲垆。卷垆聲相近。泰與大古文通。

大最樂戲于沙邱。注：徐廣曰：最一作聚。最當作取。說文：取，積也。音與聚同。功臣表注：孔子文生最。說文

以爲最爲積聚字。此最字亦取字之譌。

紂走入登鹿臺。注：徐廣曰：鹿一作廩。廩鹿聲相近。

周本紀

子公叔祖類立。索隱云：系本云：太公組紺諸蓋。蓋當作蓋。音戾。蓋類聲相近也。蓋綠色。紺青赤色。與綠

相似。故又云組紺。

兩造具備。注：徐廣曰：造一作遭。兩遭猶言兩曹。說文：曹，獄之兩曹也。

孔子卒。案：周秦二本紀，魯燕陳衛晉諸世家皆書孔子卒。而吳齊蔡宋楚世家則不書。夫孔子魯人也。

其卒宜書於魯世家。孔子有東周之志。孔子卒，而周不復興矣。以其卒之繫於周，則書於周本紀亦宜

也。若秦若衛若陳若晉與燕於孔子何與，而亦書孔子之卒也。或曰：孔子之卒，史遷爲天下惜之，故不

獨於魯書。若然，則十二國宜皆書。何爲而有書有不書也。且孔子之先，宋人也。齊楚與蔡，孔子嘗至其

國焉。視秦晉燕之從未一至者，有閒矣。何爲乎宜書而反不書也。

周太史儋見秦獻公曰始周與秦國合而別別五百載復合合十七歲而霸王者出焉案此語周本紀載之秦本紀載之封禪書老子列傳又載之蓋重出者四矣秦本紀作七十七歲老子列傳作七十歲皆傳寫之譌索隱正義於周本紀封禪書皆有注可證

子赧王延立索隱云尙書中候以赧爲然鄭玄云然讀曰赧王邵案古音人扇反今音奴板反說文赧从赤良聲良柔皮也讀如輓故古讀赧爲人扇切

王赧時東西周分治赧非王名當云赧王韓徵甲與粟於東周戰國策以爲西周

秦本紀

我不殺戎王則不敢入邑據此則周末東遷之日戎已僭王號如徐偃王楚句亶王鄂王越章王之類也其後有亳王義渠王源王皆戎種

以女弟繆嬴爲豐王妻豐王未詳閩本作幽王幽豐字形相近然幽王妻申后非繆嬴臣常游困於齊而乞食餽人注徐廣曰餽一作銍正義云銍地名在沛縣予謂沛非齊地

庶長改迎靈公之子獻公于河西而立之殺出子及其母沈之淵旁呂氏春秋當賞篇秦小主夫人用奄變羣賢不說自匿公子連亡在魏聞之欲人從鄭所之塞右主然守塞弗人曰臣有義不兩主公子

勉去矣。公子連去入翟，從焉氏塞，菌改入之。夫人聞之大駭，令吏與卒中道因變曰：非擊寇也，迎主君也。公子連因與卒俱來，至雍，圍夫人。夫人自殺，公子連立，是爲獻公。不韋言秦事必可信，小主者，卽出子，菌改者，庶長改也。呂氏言獻公名連，而索隱云名師，隔，未知所本。

與齊威楚宣魏惠燕悼韓哀趙成侯並。據六國表，秦孝公元年，當齊威十八年，楚宣九年，魏惠十年，燕文公元年，韓壯侯十年。世家作趙成侯十四年。此云燕悼韓哀，誤也。正義讀並爲白浪，反屬下，淮泗之間，爲句，亦非。

與晉戰鴈門。索隱云：紀年云，與魏戰岸門。此云鴈門，恐聲誤也。秦與韓魏戰，不當遠至鴈門。案：岸鴈聲相近，故岸門亦作鴈門，非謂代之鴈門也。

樽里疾攻魏焦，降之。樽里疾卽樽里子也。說文：樽作樽。庶長疾攻趙，虜趙將軍莊。樽里子傳：虜趙將軍莊豹。

攻韓南郡，取之。六國表作南陽。案：戰國之際，韓魏皆有南陽，魏之南陽，卽河內之修武。左氏傳：晉於是始啓南陽，是也。韓之南陽，卽秦漢南陽郡也。但秦昭王三十五年已置南陽郡，而此又云攻韓取之，亦似可疑。若江陵之南郡，則楚地，非韓地也。

秦始皇本紀

嫪毐封爲長信侯。索隱云。案漢書嫪毐出邯鄲。王劭云。賈侍中說。秦始皇母子即與嫪毐淫。坐誅。故世人罵淫曰嫪毐也。案賈侍中說以下。出許叔重說文。其所引漢書。則班氏無此文。當是漢書注也。南越傳。嬰齊取邯鄲嫪毐氏女。索隱云。嫪音紀虬反。嫪姓出邯鄲。此嫪字。正義亦音紀虬反。蓋嫪嫪古文通用。今人讀嫪爲郎到切。非也。

九年。正義云。穆帝永和八年。石勒爲慕容俊所滅。俊與儁同。是歲儁滅苻閔。非石勒也。

梁傳。至天正二年。侯景破梁。至廣陵。案侯景廢簡文帝。而立豫章王棟。改元天正。是年景卽篡位。明年景死。而傅國璽入於齊。則天正無二年也。此云天正二年。蓋據北齊紀載之文。削侯景之年。亦不用承聖號也。

搏心。揖志。索隱云。搏古專字。左傳云。如琴瑟之專壹。搏當作媯。說文。媯壹也。俗本搏作搏。尤誤。揖古輯字。書輯五瑞。史記亦作揖。

北過大夏。正義云。杜預云。大夏。太原晉陽縣。案在今并州。予謂正義說非也。始皇立石誇聲教之遠。豈

近取晉陽之地乎。周書。王會解。正北空同大夏。大宛傳。張騫從月氏至大夏。卽其地也。

別黑白而定一尊。李斯傳。別作辨。古書辨與別通。周禮。小宰聽稱。責以傳別。故書作傳辨。

異取以爲高。李斯傳作異趣。

雖萬世世不軼毀。正義云：軼，徒結反。軼與迭同。古書軼迭二字多通用。左氏傳：彼徒我車，懼其侵軼我也。釋文：軼，直結反。讀如迭。成十三年：迭我殺地，亦侵軼之義。封禪書：軼與軼衰。漢書作迭與迭衰。飯土壘，墮土形。李斯傳：壘作甌，形作鏹。古文甌與甌同。讀若九與壘音相近。太史公自序：形作刑，壘亦作甌。徐廣注云：一作濶。說文無壘字，則此文當爲濶也。

子嬰爲秦王四十六日。李斯傳：子嬰立三月。

項羽本紀

項梁使沛公及項羽別攻城陽。城陽當作成陽。縣名，屬濟陰郡，非齊之城陽國也。

誰爲大王爲此計者。此時沛公未爲漢王，蓋臣下尊之之稱。項羽亦未自王，故沛公呼爲將軍，而范增

項莊已稱爲君王。樊噲張良亦稱爲大王。史亦屢書項王，皆據當時相尊之詞。

烏江亭長橫船待。橫當從鄒氏本作樣，樣與漾同。

高祖本紀

秦泗川監平注。文穎曰：泗川，今沛郡也。案：曹參世家樊噲周昌傳俱作泗水。漢書地理志：沛郡，秦泗水

郡，而本紀亦作泗川。

別攻城陽屠之。城當作成，卽下文所謂至成陽與杠里者也。

至成陽與杠里。索隱云。成陽縣名。在濟陰。韋昭云。在潁川。非也。案。成陽漢書作陽城。故韋昭以潁川之陽城當之。當從史記作成陽爲是。

高祖已擊布軍會甄。注。案。漢書音義。會音僧保。邑名。甄音直僞反。索隱云。漢書直作缶。音保。非也。案。漢志。沛郡斬縣有審鄉。高祖破黥布。師古音審爲直。恚反。卽此會甄也。隸書垂似缶。故漢書高紀譌爲缶。字孟康讀會爲僧保之僧。非讀甄爲保。小顏未達孟義。妄有訾審。小司馬又承顏之謬而不察爾。

呂后本紀

得定陶戚姬。注。如淳曰。姬音怡。衆妾之總稱也。索隱云。如淳音非也。姬。周之姓。天子之宗女貴於它姓。故遂以姬爲婦人美號。予謂姬从臣聲。姬妾字讀如怡。乃是正音。六朝人稱妾母爲姨。字易而音不殊。與姬姓讀如基者有別。如淳去古未遠。當有所受。小顏小司馬輩輒非之。誤矣。

寧蚤自財。財與裁同。悔不早自引決也。漢書高五王傳。財作賊。小顏訓爲害。義亦通。
更名梁曰呂。呂曰濟川。案。呂后二年。割齊之濟南郡爲呂王奉邑。及呂產徙王梁地。改呂國曰濟川。以王孝惠之子。則濟川卽濟南也。諸呂旣誅。先徙濟川王於梁。乃告齊王。令罷兵。蓋仍以濟南還齊矣。

孝文本紀

古者殷周有國。治安皆千餘歲。案。殷周有天下。皆不及千歲。云千餘歲者。并稷禹受封之年計之。漢書

作且千歲。

子某最長。案高帝紀書文帝名，景帝紀書武帝名，此稱某，例亦不一。

孝景本紀

二年封故相國蕭何孫係爲武陵侯。表作武陽，其名嘉，非係也。

三年立楚元王子平陸侯劉禮爲楚王，正義云：應劭云：平陸，西河縣。案東平國有東平陸縣，此劉禮所

封邑也。水經注據陳畱風俗傳以尉氏之陵樹鄉，故平陸縣指爲劉禮所封者，失之。若應劭韋昭輩以爲西河之平陸，則謬甚矣。

五年五月丁卯，封長公主子蟠爲隆慮侯。案年表：中元五年五月丁丑，隆慮侯蟠元年。徐廣據本紀以

證表之非，予考功臣表：隆慮侯周通，以中元元年有罪國除，則蟠之封隆慮，必在中元年以後。紀書於前五年者，非矣。漢書年表：景帝中五年，隆慮侯融，以長公主子侯，二十九年，坐母喪未除服，姦，自殺，館

陶公主卒於元鼎元年，距孝景中五年，正二十九歲，又足證史記之表是而紀非也。融與蟠字形相涉而譌。

六年封趙丞相嘉爲江陵侯。表作江陽。

中元年封故御史大夫周苛孫平爲緇侯。據表：是年封周成孫應，乃苛之曾孫也，平則嗣應爲侯者，徐

廣云平一作應近之。

中六年城陽共王薨正義云城陽今濮州雷澤縣古成陽也。案城陽國治莒漢志謂文帝二年別爲國

者是也。濮州之成陽漢時屬濟陰郡乃梁地非齊地且成城字異正義說非是。

孝武本紀張晏云此紀褚先生補作予謂少孫補史皆取史公所闕意雖淺近詞無雷同未有移甲以

當乙者也。或魏晉以後少孫補篇亦亡鄉里妄人取此以足其數爾秦始皇本紀未有漢明帝十七年

十月云云平津侯傳未有太皇太后詔大司徒大司空云云司馬相如傳贊有揚雄以爲靡麗之賦勸

百風一云云皆魏晉以後人竄入。

有司與太史公祠官寬舒等議案封禪書兩稱太史公與祠官寬舒連文而不著名爲其父諱也是年

郊雍爲元鼎四年其明年冬至郊拜泰一皆談爲太史公時事談以元封元年卒卒後遷始繼之漢志

稱談名得其實矣以太史公爲太史令則據後官制追改之。

與王不相中得得字衍。

不虞不驚古文虞與吳通漢碑亦有不虞不揚之文今封禪書作不吳乃後人據毛詩私改。

黃帝得寶鼎宛侯封禪書作宛胸宛胸蓋地名濟陰郡宛句縣是也漢志作冕侯冕卽宛之譌侯句音

相近。

廿二史考異卷二

史記二

三代世表

抱之山中。注。抱音普。茅反。抱讀爲拋。說文無拋字。徐氏新附有之。从尢从力。於義無取。蓋卽抱之譌。

十二諸侯年表

人事。澂。與市同。

庚申共和元年。史公以漢武太初元年歲在焉逢攝提格。據此上推。共和之元。不值庚申。且漢人言太歲百四十四年。而超一辰。不皆依六十之序。故史公作表。有年歲而無干支。此表庚申甲子甲戌之類。蓋徐廣注。非史記本文。

周襄王十四年。叔帶復歸于周。本紀在十二年。

魯孝公稱元年。伯御立爲君。稱爲諸公子。十一年。周宣王誅伯御。立其弟稱。是爲孝公。案魯世家。伯御卽位十一年。周宣王伐魯。殺其君伯御。立稱。是爲孝公。二十七年。孝公卒。漢書律厯志。伯御卽位十一年。孝公卽位二十七年。與世家合。表乃以伯御之元年。卽爲孝公之元年。故孝公有三十八年。失其實。

矣。

魯莊公三十二年。莊公弟叔牙。鳩死子般。季友奔陳。子般上下皆嘗有脫文。

齊靈公二十七年。晉圍臨淄。晏嬰大破之。案齊世家。靈公走入臨菑。晏嬰止靈公。靈公弗從。此文當有

脫誤。

晉厲公壽曼。春秋晉弑其君州蒲。即厲公也。蒲乃滿之謬。曼滿聲相近。古書酬酢字。或作醻。是壽與州

通。

衛文公二十三年。重耳從齊過無禮。世家在十六年。

衛殤公狄。世家作秋。秋狄皆焱之謬。漢書古今人表作焱。春秋作剽。剽焱音相近。

衛君起元年。石傳逐起出。索隱云。傳音圃。或作專。音敷。左傳作石圃。圃傳相近。傳蓋傳之謬。專亦當

六國表。十二諸侯年表始於共和。共和以前。則三代世表紀之。終於周敬王四十三年。故序云。自共和

子。訖孔。其時惟陳曹先亡耳。史公以六國表繼之。晉衛附於魏。鄭附於韓。魯蔡附於楚。宋附於齊。各述其

後事。以續前表。文簡而法密矣。三家分晉。魏得晉之故都。故魏人自稱晉國。孟_{子書梁惠王}子書梁惠王。周霄皆云晉國。而韓趙則

否。史公以晉附魏。蓋以此。

湯起於亳。注徐廣曰。京兆杜縣有亳亭。案殷本紀。湯始居亳。皇甫謐曰。梁國穀熟爲南亳。湯所都也。書

立政有三毫。說者以爲湯始居南亳。在宋州穀熟縣西南。後徙西亳。卽河南偃師縣。而景亳湯所盟地。則宋州北五十里大蒙城是也。三毫非一地。要非京兆之亳亭明矣。秦本紀。寧公二年。遣兵伐蕩社。三年。與亳戰。亳王奔戎。遂滅蕩社。徐廣云。蕩一作湯。社一作杜。皇甫謐以爲亳王號湯。西夷之國。又云。周桓王時。自有亳王號湯。非殷也。封禪書於杜亳有三杜王之祠。亦指此。蓋京兆之亳。乃戎王號湯者之邑。而徐廣以爲殷湯所起。其不然乎。然此篇稱作事者必於東南。收功實者常於西北。乃述禹與西羌。周始豐鎬。而及於湯之起亳。則史公固以關中之亳爲湯之亳矣。

魏獻子、韓宣子、趙簡子。表始於周元王元年。卽晉定公三十六年也。魏獻子舒以魯定公元年卒。韓宣子起之卒。當更在其前。安得此時尙存乎。三家分晉。唯趙氏最強。世次分明。故於表首著簡子四十二年。而魏韓闕之。蓋魏自文侯韓自武子以後。年數乃可表也。後人妄益獻子宣子字於魏韓下。失史公之旨矣。春秋傳。魏舒之後。有魏曼多。世家作魏侈。侈諡襄子。見世本。此與趙簡子同時者。當是魏侈也。春秋傳。韓起之後。有韓不信。諡簡子。而世家言宣子之後。有貞子簡子莊子。未審當是何人。

魏文侯二十五年。太子罃生。罃爲子擊之子。不當云太子。

齊威王六年。晉伐到鱒陵。索隱云。劉氏鱒音屬。沈反。沈當爲沈之譌。鱒陵。世家作博陵。趙成侯六年。敗魏涿澤。魏齊世家並作濁澤。古文濁涿通。五帝本紀。涿鹿或作濁鹿。

秦昭王二年桑君爲亂誅。案秦本紀庶長壯與大臣諸侯公子爲逆皆誅桑與壯音相近穰侯傳誅季君之亂亦指桑君也。

魏安釐王十一年秦拔我廩邱。注徐廣曰或作邢邱。案秦本紀亦作邢邱當以邢爲是。

秦楚之際月表

楚項。別項於楚者義帝雖項氏所立羽不爲義帝用也。且項梁與沛公起兵皆在陳涉未敗之前其後權奉義帝不得竟係於楚。

漢。表列漢於趙齊之下燕魏韓之上趙齊強也趙先於齊者據起之先後也。

秦二世元年。自是年七月以後諸侯以起兵之月爲始以次數之。項梁十一月。皆計月不計年也。義帝元年。月田市九月。沛公二十九。韓廣三十。魏豹十八。韓成二十一。皆計月不計年也。趙歇二十六。以後諸侯以始封之月爲一月數。至十二月。卽稱二年一月。如韓王信之三年一月。卽楚四年十月。英布之二年一月。卽漢五年七月。而漢王獨稱正月者。別於諸侯也。趙歇田市韓廣魏豹韓成皆稱王已久。則仍前之月數之。而不計其年。歇終四十八。市終二十四。廣終三十七。豹終三十八。成終二十七。前後義例已爲不倫。臨江王共敖與十八王同時封。獨不稱二年一月。仍稱十三。月。敖終於三十一。敖子驩終於十六。月。又何說也。

漢興以來諸侯年表

漢獨有三河、東郡、潁川、南陽。自江陵以西至蜀北，自雲中至隴西與內史，凡十五郡。十五郡謂河東、河南、河內、東郡、潁川、南陽、南郡。即江陵漢中、巴郡、蜀郡、隴西、北地、上郡、雲中、并內史也。五原郡元朔二年始置故不數怵邪臣計。索隱云：怵音誓。怵訓習。怵當作怵。傳寫之譌。

故齊分爲七，趙分爲六，梁分爲五，淮南分爲三。案：此表凡二十六格。高祖始封同姓九國，并齊、趙、梁、淮南，析置十七國，益以長沙，當爲二十七格。今檢表：齊之下爲六格，趙之下爲五格，梁之下止三格，以濟陰附於淮陽之後，梁與淮陽地本相接也。楚之下爲二格，魯、泗水本楚地，衡山、淮南所分，亦楚故地也。廬江亦淮南所分，乃列於趙之下，與清河爲一格，似失其倫矣。

高帝四年，初王武王英布元年。武王二字衍。布已誅死，安得有證。

高后元年，初置呂國。案：呂國以齊之濟南郡置，當在齊之下，與濟南爲一行，今列於梁之下，誤也。

孝文前元年，分爲河間、都洛城。洛城當爲樂城，監本作洛陽，尤誤。

十五年，分爲膠西、都宛。注：徐廣曰：樂安有宛縣。宛上當有高字。

孝景前元年，初置臨江、都江郡。當作都江陵。

四年，初王元年，是爲孝武帝。是爲孝武帝五字，後人所增入也。考孝文封代王表，直書其名，而云高祖

子。此亦當書名。而云景帝子。

中二年初置清河郡。濟陽當作清陽。漢書地理志清河郡清陽縣。注云王都是其證也。

孝武建元元年。孝武二字亦後人所增。

元鼎三年初置泗水郡。案漢志泗水國領三縣。凌也。泗陽也。于也。郟為東海郡治。不當割為泗水國。

郡。

高祖功臣侯年表

百年之間見侯五。正義云謂平陽侯曹宗。曲周侯酈終根。陽河王氏本南監侯齊王本監仁。戴侯祕王本。

監本作穀陵侯馮王本監本。偃也。案史公作表。終於太初。平陽。曲周。陽河。戴四侯之免。皆在太初以

後。故尚在見侯之數也。江鄒侯靳石以改封。不與五人之列。然曲周侯終根其時已改封繆。陽河侯仁

其時亦改封埤山矣。是太初之世。不止見侯五也。陽河侯據漢表。乃其石之後。齊其諡。非姓也。正義稱

齊人似誤。

太初元年。盡後元二年。十八。案惠景間侯者年表。建元以來侯者年表。末一格。只云太初以後。不計年

數。此表亦當如此。蓋史公紀事。止於天漢。不及見孝武之崩也。此後人所增改。

陽陵。案隱云。陽陵屬馮翊。案馮翊之陽陵。景帝陵也。漢制。陵縣屬太常。元帝始分屬三輔。不以封諸侯。

平陵侯蘇建平陵侯范明友封國在南陽武當縣非昭帝所葬之平陵 漢志陽陵故弋陽景帝更名則高帝時尙無陽陵之名楚漢春秋作陰陵近之

廣嚴索隱云晉書地道記廣縣在東莞嚴諡也下又云壯班馬二史並誤案嚴字衍文小司馬以嚴為

諡卽下文所云壯侯也壯當為莊班氏避諱作嚴非有誤也後人又誤會班史增嚴於廣字之下亦非

史公之誤漢志齊郡有廣縣

酈侯呂台孝惠七年有罪案漢書外戚侯表無呂台有罪罷免之文

胡陵侯呂祿漢表作漢陽

酈言上張旗志秦王恐降志古文識字旗志者旗幟也說文無幟字徐氏新附有之幟取表識之義亦當作

識史漢多古字故為志耳張蒼列傳沛公以周昌為職志徐廣云主旗幟之屬叔孫通傳張旗志徐廣

云一作幟

酈高后二年懿侯同元年同祿弟文帝元年同有罪封何小子延案漢書蕭何傳子祿嗣薨亡子高

后乃封何夫人同為酈侯小子延為筑陽侯孝文二年罷同更封延為酈侯漢表以同為祿母史記以

同為祿弟既已乖迂且同以罪除何由更得諡懿此必史記之誤也

筑陽文帝元年侯延元年案此表延立十九年以文帝後三年薨子遺立一年以文帝後四年薨則

立四年以景帝元年前有罪免皆封筑陽若據漢表及傳則延封筑陽乃在高后時文帝元年前更封鄼二年漢表云子遺嗣一年遺弟則紹封二十年皆封鄼漢表則封武陽其不同如此蕭公為漢元功史家敘其世

系尚不免傳聞異詞紀載之難信自昔然矣

曲周索隱云縣名屬廣平案漢志曲周縣武帝建元四年置蓋景帝之世酈寄以罪免國除為鄉至孝

武復置為縣也

臨汝侯賢行賂一本作財罪國除漢表賢坐子傷人首匿免與此異

建平周昌始封汾陰其子開方改封建平孫左車又改封安陽也漢表失建平二字

成索隱云縣名屬涿郡案水經注淄水又逕邲北春秋齊師圍邲邲人伐齊飲馬於斯水也漢高帝封

董濞為侯國成邲古字通左氏傳本作成

蓼以執盾前元年從起碭案蓼侯孔鮒費侯陳賀陽夏侯陳豨棘蒲侯陳武都昌侯朱軫河陽侯陳

涓芒侯昭漢表作彰棘邱侯襄阿陵侯郭亭厭次侯元頃菌侯張平皆以前元年從穀陵侯馮谿汾陽侯

靳彊以前二年從汁防侯雍齒以前三年從所稱前元年前三年者高帝自稱沛公之年也人關王

漢以後始稱漢元年漢初王侯受封皆自稱元年亦用此例

費定會稽浙江湖陽湖陽漢表作湖陵

陽都案隱云漢志闕晉書地道記屬琅邪案漢志城陽國有陽都縣後漢省城陽入琅邪小司馬云漢志闕者非也

拜爲將軍忠臣侯忠臣非官號史惟見此一人

汁那功比平定侯案平定侯齊受孝惠元年始封雍齒以高祖六年封不應轉準其例當有誤文或是平侯沛嘉之譌

棘蒲案隱云漢志闕案趙世家敬侯六年伐魏取棘蒲正義云今趙州平棘縣古棘蒲邑也今考陳武以高帝六年封棘蒲侯而七年又封林摯爲平棘侯則平棘非卽棘蒲或其地相去不遠棘蒲國除之後省入平棘爾

都昌案隱云漢志闕案北海郡有都昌縣水經注以爲朱軫所封

武彊案隱云漢志闕案曹相國世家還攻武彊因至滎陽臣瓚云武彊城在陽武水經注以爲莊不識所封也

貫齊侯呂注徐廣曰呂一作台漢表作合傅胡害合與台字形相似也案隱單行本呂下有博國二字博近博國近害未審誰是

海陽案隱云海陽亦南越縣地理志闕案班志遼西郡有海陽縣水經注以爲搖母餘所封

曲城。索隱云。漢志闕。表作涿郡。案。漢志。曲成縣屬東萊。卽此曲城也。其後改封夜侯。夜卽掖。亦屬東萊。

小司馬。漢志闕者。非也。又王子侯表有曲成侯萬歲。中山靖王之子。表在涿郡。此又一曲成。小司馬

誤合爲一。

蠱逢。漢書作蟲達。

任侯。侯字衍。

昌武。索隱云。漢志闕。案。漢志。膠東國有昌武縣。

侯單甯。漢表作單究。

宣曲。索隱云。漢志闕。案。貨殖傳有宣曲任氏。小司馬據上林賦。西馳宣曲。以爲當在京輔也。

絳陽。索隱云。漢志闕。案。水經注澮水篇云。新田又謂之絳。卽絳陽也。蓋在絳澮之陽。漢高帝封華無咎

爲侯國。

東茅。索隱云。漢志闕。一作柔。案。琅邪郡有柔縣。

臺。索隱云。臨淄郡有臺鄉縣。案。兩漢無臨淄郡。當是齊郡也。又濟南郡有臺縣。

樂成。索隱云。漢志闕。案。漢志。河閒國有樂成縣。

蒯成。索隱云。漢志闕。晉書地道記。屬北地。案。晉書地理志。蒯成屬始平。不屬北地也。高帝功臣侯白四

十七人。班史皆不言其食邑所在。獨於蒯成云在長沙。必有所據。諸解紛紛。皆無當也。

復陽。案隱云。縣名屬南陽。案。清河郡亦有復陽縣。水經注以爲陳胥所封。

朝陽。案隱云。縣名屬南陽。案。濟南郡亦有朝陽縣。或稱東朝陽。水經注以爲華寄封國也。

柏至。以駢憐從。案隱云。姚氏憐鄰聲相近。案。姚氏名察。有漢書訓纂三十卷。

許溫。案隱云。漢表作許盩。溫盩聲相近。

武原。案隱云。漢志闕。案。漢志。楚國有武原縣。

稟。案隱云。漢志。稟縣屬山陽。案。稟當爲臺字之譌。

彭。案隱云。漢表。屬東海郡。案。東海郡無彭縣。武帝時。劉屈氂封澎侯。晉灼云。東海縣。然漢志東海亦無

澎縣。

甯。案隱云。漢表。甯陽屬濟南郡。案。武帝封魯共王子恢爲甯陽侯國。隸濟南郡。卽漢志泰山郡之甯陽

也。甯甯古字雖通。然以後證前。亦出意揣。予謂春秋傳。晉陽處父聘于衛。反過甯。杜云。甯。晉邑。汲郡修

武縣也。當是魏選所封邑。

襄平。案隱云。縣名屬臨淮。案。水經注以遼東之襄平爲紀通封國。

龍。案隱云。廬江有龍舒縣。蓋其地也。案。水經注。汝水又西南。逕龍鄉故城。春秋成公二年。齊侯圍龍者。

也。漢高帝封陳署爲侯國。

陸梁。索隱本作陸量。

義陵。注。徐廣曰。一作義陽。索隱云。義陽縣在汝南。案。武陵郡有義陵縣。吳程以長沙柱國封侯。當是武

陵之義陵。非汝南之義陽。且漢有兩義陽。一在南陽平氏。一在東海厚邱。皆不屬汝南。疑小司馬誤也。

吳程。漢表作吳郢。古文程與郢通。孟子。文王卒於畢郢。郢卽程邑。

禾成。索隱云。漢志闕。案。水經注。濁漳水篇云。斯洩水又東南。逕和城北。漢高帝封郎中公孫耳爲侯國。

汲侯。索隱云。漢表作汲。侯字衍。汲蓋波之譌。水經注。溴水又東北。逕波縣故城北。漢高帝封公上不害

爲侯國。

江都侯石坐爲太常。行太僕事。治齋夫可年。益縱年。國除。案。漢表。坐爲太常。行幸離宮。道橋苦惡。太僕

敬聲繫以謁聞。赦免。與此異。

衍。索隱云。漢志闕。案。蘇秦說魏襄王云。北有河外。卷衍酸棗。則衍亦河南郡地。

平州。索隱云。漢志闕。晉書地道記。屬巴郡。案。漢志。西河郡有平周縣。而路博德傳稱西河平州人。疑州

與周通也。又春秋傳。會于平州。杜預云。在秦山牟縣西。元封三年。封朝鮮降將啖爲平州侯。表在梁父。

蓋卽春秋之平州也。平州雖有三名。漢初封國。當以梁父者近是。

博陽索隱云縣名屬彭城。案彭城卽楚國漢志楚國有博陽縣古偃陽國此博陽必博陽之譌也且同

時有博陽侯陳濞不應同名小司馬注史記時尙未誤後來轉刻譌爲博爾

戚索隱云漢志關晉地道記屬東海案班志東海郡明有戚縣鄭氏音憂戚小司馬乃云志闕何其謬

也水經注今頓邱衛國縣西戚亭漢高帝封李必爲侯國此則春秋之戚非東海之戚也鄭說近之

桃索隱云縣名屬信都案水經注濁漳水篇云衛漳又東北逕桃縣故城北漢高祖封劉襄爲侯國此

信都之桃也又濟水篇云濮渠逕桃城南卽戰國策所謂酸棗桃墟也漢高帝封劉襄爲侯國此東郡

之桃也

高粱索隱云漢志關案水經注汾水過高粱邑西故高粱之墟也春秋秦穆公納公子重耳于晉害懷

公于此漢高帝封酈介於斯邑

紀信此侯國注家皆闕其地疑本封紀侯而衍信字爾或云信匡兩字謚

甘泉索隱云案志甘泉闕疑甘泉是甘水案甘水縣漢志亦闕小司馬說未審所據子謂雍之甘泉其

名舊矣王競封邑疑卽此漢表作景合甘泉爲一字

菌注徐廣曰一作鹵案代郡有鹵城縣

惠景閒侯者年表

扶柳。索隱云。縣名。屬信都。案。水經注以琅邪之扶縣爲呂平侯國。蓋酈氏所見本異。

平定。索隱云。漢志闕。或鄉名。案。漢志。西河郡有平定縣。

上邳。案。水經注泗水篇云。邾水又西。逕仲虺城北。晉太康地記曰。奚仲遷於邳。仲虺居之。史記。楚元王子邳封上邳侯。有下。故此爲上矣。

樂平。索隱云。漢志闕。案。漢宣帝封霍山爲樂平侯。表在東郡。

山都。索隱云。漢志闕。案。漢志。南陽郡有山都縣。水經注云。本南陽之赤鄉。漢高后封王恬爲侯國。

呂成侯呂忿。案。水經注清水篇云。紫谿又逕宛西呂城東。史記。呂尙先祖受封於呂。徐廣音義曰。呂在

宛縣。高后四年。封昆弟子呂恕爲呂城侯。疑卽此也。今本恕作忿。或傳寫之誤。

樂昌侯張受。案。後漢書張酺傳云。張敖子壽。封細陽之池陽鄉。蓋本析細陽地爲樂昌國也。細陽本隸

汝南。宣帝封王武爲樂昌侯。漢表在汝南。卽壽故封也。樂昌侯國。元始初尙存。不審地理志何以闕之。

列傳作張壽。壽受音相似。

祝茲。索隱云。漢書作琅邪。案。高后四年。封松茲侯徐厲。漢表作祝茲。而史記文帝紀周亞夫世家亦有

祝茲侯徐厲名。說者疑徐厲已封祝茲。則此呂榮所封。當依漢書作琅邪。然徧檢各本漢表。祝茲侯呂

瑩無有作琅邪者。則單文孤證。未可信也。及讀漢書王子侯表。祝茲侯延年下。注琅邪字。乃悟索隱本

云漢表在琅邪，後人傳寫，譌爲書作二字爾。今考定當以廬江之松茲爲徐厲國，琅邪之祝茲爲呂望國也。

清郭。清讀若靖，卽戰國策之靖郭也。王氏本作清都，監本作清源，皆誤。

周陽。索隱云：縣名，屬上郡。案：上郡有陽周縣，無周陽。小司馬本蓋作陽周，故援志以實之耳。正義引括

地志云：周陽故城在絳州聞喜縣東二十九里。帝紀見文。此卽水經所云周陽邑，蓋河東郡地也。予謂泗鈞

以齊王舅父得侯，卽裂齊地而封之。趙兼以淮南舅父得侯，其封邑亦當在淮南境內，且兼得罪失侯，

未幾卽以淮南王子賜爲周陽侯。同時侯者，阜陵東城皆淮南故地，則此周陽亦宜在淮楚之間，不特

非上郡之陽周，恐亦非河東之周陽矣。

管。索隱云：管，古國，今爲縣，屬滎陽。案：地理志：濟南郡有菅縣，字从艸，當是罷軍所封，非河南之管城也。

斥邱。索隱云：縣在魏郡。漢表作氏邱，史記本或作瓜邱。小司馬以魏郡之斥邱當之，予謂斥邱侯唐厲

高帝所封，傳三世，至元鼎初尙無恙，不應更封它人。

平昌。索隱云：縣名，屬平原。案：漢志：琅邪平原二郡皆有平昌縣，水經注以琅邪之平昌爲劉卬所封。

白石。索隱云：縣名，屬金城。案：金城郡昭帝始置，且距齊地絕遠，不應文帝時以封齊悼惠王子也。

安陽。小司馬本作安陵，故云縣名，屬馮翊，恐別有安陵。今刊本刪此五字案：馮翊之安陵，惠帝所葬，不應建爲

侯國故小司馬疑其別有一安陵不知其為安陽之譌也漢志汝南郡有安陽縣水經注以為劉勃所封也

陽周淮南傳作周陽而諸侯年表及此表並作陽周誤也漢表亦作陽周其誤與此同

犂索隱云縣名屬東郡犂與黎同

弓高索隱云漢表在營陵案漢志河閒國有弓高縣水經注以為韓積當所封也營陵縣屬北海郡疑

漢表誤或河閒別有營陵鄉

右孝文時二十九汲古閣本作二十八誤今數之止二十八蓋脫陽邱侯劉安一人據索隱單行本陽邱當在陽

虛之後蓋傳寫失之漢表不數章武南皮二侯故云二十七人

建陵案東海郡有建陵縣水經注以為衛綰所封

江陽索隱云縣名在東海案漢志東海無江陽縣惟犍為郡有江陽水經注以為蘇嘉所封也

山陽案漢志河內郡有山陽縣

周陽索隱云縣名屬上郡案水經涑水又西過周陽邑南酈元以為田勝封國也上郡有陽周無周陽

建元以來侯者年表

符離索隱云縣名屬沛郡漢表作邳離邳離在朱虛小司馬以沛之符離當之其說雖本於水經注要

不如漢表之足據。

壯。索隱云表在東平。漢表作杜。注云重平蓋東平之譌。

龍亢以校尉樛世樂擊南越死事子侯。南越傳作樛樂。無世字。漢書同樛當从手旁。

成安。索隱云表在郊。志在陳畱。郊當作邲。字之譌也。漢志陳畱潁川並有成安縣。潁川之成安。蓋分邲

縣置。卽延年封國也。水經注汝水篇旣以潁川之成安爲韓延年封邑。而汝水篇又以陳畱之成安爲

延年所封。蓋考之未審矣。

將梁。索隱云表志闕。案王子侯者表。中山靖王王朝平以元朔二年封將梁侯。元鼎五年坐酎金國除。

此楊僕以元鼎六年封。蓋卽朝平故邑。本中山地。而改隸涿郡也。

下鄴。案水經注。湍水東南流。逕南鄴縣。故城東。史記所謂下鄴也。漢武帝封左將黃同爲侯國。

涉都。索隱云表在南陽。水經注云案郡國志。筑陽縣有涉都鄉。

稔。稔當作廐。說文廐从广。稔聲。濟陰有廐縣。

子宏代立。據漢表。嗣日磾者。子賞。非宏也。

商利侯王山。漢表作王山壽。

爰威。今帝復立子爲廣陵王。案廣陵王霸。以厲王子紹封。在元帝初元二年。褚先生所稱今帝。謂元

帝也。而張蒼列傳稱孝元帝將相名臣年表續至成帝鴻嘉元年。麻書亦數至成帝建始四年。較將相
年是少孫補綴前後亦非一時。

建元已來王子侯者年表

宜春。索隱云表志闕。案漢志汝南豫章皆有宜春縣。此長沙王子封邑。當在豫章。水經注亦以豫章之

宜春為劉成國也。

廣戚。索隱云表志闕。案漢志沛郡有廣戚縣。

盱台。索隱云表志闕。案漢志臨淮有盱眙縣。即盱台。

睢陵。漢表作淮陵。景十三王傳作淮陽。漢志淮陵睢陵二縣並屬臨淮郡。水經注以睢陵為江都易王

子楚所封。

劇。索隱云表志闕。案漢志菑川國有劇縣。

平望。索隱云表志闕。案水經注平望亭在平壽縣故城西北八十里。漢武帝封菑川懿王子劉賞為侯

國。

益都。索隱云表志皆闕。案青州益都縣。曹魏所置。疑即漢之侯國地。

尉文。索隱云表在南郡。案趙世家孝成王以尉文封廉頗為信平君。是尉文為趙地。漢表云南郡。恐誤。

東城。索隱云。志屬九江。此侯趙敬肅王子。恐非九江之東城。

房光。漢表作旁光。古音房如旁。

阿武。索隱云。表志皆闕。案。漢志。涿郡有阿武縣。

蓋胥。索隱云。漢志在太山。表在魏郡。案。泰山郡有蓋縣。無蓋胥縣。此侯為河閒獻王之子。當從漢表屬

魏郡。不當屬泰山。

平。索隱云。志屬河南。此侯為濟北所分。其封國未必在河南。

泉狼。索隱云。表在臨淮。案。漢志。西河郡有泉狼縣。代與西河接壤。當是西河之泉狼也。

千章。索隱云。表在平原。案。漢志。西河郡有千章縣。

有利。索隱云。表志闕。案。水經注。沫水篇云。武陽溝水東出蒼山。山上有故城。即古有利城矣。漢武帝封

城陽共王子劉釘為侯國。

南城。索隱云。表志闕。案。東海郡有南成縣。即南城也。後漢改屬泰山郡。

廣陵常侯劉表。漢表。常作彪。晉灼音斯。索隱本亦是彪字。

千鍾侯劉搖。漢表作重侯擔。師古音丁甘反。予謂搖古字作搢。故譌為擔。漢志。渤海郡有千童縣。水經

注以為河閒獻王子封國也。

定敬侯劉越。索隱本敬作敷。注中敷字皆敷之譌。漢表作敷侯五字。索隱本無之。

柳索隱云。表志闕。案。漢志。勃海郡有柳縣。水經注以爲齊孝王子陽封國也。地理風俗記云。高城縣東

北五十里有柳亭。見水經注。漢水篇。

樊輿。索隱云。表志闕。案。漢志。涿郡有樊輿縣。

夫夷。案。漢志。零陵郡有夫夷縣。水經注以爲長沙定王子義所封也。

春陵。索隱云。志屬南陽。案。劉賈封邑本在冷道縣春陵鄉。元帝時。徙南陽蔡陽縣白水鄉。表所書者。徙

封之邑也。

零般。漢表作摩葭。志作零段。此般蓋段字之譌。

父城。索隱云。志在遼西。表在東海。案。漢表作文成。故小司馬以遼西之文成當之。然此侯爲城陽頃王

之子。當從漢表在東海。必不遠至遼西也。

涓。索隱云。表作涓。在東海。案。清水在南陽。有清陽縣。疑表非也。案。涓侯不疑乃城陽頃王之子。其封國

與東海相近。故別屬東海。不得遠引南陽之清水爲證也。

襄陵。索隱云。表在鉅鹿。志屬河東。漢表作襄隄。小司馬引河東之襄陵。亦迂遠。

漢興以來將相名臣年表

孝惠二年何薨。案蕭曹皆相國，而何書薨。參書卒，陳平灌嬰皆丞相，而平書薨，嬰書卒。此後丞相無書薨者。褚先生所續，惟蔡義黃霸韋玄成三人書薨，餘皆書卒。太僕滕公非將相，而亦書卒。

孝景元年，置司徒官。漢初無司徒司空之官，此必太尉之譌。表於三年已書置太尉官，此重出，又舛誤。

四年，御史大夫蚡。漢表蚡作介，又是年封皇子徹爲膠東王，表失書，蓋轉寫脫之。

六年，御史大夫陽陵侯岑邁。漢表不載。

後二年，御史大夫岑邁卒。案自孝景六年至此，十有一年中間，有劉舍衛綰，直不疑相繼爲御史大夫，何以又有岑邁廁其間，此班史所以疑而闕之。

征和二年，劉屈氂爲丞相，封彭城侯。城字衍，漢表彭作澎。

黃龍元年，樂陵侯史子長爲大司馬車騎將軍。子長，史高字也，表當書名，而誤書字。

河平三年，太僕平安侯王章爲右將軍。此王舜之子，漢志千乘郡有平安侯國，卽舜所封也。恩澤侯表

外戚傳俱作安平，誤。

廿二史考異卷三

史記三

禮書

張晏謂禮書樂書遷沒之後亡。今二篇俱有今上即位之文。似非盡褚先生所補。

社至於諸侯。函及士大夫。索隱云。含謂包容。鄭誕生音昭徒濫反。意義亦通。今案。大戴禮作導及士大夫。導亦通也。今此爲昭者。當以導與蹈同。後足字失。止唯有口存。故使解者得以穿鑿而用也。予謂函及者。覃及也。說文。弓。嘽也。讀若含。函从弓得聲。亦與嘽同義。古文導與禫同。士喪禮。中月而禫。古文禫作導。說文。棧。讀若三年導服之導。亦謂禫服也。導與禫通。則亦與覃嘽通。而昭又與嘽同音。是文異而實不異。小司馬疑昭爲蹈之譌。由不知古音之變易也。蹈从足昭从台。台白形聲俱別。

樂書

高祖過沛詩。三侯之章。索隱云。侯。語辭也。兮亦語辭。沛詩有三兮。故云三侯也。侯兮聲相近。其聲唯以殺。索隱本作焦。

志微焦衰之音作。古文殺與衰通。易。神武不殺。虞仲翔本作衰。

石聲磬以立別。樂記。磬作聲。別作辨。案。說文。磬即磬之古文。釋名。磬也。聲堅磬磬然。論語。子擊磬於衛。荷蕢言。鄙哉磬乎。磬。磬猶磬聲。謂磬聲也。鐘磬皆以聲得名。鄭康成注樂記。謂磬當為磬。蓋誤以磬為器名。不知磬即磬也。辨別聲義皆同。古人往往通用。

律書

開聲效勝負。效。見也。

晉用咎犯。正義云。狐偃也。咎季也。又云。胥臣也。案。古文舅為咎。見士昏禮注。狐偃。晉文公之舅。故稱咎犯。禮記亦作舅犯也。正義以為二人。未詳所據。咎季即胥臣。左傳謂之臼季。

不周風居西北。主殺生。案。八卦之位。乾居西北。故八風始於西北。易。坤之上六。龍戰于野。謂十月之卦也。說卦傳。戰乎乾。乾。西北之卦。陰陽相薄。故云主殺生。與易義同。五行家以亥為天門。遁甲。乾主開門。

史公所謂辟生氣而東之也。牛者。冒也。牛。牙音之收聲。冒。唇音之收聲。聲不類而轉相訓者。同位故也。古人以反側與輾轉對。顛沛與造次對。元首與股肱對。反側。顛沛。讀如同為出聲。元首同為收聲。則亦為雙聲矣。徵諸經典。如多訓。祇鈞訓等。蔽訓。斷。迺訓。鄉。振訓。救。曹訓。羣。憑訓。大。稟訓。媪。貫訓。中。槩訓。大。疹訓。單。皆以諧聲取義。牛之訓。冒。亦此例也。

訓。冒。亦此例也。

東至於建星。唐一行日度議。謂甄曜度及魯麻。南方有狼弧。無東井鬼。北方有建星。無南斗。此書述二十八舍。亦以建星易南斗。狼弧易東井輿鬼。然則史公所用。殆魯麻與。

條風居東北。主出萬物。東北者。艮方也。萬物之所成終而所成始。故主出萬物。於遁甲爲生門。

箕者。言萬物根柢。棋讀如菱。易。箕子之明夷。趙賓以爲箕子者。萬物方菱。茲也。其義蓋本於史公。徐廣云。棋一作橫。橫蓋核字之譌。核亦有該音。

清明風居東南。維主風。東南者。巽方也。故主風。

涼風居西南。維主地。西南者。坤方也。故主地。於遁甲爲死門。故云萬物就死氣也。

北至於罰。罰與伐同。此斂二十八舍。有罰。無觜。觜。

北至於酉。索隱云。酉卽卯也。毛傳亦以酉爲卯。卯卽昴字。詩爲參與昴。毛云。昴。酉也。孔疏引元命包云。昴之爲言酉也。言物成就繫酉也。昴。酉既爲一物。酉。昴從卯。則昴亦當從卯。而讀如柳矣。卯。古文酉。仲秋。

建酉之月。此文以酉屬八月。益徵昴當從卯。不從卯也。今本說文昴從卯。蓋傳寫之譌。然徐仙民讀昴如茅。陸氏釋文亦音卯。廣韻亦收入上聲巧部。則此音之譌久矣。

戌者。言萬物盡滅。說文。戌。滅也。五行。火死於戌。陽氣至戌而盡。故滅。從火。戌。

太蔭長七寸七分二。七分當十分角。角當作商。晉書律麻志云。司馬遷言五音相生。以宮生角。角生商。商生

徵。徵生羽。羽生宮。求其理用。罔見通途。依晉志次之。林鐘為角。南呂為徵。姑洗為羽。則太蕪必為商可知也。

生鐘分子一分。謂黃鐘長九寸。其數八十一。為十二律之本。

丑三分二。謂林鐘長六寸。其數五十四。於黃鐘本數中得三分之二也。下倣此。

寅九分八。謂太蕪長八寸。其數七十二。得黃鐘本數九分之八。

卯二十七分十六。謂南呂長五寸三分寸之一也。以分子為實。前兩位分母為法。實如法。得寸分之數。

後倣此。其數四十八。

辰八十一分六十四。謂姑洗長七寸九分寸之一也。其數六十四。

巳二百四十三分一百二十八。謂應鐘長四寸二十七分寸之二十也。其數四十二又三分之二。史公

以九分為寸。故云長四寸二分三分二。自此以下。俱有零分。

午七百二十九分五百一十二。謂蕤賓長六寸八十一分寸之二十六也。其數五十六又九分之八。故

云長五寸六分三分二。今本作一誤其實不止三分之一。史約其大率耳。

未二千一百八十七分一千二十四。謂大呂四寸二百四十三分寸之五十二。倍之。則為八寸二百四

十三分寸之一百四也。鄭康成注周禮大呂夾鍾中呂皆用倍律。其數七十五又二十七分之二十三。糴實下生得正律若上生則得倍律。

此用倍律之數乘之故云長七寸五分三分二。今本作一說亦尚有餘分也。

申六千五百六十一分四千九十六。謂夷則長五寸七百二十九分寸之四百五十一也。其數五十又

八十一分之四十六。故云長五寸。今本下有四分二字誤三分二。其實不足三分之二。舉其大數也。

酉一萬九千六百八十三分八千一百九十二。謂夾鐘長三寸二千一百八十七分寸之一千六百三

十一。倍之。則爲七寸二千一百八十七分寸之一千七十五也。其數六十七又二百四十三分之一百

三。故云長六寸七。今本作一誤分三分一。亦尚有餘分。

戌五萬九千四十九分三萬二千七百六十八。謂無射長四寸六千五百六十一分寸之六千五百廿

四也。其數四十四又七百二十九分之六百九十二。故云長四寸四分三分二。尚有餘分。

亥十七萬七千一百四十七分六萬五千五百三十六。謂仲呂長三寸一萬九千六百八十三分寸之

六千四百八十七。倍之。爲六寸一萬九千六百八十三分寸之一萬二千九百七十四也。其數五十九

又二千一百八十七分之二千三十九。故云長五寸九分三分二。亦尚有餘分也。若以十二律配十二

月。則陽律居本月。陰律居其對月。如林鐘丑而在未月。南呂卯而在酉月是也。大呂以下。必用倍律者。

以律配月。丑月之律。不可短於寅律。卯月之律。不可短於辰律。巳月之律。不可短於午律。故必倍其數。

而後長短適如其次也。而倍律之數。則惟蕤賓重上生始得之。蕤賓之下生者。正律之寸分也。重上生

者倍律之寸分也。史公言十二律分寸取倍數。言生鐘分取正數。各有所當。不可偏廢也。

上九。商人。羽七。角六。宮五。徵九。索隱云。此文似數錯。未暇研覈也。子族子唐。以太玄淮南天文訓證明

史公之義。其說確不可易。今述之左方。太玄云。甲己之數九。乙庚八。丙辛七。丁壬六。戊癸五。淮南云。戊

子。黃鍾之宮也。庚子。無射之商也。壬子。夷則之角也。甲子。中呂之徵也。丙子。夾鍾之羽也。蓋古法六十

律旋相爲宮。黃鍾爲宮。起戊子。則林鍾爲徵。配己丑。太蔟爲商。配庚寅。南呂爲羽。配辛卯。姑洗爲角。配

壬辰。次應鍾爲宮。配癸巳。蕤賓爲徵。配甲午。大呂爲商。配乙未。夷則爲羽。配丙申。夾鍾爲角。配丁酉。次

無射爲宮。配戊戌。中呂爲徵。配己亥。黃鍾爲商。配庚子。故云庚子林鍾爲羽。配辛丑。太族爲角。配壬寅。

次南呂爲宮。配癸卯。姑洗爲徵。配甲辰。應鍾爲商。配乙巳。蕤賓爲羽。配丙午。大呂爲角。配丁未。次夷則

爲宮。配戊申。夾鍾爲徵。配己酉。無射爲商。配庚戌。中呂爲羽。配辛亥。黃鍾爲角。配壬子。故云壬子次林

鍾爲宮。配癸丑。太族爲徵。配甲寅。南呂爲商。配乙卯。姑洗爲羽。配丙辰。應鍾爲角。配丁巳。次蕤賓爲宮。

配戊午。大呂爲徵。配己未。夷則爲商。配庚申。夾鍾爲羽。配辛酉。無射爲角。配壬戌。次中呂爲宮。配癸亥。

黃鍾爲徵。配甲子。故云甲子林鍾爲商。配乙丑。太族爲羽。配丙寅。南呂爲角。配丁卯。次姑洗爲宮。配戊

辰。應鍾爲徵。配己巳。蕤賓爲商。配庚午。大呂爲羽。配辛未。夷則爲角。配壬申。次夾鍾爲宮。配癸酉。無射

爲徵。配甲戌。中呂爲商。配乙亥。黃鍾爲羽。配丙子。故云丙子林鍾爲角。配丁丑。次太族爲宮。配戊寅。南

呂爲徵。配己卯。姑洗爲商。配庚辰。應鍾爲羽。配辛巳。蕤賓爲角。配壬午。次大呂爲宮。配癸未。夷則爲徵。配甲申。夾鍾爲商。配乙酉。無射爲羽。配丙戌。中呂爲角。配丁亥。而六十律終矣。戊癸爲宮聲。故宮之數五。甲己爲徵聲。故徵之數九。乙庚爲商聲。故商之數八。丙辛爲羽聲。故羽之數七。丁壬爲角聲。故角之數六也。

置一而九三之。以爲法。此下當云十一三之。以爲實。轉寫脫之。

麻書

明者。孟也。幽者。幼也。明孟聲相近。古讀明如芒。而孟亦與芒通。戰國魏有芒卯。它書作孟卯。又與暋通。後漢書。趙岐作暋。子章句。今本作娶子。字相涉而譌。卽孟子也。毛公詁詩。正爲長。冥爲幼。而鄭康成箋之。以正爲晝。冥爲夜。然則晝爲長。夜爲幼。與大戴太史公之義正同。

歸邪於終。注。邪音餘。邪餘聲相近。

注。陳術云。徵士巴郡落下閬。陳術蜀人。譚益部耆舊雜記。

其更以七年爲太初元年。年名焉逢攝提格。索隱云。爾雅。歲在甲曰焉逢。寅曰攝提格。則此甲寅之年十一月甲子朔旦冬至也。此篇末亦云寅名攝提格。則是甲寅不疑也。又據二年名單闕。三年名執徐等。年次分明。而漢志以爲其年在丙子。當是班固用三統與太初曆不同。故與太史公說有異。案。索隱

之說非也。漢志云：迺以前厯上元泰初四千六百一十七歲。至於元封七年，復得闕逢攝提格之歲。中冬十一月甲子朔旦冬至，日月在建星。太歲在子，然則班史何嘗不云闕逢攝提格之歲。與太史公說曷嘗有異乎。古法歲陰與太歲不同，太歲與歲星常相應。歲星自丑右行，太歲自子左行。歲在星紀，則太歲必在子，在玄枵，則太歲必在丑。歲星百四十有四年而超一辰，即太歲亦超一辰矣。太初之元，歲在星紀，故漢志以爲太歲在子，而當時詔書以爲年名闕逢攝提格者，乃指歲陰所在，非太歲所在也。歲陰亦謂之太陰，又曰青龍，亦左行，周十二辰，而常在太歲之前二辰，如太歲在子，則太陰在寅。太歲在丑，則太陰在卯也。淮南天文訓：太陰在寅，歲名曰攝提格。太陰在卯，歲名曰單闕。太陰在辰，歲名曰執徐。太陰在巳，歲名曰大荒落。太陰在午，歲名曰敦牂。太陰在未，歲名曰協洽。太陰在申，歲名曰涇灘。太陰在酉，歲名曰作鄂。太陰在戌，歲名曰閭茂。太陰在亥，歲名曰大淵獻。太陰在子，歲名曰困敦。太陰在丑，歲名曰赤奮若。蓋古人以太陰紀歲，攝提格以下十二名，皆謂太陰所在。淮南子言太陰元始建於甲寅，故以焉逢攝提格之歲爲厯元，而太初三統推上元日月五星，皆起於星紀，故太歲起丙子。史記厯術甲子篇云：甲寅年者，以太陰所在紀歲名。班史云：歲名困敦，乃真太歲所在也。東漢以降，術家鮮知太陰太歲之別，又不知太歲超辰之義，而古書多難通矣。

太初元年，歲名焉逢攝提格，月名畢聚，日得甲子夜半朔旦冬至。索隱云：聚音嫫，謂月值畢及嫫皆也。畢

月雄也。聚、月雌也。案爾雅。月在甲曰畢。正月爲陬。十一月爲辜。此冬至之月。建子月也。月陽在甲。當云畢辜。而云畢聚者。聚與陬古文通用。天正之月。亦可云陬也。索隱謂月值姬訾。則是建寅之月。非冬至矣。

徒維敦。詳天漢元年。此篇載歲陽名。焉逢爲甲。端蒙爲乙。游兆爲丙。強梧爲丁。徒維爲戊。祝犁爲己。商橫爲庚。昭陽爲辛。橫艾爲壬。尙章爲癸。皆與爾疋異。焉與闕。端與旃。游與柔。梧與圉。音本相近。戊己以下。則音義全別。且多違反。蓋漢儒傳授各異爾。徐廣注。單闕一作廩安。游兆一作游桃。亦音相近也。

天官書

中宮天極星。此中宮天極星。及東宮蒼龍。南宮朱鳥。西宮咸池。北宮玄武。五宮字皆當作官。案下文云。紫宮房心。權衡咸池。虛危。此天之五官坐位也。可證史公本文皆作官矣。索隱於中宮下。引春秋元命包官之爲言宣也。古文取音義相協。展轉互訓。以宣訓官。音相近也。流俗本亦譌作宮。由於不知古音。下文紫宮下。乃引元命包宮之言中也。又可證小司馬元本中宮作中官矣。小司馬解天官云。天文有五官。官者。星官也。星座有尊卑。若人之官。曹列位。故曰天官。

司其出所守。司。古伺字。

北宮玄武虛危。北方七宿不及東壁。蓋傳寫失之。

以攝提格歲陰左行在寅。歲星右轉居丑。歲陰者，太陰也。淮南天文訓：天神之貴者，莫貴于青龍。或曰：天一，或曰太陰。太陰所居不可背而可鄉。又云：太陰所建，蟄蟲首穴而處，鵠巢鄉而爲戶。太陰在寅，寅爲建，卯爲除，辰爲滿，巳爲平，午爲定，未爲執，申爲破，酉爲危，戌爲成，亥爲收，子爲開，主太歲。丑爲閉。此太陰與太歲之別也。古法太歲與歲星相應，歲星居丑，則太歲當在子，而稱攝提格歲者，史公以太陰紀歲，不以太歲紀歲，與淮南天文訓同也。貨殖傳：太陰在卯，穰明歲衰惡，至午，早明歲美，至酉，穰明歲衰惡，至子，大早，明歲美，有水，此亦以太陰紀歲之證。

正月與斗牽牛晨出東方。淮南天文訓：太陰在寅，歲名曰攝提格，其雄爲歲星，舍斗牽牛以十一月與之晨出東方。此云正月者，史公據石氏星經較淮南書每後兩月。

以二月與婺女虛危晨出。淮南作十二月。

以三月居與營室東壁晨出。淮南作正月，居字衍。

以四月與奎婁胃昂晨出。淮南作二月，胃昂二字衍。漢志淮南書俱無胃昂字。

以五月與胃昂畢晨出。淮南作三月。

以六月與鶩鱸參晨出。淮南作四月。

曰長列。漢志列作烈。

以七月與東井與鬼晨出。淮南作五月。

曰大音。漢志作天晉。

以八月與柳七星張晨出。淮南作六月。

曰爲長王。漢志作長壬。

以九月與翼軫晨出。淮南作七月。

以十月與角亢晨出。淮南作八月。

曰大章。索隱云。天文志作大星。漢志作天皇。

以十一月與氐房心晨出。淮南作九月。

曰天泉。漢志。泉作宗。

以十二月與尾箕晨出。淮南作十月。

彗惑爲勃亂。勃卽悖字。

歲行十二度百十二分度之五。案。填星率二十八日而行一度。歲三百六十五日。當行十三度餘一日。

四分日之一。當云二十八分度之一。又小分四之一。通其率爲百十二分度之五也。十二度當作十三度。

若水金在南曰牝牡。水當作木。

仲春春分夕出。郊奎婁。胃東五舍爲齊。仲夏夏至夕出。郊東井輿鬼。柳東七舍爲楚。仲秋秋分夕出。郊角亢。房東四舍爲漢。仲冬冬至晨出。郊東方。與尾箕斗牽牛俱西。爲中國。案四郊字皆效字之譌。淮南天文訓。辰星正四時。常以二月春分効奎婁。以五月夏至効東井輿鬼。以十一月冬至効斗牽牛。高誘云。効見也。予謂効見聲相近。說文無効字。當爲效。

月食始日。五月者六。六月者五。五月復六。六月者一。而五月者。凡五百一十三月而復始。索隱云。依此文計。惟有一百二十一月。與元數甚爲懸。校既無太初麻術。不可得而推定。今以漢志三統麻法計。則五月者七。六月者一。又五月者一。六月者五。五月者一。凡一百三十五月而復始耳。或術家各異。或傳寫錯謬。故此不同。無以明知也。案本文傳寫固有錯謬。小司馬所引三統法亦誤也。今考三統四分術。竝以五月二十三分之二十而一食。依次推之。則五月者一。六月者六。又五月者一。六月者七。又五月者一。六月者七。凡百三十五月而復始也。校書之家。罕通步算。傳寫譌脫。莫能是正。自昔然矣。

去地可六丈大。注徐廣曰。大一作六。大當作六。六字連下句讀。六賊。星名也。

水澹澤竭。地長見象。漢志云。水澹地長。澤竭見象。蓋以長象爲韻。與上下文同例。澹。古瞻字。水澹與澤。竭意亦相對。此傾倒兩字。蓋傳寫之譌。

城郭門閭。閭。臬。枯。槩。枯。槩。當。作。槩。枯。枯。與。閭。韻。也。閭。臬。漢。志。作。潤。息。於。義。爲。長。斗。秉。兼。之。秉。卽。柄。字。

封禪書

蚩尤在東平陸監鄉。案隱云。監音闕。皇覽云。蚩尤冢在東平郡壽張縣闕鄉城內。古文監與闕通。左傳。闕止。史記作監止。

文帝出長安門。安字衍。下文云長門五帝。可證也。漢志亦作長門。

一元曰建。二元以長星曰光。三元以郊得一角獸曰狩云。案。元光之後。尙有元朔。則元狩乃四元。非三元。班史改以爲今無三元字。蓋得之矣。言建元元光而不言元朔者。建以斗建爲名。光以長星爲名。皆取天象。若元朔紀年。應劭解朔爲蘇。取品物蘇息之義。不主天瑞。故不及之耳。說者謂建元元光之名。亦此時追命之。恐未然也。武帝紀。建下多元字。光上狩上亦有元字。此又後人妄增。

與王不相中。武帝紀。中字下有得字。蓋後人妄增。小司馬引三蒼訓中爲得。可證本文無得字也。日月北斗登龍。登與升同。

河渠書

禹抑鴻水。案隱云。抑者遏也。漢書溝洫志作堙。堙抑皆塞也。案。堙抑遏聲皆相轉。

西門豹引漳水溉鄴以富魏之河內。案漢志史起言鄴田惡漳水在其旁而西門豹不知用是不智也。乃以起為鄴令遂引漳水溉鄴民歌之史記以引漳水溉鄴為西門豹事誤。

江河之決皆天事未易以人力為彊塞塞之未必應天。此老成謀國之言當時惡蚡者謂蚡奉邑在河北故沮塞河之役其實非公論也。建元三年閩越舉兵圍東甌東甌使人告急蚡云越人相攻擊固其常又數反覆不足煩中國往救。事見東越傳此語與汲黯相似蚡雖進由外戚負責好權此兩事殊足稱也。

儒林列傳武安侯田蚡為丞相蚡黃老刑名百家之言延文學儒者數百人

拜湯子卬為漢中守。當云漢中太守脫太字。

其後莊熊熊言。漢志作嚴熊無熊字。

皓皓盱盱兮閭殫為河。漢志閭作慮慮閭以音同借用遼東無慮縣以醫無閭山得名是也。此閭字亦

借為憂慮之慮。裴駟解為州閭非是。

延道弛兮離常流。注徐廣曰延一作正。案漢書亦作正。正道弛者失其正道也。古文正與征通。封禪書

揚雄賦征或作延與延字形相似因譌為延爾。小司馬作延長解似曲。

平準書

於是募民能輸及轉粟於邊者拜爵爵得至大庶長。案文帝用鼂錯之言令民入粟拜爵此賣爵非賣

官也。爵自公士至公乘，凡八等。雖有爵，猶不得復除。與編戶無異。自五大夫至大庶長十等，爵雖高，初無職事。非有治民之責也。官有定員，而爵無定員。故云爵者上之所擅出於口而無窮。蓋假以虛名，未嘗列於仕籍。錯雖言利，猶不妨吏道矣。孝武用兵，府庫益虛，乃有人羊爲郎之例。其後置武功爵，爵至官首者得試補吏。先除，雖云買爵，亦得入仕。蓋祖鼂錯之意而失之者也。

彭吳賈滅朝鮮，置滄海之郡。案漢書武帝紀：元朔元年，東夷薺君南閭等口二十八萬人降，爲蒼海郡。三年春，罷蒼海郡，至元封三年，滅朝鮮，相距二十年，不得并爲一事。且滅朝鮮者爲荀彘、楊僕，亦無彭吳賈其人。漢書食貨志但云彭吳穿穢，貉朝朝鮮，置滄海郡。較之史記爲確。予又疑滅當爲濊字之譌。濊與薺穢同，賈讀爲商賈之賈，謂彭吳與濊朝鮮貿易，因得通道置郡也。小司馬謂彭吳始開其道而滅之，非是。

河決觀。注：徐廣曰：觀，縣名也。是時河決瓠子，東注鉅野，不及觀也。漢書：觀作灌，屬下句，當從之。

而姦或盜摩錢，裏取鎔。注：徐廣曰：音容。呂靜曰：冶器法謂之鎔。案：徐說非也。鎔當作鎔。說文：鎔，銅屑也。讀若浴。漢志：姦或盜摩錢質而取鎔，臣瓚以爲摩錢漫面，以取其屑，更以鑄錢。西京黃圖敘云：民摩錢取屑是也。

民多買復及五大夫，徵發之士益鮮。鼂錯言：爵至五大夫以上，迺復卒一人。武帝置武功爵，千夫如五

大夫故五大夫與千夫皆不在徵召之限。

不欲者出馬。吏多坐法廢免。買爵者多不願除吏。故又使出馬。

異時算輜車賈人緡錢皆有差。異時謂漢初也。上文言高祖初平天下。令賈人不得乘車。重租稅以困辱之。蓋謂此。

築令居。索隱云。令音零。姚氏音連。連令聲相近。

初置張掖酒泉郡。注。徐廣曰。元鼎六年。案漢書武帝紀。元鼎六年。分武威酒泉地。置張掖敦煌郡。而酒泉置郡。乃在元狩二年。徐氏誤。

廿二史考異卷四

史記四

吳太伯世家

楚共王伐吳。至衡山。注：杜預曰：吳與烏程縣南也。案：烏程，吳之南境。楚兵不能深入至此。今當塗縣北

有橫山。即春秋之衡山也。

美哉。淝淝乎。索隱云：淝音馮。又音泛。說文無淝字。蓋卽汎之異文。

將舍於宿。注：左傳曰：將宿於戚。索隱云：太史公以舍字替宿。遂以宿字替戚。戚是邑名。今宜讀宿爲戚。

案：衛世家：封孫文子林父於宿。宿卽戚也。古音戚如蹙。蹙與縮通。少牢禮縮執俎。注：古文縮爲蹙。是也。

宿本有蹙音。小司馬讀爲戚。是未達於古音。

懼猶不足。而又可以畔乎。索隱云：春秋左氏傳曰：而又何樂。此畔字宜讀曰樂。予謂畔讀如心廣體胖之畔。畔與般同。皆有樂義。

齊太公世家

文王伐崇。密須。犬夷。犬夷卽昆夷。

子丁公呂伋立。說文丁作玎。

遂獵沛邱。左傳沛作貝。沛亦有貝音。楚世家朝射東莒。夕發沮邱。卽此貝邱也。

與丙戎之父獵。左氏作邴。邴與蜀聲相近。

使庸職駉乘。索隱云左氏作開職。此言庸職。庸非姓。蓋謂受雇職之妻。史意不同。字亦異耳。案庸閼聲。

相近。書母若火始炎炎。漢書作庸庸。小司馬不職古音。妄以庸爲受雇。甚可笑也。

菲星將出。菲卽字字。

八月齊秉意茲。此下有脫文。

闕止有寵焉。索隱云左氏監作闕。田齊世家作監止。此史公本文也。此篇作闕。乃後人妄改。

魯周公世家

戴璧乘圭。戴卽載字。尙書戴爲植。鄭康成云植古置字。載置聲相近。

異母同類。索隱云尙書母作畝。此爲母。義亦並通。古文畝爲晦。母卽晦之省。

作餽禾。書序餽爲歸。歸有餽音。論語詠而歸。歸孔子豚。齊人歸女樂。皆讀如餽。

王亦未敢訓周公。索隱云尙書作誚。此作訓。字誤耳。予謂誚从肖。古書或省从小。轉寫譌爲川耳。

錮錮如畏然。注徐廣曰錮錮謹敬兒音窮窮。一本作夔夔。夔窮聲相近。

治民震懼。尙書震爲祗。震祗聲相近。

乃有亮闇。尙書有爲或。或有聲相近。鄭康成云。或之言有也。論語注

敬復之注。徐廣曰。一作振。尙書敬爲祗。祗振聲相近。

楊公築茅闕門。六年卒。漢書律厯志。楊公卽位六十年。此脫十字。

子屯立。是爲康公。索隱云。屯音竹倫反。漢志。屯作毛。字形相涉而譌。

子賈立。是爲文公。索隱云。系本作潛公。漢志作緡公。春秋時已有文公。潛又與閔同。疑漢志是也。

燕召公世家

子今王喜立。今王蓋當時人所稱。猶紀年稱魏襄王爲今王也。史公雜采戰國書。未及刊正。

管蔡世家

次曰毋季載。左傳作毋季。亦音乃甘切。

而舉胡以爲魯卿士。小司馬據尙書蔡仲無仕魯之文。又謂伯禽居魯。乃在七年致政之後。疑史公無

所據。予謂周公封魯。在武王未沒以前。公既畱相王室。必遣人往治之。則當伯禽未之魯。而使蔡仲以

卿士治其國。何渠不可乎。書云周公以爲卿士。既非王朝之卿。卽是仕魯之證矣。

衛使史鮪言康叔之功德。據左氏傳。乃祝蛇。非史鮪也。兩人同字子魚。因而傳譌。

乃令賊利殺昭侯。案左氏傳殺昭侯者公孫翩也。

子莊公夕姑立。索隱云夕音亦。即射姑也。子謂夕者夜也。功臣侯表趙將夜。漢書作將夕。夜又與射通。

春秋狐射姑出奔狄。公羊作夜姑。

陳杞世家

空籍五歲矣。案籍字索隱有二解。當以借義為長。字宜从艸。不从竹。

題公主謀娶公。注徐廣曰謀一作謨。索隱云娶子與反。謀謨聲相近。說文有娶無媾。媾娶本一字。故讀

娶為子與切。

衛康叔世家

衛君黔牟立八年。案年表黔牟立十年。乃出奔。

惠公立三年。出亡。亡八年。復入。與前通年。凡十一年矣。案年表惠公復入。與前為十四年。此誤。

衛石曼專逐其君起。索隱云左傳作石圃。此專音圃。穀梁作曼姑。專或音姑。諸本多無曼字。案專當作

專。專與圃音相近。石曼姑圍戚在魯哀公三年。與此石專必非一人。諸本無曼字者是也。左氏公羊經

文皆作曼姑。索隱專指穀梁。亦未然。

宋微子世家

滅阬。阬國懼禍至。下阬字衍。阬或作阬。周本紀作者。

今般其典喪。注。典。國典也。索隱云。尙書。典作淪。篆字變易。其義亦殊。子謂典讀如殄。典喪者。殄喪也。考

工記。鞞欲頡典。鄭司農讀典爲殄。燕禮。寡君有不腆之酒。注。古文腆爲殄。是典腆與殄通。

我其發出往。注。鄭玄曰。我其起作出往。詩。昊天曰明。及爾出王。毛氏傳。王。往也。

天篤下。當亡股國。尙書。篤爲毒。大宛傳。其東南有身毒國。即天竺也。竺。古篤字。小司馬亦讀毒爲篤。

常倫所斃。注。徐廣曰。一作釋。釋當作燹。說文引書。彝倫攸燹。燹。敗也。

曰涕曰霧。注。徐廣曰。一作曰洩曰被。夷有弟音。故羨讀如稀。涕亦或爲洩也。霧。說文作覈。被乃攷字之

譌。尙書。涕爲驛。霧爲蒙。又蒙在驛上。與此文異。

卜五占之用。二衍資。鄭氏以下五占之用爲句。二衍資爲句。上句言卜。下句言筮。

三十年。惠公卒。子哀公立。案。年表。三十一年。惠公薨。次年卽爲戴公元年。少哀公一世。

乃公子子魚教潛公也。據左氏傳。乃公子御說之詞。

昭公弟鮑革。注。徐廣曰。一無革字。案。左氏無革字。下文亦有單稱公子鮑者。則革爲衍文明矣。周禮。攻

皮之工。有鮑氏。鮑或作鞞。从革。此字蓋讀如鞞。革之鞞。後人瀕入正文。

晉世家

使宦者履鞮。前云勃鞮。後云履鞮。史駁文。或曰。本讀鞮為履鞮字。後人溷入正文。轉去勃存履耳。狄伐咎如。索隱云。咎音高。鄒誕本作困如。困咎聲相近。

犂二十五年。犂遲也。猶言待也。

且言何以易之。索隱云。言人之出言。不可輕易之也。謂其言不可移易。小司馬讀易為去聲。非也。

餓人示眯明也。索隱云。即左傳之提彌明。案古文神祇字作示。說文祇地祇提出萬物者也。是示與提

義相通矣。鄭大夫高渠彌史記亦作眯。

魏文子請老辟卻克。當作范武子。

其侍者豎陽穀。左氏作穀陽豎。

東至膠南至沂。左氏膠為維。

楚世家

三曰彭祖。注。虞翻曰。名翦。大戴禮帝系篇作錢。

季連生附沮。附沮生穴熊。帝系篇。季連產什祖氏。什祖氏產內熊。

賓之南海。賓讀曰攢。

王怒射殺子反。據左氏。共王賜子反死。非親射殺也。

謂初王比曰。比無諡。故以初王目之。

棄疾使船人從江上走呼。左傳云。周走而呼。古文周市之周作舡。或省爲舟。故史公譌爲船人之說。非

其實也。詩。舟人之子。鄭康成云。舟當作周。考工記。作舟以行水。注。故書舟作周。周舟二文恆相亂也。

卒自娶秦女。生熊珍。春秋。珍作軫。伍子胥傳。亦作軫。

蜀伐楚。取茲方。正義云。古今地名云。荊州松滋縣。古鳩茲地。即茲方是也。案。左氏傳。楚子重伐吳。克鳩

茲。杜預云。鳩茲在丹陽蕪湖縣東。今皋夷也。鳩舉聲相近。與茲方非一地。

鄒費郟邠者。羅襲也。孟子書有鄒穆公費惠公。此文云。泗上十二諸侯。則戰國之世。小諸侯存者尙多也。

秦王趙政立。秦王政之立。五國世家皆書。而韓世家獨闕。此篇稱趙政。又與它世家異。

虜楚王負芻。滅楚名爲楚郡。云。注。孫檢曰。秦虜楚王負芻。滅去楚名。以楚地爲秦郡。案。秦始皇父名楚。

故始皇本紀稱楚爲荆。滅楚之後。未嘗置楚郡也。孫氏謂滅去楚名。蓋得其實。楚郡之楚。當是衍文。或

者謂三十六郡之外有楚郡者。妄也。

越王句踐世家

後二十餘世。至於允常。案。少康至桀。十一傳。殷湯至紂。三十傳。周自武王至敬王。又二十五傳。而越之

世乃止二十餘。理所必無也。正義引輿地志云。越侯傳三十餘葉。歷殷至周敬王。較爲近之。敗之夫椒。索隱云。椒本又作湫。湫椒聲相近。伍子胥傳作夫椒。楚大夫椒舉。漢書作湫舉。越以服爲臣。以與已同。

與大夫柘稽。索隱云。國語作諸稽郢。諸柘聲相近。

齊與吳疥癩也。索隱云。疥癩音介眇。徒鮮聲相近。故癩爲疥之異文。

正義云。黃帝之元。執辰破巳。霸王之氣。見於地戶。案術家以亥爲天門。巳爲地戶。建在亥。則破在巳。執在辰矣。巳爲楚分。而吳越在中國之東南。正當巳位。故云地戶之位。非吳則越。春秋時。能病楚者。吳。能病吳者。越。以其當地戶也。

鄭世家

友初封于鄭。索隱云。系本云。桓公居械林。徒拾。鄭氏詩譜。宣王封母弟友於宗周畿內咸林之地。今京

兆鄭縣是其地也。械林咸林疑是一地。

祝瞻射王中臂。索隱云。左氏作祝眡。瞻當作瞻。說文。瞻。筓耳也。與眡音義相近。左氏云中肩。此云中臂。傳聞異辭。

殺其大夫單伯。索隱云。依左傳作檀伯。此文誤爲單伯者。因魯莊公十四年。厲公自櫟侵鄭事。與單伯會

齊師伐宋相連。故知誤耳。予謂單賈古文通用。麻書單闕一作賈安。淮南秦族訓。密子治賈父。卽單父也。詩。下民卒瘁。沈重本作殪。則檀單亦自可通。非因左傳而誤。

鄆公惡鄭於楚。說文。鄆。太嶽之後。甫侯所封。讀若許。

聲公五年。鄭相子產卒。子產者。鄭成公少子也。案。子產者。子國之子。穆公之孫。而世家以爲成公子。一誤也。子產卒於定公時。而世家云聲公五年。二誤也。至循吏傳稱鄭昭君之時。太宮子期言之。以子產爲相。則尤無稽之談也。

趙世家

吾有所見子晰也。索隱云。吾前夢所見者。知其名曰子晰也。詳文義謂吾有所見子甚晰。蓋記憶前夢之詞。非其人名子晰也。

襄子立四年。知伯與韓趙魏盡分其范中行故地。晉出公怒。告齊魯。欲以伐四卿。四卿恐。遂共攻出公。出公奔齊。道死。知伯乃立昭公會孫驕。是爲晉懿公。案。六國表。襄子四年。與知伯分范中行地。是歲爲晉哀公忌之三年。出公盡十八年。別無出奔之文。及考晉世家。則云出公十七年。知伯與韓趙魏共分范中行地以爲邑。出公怒。告齊魯。欲以伐四卿。四卿恐。遂反攻出公。出公奔齊。道死。故知伯乃立昭公會孫驕爲晉君。是爲哀公。哀公大父雍。晉昭公少子也。生忌。忌善知伯。早死。乃立忌子驕爲君。以趙世

家證之。出公十七年。簡子卒而襄子代立。則與知伯分地之事。不當在襄子四年矣。凡諸侯稱出者。失國之詞。出公怒四卿之分地。而見逐於四卿。則分地必在出公之末年。或者分地在十七年。而奔齊道死。則在明年。故表得有十八年耳。繼出公而立者。據晉世家爲哀公驕。據趙世家爲懿公驕。據表爲哀公忌。世家以忌爲驕之父。表則有忌無驕。而正義引表云。出公錯十八年。哀公忌二年。懿公驕十七年。今檢表。自哀公元年。距幽公柳元年。凡十有九歲。疑今本脫去晉懿公驕元年六字。然與世家總不合。成侯十六年。與韓魏分晉。封晉君以端氏。案三家分晉。在敬侯十一年。晉之滅。已十有八年矣。或其君猶存。故封以一城。使臣於趙也。

武靈王二十五年。惠后卒。此惠后卽吳娃也。惠后未死之前。子何已立爲太子矣。後文云吳娃死。卽追敘此事。非死於傳位之後也。孝成二年。惠文后卒。此是惠文王之后。長安君之母。戰國策所謂趙太后也。索隱以此惠后爲前太子章之母。以惠文后爲吳娃。翻疑史記娃死之誤。可謂弗思甚也。

反高平根柔於魏。正義云。根柔未詳。根柔。戰國策作温枳。皆河內地名。

反陘分先俞於趙。注。徐廣曰。一作王公。王公疑三公之譌。常山郡元氏縣有三公山。

左師觸龍言。願見太后。戰國策作觸讐。合龍言爲一字。

老婦恃釐而行。東廣微言太后纔三十有奇者。以惠文王吳娃之子嗣位時尙幼。約在十歲以內。享國

三十三年而卒。其后之年，不過在四十內外也。古者夫歿稱未亡人，太后自稱老婦，不必計年之多寡。索隱以吳娃當之，不知娃之前死，史有明文也。

孝成王十五年，以尉文封相國廉頗，爲信平君。索隱云：尉文蓋地名，或曰尉文官名，謂以尉文所食之地封廉頗也。案漢書王子侯表：趙敬肅王子有尉文節侯丙，是尉文爲趙地審矣，或說非也。正義云：尉文蓋蔚州地。

魏世家

魏絳卒，證爲昭子。注：徐廣曰：世本曰莊子。索隱云：系本錯也。系本卽世本，避唐文皇諱。案左氏傳亦作莊子，則世本不誤。昭莊聲相近。

武堵爲秦所敗。年表作武都。據表，則武都二字當屬上句。城武都是一事，爲秦所敗又一事。

田敬仲完世家

殺高昭子晏孺子奔魯。晏孺子乃晏圉之誤也。使孺子果奔魯，安得遷之駘而殺之。當從齊世家爲是。伐衛，取母邱。索隱云：母音貫，古國名。今作母者，字殘闕爾。予謂母古貫字，與母音義俱別。史記多古字，故以母爲貫，非字之缺也。

田臣思曰：索隱云：戰國策作田期思，蓋卽田忌也。臣當作臣音怡，與期音相近。

孔子世家

孔子生魯昌平鄉陬邑。說文。鄆。魯下邑。孔子之鄉。从邑。不从阜。左氏傳亦作鄆。杜預云。鄆邑。魯縣東南。莖城是也。

鄆人輓父母。檀弓。輓作曼。曼輓聲相近。

趨詳之節。詳與翔同。

乃因史記作春秋。據魯親周。故殷運之三代。正義云。殷中也。又中運。夏殷周之事也。案。正義訓殷爲中。非也。春秋宣十六年。成周宣榭火。公羊傳。外災不書。此何以書。新周也。何休云。孔子以春秋當新王。上黜杞。下新周。而故宋。繫宣榭於成周。使若國文黜而新之。從爲王者。後記災也。又莊二十七年。杞伯來朝。何休云。杞夏后。不稱公者。春秋黜杞。新周而故宋。以春秋當新王也。漢儒說春秋者。謂孔子制春秋之義。以俟後聖王者。存二代之後。周監于夏殷。繼周者。當黜杞而存周。以備三統。故云據魯親周。故殷運之三代。據魯。謂以春秋當新王也。親周。故殷。謂新周。故宋也。當以殷字絕句。

子襄嘗爲孝惠皇帝博士。遷爲長沙太守。漢書孔光傳。作長沙太守。惠帝時。長沙爲王國。不得有太守。漢書云。太傅是也。

子襄生忠。案。上云。鮒弟子襄。此云。子襄生忠。是子襄爲鮒弟矣。漢書孔光傳。鮒弟子襄。襄生忠。則襄爲

鮒弟之子矣。孔光爲孔子十四世孫。鮒襄各爲一世。乃合十四之數。此文蓋衍一字。

陳涉世家

陽城人也。索隱云。韋昭云。陽城屬潁川。地理志屬汝南。不同者。案郡縣之名。隨代分割。陽城舊屬汝南。史遷云。今爲汝陰。句疑後又分隸潁川。韋昭據以爲說。故其不同。它皆放此。案漢書地理志。潁川汝南皆有陽城縣。而汝南之陽城。則爲侯國。宗室劉德所封。傳三世。至王莽敗而國除。故後漢志有潁川之陽城。無汝南之陽城。非本隸汝南而後分隸潁川也。小司馬讀史不子細如此。何怪後人。

外戚世家

武帝初卽位。史公書稱孝武曰。今上曰。今天子曰。天子無稱諡者。而此篇及賈生、李將軍、萬石君、主父、假、衛將軍、驃騎、汲、鄭、酷吏列傳皆有武帝卽位之文。此後人追改。酷吏傳敘寧成周陽由。皆稱武帝。其下敘趙禹。則云今上時。蓋追改又有不盡耳。

楚元王世家

嫂詳爲羹。盡櫟釜。索隱云。漢書作轉。音勞。櫟。轉聲相近。
削東海郡。漢初諸侯王國。大率兼數郡之地。郡之屬王國者。郡名似元未嘗廢。齊悼惠王獻城陽郡以爲魯元公主。湯沐邑。呂后割齊之濟南郡封呂台。琅邪郡封劉澤。吳王濞封有四郡五十餘城。景帝時。

削吳之豫章郡、會稽郡、削楚之東海郡、趙之河間郡、皆郡之屬於國者也。趙相周昌奏常山二十五城、亡其二十城、請誅守尉、則諸侯王國之郡、亦有守也。

齊悼惠王世家

獻城陽郡。正義云：括地志：濮州雷澤縣本漢城陽縣、後為郿也。此城陽國、非雷澤之成陽、辨見景帝紀。

孝文帝盡封齊悼惠王子罷軍等七人、皆為列侯。漢書高五王傳同案：漢書王子侯表、管共侯罷軍氏、邱共侯

寧國、營平侯信都楊、邱共侯安、楊虛侯將、閭勃侯辟光、安都侯志、平昌侯卬、武成侯賢、白石侯雄、渠皆

悼惠王子、以文帝四年五月甲寅同日封。此云七人、蓋十人之譌。

以白石侯。案：隱云：縣名、屬金城。正義云：白石古城在德州安德縣北二十里。案：金城郡、昭帝所置。此白

石當是齊地、非金城之白石也。正義近之。

曹相國世家

平陽侯曹參者。案：蕭何曹參皆以相國終。故目錄皆云相國、與陳丞相平、張丞相蒼一例也。而篇首一

云蕭相國何、一云平陽侯曹參、參不稱相國而稱侯、又與絳侯周勃同。然勃雖丞相、以列侯終、不可以

例參也。平津侯亦以丞相終、而目錄不稱丞相、與蕭曹諸人異矣。其篇首則云丞相公孫弘、若以蕭相

國書法例之、當云公孫丞相弘、不當繫姓於官之下。此皆史公義例之疏也。

柱天侯反於衍氏。小司馬本作天柱侯。故引廬江潛縣之天柱以實之。

周勃世家

轉擊項籍。攻曲逆最。漢書作曲逆。逆字誤。

梁孝王世家

梁餘尚有十城。漢書云。削梁王五縣。梁餘尚有八城。此云削梁八城。餘尚有十城。未詳誰是。或據漢志。梁國統八縣。以爲當從漢書。予以爲未然。蓋志所述者。平帝元始之郡縣。而梁平王削地。乃在武帝元朔中。相去百廿餘年。即以漢書本傳考之。則王立嗣位之後。削地千戶及五百戶者數矣。又削五縣。而餘尚有八縣。益知餘八城之說。未可信也。

地入于漢爲郡。案。漢志無濟川郡。亦不言濟川國所在。予嘗讀水經注。引應劭說。濟川。今陳畱濟陽縣是也。乃知陳畱郡卽濟川。故地志稱陳畱郡。武帝元狩元年置。不言故屬梁國者。史之闕也。濟川國除。在武帝建元三年。其時當爲濟川郡。至元狩初。移至陳畱。乃改爲陳畱郡爾。呂后時已有濟川國。乃齊之濟南郡。非梁地。說見呂

三王世家

御史臣光守尙書令。案隱云。奏狀有尙書令官位。而史闕其名耳。案。案隱說非也。光以御史守尙書令。

非別有一尚書令而失其名也。下文云太子少傅臣安行宗正事。云太僕臣賀行御史大夫事。皆與此一例。

續蕭文終之後於鄴。案隱云蕭何初封沛之鄴。音贊。後其子續封南陽之鄴。音嗟也。案說文鄴沛國縣。从邑。盧聲。與南陽之鄴。形聲俱別。漢志俱作鄴字。而南陽之鄴。孟康音讚。沛之鄴。應劭音嗟。當作嗟。或師古云。此縣本為鄴。中古以來。借鄴字為之。讀皆為鄴。而莽呼為贊治。則此縣亦有贊音。予謂沛郡之鄴。亦有贊音。乃由後來借鄴為鄴之故。非本音也。班孟堅十八侯銘云。文昌四友。漢有蕭何。序功第一。受封為鄴。是蕭何初封在沛之鄴。當讀才何切明矣。小司馬謂何初封沛。後嗣改封南陽。最為有據。特贊嗟二音正相違反。今永城縣東有鄴陽集。土人讀如嗟。即何所封也。

一子為朝陽侯。正義云。括地志。朝陽故城在鄧州穰縣南八十里。案漢書王子侯表。朝陽荒侯聖下。注濟南字。而地理志濟南郡朝陽縣。本是侯國。則此朝陽非南陽之朝陽也。濟南之朝陽。後漢稱東朝陽。

廿二史考異卷五

史記五

伯夷列傳

太史公曰。余登箕山。索隱云。蓋楊惲東方朔見其文稱余。而加太史公曰也。子長書每篇稱太史公。皆自稱其官。非他人所加。亦非尊其父也。賈生馮唐傳文亦有稱余而不加太史公者。

暴戾恣睢。索隱云。鄒誕生睢音千餘反。劉氏音休季反。按。睢睢二字形聲皆別。從劉音。字當从目。從鄒音。字當从且。小司馬兼存二音。而不辯正。何也。李斯傳。有天下而不恣睢。索隱止有呼季反一音。衆庶馮生。索隱云。鄒誕生作每生。每者。冒也。冒即貪之義。每冒聲相近。貪生之義。較馮爲長。

老莊申韓列傳。自序稱老子韓非列傳。不及莊申二子。

周守藏室之史也。索隱云。張蒼傳。老子爲柱下史。按。蒼傳但云秦時爲御史。主柱下方書。未嘗及老子。一本作張湯傳。尤誤。

注。服具勝實。具勝疑即巨勝也。

亢桑子之屬。亢桑即庚桑也。亢音剛。與庚聲相近。

又非吾敢橫失能盡之難也。失、古軼字。

則以爲鬻權。索隱云：韓子，粥權作賣重。賣當作賣。說文：賣，街也。讀若育。从貝，从齒，與賣字从出，从買者

不同。賣，鬻音義一也。

汎濫博文，則多而从之。韓子作米鹽博辨。天官書：凌雜米鹽。正義云：米鹽，細碎也。

胡，兄弟之國也。鄭：姬姓，胡歸姓。本婚姻之國。而云兄弟者，禮經：舅弟與兄弟有別。己之舅弟，與從父舅

弟，從祖舅弟，族舅弟，皆同姓之親也。若兄弟則兼異姓言之。喪服傳：小功以下，爲兄弟。而姑之子，舅之

子，亦稱外內兄弟。曾子問篇：昏禮既納幣，有吉日，而壻之父母歿，謂葬。壻之伯父致命，女氏曰：某之子

有父母之喪，不得嗣爲兄弟。正義云：壻於妻之父母有總服，故得謂之爲兄弟也。

鄭人襲胡，取之。按：春秋，昭公時，歸姓之胡國尙存，或滅而復立，或自有兩胡國也。

夫龍之爲蟲也。大戴禮：易本命篇：有鱗之蟲三百六十，而蛟龍爲之長。

皆原於道德之意。而老子深遠矣。按：申韓之學，皆自謂本於老子，而實失老氏之旨。史公自序，述其父

說：道德與名法各爲一家，而於此贊又明辨之。言其似同而實異也。說者譏韓非不當與老子同傳，蓋

未諭史公微旨。

孫子吳起列傳

後十五年。五當作三。

伍子胥列傳

費無忌爲少傅。索隱云。左氏作費無極。忌極聲相近。

遂滅鄒魯之君以歸。魯當作虜。音之譌也。左氏傳。邾子又無道。吳子使太子餘討之。囚諸樓臺。鄒即邾也。當云虜其君。轉寫或誤爾。一本滅作威。

縣吳東門之上。正義云。東門。鱗門。謂鯨門也。今名葑門。葑鯨聲相近。古音有重唇。無輕唇。故讀鯨如鱗。

仲尼弟子列傳

靈公太子蒯聵。衛世家作蒯聵。說文頁部。額字云。頭蔽額也。蔽正字。蒯俗字。黃通用字。

乃下石乞壺繫。左氏。壺作孟。孟壺聲相近。

爲武城宰。正義云。括地志云。在兗州。卽南城也。輿地志云。南武城縣。魯武城邑。今刊本講作武邑城。子游爲宰者也。

按。武城卽曾子所居之南武城。索隱云。當時魯襲有北武城。故言南也。亦謂之南城。續漢書。郡國志。南城縣有東陽城。春秋哀八年傳。吳師伐武城。克之。又云。吳師克東陽而進。東陽在南城。則南城卽武

城矣。

子夏居西河教授。正義云。竭泉山一名隱泉山。在汾州堰城縣北四十里。按。汾州無堰城縣。蓋隰城之

譌。隋書地理志。隰城縣有隱泉山。此竭泉當作謁泉。謁隱聲相近也。

正義云。九二甲寅。木爲世。立五景行。水爲應。

立當作六。景行當作景子。景即丙字

此注譌舛難讀。今以意推

衍之外卦艮土。內卦乾金。外象生內象也。子水爲世。寅木爲應。應生世也。內乾爲父。外艮爲子。純陽之卦。內象本艮一陽。變乾三陽。外象艮一陽。凡得五陽爻。故生五丈夫子。內艮一陽不見。故一子短命。

商君列傳

注。周室歸藉。索隱云。藉音胙。字合作胙。誤爲藉耳。予謂藉胙聲相近。

蘇秦列傳

秦兵不敢闕函谷關十五年。

說者以此語爲從人夸誕之詞。然張儀說楚王云。秦所以不出兵函谷十

五年以攻齊趙者。陰謀有吞天下之心。其說趙王。亦云大王收率天下以賓秦。秦兵不敢出函谷關十

五年。則當時果有其事矣。蘇秦從約之成。在趙肅侯十八年。又十五歲。則趙武靈王之九年也。是歲張

儀始以連衡說魏。此十五歲之中。秦惟出兵攻魏。聞一擊韓。不聞及他國。迨五國擊秦之師不勝。在趙

王八而後張儀得以說破之。則合從不爲無功矣。謂蘇秦去趙而從約皆解。亦未盡然。

夫齊者。固寡人之深讐。

按。燕王噲之時。齊與燕未有深讐也。蘇代此說。必在昭王時。故稱齊滑王爲長

主。且有南面舉宋之語。

滑王即位三十八年而滅宋。其年必已長矣。故有長主之稱。

若移此段問答於昭王召蘇代復善遇之之下。

則詞有倫次矣。

我下軹道南陽。道非地名。蓋謂下軹之後。取道南陽耳。徐廣以霸陵之軹道當之。固誤。小司馬謂道爲衍字。亦非也。

張儀列傳

卒起兵伐蜀。十月取之。按秦本紀及年表。伐蜀乃惠王後九年事。此傳敘於惠王十年以前。則誤以爲前九年矣。

樗里子甘茂列傳

秦惠王二十五年。按年表。在惠王後十二年。此云二十五者。并前十三年數之。助魏章攻楚。魏章卽秦本紀之庶長章也。

白起王翦列傳

後七年。白起攻楚。拔鄢鄧五城。按年表。在昭王二十八年。其拔趙光狼城。卽在前一年。此云後七年。與表異。

趙孝成王與平陽君平原君計之。索隱云。平陽君未詳何人。平陽君。趙豹也。見趙世家。孟子荀卿列傳

退而與萬章之徒索隱云。孟子有萬章公明高等。蓋竝軻之門人也。按公明高非孟氏弟子。廣韻以離婁爲孟子門人。其誤亦類此。

始也濫耳。索隱云。濫卽濫觴。是江原之初始。故此文義以濫爲初也。按小司馬說非也。詳上下文義。似謂衍之說。始雖泛濫。而要歸於仁義節儉耳。司馬相如傳云。相如雖多虛濫說。然其要歸引之節儉。語意正相類。

懼然顧化。懼卽瞿字。

平原君虞卿列傳

公等錄錄。索隱云。說文云。錄錄。隨從之貌也。按說文本作錄。云隨從也。故王邵以錄爲借字。與魏齊間行。卒去趙。困於梁。王懋竝曰。范雎以秦昭王之四十一年爲相。魏齊卽以是年奔趙。匿平原君所。四十二年。誘執平原君。魏齊與虞卿亡走魏。後五年。秦破趙長平。則昭王之四十七年。而周赧王之五十五年也。唯傳所敘甚詳。及考虞卿傳。卿爲趙計事。皆在長平後。與唯傳不合。故古史考疑魏齊歟後。虞卿復歸相趙。然如所云。則史窮愁著書之言。亦無當矣。通鑑敘誘執平原君事於赧王之五十六年。則與卿傳合。然秦以五十六年正月罷兵。其歲九月。又攻邯鄲。此數月之中。秦未必能誘致平原君。而平原君亦未必敢往。與古史所云。未知孰是。

春申君列傳

黃濟陽嬰城。正義云。嬰城未詳。按下文又云許鄆陵嬰城。皆謂嬰城自守。不敢戰也。正義誤以爲地名。

故云未詳。黃卽陳留之外黃。

沒利於前。沒與昧同。趙世家。昧歿以聞。戰國策作沒歿。

范雎蔡澤列傳。按秦本紀。六國表不見二人名。

至今閉關十五年。不敢闕兵於山東者。范雎說秦。在昭王卅六年。是時秦用白起破趙魏及楚者屢矣。

而穰侯方出兵攻綱壽。安有閉關十五年之事。

昭王乃遣趙王書曰。王之弟在秦。是歲昭王四十二年。卽趙孝成王之元年也。平原君爲惠文王之弟。

於孝成爲叔父。惠文已歿。不當更稱弟。

號爲綱成君。水經注濕水篇云。于延水又東。逕岡城南。按史記。蔡澤。燕人也。謝病歸相秦。號綱成君。疑

卽澤所邑也。世名武岡城。

廉頗藺相如列傳

趙惠文王十六年。廉頗爲趙將。伐齊。大破之。取晉陽。按六國表。惠文十五年。取齊昔陽。卽樂毅破齊之

歲也。此傳與世家皆作十六年。疑誤。表與世家皆作昔陽。而此則晉陽。索隱又作陽晉。

秦破趙，殺將扈輒於武遂城。趙世家作武城，武遂在燕趙之交，秦兵未得至其地，恐因上有武遂方城之文，誤衍遂字耳。

田單列傳

得之太史燉之家，世家燉作敷。

號曰安平君。史不敘其後事，考趙世家，孝成王元年，齊安平君田單將趙師，而攻燕中陽，拔之。二年，田單爲相，卽齊王建之元年也。豈襄王旣沒，單遂去齊而入趙乎？

魯仲連鄒陽列傳

今齊潛王已益弱，此時距齊潛王之歿已二十餘年矣。文云今齊潛王，似其人尙存。

齊潛王將之魯，據世家，則之魯之鄒兩事俱在失國之後。

齊田單攻聊城歲餘，注徐廣曰，案年表，田單攻聊城，在長平後十餘年也。按六國表無田單攻聊城事。

惟燕武成王七年，書田單拔中陽，乃在長平前五年，又非聊城，或疑徐廣之誤。今細釋徐氏文義，特以

仲連遺書有粟腹事，推檢時代，當在長平後十餘年，以正史公云二十餘年之誤，非謂年表有田單事

也。仲連遺書之燕將，必非與樂毅同時，蓋其事在燕王喜之世，別有以偏師下齊城，懼讒不敢歸者，不

用仲連之言，以至身歿城屠。史公所書較之戰國策爲得其實矣。吳師道謂田單相趙之後，必不復返

齊亦恐未然。孟嘗君相秦而歸，復爲齊相，此其證也。

屈原賈生列傳

爲楚懷王左徒。黃歇由左徒爲令尹，則左徒亦楚之貴臣矣。

不獲世之滋垢。滋與茲同。說文：茲，黑也。春秋傳：何故使我水茲。

大破楚師於丹淝。淝當作浙。楚世家作丹陽。

殺其將唐昧。正義云：昧，莫葛反。呂氏春秋作唐蔑。漢書古今人表同古文昧蔑通。

章畫職墨兮。索隱云：楚詞職作志。職與識通。周官：職方氏，漢華嶽碑作識方是也。志卽識之古文。見周禮注

伯樂既歿兮。驥將焉程兮。程讀如秩。與匹爲韻。書：平秩東作。史記作便程。

方正倒植。植與置同。論語：植其杖而芸。漢石經作置。

聽九州而相君兮。索隱云：漢書作歷九州。聽當讀如離。離歷聲相近。

單閼之歲兮。注：徐廣曰：文帝六年歲在丁卯。按：漢書律厯志：高帝元年歲名敦牂，太初元年歲名困敦。

以是推之。單閼之歲當是文帝七年。徐氏不知古有超辰之法，故云六年也。

化變而嬗。轉也。嬗作嬗。蓋从韋昭本訓而爲如。嬗爲嬗也。

大專槃物兮。索隱云：漢書曰：大鈞播物。此專讀曰鈞。槃猶轉也。專與鈞聲相轉。舌齒異音，而均爲出聲。

此假借之例也。槩讀爲般。補完切。般播聲相近。

攔如囚拘。索隱云。說文云。攔。大木柵也。按。說文無攔字。索隱殆誤也。漢書作儻。而蘇林音欺全反。卻與

園音相近。

好惡積意。注。李奇曰。所好所惡。積之萬億也。意當作愆。說文。愆。滿也。一曰。十萬曰愆。

細故鬱薊兮。薊不成字。當作薊。薊芥聲相近。故漢書作芥。

呂不韋列傳

子楚夫人。趙豪家女也。蓋不韋資助之。遂爲邯鄲豪家。

刺客列傳

曹沫者。魯人也。索隱云。沫音亡葛反。左氏穀梁竝作曹劌。然則沫宜音劌。按。說文。沫。从末。讀莫葛切。與

沫。从末。讀荒內切。本是兩字。小司馬溷而爲一。非也。劌字宜讀如鬱聲。噦噦之噦。呼熹切乃與沫音相

近。

與韓相俠累有郤。索隱云。俠音古挾反。俠累合爲傀音。

將用爲夫人。蘇樞之費。正義本作大人。注中夫人字。皆大人之譌。下文家丈人召使前。索隱引韋昭說。

古者尊父。媼爲丈人。又引漢書宣元六王傳古詩丈人故言遲證之。則小司馬所見漢書。與今本異也。

李斯列傳

衛君殺其父而衛國載其德孔子著之不為不孝春秋衛石曼姑帥師圍戚公羊以為伯討孟子書稱衛君輒為孝公故趙高為此言然崩贈未嘗死於輒輒亦無德可載也

司城子罕相宋身行刑罰以威行之期年遂劫其君韓子二柄篇云子罕謂宋君曰夫慶賞賜予者民之所喜也君自行之殺戮刑罰者民之所惡也臣請行之於是宋君失刑而子罕用之故宋君見劫又人主篇云宋君失其爪牙於子罕簡公失其爪牙於田常高誘注呂覽亦云子罕殺宋昭公考宋世家不載子罕事據左氏傳司城子罕乃宋之良臣仕平公朝初未劫君也但樂氏世為司城或子罕之後豈有專政劫君者事在春秋以後故戰國漢初人多言之鄒陽傳宋聽子罕之計而囚墨翟漢書作子母亦此子罕也

與宦者韓談 太史公父名談如李談趙談之屬皆改稱同同談亦取聲相近此韓談獨不改何也滑稽傳云談言微中司馬相如傳因斯以談皆不避談字

蒙恬列傳

秦穆公殺三良而處罪百里奚而非其罪也故立號曰繆據此則秦繆公之謚當讀如謬所謂名與實爽曰繆也蒙恬秦人其言必有所自

張耳陳餘列傳

范陽人蒯通。此范陽注家不詳所在。師古以涿郡之范陽實之。因謂通本燕人。後游於齊。此不考地理而妄爲之說也。方武臣等自白馬渡河。纔下十城。安能遠涉燕地。且范陽旣降之後。趙地不戰而下者。三十餘城。然後乃至邯鄲。武臣乃自立爲趙王。然後命韓廣略燕地。豈容未得邯鄲之前。已抵涿郡乎。然則蒯通所居之范陽。當屬何地。曰。淮陰侯傳稱齊人蒯通。又稱爲齊辨士。則范陽必齊地矣。漢志東郡有范縣。此卽齊之西境。孟子自范之齊。謂此地也。趙世家云。嬴姓將大敗周人於范魁之西。小司馬謂范魁趙地。然則此范陽蓋在齊趙之界。本齊地。而亦可屬趙也。

淮陰侯列傳

走入城泉。城當作成。下同。

信遂追北至城陽。正義云。城陽。雷澤縣。是在濮州東南九十一里。此城陽是齊地。非濮州之成陽。鍾離昧家在伊盧。注。徐廣曰。東海胸縣有伊盧鄉。按續漢書郡國志作伊盧。注引史記亦作盧字。盧盧。古多通用。今江西廬陵縣。土人讀如盧音。

狡兔成。良狗亨。小司馬本狡作郊。與吳越春秋同。

陳豨拜爲鉅鹿守。此時鉅鹿屬趙國。豨蓋以趙相國兼鉅鹿守也。漢初王國所領之郡亦置守。

韓王信盧綰列傳

陳豨者宛胸人也。索隱云地理志屬濟陰。按地理志作宛句。濟陽本梁地。故史公稱爲梁人。

高祖七年冬韓王信反入匈奴。上至平城還。迺封豨爲列侯。按功臣侯表高祖六年正月豨之元年也。

又云已破臧荼封豨爲陽夏侯。則豨之侯在平城前矣。

樊鄴滕灌列傳

漢王賜噲爵爲列侯。號臨武侯。正義云桂陽臨武縣也。按戰國之際趙有臨武君。未必遠取桂陽之臨

武也。

以將軍從擊荼戰龍脫。索隱云其地闕。按趙世家孝成王十九年以龍兌汾門臨樂與燕。龍脫卽龍兌

也。脫亦有兌音。

劉敬叔孫通列傳

欲遣長公主呂后日夜泣。案張敖尙魯元公主在高帝困平城之前。彼傳云高祖從平城過趙。趙王朝

夕上食。有子堵禮。可證也。婁敬進說乃在平城以後。詎有奪趙王后以妻單于之理乎。此事未可信。

季布欒布列傳

爲氣任俠。注俠。粵也。索隱云粵音普名反。其義難喻。按說文。粵。俠也。三輔謂輕財者爲粵。

袁盎鼂錯列傳

袁盎騎竝車擊轡上曰將軍怯邪。盎時爲中郎將文帝稱爲將軍後爲吳相歸說丞相申屠嘉嘉曰鄙野人乃不知將軍幸教灌夫嘗爲中郎將史亦稱灌將軍此中郎將稱將軍之證也子又考漢時稱人爲將軍特尊重之稱不必實指其官如灌夫稱田蚡爲將軍蚡乃丞相也程不識李廣以衛尉而稱將軍衛尉本典兵之官

死十餘日吳楚七國果反錯父死才十餘日而錯衣朝衣如故則錯初未行一日之喪也刑名之學其弊乃至於此翟方進喪後母三十六日而起視事猶爲彼善於此也

噤口不敢復言也漢書噤作柑柑噤聲相近皆羣母

時鄧公免起家爲九卿漢書公卿表無鄧公名

張釋之馮唐列傳

堵陽人也正義云應劭曰哀帝改爲順陽水東南入蔡括地志云順陽故城在鄧州穰縣西三十里楚之郟邑也及蘇秦傳云楚北有郟陽竝謂此也按堵陽與順陽非一地兩漢志皆有堵陽縣屬南陽郡哀帝改順陽爲博山以封孔光不聞又改堵陽爲順陽也應劭謂順陽在順水之陽此云水東南入蔡者當謂順水也蘇秦傳注引括地志順陽故城在鄧州穰縣西百四十里與此注亦小異古書未聞以

順陽爲堵陽者。正義之說。蓋出於水經注。此酈氏誤爾。水經注清水篇堵陽地理志曰。後漢書朱祐傳。注。堵陽故城在今唐州方城縣。方成今裕州也。豈得與順陽溷而爲一乎。

陵遲而至於二世。漢書作陵夷。平準書。選舉陵遲。漢志亦作夷。司馬相如傳。陵夷衰微。漢書作遲。古文夷與遲通。詩。周道倭遲。韓詩作郁夷。淮南原道訓。馮夷大丙之御。高誘云。夷或作遲。婁壽碑。徧復衡門。卽栖遲也。說文。遲或作迤。从彳。尸。古文夷字。

從行至霸陵。居北臨廁。注。李奇曰。霸陵北頭廁近霸水。如淳曰。居高臨垂。邊曰廁也。蘇林曰。廁。邊側也。索隱云。劉氏廁音初吏反。包愷音側。義亦兩通。予謂廁卽側字。側旁从人。隸變爲尸。與廁圍字从尸者不同。劉伯莊音初吏反。小司馬以爲義可兩通。蓋廁廁兩字。唐以前已相溷矣。

萬石張叔列傳

慶方爲丞相。諸子孫爲吏。娶至二千石者十三人。按。褚先生敘。田仁制舉三河河東太守。石丞相子孫也。石氏九人爲二千石。方盛貴。仁數上書言之。其後三河太守皆下吏誅死。此在慶已沒之後。

田叔列傳

谷口蜀剗道近山。剗道者。棧道也。

扁鵲倉公列傳

秦策於是出。趙世家作秦識。識策聲相近。

嬴姓將大敗周人於范魁之西。正義云。賈逵云。月阜曰魁。

月蓋川之譌。趙世家正義引郭景純注。爾雅

云。漢原在汾陰者。人壅其流。以爲陂種稻。呼其本出處爲漢魁。又漢書王子侯表有劇魁侯。葛魁侯。皆

取川阜爲名。

案杭毒熨。索隱云。杭音玩。謂按摩而玩弄身體使調也。杭當作玩。从手从元。轉寫譌爲杭耳。

太倉公者。齊太倉長。孝文紀作太倉令。意之名無所避。而文紀稱淳于公。又稱太倉公。目錄亦稱倉公

而不名。蓋當時有此稱。史公因而書之。

吳王濞列傳

趙王有罪。削其河間郡。索隱云。案漢書作常山郡。今考文帝二年。取趙之河間郡。討趙王遂弟辟疆爲

王。傳子福。無後。國除入于漢。則河間之屬漢。乃在文帝時。非以罪削也。楚元王世家亦云。削趙王常山

之郡。此傳誤。

魏其武安侯列傳

父世。觀津人。索隱云。言其累葉在觀津。故云父世也。予謂世者。嬰父之名。

程李俱東西宮衛尉。注。漢書音義曰。李廣爲東宮。程不識爲西宮。按。不識爲長樂衛尉。長樂宮。太后所

居在未央之東。故云東朝。是程東宮。李西宮也。樗里子葬渭南章臺之東。長樂宮在其東。未央宮在其西。此東西宮之證。

韓長孺列傳

御史大夫韓安國者。安國以御史大夫病免。復起爲他官。以卒。篇首仍書御史大夫。亦變例。

梁城安人也。正義云。括地志云。成安屬潁川郡。陳留郡又有城安縣。亦屬梁。未知孰是也。按。城安之城。

當作成。漢志。陳留潁川二郡者有成安縣。而陳留爲梁故地。潁川爲韓故地。史稱梁成安。則爲陳留之。

成安無疑。潁川之成安。本郟縣地。武帝封韓千秋子延年爲侯國。

禪取辱耳。注。徐廣曰。禪一作祗。按。漢書亦作祗。易坎不盈。祗既平。京房本作禪。說文亦同。蓋禪祗古通。

用也。古書是與氏同。

衛將軍驃騎列傳

將軍公孫賀。公孫賀李蔡皆官至丞相。而以將軍目之。蓋漢人以將軍爲重。且諸人皆從衛霍立功。其

在相位。初無表見。故但稱將軍而已。

以浮沮將軍出五原。按。匈奴傳。賀將萬五千騎。出九原二千餘里。至浮苴井而還。浮苴卽浮沮。蓋以地

名。趙破奴爲匈奴浚稽將軍。李廣利爲貳師將軍。亦其類也。

七爲將軍。七當作五。

平津侯主父列傳

齊菑川國薛縣人也。漢志薛縣屬魯國。不屬齊與菑川。說者引儒林傳稱平津爲薛人。既云薛人。則上

言齊菑川者誤耳。予考本傳。元光元年。有詔徵文學。菑川國復推上弘。弘謝國人。國人固推之。則平津

爲菑川人無疑。菑川本齊之故地。故汲黯詰弘云。齊人多詐。而無情實。史言菑川又言齊者。當時通俗

之稱。扁鵲言臣齊勃海。秦越人也。言勃海又言齊。與此一例。非史之誤。漢書無齊字。班氏所刪。漢志菑川國祇有

三縣。無薛縣。然高五王傳。青州刺史奏菑川王終古禽獸行。請逮捕。有詔削四縣。安知薛縣不在所削

之內乎。且漢志所載郡國領縣若干。皆元成以後之制。王國大者僅十餘縣。小者三四縣。如蠡吾故屬

河間。良鄉。安次。文安。故屬燕。涇城。故屬趙之類。賴有列傳。略見一二。未可據志以駁傳也。

地固澤鹹鹵。漢書無鹹字。疑衍。

是時趙人徐樂。漢書樂燕郡無終人。

又使尉佗屠睢。漢書無佗字。疑衍。

南越尉佗列傳

取邯鄲。穆氏女。穆當作穆。从手旁。

立明王長男越妻子術陽侯建德爲王。注：徐廣曰：元鼎四年，以南越王兄越封高昌侯。按：徐說非也。功臣表：術陽侯建德，以南越王兄越高昌侯封。是高昌乃南越私號，及降漢之後，始受術陽之封耳。史舉其後封號書之。

東越列傳

世俗號爲東甌王。封禪書：越人勇之，言東甌王敬鬼，壽至百六十歲，卽東海王搖也。天子問太尉田蚡。按：建元二年，蚡已罷太尉矣。此時蓋以列侯奉朝請，武帝猶以前官稱之。不戰而耘。注：徐廣曰：耘義當取耘除，或言耘音于粉反。此楚人聲重耳。惠棟曰：此耘字之誤。漢書作隕，耘與隕通。左氏成二年傳：隕子辱矣。說文引作耘。耘古字。隕今字。徐氏耘除之義失之。

朝鮮列傳

朝鮮相路人相韓陰。漢書作韓陶。

降相路人之子最。案降字當連上爲句。長降，右渠子名也。功臣表作長降，路姑落切。與降聲相近。小顏注：漢書謂相路人前已降漢，而死于道，故謂之降相。此妄之甚也。下文長爲幾侯，長下亦當有降字。陰爲菽苴侯。索隱云：菽音秋。漢書本傳作秋苴，而功臣表作菽苴。師古音狄。史記表亦作未知孰是。最以父死，頗有功，爲溫陽侯。溫陽當從表作涅陽。漢書亦作涅陽。

司馬相如列傳

璊玳元厲。說文玲璊石之次玉者。卽此璊玳也。

諸蔗搏且。漢書作巴且。卽巴蕉也。巴與搏且與蔗聲皆相近。

則生蕨斯苞荔。漢書蕨作析。文選作荇。析斯聲相近。釋艸云荇蔓。大薺說文作析。

兕象野犀窮奇獲擬。漢書無此八字。文選同獲擬卽上文蠻蜒窮奇象犀則上林賦有之。當是後人妄增。

儵聊淒淒。漢書淒作情。淒情聲相近。

粉粉排排。排卽斐字。說文粉斐皆長衣兒。

罔瑋瑋。瑋瑋字重出。

何爲無用應哉。漢書用作以。以用聲相近。

洶涌滂潰。漢書作彭湃。滂與彭潰與湃聲皆相近。

澎溥沆漚。漢書澎作滂。滂澎聲相近。

蕨橙若蓀。漢書橙作持。持橙聲相近。韋昭曰持音懲。小顏破持爲苻。非。

巖突洞房。索隱云突音一弔反。文選突作窾。漢書字譌爲突。小顏謂若窾突狀。非也。

華汜辟墟。漢書汜作楓。辟作枰。皆聲相近。

留落胥餘。漢書作胥邪。邪餘聲相近。郭景純不詳留爲何物。按釋木。劉。劉杙。注。劉子生山中。實如梨。即此留也。

連卷累倦。漢書累作攪。攪累聲相近。

紛容蕭參。鄭司農注考工記。引作紛容掣參。漢書容作溶。蕭作蒨。

旖旎從風。說文無旖旎字。漢書作猗柅。當從之。張揖訓爲阿那。亦取聲相近。

被函文。漢書函作斑。斑函聲相近。

藝殪仆。注。徐廣曰。射準的曰藝。說文。臬。射準的也。周禮。匠人建國水地以縣。置槩以縣。鄭康成謂槩古

文臬。假借字。亦借用藝字。春秋傳。陳之藝極。注。藝。準也。

巴兪宋蔡。淮南子遮。巴兪當作嘒。說文。引司馬相如說。淮南宋蔡。歌舞嘒。正據此賦。蓋以宋蔡嘒

喻與淮南子遮對文也。許叔重生於漢時。所見本當不誤。嘒巴聲相近。故或作巴兪。郭景純以巴淪舞

當之。非是。

眇閭易以戍削。漢書戍作恤。閭易猶姚易也。出史

媯媯徹循。漢書作便柵。媯媯。便媯與媯媯聲相近。說文無徹循字。當從漢書。

變正朔。漢書變作革。聲相近。

用興法誅其渠帥。晉書刑法志。魏文侯時。李悝著法經六篇。蕭何又益興廢戶三篇。愈邈絕而不齊兮。此下五句。漢書無之。

斷征北僑。北當作伯。
衍曼流爛。壇以陸離。漢書。壇作疹。說文。寘多穀也。詩。擘擘駱馬。說文引作疹疹。寘多聲相近。故壇或為疹。

媮侵溼而高縱兮。漢書。媮作儻。儻媮聲相近。媮讀如檢。徐音熾。非也。說文尋字旁从彳。隸變與水相亂。涉豐隆之滂沛。漢書。沛作溲。溲沛聲相近。

視眩眠而無見兮。漢書。眠作泯。眩眠即瞑眩也。泯眠聲相近。淇恩蒙涌。漢書作厖洪。古音厖如濛。

終都攸卒。注。漢書音義曰。都於卒終也。都於釋詁文。
首惡湮沒。漢書。湮作鬱。鬱湮聲相近。

獲周餘珍。收龜於岐。漢書無珍字。
蓋號以況榮。蓋讀如盍。文穎訓為合。合號猶言合符也。小顏以為語辭。似迂。或謂且天為質開。漢書開下有市字。屬下讀。

君乎君乎。漢書乎作兮。兮乎聲相近。

淮南衡山列傳

宗正臣逸。廷尉臣賀。備盜賊中尉臣福。漢書公卿表無此三人名。

先要成皋之口。正義云。成皋城在河南滎水縣東南二里。滎水蓋汜水之譌。

日夜從容王。從容。漢書作縱。與。與。讀曰勇。縱。與。謂獎勵也。與容聲相近。鬼與區亦作鬼容區。

日夜從容勸之。從容。漢書作將養。師古讀將為獎。將養亦縱與之轉也。從當讀子容切。

汲鄭列傳

其餽遺人。不過算器食。注。徐廣曰。算。竹器。算與匱同。士冠禮。爵弁皮弁。緇布冠。各一匱。注。匱。竹器名。古

文匱為篡。說文。匱。淥米數也。

儒林列傳

於趙自董仲舒。仲舒廣川人。而稱趙者。廣川故趙地也。公孫丞相菑川人。而云齊人。朱買臣會稽人。而

云楚士。亦此類。

太皇竇太后。當云竇太皇太后。

及徐氏弟子公扈滿意。公羊傳有公扈子。公扈疑即公扈也。

酷吏列傳

乃拜都爲濟南太守。據漢表都自濟南太守遷中尉。在景帝前七年。而郡守更名太守。乃在景帝中二年。則其時不得稱太守也。太字衍。

與汲黯俱爲伎司馬安之文惡。俱在二千石列。同車未嘗敢均茵伏。索隱云。言二人與由同載一車上。不敢與之均茵。謂下之也。予謂小司馬說非也。司馬安以黯姑姊子。同時仕宦。由重黯而輕安。或時與安俱出。不得已與安同車。然亦恥與均茵伏。所謂伎也。當以與汲黯俱爲句。爲伎二字屬下句。文義方安。班史脫去與俱兩字。注家因謂黯安二人皆畏由。不敢與均。失之遠矣。漢書伏作馮。古人讀伏如匄。與馮聲相近。王吉傳馮式擡銜。卽戰國策之伏軾擡銜也。碧落文亦以凭當伏字。

劾鼠掠治傳爰書。注蘇林曰。傳謂傳囚也。予謂傳蓋傳字之譌。傳讀曰附。謂附於爰書。家兩子夾河爲守。夾河謂河內河南也。褚先生敍田仁刺舉三河。是時河南河內太守皆御史大夫杜父兄弟。卽此所云夾河爲守者也。

大宛列傳

奄蔡正義云。漢書解詁云。奄蔡卽闐蘇也。蔡有欒音。經典多以蔡代欒字。與蘇聲相近。而樓蘭姑師小國耳。注徐廣曰。卽車師。車姑聲相近。

烏孫命頭。命頭漢書作命臺。臺頭聲相近。

游俠列傳

田仲王公劇孟。王公即王孟。

藏命作姦。索隱云。案謂亡命也。予謂命者名也。藏命猶言匿名。

與人飲使之嚼。注徐廣曰。音子。妙反。盡酒也。嚼與醕同。說文醕。飲盡酒也。續漢書五行志。嚼復嚼者。京

都飲酒相強之詞也。

東道趙他羽公子。索隱云。舊解以趙他羽公子爲二人。今按此姓趙。名他羽。字公子也。予以上下文證

之。則舊解爲是。春秋傳。鄭穆公之後有羽氏。

佞幸列傳

仁寵最過庸。不乃甚篤。予謂不乃者。不能也。乃能聲相近。言周仁寵過於常人。猶不能甚篤。以見景帝

之無寵臣也。

滑稽列傳

威王八年。楚大發兵加齊。按世家及表。是年齊楚無交兵事。此傳之言。多不足信。

其後百餘年。楚有優孟。優孟事楚莊王。在淳于髡前二百餘年。此傳云在髡後百餘年。乃躡駁之甚者。

而小司馬未及舉正何也。

銅歷爲棺。索隱云。歷卽釜鬲也。歷卽屨字。說文。鬲或作屨。

日者列傳

獵纓正襟危坐。索隱云。獵攬也。獵攬聲相近。

比周賓正。賓讀曰擯。六國表。諸夏賓之。張儀傳。大王收率天下以賓秦。皆擯棄之義。

天人家曰小吉。太一家曰大吉。天人家不見於藝文志。或云當作天一。藝文志。五行三十一家。有一

六卷。秦一二十九卷。

龜策列傳。張晏謂龜策傳有錄無書。褚先生言。臣往來長安中。求龜策列傳不能得。然此篇有今上卽

位之文。其詞非褚先生所能作。

宋元王二年。宋世家有元公。而無元王。宋之稱王。自偃始。此元王。或卽王偃之譌。王偃雖戰勝攻取。尋

卽亡滅。暴而不德。非靈龜所能祐也。

規矩爲輔。副以權衡。按。魏相奏事。言東方之神。執規司春。南方之神。執衡司夏。西方之神。執矩司秋。北

方之神。執權司冬。此云規矩權衡。指四方而言。并四維爲八卦。此遁甲式。今人所云奇門也。

視其吉凶。介蟲先見。此冬至後壬子日庚子時也。子爲夜半。宿在牽牛。冬至候也。甲子爲旬首。在巽宮。杜門爲使時。加

子。子爲玄武。其占爲介蟲。

桀有諛臣。名曰趙梁。桀臣趙梁。紂臣左彊。本紀皆無之。

貨殖列傳

積著之理務完物。著古貯字。說文。寧訓辨積物。是積貯本字。而寧與著通。詩。俟我於著乎。而卽當寧之寧。此又通爲積寧之寧。

白圭曰。吾治生產。猶伊尹呂尙之謀。孫吳用兵。商鞅行法。按。白圭當魏文侯時。而商鞅佐秦孝公。

卽位。距魏文侯薨已二十五年矣。不得如史所言。

江南卑溼。丈夫早夭。賈生傳言長沙卑溼是也。

豫章出黃金。長沙出連錫。卽上文所謂江南出金錫連也。篇中江南。皆謂豫章長沙南楚之地。非今之

江南

果隋贏蛤。正義云。隋今爲搖音同。上古少字也。果搖猶搖疊包裹也。案。說文無隋字。蓋卽隋之省文。索

隱讀爲徒火切者是也。漢書作菘音。與隋相近。正義妄引果搖方言。輒詆班氏。可謂詭之甚也。

以故皆虛。說文作啍。从兩口。與皆苛字不同。

封者食租稅。歲率戶二百。千戶之君。則二十萬。按。漢書。富平侯張安世。國在陳留。別邑在魏郡。租入歲

千餘萬子延壽嗣上書讓減戶邑徙封平原并一國戶口如故而租稅減半然則漢時戶口租稅固有
多寡之殊史公云歲率戶二百者舉其大略耳又匡衡封僮之安樂鄉鄉本田提封三千一百頃南以
閩陌爲界初元元年郡圖誤以閩陌爲平陸陌多四百頃以是推之列侯封戶雖有定數要以封界之
廣狹定租入之多寡故有戶口同而租稅異者

醴爵千坂索隱云坂音閑江反 坂當作坂說文坂似壘長頸受七升讀若洪

本器髻者千枚 髻當作鬢說文鬢髮也

馬蹄躐千注躐苦弔反馬八膠 按說文無躐字徐解爲馬八膠八膠即尼骨則躐乃躐之異文漢書躐

作躐故小顏訓爲口

寧爵母刁古音爵與醮近服虔左傳解誼云爵者醮也所以醮盡其材也見驪元年正義此以刁爵合韻亦讀

爵如醮

酒削薄技也 予謂削讀若濬說文濬所以灑水也引漢律及其門首洒濬即邳氏之洒削

太史公自序 自史公有自序一篇而班孟堅司馬彪亦稱華溥稱譜敘見三國志注沈約魏收李延壽之徒各爲

敘傳承祚先世仕蜀不顯爵宗與漢年代隔越故不立此篇蕭子顯齊豫章王嶷之子其傳贊云烈考

云我王與它篇異但傳中竟不列己名則又矯枉過直矣姚思廉陳書於父傳末略述已修史事而不

稱敘傳亦不及入唐以後事。於體例最爲得之。唐宋以來設立官局。史非一人一家之書。故無敘傳之名矣。

談爲太史公。按太史公是官名。遷父子世居其職。衛弘漢人。其言可信。而後人多疑之。予謂位在丞相上者。謂殿中班位在丞相之右。非職任尊於丞相也。虞喜謂朝會坐位猶居公上。蓋得之矣。子長自言天下遺文古事。靡不畢集。太史公與漢儀注云。天下計書先上太史公者正合。史記一書。惟自序前半稱太史公。及封禪書兩稱太史公指其父。餘皆遷自稱之詞。小司馬小顏以爲尊其父者非矣。有省不省耳。按爾雅。省善也。有省不省。猶言有善有不善。

竊觀陰陽之術。大祥注。徐廣曰。一作詳。索隱云。漢書作大詳。今此作詳。於義爲疏。予謂古書詳詳通用。易視履考祥。釋文云。本亦作詳。書呂刑告爾祥刑。後漢書劉愷傳注引作詳刑。鄭康成注。詳君爽其終。審察之也。出於不祥。漢石經本。祥爲詳。小司馬譏祥義爲疏。是未識古文也。

實不中其聲者。謂之竅。注。徐廣曰。音款。空也。漢書竅作款。款空聲相近。莊子導大竅。向秀讀竅爲空。厄困鄙薛彭城。漢書鄙作蕃。

卒三歲。而遷爲太史令。令當作公。正義文可證。

孔子卒後。至於今五百歲。按孔子卒於魯哀公十六年。至漢武帝太初元年。凡三百七十五歲。云五百

歲誤矣。上文云自獲麟以來四百有餘歲。其實尙不盈四百歲也。

上大大夫壺遂。索隱云遂爲詹事。秩二千石。故位上大夫也。按十二諸侯年表稱上大夫董仲舒封禪書

鼓新垣平云於是貴平上大夫萬石君傳以上大夫祿歸老于家。佞幸傳鄧通官至上大夫韓嫣官至

上大夫似漢時本有上大夫之官。又封禪書拜公孫卿爲中大夫。

虞舜不台。索隱云台音怡。五帝本紀舜讓於德不憚。徐廣云今文尙書作不怡。台古怡字。

閒不容翽忽。翽當爲蕞。淮南天文訓秋分蕞定。蕞定而禾熟。故十二蕞而當一粟。高誘云蕞古文作秒

也。小司馬訓翽爲輕。失之。

栗姬傾貴。傾與負同。恃也。武安侯傳贊武安負貴而好權。與此同義。下文述梁孝王云傾愛矜功。亦同。

維仲之省。省訓善。言仲雖以罪奪王爵。而高帝猶善之。故又封其子也。夔頡侯亦兄子。以其母不善。故

不得王。

爲太史公書。按子長述先人之業。作書繼春秋之後。成一家言。故曰太史公書。以官名之者。承父志也。

以虞卿呂不韋著書之例言之。當云太史公春秋。不稱春秋者。謙也。班史藝文志太史公百三十篇。馮

商所續太史公七篇。俱入春秋家。而班叔皮亦稱爲太史公書。蓋子長未嘗名其書曰史記也。桓譚云遷著書成。以示東方朔。朔皆署曰太史公署之者。名其書也。或者不察。以公爲朔尊遷之稱。失之遠矣。

周本紀云。太史伯陽讀史記。陳杞世家云。孔子讀史記。儒林列傳云。孔子因史記作春秋。十二諸侯年表云。孔子西觀周室。論史記舊聞。又云。左邱明因孔子史記。具論其語。成左氏春秋。老子列傳云。史記周太史儋見秦獻公云云。天官書云。余觀史記。考行事。此篇云。史記放絕。又云。紬史記石室金匱之書。皆指前代之史而言。班史五行志所引史記。亦非太史公書。楊惲傳。惲始讀外祖太史公記。初不云史記。又考漢書宣元六王傳。東平王宇上疏求太史公書。大將軍王鳳言。太史公書有戰國策縱橫權譎之謀。揚雄傳。太史公記六國。歷楚漢。訖麟止。不與聖人同敘傳。東平思王以叔父求太史公諸子書。大將軍白不許。後漢書竇融傳。乃賜融以外屬圖。及太史公五宗外戚世家。魏其侯列傳。范升傳。難者以太史公多引左氏。升又上太史公違戾五經。謬孔子言。及左氏春秋不可錄三十一事。陳元傳。博士范升等議奏左氏春秋不可立。及太史公違戾凡四十五事。楊終傳。受詔刪太史公書爲十餘萬言。皆不云史記。史記之名。疑出魏晉以後。非子長著書之意也。後漢書班彪傳有司馬遷著史記之語此范蔚宗增益非東觀舊文

正義序

開元二十四年八月。殺青斯竟。按守節撰正義。成於開元廿四年。小司馬索隱前後序。則不著撰述之年。而唐書藝文志注貞云。開元潤州別駕。是兩人生於同時。而其書不相稱引。司馬長於駁辨。張長於地理。要皆龍門功臣。難以偏廢。守節官諸王侍讀。右清道率府長史。唐志失書。小司馬序自題國子博

士弘文館學士。而唐志云潤州別駕。殆終於別駕者與。正義索隱兩書。唐時皆單行。不附於正史。今索隱尚有汲古閣所刊單行之本。正義舊本失傳。卷帙次第無可考矣。

論字例

美下爲大。哀下爲衣。按說文。美从羊从大。漢隸或有誤从火者。此文大字。必火之譌也。哀字說文所無。易哀多益寡。唐石經作褒。褒之爲哀。亦隸體之變。此字宜在衣部。而守節訶爲譌字何耶。

廿二史考異卷六

漢書一

高帝紀

羽自立爲西楚霸王。王梁楚地九郡。按本紀與項籍傳俱有王梁楚地九郡之文。而九郡之名。注家罕能詳之。考戰國之際。楚地最廣。羽旣以長沙奉義帝。九江王英布。衡山王吳芮。南郡王共敖。而梁之河內河東。亦不在羽封域之內。則羽所有者。於秦三十六郡中。實得泗水碭薛會稽四郡。而史稱九郡者。據當時分置郡名數之也。高帝六年。以故東陽郡鄆郡吳郡五十三縣立荆王。以碭郡薛郡郟郡三十六縣立楚王。此二國卽項羽故地。然則九郡者。泗水也。東陽也。東海也。鄆也。郟也。吳也。會稽也。東郡也。灌嬰傳。度江破吳郡。長吳下。遂定吳豫章會稽郡。豫章當作鄆吳王濞傳。上患吳會稽輕悍。是會稽之外。更有吳郡矣。水經注。廣陵城。楚漢之閒。爲東陽郡。晉志。漢武帝分沛東陽置臨淮郡。是楚漢之閒。有東陽郡也。文類云。東陽今下邳。蓋因後漢改臨淮郡。屬下邳國。故云。非謂卽治下邳也。

以故得劫五諸侯兵。董教增曰。注家說五諸侯者不一。顏氏牽引諸王以足五數。於義亦非。蓋此處五諸侯有河南韓魏殷等。而項籍傳贊云。遂將五諸侯滅秦。又繫何人。尋其條貫。當據故七國以其地言。

不以其王言也。漢定三秦，卽故秦地。項羽王楚，卽故楚地。其餘韓、趙、魏、齊、燕爲五諸侯，劫五諸侯兵，猶後言引天下兵耳。故漢伐楚，可言五諸侯。楚滅秦，亦可言五諸侯也。

六年，以故東陽郡、鄆郡、吳郡五十三縣立劉賈爲荊王，以碭郡、薛郡、郟郡三十六縣立弟文信君交爲楚王，以雲中、鴈門、代郡五十三縣立兄宜侯喜爲代王，以膠東、膠西、臨淄、濟北、博陽、城陽郡七十三縣立子肥爲齊王。按秦三十六郡無東陽、鄆、吳、郟及膠東、膠西、臨淄、濟北、博陽、城陽之名。蓋楚漢之際，諸侯分王其地，各自立郡，非秦之舊。膠東、濟北、項羽所立國名，與齊號爲三齊。臨淄卽齊都，博陽卽濟北王都也。曹參傳：攻破齊，歷下軍，遂取臨淄，還定濟北郡。蓋田榮并三齊之後，以濟北爲郡。師古以爲史追書之者，非也。英布傳：九江、廬江、衡山、豫章郡皆屬焉。秦時止有九江郡，其餘皆楚漢之際所置，謂三十六之外皆非郡者，眞契舟求劍之見也。楚元王傳：王薛郡、東海、彭城三十六縣。東海卽郟郡。紀有碭郡，而傳無之。考地理志：梁國故秦碭郡。高帝五年爲梁國，梁爲彭越所封。楚元不能得之，當從傳爲是。

十一年，立子恢爲梁王，子友爲淮陽王，罷東郡、頗、益、梁、罷潁川郡、頗、益、淮陽，謂分東郡、潁川之支縣以益二國，非廢此二郡也。

惠帝紀

元年冬十二月趙隱王如意薨。按班史本紀之例諸侯王薨書名不書諡。惠六年齊王肥呂后二年恆山王不疑七年燕王建之類是也。而惠元年趙隱王如意文元年楚元王交則兼其諡書之。景帝中六年梁王薨則又失書其名矣。又諸侯王生不稱諡高帝紀淮南王梁王趙王楚王朝未央宮是也。而惠二年齊悼惠王來朝則生而諡之矣。丞相相國薨不書姓惠二年相國何五年相國參景二年丞相嘉武帝太初二年丞相慶是也。而文二年丞相陳平四年丞相灌嬰成帝綏和二年丞相翟方進又并其姓書之皆義例之不一也。

二年郤陽侯仲薨。列侯薨紀皆不書獨惠帝紀書薨者二人郤陽侯仲高帝之兄以屬尊特書舞陽侯噲或云以呂氏戚屬故書然噲剛直未必黨於呂也。

高后紀

元年不疑爲恆山王。按高后紀恆山王三見外戚傳恆山王二見周勃傳恆山一見郊祀志恆山字四見五行志恆雨恆暘恆與恆寒恆風字屢見亦有易爲常字者犯文帝諱韋賢傳實絕我邦我邦旣絕寤其外邦於異他邦犯高帝諱刑法志殺人盈城犯惠帝諱文帝紀夏啓以光武帝紀見夏后啓母石古今人表有漆彫啓犯景帝諱景帝紀省徹侯之國賈誼傳列爲徹侯而居百官公卿表徹侯字兩見犯武帝諱楚元王傳歆以建平元年改名秀犯光武諱高帝紀有莊賈項莊地理志莊公破西戎藝文志有莊

子莊夫子莊助莊安莊忽奇陳勝傳有莊賈申屠嘉田蚡傳皆有莊青翟鄭當時傳莊字三見南粵傳莊字一見西南夷傳莊字三見敘傳莊字一見犯明帝諱

未敢誦言誅之。史記誦作訟。章昭曰訟猶公也。

文帝紀

元年故常山丞相蔡兼爲樊侯。丞字衍。

三年太尉潁陰侯灌嬰爲丞相。丞相三公除授紀皆不書。文三年太尉潁陰侯灌嬰爲丞相以罷太尉

書也。成帝綏和元年以大司馬票騎大將軍大字根監本無爲大司馬以罷將軍書也。哀帝元壽二年

大司馬衛將軍董賢爲大司馬丞相。孔光爲大司徒。御史大夫彭宣爲大司空。以正三公官書也。成帝

初卽位以元舅侍中衛尉陽平侯王鳳爲大司馬大將軍領尙書事。特書於本紀者著王氏篡國之漸

也將相罷免例不書。惟建元二年丞相嬰大尉蚡免。元壽二年大司馬票騎將軍丁明免。獨書。

後六年河內太守周亞夫爲將軍。按景帝中二年始改郡守曰太守。此太守字本傳無太字太字

景帝紀

中二年令諸侯王薨列侯初封及之國大鴻臚奏諡誄策。按諡死者所用策則初封及之國者所用

謂諸侯王薨大鴻臚主奏諡誄列侯初封及之國大鴻臚主奏策也。應劭以策爲哀策非是。

武帝紀

建元五年平原君薨。婦人薨例不書。此以外祖母屬尊特書。

六年大司農韓安國出會稽。當作大農令。太初元年始改名大司農也。

元光元年海外肅眚北發渠搜氏羌徠服。晉灼曰王恢傳當云韓安國傳北發月氏可得而臣似國名也。臣瓚曰

孔子三朝記云北發渠搜南撫交阯此舉北以南爲對也。師古曰北發非國名言北方即可徵發渠搜

而臣屬之瓚說近是。按大戴禮少閒篇海外肅慎北發渠搜氏羌來服之文凡四見而南撫交趾僅

一見其文又不相屬則非以南北對舉明矣。孔子三見哀公爲三朝記七篇今在大戴記卽千乘四代

虞戴德語志小辨用兵少閒七篇也。瓚何不考而妄爲此說乎。盧辯注大戴以北發爲北狄地名。李善

注文選以爲國名與晉灼說同。師古解爲徵召之義誤矣。然小顏之誤亦自有因公孫宏傳載元光五

年制詞有北發渠搜南撫交阯之語。明以南北相對訓爲徵召於義似允。然此實制詞之誤。平津對策

略而不言蓋知其誤而不欲訟言之耳。渠搜西域之國以爲北方亦未通於地理。新序雜事篇亦云北發渠搜南撫交阯又

承武帝制策之誤

於是董仲舒公孫宏等出焉。按平津侯以元光五年對策擢第一始見任用是歲初徵賢良除博士不

合意而移疾去。

六年遣車騎將軍衛青。按是年青自大中大夫爲車騎將軍。元朔五年春。青爲大將軍。公卿表皆不載車騎之號。其時猶未甚貴。大將軍之失書。則傳寫脫漏也。

元鼎五年十一月辛巳朔旦冬至。按自是年至太初元年。相距八歲中。積二千九百二十二日。冬至當在癸亥。不得到甲子。再以月法收之。得積月九十八又二十七日有奇。冬至當在十一月二十八日。未得置閏於天正前也。若用太初之元。則辛巳之冬至。又後天一日。史家特據當時所頒之朔書之耳。律厯志載元朔六年甲申朔旦冬至。乃太初改厯後逆推之。當時未必以爲章首也。

六年定西南夷。以爲武都郡。牂柯越巂。沈黎文山郡。按文山郡。宣帝地節三年。省入蜀郡。惟沈黎郡。紀志不言何時省併。考後漢書西南夷傳。祚都夷者。武帝所開。以爲祚都縣。元鼎六年。以爲沈黎郡。天漢四年。并蜀爲西部。此可補本紀之闕。

元封三年。朝鮮斬其王右渠降。以其地爲樂浪臨屯元菟眞番郡。臣瓚引茂陵書。臨屯郡治東臚縣。眞番郡治讞縣。按地理志無讞縣。東臚則樂浪屬縣也。昭帝紀。始元五年。罷眞番郡。王伯厚謂臨屯郡亦始元五年罷。然班史無之。

太初二年。御史大夫兒寬卒。御史大夫書卒。自寬始。惟元帝紀失書。陳萬年卒。史闕文也。御史大夫卒。例書姓。竟寧元年。御史大夫廷壽卒。不書姓。亦闕文。

後元二年帝崩於五柞宮。臣瓚曰：帝年十七即位，即位五十四年，壽七十一。按武帝十六歲即位，明年改元，壽至七十，瓚說誤。

昭帝紀

元鳳五年罷象郡，分屬鬱林、牂柯。按武帝開南越，置九郡，無象郡之名。地理志謂日南卽秦象郡也。此乃云罷象郡，豈日南之外別有象郡乎？抑所罷者卽日南，罷之未久而復置乎？史無文以知之矣。

宣帝紀

本始元年，德武食邑。張晏曰：舊關內侯無邑也。以蘇武守節外國，劉德宗室俊彥，故特令食邑。按上文右扶風德在蘇武之前，宗正德在武之後，此文先德後武，則是周德，非劉德也。蘇武傳稱賜爵關內侯，食邑三百戶，而劉德傳無食邑之文，張說似未可信。

元康元年五月，復高皇帝功臣絳侯周勃等百三十六人家子孫，令奉祭祀，世世勿絕。其毋嗣者，復其次考。功臣表諸功臣之後，詔復家者實百二十三人，與紀人數不合，或表有脫漏矣。表稱元康四年而紀書於元年，蓋有司奉詔檢校得實，請於朝而復之，非一時所易了。紀所書者，下詔之歲，表所書者，賜復之歲也。

二年冬，京兆尹趙廣漢有罪要斬。按廣漢傳事在地節三年，相校差三歲，又公卿表本始三年，潁川太

守趙廣漢為京兆尹。六年下獄要斬。自本始三年數至地節四年。恰是六年。校之本傳後一年。校之本紀又先二年。俱不相合。

甘露二年正月立皇子闢為定陶王。九月立皇子宇為東平王。按諸侯王表。宇闢並以是年十月乙亥封。與紀異。

黃龍元年帝崩於未央宮。諸帝紀書崩之後必書某月日葬某陵。惟宣帝紀不書。乃於元年紀書初元元年正月辛丑孝宣皇帝葬杜陵。以葬在踰年之後也。

元帝紀

初元三年四月乙未晦。茂陵白鶴館災。按五行志。四月乙未。孝武園白鶴館災。茂陵即孝武陵也。志不書晦。以三統術推之。是歲四月乙酉朔乙未。乃月之十一日。非晦日也。晦字衍文。翼奉傳載此事。亦不云晦。

贊貢薛韋匡迭為宰相。注。貢禹薛廣德韋賢匡衡迭互而為丞相也。按元帝時丞相韋玄成。非韋賢。注誤也。漢以御史大夫貳丞相。亦稱三公。然史未有稱御史大夫為丞相者。元帝之世。匡韋皆為丞相。貢辭止於大夫。而孟堅概以宰相目之。已非其倫。師古注尤誤。蕭望之言。吾嘗備位將相。以嘗為御史大夫故也。蓋時俗之通稱。而孟堅用之。

成帝紀

陽朔三年八月丁巳，大司馬大將軍王鳳薨。按：大司馬書薨，自元狩六年霍去病始，其不書姓，亦如丞相例。惟陽朔三年，大司馬大將軍王鳳，永始二年，大司馬車騎將軍王音，元延元年，大司馬大將軍王商兼書姓。

鴻嘉二年六月，立中山憲王孫雲客爲廣德王。羅願新安志云：景十三王傳，復立憲王弟孫利鄉侯子雲客，是爲廣德夷王。諸侯王表：雲客以懷王從父弟子紹封，獨成帝紀載雲客是憲王孫。按：雲客之祖孝侯安，於憲王爲弟，其父戴侯遂，於懷王爲從父弟，則雲客乃憲王弟孫，懷王從父弟子。表傳所言是也。紀脫一弟字。

永始三年，徙李譚等五人，共格殺竝等，皆封爲列侯。按：功臣表只有李譚、稱忠、鍾祖、營順四人。綏和元年，以大司馬票騎大將軍爲大司馬。當云票騎將軍多一大字。

哀帝紀

元壽二年春正月，元壽二字衍文。

帝崩於未央宮，臣瓚曰：帝年二十卽位，卽位六年，壽二十五。師古曰：卽位明年乃改元，壽二十六。按：哀帝年三歲嗣定陶王，元延四年入朝，年十七，明年立爲皇太子，又明年卽位，蓋年十九矣。踰年改元，壽當二十五。

平帝紀

元始二年立江都易王孫盱台侯宮爲廣川王。按諸侯王表廣世王宮以易王庶孫盱台侯子紹封又

景十三王傳平帝時立建弟盱台侯子宮爲廣陵王奉易王後則紀文盱台侯下脫一子字矣廣川廣陵廣世紀表傳互有不同考廣陵王胥以武帝子封其後絕而更紹至王莽時始廢不容更封它人若

廣川國則其時已改爲信都。以封楚孝王孫景矣。未必割其地以封宮也。當從表作廣世爲是。

廣川惠王曾孫倫爲廣德王。諸侯王表作檢廣川惠王傳作檢師古音愈王子侯表中山靖王傳皆作倫。

五年春正月。祿祭明堂。諸侯王二十八人徵助祭。按是時諸侯王見存者。城陽王偃。菑川王永。河間王

尚。魯王閔。趙王隱。長沙王魯。廣平王廣漢。膠東王般。六安王育。真定王揚。泗水王靖。廣陽王嘉。廣陵

王守。高密王慎。淮陽王續。東平王開明。中山王成。都楚王紆。信都王景。廣宗王如意。廣世王宮。廣德王

倫。一作止二十二。人。梁王音以是年紹封。在正月以後故不數。

異姓諸侯王表

譜十八王月而列之。長沙王吳芮。漢高所封不在十八王之數。

高后元年初置淮陽國。按魯國本楚地。故與楚爲一行。呂國本齊地。南郡即濟南郡故與齊爲一行。淮陽與臨江

非一地。而同行。以其皆爲楚之分也。梁亦項羽故地。漢五年置梁國王彭越。與魏同行。以梁本

六國魏地故也。呂后七年，初置梁國。王呂產，則與韓同行，殊非其類，恐是轉寫之譌。

復置常山國。本紀作恆山，此避文帝諱，追改。文云復置，似張耳初封本名恆山王，亦後人追改也。

諸侯王表

梁分爲五，師古曰：謂梁、濟川、濟東、山陽、濟陰也。按：山陽、濟陰後爲郡，濟東卽東平國也。惟濟川國史不著其所在，予讀水經注，引應劭曰：濟川，今陳留濟陽縣是也。乃悟陳留郡卽濟川國，小顏注失采此文。後人遂莫知濟川所在矣。

廣宗王如意世，地理志載諸侯王國二十。廣宗、廣世、廣德三國，皆元始二年置，而志不書。定陶國、哀帝時廢，而志亦不書。大約以元始元年版籍爲斷也。續漢志：鉅鹿郡有廣宗縣，疑卽廣宗國都也。成帝鴻嘉二年，嘗以丹陽之黟縣置廣德國，未久而廢。元始封廣德王倫，當卽其地，惟廣世無可考。

廣德靜王掾，以惠王曾孫戴王子紹封。羅願曰：景十三王傳，立戴王弟襄隄侯子掾爲廣德王。王子侯表亦言倫是襄隄侯聖之子，而諸侯王表乃言掾以戴王子紹封，當脫一弟字。大昕謂掾與瘞音相近，其又作倫者，字形相涉而譌。

王子侯表上

管共侯罷軍。管當作菅，卽濟南郡之菅縣也。據水經注徐廣以滎陽之管城當之，非是。

臨衆敬侯始昌。下注臨原字似分臨原地置臨衆侯國也。考地理志琅邪郡只有臨源侯國無所謂臨

衆者。史記表亦作臨原。則衆當爲原之譌。或後人校定當爲臨原。誤入正文耳。

尉文節侯丙。注南郡疑有誤。丙爲趙敬肅王子封地。不當遠屬南郡。

薪處侯嘉。地理志作新處。

濕城侯忠。師古曰濕音它合反。濕城卽西河郡之隰成縣也。濕隰字形相涉而譌。不當音它合反。史記

本作隰成。

泉琅侯遷。按代共王子同時侯者九人。離石蘭濕成卽濕土軍皆西河縣名。臨河則朔方縣名。泉琅千

章亦西河之縣也。地理志西河郡有代與西河郡近。故代所分侯國多改隸西河。表於泉琅下注臨淮

字。千章下注平原字。臨淮平原與代風馬牛不相及矣。表似失之。

衆陵節侯賢。地理志零陵郡有泉陵侯國。此作衆陵。誤。

庫葭康侯澤。師古曰庫音乎。葭音工。遐反。地理志琅邪郡有零段侯國。師古曰零音許于反。段音工下

反。按零段卽庫葭。顏氏各隨其文音之。非也。

柳裴戴侯道。鄭氏曰音卽非。在肥鄉縣南五里。按地理志魏郡有卽裴侯國。此侯爲趙敬肅王子。趙魏

相去不遠。表云東海。殆誤。

王子侯表下。

孝元之世亡王子侯者。元帝子封王者二人。定陶中山各有一子嗣王。皆入繼大宗。無支子封侯者。號謚姓名。宗室例不書姓。姓字衍文。然北宋本已然。蘇明允謂王莽僞襲宗室。故從異姓例。示天子不得有其同姓。此不考其本末而妄爲之說也。昭宣元成哀五朝之侯。與王莽何與。卽元始之際。王子封侯。亦循故事。惟承鄉侯以下二十二人。以王孫得封。出於莽之僞襲耳。入居攝所封。班氏未嘗列於表。何故一例譏之乎。

松茲戴侯霸。元始五年六月辛丑封。劉貢父謂元始當爲始元。其說是也。老蘇謂此卷皆元始之際。王莽僞襲宗室而侯者。正由讀此誤本。不能校正耳。

高惠高后文功臣表。

武陽侯蕭則。以何孫遺弟紹封。按蕭何傳。孝文元年更封延爲鄼侯。薨。子遺嗣。薨。無子。文帝復以遺弟則嗣。是則嗣鄼侯之封。非武陽也。傳又云。景帝二年。制詔御史。故國相蕭何。高皇帝大功臣。今其祀絕。朕甚憐之。其以武陽縣戶二千封何孫嘉爲列侯。蓋則以罪免之後。嘉始別封武陽。表以武陽屬之侯。則誤矣。

地節四年。安侯建世。以何元孫紹封。宣帝紀作曾孫。誤。蕭何傳亦作元孫。

曲成圍侯蟲達位次曰夜侯恆。恆當作垣。據史記表。恭侯捷以孝景中五年復封垣。則垣當為大字。書於下一格。

敬市侯閻澤赤。敬市當從史記作故市。河南郡有故市縣。即赤所封也。閻澤赤。水經注作閻澤毋赤。

昌武靖信侯單究。史記作單寧。

終陵齊侯華毋害。終陵當從史記作絳陽。水經注。絳陽蓋在絳澮之陽。漢高帝六年封越騎將軍華無

害為侯國。史稱越將。水經注。誤增騎軍二字。

東茅敬侯劉到。史記作劉劍。當從之。

到曾孫銅陽公乘咸。師古曰。銅音紂。按銅从魚同聲。不得有紂音。地理志。汝南郡銅陽縣。孟康云。銅音

紂。紅反。正合同聲。俗儒不通翻切。妄謂銅有紂音。大可怪也。

杜衍嚴侯王翥。如淳曰。翥音署。即項籍傳云王翳也。

祝阿孝侯高色。高色。史記作公孫耳。

平州共侯昭涉掉尾。昭涉當作昭沙。廣韻沙字下引作昭沙掉尾。以昭沙為複姓。

博陽節侯周聚。博陽當作傅陽。說見史記。

穀陽定侯馮谿。建元四年侯偃嗣。按偃無諡。又無薨年。其子孫又無嗣爵者。當是坐事除免。而史闕

其文。

景嚴侯王競。孝文十一年，侯嬭嗣。師古曰：嬭音許，反。子弟晦之曰：師古音非也。史記：嬭作嬭，嬭古

文作嬭。漢書多用古文，故爲嬭字，譌爲嬭耳。當音匹昭翻。

右高后十二人，扶柳、襄城、軹、壺關、昌平，皆其騰。外戚恩澤侯表作騰昌成。外戚恩澤侯表作昌成睡、祝茲、建陵十一人在恩澤

外戚。洩、沛、信都、樂昌、東平五人隨父。上邳、朱虛、東牟三人在王子。凡三十一人。按：外戚恩澤侯表，高

后十人，五人隨父。凡十五人。十人者，扶柳、襄城、軹、壺關、昌平，皆其騰。呂成、祝茲、建陵也。五人隨父者，睡

侯、呂通、東平侯呂庇、汝侯呂產。功臣表汝作汝皆呂澤子。不其侯呂種、漢陽侯呂祿，皆呂釋之子也。信都侯張

修、樂昌侯張受，別隨父。敖在功臣表，故恩澤侯不復數之也。此表失數不其、漢陽，而多一沛，又別出睡

不入隨父之列，與外戚恩澤侯表互異。

注：師古曰：洩音交，又音下交反。地理志：沛郡有洩縣。史記作郊侯，郊與洩同。恩澤侯表作汝字，形相涉

而譌也。小顏於彼注音問略不考正，亦疏。

右孝文十人：管氏營邱、營平、陽虛、楊邱、枋安都、平昌、武城、白石、阜陵、安陽、陽周、東城十四人在王子。按：

王子侯表：管是一國，氏邱是一國，營平又是一國。此於氏字下多一營字。

景武昭宣元成功臣表。

葛繹侯賀延和二年以子敬聲有罪下獄死師古曰延亦征字也延當作廷說文廷與征同从正从彡

與延長之延从延从人者形聲俱別今本作延乃傳寫之誤耳亞谷侯盧賀延和二年坐受衛太子節掠死安道侯揭陽當時延和四年坐殺人棄市東城侯居股延和三年坐衛太子舉兵謀反要斬無錫侯卯延和四年坐追反虜擅棄兵還贖罪免荻苴侯韓陶延和二年薨開陵侯祿延和三年坐祝詛上要斬稔侯商邱成延和二年封海西侯李廣利延和三年擊匈奴兵敗降承父侯續相如延和四年坐祝詛上要斬又文帝功臣表按道侯韓興延和三年嗣皆延字之譌

右孝景十八人魏其蓋二人在外戚按外戚恩澤侯表尙有章武侯竇廣國南皮侯竇彭祖二人

襄城侯樊龍以史記索隱證之則漢表本作襄武蓋後人又據史記改爲襄城耳

博望侯張騫地理志南陽郡有博望侯國卽騫所封騫以元狩二年失侯宣帝時復以其地封許舜

遼悼侯王援嘗注舞陽按後有瞭侯次公亦注舞陽疑瞭瞭一地援嘗亡後又以封次公也

輝渠忠侯僕朋以校尉從票騎將軍再出擊匈奴得王侯元狩二年二月封按下文又有輝渠慎侯應

庇亦以元狩二年七月封國名相同又同在魯陽小司馬引韋昭謂僕多所封則作輝渠應它所封則作渾渠二者皆鄉名皆在魯陽宏嗣生於漢末其說當可信孔文祥謂一邑分封二人此出於臆度而小司馬取之何也

義陽侯衛山。漢時侯國有兩義陽。衛山以元狩四年封義陽侯。傅介子以元鳳四年封義陽侯。表俱注

在平氏。此南陽之義陽也。今信陽州師丹傳。平帝即位。以厚邱之中鄉戶二千一百封丹爲義陽侯。厚邱屬

東海郡。故恩澤侯表注東海字。此東海之義陽也。

杜侯復陸支。注重平。史記索隱引漢表在東平。此重疑東之譌。

瞭侯畢舉。注南陽。前瞭侯次公下注舞陽。此注南陽。舞陽縣本隸南陽。其實一也。史記索隱謂漢表在

下邳。似誤。

湘成侯監居翁。注堵陽。前湘成侯敞屠洛下注陽城。此又云堵陽。考監居翁封侯。在敞堵洛坐酎金失

侯之後。嘗是一地。而注各異。未審其故。

轅陽侯江喜。江喜當是江德之譌。酷吏傳。廢畜夫江德封轅陽侯。公卿表。始元六年。轅陽侯江德爲太

常。四年。坐廟郎夜飲失火免。卽此轅陽侯也。褚少孫補史記作潦陽侯。江德。潦字小異。而名與公卿

表合。水經注。淇水又東北。逕榆陽城北。漢昭帝封太常江德爲侯國。其云榆陽者。轉寫之譌。謂昭帝時

封。亦誤。而其名之爲德不爲喜。亦一證也。表但書征和二年十一月封。不書某年薨。闕文也。德爲太常

。坐法免官。而侯爵未替。故其子仍得嗣侯。

六年。侯仁嗣。此六年以上無所承。必有脫文也。江德以始元六年拜太常。又四年而免。史雖未著其薨年。

然宣帝以後紀元無至六年者則仁之嗣侯當在昭帝元鳳六年矣。

丞父侯孫王 丞父即前承父也丞與承通。

孝成五人武陽博陽贊字即鄆騏龍額開陵樂陵博望樂成龍安平平阿成鄉紅陽曲陽高平十五人隨父。

按成鄉當作成都謂王商也樂成下行一龍字又新都侯王莽以成帝永始元年封表計隨父諸人不及新都亦誤按安平當作安成謂王崇也。

外戚恩澤侯表

樂成敬侯許延壽 褚先生補史記作樂平水經注灑水又東北逕樂平縣故城東宣帝封許廣漢少弟翁孫於樂平為侯國翁孫延壽字也則鄆元亦以樂平為延壽所封矣予按此表注平氏字平氏縣屬南陽而地理志南陽郡本有樂成侯國此即延壽所封分平氏置者也樂平侯國地理志無之褚表注俱不足信

安成共侯王崇 漢時侯國有兩安成崇以建始元年封表注汝南字此汝南之安成也王子侯表安城

思侯蒼長沙定王子元光六年封此長沙之安成也彼表注豫章字蓋安成本長沙縣建為侯國乃改

隸豫章國除之後仍還長沙也長沙之安成表作安城

紅陽荒侯王立以皇太后弟封三十年薨按立與平阿侯仁皆為王莽所憚莽遣使迫守令自殺事見

元后及王莽傳表於平阿侯亦云爲莽所殺。獨立云薨不云殺者。誤也。

右孝哀十三人。新成、新都、平陽、營陵、德五人隨父。凡十八人。按新都侯王莽。成帝永始元年封。表於成帝。隨父八人之內已及之。此又見於哀帝下。誤矣。德侯劉勳。以元壽二年紹封。見王子侯表。營陵侯劉歸生。以劉澤元孫之孫紹封。見荆燕吳傳。而表不書。史之脫漏也。又考成都侯王邑。以建平二年紹封。汝昌侯傅昌。以元壽二年紹封。亦當在隨父之例。而此表失數之。

百官公卿表上

易敍密義神農。宓當作慮。慮與伏同。與宓字形聲俱別。

太初元年更名光祿勳。胡廣漢官注。勳猶闕也。主殿宮門戶之職。

衛尉掌宮門衛屯兵。按宮門者。未央宮門也。武帝時。李廣爲未央衛尉。程不識爲長樂衛尉。表有廣無

不識。宣帝時。霍光長女壻鄧廣漢爲長樂衛尉。女壻范明友爲度遼將軍。未央衛尉。表有明友無廣漢。

知表所載。惟未央衛尉也。未央長樂二尉。分主東西宮。孟康云。李廣爲東宮。程不識爲西宮。予謂長樂

宮太后所居。太后朝稱東朝。似長樂在未央之東矣。未央衛尉。諸傳皆單稱衛尉。獨李廣范明友稱未

央者。以別於長樂也。韋玄成傳亦稱未央衛尉。則以其時始置建章衛尉。故亦稱未央以別之。

長樂建章甘泉衛尉皆掌其宮。不常置。宣帝紀。元康元年。置建章衛尉。元帝紀。初元三年。罷甘泉建章

宮衛令就農

凡縣道國邑千五百八十七。按地理志縣邑千三百一十四道三十二侯國二百四十一合之恰符千五百八十七之數。然以每郡國所領縣計之。止千有五百七十八。蓋史文有脫漏也。

百官公卿表下

孝景中三年。袁叢侯乘昌為奉常。按功臣表袁叢端侯革朱史記作靖侯孫昌以孝景中二年嗣侯。即

此乘昌也。一人而姓互異。廣韻乘姓引袁叢侯乘昌革姓引袁叢侯革朱。

中五年。軼侯吳利為奉常。按功臣表軼侯黎朱蒼。孝惠二年以長沙相侯。傳子孝侯豨。孫彭祖。至曾孫

扶失侯。則孝武元封元年事也。黎朱蒼。史記作利蒼。別無所謂軼侯吳利者。

孝武建元二年。郎中令石建。六年卒。按萬石君傳。建以建元二年為郎中令。元朔六年卒。前後凡十六

年。表蓋脫十字。又李廣傳稱廣代石建為郎中令。考廣由右北平太守拜郎中令。正在元朔六年。可證

建任郎中令實十六年。而非六年矣。

三年。內史石徧。徧當作慶。

元光四年。寧平侯張歐為太常。此與御史大夫張歐各是一人。考功臣表未見有封寧平侯者。惟宣平

侯張敖之孫哀侯歐。以孝文十六年嗣侯。然亦薨於景帝時。不及仕孝武朝也。又據史記表。歐乃嗣封

南宮侯實非官平則與此表之張歐亦斷非一人矣此條疑有誤。

元狩三年廷尉安蓋司馬安也汲黯傳稱安以文深巧宦四至九卿以表考之元狩元年中尉司馬安五年有廷尉司馬安并此爲三矣。

六年俞侯樂賁當作樂賁樂布子也。

元鼎四年睢陵侯張廣國爲太常功臣表作廣孫蓋張敖之曾孫也。

征和四年繆侯鄺終根爲太常十一年坐祝詛誅按終根官太常不過二三年此十一年蓋三字之譌也功臣表終根以元鼎二年嗣侯二十九年後二年祝詛上要斬可證十一年必爲三年之譌矣。

孝昭元鳳元年光祿勳并右將軍表云并者一人兼兩職非不置此官也霍光廢昌邑王時羣臣連名奏上皇太后九卿中獨無衛尉光祿勳京兆尹名考其時張安世以車騎將軍兼光祿勳范明友以度遼將軍兼衛尉列將軍位在九卿之右故舉其尊者書之趙廣漢以京輔都尉守京兆尹未正授故但稱都尉而敘於馮翊扶風之後。

孝宣地節三年執金吾延年按武五子傳臣敞故知執金吾嚴延年字長孫女羅紉前爲故王妻此延年當卽嚴延年也酷吏傳嚴延年字次卿官至河南太守此別是一人。

黃龍元年太子太傅蕭望之爲前將軍一年爲光祿勳二年免按望之以前將軍兼光祿勳在元帝卽

位以後本傳云宣帝寢疾拜望之爲前將軍光祿勳受遺詔輔政蓋因拜將軍而牽連及之耳

孝元初元五年河南太守劉彭祖爲左馮翊二年遷太子太傅劉當作嚴嚴彭祖卽傳公羊春秋者

永光二年右扶風鄭宏爲御史大夫五年有臯自殺按本傳及京房傳但云坐與京房議論免爲庶人

不云自殺且大臣有臯自殺例書於本紀今紀不書疑表誤

建昭元年尙書令五鹿充宗爲少府五年貶爲元菟太守按儒林傳梁邱臨代五鹿充宗爲少府據表

則代充宗者乃召信臣非梁邱臨也又張禹傳弟子有少府戴崇儒林傳林尊張山拊琅邪王中淄川

任公俱爲少府王尊傳尊子伯亦爲京兆尹敍傳班伯爲水衡都尉外戚傳有宗正劉長樂執金吾劉

敢表皆未見

竟寧元年安年侯王章子然爲執金吾安年當作安平章蓋邛成太后兄王舜之子與京兆尹王章非

一人

孝成建始二年戈陽侯任千秋長伯爲執金吾公卿表中書名不書姓者史之闕文也書名而兼及字

與郡者以其人無傳故附見於表若傳已見字者例不更書惟綏和二年太子中庶子傅喜穉游爲衛

尉穉游字已見本傳而表復書疑後人所加也一人而表中再三見者於最初書字與郡後不更書惟

初元四年書戈陽侯任千秋長伯爲太常而建始二年又書戈陽侯任千秋長伯爲執金吾疑亦後人

所加。

河平三年，右曹光祿大夫辛慶忌爲執金吾。四年，貶爲雲中太守。按慶忌傳，初爲執金吾，坐子殺趙氏，左遷酒泉太守。歲餘，以大將軍王鳳薦，復徵爲執金吾。數年，坐小法免。左遷雲中太守，則慶忌再爲執金吾而再左遷也。表誤合兩任爲一。

鴻嘉元年，平喜侯史中爲太常。六月病免。史氏無封平喜者，當是平臺侯史恁也。

元延三年，廣漢太守孫實爲京兆尹。一年免。實當作寶，一年當爲三年。

綏和元年，長信少府薛宣爲京兆尹。一年，貶爲淮陽相。按薛宣傳，宣自罷相之後，復爲特進，給事中，視尚書事，坐善定陵侯淳于長罷，未嘗爲長信少府。京兆尹也。淳于長之誅，在綏和元年。宣方連坐免官，無緣復拜京兆。表所載由長信少府遷京兆尹者，蓋宣之弟修也。傳稱修歷郡守京兆尹少府，不云長信者，脫文耳。鮑宣傳，郭欽，哀帝時爲丞相司直，奏免京兆尹薛修等。考哀帝以綏和二年四月卽位，修官京兆，在綏和元年，閱一年，貶。正當哀帝時。

太僕宏爲執金吾。當云任宏，脫任字。

南陽謝堯長平一年遷。長平下當有爲執金吾四字。

二年，衛尉王襲爲侍中光祿勳。二年，貶爲恆農，坐呂寬自殺。恆農下脫太守二字。呂寬事見王莽傳，在

元始三年，距是歲七年矣。

孝哀建平三年，右將軍公孫祿爲左將軍，一年免。按何武傳，哀帝崩，武爲前將軍，與左將軍公孫祿相善。武舉公孫祿可大司馬，而祿亦舉武，有司劾奏武祿互相稱舉，皆免。事在元壽三年，距建平三年，實四歲矣。此云一年免，誤。

孝平元始二年，中郎將幸成子淵爲水衡都尉。幸成當是辛茂之譌，辛慶忌少子也。三年，執金吾長安王駿君公。此別是一人，非成帝時王駿也。

古今人表

師古曰：但次古人而不表今人者，其書未畢故也。予謂今人不可表，表古人以爲今人之鑒，俾知貴賤止乎一時，賢否著乎萬世。失德者雖貴必黜，修善者雖賤猶榮。後有作者，繼此而表之，雖百世可知也。觀孟堅序但云究極經傳，總備古今之略要，初不云褒貶當代，則知此表首尾完具。小顏所云蓋未喻孟堅之旨。

桀紂龍逢比干，欲與之爲善，則誅。于莘崇侯與之爲惡，則行。可與爲惡，不可與爲善，是謂下愚。依此文，桀紂當竝列九等。今表以紂與妲己飛廉惡來列九等，而桀與未喜于莘乃在八等，又失載崇侯名，皆轉寫之譌脫也。

注張晏曰老子玄默仲尼所師雖不在聖要爲大賢而在第四今本老子有列於第一格者蓋唐人刊

定本舊唐書禮儀志天寶元年二月丙申詔史記古今人表元元皇帝昇入上聖正謂此也史記當作漢書南

監本老子在第四格郊子之後此班氏元本

田單以卽墨孤城復強齊之大魯連之博通忽於榮利藺子申威秦王退讓廉頗乃在第五今本魯仲

連藺相如在第二格田單在第四格又據張晏說寺人孟子在第三今本在第四格晏又譏嫪毐上蒸

昏亂惡不忍聞乃在第七今本不列毒名蓋後人妄以己見升降出入不皆班氏之舊矣

大吳帝宓羲氏上上宓當作慮

列山氏上中禮記祭法作厲山氏鄭康成韋曜皆以爲炎帝之號表以炎帝神農氏列第一等列山氏

列第二等

帥味上中按左氏傳金天氏有裔子曰昧爲元冥師生允格臺駘此作帥味字形相近而譌

廖叔安上中師古曰左氏傳作戮左傳作颺此云戮誤

柏奮上中伯仲之伯漢表多作柏柏奮柏虎柏譽即柏柏益柏封叔逢公柏陵柏樂皆是

雒陶上下廣韻作雄陶

續身上下廣韻作續身

朱斯上中 卽艾斯。

蓬門子下中 孟子作蓬蒙。蒙門聲相近。

雅侈下中 墨子作推哆。

孟獻中上 益後 秦本紀作孟戲。戲獻聲相近。

劉姓豕章中上 左氏傳陶唐氏既衰其後有劉累。學擾龍于豨龍氏。以事孔甲。夏后嘉之。賜氏曰御龍。

以豨豕章之後。杜預云。以劉累代彭姓之豕章。累尋遷魯縣。豕章復國。至商而滅。累之後世。復承其國。

爲豕章氏。此表前有豕章。與大彭並列第三等者。劉姓之豕章也。國語大彭豕章爲商伯。又云彭姓彭祖豕章則商滅之矣。此豕章

乃劉棄之後。范宣子云。句之祖在商爲豕章氏者也。故言劉姓以別之。

馮辛中下 史記作麋辛。

秦女妨中下 史記作女防。

孟會中下 秦本紀作孟增。會蓋增之譌。後文亦作孟增。

秦大雒中中 大乙字。秦本紀作大駱。駱雒古字通。大乙則大儿之譌。

楚熊盤中中 艾子。按楚世家熊艾生熊顛。表作顛熊顛生熊勝。熊勝以弟熊楊爲後。鄒誕生本揚作錫。又

作楊。表所載熊盤。卽世家之熊勝也。世家以爲艾孫。表以爲艾子。表又以熊錫爲盤子。皆與世家異。

楚摯紅中下。渠子。表於摯紅。熊摯皆云渠子。而無熊渠名。蓋傳寫脫之。

懿王墜下中。周本紀。墜作黷。音相近。

夷王摺中下。周本紀。摺作變。

楚熊紉中下。楚世家作季徇。

司徒皮下下。師古曰。詩所謂蕃爲司徒是也。蕃音婆。古讀皮如婆。

楚寧敖下上。楚世家作霄傲。

司空牛父下上。左氏傳作司寇。

公子穀生下上。左氏傳作穀甥。

秦憲公中下。文公子。秦本紀。文公子。緡公。緡公子。寧公。與表異。

魯公孫隱中下。卽左氏傳公子偃也。偃隱聲相近。徐偃王。表作隱王。

石彘中下。據左氏傳。石彘與良霄使楚。在鄭簡公之世。不與鄭繆公同時。其謀納繆公者。石癸也。僖三

十年。傳有石甲父。疑與癸一人。表別有石癸。則以此石彘當甲父矣。

夏父不忌下上。左氏傳作弗忌。古讀弗如不。

五參中上。五古伍字。

曹劌時。上下。師古曰。卽曹欣時也。欣劌聲相近。左氏作喜時。

屠顏賈。下。師古曰。卽屠岸賈也。岸顏聲相近。

叔山舟。中。左氏傳作舟。

國佐。下。中。據左氏傳。國佐卽賓媚人。表以賓媚人列第四等。國佐列第八等。

鄭卑湛。中。上。卽裨諶。

衛公子逞。中。上。卽左氏傳公子郢也。

大夫選。中。中。卽論語大夫僕。

榮聲期。中。中。師古曰。卽榮啓期也。聲當爲罄之譌。啓罄聲相近。

諸稽到。中。上。卽諸稽郢也。郢與到字形相涉而譌。

孔文子。下。上。卽仲叔圉也。表以中叔圉列第四等。孔文子列第七等。

石國。下。下。國當作圃。

離朱。中。中。卽離婁也。表列於公輸般之後。則以朱爲春秋時人。

陳太宰喜。中。中。禮記檀弓篇所謂太宰嚭也。吳太宰伯嚭。它書亦作帛喜。

我子。中。上。我子以下四人。皆墨翟弟子。

荀薪中上 趙世家作荀欣。

秦簡公中中 厲公子 秦本紀以為懷公子。

顏敢中上 即孟子書所謂顏般也。般敢字形相似。

王慎中上 孟子作王順。

大成午中中 趙世家成侯三年大戊午為相。徐廣曰戊一作成。

公仲用中中 即韓之公仲朋也。朋作用傳寫之譌。

王升中上 戰國策所謂先生王斗也。斗古文作升。與升往往相亂。

捷子中中 捷即接字。史記孟子傳接子齊人。學黃老道德之術者是也。藝文志道家有捷子二篇。齊人

武帝時說。蓋即此捷子。其云武帝時說。則轉寫譌錯耳。

安陸君中中 此與唐雖並列。當即戰國策所謂安陸君也。

高漸離中上 荆軻中中 秦武陽中下 按劉知幾譏班表云其敍晉文之臣佐也。舟之僑為上。陽處父次

之士會為下。其述燕丹之賓客也。高漸離居首。荆軻亞之。秦武陽居末。自注云舟之僑在第三等。陽處

父在第四等。士會在第五等。高漸離在第五等。荆軻在第六等。秦武陽在第七等。今本陽處父與舟之

僑俱在第三。士會高漸離在第四。荆軻在第五。秦武陽在第六。又知幾稱鄧侯入下愚之上。第七等 三朝

列在中庸下流。第六等今本鄧祁侯在第六。騶甥聃甥養甥在第五。俱與劉氏所說異。蓋轉寫譌舛。失其本真。當以劉所見本爲正也。

廿二史考異卷七

漢書二

律麻志上

徵、祉也。徵、祉聲相近，故徵有祉音。

林、君也。釋詁文。

應鍾言陰氣應亡射，該臧萬物，而雜陽闕種也。孟康曰：陰雜陽氣臧塞，爲萬物作種也。按：應鍾、十月之律，於消息爲純陰卦，而八卦之位，乾在十月，是爲陰雜陽氣也。坤之上六云：龍戰於野，其血玄黃，而文言傳以爲天地之雜。莊氏謂上六之爻，兼有天地雜氣，故血有天地之色。

三十斤爲鈞，四鈞爲石，付爲十八，易十有八變之象也。孟康曰：付，度也。度其義有十八也。黃鐘俞銖兩鈞，斤石凡七，與下十一象爲十八也。按：孟說非也。一鈞重萬一千五百二十銖，以易六十四卦之數除之，得一十有八，合於易之十八變而成卦也。

迺以前麻上元，泰初四千六百一十七歲，至于元封七年，復得闕逢攝提格之歲，中冬十一月甲子朔旦冬至，日月在建星。太歲在子。按：太初元年，太歲在丙子，東漢以後，術家不知太歲有超辰之法，上溯

太初之元以爲丁丑。非太初本法也。其云闕逢攝提格之歲者。謂是年歲陰在甲寅也。歲陰與太歲皆百四十四歲而超一辰。故四千六百一十七歲而復其初。秦漢之間。多以歲陰紀歲。淮南子言。太陰在寅。名曰攝提格。史記貨殖傳。太陰在卯之類是也。東漢始專用太歲。而去其超辰之法。故於此文多不。了。唐一行日度議云。漢太初元起丁丑。推而上之。不值甲寅。猶以日月五緯。復得上元本星度。故命曰闕逢攝提格之歲。而實非甲寅。此亦強作解事語。觀太初詔書。固云年名焉逢攝提格矣。安得云實非甲寅乎。劉攽云。十七歲當作十一歲。此亦妄說。二劉於推步本無所解。宋子京所引景本。亦無一不誤。今不復辨也。

又妄言太初麻虧四分日之三。去小餘七百五十分。按。黃帝六家之術。太略皆與四分同。四分以九百四十爲日法。九百四十之七百五。正四分之三也。則壽王術日法亦同四分矣。

參閏法爲周至。以乘月法。以減中法而約之。則六劫之數。爲一月之閏法。其餘七分。此論中月相求之理也。周至五十七以乘月法。得十三萬六千三百四十四。與中法十四萬五百三十相減。餘四千一百八十六。是爲一月之閏法。蓋中法以滿元法四千六百爲一日。置中法以元法除之得三十日又四周至乘月法。則亦以滿元法爲一日。置十三萬六千三百四十四以元法除之得二十九日又四兩數相減之餘。卽中多於朔之數。而爲一月之閏分也。六劫當作七劫。置四千一百八十六數。以通法除之。

得七而通法又卽一劫之數。月法二千三百九十二爲再劫兩之數。則通法五百九十八者一劫之數也。則一月之閏法爲七劫之數矣。歲有閏餘十九分之七。析之則每月有閏餘二百二十八分之七也。

易九厄曰。初入元百六。陽九。次三百七十四。陰九。孟康曰。易傳也。所謂陽九之厄。百六之會也。按九厄當作无妄。易雜卦傳无妄災也。京房說无妄以爲大旱之卦。萬物皆死。無所復望。應劭云。天必先雲而後雷。雷而後雨。今無雲而雷。无妄者。无所望也。萬物無所望於天。災異之最大者也。漢儒引伸其義。故有陽九陰九經歲災歲之說。此亦緯書之類。孟康以爲易傳。猶稽覽圖稱中孚傳也。谷永傳。遭无妄之卦運。直百六之災。阨。論衡明雩篇云。災變大抵有二。有政治之災。有無妄之變。德鄴政得。災猶至者。無妄也。德衰政失。變應來者。政治也。又云。無妄之氣。歷世時至。又云。非常之變。無妄之氣。聞而至也。水氣閒堯。旱氣閒湯。恢國篇云。建初孟年。無妄氣至。須頌篇云。成湯加成。宣王言宜。無妄之災。不能虧政。寒溫篇云。按易無妄之應。水旱之至。自有期節。三國志注。公孫淵上孫權表。伏惟遭天地反易。遇無妄之運。劉涓子注吳都賦。引漢書此條。正作易无妄。可證魏晉時本尙未誤。李善注文選。屢引此文。並作陽九厄。則唐時已譌。不始於近代矣。无妄譌爲九厄。蓋字形相涉。或并改易爲易。以傳會陽九之文。不知水旱之災。陽不必九。九不獨陽也。

凡十二次。日至其初爲節。至其中斗建下爲十二辰。斗建上當有爲中二字。蔡邕月令章句。周天三百

六十五度四分度之一分爲十二次日至其初爲節至其中爲中氣。

孟仲季迭用事爲統首。寅申己亥爲四孟。子午卯酉爲四仲。丑未辰戌爲四季。故甲申曰孟統。甲子曰仲統。甲辰曰季統。淮南天文訓。木生於亥。壯於卯。死於未。火生於寅。壯於午。死於戌。金生於巳。壯於酉。死於丑。水生於申。壯於子。死於辰。孟仲季之序。蓋因於此。

律曆志下

積中七。中餘千七百一十八。當云積中十。

東九西七。乘歲數。并九七爲法。得一金水晨夕歲數。金水晨見。伏在東方。夕見。伏在西方。約其率。則晨見十六分之九。夕見十六分之七。故以十六爲總法。以九乘歲數。十六除之。得晨歲數。七乘歲數。十六除之。得夕歲數也。

壹見三百九十八日五百一十六萬三千一百二分。劉敞曰。三百九十八日五百一十六萬三千一百二分者。通計上文見伏之日分也。今作壹見字。疑後人妄改之。按。木土火稱一見者。以見統伏也。今水稱一復者。以復該晨夕也。上文見中法下。分注見數復數。其義已明。此下又有推五星見復之術。劉氏俱未檢照。輒疑後人妄改。甚違蓋闕之義。

日行四十六分度四十三。四十三當作三十三。

日行三分度一。六日而伏。三分當作二分。

壹復五百八十四日百二十九萬五千三百五十二分。劉敞曰。此又妄改爲壹復。自是通計晨夕見伏之日分也。說見上。

百三十七日千七百一十七萬一百七十分。土星伏三十七日有奇。上百字衍。

伏日行不盈九十二分度七十三分。下分子衍。

十七日順疾。十字衍。

盈元法除之餘不盈統者。統當作元。

以章月乘人統歲數。人當作入。

以十二乘閏餘。加十得一。加十當作加七。

以算餘乘人統歲數。算當作策。人當作入。

求八節。加大餘四十五。小餘千一百。林文炳曰。當作小餘千一十。林說是。

求二十四氣。三其小餘。加大餘十五。小餘千一十。林文炳曰。當云加大餘十五。三分其小餘千一十。按。

林說非也。千一十之數。三分之。則有畸零。不可入算。故三倍其小餘。本以統法爲日法。今以元法爲日法也。上云千一十者。一千五百三十九分日之餘。此云千一十者。四千六百一十七分日之餘。

推中部二十四氣皆以元爲法。部疑節之譌。

所得起其正算外則食月也。其當作天。

盈見中法得一則積中法也。下法字衍。

不盈者名曰月中餘。中字衍。

中次至日數次以次初數。中次之次當作以。

加後餘於中餘。後下當有中字。

數如法則見中也。數下當有除字則下當有後字。

推至日及入中次度數如上法。次下當有日字。

推朔日及入月數如上法。月下當有日字。

以六十除餘積次。餘字衍。

算盡之外則太歲日也。日字誤。當云太歲所在。

六物者歲時數日月星辰也。數字衍。

斗二十六。此下當有三百八十五分六字。賈逵云太初麻斗二十六度三百八十五分。姜岌云三統以

一千五百三十九分之三百八十五爲斗分。蓋周天以牽牛起算。終於南斗二十六度。所有零分歸於

斗度之末。故曰斗分。此斗分字當是分注。後人傳寫失之。

北九十八度。此下亦當有三百八十五分六字。

四分上元至伐桀。十三萬二千一百一十三歲。按。四分之術。至後漢始行。今劉子駿三統術亦著其說。

則西京已有之矣。淮南天文訓所述甲寅元。亦與四分同。

壬辰。晨星始見。師古曰。晨古晨字也。其字從日。曰音居玉切。按。說文。晨晨二字有別。晨夕字。从日。晨爲

房星。从晶。當作晨。或作晨。省文也。此晨星者。水星也。亦从日。

丙午還師。還當作逮。

世家。煬公即位十六年。汲古閣本作六十年。是也。史記魯世家。煬公六年卒。六下亦脫十字。

是歲。距上元十四萬二千五百七十七歲。按。自上元盡僖公五年。得十四萬二千五百七十七歲。凡言

距算者。皆外所求。則七十七歲當作七十六歲。

王莽居攝。盜襲帝位。自此以下。皆班氏所增入。非劉歆本文。上文初元元年。距建武七十六歲。亦班氏

增入也。

改元曰建武。歲在鶉尾之張度。按。光武建武元年。距上元十四萬三千二百五十五歲。滿歲星歲數去

之。歲餘一千五百五十九。以百四十五乘之。得二十二萬六千五十五。滿百四十四而一。得積次一千

五百六十九次餘百十九以十二除積次餘數九從星紀起算外則歲在壽星也又以六十除積次餘數亦九從丙子起算外則太歲在乙酉也志云歲在鶉尾之張度者蓋以太初元年歲在星紀距是歲一百二十八算未盈超辰之限故約略計之以爲當在鶉尾耳若以密率求之則太初改元歲星在婺女六度已是星紀之末歲星每年多行一分至太始二年歲星已度壽星而入大火即太歲亦超乙酉而在丙戌矣王莽傳建國五年歲在壽星倉龍癸酉八年歲躔星紀天鳳七年歲在大梁倉龍庚辰厥明年歲在實沈倉龍辛巳據此推至光武建武元年正當在壽星之次此實算也翼奉以元帝初元二年上封事云今年太陰建於甲戌此太陰即謂太歲

禮樂志

後董仲舒對策言王者欲有所爲宜求其端於天按仲舒對策已見本傳而志復載其文至四百言王吉疏已見本傳而志復載其文至百五十餘言司馬遷言李陵事已見遷傳而陵傳又載其文百五十言元帝初元二年地震下詔已見本傳而翼奉傳又載其全文

沸愈甚而無益 俞古愈字

是故纖微焦瘁之音作注瘁一作衰樂記作志微噍殺之音鄭氏解志微爲意細似曲當依此文作纖纖與識字形相涉而志又識之古文遂譌爲志耳衰殺聲相近較之瘁字爲長

以營亂富貴之耳目。營與熒通。營亂猶惑亂也。師古訓回繞。似非。

建始元年。丞相匡衡奏罷鸞路龍鱗。更定詩曰涓選休成。按志云奏罷者。謂去鸞路句。改爲涓選休成也。下章云奏罷黼黻周張。更定詩曰肅在舊典。亦謂去黼黻句。改爲肅若舊典也。郊祀志成帝初即位。丞相衡等奏定南北郊。又言甘泉泰畤紫壇有文章采鏤黼黻之飾。石壇仙人祠。瘞鸞路駢駒寓龍馬。不能得其象於古。宜皆勿修。故更去鸞路龍鱗。黼黻周張二語。其餘仍用舊文也。監本以涓選休成句屬天地章。以肅若舊典句屬日出入章。此誤之甚者。然文獻通考載元豐六年判太常寺陳薦議引郊祀歌涓選休成。天地竝況。證天地合祭之說。則北宋本已誤矣。

刑法志

孝文二年。左右丞相周勃陳平奏言。按公卿表。孝文元年十月。右丞相陳平爲左丞相。太尉周勃爲右丞相。八月。勃免。平獨爲丞相。二年十月。丞相平薨。十一月。勃復爲丞相。是平勃同爲丞相在元年。非二年也。文帝紀。元年十二月。除收帑相坐律。正平勃並相之時。志云二年。誤。

食貨志上

燂木爲耒。宋祁曰。燂木當爲揉木。按說文。燂。屈申木也。揉。字說文不收。當以燂爲正。史漢多古字。率爲校書人妄改。子京猶不免爾。何況餘子。

三歲更耕之。自爰其處。按春秋傳。晉於是乎作爰田。服虔孔晁皆云爰。易也。說文爰作越。越田。易居也。張湯傳。傳爰書。師古訓爰爲換。換與易同義。

還廬樹桑。師古曰。還繞也。還與環同。

其詩曰。有滄漭漭。與雲祁祁。按韓詩外傳引詩。亦作與雲祁祁。漢無極山碑。亦有與雲祁祁。雨我公田。遂及我私之文。蓋漢世經師傳授皆然。顏之推家訓云。詩有滄萋萋。與雲祁祁。毛傳。滄。陰雲貌。萋。雲行貌。滄。已是陰雲。何勞復云與雲。雲當爲雨。俗寫誤爾。班固靈臺詩云。習習祥風。祁祁甘雨。此其證也。之。推仕南北朝。雖疑雲爲誤字。不聞據他本以正之。則六朝本亦皆作與雲矣。大雅韓奕篇云。祁祁如雲。可證祁祁爲雲行貌。非轉寫之誤。後漢書左雄傳。作與雨祁祁。或後人校改。

大命將泛。孟康曰。泛音方勇反。宋祁曰。勇當作濫。按方勇卽泛之轉聲。說文風从凡聲。而汎亦有馮音。今人呼帆爲篷。亦聲之轉也。宋子京不知古音。故疑其誤。民命勤農。俞古愈字。下文貧弱愈困。民愈窮困之愈竝同。

食貨志下

孔僅使天下鑄作器。三年中至大司農。列於九卿。而桑羊爲大司農中丞。管諸會計事。按百官公卿表。大農令太初元年更名大司農。此孔僅爲大農令。在元鼎二年。尙無大司農之名也。史記平準書無司

字桑羊稱大農丞。不云中丞得之。

郊祀志上

後四年秦宣公作密時于渭南。史記作六年。誤。

設射不來。不來者。諸侯之不來朝者也。史記云。設射。狸首。狸首者。諸侯之不來者。按禮記射義。諸侯以

狸首爲節。狸首者。樂會時也。大射儀。奏狸首。鄭康成云。狸之言不來也。其詩有射諸侯首不朝者之言。

因以名篇。考工記祭侯之辭曰。毋或若女不寧。侯不屬於王所。故抗而射女。不屬者。不來朝會也。葺宏

所行。乃是古禮。戰國後禮廢。乃疑其神怪爾。

四曰陰。主祠三山。師古曰。三山卽下所謂三神山。按小司馬引顧氏說。東萊曲成有參山。卽此三山者

是也。師古注誤。

冬寒禱祠。塞古賽字。史記作賽。說文無賽字。當依班志。下竝同。

至中山晏溫。如淳曰。三輔謂日出清濟爲晏。說文。晏。天清也。濟與霽同。洪範曰。雨曰霽。史記作濟。

皆嘗鷓亨上帝鬼神。師古曰。鷓亨一也。韓詩采蘋曰。予以鷓之。唯錡及釜。亨音晉庚反。鷓。湘聲相近。亨

讀如享。服虔云。以享祀上帝也。師古讀如烹。非。

受此書申公。下云申公齊人。則非魯之申培公。蓋別是一人。

郊祀志下

十二年。酒下詔曰。元康四年。宣帝卽位之十二年也。

又祠太室山於卽墨。地理志。膠東卽墨縣有天室山祠。此云太室。疑誤。

三戶山於下密。地理志。下密縣有三石山祠。汲古閣本作古關水經注引地理志亦作石。

又祠參山八神於曲成。地理志作曲成。參山卽三山。八神之一。

蓬山石社石鼓於臨胸。注。地理志。蓬山作蓬山。按。地理志。臨胸縣有蓬山祠。注。誤。蓬爲蓬。

皆罷候神。候神二字當屬下句。謂候神之方士使者副佐也。

天文志

東井西曲星日戊。戊古鉞字。史記作鉞。俗本譌爲戌。

三星若合。是謂驚立絕行。立古位字。下文作驚位可證。

積薪在北戌西北。積水在北戌東北。戌當作戊。

元封中。星孛於河戌。占曰。南戌爲越門。北戌爲胡門。按。天官書。朝鮮之拔星。菲於河戒。小司馬引天文

志。元封之中。星孛於河戒。其占曰。南戒爲越門。北戒爲胡門。是戌爲戒之譌也。唐一行言。天下山河之

象。存乎兩戒。亦引星傳。北戒爲胡門。南戒爲越門之文。

五行志上

次二曰羞用五事。注：羞，進也。按：古文敬作羞，與羞相似，羞疑敬之譌也。又考：藝文志引書云：初一日五行，次二曰羞用五事。言進用五事以順五行也。五行藝文二志皆取劉歆之說，則歆所傳尚書本是羞字。孔光對曰：蝕事亦引書羞用五事。

劉向治穀梁春秋，數其禍福，傳以洪範。注：以洪範義傳而說之。傳字或作傅。讀曰附。予謂或說是也。

傳載睦、孟、夏侯勝、京房、谷永、李尋之徒所陳行事。傳亦當爲傅。讀曰附。言以仲舒向歆爲主，而附載睦

孟諸人說也。

建元六年六月丁酉，遼東高廟災。武帝紀作二月乙未。

建始元年正月乙丑，皇考廟災。成帝紀：皇曾祖悼考廟災，此有脫文。

五行志中之上

思曰容。應劭曰：容，通也。古文作容。按：伏生傳本作容。董生春秋繁露述五行五事云：思曰容。容者，言無不容。又云：容作聖。聖者，設也。王者心寬大無不容，則聖能施設，事各得其宜也。此志說思心之不容云：容，寬也。孔子曰：居上不寬，吾何以觀之哉。言上不寬大，包容臣下，則不能居聖位，則爲包容之容。非容智字明矣。容與恭從聽爲韻。鄭氏破容爲容，於義爲短。今漢書刊本作容，非容非容，亦失班志之舊。

霧恆風若。霧蒙聲相近。

史記成公十六年公會諸侯於周。注此志凡稱史記者皆謂司馬遷所撰也。按此條引單襄公見晉厲公視遠步高事見國語而太史公書無之此外所引史記如單襄公見晉三郤齊國佐一條晉惠公時童謠一條穀洛水鬪將毀王宮一條周三川震伯陽甫言周將亡一條夏后氏之衰二龍止於夏廷一條季桓子穿井得土缶一條隼集陳廷楛矢貫之石磬一條皆國語之文惟夏后二龍伯陽甫事見周本紀土缶楛矢事見孔子世家餘皆無之又戰國及秦事志稱史記者間與太史公書合而秦昭王三十四年渭水赤始皇二十六年有大人長五丈見於臨洮二世元年天無雲而雷今史記亦無之則班志所云史記非專指太史公書矣古者列國之史俱稱史記周本紀云太史伯陽讀史記陳杞世家云孔子讀史記而漢書藝文志稱仲尼以魯周公之國史官有法故與左邱明觀其史記據行事仍人道因興以立功就敗以成罰有所褒諱貶損不可盡見口授弟子邱明恐弟子各安其意以失其真故論本事而作傳明夫子不以空言說經也然則邱明所論次者謂之春秋傳國語乃左氏所錄史記舊文故亦可稱史記劉知幾以班志所引不云國語惟稱史記譬其忘本狗末逐近棄遠蓋未識此旨也史遷著書未嘗以史記名之卽孟堅亦未嘗以史記目太史公書小顏考之未詳爾

能者養之以福注之往也能養生者則定禮義威儀自致於福按律厯志引此文作養以之福師古訓

之爲往之福與取禍相對。此志亦當。然後人據今本左傳改之。與注意不合。

匪傲匪傲。詩作彼交匪敖。春秋傳作匪交匪敖。古書彼與匪通。詩彼交匪紆。荀子勸學篇作匪交匪紆。左傳引詩如匪行邁謀。杜預云。匪。彼也。

雷以二月出。其卦曰豫。以八月入。其卦曰歸妹。按孟喜卦氣圖。豫二月卦。歸妹八月卦。遠哉搖搖。春秋傳作遙遙。說文無遙字。當从漢志。

五行志中之下

劉向以爲殷道既衰。高宗承敝而起。盡涼陰之哀。天下應之。既獲顯榮。怠於政事。國將危亡。故桑穀之異。見注。桑穀自太戊時生。涼陰乃高宗之事。而此云桑穀卽高宗時出。其說與尙書大傳不同。或者伏生差謬。此自劉向差謬。非伏生誤也。郊祀志亦以桑穀爲太戊事。

五行志下之上

於易巽爲風爲木。卦在三月四月。易乾鑿度巽位在四月。又云巽漸三月。蓋立夏巽始用事。在三月四月之間。

秦孝文王五年。旃胸衍有獻五足牛者。此事不見太史公書。孝文王享國一年。無五年也。先是文惠王始都咸陽。史記惠文王十三年。始都咸陽。卽惠王也。此作文惠誤。

賀欲出光祿大夫夏侯勝當車諫。按此事又見勝傳。

是時吳王濞封有四郡五十餘城。按高帝紀六年以故東陽郡鄆郡吳郡五十三城立劉賈爲荊王吳

濞所封卽賈故地。故傳云王三郡五十三城而伍被傳云吳王四郡之衆。此志亦云四郡者楚漢之

際。會稽嘗析爲吳郡。灌嬰傳度江破吳郡。長吳下得吳守。遂定吳豫章會稽郡。此有會稽。又有吳郡之

證。吳王濞傳上患吳會稽輕悍。亦兩郡兼舉也。吳郡本會稽所分。言吳可以包會稽。高帝紀單稱吳郡。

則爲三郡。此兼舉吳會。故言四郡也。

五行志下之下

谷永以爲歲首正月朔日是爲三朝。按漢初以十月建亥爲歲首。正月非歲首也。

朔而月見東方。謂之仄慝。周禮疏引尙書五行傳作側匿。

地理志上

又北播爲九河。同爲逆河。逆當作迎。迎逆聲相近。義亦不異。宋子京改迎爲逆。於義雖通。終失班氏之

舊。

川曰庫池。嘔夷。注嘔夷出平舒。按師古之注。本於鄭氏周禮注。蓋以邠夷當嘔夷也。然孟堅實以澗水

爲嘔夷。故於代郡靈邱縣。云澗河東至文安。入大河。并州川。而於平舒之邠夷水。不云并州川。是班與

鄭異也。顏注雖宗後鄭，卻失孟堅之旨。

京兆尹。南陵霸水亦出藍田谷，北入渭。師古曰：茲水秦穆公更名，以章霸功。視子孫。按：此皆班氏本

文。謂霸水本名茲水，秦穆公始更名耳，非師古注也。師字後人妄加。

沂音先歷反。視讀曰示。此上當有師古曰三字。

恆農郡。按：京兆馮翊扶風不言屬司隸者，尊京輔也。恆農河東承三輔之下，故亦不言所屬。河內河南

則中隔太原上黨兩郡，故書屬司隸以別之。

武帝元鼎四年置。元鼎以前屬何郡，志失書。

河東郡。莽曰兆陽。兆陽當作兆隊。王莽傳：河東河內恆農河南潁川南陽爲六隊郡。以志考之，南陽

爲前隊，河內爲後隊，潁川爲左隊，恆農爲右隊，河東爲兆隊，祈隊則治河南之滎陽。莽傳云：祈隊故滎

陽也。

上黨郡。襄相。續志作襄垣。宋子京云：邵本作垣者是也。

河南郡。雒陽戶五萬二千八百三十九。按：縣邑有戶口數者，京兆之長安、馮翊之長陵、扶風之茂陵、

河南之雒陽、潁川之陽翟、僑陵、南陽之宛、蜀郡之成都、魯國之魯、楚國之彭城，凡十縣，惟雒陽注於郡

名之下。

中牟趙獻侯自耿徙此。臣瓚音義引春秋傳汲郡古文證此中牟非趙地。春秋正義史記集解皆載其說。師古以其與班氏異故不取。予謂魏晉諸儒地理之學極精。小顏黨同妒真。多所芟棄。如此類者。深可惜也。

陳留郡。武帝元狩元年置。按陳留故梁地。景帝分置濟川國。都濟陽。國除爲郡。武帝始更名。

南陽郡。鄧侯國。注卽蕭何所封。按蕭何初封本是沛郡之鄜。其後嗣乃封南陽之鄧。師古於此殊未了。

平氏。禹貢桐柏大復山在東南。淮水所在。按五嶽四瀆之祠。皆載於志。平氏有淮水祠。獨失書。恐傳寫有脫漏。

南郡。秦置。高帝元年更爲臨江郡。五年復故。按高帝元年。楚柱國共敖爲臨江王。都江陵。卽南郡故地也。本項羽所封。史家繫之高帝耳。其五年。敖子尉爲漢所虜。則復爲南郡矣。

江夏郡。鍾武侯國。王子侯表有鍾武侯度。此卽度所封也。志有兩鍾武縣。一屬零陵郡。一屬江夏郡。度爲長沙頃王之子。其初封必在零陵之鍾武。而志以江夏之鍾武爲侯國。蓋後來徙封。如春陵侯本在冷道。後移於南陽也。

九江郡。曲陽。應劭曰在淮曲之陽。按東海郡曲陽縣。注亦引應劭曰在淮曲之陽。二注當有一誤。續

漢志以此爲西曲陽。

山陽郡。郟成侯國。表未見封郟成者。宋子京云。郟當作邛。外戚侯表。邛成屬濟陰。濟陰與山陽相距不遠。疑子京說是也。

沛郡。敬邱侯國。按王子侯表。魯共王子政封瑕邱侯。疑卽此敬邱也。山陽郡有瑕邱縣。然不云侯國。魏郡。卽裴侯國。王子侯表作柳裴。

邯溝侯國。王子侯表作邯溝。

常山郡。高帝置。按項羽封張耳爲常山王。郡襄國。是常山之名。不始於高帝。蓋趙歇旣滅。遂因爲郡耳。高帝紀稱常山二十五城。志止十八縣。蓋後來稍分析之。襄國本王都所在。而志隸趙國。亦一證也。

中邱逢山。長谷諸水所出。東至張邑入濁。諸當依說文作渚。濁當依說文作澗。濁或作澗。蜀亦誤。南行唐牛飲山白陸谷。滋水所出。說文作白陘谷。

清河郡。清陽王都。按漢志稱王都者。惟清河之清陽。信都之信都。若秦山之盧。則云濟北王都。江夏之郟。則云衡山王吳芮都。以郡與國不同名也。廣陵之廣陵。則云江都易王非。廣陵厲王胥皆都此。此外無言王都者。淮南王安都壽春。則朱贛言風俗及之。

涿郡。南深澤。按中山有深澤縣。故云南以別之。李吉甫元和郡縣志。定州深澤縣。本漢南深澤縣。以

涿郡有深澤縣。故此加南以別之。然則中山之深澤有南字。涿郡之深澤無南字矣。與今本互異。以里望準之。中山實在涿郡之南。然續漢志於安平國之南深澤。亦云故屬涿。似今本元不誤。

平原郡。平昌侯國。續漢志謂之西平昌。以琅邪郡亦有平昌縣也。

千乘郡。溼沃。溼當作濕。音它合反。

博昌博水東北至鉅定。入馬車瀆幽州。博水當作時水。職方氏幽州其浸菑時是也。或作縣水。亦誤。

濟南郡。朝陽侯國。續志謂之東朝陽。以南陽郡亦有朝陽縣也。

獠侯國。蘇林音爻。蔡蕃音由。爻由聲相近。

泰山郡。博有泰山廟。岱山在西北求山上。求山上三字蓋兗州山之譌。

齊郡。鉅定。水經注作巨淀。定有澱音。語之轉也。後人又加水旁。

廣爲山濁水所出。說文爲作媯。

琅邪郡。朱虛東泰山。汶水所出。東至安邱入維。注前言汶水出萊蕪入濟。今此又言出朱虛入維。將桑

欽所說有異。或者有二汶水乎。按水經有二汶水。一出泰山萊蕪縣原山。一出朱虛縣泰山。源流各

異。師古似未見水經。故云然。

靈門有高屛山。注屛卽柘字也。或云屛乃原之譌。

拒根艾水東入海。以水經注考之。即拒艾水也。根乃拒之譌。拒字水經注俱从手旁。

東海郡。海曲。曲當作西。續志。廣陵郡海西縣故屬東海。沈約宋志。臨淮郡海西縣前漢屬東海。後漢

晉屬廣陵是也。三國志糜竺傳。先主轉軍廣陵海西。

蘭祺侯國。王子侯表作蘭旗。

都陽侯國。應劭曰。春秋齊人遷陽是。按。城陽國陽都縣注。亦引應劭曰。齊人遷陽故陽國是。二注似有

一誤。然都陽侯音本城陽戴王之子。或當日即割陽都之鄉爲侯國。本非兩地乎。

臨淮郡。諸郡國皆書屬某州。惟臨淮、武都、隴西、金城、天水、武威、張掖、酒泉、敦煌、安定、北地、九真、河間、廣

陽、留川、膠東、高密、泗水、六安失書。按。臨淮、泗水當屬徐州。留川、膠東、高密當屬青州。河間、廣陽當屬冀

州。北地當屬朔方。六安當屬揚州。九真當屬交州。武都以下九郡當屬涼州。

武帝元狩六年置。晉志。漢武帝分沛東陽置臨淮郡。東陽。楚漢之際所置郡也。漢初屬吳國。

取慮。注。取音趨。又音秋。慮音慮。左傳釋文引如淳說。取音陬。訾之陬。慮音邾。婁之婁。

丹陽郡。故鄣郡。屬江都。劉原父謂秦三十六郡無鄣郡。疑鄣非郡名。武帝以故鄣地爲丹陽郡。志但

當云故鄣。屬江都。以是譏班氏之誤。此真警說也。志云故梁。故淮南。故齊。故楚。皆謂諸侯王國。鄣非國

名。何以得稱故鄣乎。秦無鄣郡。而楚漢之際則有之。高帝紀以故東陽郡。鄣郡。吳郡五十三縣立荆王。

是高王之世有鄆郡矣。若縣名有故鄆，此猶河南之故市、涿郡之故安。當時或別有取義，豈可援以爲鄆非郡之證。借如劉說，但當云故屬江都，何必又云故鄆。而下文更名丹陽之語，更不可通矣。

胡孰，宋祁曰：胡當作姑。按：胡孰，續志作湖熟。今上元縣東南五十里有湖熟鎮，卽漢故縣所在。自漢至晉，有湖熟縣，無姑孰縣。宋說非是。

黟漸江水出南蠻夷中。宋祁曰：漸字當作浙字。水經本作漸江水。子京亦失考。

零陵郡。武帝元鼎六年置。當云故屬長沙。

廣漢郡。什方。表作汁防。史記表作汁邠。

葭明。應劭曰：音家盲。古音明如盲。

蜀郡。汶江澱水出徼外南，至南安東入江。按：說文：澱水出蜀汶江徼外東南入江。从水，我聲。別無澱字。水經注：澱水出徼外，逕汶江道南，至南安入大澱水。大澱水又東入江，亦從我，不从澱。志作澱者，傳

寫之譌。然廣韻十六哈部有澱字。注云：水名。出蜀，則沿譌實始於唐矣。

越蕩郡。闌。續志作闌。當从之。若本文是闌，注不應又音闌也。

群柯郡。同竝。應劭曰：竝音伴。竝伴聲相近。

地理志下

金城郡。縣十三。按昭帝紀始元六年以邊塞闊遠取天水隴西張掖各二縣置金城郡是金城始置。

止有六縣此十三縣之中惟破羌允街兩縣宣帝所置其餘俱不書置自何時可見志之闕漏者多也。

天水郡。武帝元鼎三年置。蓋析隴西置李廣隴西成紀人志屬天水是其證也。

武威郡。故匈奴休屠王地。武帝太初四年開。紀在元狩二年當從紀。

張掖郡。故匈奴昆邪王地。武帝太初元年開。按武帝紀元鼎六年分武威酒泉郡置張掖敦煌郡。敦

煌爲酒泉所分則張掖必武威所分矣。四郡之地雖皆武帝所開然先有武威酒泉而後有張掖敦煌。

以內外之詞言之。武威酒泉當云元狩二年開。張掖敦煌當云元鼎六年分某郡置不必云開也。昆邪

來降在元狩間而志以爲太初。張掖乃武威所分而志以張掖屬元年。武威屬四年皆誤。

酒泉郡。武帝太初元年開。紀在元狩二年。

敦煌郡。武帝後元年分酒泉置。紀在元鼎六年。

效穀師古曰本魚澤障也。桑欽說孝武元封六年濟南崔不意爲魚澤尉教力田以勤效得穀因立爲縣

名。此班氏本文非小顏注也。桑欽書唐初已失傳師古曰三字衍。

安定郡。武帝元鼎三年置。蓋析北地置。

上郡。膚施有五龍山帝原水黃帝祠四所。按郊祀志宣帝立五龍山僊人祠及黃帝天神帝原水凡

四祠於膚施五龍山一也。帝即天神帝二也。原水三也。黃帝四也。

朔方郡屬并州。按武帝元封五年置十三部刺史并與朔方各自為部未嘗屬并州也。朔方之屬并

乃光武建武十一年事耳。上郡亦屬朔方部。故馮野王為上郡太守朔方刺史蕭育奏封事薦之。

雲中郡北輿注闕駟曰廣陵有輿故此加北。按輿縣屬臨淮後漢始屬廣陵。

代郡班氏秦地圖書班氏此注疑有脫譌。秦地圖蓋即蕭何所收者琅邪郡長廣縣奚養澤在西秦

地圖曰劇清地史引秦地圖祇此二條。

狝氏孟康曰狝音權氏音精示有祁音氏有支音祁與權支與精聲皆相近。

漁陽郡白檀瀟水出北蠻夷注瀟音呼鴟反。按水經注瀟水流逕漁陽白檀縣故城地理志曰瀟水

出縣北蠻中蓋鄴元所見之漢書本作瀟水不知何時譌瀟為瀟師古不能正也。漢之白檀縣在今古

北口外瀟水所經瀟瀾古今字別無瀟水之名。

趙國襄國西山渠水所出東北至任入瀆又有藜水馮水皆東至朝平入澗。按說文澗水出趙國襄

國之西山東北入瀆此渠水當是澗水之譌說文又云澗水出趙國襄國東入澗此馮水恐亦澗水之

譌也。

廣平國武帝征和二年置為平干國宣帝五鳳二年復故。按王溫舒為廣平都尉在元朔元狩之間。

是平干國未置之前。已爲廣平郡矣。五鳳二年。平干繆王坐殺謁者。會薨。不得代。國除。仍爲廣平郡。故云復故也。當云故廣平郡某年置。乃與復故之文相應。哀帝建平三年。更置廣平國。志又失書。皆脫漏之甚者。

河間國。故趙。按。河間與真定信都廣平皆故趙地。常山中山雖爲郡。仍屬趙也。志或書或不書。

留川國。劇。按。北海郡亦有劇縣。志稱留川後并北海。則二劇疑卽一地。然北海之劇。本是侯國。卽留川懿王子錯所封。蓋析劇縣之鄉爲侯國。別屬北海。而劇縣之隸留川如故。非重出也。

東平國。故梁國。當云故梁。無國字。

廣陵國。高帝六年。屬荊州。州字衍。高帝六年。封劉賈爲荊王。兼有廣陵之地。故云屬荊。其時未設諸州。刺史不得言荊州也。

本秦京師爲內史。分天下作三十六郡。今以志考之。則三十六郡者。三川、河東、南陽、南郡、九江、會稽、潁川、碭、泗水、薛、東郡、琅邪、齊、上谷、漁陽、右北平、遼東、遼西、代、鉅鹿、邯鄲、上黨、太原、雲中、九原、鴈門、上郡、隴西、北地、漢中、巴蜀、長沙、南海、桂林、象郡也。裴駙注史記。以鄠、黔中與內史足三十六郡之數。而不數南海三郡。與漢志不合。

高祖增二十六。謂河內、汝南、江夏、豫章、常山、中山、清河、魏郡、涿郡、勃海、平原、千乘、泰山、東萊、東海、廣漢。

定襄、桂陽、武陵、鄆郡、城陽、濟南、楚國、燕國、淮陽國、并內史也。晉志以鄆郡爲秦置。此志但云故鄆郡。不云秦郡。蓋楚漢之際所置也。孝惠時齊王獻城陽郡爲魯元公主湯沐邑。高后割齊之濟南郡爲呂王奉邑。知此二郡當置於高帝矣。

文景各六。文帝六。謂河閒、菑川、膠東、膠東、廬江、衡山。景帝六。謂北海、濟東、即東平山陽、濟陰、江都、廣川也。文帝建國九。濟南、城陽因舊郡。濟川即泰山郡。景帝建國九。中山、常山、清河因舊郡。濟川國後廢。故皆不數。

武帝二十八。謂馮翊、扶風、恆農、陳留、臨淮、零陵、天水、安定、西河、朔方、武都、武威、張掖、酒泉、敦煌、犍爲、牂柯、越巂、益州、元菟、樂浪、蒼梧、交阯、合浦、九真、廣平、真定、泗水也。南海、鬱林、日南即秦南海三郡。沈黎、文山、珠厓、儋耳、臨屯、真番、蒼海後皆廢。故不數。

昭帝一。金城也。

侯國二百四十一。今數之。止百九十有四。蓋史有闕文。

自井十度至柳三度。謂之鶉首之次。十二次宿度。惟載鶉首、鶉火、壽星、析木。飯皆闕如。蓋班氏未定之本。其述分壘。既以東平、須昌、壽張爲宋分。又云東平、須昌、壽張皆在濟東。屬魯。非宋地也。嘗考亦疑而未決之詞也。所述星度。與蔡邕月令章句合。較之律曆志。每次大率差五六度。

汝南之召陵、灊、潁、新汲、西華、長平、河南之開封、中牟、陽武、酸棗、卷。以志考之，新汲屬潁川，非汝南。酸棗屬陳留，非河南。蓋漢時郡國屬縣，更易靡常，史家不能考而悉言之。

自東井六度至亢六度，謂之壽星之次。東井當作軫。

南至浮水、繁陽、內黃、斥邱。志未見浮水縣，繁陽以下屬魏郡。

南得涿郡之易容城、范陽、北新城。按：中山國有北新城縣，不屬涿郡。成城字亦異。

自危四度至斗六度，謂之析木之次。危當作尾。

子之營兮，遭我庫囂之閼兮。古書營與環通。說文：營，市居也。讀如閼關之關。還與環音亦同也。猛農聲相近，故文或爲囂。

東平、須昌、壽張。壽張本名壽良，光武避趙王良諱，改良爲張。此班氏追改。

溝洫志

山行則楫。史記：山行卽橋，橋與楫，則與卽皆聲相近也。

武安侯田蚡爲丞相，其奉邑食鄒。鄒與兪同。清河郡之縣也。兪侯轅布子賁，以景帝中六年嗣侯。元狩六年，坐爲太常犧牲不如令，國除。當武安爲相時，賁尙無恙，而奉邑得食鄒者，布封邑僅千八百戶，除所封之外，仍屬之有司也。

藝文志

記百三十一篇。七十子後學者所記也。按鄭康成六藝論云。戴德傳記八十五篇。戴聖傳記四十九篇。此云百三十一篇者。合大小戴所傳而言。小戴記四十九篇。曲禮。檀弓。雜記。皆以簡策重多。分爲上下。實止四十六篇。合大戴之八十五篇。正協百卅一之數。隋志謂月令。明堂位。樂記三篇。爲馬融所足。蓋以明堂陰陽三十三篇。樂記二十三篇。別見藝文志。故疑爲東漢人附益。不知劉向別錄已有四十九篇矣。月令三篇。小戴入之禮記。而明堂。陰陽。與樂記。仍各自爲書。亦猶三年問。出於荀子。中庸。緇衣。出於子思子。其本書無妨單行也。記本七十子之徒所作。後人通儒各有損益。河閒獻王得之。大小戴各傳其學。鄭氏六藝論言之當矣。謂大戴刪古禮二百四篇。爲八十五篇。小戴又刪爲四十九篇。其說始於晉司空長史陳邵。而陸德明引之。隋志又附益之。然漢書無其事。不足信也。或謂漢書不及禮記。考河閒獻王所得書。禮記居其一。而郊祀志引禮記。燔柴於太壇。祭天也。瘞葬於太折。祭地也。又引禮記。天子祭天地及山川。歲徧。又引禮記。天子籍田千畝。以事天墜。又引禮記。祀典。即祭法也。律麻。志謂之祭典。功施於民。則祀之。天文。日月星辰。所昭仰也。地理。山川海澤。所生殖也。又引禮記。唯祭宗廟社稷。爲越縉而行事。梅福傳引禮記。孔子曰。某。般人也。韋玄成傳亦引禮記。王制。禮記。祀典之文。皆在四十九篇之內。志不別出。記四十九篇者。統於百三十一篇也。

春秋古經十二篇。謂左氏經也。劉歆傳。歆校祕書。見古文春秋左氏傳。又云。左氏傳多古字古言。許慎五經異義言。今春秋公羊說。古春秋左氏說。

合於堯之克讓。注。讓古讓字。按說文。揖讓字从手。責讓字从言。數奪字从支。

易之嗛嗛。一謙而四益。注。嗛字與謙同。古書言旁字與口旁字往往相通。故謙或爲嗛。

五子胥八篇。五古伍字。呂氏春秋。五員亡荆。古今人表。伍參亦作五參。非文之譌。陳涉傳。鉦人五逢。史

記作伍徐。

凡數術百九十家。十字衍。

廿二史考異卷八

漢書三

陳勝傳

陳勝字涉，陽城人。師古曰：地理志屬汝南郡。按汝南、潁川皆有陽城縣。汝南之陽城爲侯國，宣帝時始置。此當是潁川之陽城也。

項籍傳

梁使羽與沛公別攻城陽。城陽當作成陽。

諸別將皆屬號卿子冠軍。皆屬下當有義字。

瑕邱公申陽者。孟康曰：瑕邱縣之老人也。姓申，名陽。子謂此公非老人之稱。春秋之世，楚縣令皆僭稱

公。楚漢之際，官名多沿楚制。故漢王起沛，稱沛公。楚有蕭公、薛公、郟公、柘公。漢有滕公、戚公。皆縣令之稱。此瑕邱公亦是瑕邱縣令。孟說非也。

張耳傳

東井者，秦分也。先至必亡。亡字疑誤。

貫高等乃壁人柏人。要之置廁。文穎曰。置人廁壁中。以伺高祖。予謂置者。郵傳之名。廁與側同。非廁瀾之廁也。伏人於置側。欲要而殺之。

韓王信傳

成帝時。繼功臣後。封增兄子岑爲龍韃侯。薨。子持弓嗣。按功臣表。元封當作元延元年。節侯共以寶從父昆弟紹封。子斂嗣。蓋增之兄子。於寶爲從父昆弟也。惟兩侯之名。表傳各異。未詳孰是。

荆燕吳傳

荆王劉賈。宗室王例不書姓。劉賈劉澤獨書姓。衍文。

故孽子悼惠王王齊七十二城。庶弟元王王楚四十城。按高帝紀。封齊王七十三縣。此云七十二。或彼文誤也。楚元王傳及高紀俱云王三十六縣。此云四十城。恐誤。

御史大夫鼂錯營或天子。師古曰。營謂回繞之也。營與熒通。非回繞之義。

劉向傳

父德。武帝時。治淮南獄。按淮南王安以謀反誅。事在元狩元年。此傳言昭帝即位。德待詔丞相府。年三十餘。自元狩元年。數至後元二年。昭帝即位。實三十六年矣。當淮南獄起之時。恐德尙未生。安得預治獄之列。

孝武帝時。兒寬有重罪。繫按道侯韓說諫曰。前吾邱壽王死。陛下至今恨之。今殺寬。後將復大恨矣。上感其言。遂貰寬。復用之。此事寬傳不載。韓說名在佞幸傳。而能爲寬強諫。亦自可取。當表而出之。

下太傅韋玄成。玄成爲太子太傅。不當刪太子字。蓋轉寫失之。

故其詩曰。密勿從事。密勿卽黽勉。聲之轉也。古讀勿如沒。爾雅。黽沒。勉也。亦密勿之異文。

日月鞠凶。鞠告聲相近。

雨雪庶庶。見睨聿消。聿曰聲相近。

易曰。飛龍在天。大人聚也。聚造聲相近。

及秦惠文、武、昭、嚴、襄五王。惠文一也。武二也。昭三也。嚴襄卽莊襄四也。此云五王者。蓋昭王之後。尙有

孝文王。傳脫孝文二字耳。

劉歆傳

博見強志。志古識字。後文賢者志其大者。不賢者志其小者。載文志多見而志之。皆從古文。

田叔傳

趙、涇城人也。史記、涇城今在中山國。考地理志。中山有苦涇。有陸成。無涇城縣也。

曹參傳

遂取臨淄。還定濟北郡。師古曰。時未有濟北郡。史追書之耳。按。項羽封田安爲濟北王。都博陽。田榮攻

殺安。并三齊之地。因以濟北爲郡。非追書也。

擊龍且軍於上假密。文穎曰。或以爲高密。高假聲相近。

參之相齊。齊七十城。按。吳王濞傳。悼惠王王齊七十二城。高五王傳亦云。食七十餘城。此云七十者。舉成數也。

哀帝時。乃封參玄孫之孫本始爲平陽侯。按。功臣表。本始乃參玄孫之玄孫。傳脫玄字。

張良傳

景駒自立爲楚假王。在陳留。陳字衍。

封雍齒爲什方侯。功臣表作汁防。

陳平傳

陽武戶牖鄉人也。師古曰。陽武。縣名。屬陳留。按。地理志。陽武屬河南。不屬陳留。

嬰封平爲曲逆侯。盡食之。漢時封縣侯。戶數多少不同。如蕭何始封鄼。食八千戶。後又益封二千戶。元

狩中。以鄼戶二千四百封其曾孫慶宣。帝時。以鄼戶二千封其玄孫建世。封號雖同。而租入迥別。蓋一

縣之戶。不止此數。除侯所食外。其餘歸之有司也。高祖功臣盡食一縣者。惟平一人。

周勃傳

於是陰謀以爲少帝、及濟川、淮陽、恆山王皆非惠帝子。此稱恆山、後稱常山、史駁文也。考外戚恩澤侯表、高后時以孝惠子侯者四人、襄城侯義、三年爲常山王。更名卽少帝也。軹侯朝、四年爲常山王。壺關侯武、六年爲淮陽王。昌平侯大、七年爲呂王。異姓諸侯王表、高后七年呂王產徙梁、十一月丁巳、王大始故平昌侯。恩澤侯表作昌平侯傳稱濟川王、表稱呂王、其實一人也。初高后割齊之濟南郡爲呂王奉邑、及呂產徙封、改呂國曰濟川、以王孝惠之子。此事之所宜有者、則濟川卽濟南矣。孝景時分梁爲濟川國、考梁孝王始封、其時濟南王辟光尙存、七國旣平、梁又未嘗益封、此兩濟川者、名同而實異也。

文帝擇勃子賢者、皆推亞夫、迺封爲條侯。師古曰、縣在勃海、地理志作舊字、其音同耳。按地理志、勃海郡有脩市縣侯國、應劭讀脩爲條、此清河綱王子寅所封也。又信都國有脩縣、師古亦讀爲條。亞夫所封、蓋信都之脩、非勃海之脩市也。志作脩、不作舊、小顏注誤。

夏侯嬰傳

夏侯嬰沛人也。嬰本夏侯氏、而標曰稱滕、不稱夏侯、石奮傳標題不云石、而云萬石、皆因史公元文、然於例終未盡一。

會孫顏、尙平陽公主、坐與父御婢紆自殺、國除、顏尙主、主隨外家姓、號孫公主、故滕公子孫嬰爲孫氏。

按漢景帝女平陽公主。本陽信公主。王皇后生。元帝女平陽公主。衛婕妤生。其外家皆非孫氏。此夏侯頗所尙之平陽公主。蓋別是一人。不知何帝女也。馬端臨帝系考載。高祖一女。魯元公主。文帝二女。館陶長公主。及周勃子勝之所尙公主。景帝三女。平陽公主。南宮公主。隆慮公主。武帝五女。鄂邑。蓋長公主。夷安公主。衛長公主。諸邑公主。陽石公主。宣帝二女。館陶公主。敬武公主。元帝三女。平都公主。平陽公主。穎邑公主。皆據班史紀傳。然尙有未備。如博成侯張建。建始四年。坐尙陽邑公主。與婢姦。主旁數醉罵主。免。夏侯頗尙平陽公主。成帝微行。過陽阿。主作樂。此三事皆遺漏。而南宮公主壻。彰申。見功臣侯表。馬氏亦失書。

灌嬰傳

灌嬰、睢陽販繒者也。依班史例。當云睢陽人也。以販繒爲生。

傅寬傳

傅寬以魏五大夫騎將從。傅寬斬歙二人。史失其所居郡縣。

酈食其傳

陳留高陽人也。按地理志。陳留郡無高陽縣。蓋鄉名。非縣名。涿郡琅邪郡皆有高陽縣。然非食其所居之高陽也。高祖紀。沛公西過高陽。文穎云。聚邑名。屬陳留圉。按國縣漢屬淮陽。後漢始屬陳留。臣瓚云。陳留傳在雍邱。

西南。

婁敬傳

婁者，劉也。賜姓劉氏。婁劉聲相近。今吳人呼婁江曰劉家河。吾邑婁塘市，土人亦呼劉。

濟北王勃傳

國除爲北安縣，屬泰山郡。按地理志，泰山郡無北安縣，惟盧縣。注云濟北王都，疑北安爲盧之誤。或初名北安，而後改盧也。

息夫躬傳

烏孫兩昆彌弱，卑爰寔強盛。卑爰寔，匈奴傳作卑援寔。

循烏孫就屠之跡，孫字衍。

衛綰傳

代大陵人也。按地理志，大陵縣屬太原，不屬代郡。漢初以山南太原之地屬代國，故繫大陵於代。

直不疑傳

稍遷至中大夫。按公卿表，景帝中六年，中大夫令直不疑娶爲衛尉。此傳脫令字。中大夫令本衛尉也。景帝初改，後復。

周仁傳

以是得幸入臥內。周仁列於佞幸。乃與萬石君直不疑同傳。似非其倫。

張敞傳

景帝時。尊重常爲九卿。至武帝元朔中。代韓安國爲御史大夫。按公卿表。敞代安國爲御史大夫。在元光四年。非元朔也。任御史大夫五年。以老病請退。則在元朔中耳。表於景帝五年。書安邱侯張敞爲奉常。據傳。敞爲安邱侯說少子。未嘗嗣侯。此表之誤也。又表於景帝元年。有廷尉敞。不書姓。疑亦張敞也。

文三王傳

地北界泰山。西至高陽。蘇林曰。陳畱北一作縣。高陽非縣名。文穎以爲聚邑名者。得之。

與睢陽太守客俱出同車。按睢陽非郡名。不得有太守。當作淮陽。因上有睢陽字。相涉而誤耳。史記本

作淮陽。淮陽國景帝四年除爲郡。故得置太守。梁與淮陽接壤。故太守客得至梁境。爲睢陽人所殺也。

賈誼傳

夫樹國固必相疑之執。沈彤曰。夫當作大。鄭氏云。今建立國秦大。其執必固相疑也。若作夫樹國云云。則當請廢封建矣。或於固字句絕。則當請無立國於險矣。而下文皆不之及。但言國不可太大。宜兼建諸侯。而少其力。故知夫爲大之譌。

諸侯之地。其削頗入漢者。爲徙其侯國。及封其子孫也。所以數償之。沈彤曰。也當作他。謂諸侯或以罪黜。其地被削。多入於漢者。若因其所存地爲國。則國小。而其子孫亦不得封。故爲之徙其侯國。并封其子孫於他所。如其被削之數償之也。師古注誤。

病非徒癩也。又苦蹠。師古曰。蹠古蹠字。音之石反。足下曰蹠。今所呼腳掌是也。按說文無蹠字。小顏讀爲蹠。恐亦臆說。當是啉字之譌。說文啉。脛肉。一曰曲脛。讀若達。渠道切蹠亦當從說文作蹠。蹠。爾戾也。啉蹠謂足脛反戾。不便行動。

鼂錯傳

丞相青翟。中尉嘉。廷尉歐劾鼂錯。是時開封侯陶青爲丞相。翟字衍文也。因武帝時有丞相嚴青翟。相涉而誤。景帝紀。元年。遣御史大夫青翟。誤與此同。

枚乘傳

凡可讀者。不二十篇。不當作百。藝文志。枚皋賦百二十篇。

路溫舒傳

鉅鹿東里人也。地理志。鉅鹿郡無東里縣。

韓安國傳

梁城安人也。按地理志成安縣屬陳留郡。陳留本梁地。武帝始置爲郡。故史繫之梁耳。城當作成。若是則北發月氏可得而臣也。師古曰。發猶徵召也。北發。北狄地名。師古注誤。詳見武帝紀。

趙敬肅王彭祖傳

大鴻臚禹。王禹也。

中山靖王勝傳

令諸侯以私恩自裂地分其子弟。而漢爲定制封號。輒別屬漢郡。按地理志。諸侯王國二十。如趙、真定、河間、廣陽、城陽、廣陵皆止四縣。菑川、四水止三縣。高密、六安皆五縣。魯六縣。東平、楚皆七縣。竊疑漢初大封同姓。幾據天下之半。文景以後。稍有裁制。然諸侯王始封。往往兼二三郡之地。其以罪削地者。史亦不多見。何至封城若此之小。及讀中山王勝傳。謂武帝用主父偃謀。令諸侯以私恩自裂地封其子弟。而漢爲定制封號。輒別屬漢郡。漢有厚恩。而諸侯地稍自分析弱。小云。始悟諸侯王國所以日削者。由王子侯國之多。以王子侯表徵之。城陽五十四人。趙三十五人。河間二十三人。菑川二十一人。魯二十人。王國之食邑。皆入於漢郡。無怪乎封圻之日蹙矣。郡領縣多者。無過於琅邪。琅邪縣五十一。東海縣三十八。琅邪與城陽、菑川、膠東、高密四國鄰。東海與魯、泗水、楚、城陽諸國鄰。侯國之析置者。多屬焉。此所領之所以多於它郡也。中山之陸成。表作陸城新處。表作薪處安險皆嘗爲侯國。改屬它郡矣。陸成新處皆屬

涿惟安險表失書所宣元之世中山絕而復封所封又是帝子故稍以舊封益之如北新城劉向以爲屬亦當屬涿郡也
涿郡地理志未論十二國而志屬中山亦是後來益封之證也
分城蓋出於劉向

哀帝復立雲客弟廣漢爲廣平王薨無後平帝元始二年復立廣川惠王曾孫倫爲廣德王奉靖王後

羅願曰按諸侯王表廣漢至王莽時猶在安得遽云薨無後此廣德王倫自以廣川系絕故封考之廣川惠王傳可見非續中山也中山子孫侯者二十餘人不應取於見絕之廣川明矣大昕按劉敞以此倫封廣德王廣川王後又封廣德王俱是平帝二年事必有一誤今據羅氏辨正則此傳薨無後以下二十三字明是衍文倫瘞字形相近非有二人也

李廣傳

隴西成紀人也按地理志成紀縣屬天水不屬隴西天水郡武帝所置漢初蓋屬隴西也
典屬國公孫昆邪即平曲侯公孫渾邪丞相賀之大父也

將軍其率師東轅彌節白檀孟康曰白檀縣名屬右北平按地理志白檀屬漁陽不屬右北平孟注因下有右北平字而誤耳

衛青霍去病傳

路博德西河平州人地理志西河郡有平周無平州

董仲舒傳

先是遼東高廟長陵高園殿災。仲舒居家。推說其意。以稟未上。主父偃侯仲舒私見嫉之。按主父偃傳。元光元年。西入關。而高廟高園殿災。乃在建元六年。其明年始改元光。計其年月。似不相應。

公孫弘傳

其以高成之平津鄉戶六百五十。封丞相弘爲平津侯。恩澤侯表云三百七十三戶。高成屬勃海郡。表作高城。

好問近乎知。此禮記中庸文。今本作好學。

兒寬傳

居位九歲。以官卒。表稱爲御史大夫八年卒。

張湯傳

劾鼠掠治。傳爰書。傳當作傳。音附。謂附於爰書也。師古訓爲傳逮。似非。王朝。齊人以術至右內史。公卿表作王臈。臈與朝同。司馬遷傳。爰盡朝錯列傳第四十一。卽臈錯也。

張安世傳

子勃嗣。表作敞。古書勃爲敦。敦與敞字形相涉。因譌爲敞耳。

杜業傳

業有材能。業字君都。見公卿表。

鉅鹿太守孫宏。翟方進傳作孫閔。

司馬遷傳

昔在顛頊。劉知幾謂篇首當云司馬遷字子長。馮翊夏陽人。繼以其自序曰云云。方合著述之體。其說固然。然此例人所共知。孟堅命世大才。詎猶未了。蓋叔皮父子踵史遷而作書。故自敍一篇。悉因舊文。附以後事。取述而不作之義。意主撝謙。非失於檢照也。

燕刺王旦傳

其者寡人之不及與。其者之者。讀如諸。

廣陵王胥傳

宣帝卽位。封胥四子。聖曾寶昌皆爲列侯。下文云胥子南利侯寶。坐殺人奪爵。卽四侯之一也。子弟晦之曰考。王子侯表。且有朝陽荒侯聖。平曲節侯曾。南利侯昌三人。別無名寶者。表稱南利侯昌。地節二年。坐賊殺人免。此傳云南利侯寶。疑誤。

武五子傳贊

建元六年，蚩尤之旗，其長竟天，後遂命將出征，略取河南，建置朔方。其春，戾太子生。按本傳，戾太子，元狩元年立為皇太子，年七歲矣。初上年二十九，乃得太子，甚喜，以年歲推之，戾太子生於元朔元年，非建元六年也。衛青傳，元朔元年春，衛夫人有男，外戚傳，孝武衛皇后元朔元年生男據，遂立為皇后，立七年，而男立為太子，皆與本傳合。孟堅贊語似未推校年歲。若衛青收河南，置朔方郡，則在元朔二年，又在戾太子生之後矣。

嚴助傳

而中國之人不能其水土也。師告曰：能堪也。能耐二字，古書多通用。食貨志：能風與旱，鼃錯傳：其性能寒，其性能暑。趙充國傳：漢馬不能冬。西域傳：不能饑渴。師古皆讀如耐。此亦當從耐音。

朱買臣傳

會邑子嚴助貴幸。邑子猶言邑人，助與買臣皆吳人，同邑，故有邑子之稱。疏廣傳：公卿大夫，故人邑子，設祖道，供張東都門外。趙廣漢傳：廣漢疑其邑子榮畜教令。師古曰：蘇賢同邑之子也。尹翁歸傳：定國家在東海，欲屬託邑子二人。師古曰：邑子，同邑人之子也。皆與此同義。六朝碑多有題邑子者。

吾邱壽王傳

吾邱壽王，兩都賦序作虞邱，虞吾聲相近。

東方朔傳

平原厭次人也。師古曰：高祖功臣表有厭次侯爰類，是則厭次之名，其來久矣。而說者乃云後漢始爲縣，於此致疑，斯未通也。按地理志：平原郡有富平侯國，應劭云：明帝更名厭次，後人因疑西京無厭次之名。考：厭次侯爰類傳：子至，孝文五年以謀反誅，國除，而張安世封富平侯，在昭帝時，其封邑本在陳留郡，及子延壽嗣侯，上書讓減戶邑，徙封平原，乃在宣帝之世，然則昭帝以前，平原無富平侯國也。蓋厭次國除之後，本爲厭次縣，宣帝移富平侯國於此，始去厭次之名。明帝時，仍復其舊，水經注謂厭次故名，非始明帝，蓋復故耳。其說精而當矣。漢時列侯國除，有卽爲縣者，如武帝以穰之盧陽鄉，宛之臨駮聚，封霍去病爲冠軍侯，去病子嬪薨，國除，爲冠軍縣是也。武帝以高成之平津鄉，封公孫丞相爲平津侯，元帝以僮之樂安鄉，封匡衡爲樂安侯，而地理志無平津樂安縣，是國除之後，仍爲鄉矣。南陽郡有博山侯國，故順陽縣，哀帝以封丞相孔光，改名，明帝改曰順陽，亦是從其舊名，與厭次正相類。是婁數也。師古曰：婁數，戴器也，以盆盛物，戴於頭者，則以婁數薦之。釋名：婁數，猶局縮，皆小意也。說文：櫛，盥戴器，婁數卽櫛，盥聲之轉也。與寄生聲亦相近。故樹上之寄生，亦有婁數之名。廣韻：婁數，四足凡也。此與蘇林四股鉤之說相近，皆以形相似名之。

公孫賀傳

語在江充戾園傳。按外戚王夫人傳云。語在戾太子傳。劉屈氂傳云。語在太子傳。上文有戾字。故但稱太子。而此與江充傳俱稱戾園。亦例之不一也。

朱雲傳

成帝時。丞相故安昌侯張禹。以帝師。位特進。甚尊重。按禹以成帝河平四年為丞相。鴻嘉元年。以老病乞骸骨。賜安車駟馬。罷就第。以列侯朝朔望。位特進。此稱位特進。則在罷相之後。故朱雲但斥言安昌侯張禹。不言丞相。而成帝亦但以廷辱師傅罪雲也。文嘗云。故丞相安昌侯。今本以故字屬丞相下。乃轉寫之誤耳。

梅福轉

書曰。毋若火始庸庸。今本作僦僦。庸僦聲相近。

遂下詔封孔子世為殷紹嘉公。孔何齊初封殷紹嘉侯。尋進爵為公。
霍光傳

自先帝時。桀已為九卿。公卿表。後元二年。太僕上官桀為左將軍。其初除太僕。表不得其年。蓋征和二
年。公孫敬聲有罪下獄。即以桀代之也。

御史大夫蔡誼。即蔡義也。儒林傳亦作蔡誼。按鄭仲師注。周禮云。古者書儀。但為義。即威。今時所謂義

爲誼。即仁義字漢書項籍傳贊。仁誼不施。董仲舒傳。布德施仁以厚之。設誼立禮以導之。知自貴於物。然後知仁誼。知仁誼。然後重禮節。將欲與仁誼之休德。明帝王之法。制正其誼。不謀其利。五尺童子羞稱五伯。爲其先詐力而後仁誼也。夏侯勝傳。孝武皇帝躬仁誼。皆以誼爲義。義者宜也。故字从宜。儒林傳。東郡太守程

程 誼。即程義。

金日磾傳

宣帝卽位。賞爲太僕。霍氏有事萌牙。上書去妻。按公卿表。宣帝甘露四年。稅侯金賞爲侍中太僕。距霍氏之亡。已十六年矣。霍氏有事之始。賞祇爲侍中。未任太僕也。

日磾傳子節侯賞。功臣表失載賞諡。

趙充國傳

至征和五年。按征和無五年。疑有誤。

數使使尉黎危須諸國。西域傳作尉犂。

充國乞骸骨。賜安車。駟馬。黃金六十斤。罷就第。按公卿表於神爵二年。書後將軍充國。不言何年罷免。

據此傳。似卽是神爵二年事。而常惠傳言甘露中。後將軍充國薨。天子遂以惠爲右將軍。則充國雖以病免。宣帝猶以將軍待之。終充國之身。虛將軍位不置也。

元始中，修功臣後，復封充國會孫伋爲營平侯。恩澤侯表失載此事。

常惠傳

是時烏孫公主上書言匈奴發騎田車師。此傳與西域傳相同者，幾三百言。

諡曰壯武侯。功臣表作壯侯。

陳湯傳

君子以功覆過，而爲之諱行事。按小顏解行事爲滅項之事，是也。劉貢父疑其不辭，欲以行事屬下句。

淺陋可笑。

西域都護段會宗爲烏孫兵所圍，驛騎上書，願發城郭敦煌兵以自救。丞相王商、大將軍王鳳及百僚議數日不決。按會宗傳，竟寧陽朔中，再爲西域都護，不云爲烏孫所圍。惟元延中嘗被圍，其時又非都護，且不與丞相王商、大將軍王鳳同時。此傳云會宗爲烏孫所圍，似當在陽朔中。又考公卿表，王商於河平四年罷相，以張禹代之。其明年始改元陽朔，使會宗果於陽朔中被圍，則丞相乃張禹，非王商矣。以二傳參互考之，當有一誤，或會宗傳陽朔字當爲河平，或此傳王商當爲張禹也。

段會宗傳

天水上邽人也。按地理志，上邽縣屬隴西。趙充國傳，外戚上官皇后傳亦云隴西上邽人。此作天水，疑

誤。

末振將殺大昆彌。會病死。漢恨誅不加。按西域傳。大昆彌。翎侯難。殺末振將。漢恨不自責。誅末振將。復使段會宗斬其太子番邱。會宗以難。殺末振將。雖不指為漢。合於討賊。奏以為堅守都尉。是末振將實難所殺。傳以為病死者。誤也。

小昆彌烏犁靡者。末振將兄子也。西域傳作安犁靡。烏安聲相近。

兩龔傳

執金吾閻崇。公卿表作閻宗。

鮑宣傳

宣不知情。宋祁曰。情字上疑有其字。按後漢書孔融傳。漢律。與罪人交關三日已上。皆應知情。知情者。應坐罪。不知情者。不坐。故揚雄傳云。雄不知情。有詔勿問。宋子京疑情上當有其字。蓋未考漢律也。

韋賢傳

黼衣朱紱。注。朱紱為朱裳。畫為亞文也。亞古弗字。亞當作匹。兩已相背也。與亞次字音義全別。此朱紱。諸侯之服。當訓為鞞。不當作黼黻解。師古注誤。

內吉傳

豈宜褒顯。豈宜者猶言宜也。古人語急以豈不爲不可爲可。此當言豈不宜亦語急而省文耳。朱子文疑當爲直字非孟堅之旨。

眭孟傳

孝昭元鳳三年正月。眭孟言災異涉妖妄。蓋夏賀良之流。其事已見五行志。不必別爲立傳。

夏侯勝傳

初魯共王分魯西寧鄉以封子節侯。別屬大河。大河後更名東平。故勝爲東平人。按魯共王子寧陽侯恬。瑕邱侯政。皆諡節侯。此傳所稱節侯。蓋寧陽侯也。地理志寧陽屬泰山郡。不屬東平。蓋宣帝建東平爲王國。復以寧陽屬它郡。

從始昌受尙書及洪範五行傳。說災異。始昌習尙書。名已見儒林傳。其說災異。祇有言柏梁臺災事。附見勝傳可矣。乃以兩夏侯題其篇目何也。

京房傳

房以建昭二年二月朔拜上封事。二月當作三月。以三統術推。是年正月甲午朔。二月甲子朔。房封事所稱辛酉者。正月二十八日也。己卯庚辰辛巳則二月之十六十七十八日也。張晏注以辛巳蒙氣乘卦爲晉卦。解卦。太陽侵色爲大壯。考卦氣圖。晉解大壯皆二月卦。則房上封事必在二月後矣。

迺辛巳蒙氣復乘卦。太陽侵色。張晏曰。晉卦。解卦也。太陽侵色。謂大壯也。以三統術推。是年二月二十四日丁亥春分。其前六日辛巳。正當晉卦用事之始。而蒙氣乘之。春分後解卦用事。又六日七分。而大壯乃用事。則三月癸巳朔也。大壯消息卦。晉解皆雜卦。

迺丙戌小雨。丁亥蒙氣去。丙戌。四月二十四日。其明日丁亥。直小滿。小畜卦用事。亦雜卦也。

己丑夜有還風。盡辛卯。己丑。四月二十七日。辛卯。二十九日。

至癸巳。日月相薄。癸巳。五月二日。正當乾卦用事之始。而有相薄之異。故云邪陰同力。而太陽爲之疑也。

翼奉傳

注。翼氏風角曰。木落歸本。水流歸末。故木利在亥。水利在辰。利當作形。木刑於亥。水利於辰。火刑於午。金刑於酉。五行家所謂自刑也。亥爲木之生方。故云本。辰爲水之死方。故云末。

七月己酉。地復震。以三統術推。初元二年七月己未朔。無己酉日。恐是乙酉之誤。

蓋聞聖賢在位。云云。按。元帝紀。初元二年三月。詔書舉茂材異等。直言極諫之士。文與此略同。其七月。又有詔書。卻無舉直言極諫事。此傳誤合兩詔爲一。因添一年地再動之語。

今年太陰建於甲戌。古法太陰與太歲不同。奉上封事。在初元二年。以今法推之。太歲正在甲戌。蓋以

太歲爲太陰。實自奉始矣。漢初言太歲者。皆用超辰之法。故太初之元歲在丙子。依此下推。初元二年歲當在癸酉。而云甲戌者。以三統歲術計之。太初元年歲星在婺女六度。已是星紀之末。則太歲亦在丙子之末。太歲與歲星每年多行一分。至太始二年。歲星已度壽星而入大火。太歲亦超乙酉而在丙戌矣。故算至初元二年。太歲得在甲戌也。

注。孟康曰。太陰在甲戌。則太歲在子。按。太陰在戌。太歲當在申。孟說非也。

律以庚寅初用事。麻以甲午從春。孟康曰。十一月庚寅日。黃鍾律初起用事也。按。推律自歲前十一月

始。依三統術推。得初元二年。天正癸亥朔。即初元元年十一月也。冬至與朔同日。庚寅則月之二十八日也。冬至

日黃鍾律始用事。孟云庚寅日黃鍾律初起用事。其法未詳也。又以三統術推。是年二月四日甲午春

分。故云麻以甲午從春。

尹翁歸傳

少子岑。歷位九卿。至後將軍。岑字子河。嘗爲執金吾。元延元年爲後將軍。公卿表作右將軍。誤。

韓延壽傳

延壽代蕭望之爲左馮翊。而望之遷御史大夫。按。公卿表。望之之後。尙有左馮翊彊一人。非卽以延壽

代也。望之由馮翊遷大鴻臚。又二年。而拜御史大夫。其時延壽亦爲左馮翊矣。傳所書未核。

鄭崇傳

上遂下詔曰朕幼而孤皇太后躬自養育惠澤茂焉前追號皇太后父為崇祖侯惟念德報未殊朕甚惡焉侍中光祿大夫商皇太后父同產子其封商為汝昌侯按哀帝紀建平四年二月封帝太

蕭望之傳

太后從弟侍中傳商為汝昌侯六月尊帝太后為皇太后此詔稱皇太后史家追改

下少府宋畸問狀注畸音居宜反公卿表作宋疇字之譌也宣帝紀有詹事畸師古曰宋畸也亦音居

蕭育傳

宜反蓋由詹事歷大鴻臚左馮翊遷少府

馮奉世傳

歷冀州青州兩部刺史育又為朔方刺史見馮野王傳本傳失書

其先馮亭為韓上黨守此傳述馮氏先世百有餘言與司馬遷揚雄自序略相類疑馮商續太史公書

亦有自序孟堅仍其元文耳

送大宛諸國客至伊脩城西域傳吏士四十人田伊循循脩二字相似因譌作脩耳三國志蜀後主傳費禕為蜀降人郭循所殺禕傳亦作郭循而魏三嗣主傳張嶷傳竝作郭脩

東平王宇傳

詩不云乎。毋念爾祖。述脩厥德。述與聿同。爾雅。適自也。孫炎云。適古述字。讀聿。

定陶王康傳

追尊共王爲共皇帝。帝字衍文。哀帝紀外戚傳但云共皇。無稱帝之文。丁姬初稱共皇后。後稱帝太后。太后之號。從子不從夫也。漢制。非有天下者。不稱帝。故高帝父太公稱太上皇。而後漢追稱孝德皇。孝崇皇。孝仁皇。皆不稱帝。

匡衡傳

於是司隸校尉王尊劾奏衡。此奏已見尊傳。較此文爲詳。

封樂安侯。食邑六百戶。恩澤侯表作六百四十七戶。此舉其成數耳。

初元元年。郡圖誤以閩伯爲平陵伯。漢時郡國各有圖。至魏猶然。清河平原爭界。八年。變二刺史不決。孫禮請以烈祖初封平原時圖決之是也。

衡遣從史之儻。收取所還田租穀千餘石入衡家。按衡以建昭三年封侯。距初元之元。已十三年。又四歲。爲成帝建始元年。衡多收租入三歲矣。此租穀千餘石。卽三歲中多收之數。郡初上計簿時還之官。至是乃復收之也。以是推之。列侯封戶雖有定數。要以封界之廣狹。定租入之多寡。不專以戶數爲定。

也。

司隸校尉駿，少府忠行廷尉事，劾奏衡。按公卿表，衡以建始三年十二月免相，而張忠為少府。在建始四年，不應有劾衡事，衡免相時，廷尉則何壽也。

薛宜傳

壹关相樂，師古曰：关古笑字也。說文無笑字，徐鉉本增入，关亦不知所从，當即芙薊之芙。說文：媵从女，芙聲。

女子笑也，莞爾之莞亦从艸，明芙即古笑字矣。漢隸从竹从艸之字，皆省作艸，後人往往相亂，如著作字當从竹，而反从艸，笑語字當从艸，而反从竹，皆由隸省而譌也。隸書艸在上者，或變為兩點一畫，故班史或作关，亦有作咲者，此即从艸之證。李陽冰謂竹得風，其體天屈，如人之笑，較之以竹鞭犬，稍為近理，要皆臆造，不可信。

翟義傳

熙我念孺子，師古曰：熙，歎辭。大誥：熙作已，已蓋熙之省文。

谷永傳

傳曰：飢而不損，茲謂泰。厥災水，厥咎亡。師古曰：洪範傳之辭。按五行志，乃京房易傳之文，非洪範傳文。小顏注誤也。五行志：厥咎牡亡，此傳脫牡字。

師丹傳

上於是追尊定陶共王爲共皇帝。帝字衍。下文稱共皇者不一辭。皆不云帝也。詳見定陶王康傳。

揚雄傳

百牙絕絃破琴。卽伯牙也。古文伯百通用。

贊曰。雄之自序云爾。予謂自雄之自序云爾以下。至篇終。皆傳文。非贊也。司馬遷傳亦稱遷之自序云爾。然後別述遷事。以終其篇。與此正同。遷有贊而雄無贊者。篇中載桓譚及諸儒之言。褒貶已見。不必別爲贊也。此贊曰二字。後人妄增。非班史本文。

儒林傳

擇掌故以補中二千石屬。文學掌故補郡屬備員。師古曰。云備員者。示以升擢之。非藉其實用也。按師古說非也。平津本意。以詔書爾雅深厚。非俗吏所解。故選文學掌故補卒史。所謂以儒術緣飾吏事也。安得云不藉其實用乎。備員蓋蒙上不足之文。謂如有不足。當以文學掌故充之。毋使缺額耳。中二千石屬。卽謂內史大行卒史。郡屬卽謂郡卒史。劉攽謂卒史遷而爲屬。亦非是。

沛戴崇子平崇爲九卿。公卿表無崇名。據張禹傳。崇蓋任少府也。喜因不肯切。切古認字。說文無認。

唯京氏爲異黨。焦延壽獨得隱士之說，託之孟氏，不相與同。師古曰：黨讀曰儻。惠棟曰：按文義當以黨字屬上句，異黨猶言異類也。

商善爲算，著五行論，歷四至九卿。以公卿表考之，永始三年，詹事許商爲少府，綏和元年，又由侍中光祿大夫爲大司農，其年又遷光祿勳，當云三至九卿也。又據溝洫志，商嘗爲博士，將作大匠，河隄都尉，皆在未爲詹事以前。

號其門人沛唐林子高爲德行，平陵吳章偉君爲言語，重泉王吉少音爲政事，齊快欽幼卿爲文學。班史書人名字，例至精密，它書已見字者，不更書，唐林子高已見鮑宣傳，而又書者，因三人而類及之也。

王式，東平新桃人也。按地理志，東平國無新桃縣，後漢書光武紀，龐萌蘇茂圍桃城，注任城國有桃聚故城，在今兗州任城縣北，又劉永傳，龐萌自號東平王，屯桃鄉之北，注桃鄉故城在今兗州龔邱縣西北，此卽東平之新桃也。

琅邪左咸，咸爲郡守九卿。公卿表，建平元年，左咸爲大司農，三年，爲左馮翊，元壽二年，復由復土將軍爲大鴻臚，元始五年，又爲大鴻臚，蓋四至九卿矣。

循吏傳

九江以召父應詔書。信臣不書名，非史例也。蓋寬饒傳稱魏相為魏侯，鄭崇、蕭育傳稱貢禹為貢公，故傳稱桓譚為桓生，皆史家刊正，未歸畫一。

酷吏傳

南陽有梅免百政，師古曰：梅百皆姓也。百與伯通。

於是賜小史爵關內侯，食遺鄉六百戶。漢制，列侯大者萬餘戶，小者數百戶。武帝時，襄城侯桀龍四百

戶，驂侯駒幾五百二十戶，瞭侯畢取五百一十戶，荻莛侯韓陶五百四十戶，邗侯李壽一百五十戶。疑有誤。而圍小史得食六百戶，是列侯封邑，有時不如關內侯之多也。

便輿出瘞寺門，桓東如淳曰：陳宋之俗言，桓聲如和，今猶謂之和表。師古曰：卽華表也。桓和華聲皆相

近。

游俠傳

拜鎮戎大尹、天水太守。按：王莽改天水曰鎮戎，太守為大尹。既云鎮戎大尹，不當更云天水太守。疑本

注文，後人誤入正文。

佞幸傳

鄧通蜀郡南安人也。地理志：南安屬犍為郡，不屬蜀郡。犍為武帝所置，漢初蓋屬蜀也。

韓嫣弟說亦愛幸以軍功封案道侯。巫蠱時爲衛太子所殺。子增封龍雒侯。雒當大司馬車騎將軍。自有傳。按說增父子已附韓王信傳。說以愛幸故又牽連書於嫣傳。不必更及其子也。

后姊嬀爲龍雒思侯夫人。雒當作頡。韓寶嗣父增爲龍頡侯。謚曰思。

朱詡子浮建武中貴顯至大司馬司空封侯。按後漢書浮爲大司空未嘗爲大司馬也。豈以其嘗爲大司馬主簿相涉而誤歟。

南粵傳

故濟北相韓千秋。李陵傳作濟南相。

西域傳下

昆莫王號也。名獵驕靡。後書昆彌云。師古曰。昆莫本是王號。而其人名獵驕靡。故書云昆彌。昆取昆莫。彌取驕靡。彌靡音有輕重耳。蓋本一也。子謂小顏說非也。昆彌卽昆莫。彌莫聲相轉。猶宛王毋寡一作毋鼓。鼓寡聲相轉。其實一耳。莫之爲彌。譯音有輕重。而名號未改。非取王名之一字而沿以爲號也。焉耆國王治員渠城。員渠卽焉耆之轉。與尉犁國王治尉犁城。危須國王治危須城。初不異也。

外戚傳上

孝惠張皇后。少帝、恆山、淮南、濟川王皆以非孝惠子誅。淮南當作淮陽。

孝景王皇后。初皇太后徵時。所爲金王孫生女俗在民間。師古曰。言隨俗而在閭巷。未顯貴。予謂俗蓋金氏女之名。

孝武陳皇后。堂邑侯午薨。生男須嗣侯。功臣表作季須。

史皇孫王夫人。封舅無故爲平昌侯。武爲樂昌侯。食邑各六千戶。外戚侯表無故。武皆六百戶。

外戚傳下

孝成許皇后。五月庚子。鳥焚其巢。太山之域。五行志。河平元年二月庚子。泰山山桑谷有獻焚其巢。

此作五月誤。下文有三月四月可證。

后姊平安剛侯夫人謁等。董教授曰。表未見此侯。惟卬成家有安平侯王舜子章。證剛侯。然非平安也。

予謂地理志千乘郡有平安侯國。當是王舜所封。若豫章郡之安平侯國。則長沙孝王子所封。涿郡之安平。又非侯國也。

孝成趙皇后。票騎將軍貪著錢。不足計事。票騎將軍謂曲陽侯王根也。

於是免新成侯趙欽。欽兄子成陽侯訢皆爲庶人。按。外戚侯表。成陽節侯趙臨。以皇后父侯。薨。子訢嗣。新成侯欽。以皇太后弟封。建平元年。皆坐弟昭儀絕繼嗣。免。表以欽與訢皆爲昭儀之兄。傳以訢爲欽兄子。必有一誤。

孝平王皇后。迎皇后於安漢公第宮。師古曰。本是莽第。以皇后在是。因呼曰宮。董教增曰。此當以第爲句。宮字連下。豐歆讀。卽前文大司徒宮。大司空豐。光祿大夫歆三人也。顏氏第宮之說。失之遠矣。

王莽傳上

前將軍何武。後將軍公孫祿互相舉。按公卿表。何武傳俱云。祿爲左將軍。此作後將軍。誤也。

王莽傳中

義陽東都曰六州。地理志。雒陽。莽曰宜陽。卽此義陽也。

其以益歲以南村新平。新平故淮陽。蘇林曰。陳畱圜縣。莽改曰益歲。按地理志。圜縣本屬淮陽。不屬陳

畱。豈莽時嘗改屬陳畱乎。圜縣。莽曰益歲。今地理志亦無之。

昏以戊寅之旬爲忌日。莽以戊子代甲子爲六旬首。戊寅旬中無子。故忌之。

王莽傳下

夙夜連率韓博。按地理志。不夜縣。莽曰夙夜。此云連率。則莽嘗置爲郡矣。壽光縣。莽曰翼平亭。而此傳

有翼平連率田況。亦其類也。

立安爲新遷王。服虔曰。遷音仙。師古曰。遷猶僂耳。不勞假借音。予謂遷之讀仙。方是古音。律麻志。少陰

者。西方西遷也。陰氣遷落物。西遷聲相轉。猶尙書大傳云。西方。鮮方也。莽稱紫閣圖文太一黃帝。皆得

瑞以遷今本或作僂所謂新遷者乃太一新遷之後也諸遷字皆作僂解故知服音爲是

直貨錢二十五食貨志作貨泉錢卽泉字

會世祖與兄齊武王伯升伯升光武之兄故字而不名劉聖公光武所事也故亦稱字

迫措前隊醜虜莽改南陽爲前隊所云醜虜指光武兄弟也孟堅於王莽指斥之詞無所隱諱所以著

莽之惡於光武盛德初無損也

敘傳上

上於是引商丹入爲光祿大夫伯遷水衡都尉與兩師竝侍中按公卿表元延元年侍中光祿大夫趙

彭大伯爲侍中水衡都尉三年卒計其年正許商師丹除侍中光祿大夫之時也伯爲水衡都尉表不

應失載疑趙彭卽班伯之譌

既繫繫於世教矣肇古戀字說文無戀

思有短褐之製短當作短說文短豎使布長襜貢禹貨殖傳竝有短褐不完之語

又況玄靡尙不及數子鄭氏曰靡音麼小也晉灼曰此骨偏靡之靡也師古曰鄭音是也骨偏靡自音麻

與此義不相合晉說失之予按說文無麼字徐鉉等新附而有𦃟字𦃟癩病也與靡同玄言其小靡言其

病童謠所稱見一蹇人言欲上天隗囂少病蹇以是刺之也晉說得之

吹中蘇爲庶幾兮。師古曰。吹古聿字。吹从日。不从日。詩。遙求厥寧。說文引作吹。

敍傳下

涵涵紛紛。卽呂刑泯泯焚焚也。涵泯聲相近。詩。縣縣其廡。韓詩作民民。

六世耽耽。其欲澈澈。易。其欲逐逐。子夏傳作攸攸。蘇林音攸爲迪。迪逐聲相近。

廿二史考異卷九

漢書四

侯國考

漢制。列侯所食邑爲侯國。西京侯者。封戶有多少。所食或盡一縣。或止一鄉一亭。皆以侯國稱之。如陳平封陽武之戶牖鄉。公孫丞相封高成之平原鄉。匡衡封僮之樂安鄉。師丹封厚邱之中鄉。何武封不其之氾鄉。所食不過一鄉。皆別於縣。而自爲侯國。恩有降殺。秩無尊卑也。後漢始定爲郡鄉侯。鄉侯。都亭侯。亭侯之差。於是有侯而不爲國者矣。高祖之世。功臣侯者百五十餘人。其封邑所在。班孟堅已不能言之。武昭以後侯者。班表始著其地。亦有不備者。蓋疑而闕之。或轉寫脫去也。地理志載侯國。皆據當時見存者。若中山之曲逆。陳平所封。清河之鄒。樊布所封。南陽之冠軍。霍去病所封。汝南之定陵。淳于長所封。丹陽之秣陵。胡執。江都易王子所封。魏之陰安。濟北。貞王子所封。志皆不云侯國者。其時國已除也。考哀平間。侯國志皆不書。王子侯表堂鄉以下十一侯。恩澤侯表殷紹嘉以下三侯。皆成帝綏和以後所封。而志亦不之及。然則志所書侯國。蓋終於成帝元延之末。惟博山一侯。或後人增加也。志稱侯國二百四十一。今數之。止百九十有四。予證以諸表。各標其始封姓名。又補志之失注者二十五人。後之讀班史者。庶有取

焉。

河東郡。

騏驎。

東郡。

陽平。王志禁注。

陳留郡。

長羅。常惠

潁川郡。

成安。郭忠

汝南郡。

陽城。劉德

宜春。王新

歸德。先賢

安陽。音王

周承休。姬廷

安成。崇王

弋陽。宮任

安昌。張禹

博陽。吉丙

成陽趙臨

南陽郡

鄧何蕭

安衆長沙王子丹定

新都王莽

樂城許延壽

復陽長沙頃王子延年王

南郡

高成長沙頃王子梁表作高城勃海亦
有高城縣與長沙太遠志失注

江夏郡

鍾武長沙頃王子度

廬江郡

松茲六安共王子霸

九江郡

博山孔光

春陵長沙王子真定

紅陽立王

博望許

當塗魏不害

曲陽王楨

山陽郡

城都王商表

爰戚趙長

中鄉梁敬王延年

鄭梁敬王罷軍

栗鄉東平王護

西陽東平王護表在東萊

沛郡

廣戚楚孝王子勳

敬邱魯共王子政侯當即此封

建成黃霸

栗趙敬王子樂

博鄉六安王交

黃梁敬王子順表在濟陰

郟成王奉光封郟當作郟表在濟陰

平樂梁敬王遷

留鄉梁敬王就表在濟南

曲鄉梁荒王鳳表在濟南

公邱魯共王子順

汶趙敬王子周舍

建平杜延年表在濟陽

扶陽章賢

高梁敬王
子舜

漂陽梁敬王子欽
志失注

東鄉梁敬王子方
志失注

義成甘延壽
志失注

魏郡

卽裴趙敬肅王子道
裴作卿裴在東海

平恩許廣漢

鉅鹿郡

象氏趙敬肅王子賀

安定燕刺王
子賢

樂信廣川纒
王子纒

柏鄉趙哀王
子賢

常山郡

桑中趙頃王
子廣漢

高柴梁敬王
子發

平阿譚王

臨都梁敬王子未
央志失注

祁鄉梁夷王
子賢

邯鄲趙敬肅王子仁

邯鄲趙頃王子萇

新市廣川纒王
子吉

歷鄉廣川纒王
子必勝

武陶廣川纒王
子朝

安鄉趙喜王

封斯趙敬肅王
子胡

封斯趙敬肅王
子胡

樂陽趙頌王

都鄉趙頌王景

清河郡

東陽清河宏

涿郡

廣望中山靖

樊輿中山修

良鄉趙共王或即此

臨鄉城陽頃王雲誤城

陽鄉廣陵頃王發

阿武河間獻

勃海郡

定齊孝王

平臺元

信鄉清河綱新鄉豹

州鄉河間禁

成中山喜頃王安

利鄉中山頃王安

益昌廣陽頃王嬰

西鄉廣陽頃王容

高郭河間獻

參戶河間免

柳子齊陽孝已王

脩市王清河寅綱

章鄉作魏祖表童鄉

平原郡

平昌王無

富平張安

樓虛順嘗

安侯濟北貞王子樂表作安陽

千乘郡

平安王舜封安平侯即此史記將相

繁安齊孝王

濟南郡

朝陽廣陵厲

宜成燕倉表作

臨樂王中山光培

景成王河胤猷

蒲領王清河猷猷

羽王濟北成武

合陽喜梁

龍領韓

被陽齊孝王

延鄉李譚注

獠趙敬肅起

泰山郡

柴齊志失王子代注

富陽東平志失王子注

桃鄉東平志失王子注

齊郡

廣傾苗川志失王子注

北鄉苗川志失王子注

臺鄉苗川志失王子注

北海郡

劇魁苗川志失王子注

劇苗苗川志失王子注

平的苗川志失王子注

樂望苗川志失王子注

平城苗川志失王子注

寧陽子魯共王注

桃山子陽志失王子注

式憲城陽志失王子注

廣饒國苗川志失王子注

平廣封平侯當即此服

瓠城子陽志失王子注

平望苗川志失王子注

柳泉膠東表在南關饒成侯也

饒縣膠東表當為饒成侯也

密鄉苗川志失王子注

羊石。膠東同。

石鄉。膠東同。

新成。膠東新成王根。

膠陽。高密王國名。當是膠東侯。

東萊郡

平度。當川志。失注。

牟平。齊志。失注。

徐鄉。膠東志。失注。

琅邪郡

虛水。城陽同。

祗。城陽侯王即此。

零段。城陽侯王即此。

稻。齊志。失注。

魏其。膠東王昌。

廿二史考異 卷九

樂都。膠東同。

上鄉。王高子安。

成鄉。王高子安。

臨胸。當川志。失注。

陽樂。膠東侯疑即此。

臨原。當川志。失注。

餅。當川志。

雲。齊志。

泉虞。膠東同。

茲鄉。王高子安。

箕城王陽荒

高鄉王陽休

卽來王陽俊

武鄉王高密

新山王忠

崑山王陽光

折泉王陽根

房山王陽勇

駟望王廣

高陵王進

石山王陽元

東海郡

良成子魯安

南成子魯安

襄陽共王子貞

高廣王陽

柔城陽荒王字山相涉

麗高密侯當王賜封

伊鄉王陽

高陽王宣

參封王陽嗣

博石王陽淵

慎鄉王表未

安邱王高密

臨安王膠東共

蘭祺王魯安

蘭祺王魯安

山鄉子魯安

山鄉子魯安

建鄉。魯頃王

東安。魯孝王

于鄉。泗水勤

郡陽。城陽戴

部鄉。魯頃王

新陽。魯頃王

昌慮。魯孝王
表在泰山

臨淮郡

西平。子定國
志失注

開陵。成

廣平。廣陵孝

襄平。廣陽厲王
當是廣陵

豫章郡

海昏。昌邑哀王
志失注

容邱。魯安王

建陽。魯孝王

平曲。廣陵厲

陰平。楚回王

武陽。丹

建陵。魯孝王

都平。城陽荒

高平。王逢

昌陽。泗水戾

蘭陽。廣陵孝王
侯即此

樂陵。高

安平。長沙孝王
鉅鹿習

桂陽郡

陽山長沙孝王子宗

零陵郡

夫夷長沙定王子義志失注

泉陵長沙定王子表作秦陵誤

廣平國

南曲清河綱王子選志失注

廣鄉平千頃王子表在鉅鹿志失注

平鄉平千頃王子表在魏郡志失注

城鄉平千頃王子表作成鄉志失注

信都國

樂鄉河間獻王子表在鉅鹿志失注

桃廣川經王子表在鉅鹿志失注

昌成廣昌經王子元

陰山表未見

都梁長沙定王子

曲梁平千頃王子表在魏郡志失注

平利平千頃王子表在魏郡志失注

陽臺平千頃王子表在魏郡志失注

平隄河間獻王子表在鉅鹿志失注

西梁廣川戴王子表在鉅鹿志失注

東昌清河綱王子成

志未見者

利昌代共王
子嘉

頃陽膠東頃
王子共

卑梁高密頃
王子都

陵石膠東共王子慶
疑即東萊之陽石

懷昌苗川懿王子高
遂史記作懷

昌鄉膠東頃王子憲
以元壽二年免

瑛邱東平思王子頃
泰山之乘邱瑛字
疑即

樂昌王武表
在汝南

問侯國例不屬諸侯王。故王子而侯者，必別屬漢郡。廣平信都亦諸侯王國也。而得有侯國，何故？曰：班志郡國之名，以元始二年戶口籍為斷。其侯國之名，則以成帝元延之末為斷。元延之世，廣平信都皆郡也。非國也。國已除為郡，則從前之改屬它郡者，復返其舊。迨哀帝建平中，復置此二國，則侯國必仍改屬它郡。特史家不能一一載之爾。試觀廣平領縣十六，而戶止二萬七千有奇。信都領縣十七，而戶止六萬五千有奇。以附近郡國準之，不應縣多而戶少。乃爾蓋改郡為國之後，未必仍領若干縣也。



廿二史考異卷十

後漢書一

光武帝紀上

高祖九世之孫也。按紀傳所述世數，多不一例。此紀光武爲高祖九世孫，自高祖至光武九世，實八世孫也。皇后紀，伏后爲大司徒滿八世孫，自滿至后八世，實七世孫也。至劉永傳稱梁孝王八世孫，自孝王至永父立，已八世矣。如依二紀之例，亦當云九世孫也。考班史諸表，自始封至子孫，曾孫、玄孫、玄孫之子，卽爲六世。此以封爵之世次言，故合始封計之。他傳則否。孔光傳云孔子十四世孫，自孔子至光，實十五世。推此論之，當以永傳爲是。

立劉聖公爲天子。范史於淮陽王、聖公、齊武王、續皆字而不名，蓋殊於諸王也。漢書王莽傳，聖公伯升，皆不名。

驃騎大將軍宗佻。注：驃騎大將軍武帝置，自霍去病始。按：去病爲驃騎將軍，無大字。

又別號諸賊銅馬、大彤、高湖、重連、鐵脛、大槍、尤來、上江、青犢、五校、檀鄉、五幡、五樓、富平、獲索等。按：鐵脛、上江、五樓紀不載其後事。馮異傳，擊破鐵脛於北平。吳漢傳，與偏將軍馮異，擊昌城五樓賊張文等破。

之。

建武元年以前高密令卓茂為太傅。注：高密縣屬高密國。今密州縣故城。在今縣之西南。按：卓茂傳作

密令。注云：密今洛州密縣也。傳稱天下大蝗。河南二十餘縣皆被其災。獨不入密縣界。則茂作令在河

南之密。非高密矣。紀文衍一高字。章懷不能考正。隨文注之。以致自相抵牾。水經注：密縣城東門南。側有漢密令卓茂祠。

二年。強鞅弱枝。所以為治也。章懷避唐諱。凡治字多改為理。或為化。今本閒有作治者。皆宋人校改。

真定王楊。劉植耿純傳皆作楊。

臨邑侯讓。耿純傳作林邑。

三年。西州大將軍隗囂。按：隗囂傳。自稱西州上將軍。自是名震西州。命囂為西州大將軍。每及西州之

事。公孫述傳。使西州豪傑來歛。傳。西州未附。西州方略。西州士大夫皆信重之。西州新破。竇融傳。西州

地勢局促。西州豪傑遂復附從。馬援傳。因留西州。常獨為西州言。披自西州。卒破西州。耿恭傳。安豐侯

竇融昔在西州。鄧騭傳。涼部叛羌。搖蕩西州。杜林傳。問以經書。故舊及西州事。林前於西州得漆書。古

文尚書。申屠剛傳。西州發兵。人人懷憂。龐參傳。方今西州流民擾動。乃為西州士大夫所笑。虞詡傳。辟

西州豪傑為掾屬。橋玄傳。上邽姜岐。守道隱居。名聞西州。皇甫規傳。爰自西州。侵及涇陽。自以西州豪

傑。鄭太傅。明公出自西州。趙壹傳。竊伏西州。皆謂涼州也。陳寵傳。西州豪右并兼。廉范傳。父客死於蜀

漢范滂流寓西州。西州平。歸鄉里。任文公傳。西州智士死。我乃嘗之。謂益州也。陳龜傳。今西州邊鄙。土地墾墾。則兼并涼二州言之。光武紀。後拔邯鄲。北州弭定。彭寵傳。使謁者韓鴻持節徇北州。北州衆多疑惑。是時北州破散。而漁陽差完。吳漢傳。北州擾惑。北州震駭。鄧禹傳。北州略定。景丹傳。景將軍北州大將。劉植傳。北州疑惑。朱浮傳。北州憂恐。劉虞傳。虞以恩厚得衆。懷被北州。烏桓傳。北州乃定。皆謂幽州也。崔寔傳。寔從兄烈。有重名於北州。烈。涿郡安平人。安。伏恭傳。由是北州多爲伏氏學。恭。爲常山太守。謂冀州也。溫序傳。將兵平定北州。陳龜傳。便習弓馬。雄於北州。董卓傳。乞將之北州。效力邊垂。謂并州也。魯恭傳。是時東州多盜賊。鄭太傅。東州鄭玄。學該古今。謂青州也。伏湛傳。東州號爲伏不闢云。趙瑗。謂徐州也。陳俊傳。東州新平。則兼青徐二州言之。樊準傳。今雖有西屯之役。宜先東州之急。鄧皇后紀。又遭水潦。東州饑荒。此又兼冀徐諸州言之矣。王常傳。嬰始不量愚臣。任以南州。注。謂行南陽太守。桓帝紀。盜賊徵發。南州尤甚。謂荊州也。郭太傅。始至南州。過袁奉高。不宿而去。從叔度累日不去。謂豫州也。袁黃。皆汝南人。張綱傳。南州晏然。許荆傳。郡濱南州。徐穉傳。此必南州高士徐孺子也。謂揚州也。張綱爲廣陵太守。在徐州部。而輿揚境密邇。故亦有南州之稱矣。南蠻傳。南州水土溫暑。謂交州也。鄭均傳。前安邑令毛義。淳潔之風。東州稱仁。方術傳。會稽謝夷吾。出自東州。義廬江人。廬江會稽皆屬揚州。當云南州。而稱東州者。揚在雒陽之東南。職方氏。東南曰揚州。故亦可稱東州也。劉焉傳。南陽三輔民數萬戶。流入益州。

焉悉收以爲衆。名曰東州兵。此因益州在西。故呼中土爲東州。非史家之通稱也。
四年。進幸臨平。注。縣名。屬鉅鹿郡。按續志無此縣。蓋建武六年所省。

光武帝紀下

七年。詔郡國出繫囚見徒。免爲庶民。按章懷注。范史避太宗諱。民字皆改爲人。如光武紀兆人塗炭。爲人父母。祖宗之靈。士人之力是也。今本仍有作民者。則宋以後校書者回改。然亦有不當改而妄改者。如建武七年。詔郡國出繫囚見徒。免爲庶民。十一年。詔敢灸灼奴婢。論如律。免所灸灼者爲庶民。十二年。詔隴蜀民被略爲奴婢。自訟者。及縣官未報。一切免爲庶民。十三年。詔益州民自八年以來。被略爲奴婢者。皆一切免爲庶民。十四年。詔益涼二州奴婢。自八年以來。自訟。在所官。一切免爲庶民。殤帝延平元年。詔宗室坐事沒入宮者。今悉免遣。及掖庭宮人。皆爲庶民。此庶民本當作庶人。校書者不知庶民與庶人有別。而一例改之。然建武五年。詔郡國出繫囚見徒。免爲庶人。六年。詔王莽時吏人沒入爲奴婢。不應舊法者。皆免爲庶人。此兩處仍未改也。凡律言庶人者。對奴婢及有罪者而言。與它處泛稱庶民者。迥乎不同。今本有改有不改。由當時校書不出一手故爾。又崔寔傳引景帝詔曰。加笞與重罪無異。幸而不死。不可爲民。此亦不當改而妄改者也。又一卷之中。或改或否。如明帝紀。中元二年。詔流人無名數。欲自占者。人一級。永平三年。詔流人無名數。欲自占者。人一級。十七年。詔流人無名數。欲占

者。人一級。而永平十二年。十八年。俱云流民無名數。欲占者。人一級。魯恭傳。前云萬人之命。在於一舉。後云萬民者。天之所生。又有一文重見。而或改或否。如光武紀。民無所措手足。章帝紀。人無所措手足。梁統傳。人無所厝手足。郎顛傳。安上理人。莫善於禮。張純傳。安上治民。莫善於禮。苟爽傳同又如逸民傳。章懷本改爲逸人。今雖已回改。而法雄傳中逸人字。仍未改。皆校書者之不學也。

八年。河西太守竇融。按。河西非郡名。不當有太守。當依前五年作河西大將軍。

率五郡太守。與車駕會高平。注。五郡謂隴西。金城。天水。酒泉。張掖。按。隴西。天水二郡。非竇融所統。當從融傳。以武威。敦煌。足五郡之數。

十三年二月丙辰。詔曰。長沙王興。真定王得。河間王邵。中山王茂。皆襲爵爲王。不應經義。按。真定王得。卽建武二年所封真定王楊子德也。德得古字通。此景帝子常山憲王之後也。中山王茂。光武族父。建武元年封。亦長沙定王之後。河間王邵。建武七年。以故河間王封。未詳其世系。長沙王興。當亦定王之後。史不爲立傳。而本紀亦不載受封年月。疑與邵皆襲始所封也。

丁巳。降太原王章爲齊公。魯王興爲魯公。按。齊武王傳。建武二年。立章爲太原王。十一年。徙章爲齊王。是章由齊王降封公。紀云太原王者。誤也。齊魯二王降封。本傳俱不載。建武十九年。進齊魯公爵爲王。傳亦不書。皆史之疏也。

省并西京十三國。廣平屬鉅鹿。真定屬常山。河間屬信都。城陽屬琅邪。泗水屬廣陵。淄川屬高密。膠東屬北海。六安屬廬江。廣陽屬上谷。注據此。惟有九國。云十三誤也。按續志北海屬下云。建武十三年。省淄川高密膠東三國。今本省以其縣屬。蓋其時以高密四縣封鄧禹。膠東六縣封賈復。故不立王國。而竝屬之北海。高密與淄川同在省并之內。非以淄川屬高密也。志又稱世祖并省郡國十。今并高密計之。正合十國之數。乃知紀云十三國者。誤衍三字。而淄川下又衍屬字耳。章懷注據紀文止有九國。以證十三之誤。則知唐初此本已誤矣。

十五年正月丁未。有星孛於昴。丁未。有星孛於營室。丁未。重出。當有一誤。以天文志證之。似下丁未誤也。予以四分術推得是年正月戊寅朔。則丁未爲月之三十日。彗星見四十九日而滅。其滅當在三月十九日乙未。而志云二月乙未滅。亦誤。

十七年二月乙亥晦。日有食之。五行志作乙未。

十九年正月。追尊孝宣皇帝曰中宗。始祠昭帝元帝於太廟。按祭祀志。是年雒陽高廟四時加祭孝宣孝元。凡五帝。此云昭帝誤。

於赫有命。系隆我漢。蔚宗宋人。不應有我漢之稱。此必沿東觀舊文。

明帝紀

永平三年去其螟蚋。注。蚋一名短狐。蚋當爲蟻。卽臙字。爾雅作蟻。注以爲短狐。失之。

十三年十月壬辰晦。日有食之。五行志作甲辰。

注。仲叔圍治賓客。下兩治字作主。蓋章懷所改。此治賓客之治。又後人回改。

十七年正月甘露降於甘陵。按。清河之甘陵。本厝縣。安帝始改名。不應此時先有之。恐有譌字。

注。楊浮異物志。浮當作孚。

章帝紀

建初四年七月。葬明德皇太后。按。光烈、章德、和熹、安思、順烈、桓思、靈思諸后之葬。皆書皇后。此獨書太

后。太字疑衍。

孔子曰。學之不講。是吾憂也。又曰。博學而篤志。切問而近思。仁在其中矣。按。博學以下。乃子夏之言。非

孔子語。蔡邕傳。小能小善。雖有可觀。孔子以爲致遠恐泥。亦子夏語也。漢書藝文志引雖小道。必有可

觀者焉。王充論衡引死生有命。紂之不善。不如是之甚。皆以爲孔子語。說者以爲古人引書多誤。其實

非也。考藝文志云。論語者。孔子應答弟子時人。及弟子相與言。而接聞於夫子之語也。云接聞於夫子。

則其言皆孔子所取矣。故漢人引論語。雖弟子之言。皆歸之孔子。非由記憶之誤。

六年五月辛酉。趙王盱薨。按。趙王良傳。子節王栩嗣。立四十年薨。而本紀中元元年。永平六年竝書趙

王盱惟永平五年書趙王栩必有一誤。栩與盱音相近而譌也。

元和二年四月乙巳。客星入紫宮。天文志作元年四月丁巳。

春秋於春每月書王者。重三正。注禮記曰。正朔三而改。文質再而復。此禮三正記之文。注脫三正二字。

章和元年七月。燒當羌寇金城。護羌校尉劉盱討之。以西羌傳校之。其時校尉乃張紆。非劉盱也。

八月乙未晦。日有食之。五行志在元和元年。此文已書乙未幸沛。又重書乙未。

和帝紀

孝和皇帝諱肇。注臣賢案。許慎說文。肇音大可反。上諱也。按說文云上諱者。乃从戈之肇。非从支之肇。

且說文無反切。乃後人所增益。章懷以爲說文有音者。非也。今本說文用孫愐唐韻切音。讀肇爲直小切。與兆音同。不知何以有大可切之音。疑卽直小兩字之譌。

永元三年。阜陵王种薨。按光武十王傳作冲。說文無种字。种卽冲也。

詔曰。高祖功臣。蕭曹爲首。有傳世不絕之義。曹相國後。容成侯無嗣。顧澗曰。此詔蕭曹竝舉。而獨云曹。

相國後無嗣。則鄼侯有後矣。今據前書功臣表。鄼侯九世孫禹王莽。建國元年。更爲蕭鄉侯。莽敗絕。而。

平陽侯十世孫宏。光武建武二年。以舉兵佐軍。紹封。傳子曠。表云。今見。則孟堅修史時尙存也。與此詔。

正相反。未知其審。予按。章彪傳亦云。建初七年。詔求蕭何後。封何末孫熊爲鄼侯。建初二年。已封曹參。

後曹洪爲平陽侯。故不及焉。則曹之有後審矣。而一云建武所封。一云建初所封。其名又復互異。且班表章傳皆云平陽侯。而此詔稱容成侯。皆事之可疑者也。

四年射聲校尉郭璜。璜子侍中舉。按天文志。郭舉爲侍中射聲校尉。舉父璜。長樂少府。皇后紀寶誤。寶傳亦同紀似

九年越騎校尉趙世等。西羌傳作趙代。蓋章懷避唐諱改之。趙熹傳亦作代。此紀作世。又唐以後人回改。

十一年復置右校尉官。注東觀記曰。置在西河鵠澤縣。按郡國志無鵠澤縣。蓋後漢并省。據此記。則和帝時尙未省也。

安帝紀

恭宗孝安皇帝。按獻帝初平元年。有司奏和穆安恭順宗桓威四帝無功德。不宜稱宗。故和帝順帝桓

帝紀俱不稱某宗。獨此紀書恭宗。蓋刪之不盡也。

永初元年。封帝弟常保爲廣川王。按安帝弟名常保。而子亦名保。當有一誤。

三年大鴻臚九江夏勤爲司徒。按范史三公除拜。皆載於本紀。其人無傳者。則書郡以顯之。用班史公卿表之例也。夏勤事已附見樊儵傳。延光二年。東萊劉熹爲司徒。熹名見馮魴傳。陽嘉二年。沛國施延

爲太尉。延名見陳忠傳。於例皆不必書郡。

四年徙金城郡都襄武。漢時郡所治亦曰都。臧洪傳。徙爲東郡太守。都東武陽是也。

元初四年二月乙巳朔。日有食之。五行志作乙亥。

延光三年九月庚申晦。日有食之。五行志作庚寅。

四年侍中謝暉。據后妃傳。暉爲虎賁中郎將。非侍中也。侍中當是加官。

順帝紀

永建二年。注。劉光字仲遠。卽太尉劉矩之弟。按。劉矩傳。稱叔父光。此注誤。風俗通劉矩父字叔遠。

陽嘉元年。海賦。曾旌等寇會稽。天文志。作曾於古書旌。或作旒。於當是旒之譌。

分禱祈請。靡神不禁。按。雲漢詩云。上下奠瘗。靡神不宗。毛訓宗爲尊。漢時三家詩必有作禱字者。祭法。

雩宗。祭水旱也。鄭讀宗爲禱。是宗與禱通。注以靡神不舉釋之。似未必然。

楊州六郡妖賊章河等。天文志。作章何。

建康元年。遣御史中丞馮赦。活作馮糲。

桓帝紀

建和二年。封帝弟順爲平原王。奉孝崇皇祀。河閒王開傳云。更封帝兄都鄉侯頌爲平原王。與紀互異。

三年監寐寤歎，疾如疾首。監寐猶假寐也。監假聲相近。劉陶傳：屏營彷徨，不能監寐。袁紹傳：我州君臣監寐悲歎。

延熹元年，分中山置博陵郡。子弟晦之曰：按隸釋，靈臺碑有博陵、蠡吾、管遵。又孔彪碑陰，故吏有博陵

安平六人，博陵安國三人，博陵高陽一人，博陵南深澤二人，安國蠡吾故屬中山，安平、南深澤、高陽故

屬河間，然則博陵一郡，兼得中山安平河間之地，不獨分中山也。黨綱傳：劉祐，中山安國人。安國後別屬博陵。

五年四月乙丑，恭陵東闕火。注：安帝陵也。五行志作恭北陵。恭北陵者，順帝母李氏陵也。

八年己酉，南宮嘉德署黃龍見，千秋萬歲殿火。按：此上承正月丙申晦日食，則己酉上當脫二月兩字。

五行志亦云二月也。依此文，似龍見一事，火災又一事，志於黃龍下無見字，萬歲殿下多皆字，則黃龍

亦是殿名，與嘉德署同日火也。

五月丙戌，太尉楊秉薨。按：風俗通云：六月九日未明，太尉楊秉暴薨，應劭與秉同時，共記月日，當可信。

九年正月辛亥朔，日有食之。五行志作辛卯。

九月，南陽太守成瑨、太原太守劉質竝以譖棄市。按：陳蕃、王允、劉般、襄楷傳俱作劉瓚。考說文無瓚字，

當以質爲正也。瑨質被譖棄市，據陳蕃傳，在延熹八年。時蕃爲太尉，上疏極諫，明年李膺等以黨事下

獄，蕃又疏諫，帝惡其切直，託以辟召，非人策免。紀書此事於蕃免官之後，似失其次矣。天文志在九年十一月。

靈帝紀

父萇世封解瀆亭侯。按董皇后紀亦稱解瀆侯萇。獨河閒王開傳作長。古書長萇多通用。

建寧二年十月。司隸校尉朱瑀。按黨錮及竇武傳皆作朱寓。此作瑀。誤。同時有長樂五官史朱瑀。乃宦

官黨於曹節者。見寶武傳此別是一人。

庚子晦。日有食之。五行志作戊戌。此誤。

三年。濟南賊起。攻東平陵。注東平陵縣名。故城在今濟州東。濟州當作齊州。

熹平元年。甘陵王恢薨。按清河王慶傳。梁太后立安平孝王子經。侯理為甘陵王。是為威王。理立二十

五年。薨。子貞王定嗣。定立四年。薨。子獻王忠嗣。別無名恢者。考理以桓帝建和二年封。至熹平元年。恰

二十五年。則恢與理實一人也。

三年。中山王暢薨。無子國除。按中山王焉傳。穆王暢立三十四年。薨。子節王稚嗣。無子國除。是暢本有

子。而國亦未即除也。

四年。封河閒王建孫佗為任城王。按光武十王傳。佗為建子。非建孫。

六年。衛尉陳球為司空。按球傳。其時為廷尉。非衛尉。

太常河南孟馘為太尉。按成陽堯廟碑。濟陰太守河南偃師即偃孟府君諱郁。字敬達。治尚書。經歷典

六郡威教若神，卽其人也。馘與郁同，碑立於永康元年。至熹平六年，相距十年矣。注云字叔達，而碑云敬達，叔敬二文相似，碑已亡失，莫能決其然否。

中平元年，下邳王意薨，無子國除。按，下邳王衍傳，中平元年，意薨，子哀王宜嗣，數月薨，無子。建安十一年，國除，是意亦有子。

二年二月己亥，廣陽門外屋自壞。五行志作癸亥，予以四分術推得是年二月庚子朔，不得有己亥日。紀誤。

十月庚寅，司空楊賜薨。以四分術推，是月丙申朔，無庚寅，庚寅乃九月二十四日也。月日必有一誤。四年，護烏桓校尉公棊稠，劉虞傳作箕稠。

獻帝紀

興平元年，是歲穀一斛五十萬。自是歲以下百一十五字，又見董卓傳，當刪彼存此。

三年，殺光祿勳鄧泉。五行志作鄧淵，此作泉者，章懷避諱改。

建安元年，封衛將軍董承爲輔國將軍，伏完等十三人爲列侯。按，董卓傳，是時按董承、伏完等十餘人

爲列侯，董承下不當有爲字，十三人者，董承、伏完、丁中、种輯、鍾繇、郭曄、董芬、劉艾、韓斌、楊衆、羅邵、伏德、趙麇也。見袁宏後漢紀但伏完襲父爵，不其侯，當在桓靈之世，豈待此時始封列侯。此史文之可疑者，竊意完

但增加食戶其子德別受列侯之封耳。

五年越騎校尉種輯。董卓傳作長水校尉。

六年三月丁卯朔日有食之。五行志作十月癸未。

十一年濟北海阜陵下邳常山甘陵濟陰平原八國皆除。通鑑作齊北海。閩本亦是齊字。今本作濟。轉

寫之譌也。明帝子濟陰王長早薨。無後。安帝廢太子保爲濟陰王。其後人承大統。卽順帝也。此後無封濟陰者。必濟北之譌。

十七年立皇子敦爲東海王。按東海王祇以建安五年薨。子羨嗣。魏受禪始除。不應別封皇子。當是北海之譌。

十九年討朱建於枹罕。天文志作宋建。董卓傳作宗建。三國志亦作宋建。

二十二年丞相軍師華歆爲御史大夫。按魏志華歆傳云。魏國初建。爲御史大夫。是歆爲魏國之御史大夫。非漢廷之御史大夫也。劉昭注百官志云。建安十三年。罷司空。置御史大夫。御史大夫郗慮免。不得補考。建安十九年。廢皇后伏氏。慮尙在職。至廿一年。封魏王操。則宗正劉艾行御史大夫事。廿五年。禪位。則太常張音行御史大夫事。然則郗慮以後。漢廷無眞授御史大夫。其說信矣。魏志太祖紀。書華歆爲御史大夫。而不書郗慮爲漢臣。歆爲魏臣故也。歆之除授。不當書於漢紀。且使歆而得書。則鍾繇

爲相國何以轉不書乎。蔚宗未達官制，因有此誤。

皇后紀上

世讓范蔚宗創爲皇后紀，非也。晉書稱華嶠作漢後書九十七卷，有帝紀十二卷，皇后紀二卷，嶠以皇后配夫作合，前史作外戚傳以繼末編，非其義也。故改皇后紀，次帝紀之下，然則皇后之紀，乃嶠自出新意，蔚宗特因之不改爾。

親屬別事，各依列傳，其餘無所見，則係之此紀，注謂賈貴人虞美人之類是也。此言后妃親屬，如陰馬鄧竇之倫，事迹昭著，別爲列傳，其無事可見者，附入此紀，不更立外戚傳，若郭況、閻顯、鄧康之類是也。注似未達其旨。

郭皇后，后從兄竟，以騎都尉從征伐有功，封爲新郟侯，官至東海相，竟弟匡，爲發干侯，官至太中大夫。按新郟侯竟，發干侯匡，歷官，具詳於後，此文可省并也。今依史通點煩之例，可省二十字。

竇皇后，扶風平陵人。按馬皇后，援之少女，梁貴人，竦之女，鄧皇后，禹之孫，和帝陰皇后，光烈后兄識之曾孫，獻帝曹皇后，操之中女，援，竦禹識皆有傳，操之大父騰，亦見宦者傳，故史不言某郡縣人，竇皇后，融之曾孫女，而又書扶風平陵人，伏皇后，滿之八世孫，而又書琅邪東武人，是自亂其例也。班超，彪之少子，而又書扶風平陵人，黃瓊，香之子，而又書江夏安陸人，荀彧，淑之曾孫，而又書潁川潁陰人，鄭

太衆之曾孫。而又書河南開封人。周舉防之子。而又書汝南汝陽人。皇甫嵩規之兄子。而又書安定朝那人。伏恭。馮之兄子。而又書琅邪東武人。袁紹。湯之孫。袁術。逢之子。而又書汝南汝陽人。李固。郃之子。而又書漢中中鄭人。法真。雄之子。而又書扶風郿人。周燮。燕之後。而又書汝南安城人。皆餘複可省。梁貴人。上尊諡曰恭懷皇后。與姊大貴人俱葬西陵。儀比敬園。注。敬園。安帝祖母宋貴人之園也。按。注說非也。章帝葬敬陵。以竇皇后合葬。而梁太后別葬西陵。史稱儀比敬園者。謂置令丞守衛如敬陵之制。百官志。每陵園令各一人。掌守陵園。案行掃除。故稱敬陵曰敬園。猶西京之高園文園也。若清河王慶之母宋貴人。別葬樊濯聚。和帝時。慶欲求作祠堂。恐有自同恭懷梁后之嫌。遂不敢言。安得有敬園之稱乎。其後安帝嗣立。追尊祖母爲敬隱皇后。距恭懷改葬。二十餘年矣。祭祀志。安帝建光元年。追尊祖母陵曰敬北陵。亦就陵寢祭。太常領如西陵。此則敬北陵之儀比西陵耳。章懷何不考其年代。而妄爲之說乎。

皇后紀下

宋皇后。父鄼。執金吾。封不其鄉侯。按。伏湛於建武六年。封不其侯。傳國八世。至獻帝時始絕。而宋鄼於靈帝之世。得封不其鄉侯者。伏氏食邑三千六百戶。除所食之外。尚有它鄉也。

其職僚品秩事。在百官志。按。蔚宗志今已失傳。其名目可考者。有五行天文志。見蔡邕傳。有禮樂輿服。

志見東平王蒼傳有百官志見此紀。

建武十五年封舞陽長公主。當作舞陰梁松傳尙舞陰公主。按舞陰與涅陽館陶二主同時以皇女封。但當云公主耳。

其加長字當在明章之世。史家省文併作一事書之也。蔡邕獨斷云帝女曰公主。姊妹曰長公主。此漢家故事。章懷據此文謂帝女尊崇亦爲長。非惟姊妹失其旨矣。

廿二史考異卷十一

後漢書二

劉聖公傳

更始復疑王匡、陳牧、成丹、與張卬等同謀，乃竝召入。牧、丹先至，卽乘之。按：鄧禹傳言更始諸將王匡、胡

殷、成丹等，皆詣宗廣降，則丹未嘗斬也。二傳必有一誤。

子巡嗣，復徙封灌澤侯。注：灌澤，今澤州縣。灌澤當爲漢澤。

劉永傳

西防賊帥山陽俊彊。注：西防，縣名，故城在今宋州單父縣北。郡國志未見此縣。前志山陽郡有西陽縣。

陽防字形相似。

隗囂傳

庶無負子之責。史記魯世家：若爾三王，是有負子之責于天。小司馬云：尙書負爲丕，鄭玄讀丕曰負，負

子謂負上天之責也。章懷注：非是。王伯厚言言之。

齊武王縝傳

建武十五年追諡伯升爲齊武王。按北海王興傳亦云十五年追諡仲爲魯哀王。然考之本紀建武十五年四月癸丑追諡兄伯升爲齊武公。兄仲爲魯哀公。諡號雖同而王公爵異。以情事推之。是歲封皇子十人皆爲公。又前二年降封趙齊魯三王爲公。則追諡兩兄亦必以公爵明矣。至十七年皇子封公者皆進爲王。十九年又進趙齊魯三國公爲王。然後伯升與仲皆追稱爲王耳。二傳所書蓋未得其實。趙王良傳

十三年降爲趙公。十七年薨於京師。子節王栩嗣。按光武紀建武十七年正月趙公良薨。十九年四月進趙齊魯三國公爵爲王。是栩初襲公爵。又二年始進爲王。史於降封公之後。卽書節王栩嗣。文雖簡而意不貫。

子獻王赦嗣。按趙王赦以建安十六年薨。而阜陵王赦亦以建安中薨。此二王同時同名。法事之可疑者。

城陽恭王祉傳

封於零道之春陵鄉。前志續志俱作冷道。

泗水王欽傳

更封茂爲穰侯。光武紀茂封單父侯。

來歙傳

以歙有平羌隴之功。故改汝南之當鄉縣爲征羌國焉。按汝南郡無當鄉縣。縣字疑衍。水經注。征羌縣故召陵縣之安陵鄉安陵亭也。

鄧禹傳

五品不訓。史記五帝本紀作五品不馴。正義讀馴爲訓。周禮地官有土訓。鄭司農讀訓爲馴。馴訓古通用。訓者順也。與遜義亦同。劉愷傳。調訓五品。周舉傳。五品不訓。責在司徒。謝夷吾傳。下使五品咸訓於嘉時。

馮異傳

又降匈奴于林關頓王。注。山陽公載記。頓字作確。前書音義。關音踢。頓音確。按頓確聲相近。說文無關字。當是關字之譌。三國志作踢頓。

橫被四表。昭假上下。橫被卽書光被也。漢書王莽傳。昔唐堯橫被四表。無以加之。王褒傳。化溢四表。橫被無窮。班固西都賦亦云橫被六合。蓋堯典光被字。漢儒傳授本作橫矣。釋言。枕。頰充也。枕卽橫字。古文光爲爻。與黃相似。故橫或爲枕。孔傳出于魏晉之間。堯典橫已作光。而訓光爲充。猶存古義。後世因作光輝解。失漢儒之本旨矣。

賈復傳

食郁秩、壯武、下密、卽墨、挺胡、觀陽、凡六縣。注：六縣皆屬膠東國。漢志：膠東國有挺縣，無挺胡縣。胡字疑衍。

吳漢傳

分漢封爲三國。按：吳漢封廣平侯，食廣平、斥章、曲周、廣年四縣。此所封乃汝南之濯陽、新蔡、南陽之筑陽，與廣平遠不相涉。何云分漢封爲三國乎？或後來徙封汝南，而范史失載耳。

臧宮傳

公孫述將延岑，盛兵于沅水。注：沅水出廣漢，解見光武紀。按：光武紀：建武十一年，臧宮與公孫述將延岑戰于沅水。注：引水經注：沅水出廣漢縣，下入涪水。本或作沅水及沅水者，竝非。則此沅字乃沈之譌。

耿弇傳

至浚靡而還。前志續志俱作俊靡。

封牟平侯。此封況子舒爲牟平侯，而況之封隴糜如故也。史有脫文耳。

寶女弟爲清河孝王妃，及安帝立，尊孝王母爲孝德皇后，以妃爲甘園大貴人。按：安帝紀：建光元年，追尊皇考清河孝王曰孝德皇，皇妣左氏曰孝德皇后，祖妣宋貴人曰敬隱皇后，又追尊孝德皇元妃耿

氏爲甘陵大貴人。此傳以孝德皇后爲孝王之母。誤矣。甘園、甘陵之園也。

耿國傳

建武二十七年代馮勤爲大司馬。按光武紀是年五月改大司馬爲太尉。驃騎大將軍行大司馬劉隆即日罷以太僕趙意爲太尉。大司農馮勤爲司徒。則是建武廿七年以後不復置大司馬。而馮勤亦未嘗任大司馬。安得以耿國代之乎。此大司馬當是大司農之譌。蓋勤既遷司徒。其大司農缺以國代之耳。

銚期傳

攻拔樂陽。棄肥曩。注樂陽縣名。屬常山郡。今恆州棗城縣也。注常山郡下脫棄字。班志本作棗城。此云棄者。省文也。郡國志無此三縣。蓋建武中并省。

邳彤傳

萬封重平侯。綏封平臺侯。注重平縣屬渤海郡。平臺縣屬常山郡。此注據前志。郡國志無此二縣。蓋建武後并省。王愨云。平臺前志屬濟南。注屬常山。誤。予謂濟南郡只有臺縣。無平臺縣。漢書刊本誤以鄒平之平。連下臺字。後人因讀爲平臺耳。章懷之說不可易也。

耿純傳

與縣曼賊交通。注。綿曼故城在今恆州石邑縣西北。俗音譌謂之人文故城也。古者文如岷。與曼聲相近。

宿至代郡太守。封遂鄉侯。寒朗傳有遂鄉侯耿建。蓋卽宿之後。

馬成傳

建武九年。代來歙守中郎將。率武威將軍劉尚等破河池。遂平武都。明年。大司空李通罷。以成行大司空事。按。光武紀。馬成平武都。在建武十一年。其行大司空事。在十二年。與傳異。

馬武傳

世祖擊尤來五幡等。敗於慎水。按。光武紀作順水。注本或作慎水者。誤。定封爲揚虛侯。注不言揚虛所在。按。漢書。齊悼惠王子將閭封揚虛侯。

竇融傳

金城太守庫鈞。按。下文云。以庫鈞爲金城太守。則此時未爲太守。疑亦是都尉也。融長子穆尙內黃公主。內黃公主不見於皇后紀。疑諸王女。

馬援傳

良工不示人以朴。朴古璞字。木皮爲朴。故玉之皮亦曰朴。鼠朴與玉璞本非異文也。說文無璞字。

夏爲援制都布單衣。注東觀記都答。都答聲相近。

前披輿地圖。見天下郡國百有六所。按班史地理志郡國百有三。此據平帝元始之籍也。今云百有六所。豈王莽以後又有增置乎。

以扶樂侯劉隆爲副。注扶樂縣名。屬九真郡。按陳國有扶樂縣。隆封國當在此。未必遠至九真也。隆傳云扶樂鄉侯。

魯恭傳

永元十二年。代呂蓋爲司徒。和帝紀在十三年。

經曰。后以施令誥四方。鄭康成易誥作詰。注云。詰。止也。此傳云。君以夏至之日。施命令止四方行者。則恭所引易。亦作詰矣。後人據王輔嗣本改爲誥爾。

馮勤傳

由黃門侍郎尙平安公主。注東觀記亦云安平。皇后紀云。由尙平邑公主。紀傳不同。未知孰是。劉攽曰。傳作平安。注云安平。必有一誤。然安平是縣名。則安平是矣。予謂平安亦縣名。屬廣陵郡。貢父偶未檢及耳。平安與平邑只一字之異。未可遽以安平爲是也。

趙熹傳

以憲守簡陽侯相。荊州牧秦熹才任理劇，詔以為平林侯相。按：簡陽平林二縣，兩漢志皆無之。蓋建武初置，不久即省，亦未知何人所封也。光武紀注：平林在今隨州隨縣東北。

馮衍傳

饑者毛食。注：案衍集毛字作無，今俗語猶然，或古亦通乎。古音無如模聲，轉為毛，今荆楚猶有此音。

登平陽而懷傷。注：平陽縣名，在今岐州岐山縣西南。按：兩漢三輔無平陽縣，史記秦本紀寧公徙居平陽，正義云岐山縣有陽平鄉，鄉內有平陽聚。

郎顛傳

今立春之後，火卦用事，當溫而寒，違反時節。按：鄭康成注稽覽圖云：雜卦九三上六決溫，九三上九微

溫。魏正光麻同。立春之後，小過用事，九三上六決溫之卦，故云火卦。

正月三日至乎九日，三公卦也。注：凡卦法，一為元士，二為大夫，三為三公，四為諸侯，五為王位，六為宗廟，分卦直日之法，爻主一日，即三日九日竝為三公之卦也。按：注說非也。京氏卦氣直日之法，坎離震

兌用事，分至之首，得八十分日之七十三，餘卦皆主六日八十分日之七。郎宗父子世傳六日七分，即其術也。今以四分術推，陽嘉二年，年前十一月甲戌朔二十九日壬寅冬至，坎卦用事，次日癸卯十二月初也。自癸卯至戊申，中孚卦用事，己酉至甲寅，復卦用事，乙卯至庚申，屯卦用事，辛酉至丙寅，謙卦

用事。丁卯至壬申。睽卦用事。癸酉至戊寅。升卦用事。癸酉閏十二月朔日也。己卯至甲申。臨卦用事。乙酉至庚寅。小過卦用事。辛卯至丙申。蒙卦用事。丁酉至癸卯。益卦用事。丁酉至壬寅六日。又歲前冬至之二十也。則坎卦用事。已後次日十三分。而自中學用事以來。小餘三十二分之八。即八十分餘分所積。又七十分。故益卦用事。盡癸卯日而尚有餘分也。甲辰至己酉。漸卦用事。漸主正月。三公之卦也。是歲正月壬寅朔。甲辰爲月之三日。甲辰至己酉。盡六日而尚有餘分。故云正月三日。至九日三公卦也。自正月九日至二月九日。泰需隨晉解五卦更代用事。而及於大壯。故顛再上書言。今月九日至十四日。大壯用事。今月謂二月也。

今日十七日戊午。徵日也。納音之法。戊午屬火。於五音爲徵。故以戊午爲徵日。

易中孚傳曰。陽感天不旋日。此易稽覽圖之文也。其書首言甲子卦氣起中孚。故漢儒謂之中孚傳。

臣竊見去年閏十月十七日己丑夜。有白氣從西方天苑趨左足入玉井。數日乃滅。按顛上便宜七事。

在陽嘉二年。順帝紀。陽嘉元年閏月戊子。客星出天苑。卽其事也。紀書閏月於十二月之後。則是閏十

二月也。以四分術推之。是歲閏餘十八。閏當在十二月後。其月癸酉朔十七日。恰得己丑。此傳云閏十

月者。誤也。十字蓋衍文。或嘗云閏十二月。

臣伏惟漢興以來。三百三十九歲。於詩三基。黃祖起亥仲二年。今在戊仲十年。注基當作基。謂以三基之

法推之也。按詩三基者。蓋詩汜麻樞之別名。猶稽覽圖稱中孚傳也。其法蓋以三百六十歲爲一周。

十二辰各三十年。一辰又別爲孟仲季各十年。故下云戊仲已竟。來年入季也。

襄楷傳

平原隰陰人也。注。隰陰縣在隰水之南。故城在今齊州臨邑縣西。隰當作濕。郡國志。平原郡有濕陰縣。濕。他合反。卽溧水也。班志作溧陰。按說文。濟溧字本作濕。隸省作溧。燥濕字本作溼。後世借溼爲燥溼。字而以溧爲水名。不知溧爲濕之譌也。其正作濕者。多與隰相亂。左氏哀十年傳注。濟南有隰陰縣。陸德明誤音習。

梁統傳

更封高山侯。高山。縣名。屬臨淮郡。

曹褒傳

父充。持慶氏禮。持本是治字。章懷避諱改之。隗囂傳。申屠剛杜林爲持書。杜林傳。爲持書。平來歷傳。持書侍御史龔調。蔡邕傳注。太伯端委以持周禮。皆本治字。而唐人改爲持也。邢惲傳。理韓詩。嚴氏春秋。則治經之治。或改爲持。或改爲理。初無一定。若侯霸傳。治穀梁春秋。吳良傳。又治尙書。此又校書者轉改。

鄭康成傳

初中興之後。范升、陳元、李育、賈逵之徒。爭論古今學。古學謂左氏春秋。今學則公穀二家也。范升、李育

主公羊說。陳元、賈逵主左氏說。

門生相與撰玄答諸弟子問五經。依論語作鄭志八篇。按隋書經籍志。鄭志十一卷。魏侍中鄭小同撰。

鄭記六卷。鄭玄弟子撰。與此傳不合。考孝經正義云。鄭君卒後。其弟子追論師所著述。及應對時人謂之鄭志。鄭之弟子分證門徒。各述所言。更爲問答。編錄其語。謂之鄭記。是鄭志出於諸弟子明矣。鄭氏門人見於鄭志與鄭記者。有趙商、張逸、劉琰、昞模、田瓊、孫皓、冷剛、任厥、汜閣。一作陳鏗、焦氏、崇精、鮑遺、王權、崇翹、焦喬疑卽焦氏等。傳惟載河內趙商一人。餘人爵里不可考。

凡玄所注周易、尚書、毛詩、儀禮、禮記、論語、孝經。按蔚宗述康成所注有孝經。而謝承、薛瑩、司馬彪、袁山松諸家皆無之。隋志但云鄭氏注。舊唐志始實以康成。邢昺孝經疏。謂鄭君弟子作鄭志目錄。記鄭所注書。不及孝經。趙商作康成碑銘。亦不言注孝經。則非鄭所注審矣。三禮皆康成注。流傳至今。乃本傳有儀禮、禮記。而無周禮。此轉寫之脫漏。

答臨孝存周禮難。臨孝存名碩。北海人。范史多稱人字。孔融傳。郡人甄子然。臨孝存知名。早卒。皆字而不名。

東萊王基。按魏志。基卒於元帝景元二年。不言年壽若干。而墓碑云。年七十二。溯其生年。當在初平元

年庚午。康成以建安五年庚辰卒。其時基僅十一歲。不得在弟子之列。恐范史誤也。基治經常申鄭而駁王肅。故蔚宗疑爲康成弟子。要是私淑鄭學。非親受業者也。

鄭興傳

乃徵爲太中大夫。按鄭康成注周禮。稱興爲鄭大夫。衆爲鄭司農。興以縣令終。而稱大夫。舉其貴者稱之也。

范升傳

子以人不聞於其父母爲孝。臣以下不非其君父爲忠。按漢書杜鄴對策言。孔子善閔子騫守禮。不苟從親。所行無非理者。故無可聞也。范升說與鄴略同。蓋漢儒相承古義。

陳元傳

卒淵聖獨見之旨。章懷注本避唐諱。改淵爲深。或爲泉。今本諸淵字皆後人回改。如章帝紀。聰明淵塞。諒惟淵體。安帝紀。若墜淵水。陳寔傳。曾是淵軌。劉愷傳。沈重淵懿。文苑傳。椒酒淵流。逸民傳。覆巢竭淵。方術傳。何故敗我濯龍淵。儒林傳。歷神淵。鄭康成傳之國淵。西羌傳之馬文淵。皆是也。

桓郁傳

宗正劉方。宗室之表。善爲詩經。方。平原人。范史無傳。考章帝元和二年詔書。稱襄城令劉方。則其時方

尙爲縣令。至永元四年。由宗正拜司空。首尾裁八年爾。頗怪其遷轉之驟。今觀竇憲疏。乃知方以宗室通經術。故有不次之擢也。

法雄傳

子真。在逸人傳。逸人卽逸民。章懷避諱。改爲人字。後來追改。不及徧檢。它傳故或改或否耳。列女王霸妻傳亦云。霸已見逸人傳。趙岐傳。漢有逸人。姓趙名嘉。

班彪傳

扶風安陵人也。班超傳云扶風平陵人。當有一誤。

父稚。哀帝時爲廣平太守。漢書敘傳作廣平相。廣平諸侯王國。當云相。不當云太守也。

班固傳

表以秦華終南之山。秦華文選作太華。蔚宗避父諱。如郭林宗。鄭公業名皆作太字。此賦秦華秦紫秦

清之類。必後人所改。

弟五倫傳

臣愚不足採。文章未完。

宋意傳宋當作宗

擢拜阿陽侯相。按阿陽縣屬漢陽郡。不云侯國。而上黨之陽阿為侯國。此阿陽或陽阿之譌。

東海王疆傳

建武十九年封為東海王。二十八年就國兼食魯郡合二十九縣。按郡國志東海十三城。贛榆本屬琅邪。實十二城。魯國六城并之。止十八縣。而琅邪郡之開陽、臨沂即邱繒。下邳國之下邳、曲陽、司吾、良成、廣陵郡之海西、泰山郡之南城、費皆故屬東海。故云二十九縣。

使大司空持節護喪事。司空馮魴也。大字衍。

沛王輔傳

建武十五年封右馮翊公。光武紀無馮字。中山王焉傳封左馮翊公。與此傳同。皆衍文也。左翊右翊蓋取嘉名。非分馮翊地為左右。

中元二年封輔子寶為沛侯。按沛為王國之名。不應更有沛侯。疑字有譌。

楚王英傳

建武三十年以臨淮之取慮須昌二縣益楚國。注臨淮無須昌。有昌陽縣。蓋誤也。按郡國志無昌陽。蓋順帝時已併省矣。取慮志仍屬下邳。即臨淮。蓋楚國既除之後復其舊也。

濟南王康傳

建武三十年。以平原之祝阿、安德、朝陽、平昌、隰陰、重邱六縣益濟南國。朝陽卽東朝陽。平昌卽西平昌。隰蓋濕之譌。續志無重邱縣。蓋後來所省。前志朝陽本屬濟南。不知何時改隸平原也。

東平王蒼傳

永平二年。以東郡之壽張、須昌、山陽之南平陽、棗湖陵五縣益東平國。按郡國志。南平陽三縣仍屬山陽。

阜陵王延傳

建武三十年。以汝南之長平、西華、新陽、扶桑四縣益淮陽國。注。扶桑故城在陳州泰康縣北。扶桑當依閩本作扶樂。

琅邪王京傳

永平二年。以太山之蓋南、武陽、華、東萊之昌陽、盧鄉、東牟六縣益琅邪。按前志泰山郡有華縣。而續志無之。今據此傳。則永平之世。華縣見在。而三國志稱臧霸爲泰山華人。孔宙碑陰亦有題泰山華者。疑華縣在東漢初未嘗并省。志偶漏此一縣耳。

上書願徙宮開陽。以華蓋、南武陽、厚邱、贛榆五縣。易東海之開陽。臨沂。肅宗許之。此事在建初五年。考前志續志厚邱本屬東海。據此。似又嘗改隸琅邪矣。

朱穆傳

丁亥之歲。刑德合於乾位。注。歷法。太歲在丁壬。歲德在北宮。太歲在亥卯未。歲刑亦在北宮。故合於乾位也。按漢書藝文志。刑德七卷。五行奇胘。刑德二十一卷。今皆不傳。淮南天文訓言。刑德合四歲而分。十六歲而復合。刑不得入中宮。而遷於木。則其說自漢初已有之矣。今依其法衍之。甲己之歲。德在東宮。乙庚之歲。德在西宮。丙辛之歲。德在南宮。丁壬之歲。德在北宮。戊癸之歲。德在中宮。故王莽傳云。倉龍癸酉。德在中宮。張純傳云。蒼龍甲寅。德在東宮也。申子辰之歲。刑在東方。子刑卯也。亥卯未之歲。刑在北方。卯刑子也。寅午戌之歲。刑在南方。己酉丑之歲。刑在西方。午酉自刑也。翼氏風角云。金剛火驅。各守其鄉。即午酉自刑之謂也。又云。二陰竝行。是以王者忌子卯。即子卯相刑之謂也。蘇竟傳云。德在中宮。刑在木。謂建武四年戊子之歲也。此傳云。丁亥之歲。刑德合於乾位。乾位謂北方也。近則邴吉張子孺。王懋竝曰。張安世不當獨稱字。乃章懷所改也。世皆改作代。而人名不合改。故稱其字。

樂恢傳

成陽高鳳。按逸民傳。高鳳。南陽葉人。此成陽恐是南陽之譌。或別有同姓名者。

袁安傳

伏念南單于屯。本名屯屠何。此單舉上一字。

張酺傳

趙王張敖之後也。敖子壽。封細陽之池陽鄉。史記呂后本紀。壽爲樂昌侯。

功臣表作受

徐廣云。今細陽之池

陽鄉。蓋本此。漢書功臣表不言樂昌所在。宣帝封舅王武爲樂昌侯。則表繫之汝南。細陽本屬汝南。則武所封。當亦在池陽鄉矣。

周景傳

遂連及中常侍防東陽侯侯覽。劉貢父據覽傳。覽防東人。封高鄉侯。證此文當爲高鄉之誤。是矣。予又疑高鄉卽防東之鄉。故傳稱爲防東鄉侯。因下文有東武陽字。又誤鄉爲陽也。

郭躬傳

時廷尉河南吳雄季高。按。孔廟百石卒史碑。雄。河南原武人。

陳寵傳

美鄭喬之仁政。春秋傳。喬作僑。古人名字恆相應。產者。生也。木高曰喬。有生長之義。故名喬。字子產。後人增加人旁。

先是洛縣城南。洛當作雒。廣漢郡所治。

東平相應順。應順亦汝南人。奉之曾大父也。其為東平相。遷左馮翊。則奉傳所未及載。

班超傳

焉者王舜。舜子忠。獨謀悖逆。按。明帝紀西域傳不載焉者王之名。獨見於此詔。

應奉傳

為郡決曹史。行部四十二縣。按。郡國志汝南郡領三十七城。此云四十二。未詳。

應劭傳

靈帝時。舉孝廉。辟車騎將軍何苗掾。按。風俗通正失篇。子為蕭令。謁辭。故司空宜伯應。考。宜。鄂。為司空。

在延熹九年十二月。次年四月免。是劭為蕭令。在靈帝初。而傳失書。

夫時化則刑重。時亂則刑輕。書曰。刑罰時輕時重。此之謂也。注。犯化之罪固重。犯亂之罪為輕。按。漢書

刑法志。治則刑重。亂則刑輕。犯治之罪固重。犯亂之罪為輕也。本荀子此傳及注中化字。本是治字。唐

人諱治。故章懷注范史。多改治為理。亦有改為化者。張奮傳。王者化定制禮。功成作樂。曹褒傳。功成作

樂。化定制禮。王符傳。亂生於化。危生於安。化國之日舒。以長。亂國之日促。以短。仲長統傳。亂世長而化

世短。此世字後人所改。君子用法制而至於化。小人用法制而至於亂。或以之化。或以之亂。爰延傳。尚書令陳

蕃任事則化。中常侍黃門預政則亂是也。世皆改為代。亦有改為時者。此傳時輕時重是也。

緹縲十重。注。縲音襲。古文襲與習通。士喪禮。綌者以褶。則必有裳。注。古文褶爲襲。

陳王羨傳

遺詔徙封爲陳王。食淮南郡。淮南當作淮陽。和帝紀。改淮陽爲陳國。遺詔徙西平王羨爲陳王。是其證也。淮陽王昞。以章和元年薨。未爲立嗣。故以其地改封羨。參考紀傳。左驗明白。或疑淮當爲汝者。非也。後見嘉靖閩本果作淮陽。私喜予言之不安。

樂成王黨傳

建初四年。以清河之游。觀津。勃海之東光。成平。涿郡之中水。饒陽。安平。南深澤。八縣益樂成國。注。前書及

河無游縣。按。觀津本屬信都。即樂成。不知何時改隸清河也。史記外戚世家。竇皇后。清河觀津人。此在信都

置郡之前。郡國志。中水。成平。屬河間。

和帝詔削東光。鄒二縣。鄒本屬鉅鹿。不知何時改隸樂成。竊意建初所益八縣。鉅鹿之鄒。當居其一。史誤以爲清河之游。清河本無游縣也。

下邳王衍傳

建初四年。以臨淮郡及九江之鍾離。當塗。東城。歷陽。全椒。合十七縣益下邳國。按。下邳本東海屬縣。今置爲王國。而以臨淮郡地益之。志稱下邳國十七城。除下邳。曲陽。司吾。良成。夏邱。本不屬臨淮。其餘十

二縣并鍾離五縣正合十七之數。但志所載東成卽九江之東城實重出一縣當併下邳計之爲十七也。鍾離當塗歷陽全椒四縣志仍屬九江傳又不見削地事考漢世王子封侯者例別屬它郡鍾離歷陽志稱侯國必王子侯也其二縣志不言侯國或分封未幾而國除爲縣乎。

梁王暢傳

建初四年徙爲梁王以陳留之鄆寧陵濟陰之薄單父己氏成武凡六縣益梁國按前志己氏本屬梁國薄單父成武本屬山陽且濟陰王長亦同時益封以理揆之不應奪濟陰以畀梁恐傳又誤也郡國志鄆作隅此字亦誤當爲鄆。

淮陽王昞傳

建初四年徙爲淮陽王以汝南之新安西華益淮陽國按汝南郡無新安縣疑新陽之譌也郡國志西華仍屬汝南

濟陰王長傳

建初四年以東郡之離狐陳留之長垣益濟陰國郡國志長垣仍屬陳留

陳禪傳

州辟治中從事注續漢志曰每州有治中從事按章懷避唐諱凡治字或改爲理或改爲化或改爲持

此治中字亦必改易。宋人校書者又回改耳。袁紹傳以審配爲治中。又有治中劉惠。故詩云以雅以南。韎任朱離。注毛詩無韎任朱離之文。蓋見齊魯之詩也。予謂韎任句上下當有脫文。未必詩有此語。

廿二史考異卷十二

後漢書三

崔駰傳

涿郡安平人。安平縣本屬涿。章帝建初四年。改隸樂成國。順帝改樂成國為安平。因縣以名也。桓靈之世。安平改隸博陵郡。故孔彪碑陰。故吏名有博陵安平崔烈。而程夫人亦稱烈為冀州名士也。涿郡屬幽州。樂成博陵則屬冀州。

犯孔戒之治容。注。易繫辭曰。治容誨淫。鄭玄云。謂飾其容而見於外曰治。治容。鄭本作野容。故有見於外之訓。

貴啟體之歸全兮。庶不忝乎先子。案。崔宗仕莽顯貴。篆亦至二十石。已昧守貞之誼。漢室中興。正當匡時。以蓋前愆。乃更辭歸不仕。去就俱倒如此。而云無忝先子。何顏之厚乎。此傳敘述家世。詞多溢美。蓋由東觀諸臣阿其所好。蔚宗承其舊文。可加芟削。未為有識也。東觀記儒林傳有崔篆。乃元嘉初。增入時崔寔為史官。即篆元孫也。

當其無事。則躡纓整襟。注。躡。踐也。此字宜從手。廣雅云。躡。持也。史記曰。攝纓整襟。案。說文。攝。理持也。字宜從手。不從足。史記曰者。傳本作獵纓正襟。獵亦攝之譌。此作攝者。因下文相涉而誤。

吾亦笑子屑屑而已也。注：屑屑猶區區也。案：王良傳：往來屑屑不憚煩也。注引方言之：屑屑不安也。

二注互異，當以彼注為是。

豈可不庶幾夙夜以永衆譽。古音衆如終。春秋傳：衆父卒。釋文音終。葛本改作終非。

周燮傳

荀恁字君大。案：劉平傳：數薦達名士承宮、郇恁等。即此荀恁也。說文無荀字，當以郇為正。恁父越，見漢

書鮑宣傳，亦作郇。

蓋詭時審己以成其道焉。注：詭，違也。案：中庸云：君子之道費而隱。鄭氏注言：可隱之節也。費猶儉也。道

不費則仕，儉與詭同。費本又作拂。拂亦訓違。此序云：詭時審己以成其道。即記所謂君子之道費而隱

也。馮衍傳：詭於衆意。注亦訓詭為違。

常肆勤以自給。注：肆，陳也。肆當為肆字之譌。

黃憲傳

余曾祖穆侯。案：范甯撰穀梁集解，往往采其先人及兄弟子姪之說。蔚宗作史，亦舉曾祖穆侯。注：王父

豫章君甯，先大夫宣侯。泰

楊秉傳

中常侍單超弟匡。案第五種傳以匡爲超兄子，宦者傳以爲超弟子。

楊賜傳

熹平二年，代唐珍爲司空。案靈帝紀：熹平二年正月，司空宗俱薨。二月，以光祿勳楊賜爲司空。七月，司空楊賜免。太常唐珍爲司空，是賜代宗俱而珍代賜也。傳誤。

以問侍中任芝。中常侍樂松。案：中常侍惟宦者爲之。樂松初爲鴻都文學。見酷吏傳繼爲侍中祭酒。見蔡邕傳

又爲奉車都尉。見劉陶傳皆非宦者之職。賜前上書言樂松處常伯。漢人稱侍中爲常伯。則松官侍中明矣。

此云中常侍誤也。

濟北王壽傳

永和四年，立戰鄉侯安國爲濟北王。和帝紀：封故濟北王壽子安爲濟北王。無國字。

河間王開傳

永寧元年，鄧太后封開子翼爲平原王，奉懷王勝祀。子德爲安平王，奉樂成王黨祀。案：安帝紀：是年與平原王同封者，乃濟北王壽之子樂成王萇也。其明年爲建光元年，鄧太后崩，樂成王萇亦以罪廢。又明年爲延光元年，始改樂成國爲安平，封河間王開子得爲王，得與德本一人也。此傳蓋有脫文。

熹平三年，使使拜河間安王子康爲濟南王。案：光武子有濟南安王康，此濟南王亦名康。先後同國。

同名亦可疑也。御覽引續漢書此濟南王名庚。

張皓傳

時清河趙騰上言災變譏刺朝政章下有司收騰繫考案楊震傳河閒男子趙騰詣闕上書指陳得失帝怒收考詔獄震上疏救之帝不省騰竟伏尸都市此安帝延光二年事也皓為司空在順帝永建元年冬又有趙騰以言事獲咎因皓上疏諫得減死一等相距僅三四載姓名又相同疑一事而傳聞異詞也。

王暢傳

聞伯夷之風者貪夫廉懦夫有立志此語見孟子今本貪作頑貪與廉相反當從貪為是。丁鴻傳論亦同。

种劭傳

及左中郎劉範諫議大夫馬宇董卓傳云侍中馬宇右中郎將劉範

劉陶傳

武旅有鳧藻之士注武旅周武王之旅鳧得水藻言喜悅也案今文太誓云師乃鼓鼗諫師乃拊前歌後舞鳧藻即鼗諫文異義同也杜詩傳將帥和睦士卒鳧藻亦用斯語章懷知其為武王事而不引太誓以實之

謝弼傳

建寧二年一本作三年詔舉有道之士弼與東海陳敦玄菟公孫度俱對策案靈帝紀建寧元年五月詔郡

國守相舉有道之士各一人二年當是元年之誤

時青蛇見前殿五行志熹平元年四月甲午青蛇見御坐上楊賜傳亦作熹平以弼封事證之當是建寧元年

非熹平也

又熹惑守元天文志不載此事

今之四公唯司空劉寵斷斷守善餘皆素餐致寇之人注四公謂劉矩為太尉許訓為司徒胡廣為太傅

及寵也案劉寵為司空在建寧元年注所舉太尉劉矩亦以元年十一月免官似章懷本元是建寧

元年非二年矣惟許訓為司徒與本紀未合

蓋勳傳

昔莊賈後期穰苴奮劍案東漢人避明帝諱改莊為嚴此稱莊賈董卓傳亦有穰苴斬莊賈之語明帝

紀楚莊無災以致戒懼皆後來校書者不學輒改之也西南夷傳楚頃襄王時遣將莊蒙又云滇王者

莊躡之後西羌傳魯莊公伐秦此蔚宗敘事之詞故不避漢諱

張衡傳

祖父瑛蜀郡太守。案張瑛在列傳第二十一卷。彼云南陽宛人。此云南陽西鄂人。縣名小異耳。何貺瞻

謂別一張瑛。非是。朱暉傳同縣張瑛暉亦宛人也。

不見是而不悟。注。悟猶悶也。悟悶聲相近。

繡幽蘭之秋華兮。說文。繡。維綱中繩也。讀若畫。又讀若維。諸家讀爲戶珪反者是也。章懷讀爲纂。則文

當從篤考。說文有繡無纂。章懷音誤矣。

羈要鼻以服箱。劉敞曰。案要。要。古良馬。當作要。從馬。案。要。鼻之名。本取疊韻。劉必改從馬。則要亦當作

要。所謂泥俗而不通於古也。文選。羈作要。

愁蔚蔚以慕遠兮。文選作鬱鬱。

顛羈旅而無友兮。注。顛。獨也。顛與塊聲相近。說文。顛。讀若魁。

馬融傳

詩詠園草。注。韓詩曰。東有園草。園當從園。本作圃。詩。東有甫草。鄭氏讀如圃。

其土毛則推牧薦草。注。推牧未詳。推蓋與葢同。爾雅。葢。山韭是也。牧。莪菹也。

陳子籌昏。注。陳子。陳平。善於籌策也。陳子。古之善算者。周髀經云。榮方問于陳子。是也。章懷以爲陳平

誤矣。

旃旒摻其如林。說文。旃。建大木。置石其上。發以機。以追敵也。詩曰。其旃如林。季長所見本與叔重同。

獄鬻熊。注。鬻亦狂也。鬻當作獬。

天地虹洞。注。虹洞相連也。虹洞與鴻綱同。

駭恫底伏。注。底伏猶滯伏也。春秋傳。物乃坻伏。鬱湮不育。注。坻。止也。坻與底同。

蔡邕傳

出補河平長。郡國志。無河平縣。

宣王遭旱。密勿祇畏。案。雲漢之詩云。黽勉畏去。劉向引詩。黽勉從事。作密勿從事。向世習魯詩。知魯詩

黽勉字皆作密勿矣。伯喈封事。蓋用雲漢詩文。而章懷不能注也。胡廣傳。密勿夙夜。傅毅傳。密勿朝夕。謝夷吾傳。密勿在公。

今者道路紛紛。復云有程大人者。案。陳球傳云。陽球小妻。程璜之女。璜用事宮中。所謂程大人也。漢時

宮人中。奢宿。皆稱中大人。見鄧禹傳。章昭云。古者名男子爲丈夫。尊父嫗爲大人。故宮婢亦有大人之稱。崔

烈因傳。母入錢得爲司徒。烈傳所云程夫人。疑卽此人。

叔父衛尉質。又與將作大匠楊球有隙。球卽中常侍程璜女夫也。楊當作陽。據陳球傳。則程璜卽程大

人。乃是女子。此傳云中常侍。則是宦者。非婦人矣。未審誰得其實。

左雄傳

褒豔用權注。褒豔謂褒嬖也。豔。美色也。案。章懷注用毛氏說。鄭康成則以豔妻為厲王后。謂正月惡褒
 嬖滅周。十月之交。疾豔妻煽方處。則褒豔非一人。此疏上言幽厲昏亂。下言褒豔用權。則亦與鄭氏說
 同。魯詩豔作閻。尚書中候作刻閻。刻豔文異實同。蓋其女族姓。非訓美色也。漢成帝時。谷永對策云。昔
 褒嬖用國。宗周以喪閻妻驕扇。日以不滅。兩漢經師皆主此說。故康成從之。
 或色斯以求名。此用論語以色斯當遠舉之義。二國志崔琰傳。哲人君子。俄有色斯之志。漢張壽碑。常
 懷色斯。元賓碑。翻響色斯。鄭固碑。將從雅意。色斯自得。斥彰。長田君碑。色斯去官。抱朴子外篇。或色斯
 而不終日。蓋漢魏人用歇後語多如此。

周舉傳

延熹四年。辟司徒李邵府。延熹當作延光。

黃琬傳

出為魯東海二郡相。案。漢制。諸侯王國稱相。郡稱太守。此郡當為國之誤。

荀淑傳

有子八人。儉。緄。靖。燾。汪。爽。肅。專。專當作專。即敷字。陶淵明四八目云。儉字伯慈。緄字仲慈。靖字叔慈。燾

字慈光。汪字孟慈。爽字慈明。肅字敬慈。專字幼慈。見張璠漢紀。

荀爽傳

行至宛陵。宛與蕤同。此河南之宛陵。非丹陽之宛陵。

陳寔傳

字仲弓。洪氏隸續載陳寔碑云字仲躬。

中平四年。年八十四。卒于家。碑云。春秋八十三。中平三年卒。

李固傳

司徒郃之子也。郃在數術傳。數術當作方術。

吳祐傳

所謂觀過斯知入矣。今本論語。人作仁。古書仁人二字多通用。然以人義爲長。

延篤傳

爲平陽侯相。此山陽之南平陽。非河東之平陽。

孝悌也者。其爲人之本與。此據葛氏本。諸本皆作仁。今本論語。人作仁。案初學記友悌部。太平御覽人事部引論語。

俱云其爲人之本與。有子先言其爲人也。孝弟。後言其爲人之本。首尾相應。亦當以人爲長也。

史弼傳

陛下隆於友于。案袁紹傳亦云友于之性生於自然。六朝人好用此語。三國志陳思王植傳今之否隔。友于同聲。吳三嗣主傳友于之義薄矣。許靖傳注處室則友于不穆。晉書長沙王又傳友于十人同產。皇室東萊王蕤傳曾無友于之情。王渾傳虧友于款篤之義。傅咸傳無友于之情。李友傳論篤友于而宣範。宋書盧江王禕傳克敦友于。桂陽王休範傳先帝穆於友于。范泰傳孝慈天至友于過隆。南齊書豫章王嶷傳友于之愛垂友于之性。朕友于之深。王思遠傳友于甚至。梁書陳伯之傳朱鮪涉血於友于。南史齊文惠太子傳太子見上友于既至。梁臨川王宏傳武帝於友于甚厚。袁象傳辨讞之日友于讓生。北史李順傳篤穆友于見稱於世。李謐傳幼事兄瑒恭順盡友于之誠。薛聰傳友于篤穆。房彥謙傳上副聖主友于之意。要皆濫觴於後漢。

盧植傳

將有楚人脅比尹氏立朝之變。公羊傳靈王作乾谿之臺三年不成。楚公子棄疾脅比而立之。章懷注不引公羊而引左氏周走而呼云云。非植意也。

皇甫規傳

自以連在大位欲退身避第。第當作弟。避弟謂已避位而弟得辟召也。此事見風俗通過譽篇。下文避

第什塗亦弟字之譌。章懷注謂欲歸第避仕宦之塗。誤矣。

張奐傳

敦煌酒泉人也。注。酒泉縣名。地多泉水。今永州晉昌縣東北。闕本水作陽。考唐書地理志晉昌縣屬瓜州。永陽二字俱誤。案。酒泉郡

名。非縣名。當作淵泉。胡三省注通鑑云。免。敦煌淵泉人。胡所見本尙未譌也。漢志敦煌郡有淵泉縣。晉

志作深泉。蓋避唐諱。章懷本亦當作深。後人妄改爲酒耳。郡國志作拼泉。拼亦淵字之譌。

陳蕃傳

車駕幸廣城校獵。注。廣城苑名。在今汝州梁縣西。城當作成。馬融上廣成頌。卽此。

齊景公欲觀于海。放乎琅邪。晏子爲陳百姓惡聞旌旗輿馬之音。舉首嚙眉之感。此誤以孟子對齊宣

王語爲晏子之言。

黨錮傳

郭林宗。賈偉節爲其冠。案。何顒傳亦云郭林宗。賈偉節等。蔚宗避家諱。故郭泰不書名。并偉節亦字之。

岑旺傳。郭林宗。朱公叔等皆爲友。亦因郭而及朱也。

范康。荀淑。竇武傳並作苑康。

張儉。外黃令毛欽。胡三省曰。外黃縣屬陳留郡。黃縣屬東萊郡。毛欽蓋爲黃縣令。外字衍。

郭太傳

初太始至南州。過袁奉高。不宿而去。從叔度。累日不去。或以問太。太曰。奉高之器。譬之泛濫。雖清而易挹。叔度之器。汪汪若干頃之陂。澄之不清。撓之不濁。不可量也。已而果然。太以是名聞天下。予初讀此傳。至此數行。疑其詞句不倫。蔚宗避其父名。篇中前後皆稱林宗。即它傳亦然。此獨書其名。一疑也。且其事已載黃憲傳。不當重出。二疑也。叔度書字而不書姓。三疑也。前云於是名震京師。此又云以是名聞天下。詞意重沓。四疑也。後得閩中舊本。乃知此七十四字。本章懷注引謝承書之文。叔度不書姓者。蒙上入汝南。則交黃叔度而言也。今本皆僂入正文。惟閩本猶不失其舊。閩本係明嘉靖己酉歲按察使周采等校刊。其源出於宋刻。較之它本爲善。如左原以下十人。附書林宗傳末。今本各自跳行。閩本獨否。泛濫。黃憲傳作汎濫。謂汎泉。濫泉也。此作泛。譌。

孔融傳

故發辭偏宕。說文。宕。過也。

荀彧傳

朗陵令淑之孫也。荀淑傳。補朗陵侯相。漢制。縣爲侯國。則置侯相。一人治之。其職與令長同。故亦通稱爲令也。東萊之不其。亦侯國。而董恢傳稱除不其令。

明年又爲操鎮東司馬。此初平二年之明年也。據魏志操爲鎮東將軍在建安元年。則初平三年安得便稱鎮東司馬乎。魏志或傳本云。明年太祖領兗州牧。後爲鎮東將軍。常以司馬從。然則領兗州在此年。而除鎮東司馬不在此年也。范史刪去領兗州句。遂誤以鎮東司馬爲是年事矣。

將軍本以兗州首事。故能平定山東。此實天下之要地。而將軍之關河也。案魏志或傳云。河濟天下之要地也。今雖殘壞。猶易以自保。是亦將軍之關中河內也。蓋上言高祖保關中。光武據河內。皆深根固本。以制天下。故以兗州比關中河內。范史刪去二字。未當。

袁紹旣兼河朔之地。有驕氣。而操敗于張繡。紹與操書甚倨。注陳琳爲紹作檄書云云。案傳云紹與操書。注以檄書當之。誤矣。操爲張繡所敗。在建安二年。而紹宣檄乃在建安五年。亦不相涉。

皇甫嵩傳

徵爲議郎。遷北地太守。按下文靈帝召羣臣會議。嵩亦與焉。似無出守事。或已遷而未之官耶。

朱儁傳

博士鄭玄等。是時康成避地徐州。陶謙以師友待之。故與謙同列名。中平五年。康成與荀爽韓融等竝以博士徵。雖未就職。猶以博士稱之也。

董卓傳

乃任吏部尚書漢陽周秘。王愨竝曰：漢時尚書六曹，止稱尚書，不以曹名官也。吏部則東漢初無此稱。

此范史之誤。予案：靈帝末，梁鵠為選部尚書，見續漢百官志注。而蜀志許靖傳亦云：以漢陽周愨為吏

部尚書。以漢末已有吏部之稱矣。章懷注引英雄記云：周愨，武威人。此與蜀志俱云漢陽，未知孰是。

殺衛尉种拂等。案：獻帝紀，种拂傳皆云太常，非衛尉也。

四年，張楊為將楊醜所殺。案：獻帝紀在三年十二月。

劉虞傳

前中山相張純、南匈奴、烏桓傳俱作前中山太守。

公孫瓚傳

齊桓立柯會之盟。會當作亭。典略本作亭。

陶謙傳

初曹操父嵩避難琅邪時，謙別將守陰平，利嵩財寶，遂襲殺之。案：應劭傳謂謙素怨嵩，子操數擊之，乃

使輕騎追嵩殺之。二說互異，當以謙傳為正。操欲吞併徐部，文致謙罪，以為出兵之名耳。韋昭吳書謂

歸咎於陶謙者，得之。

袁紹傳

父成、五官中郎將。華嶠漢書作左中郎將。見三國志注。袁安傳云左中郎似失之。除濮陽長。許劭傳稱紹爲濮陽令。

少府陰循、執金吾胡母班、將作大匠吳循。獻帝紀、循皆作脩。魏志亦作吳脩。當以脩爲正。操姦閹遺醜。姦當作贅。漢書如淳注、淮南俗、賣子與人作奴婢、名曰贅子。操父嵩本夏侯氏、爲中常侍。曹騰養子、故云贅也。三國志注及文選竝是贅字。

劉表傳

荊州八郡、可傳檄而定。注、漢官儀曰、荊州管長沙、零陵、桂陽、南陽、江夏、武陵、南郡、章陵等是也。案、郡國

志無章陵郡。蓋漢末所增置。禰衡傳、黃祖子射爲章陵太守。三國志、太祖征荊州、以趙儼領章陵太守。

又劉表將有章陵、太守蒯越是也。水經注、安昌縣故蔡陽之白水鄉也。漢元帝以長沙卑溼、分白水上

唐二鄉爲春陵縣。光武卽帝位、改爲章陵縣。魏黃初二年、更從今名。故義陽郡治也。章懷太子云、春陵、

陽縣。魏志、彭城王據傳、黃初二年、爲章陵王。其年徙封義陽。依酈氏說、則義陽卽漢末之章陵郡。非有

兩地矣。但酈所云安昌縣、爲漢蔡陽縣地。而漢之義陽侯國、則平氏縣地。魏初置義陽縣、卽因漢侯國

之舊。雖均屬南陽郡、而相距且數百里。究難溷而而爲一。竊意黃初置義陽縣、雖取義陽縣爲名、而治所實在安昌。卽章陵郡故治。但魏文多忌諱、惡章陵之名、置不用耳。至晉泰始初、封義陽王望、乃徙治

義陽縣。

劉焉傳

并州刺史張懿。蜀志劉二牧傳作張益。

遂就拜魯鎮夷中郎將領漢寧太守。注袁山松書建安二十年置漢寧郡。案曹公破張魯在建安二十一年而魯領漢寧太守乃在其前則漢寧之名由來已久大率劉焉父子所表授耳山松書蓋據曹公破漢中之歲書之魏志建安二十年復漢寧郡為漢中蓋得其實矣。

袁術傳

遂果僭號自稱仲家。注仲或作沖。沖家猶沖人沖子也當以沖為是。

循吏傳

劉矩。叔父光順帝時為司徒。案順帝紀永建二年七月太常劉光為太尉四年八月免未嘗為司徒也。

以叔父遼未得仕進。當云父叔遼傳寫慎倒耳見風俗通十反篇。

劉寵。弟方官至山陽太守。此別一劉方。

仇覽。時考城人河內王渙。渙當作免河內武德人見范丹傳非廣漢之王渙也。

酷吏傳

周紆。常築壑以自給。劉放曰。壑非築所成。當作塹。說文。壑。瓴適也。洪氏隸續有永初官壑文。云眉州人掘武陽故城。時或得之。傳云築壑者。以壑築城垣也。劉貢父破爲塹。非是。

陽球。案。松覽等皆出於微蔑。微蔑猶言微末也。

爾前事吾父子如奴。國本事上有華字奴敢反汝主乎。案。陽球誅王甫輩。雖快人意。然球本中常侍程璜女夫。

又以私憾蔡質。道飛章陷質。豈父子王萌所云事吾父子如奴。殆非誣也。傳曰。無瑕者。可以戮人。

宦者傳

皆剝割萌黎。萌與侯通。

孫程。李元爲襄信侯。楊佗爲山都侯。注。襄信。山都竝屬南陽郡。按。郡國志。襄信屬汝南。不屬南陽。

單超。故汝南太守下邳李暹。此與蘇不韋傳之李暹同時。又同姓名。

時下邳縣屬東海。案。郡國志。下邳國十七城。其一曰下邳。故屬東海。凡縣名先書者。爲郡所治。則下邳

縣乃王都所在矣。下邳王衍。以永平十五年封。傳國三世。至建安十一年國除。超傳載徐宣爲下邳令。

黃浮爲東海相。則桓帝延熹中也。豈其時下邳王已徙都它邑。而以縣仍屬東海乎。

曹節。越騎營五百妻有美色。輿服志謂之伍伯。補衡傳。令五百將出欲加蓋。

呂強。汝陽李巡。巡官中黃門。即注爾雅者。

張讓。發太原河東狄道諸郡材木。狄道非郡名。當云隴西。

論。三世以嬖色取禍。注夏以末嬉殷以妲己。周以褒姒。三世當為三代。章懷注范史。凡世字皆改為

代。以避唐諱。宋以後校書者復改正之。此三代字。蔚宗本文。校書者不知而妄改。

儒林傳上

乃更修鬢字。注說文曰。鬢。學也。案說文無此文。徐鉉以鬢為俗書。

歐陽歙。樂安千乘人也。案和帝永元七年。始置樂安國。歙卒於光武之世。當稱千乘人。前書歐陽和伯千乘人。

牟長卒章帝朝。而傳稱樂安臨濟人。皆史臣追書。

孔僖。世祖復封均子志為褒成侯。志卒。子損嗣。永元四年。徙封褒亭侯。案孔鮒碑載。元嘉三年。司徒

雄等奏稱。褒成侯四時來祠。又韓敕碑陰有褒成侯孔建壽名。碑立于永壽二年。洪适疑建壽即損之

字。又據安帝紀。延光三年。賜褒成侯帛。及二碑俱稱褒成。以證損未嘗徙封。其說當矣。考郡國志無褒

成侯國。則褒成之封。當是亭侯。非縣侯。史例當書褒成亭侯。或偶脫成字。蔚宗因誤以為徙封褒亭爾。

魏文帝黃初二年詔。亦稱褒成之後。絕而莫繼。

儒林傳下

薛漢 會稽澹臺敬伯。今吳縣南有澹臺湖。蓋以姓得名。建武永平之際。吳地尙屬會稽也。

何休 蕃敗。休坐廢錮。乃作春秋公羊解詁。覃思不闕。門十有七年。案陳蕃事敗。在建寧元年九月。是

歲歲在戊申。而休卒於光和五年壬戌。首尾僅十有五載。而晚年又應公府之辟。歷官議郎諫議大夫。

則著書杜門。大約不過十年耳。光和二年。以上祿長和海言。令黨人禁錮小功以下皆除之。傳所謂黨

禁解者。當在此時。至中平元年。大赦天下黨人。則休已先卒矣。

許慎 少博學經籍。案慎子冲上說文表。云慎本從賈逵受古學。

爲郡功曹。舉孝廉。再遷除涪長。卒于家。冲表稱臣父故太尉南閣祭酒。傳失書。冲上表在安帝建光元

年九月。其時慎已病。當卒於安帝之末也。

文苑傳上

杜篤 癡偃西戎。偃與闕同。癡偃猶癡過也。

蓋夫燔柴剝蛇。注。剝之竟反。剝古斷字。

劉珍 又撰釋名三十篇。以辨萬物之稱號云。案隋書經籍志。釋名八卷。劉熙撰。直齋書錄解題。亦云

釋名八卷。漢徵士北海劉熙成國撰。凡二十七篇。

文苑傳下

趙壹。榮納由于閃榆。注。閃榆。傾佞之貌。榆音輸。案。閃榆猶言陝輸。曹大家女誠云。動靜輕脫。視聽陝

輸。注。陝輸。不定貌也。集韻作陝榆。榆從手旁。

劉梁。庚桑瑣隸。風移礪礪。礪礪即畏壘也。史記云。畏壘。虛亢桑子之屬。皆空語。崔譔注。莊子本作壘。

俗作累。又加石旁耳。說文作銀鏗。

高彪。後遷內黃令。內黃當為外黃之譌。申屠蟠。陳留外黃人。此云到官上書薦縣人申屠蟠等。可證

其非內黃也。洪氏隸釋有外黃令高彪碑。

彌衡。激楚揚阿。至妙之容。臺牧者之所貪。注。臺牧未詳其義。融集作堂牧。文選載此表作掌技。

獨行傳

劉茂。時小吏所輔。注。所。姓也。風俗通曰。宋大夫華所事之後。案。左氏傳有華御事。未見名所事者。春

秋隱九年。俠卒。穀梁云。所俠也。

彭脩。會稽毗陵人。案。毗陵。順帝時析屬吳郡。脩與鍾離意同時。其時未置吳郡。張武。吳郡由拳人。高

彪。吳郡無錫人。則皆在分郡以後矣。陸續稱會稽吳人。其孫康稱吳郡吳人。續仕明帝之世。康在靈帝

時也。

陳重。少與同郡雷義為友。按。袁敞傳言。尚書郎朱濟。丁盛。立行不脩。張俊欲舉奏之。二人恐。因陳重

雷義往請俊，俊不聽。因共私賂侍史，使求俊短，得其私書封上之。雷陳雖以善交稱，然與儉人爲朋，私相請託，難免比匪之傷矣。

方術傳

是以通儒碩生，忿其姦妄不經，奏議慷慨，以爲宜見藏擯。注：謂桓譚、賈逵、張衡之流也。案：賈逵傳會圖識，具見本傳。此序亦云逵以附同稱顯，注乃以逵與桓譚、張衡竝稱，誤矣。

許楊，汝南舊有鴻郤陂。漢書作鴻隙，隙與郤同。

高獲，遂遠遁江南，卒于石城。注：石城在今蘇州西南。案：石城縣名，屬丹陽郡。此注恐誤。

方術傳下

董扶，諸葛亮問廣漢秦宓。蜀志：宓作宓，宓字子勅，當取謹宓之宓。世俗借用堂宓字。

華佗，漆葉屑一斗。斗當依魏志作升。漢隸：斗作升，與升字相似，故易混耳。

費長房，而逢長房爲謁府君。漢人稱太守爲府君，然敘事之文，當從其實。此傳多采鄙俗小說，未及

釐正。若東海君、葛陵君之稱，豈可穢正史乎。

章帝時有壽光侯者。注：壽，姓也。案：壽光，國名。光武封更始子鯉爲壽光侯。又北海王晉初封壽光侯，是也。此侯失其姓名，故舉其爵。下云侯爲勅之侯，復勅之，可證注以壽爲姓之誤。

甘始、元放、延年皆爲操所錄，問其術而行之。元放、左慈之字，慈事已見前。此元放二字衍也。曹操不稱姓，亦脫文。自左慈以後，中隔計子勳，上成公解，奴辜張貂等數人，皆不與操同時，不當遙承其文。

吾本師姓韓，字雅。裴松之注魏志，引辯道論云：姓韓，字世雄。

列女傳

曹世叔妻，令皇后諸貴人師事焉，號曰大家。此家字相傳讀如姑。考古書家室之家，亦讀爲姑。詩宜爾室家，樂爾妻帑，以家協帑。左氏傳：姪其從姑。六年其逋，逃歸其國，而棄其家，以家協姑逋。今人皆轉爲古牙切，獨此大家字尙存古音。

龐涓母，福祿長尹嘉義之。福祿當作祿福，詳見郡國志。

孝女叔先，雄者，韃爲人也。水經注：符縣長趙祉，遣吏光尼和，以永建元年十一月詣巴郡，沒死。子賢求喪不得，女絡，年二十五歲，有二子，五歲以還。至二年二月十五日，尙不得喪，絡乃乘小船至父沒處，哀哭自沈。夢告賢曰：至二十一日，與父俱出。至日，父子果浮出江上。郡縣上言爲之立碑。與此傳所載卽一事，而姓名互異。華陽國志亦云：符有先絡，懿道有張帛，絡與帛協韻，則其名當爲絡，不爲雄矣。水經注亦附符有光洛二語，落卽絡之譌。先與光字形相涉，常璩書與范史皆作先，而史又多叔字。廣韻亦以叔先爲複姓，則此女本姓叔先，或單稱先，猶諸葛之稱葛也。雄當是雒字之譌，雒與絡同音。國語：王孫雒，今本亦譌爲雄。

此其證也。王伯厚引水經注，以爲光終，終亦譌字。

西南夷傳

桓帝時，郡人尹珍，自以生於荒裔，不知禮義，乃從汝南許慎，應奉受經書圖緯。案：許慎與應奉不同時。奉仕桓帝朝，而慎之卒，蓋在安帝之世，不得到桓帝也。華陽國志作明章之世，則與許慎時代相及矣。但珍旣受業許慎，豈能更與應奉同朝。傳聞異詞，要皆不足信。

西羌傳

陸渾戎自瓜州遷于伊川，允姓戎遷于渭汭，東及轘轅，在河南山北者，號曰陰戎。案：左氏傳，僖二十二年，秦晉遷陸渾之戎于伊川，杜注：允姓之戎居陸渾，在秦晉西北，二國誘而徙之伊川，遂從戎號。至今爲陸渾縣也。又昭九年，晉梁丙張趯率陰戎伐潁，王使詹桓伯辭于晉曰：允姓之姦，居于瓜州，伯父惠公歸自秦，而誘以來，使偪我諸姬，入我郊甸。杜注：陰戎，陸渾之戎也。然則陸渾之戎，系出允姓，與允姓戎非二種，此傳似歧而二之。

和帝永元四年，訓病卒。案：下文已有永元元年，此又舉永元，詞之贅也。以傳例推之，和帝二字，應移在前文永元之上。

領護羌校尉衛瑤。順帝紀作衛瑤。

南匈奴傳

單于姓虛連題。注前書曰：單于姓攣鞬氏。案：連題卽攣鞬之轉。

北匈奴入雲中，遂至漁陽。太守廉范擊卻之。案：范爲雲中太守，太守上當有雲中二字。

屈蘭儲卑胡都須等。章帝紀：屈作屋。

北單于復爲右校尉耿夔所破。右當作左。

新降一部大人阿族等遂反畔。安帝紀：南匈奴左日逐王叛。

南匈奴左部句龍王吾斯車紐等背叛。順帝紀作句龍大人，王與大人皆匈奴尊稱，譯語小異。

右部醜落與休著各胡白馬銅等十餘萬人反。靈帝紀作休屠各。案：休屠之屠音儲，而著亦音直慮切。

譯語有輕重，其實一也。烏桓鮮卑傳俱云休著屠各，此必讀范史者音著爲屠，後遂攙入正文耳。晉書匈奴

傳北狄以部落爲類，其入居塞者有屠各、鮮支、寇頭、烏譚等十九種，屬各最豪貴，故得爲單于。

烏桓傳

因徙烏桓於上谷、漁陽、右北平、遼東五郡塞外。案：文止有四郡，蓋脫遼西二字。

廿二史考異卷十三

續漢書一

律厯志上

黃鍾一日。案黃鍾、太簇、姑洗、蕤賓、林鍾、南呂、應鍾七律皆主一日。所謂五音之正。各終一日者也。其餘五十三律。或主五日。或六日。或七日。或八日。合三百六十六日。所謂以六十律分朞之日也。

南授十三萬九千六百七十。當作七十四。脫四字。

中呂十三萬一千七十二。此數以三除之。卽有奇零不盡。時息以下亦然。由中呂下生。不能及黃鍾之半律。故又轉而上生。此下盛變。南中、離宮、內負、制時、物應、依行、重上生者。凡七變。而後終六十律之數。南事十二萬四千一百五十四。案六十律終於南事。南事之律。固不能下生矣。轉而上生。其數在大呂。分否之間。未始不可引而伸之也。

下生南事窮。無商徵。不爲宮。案十二律之變。窮於南事。安得云下生乎。疑下爲不字之譌。

離宮十二萬一千八百一十九。當云一千八十九。

解形十一萬九千一百三。當云十萬。

分積十萬六千一百八十八。當云八十七。
分爲九萬三千一百一十七。當作一十六。

故待詔嚴崇。宋書厯志作嚴嵩。古文崇嵩通。漢武帝改嵩高山爲崇高。

律厯志中

自太初元年始用三統厯。案何承天謂劉歆之生不逮太初。訾譏司馬氏以爲不知而妄言。其實非也。
太初造術以前四千六百一十七歲爲上元。一元之中卽有三統。三統與太初異名而同實。劉子駿用太初法推衍之。以說尙書春秋。又追日月五星同起牽牛之始。以爲太極上元。初非別立一術。則三統之名不自歆始也。承天號稱知厯。何未悟及此。

史官用太初鄧平術。有餘分一。在三百年之域。行度轉差。案四分術。歲三百六十五日四分日之一。太初術以千五百三十九之三百八十五爲斗分。較之四分又多千五百三十九分之一。所謂餘分一也。
積至三百年。當贏七十五分。則冬至益後天。故云行度轉差。

太尉屬梁鮪。司徒嚴勛。此嚴勛亦司徒之掾屬。非司徒也。史脫文。

以太初厯考。太初元年。盡更始二年。二十四事。十得晦。以上下文校之。十得晦。句上下當有脫文。
其值東井與鬼。出赤道北五度。當云二十五度。脫二十兩字。

中興以來圖讖漏泄而考靈曜命麻序皆有甲寅元。案淮南天文訓以太陰紀歲元始甲寅而太初改麻亦云復得闕逢攝提格之歲史記麻術甲子篇云太初元年歲名焉逢攝提格則太初本用甲寅元矣但漢初言甲寅元者乃指太陰非謂太歲元帝時翼奉上封事始誤合太陰太歲爲一緯候出於袁平間術士習聞甲寅元而不知太陰太歲之分又不知超辰之法而甲寅元遂移於太歲矣尙書考靈曜春秋命麻序今已不傳惟易乾鑿度尙存亦用甲寅元也。

百四十四歲而太歲超一表。表當作辰。

漢祖受命因秦之紀十月爲年首閏常在歲後不稽先代違于帝典。古法子丑寅月迭爲三統無以建亥爲歲首者。堯典云閏月正四時成歲是四時皆可置閏而秦法置閏常在歲終此二事皆違經而背古也。

五是以備。洪範五者來備此云五是蓋漢儒傳本異也。閏本汲古閣本作五者則後人據今本尙書易之李雲傳五氏來備氏古是字荀爽傳五隄咸備隄亦訓是。

兩麻相課六千一百五十六歲而太初多一日。四分術歲有小餘四分日之一太初術小餘千五百三十九分日之三百八十五兩法相課則四歲之中小餘皆滿一日而太初尙贏千五百三十九分之一也積至六千一百五十六歲而餘分又滿一日。

上納其言遂改厯事。詳文義。是安帝納尙書令忠言。仍用四分。不復議改。蔡邕云。延光元年中。謁者竇
詡亦非四分庚申。上言當用命厯序甲寅元。公卿百僚參議正處。竟不施行。謂此事也。沈約志亦云竇
等遂寢。此文遂下當有罷字。或是寢字。

乾鑿度八十分之四十三爲日法。當云八十一分。

從太初至永平十一年。百七十歲。當云百七十一歲。

至永和二年。小終之數寢過。永和當作元和。

四分厯仲紀之元。起于孝文皇帝後元三年。歲在庚辰。上四十五歲。歲在乙未。則漢興元年也。又上二百

七十五歲。歲在庚申。則孔子獲麟。今世所推甲子紀元。蓋出於此。古術家用百四十四年超辰之法。

漢志云。高帝伐秦。太歲在午。則文帝後三年。太歲當在卯也。

太初元年。歲在丁丑。上極其元。當在庚戌。而云丙子。言百四十四歲超一辰。凡九百九十三超。歲有空行

八十二周有奇。乃得丙子。案三統術。上元至太初元年。十四萬三千一百二十七算。以百四十四除

之。得九百九十三。餘百三十五此爲上元以來太歲超辰之數。以此數并入積算。起丙子算。至太初元年。復

得丙子矣。東漢以後。術家不知太歲當超辰。但依六十之數。上溯太初。以爲歲在丁丑。又以爲上元當

在庚戌。非太初本法也。鄭康成注周官馮相氏。十有二歲云。歲謂太歲。歲星與日。同次之月。斗所建之

辰樂說說歲星與日常應太歲月建以見然則今厯太歲非此也東京諸儒知太歲有跳辰法者獨康成一入而已歲星與太歲相應太歲超九百九十三辰則歲星亦超九百九十三次十二次而一周故云八十二周有奇

案百七十歲二部一章當云百七十一歲

及命厯序積獲麟至漢起庚子部之二十三歲竟己酉戊子及丁卯部六十九歲合爲二百七十五歲

案元命包乾鑿度皆云開闢至獲麟二百七十六萬歲以元法收之得六百有五餘歲一千二百又以部法收之得積部十五其餘六十則獲麟之歲入乙酉部六十一年依此推至漢文後二年適足五部之數故次年得爲元首復起甲子部也命厯序以甲寅爲元較元命包積年少一百一十四算以元法部法收之正入庚午部之二十三年此云庚子當爲庚午之譌也然依此推至漢文庚辰歲不當甲子部首不可立元矣

漢元年歲在乙未上至獲麟則歲在庚申推此以上上極開闢則不在庚申讖雖無文其數見存案自獲麟至開闢二百七十六萬歲以六十除之恰盡獲麟之歲既是庚申則開闢之始亦必庚申矣當云元在庚申不字乃元字之譌

而光晃以爲開闢至獲麟二百七十五萬九千八百八十六歲獲麟至漢百六十二歲案光晃說開闢

至獲麟歲數與春秋命厯序同。而獲麟至漢初。則較命厯序少百一十四歲。依此推至高帝元年。則當在壬寅。而非乙未矣。故蔡邕識其謬。

恂術以五千六百四十日有九百六十一食爲法。日當作月。古法百三十五月有二十三食。卽宗誠術也。今馮恂術五千六百四十月有九百六十一食。較古法稍強。劉洪乾象術萬一千四十六月有千八百八十二食。又強於恂術。

律厯志下

斗建移辰。謂之日月之行。日上脫一月字。

璇衡追日以察斂。察下脫發字。

中法四十二。四當作三。置日餘百六十八。以三十二除之。得五日三十二分之八。卽四分前志所謂策

餘也。每月中氣三十日。又三十二分之十四。故以三十二爲中法。

其月食百三十五。食字衍。

得五百二十三之二十而一食。百當作月。春秋正義云。三統之術。以五月二十三分月之二十而一食也。四分術亦同。

五百一十三分之五十也。五十下脫五字。

分終其法。因以與蔀相約。得四與二十七。五之會二千五十二。案。七十六歲爲蔀。以二十七乘之。得二千五百一十三。爲會歲數。以四乘之。亦得二千五十二。然則二千五十二歲。而蔀分與會分適相直。故名之曰蔀會也。五之兩字難解。閩本。汲古開本作互。亦非是。當云名之曰蔀會。傳寫脫譌耳。

蔀會三千五十三。當云二千五十二。以蔀會除元會。得數二十。故云二十而與元會。月數百二十五。二當作三。

食法二十二。當云二十三。

其餘以蔀會除之。所得以七十二乘之。滿六十。除去之。置蔀會數以六十除之。尚餘十二。故以七十二乘。與以十乘。同滿六十去之。乃得與紀首歲名相直也。

所得數從天紀算之起外。所以入紀。之起以三字皆衍文。或云起當在算上。各以不入紀歲名命之。不當作所。

天紀歲名。地紀歲名。人紀歲名。蔀首。案。此四行今本皆失其次。試爲別而言之。自庚辰至甲申。

天紀歲名也。自庚子至甲辰。地紀歲名也。自庚申至甲子。人紀歲名也。自甲子至乙酉。則蔀首天正朔且冬至之日。因以爲蔀名也。最下一至二十。則蔀首之次第。因一紀之中。各有二十蔀。故以次列之也。校書者不知天紀歲名當與庚辰竝列。誤升於上。餘皆以次遞升。遂至舛誤不可究詰。今特爲更正如

右.

廿二史考異 卷十三

天紀歲名地紀歲名人紀歲名部首

癸酉	甲午	乙卯	丙子	丁酉	戊午	己卯	庚子	辛酉	壬午	癸卯	甲子
丙子	庚申	甲辰	戊子	壬申	丙辰	庚子	甲申	戊辰	壬子	丙申	庚辰
丙申	庚辰	甲子	戊申	壬辰	丙子	庚申	甲辰	戊子	壬申	丙辰	庚子
丙辰	庚子	甲申	戊辰	壬子	丙申	庚辰	甲子	戊申	壬辰	丙子	庚申
十二	十一	十	九	八	七	六	五	四	三	二	一

壬子	壬辰	壬子(本作壬午誤)	壬申	十三
辛卯	戊申	戊辰	戊子	十四
庚午	甲子	甲申	甲辰	十五
己酉(本作乙酉誤)	庚辰	庚子	庚申	十六
戊子	丙申	丙辰	丙子	十七
丁卯	壬子	壬申	壬辰	十八
丙午	戊辰	戊子	戊申	十九
乙酉	甲申	甲辰	甲子	二十

加大餘二十九，小餘四百九十，九十下脫九字。

一術以太周乘年，周天乘減之，餘滿蔀日，則天正朔日也。此條有脫誤，依法推之，當以大周乘入蔀年。

又以周天乘閏餘相減，大周者，周天乘章月之數，閏餘則不盈章月，餘滿蔀月，得一爲積日，滿六十去之，其餘爲大餘，以所入蔀名命之，算外即天正朔日。蓋以大周乘入蔀年，以蔀月除之，所得即天正冬，至後于經朔，由閏餘所積，故以閏餘化爲日，分相減而得天正朔日也。周天乘下當脫閏餘二字，蔀日當作蔀月。

以月餘乘之，滿中法得一，月餘當作日餘。

一術以爲五乘冬至小餘以減通法餘滿沒法得一則天正後沒也。爲五當作十五以十五乘冬至小餘與通法相減餘滿沒法得一卽冬至距後沒之日數也。起冬至算外爲後沒日。

置入蔀積月以日乘之。當云置入蔀積日以蔀月乘之。

積度加斗二十一度加二百三十五分。此以蔀月爲度法九百四十分之二百三十五卽四分之一也。經斗除十分。當作除十九分。此以蔀法爲度法七十六分之十九與九百四十分之二百三十五其比例同皆四之一也。

積度加斗二十一十分。十分當云十九分。

其冬下旬月在張心署之。案乾象景初術俱有此文考隋書刑法志陳制晦朔八節六齊月在張心日竝不得行刑。今術家以二十八宿配日月五星房昴虛七星屬日心張危畢昴月。

謂盡漏分後盡漏盡也。此九字當是衍文。

置其節氣夜半之數。夜半當作夜漏。

以月數乘積。積下當有食字。

求後食加五百二十分。百當作月。

又以四百九十乘積月。九十下當有九字。閩本有九字

不滿法。法什之。下法字衍。

五星數之生也。當提行。各本皆誤接前行。

以章法乘周率爲用法。用當作月。

以月之月乘積爲朔大小餘乘爲入月日餘。此處有脫譌。今以算求之。當以部日乘積月如部月而一。

爲積日。不盡爲小餘。積日滿六十去之。餘爲大餘也。又以部日乘月餘。以月法乘朔小餘併之。以四千

四百六十五約之。所得如日度法。而一爲入月日。不盡爲日餘也。

以率去日率。餘以乘周天。本或作大譌如日度法爲度之餘也。以下脫周字爲度之餘。當云爲積度度餘。

木。日餘萬四千六百四十七。七當作一。

火。入月日十一。一當作二。

七。入月日二十三。三當作四。

水。月餘二十一萬七千六百六十。六十下脫三字。

虛分四百四十九。九當作一。

入月日二十七。七當作八。

日度法四萬七千六百三十一。一當作二。

滿其月法得一。從小積爲月餘。小積下脫不盡二字。

以蔀日乘之入紀月。之字衍。

以四千四百六十五約之。四千四百六十五者。章法乘章月之數也。

所得得滿日度法得一。所得下衍得字。

餘一加晨得夕。加夕得晨。餘一當作金水。

其月餘得一。月者又餘二十九。又下疑有脫文。當云加大餘二十九。小餘四百九十九。

小餘滿蔀月。得一如大餘。如當作從。

木晨伏十六日七千二百二十分半。二百當作三百。

八十四日進十二度。進當作退。

伏復十六日七千二百二十二分半。二百當作三百。二十二分當作二十分。北宋本。圖本俱作二十分。

行星三十二度。與萬三百一十四分。三十二當作三十三。

八十四日行一十二度。當云百八十四日行百一十二度。

一見六百三十六日。行百三度。行下脫三字。

日行行四十六分度之三十三。下行字衍。

四十六日行三十三度而。而下脫疾字。

日行一度九十分度之十五。九十下脫一字。

一合二百九十二日百八十一分。日下脫二字。

行百六度而進。進當作遲。

伏五日退四度而後合。後當作復。

凡三合一終。三合當作再合。

九日行八度留不行二日。二日下脫旋字。

一見三十二日行三十度。度上脫二字。

以步法伏日度分。如星合日度餘。如當作加。

以天度乘晝漏夜漏減三百而一。當云滿二百而一。

冬至斗二十度百一十分八分。當作二十一度八分。因下有百一十五之文。而重出耳。此以三十二爲

度法。分滿法。即進爲度。無有過三十一分者。

大寒心半。當云心二半。

立春危七度二十一分。七當作十。

雨水室八度二十八分。八度當作九度。

驚蟄壁八度三分。八當作九。

大暑星四度三分。三當作二。

霜降氏十四度十三分。三當作二。

注。每次三十二度三十三分之十四。當云三十度三十二分之十四。

自危十度至壁八度。八當作九。下文自壁八度至胃一度同。

立春驚蟄居之。此以驚蟄爲正月中氣。雨水爲二月節。依古法也。四分術以雨水爲正月中。

從上元太歲在庚辰以來。盡熹平三年。歲在甲寅。積九千四百五十五歲也。四分術本以漢文帝後三

年庚辰歲爲元。在熹平甲寅前三百三十五年。又追上兩元。計九千一百二十歲。以爲上元。距開闢之

始。二百七十五萬一千二百歲也。四分術以章帝元和二年施行。在熹平甲寅前九十年。此算積年乃

及熹平者。蓋劉洪撰記時附益之。

而顛項用乙卯。唐一行日度議引洪範傳云。麻紀始于顛項上元。太始闕逢攝提格之歲。畢陬之月。朔

日己巳立春。七曜俱在營室五度。則顛項亦用甲寅。與此志異。然日度議又云。魯宣公十五年。顛項弟

十三部首。以丁巳平旦立春。則顛項麻元在春秋前七百八十四年。正是乙卯歲。殷祖辛之元祀也。術

家皆上追開闢。此獨始於殷代。故云斷取近距。

殷用甲寅。案前志載殷麻云。成湯用事十三年十一月甲子朔旦冬至。終六節首。當周公五年正月戊午朔旦冬至。又竟十四節。至漢元帝初元二年。復爲紀首。初元二年歲在甲戌。則前一紀首乃甲寅歲也。

周用了巳。李淳風說。周麻上元丁巳。至魯僖公五年丙寅。積二百七十五萬九千七百六十九算。較元命包所說開闢至獲麟之歲。少五十七算。

漢興承秦初用乙卯。唐一行日度議云。顓頊麻上元甲寅辰初合朔立春。七曜皆在艮維之首。蓋重黎受職於顓頊。帝堯復其子孫。俾掌天地四時。以及虞夏。故本其所由生。命曰顓頊。其實夏麻也。湯作殷麻。更以冬至爲上元。周人因之。距羲和千祀。昏明中星。率差半次。夏時直月節者。皆當十有二中。故因循夏令。其後呂不韋得之。以爲秦法。更考中星。斷取近距。以乙卯歲正月己巳合朔立春爲上元。

追漢三十五年庚辰之歲。三當作四。

加六百五元一紀。上得庚申。自開闢至漢文帝後三年。積二百七十六萬三百二十算。以元法收之。得

六百有五。其餘一千五百二十。恰滿一紀之數。

洪能爲算。述敘三光。此卷首千餘言。述推步之原。精微簡要。非洪不能作。後之步天者。宜寶之。

禮儀志上

齋日內有汙染解齋。說文引漢律云。見舛變不得侍祠。舛。婦人汚也。

上巳官民皆絜于東流水上。絜古禊字。應劭云。禊者。絜也。言自絜濯也。見南齊書說文無禊字。

禮儀志中

注。維建寧四年七月乙未。本紀。七月癸丑。立貴人宋氏為皇后。

今使太尉襲。使持節奉璽綬。案。靈帝紀。太尉聞人襲。以三月免官。此立后乃在七月。或紀所書月日誤。

以朱索連葦菜。彌牟朴蠹鍾。彌牟五字未詳。

以桃印長六寸。方三寸。五色書文如法。以施門戶。桃印。宋書禮志作桃卯。注稱桃印本漢制。所以輔卯。

金。則印當為卯之譌。

周人木德。以桃為更。更即梗字。下文云。設桃梗。鬱鬪。葦菱是也。

太子具樂器。太子當作太子。

禮儀志下

巴俞擯歌者六十人。為六列。獻帝紀注引此文作擯歌。首徒了反。

祭祀志上

及中宮宿五官神。中宮當作中官。

二十八宿外宮星。外宮當作外官。漢書天文志。經星常宿中外官。凡百一十八名。

甲午禪于梁陰。梁陰卽梁父也。

祭祀志中

元和二年正月詔曰。章帝紀作二月。

祭祀志下

於是雒陽高廟四時加祭孝宣。孝元。凡五帝。前此雒陽廟祀高帝。文帝。武帝。今加祭宣元二帝。故云五也。

注。世祖廟樂名宜曰大武之舞。案。下文引樞機鈴當作旋。曰。有帝漢出德洽。作樂名子。虞韶。禹夏。湯漢。

周武無異。不宜以名舞。蓋言樂名大子。與韶夏濩相同。不宜更以大名舞也。又引詩傳云。頌言成也。

章成篇宜列德。此言歌詩宜名武德之舞。不宜單稱大武也。然則東平王蒼之議。正主武德之舞。其前

云樂名宜稱大武者。或當時公卿有此議。故博引圖緯經傳以駁之耳。沈約樂志言。蒼總定公卿之議

曰。宗廟宜各奏樂。不應相襲。所以明功德也。承文始五行武德。爲大武之舞。又制舞歌一章。薦之光武

之廟。此是錯會東觀書意。蒼所制歌詩。固云武德舞。不云大武舞也。近有據沈約志以譏范史之誤者。

由未尋繹斯文而意爲之說爾。

和帝追尊其母梁貴人曰恭懷皇后陵。當云陵曰西陵。史脫去三字。

高廟五主。世祖廟七主。五主者。高文武宣元也。七主者。光武明章和安順桓也。

陳嚴具。王懋竑曰。嚴當作裝。東漢諱莊爲嚴。遂并改焉。予謂裝妝皆俗字。古文本作莊。故東漢人稱妝具曰嚴具。魏志田疇傳。戒其門下趣治嚴。卽治裝也。

天文志上

建武九年七月。金犯軒轅大星。案志載五星凌犯。或稱太白熒惑歲星垣星辰星。或稱金木水火土。前後俱不畫一。

天文志中

永元六年。度遼將軍朱徽。和帝紀。匈奴傳俱作朱徽。

元興元年十月二日。和帝崩。案和殤二帝紀俱云十二月辛未。

永初三年。彗星起天苑。安帝紀作天苑。苑苑古字通。

四年後。太郡張敏免官。安帝紀作張禹。

永和三年。江賊蔡伯流數百人攻廣陵九江。燒城郭。殺都長。順帝紀作九江賊。此脫九字。都長上脫江。

字。

四年中常侍張遠、遼政、陽定、內署、令石光。陽當作楊。內署當作內者。百官志有內者。令遠等自知事不從。各奔走。或自刺解。貂蟬投草中。逃亡。皆得免。案。梁商傳云。收遠等。悉伏誅。此云皆得免者。妄也。

天文志下 此卷注全闕

和平元年十二月甲寅。梁太后崩。桓帝紀在二月。此衍十字。

延熹五年。京兆虎牙都尉宋謙。桓帝紀作宗謙。

八年。太僕南鄉侯左勝。桓帝紀。宦者傳俱作左稱。趙岐傳。中常侍左悺。兄勝。

河南尹鄧萬。萬下脫世字。蓋唐人避諱去之。爰延傳亦作鄧萬。

虎賁中郎將安鄉侯鄧魯。安鄉當作安陽。據皇魯當作會。據桓帝及

後六年。司徒劉翬為中常侍。曹節所譖。下獄死。案。熹平之世。司徒無下獄死者。惟光和二年。劉郃以謀

誅宦官。下獄死。翬當為郃之譌也。自熹平二年至光和二年。相距恰六載矣。

五行志一

建光元年。京都及郡國二十九。續志凡京師皆作京都。避晉諱也。百官志間有作京師者。乃後人妄改。

皆幘而衣婦人衣繡擁鬢。光武紀作繡鬪。

后父禁為平陽侯。平陽當作陽平。案世傳注引此文亦誤作平陽劉貢父已辨之。

河內牢川詣闕上書。黨錮傳作牢脩。

五行志二

漢陽河陽中失火。河陽當作阿陽。

先是皇后因賤人得幸。案桓帝鄧皇后初冒姓梁氏。帝惡梁氏改姓為薄。而李雲傳云立掖庭民女亳

氏為皇后。此志亦云亳后。蓋古文亳與薄通。漢書地理志山陽郡薄縣。臣瓚云湯所都也。史記封禪書

亳人謬忌亦稱薄忌。

皇后兄何進。異父兄朱苗。案靈帝及何后紀皆稱何苗。苗本姓朱。惟見於此。此稱異父兄。而前卷稱同

母弟亦小異。

五行志三

延熹八年四月濟北水清。濟北下脫河字。

五行志四 此卷注全闕

匈奴單于於除難鞬叛。難字衍。

使征西將軍劉尙擊之。此又一劉尙。乃南陽宗室襲封朝陽侯者。

建光元年九月己丑。郡國三十五地震。安帝紀作十一月。

延光元年九月戊申。郡國二十七地震。安帝紀作甲戌。

二年。京都郡國三十二地震。安帝紀無十二字。

四年十月丁巳。京都郡國十六地震。順帝紀作十一月。

永和二年四月庚申。京都地震。順帝紀作丙申。

光和元年二月辛未。地震。靈帝紀作己未。

廿二史考異卷十四

續漢書二

郡國志

河南尹注。秦三川郡。高帝更名。世祖都雒陽。建武十五年。改曰河南尹。子弟晦之曰。此司馬彪本注。它郡國放此。

卷有垣離城。或曰古衡雍。垣衡聲相近。

苑陵。前志作苑陵。杜預注。左氏傳作宛陵。苑苑宛古皆通用。

成舉。舉當作臬。字形相涉而譌。河內郡平皋志亦譌爲舉。

河內郡。山陽邑。順帝阿母宋娥封山陽君。

獲嘉侯國。馮石所封獲嘉公主子。

河東郡。平陽侯國。馮奮所封平陽公主子。

開喜邑。和帝女聞喜公主。

垣有王屋山。竟水出。竟卽沆字。古人從水字。或橫寫如盍。盍之類。沆作竟。亦是以立水爲橫水。隸省爲

六爾。兖州本以沈水得名。非兩字也。

濩澤侯國。更始孫劉巡所封。明帝時。有濩澤侯鄧鯉。

有祁城山。晦之曰。祁當作析。

恆農郡。恆農燭水出。注。前志出衡山嶺下谷。晦之曰。衡當作衙。

有務鄉。注。亦眉破李松處。劉聖公傳作務鄉。音莫老反。

左馮翊。衙。漢碑作鄢。

右扶風。險廩侯國。耿況所封。又耿弇封好時侯。傳四世。至安順時。尚無恙。而志無此縣。未知其審。

右司隸校尉注。曹公分關中置漢興郡。國游楚為太守。國當作以。游楚事見魏志張既傳注。

郡國志二

潁川郡。襄。前志無此縣。

舞陽邑。順帝長女舞陽公主。

臨潁。和帝女封臨潁公主。志似脫邑字。桓帝時。邊韶為臨潁侯相。蓋公主之子襲封為侯也。

汝南郡。平輿。注。有摯亭。見說文。摯當作摯。說文。汝南平輿有摯亭。讀若晉。

新陽侯國。陰就所封。

汝陽。案順帝季女封汝陽公主。志所據者。順帝時圖籍。則汝陽下宜有邑字。或其時尙幼。未有封邑也。

新息國。國上當有侯字。馬援所封。

灑強侯國。陰興子博所封。

安城侯國。鮑期封安成侯。卽此安城也。前志亦作安成。期子丹徙封葛陵。光武又封劉賜爲安成侯。

鮑陽侯國。陰興子慶所封。

安陽侯國。吳漢兄子彤所封。

富波侯國。東觀記。光武封皇考姊子周均爲富波侯。

朗陵侯國。臧宮所封。

弋陽侯國。劉國所封。

征羌侯國。本汝南之營鄉。光武封來歙於此。前志無。

思善侯國。前志無。

褒信侯國。前志無。順帝封中黃門李元。

原鹿侯國。前志無。光武封陰識於此。

定穎侯國。前志無。順帝時封郭鎮。

固始侯國。故寢也。光武中興，更有寢邱。案前志：汝南郡有潯縣。應劭云：孫叔敖子所邑之潯邱是也。世祖更名固始。又淮陽國有固始縣。師古云：本名寢邱。楚令尹孫叔敖所封地。予意汝南淮陽地相毗連。光武封李通，或兼食二縣之地，而國都在寢，遂移固始之名於彼耳。

山桑侯國。王常所封。

梁國。穀熟。前志無。光武封更始子歆爲穀孰侯。

陽故屬陳畱。前志作僞。應劭謂卽鄭伯克段于鄆之鄆。續志用杜預說，以潁川之僞陵爲春秋之鄆。而劉昭以鄭伯克段事實之。洪亮吉云：京城廩延，皆在鄭東北。自陳畱之僞至共道里亦近。應氏說不可易也。

薄故屬山陽。所都。晦之云：所上脫湯字。

沛國。竹邑侯國。彭城靖王子阿奴所封。

杼秋有澶淵聚。注左傳：襄二十年，盟于澶淵。案春秋之澶淵，杜云在頓邱縣南。劉昭以杼秋之澶淵當之，非也。

陳國。扶樂。前志無。光武封劉隆爲扶樂鄉侯。

武平。前志無。

魯國。案建武二年封兄子興爲魯王。二十八年徙封北海。此後無封魯王者。而志稱國不稱郡。蓋自光

武以魯國益封東海恭王。終東京之世。魯常爲東海國所屬。而魯國之名未改。故明帝時鍾離意和帝

時汝郿靈帝時陳逸皆稱魯相。而曲阜孔廟永興永壽建寧諸石刻皆有魯相之稱。初不稱太守也。

魯有牛首亭。注左傳桓十四年宋伐鄭取牛首。案左傳之牛首杜元凱以爲鄭邑。劉昭以魯之牛首亭

當之。非也。水經注沙水又東南逕牛首亭東。左傳宋人與諸侯伐鄭東郊取牛首者也。俗謂之車牛城矣。

魏郡。陰安邑。章帝女陰安公主。

鉅鹿郡。廣宗。前志無。平帝元始二年封代孝王元孫如意爲廣宗王。當卽其地也。順帝封宦者王成

爲侯國。

常山國。郡鄉侯國。東京人封郡鄉侯者甚多。郡鄉者。近郭之鄉。班在鄉侯之上。非皆常山之鄉。郡也。

熊方年表於郡鄉侯皆注云常山。非是。常山之郡鄉相四京已爲侯國。乃趙頃王子景所封。王莽時絕未審。東京更封何人。

樂城。注在縣西南六十里。在上有脫文。前志無此縣。

中山國。蠡吾侯國。河閒孝王子翼所封。桓帝父也。

安平國。阜城故昌城。案前志昌成縣屬信都郡。而勃海郡卻有阜城縣。

經。前志無。安平孝王得子理封經侯。

南深國故屬涿。國當作澤。案前志涿郡中山皆有深澤縣。而涿郡加南字。續志有南深澤。無深澤。趙國中邱。當云故屬常山。

勃海郡。浮陽侯國。光武封劉植從兄歆。順帝封中黃門孫程。程徙封宣城。死。又封其養子壽。

郡國志三

陳留郡。封邱有桐牢亭。或曰古蟲牢。古音蟲如同。詩蘊隆蟲蟲。徐仙民音徒冬反。韓詩亦作爛爛。故

蟲牢轉爲桐牢也。

已吾。前志無。

東郡。樂平侯國。梁竦子棠所封。

穀城。前志無。

任城國。任城有桃聚。注光武破龐萌於桃鄉。漢書王式東平新桃人。卽此桃鄉也。

泰山郡。嬴有鐵山。山字當連下句。山荏。縣名也。

濟北國。盧有平陰城。有防門。有光里。光里卽春秋傳廣里也。杜預謂防有門。於門外作塹。橫行廣一

里者。非是。

成。前志泰山郡有式縣。無成縣。

山陽郡。方輿有泥母亭。或曰古甯母。泥甯聲相近。

金鄉。前志無。

防東。前志無。

濟陰郡。乘氏侯國。梁竦子雍所封。

單父侯國。初封劉茂。後封梁竦子翟。

東海郡。案光武封子疆為東海王。傳國最久。中間無改國為郡之事。此郡字當為國之譌。

合城。前志有合鄉。無合城。晉書地理志。東海亦祇有合鄉縣。此城字必鄉之譌。

琅邪國。西海。前志無西海。蓋海曲之譌。劉益子傳。琅邪海曲有呂母。注海曲。縣名。故城在密州莒縣

東。

卽邱侯國。故屬東海。案永平中。吳良左轉為卽邱長。是明帝時猶未為侯國也。

繒侯國。劉敞所封。敞東海恭王之後。故志云故屬東海。

彭城國。高帝置為楚。章帝改。案袁安傳。永平十三年。楚王英謀為逆。事下郡覆考。明年。三府舉安能治

劇。拜楚郡太守。然則國除之後。本為楚郡。至肅宗遺詔徙封六安王恭為彭城王。乃更為彭城國也。

下邳國。僮侯國。沛獻王子嘉所封。

潘旌。前志作播旌。

東城。當云故屬九江。

曲陽侯國。淄川王子鳳所封。

右徐州刺史部。注。魏氏春秋曰。初平三年。分琅邪東海為城陽新城。當作昌慮郡。案。魏志太祖紀。建安

三年。分琅邪東海北海為城陽利城昌慮郡。以臧霸傳考之。蓋禽呂布後所置。魏氏春秋以為初平三年分者。誤。

郡國志四

濟南國。嘗有賴亭。注。左傳。哀六年。公如賴。案。左傳云。使胡姬以安孺子如賴。此云公。誤也。

鄒平。案。溫序傳。為鄒平侯相。是鄒平嘗為侯國也。

平原郡。鬲侯國。朱祐所封。

樂安國。高帝西平昌置。為千乘。案。文當云高帝置。不應有西平昌三字。其為衍字無疑。後讀宦者傳。彭

愷為西平昌侯。注云。西平昌縣屬平原郡。乃悟此三字當屬上文平原郡。而平原郡九城當為十城。因

此三字錯入樂安注中。校書者遂改十為九。以合見存之數耳。北海有平昌縣。故稱西以別之。晉志平原國亦有西平昌縣。

北海國。高密侯國。鄧禹所封。

昌安侯國 鄧禹子襲所封

夷安侯國 鄧禹子珍所封

膠東侯國 賈復所封 前志有膠東國 無膠東縣

卽墨侯國 賈復子宗所封

拒 當作挺 宋書州郡志 挺令前漢屬膠東 後漢屬北海 或以琅邪之拒當之 非也

東萊 曲成侯國 明帝時有曲成侯 劉建韓敕碑有曲成侯王鬲

掖侯國 歐陽欽封夜侯 卽掖也 傳子復 以無子 國除

葛盧 前志無

不期侯國 伏湛封不其侯 卽此

南陽郡 冠軍邑 順帝第二女冠軍公主

舞陰邑 安帝妹舞陰公主

復陽侯國 順帝封中黃門李建

湖陽邑 光武姊湖陽公主

育陽邑 光武女清陽公主

涅陽。安帝妹涅陽公主食邑。當有邑字。

山都侯國。順帝封中黃門楊佗。

鄼侯國。順帝封長樂太官丞王國。

蔡陽侯國。城陽恭王子平所封。後徙竟陵。

安衆侯國。漢書王子侯表。安衆侯丹。以長沙定王子封。傳六世崇。爲王莽所滅。建武二年。以崇從父弟

寵紹封。十三年。子松嗣。班孟堅修史時見存。

筑陽侯國。光武封吳漢子盱。後徙封平春。

順陽侯國。光武封族兄嘉。傳子參。削爲南鄉侯。

成都。前志無。

襄鄉。前志無。

南鄉。前志無。順陽侯劉參有罪。削爲南鄉侯。卽此。

南郡。中廬侯國。順帝封中黃門孟叔。

華容侯國。順帝封中黃門王康。

邵侯國。淄川王終子柱所封。

宣城侯國。順帝封中黃門孫程。

臨沮侯國。順帝封中黃門史汎。

枝江侯國。順帝封中黃門李剛。

江夏郡。軼侯國。王霸子符所封。

竟陵侯國。城陽恭王子平所封。

蕪春侯國。陳俊子浮所封。

平春侯國。前志無。章帝封吳漢子盱。

南新市侯國。前志無。

零陵郡。湘鄉。前志無。

昭陽侯國。前志無。

武陵郡。注。晉代太守趙厥。晉書。厥作厥。

作唐。前志無。

長沙郡。湘南侯國。順帝封中黃門黃龍。案。順帝即位之始。宦侍侯者十九人。封邑具載范史。此志於

廣宗。廣平。皆屬東阿。范縣。皆屬祝阿。屬平。析。屬南夷陵。屬南。下雋。屬長。諸縣。皆不云侯國。恐傳寫遺脫。

未必元文之漏。或云涿郡范陽縣志稱侯國。王道封范縣侯。疑是范陽之譌也。

醴陵。前志無。

九江郡。合肥侯國堅鐔所封。

阜陵。案章和元年置阜陵國。食五縣。以壽春爲王都。傳國至桓帝初。暫絕而復繼。與漢相終始。志獨不載何也。

廬江郡。臨湖侯國。故樂成王萇所封。

龍舒侯國。明帝封楚王英舅子許昌。

居巢侯國。劉般所封。

六安國。明帝時有六安侯劉盱。章帝嘗封弟恭爲六安王。以廬江郡爲國。尋復故。

會稽郡。太末注。初平三年分立新安縣。建安四年孫氏分立豐安縣。二十三年立遂昌縣。案宋書州

郡志。豐安。漢獻帝興平二年孫氏分諸暨立也。遂昌。孫權赤烏二年分太末立。曰平昌。晉武帝太康元

年更名。是遂昌立縣。不在建安之世。其初名亦不稱遂昌也。惟新安之分自太末。則沈約志亦在初平

三年。而建安廿三年所分者。則爲定陽。非遂昌也。若豐安爲諸暨所分。則又與太末無與矣。未審孰是。

章安故治閩越地。光武更名。注。晉元康記曰。元康當本鄞縣南之迴浦鄉。章帝章和元年立。未詳。案。鄭

元康當作太康

巨君傳。舊交阯七郡貢獻轉運。皆從東冶汎海而至。所云東冶。卽會稽之冶縣。巨君以章帝建初八年爲大司農。其時尙稱東冶。則非光武更名明矣。又考班志。治與回浦本是二縣。意者東漢初嘗省回浦入鄞縣。故有回浦鄉之稱。

東部侯國。案宋書州郡志。候官。前漢無。後漢曰東候官。屬會稽。此東部侯國。當卽東候官之譌。漢時未見有封東部侯者也。又鄭巨君傳注。引太康地志云。漢武帝名爲東冶。後改爲東候官。是章安爲回浦東候官爲治。各不相涉。太康志本自瞭然。志以章安爲故治。疑未可信。吳志虞翻傳。太守王朗亡。走浮海。翻追隨營護到東部候官。候

官長閉城不受。

豫章郡。注。豫章縣建安立。案宋書州郡志。豫寧。漢獻帝建安中立。吳曰要安。晉武帝太康元年更名。卽謂此縣也。據此注。似本名豫章。晉初改爲豫寧。

南昌。注。豫章記曰。江淮惟此縣及吳臨湘三縣是也。案應劭漢官云。荆揚江南七郡。唯有臨湘南昌吳

三令爾。見百官志注。蓋漢制。萬戶以上爲令。萬戶以下爲長。而江南七郡。唯有三令。此外戶口雖錄。祇從小

縣之例。不得置令。豫章所云。正與應氏合。三縣當是三令之譌。

海昏侯國。宣帝封昌邑王賀於此。王莽篡位。絕建武初復封。

石陽。前志無。

郡國志五

漢中郡。襄中注有唐公防祠。防當作房。漢人隸書房或作所。因譌為盲旁。

巴郡。注譙周巴記曰。初平六年。趙穎分巴為二郡。案。初平紀元止於四年。巴記云六年者。誤也。趙穎

三國志作趙驥。

以墊江為治所。安漢以下為永寧郡。案。華陽國志。趙穎建議以墊江以上為巴郡。治安漢。江州至臨江

為永寧郡。是安漢墊江同在巴郡之內。而安漢且為郡治。穎為安漢人。故欲移巴郡之名於安漢也。此

文似有誤。

劉璋分巴。以永寧為巴東郡。案。華陽國志。改永寧為巴郡。非巴東也。

廣漢郡。德陽。前志無。

蜀郡。八陵。前志有蠶陵。無八陵。晉志亦作蠶陵。

犍為郡。南安有魚涪津。晦之云。涪當作涪。吳漢傳。漢與公孫述將魏黨公孫永戰於魚涪津。注云。在

南安縣。北臨大江。劉昭注引蜀郡賦注作魚符津。符涪聲相近也。

荷節。前志有符無荷節。疑荷乃符之譌。而衍一節字也。水經。江水東過符縣。注引符有先絡。楚道有張

帛。是後漢亦名符縣矣。或謂東京改名符節。晉時復為符者。非也。

群荆郡。進乘。前志作進桑。

越蕩郡。三縫。前志作三絳。

益州郡。母掇。說文掇從木。此從手。誤。前志亦作掇。

同瀨。注。地道記曰。銅虜山。米水所出。前志云談虜山。迷水所出。銅談聲相近。米即迷也。縣蓋以山得名。

瀨虜聲亦相近。前志。同作銅。

廣漢屬國都尉。都尉二字衍。

隴西郡。郭。前志無。

漢陽郡。顯親。前志無。光武封竇融弟友為侯國。

武都郡。羌道。當云故屬隴西。

安定郡。烏枝。前志作烏氏。師古讀氏為支。梁統傳亦作烏氏。

酒泉郡。福祿。前志作祿福。魏志龐涪傳及皇甫謐列女傳載龐娥事云。祿福趙君安之女。又云。祿福

長尹嘉。曹全碑亦云。拜酒泉祿福長。則知作福祿者。誤也。

表氏。前志作表。是。是氏古通用也。靈帝紀。光和三年。表是地震。涌水出。

沙頭。前志作池頭。魏志閻溫傳。攻酒泉沙頭乾齊二縣。

延壽。前志無。

敦煌郡。拼泉。當作淵泉。

張掖居延屬國。居延注。獻帝建安末立為西海郡。案晉志西海郡故屬張掖。漢獻帝興平二年。武威

太守張雅請置。獻帝起居注。建安十八年。復禹貢九州。雍州部已有西海郡。是西海立郡不在建安之末也。

太原郡。榆次有鑿壺。注引史記曰。韓魏殺智伯。埋於鑿壺之下。壺當作臺。字形之譌。

五原郡。河陰。當作河陰。

雲中郡。箕陵。前志無。

右并州刺史部郡九。注。古今注曰。建武十一年十月。西河上郡屬魏。魏字誤。案光武紀。建武十一年。省

朔方牧。并并州。此西河上郡。必朔方刺史所部。至是始屬并州耳。班史。馮野王為上郡太守。朔方刺史。蕭育奏封事。薦之。是上郡屬朔方部之證也。注文當有脫漏。又因下引魏志。而衍一魏字耳。

涿郡。北新城。當云故屬中山。

廣陽郡。世祖省并上谷。永平八年復。和帝紀。永元八年九月。復置廣陽國。此永平當為永元之譌。

代郡。北平邑。章帝女平邑公主。章懷注。平邑屬代郡。前志無北字。

上谷郡。甯。前志作寧。古書寧與甯通。廣甯縣。前志亦作廣寧。

漁陽郡。倭奚。前志作庠奚。

遼東郡。無慮。此下當有有醫無慮山五字。

候城。案玄菟郡有候城。云故屬遼東。則此候城為衍文矣。

樂浪郡。樂都。前志無。

遼東屬國。昌遼故天遼。洪亮吉曰。水經注。白狼水又東北。逕昌黎縣故城西。地理志云。交黎也。應劭

曰。今昌黎。然則昌遼故天遼。當作昌黎故交黎也。余謂黎遼聲相近。故昌黎亦作昌遼。猶烏氏為烏枝。

庠奚為倭奚也。

無慮有醫無慮山。晦之曰。安帝紀。元初二年。鮮卑圍無慮縣。又攻夫犁營。注云。無慮屬遼東郡。有醫無

慮山。因為名。夫黎。縣名。屬遼東屬國。鮮卑傳注亦同。惟夫黎作扶黎然則章懷所見本。遼東屬國有夫黎。無

無慮也。無慮既屬遼東。不應重出。竊意此無慮當是夫犁之譌。因聲相近而誤耳。此有醫無慮山句。當

移於遼東無慮之下。

南海郡。增城。前志無。

交趾郡。蒼洽。說文作蒼洽。

漢書地理志。凡郡國百三。世祖中興。省郡國十。明帝置郡一。章帝置郡國二。和帝置三。安帝又命屬國別領比郡者六。至於孝順。凡郡國百五。今以志考之。世祖省郡國十。廣平、真定、河間、城陽、泗水、淄川、高密、膠東、六安、廣陽也。明帝置永昌郡。章帝置任城國。和帝置濟北、河間、廣陽三國。安帝置蜀、廣漢、犍爲、張掖、居延、遼東屬國。順帝置吳郡。合之得郡國百有五。此失載順帝所置之郡。尙稱章帝置郡國二。故總數雖合。而實不合也。然章帝所置任城國之外。尙有阜陵一國。則其云置郡國二者。本自無誤。而志不載阜陵者。或所據版籍。正在永嘉本初之間。阜陵絕而未繼之時乎。

百官志一

注。西曹掾安衆鄭均。此又一鄭均。

百官志二

博士祭酒一人。六百石。本僕射。中興轉爲祭酒。本僕射上。當有本注曰三字。

太子樂令一人。六百石。太子當作大予。明帝紀。永平三年。改大樂爲太子樂。注引漢官儀云。太子樂令

一人。秩六百石。

百官志三

侍中。本注曰無員。案。朱穆傳言。漢家舊典。置侍中中常侍各一人。黃門侍郎一人。宦者傳。永平中。始置

員數。中常侍四人。小黃門十人。自明帝迄乎延平。其員稍增。中常侍至有十人。小黃門二十人。此志於侍中。中常侍。黃門侍郎。小黃門。皆云無員。亦未深考耳。

丙署長七人。皆四百石。黃綬。黃綬二字疑衍。公卿以下綬制。已見輿服志。不應單出此條。

百官志四

中宮僕一人。千石。本注曰。宦者主馭。本注曰。太僕。秩二千石。中興省太。減秩二千石。下注字衍。謂本名太僕。後省太字也。減秩二千石。當云減秩千石。

百官志五

注。建安十八年。復禹貢九州。雍州得恆農。京兆。左馮翊。右扶風。上郡。安定。隴西。漢陽。北地。武都。武威。金城。西平。西郡。張掖。張掖屬國。酒泉。敦煌。西海。漢興。永陽。東安。南凡二十二郡。案。廿二郡之名。不見於郡國志者。凡六。西平郡。蓋分金城置。晉志。領四郡。臨羌。長寧。安夷。四縣。西郡。蓋分張掖置。晉志。領日勒。刪丹。仙。帝興平二年置。即張掖居延屬國也。晉志。領居延一縣。漢興郡。蓋曹公分關中置。永陽郡。則獻帝初平四年分漢陽置也。惟東安。南一郡無可考。疑本作南安。而衍東字耳。秦中記。中平五年。分漢陽置南安郡。晉志。南安郡。領源道。新興。中陶三縣。

豫州部郡本有潁川。陳國。汝南。沛國。梁國。魯國。今并得河南。滎陽都尉。凡八郡。案。東漢始以屬國都尉

領域比於郡守。嗣後內地分置都尉，亦得稱郡。晉秦始初置熒陽郡，蓋因魏之熒陽都尉也。魏志李通傳：太祖分汝南二縣以通爲熒安都尉，而趙儼傳云：袁紹遣使招誘豫州諸郡，惟熒安郡不動，而都尉李通急錄戶調，此亦以都尉爲郡之證也。裴松之引魏略云：李勝嘗爲熒陽太守，當在魏世似魏世已有熒陽郡矣。

凡州所監都爲京都，置尹一人。案京都置尹一人，志正文也。上六字乃注文，譌舛不可通。予謂監都之部，當作部，以上文云某州部郡國若干，因解部字義以足成之。當云凡州所監爲部，字譌，又傾倒其文耳。

公主所食湯沐曰國，國當作邑。

本注曰：太僕比二千石，武帝改但曰僕。注字衍，此言王國之僕，其初亦稱太僕，武帝時始去太字耳。謁者比四百石，本注曰：掌冠長冠本員十六人，後減。此注疑有脫誤，據太子洗馬注云：員十六人，職如謁者，則王國之謁者亦宜有十六人矣。漢朝謁者掌賓贊受事，及上章報問，則王國之謁者所掌亦宜如之，或云掌冠長別是一官，如禮樂長衛士長之類，則員不得若是之多也。

輿服志上

屬車四十六乘，當作三十六乘。

黃綬武官伍伯。文官辟車。謂黃綬武官導從用伍伯。文官導從用辟車也。漢制四百石至二百石皆

黃綬。

輅下侍閣。明帝紀注引作鈴下。魏志管輅傳所謂老鈴下也。

主縣假給辟車鮮明卒。洪氏隸續載漢碑畫象有鮮明騎。

輿服志下

尚書皋陶篇。伏生今文尚書。以益稷合於皋陶謨。故引日月星辰山龍華蟲之文爲皋陶篇也。

記曰。知天者冠述。述讀如聿。詩聿修厥德。漢書引作述修。爾雅。述。自也。孫炎云。述古述字。聿與述同。故

鶻冠字亦爲述也。

簪以瑇瑁爲適。適卽掃字。所以摘髮。詩所謂象掃也。

南山豐大特。獸名。見史記秦本紀。

4

5

6

廿二史考異卷十五

三國志一

裴松之表上搜舊聞傍摭遺逸案松之注所引書有謝承後漢書字偉平吳武陵太守司馬彪續漢書字紹統

華嶠漢書字叔駿晉少府張璠漢紀字彥道魏魚豢魏略字思光孔

吳書字宏嗣胡沖吳麻晉尚書郎張勃吳錄字博士陰澹魏紀官左將軍袁暉獻帝春秋一作暉孔

衍漢魏春秋字舒元晉孫盛魏氏春秋字安國晉習鑿齒漢晉春秋字彥威晉王隱晉書

著述字處叔晉虞預晉書字叔寧晉干寶晉紀字令升晉散騎常侍劉艾靈帝紀漢中樂資山陽公載記

作耶獻帝起居注不詳撰人魏武故事不詳司馬彪九州春秋記漢末事王粲英雄記隋志稱漢末英雄記曹瞞傳吳人作

郭頒世語頒一作班晉襄陽令虞浦江表傳字允源晉魚豢典略魏末傳不詳撰人獻帝傳不詳譙周蜀本

紀字允王隱蜀記傳暢晉諸公贊不詳撰人泰始起居注李軌陸機晉惠帝起居注字士衡晉孫盛魏

世譜蜀世譜三朝錄不詳晉百官名裴云不知誰所撰也皆晉百官表疑與上晉中經簿荀勗撰字公

三輔決錄趙岐撰晉先賢行狀不詳魏名臣奏不詳漢末名士傳不詳張儼默記

吳大魏文帝典論蔣濟萬機論字子通傅子晉司隸校尉袁子晉給事中袁司馬彪戰略葛洪抱朴子

鴻臚魏太子傅子傅休奕撰袁子晉給事中袁司馬彪戰略葛洪抱朴子

川字雜虞喜志林字仲寧殷基通語吳審陵太守應劭風俗通字仲遠張華博物志字茂先于寶探神記字茂先荀勗文章

敘錄摯虞文章志一名文章流別志決疑要注晉太常杜氏新書不詳撰人姓名似顧愷之啓蒙注徐衆三國評

隋志有三國志評二卷孫盛異同評或作異同雜語又作異同孫綽評字與公太康三年地記撰人皇

甫謚帝王世紀高士傳逸士傳列女傳俱謚撰張隱文士傳隱一作鸞一作汝南先賢傳裴周陳留著

舊傳魏散騎侍郎蘇林撰零陵先賢傳不詳撰人楚國先賢傳晉張陳壽益部耆舊傳益部耆舊雜記蜀陳術撰會稽

典錄虞預撰華陽國志常璩撰王範交廣二州春秋廣州大中正太康八年上王隱交廣記荀綽九州記字彥舒助之孫

兗州記襄陽記不詳撰人異物志後漢議郎楊孚撰陸氏異林人名列異傳晉志魏文帝撰葛洪神仙傳應璩書林

山濤啓事字巨源衛恆四體書勢序字巨山晉左思蜀都賦字太庾闈揚都賦字仲初晉及荀氏家傳

袁氏世紀盧江何氏家傳會稽邵氏家傳傅暢裴氏家記庾氏孫氏阮氏嵇氏孔氏劉氏陳氏王氏郭

氏諸葛氏崔氏之譜鄭玄荀彧禰衡原吳質劉廙任嘏王弼何劭孫資嵇康兄喜華佗管輅弟辰趙

雲費韓虞翻諸葛恪荀勗程曉潘岳潘尼孫惠盧謹機雲之別傳王朗家傳陸氏世頌陸氏祠堂像贊

高貴鄉公陳思王王朗諸葛亮傅咸姚信張超之集凡百四十餘種其與史家無涉者不在數內

中書侍郎西鄉侯臣裴松之上宋書南史俱失載西鄉侯

魏

武帝紀

遷爲濟南相。國十有餘縣。續漢志濟南國領十縣。或漢末更有增置之縣。故云十餘縣。

建安元年。斬辟劭等。謂劉辟黃邵。

案。建安五年。汝南降賊劉辟等。叛應袁紹。見下文。及蜀先主傳。則此時無

斬辟之事。紀文有誤。

三年。分琅邪東海北海爲城陽利城昌慮郡。案。臧霸傳。太祖禽呂布。索得霸。見而悅之。使霸招吳敦。尹

禮。孫觀。觀兄康等。太祖以霸爲琅邪相。敦利城。禮東莞。觀北海。康城陽太守。是東莞亦此時所置也。昌

慮郡。建安十一年。省入東海。利城郡未審何時并省。黃初六年。利城郡兵蔡方等以郡反。殺太守徐質。

則魏初尙有之。

六年。汝南賊共都等。蜀先主傳作龔都。龔與共古字通。

八年。東平呂曠呂詳叛尙。袁紹傳詳作翔。

九年。尙懼。故豫州刺史陰夔及陳琳乞降。故上當有遣字。

十一年。鑿渠自呼淹入派水。注。派音孤。派當作瓜。从瓜得聲。今譌爲支派字。

十二年。尙熙與蹋頓。遼西單于樓班。右北平單于能臣抵之等。將數萬騎逆軍。以烏丸鮮卑傳考之。右

北平單于乃烏延。非能臣抵之。其名能臣氏者。則代郡烏丸。非右北平也。氏與抵音相近。

遼東單于速僕九。烏丸傳作蘇僕延。譯音無定字也。彼傳前稱烏丸大人蘇僕延。後稱速附九。亦卽一人。古音附如僕。

十六年。與韓遂、楊秋、李靖、咸宜等叛。靖當作堪。

十七年。割河內之蕩陰朝歌林慮東郡之衛國頓邱東武陽發干。鉅鹿之瘦陶曲周南和廣平之任城。趙之襄國邯鄲易陽以益魏郡。案光武并廣平國入鉅鹿郡。此後未見復置。疑廣平下衍一之字。任城屬兗州。不當以益魏郡。蓋亦衍一城字。或據劉昭注續漢志。引此文作廣平之廣平任城。似當時已有廣平郡。然獻帝起居注。建安十八年。冀州部三十二郡。不數廣平。晉志亦云廣平郡魏置。則劉注廣平之三字。明是衍文。不足據以爲證。國本後漢書無此三字。

十九年。省安東永陽郡。案獻帝起居注。初平四年。分漢陽爲永陽郡。安東之名。則前志無之。惟晉志載靈帝置南安郡。亦漢陽郡地也。續百官志注引獻帝起居注。建安十八年。復禹貢九州。雍州領二十二郡。東安南居其一。予初疑爲南安之譌。此紀上文有南安字。似所省之安東。亦卽南安之譌矣。然明帝紀。太和二年。天水南安安定三郡吏民叛。則南安仍未并省也。何承天以爲南安郡魏分天水立。然魏志亦無明文。或者建安已省。而復置於魏初乎。

二十年。分漢中之安陽西城爲西城郡。置太守。分錫上庸郡。置都尉。案是歲曹公始得漢中。分其地立

西城上庸二郡其時尚有房陵郡亦漢中所分而紀不之及者非曹公所置也考續漢志房陵縣注引巴漢志建安十三年別屬新城郡房陵卽新城所治故亦稱房陵郡矣紀云上庸置都尉而蜀志劉封傳封與孟達會上庸上庸太守申耽舉衆降則上庸亦置太守也建安廿四年蜀先主取漢中而西城三郡亦歸於蜀其明年孟達背蜀降魏文帝并房陵上庸西城三郡爲新城郡以達爲太守治上庸又以申儀爲魏興太守屯洵口自是漢中入蜀而新城魏興入魏一郡之地分屬兩國矣於是分巴郡以胡爲巴東太守漢爲巴西太守案巴東巴西二郡乃劉璋所分其地久屬益部但遙假以名耳朴胡杜濩尋爲蜀先主所殺曹公不能有其地也

初置名號侯案黃初元年以漢諸侯王爲崇德侯二年封孔羨爲宗聖侯皆名號侯也

注又置關內外侯十六級內字疑衍

二十三年代郡上谷烏丸無臣氏等叛案任城王彰傳止言代郡烏丸反疑上谷二字而也無臣氏卽

能臣氏之譌

文帝紀

注春秋玉版讖曰代亦眉者魏公子卽上文所云孔子玉版也

或以雜文爲蒙古書蒙與廕通詩秦風蒙伐有苑鄭云蒙廕也畫雜羽之文於伐故曰廕伐又邯風狐

裘蒙戎春秋傳作麗茸。故蒙有雜文之訓。易雜卦傳。蒙雜而著。

兩日昌字。案說文。昌从日。从曰。不从兩日。尹敏謂識書中多近鄙別字。如土乙力爲地。人十四心爲德。及此類皆是。

柏城子高以義爲貴。柏城。莊子作伯成。

昔光和七年。歲在大梁。武王始受命。爲時將討黃巾。是歲改元爲中平元年。建安元年。歲復在大梁。案古法。歲星百四十四年而超一次。依三統術。漢元年。歲在鶉首。孝武太初元年。歲在星紀。至太始二年。超壽星入大火。則光武建武二十六年。當超大火入析木。獻帝興平元年。當超析木入星紀。依此推算。中平元年。歲當在玄枵。建安元年。歲當在娵訾。與蘇林等所言差二三次。其故何在。蓋後漢用四分術。歲星日行四千七百廿五分之三百九十八。約三百九十三年。而超五次。則每七十八九年。卽超一次。自漢元年。歲在鶉首。至中平之元。凡三百九十年。當超五次。故中平初得在大梁也。

黃初元年。京都有事於太廟。晉史臣避景帝諱。稱京師爲京都。或曰京邑。

二年。授楊彪光祿大夫。案魏紀。惟太傅。太尉。大司馬。大將軍。司徒。司空。驃騎大將軍。車騎將軍。衛將軍。除免薨皆書。楊彪爲光祿大夫。朝見位次三公。劉放孫資加左右光祿大夫。儀同三司。故特書之。然亦不書其卒。惟資以驃騎將軍。亦書薨也。蜀志。惟丞相。司徒。大司馬。大將軍得書。吳志。則丞相。大將軍。大

司馬、太尉、司徒、司空得書，而輔吳將軍張昭以耆德舊臣，亦書卒。

三年三月乙丑，立帝弟鄢陵公彰等十一人，皆爲王。今以諸王傳考之，是年以皇弟封王者，任城王彰、章陵王據、下邳王宇、譙王林、北海王袞、陳留王峻、河間王幹、弋陽王彪、廬江王徽，凡九人。紀云十一人，似誤也。鄆城王植以四月戊申封，與任城諸王不同日，且是縣王，非郡王。任城諸王皆由公進封，惟植以罪貶侯，故不得郡王。故不在此數。又考文帝子以黃初三年封王者，凡六人：平原王叡、河東王林、京兆王禮、淮南王邕、清河王賁、廣平王儼。本紀惟載叡、儼二人，亦未免闕漏。

明帝紀

太和二年，分新城之上庸、武靈、巫縣爲上庸郡，錫縣爲錫郡。案黃初元年，并西城、房陵、上庸爲新城郡，以孟達爲太守。至是達誅，復分其地爲三也。武靈當作武陵。本前漢舊縣，屬漢中。後漢并省，疑蜀先主更置也。巫縣疑亦蜀所置。晉志謂之北巫，以南郡有巫縣也。

三年，詔曰：禮皇后無嗣，擇建支子以繼太宗，則當纂正統，而奉公義，何得復顧私親哉？案漢成帝立定陶王爲太子，太后欲令傅太后丁姬，十日至太子家，成帝曰：太子承正統，當共養陛下，不得顧私親。及哀帝卽位，追尊定陶共皇，師丹議禮子亡爵父之義，爲人後者爲之子，故爲所後服。斬哀三年而降其父母，其明尊本祖而重正統也。魏武帝未立太子，崔琰言：五官將仁孝聰明，宜承正統。齊王芳廢羣

臣奏高貴鄉公文皇帝之孫宜承正統蓋古人言正統者皆主嫡子承祧及為後大宗之義喪服傳云
大宗者尊之統也又云正體於上又乃將所傳重也正統二字實出於此後儒紛紛聚訟皆郢書燕說
也。

四年六月戊子太皇太后崩。后妃傳作五月。

六本改封諸侯王皆以郡為國。案是年改封郡王者任城王楷子彰陳王植彭城王據燕王宇沛王林中

山王兗陳留王峻琅邪王敏范陽王矩子趙王幹楚王彪東平王徽曲陽王茂北海王禕東海王霖梁王悌

元城王禮嗣子魯陽王温郟鄏子凡十六人又黃初六年改封諸王為縣王此事亦當載於本紀。

陳思王植薨。諸王薨例不書諡思字衍。

青龍二年二月乙未太白犯熒惑。宋書天文志作己未。案下文有癸酉乙未與癸酉相去三十九日不

得在一月當從宋志。

景初元年分魏興之魏陽錫郡之安富上庸為上庸郡省錫郡以錫縣屬魏興郡。案魏興郡志不言何

年置以劉封傳證之當在黃初元年也魏陽縣晉宋二志皆無之。

九月皇后毛氏卒。案嘉平三年皇后甄氏書崩此悼后以不得其死故變文書卒也文帝黃初二年夫

人甄氏非后而亦書卒蓋以子貴錄其母然兩后書葬而甄夫人不書葬至追諡為后改葬乃書。

分襄陽臨沮、宜城、裕陽、郟四縣置襄陽南部都尉。裕陽卽旌陽。

二年二月癸丑月犯心距星。宋志作己丑誤。

分沛國蕭、相、竹邑、符離、蘄、龍亢、山桑、浚、虹十縣爲汝陰郡。案晉志汝陰郡統八縣，與此無一同者，疑

此有誤也。山桑縣，續漢志屬汝南。

宋縣、陳郡、苦縣皆屬譙郡。宋縣卽宋公國也。後漢屬汝南，晉屬汝陰。

以沛、杼秋、公邱、彭城、豐國、廣戚并五縣爲沛王國。豐本屬沛，今繫彭城之下，恐誤。豐嘗爲王國，故有豐

國之稱。

帝曰：司馬懿臨危制變，承祚書稱司馬懿必云宣王，惟此稱名，蓋述帝語，不得云宣王也。然亦後人追

改。蜀後主傳：魏使司馬懿由西城，魏司馬懿張郃救祁山，李嚴傳：平說司馬懿等開府辟召，吳主傳：聞

司馬懿南向，又司馬懿前來入舒，旬日便退，諸葛恪傳：加司馬懿先誅王凌，續自隕斃，皆後人所追改

也。魏三少帝紀書中撫軍司馬炎者二，書中壘將軍司馬炎、撫軍大將軍新昌鄉侯炎，晉太子炎者各

壽爲晉臣，不當斥武帝名，蓋亦後人所改。

齊王芳紀

景初三年，以遼東東沓縣吏民渡海，居齊郡界。續漢志：遼東郡有沓氏縣。

正始元年。以遼東汝北豐縣民流徙渡海。續漢志遼東郡有汝縣。班志汝作文無北豐縣。

嘉平六年。注。廷尉定陵侯臣繁。繁當作毓。

少府臣襲。襲當作表。此時公卿列名者四十六人。以本志及晉書考之。太尉長社侯孚者。司馬孚也。大

將軍武陽侯師者。司馬師也。司徒萬歲亭侯柔者。高柔也。司空文陽亭侯冲者。鄭冲也。行征西安東將軍新城侯昭者。司馬昭也。衛尉昌邑侯倬者。滿倬也。太僕嶷者。庾嶷也。廷尉定陵侯毓者。鍾毓也。大鴻臚芝者。魯芝也。大司農祥者。王祥也。少府表者。鄭表也。永寧衛尉禎。當是何禎也。司隸校尉穎昌侯會者。何曾也。河南尹蘭陵侯肅者。王肅也。中護軍永安亭侯望者。司馬望也。武衛將軍安壽亭侯演。當是曹演也。中堅將軍平原侯德者。甄德也。屯騎校尉關內侯陔。當是武陔。步兵校尉臨晉侯建。當是郭建。射聲校尉安陽侯溫。當是甄溫。侍中曰小同者。鄭小同也。曰顛者。荀顛也。曰豐者。趙豐也。曰博平侯表者。華表也。侍中中書監安陽亭侯誕者。韋誕也。散騎常侍曰瓌者。當是司馬孚之子瓌。曰關內侯芝者。郭芝也。尚書僕射光祿大夫高樂亭侯毓者。盧毓也。尚書曰觀者。王觀也。曰叡者。傅叡也。曰亮者。袁亮也。曰贊者。崔贊也。曰騫者。陳騫也。中書令康者。孟康也。博士峻者。庾峻也。晉書任愷傳。父吳。魏太常。此奏有太常晏。晏吳字形相似。疑卽其人也。光祿大夫關內侯孫邕。見論語集解序。荀彧孫翼。與司馬景王。王文王親善。官至中領軍。此奏有中壘將軍昌武亭侯虞。疑卽翼也。永寧太僕閎。大長秋模。城門校

尉憲、越騎校尉睢陽侯初、長水校尉關內侯超、散騎常侍儀、御史中丞鈐、博士範八人、未詳其族姓。
太后遭合陽君喪。太后母杜氏也。后妃傳作郃陽。

高貴鄉公紀

正元二年閏月壬子。司馬景王薨於許昌。晉書作辛亥。

甘露元年。注。帝慕夏少康。因問顓等。案。少康之論。意常在司馬氏也。聰明太露。終爲權臣所忌。失艱貞。自悔之義。能處此者。其後周武帝乎。

王肅云。堯順考古道而行之。案。王肅卒於是年。而其說已爲博士所習。進講人主之前。蓋肅兼通諸經。強辯求勝。又以三公之子。早登顯要。易爲人所信從也。

博士馬照。案。毛詩正義。往往載馬昭說。卽其人也。昭說經主鄭氏。與王肅多異。

注。惟正始三年九月辛未朔二十五日乙未直成。子生。案。高貴鄉公以甘露五年遇弑。歲在庚辰。年纔二十。計其生年。當在正始二年辛酉。此云三年者。傳寫之譌也。考通鑑目錄。正始二年九月。正是辛未朔。是歲閏六月。立冬在九月望後。月建於亥。故未直成日。

三年。注。東里堯後爲于禁司馬。見魏略游說傳。案。魚豢魏略今已不存。其諸傳標目。多與它史異。如董遇、賈洪、邯鄲淳、薛夏、隗禧、蘇林、樂詳七人爲儒宗傳。常林、吉茂、沐竝、時苗四人爲清介傳。脂習、王修、龐

清、文聘、成公英、郭憲、單固七人爲純固傳。孫賓、頌、祝公道、楊阿若、鮑出四人爲勇俠傳。王思諸人爲苛吏傳。並見裴氏注田疇、管寧、徐庶、胡昭諸人爲知足傳。見梁書及此游說傳是也。王粲、繇、欽、阮瑀、陳琳、路粹諸人合傳。焦先、扈累、寒貧諸人合傳。當亦有目。今不可考矣。若秦朗、孔桂之爲佞倖傳。則沿遷固之舊目也。

四年分新城郡復置上庸郡。案景初元年復置上庸郡自後未見并省之文。

陳留王免紀

景元元年進大將軍司馬文王位爲相國封晉王增封二郡并前滿十。案甘露三年以并州之太原上

黨西河樂平新興雁門司州之河東平陽八部爲晉公國此又增司州之恆農雍州之馮翊二郡。

咸熙元年相國參軍事徐紹。晉書作徐劭。

后妃傳

文德郭皇后安平廣宗人也。案續漢志廣宗屬鉅鹿郡不屬安平。晉志始屬安平蓋沿魏之舊。

袁紹傳

韓馥長史耿武別駕閔純治中李歷諫馥。後漢書紹傳亦載此事同時進諫者有騎都尉沮授無李歷。

公孫瓚傳

朝議以宗正東海劉伯安既有德義。案紀事之文當稱名。承祚志多有稱字者。如此傳之劉伯安、張管傳之陳仲弓、竇許靖潘濬、尹默傳之宋仲子、忠張裔傳之許文休、增彭美傳之秦子勅、密尹默傳之司馬德操、徵秦宓傳之任定祖、安譙允南、周顧雍傳之蔡伯喈、也士燮傳之劉子奇陶皆是。若孫炎之稱叔然、則以避晉武帝諱故也。范蔚宗史亦好稱人字。如郭林宗、賈偉節、黃子艾、和陽士、董子儀、嚴子陵之類甚多。

公孫度傳

分遼東郡爲遼西中遼郡。置太守。晉書地理志。帶方郡公孫度置。本傳卻不載。而於東夷傳見之。太和二年。淵魯奪恭位。明帝卽位。拜淵揚烈將軍。遼東太守。案。明帝以黃初七年卽位。其明年。改元太和。傳以明帝卽位承太和二年之下。誤也。位字當是衍文。

曹仁傳

從攻費華卽墨開陽。謙陶遣別將救諸縣。案卽墨屬青州之北海郡。陶謙爲徐州牧。未得有其地。疑是卽邱之譌。

夏侯太初傳

緬緬紛紛。卽書泯泯焚焚也。泯緬聲相近。漢書敘傳作灑灑紛紛。

清河王經注世語曰經字彥偉。管輅傳注字彥緯當从糸旁。

荀彧傳

祖父淑字季和朗陵令。當從司馬彪書張璠紀作朗陵侯相。

永漢元年舉孝廉。後漢書作平中六年考獻帝以中平六年九月即位改元永漢兩號實在一年。

國淵傳

樂安蓋人也。案蓋縣屬泰山不屬樂安蓋當為益字之譌。

田疇傳

舊北平郡治在平岡道出盧龍達於柳城。前漢志右北平郡有平剛縣即平岡也。

疇自以始為居難居當作君。

王脩傳

行司金中郎將。案陳琳為袁紹檄稱操特置發邱中郎將摸金校尉即謂此也。韓暨傳就加司金都尉。

邴原傳

注國之將隕釐不恤緯。釐古縻字說文無縻。

司馬芝傳

以芝爲管長。管當作菅。濟南有菅縣。故下文有馳檄濟南之語。

王朗傳

東海郡人也。郡當作郟。

蔣濟傳

楚國平阿人也。案平阿縣前漢屬沛。後漢屬九江。晉屬淮南。魏以九江郡爲楚王國。故平阿屬楚。

司馬朗傳

以朗爲伊顏之徒。雖非聖人。使得數世相承。太平可致。伊顏以下。乃朗駁鍾繇王粲之論。當云朗以爲。今本誤顛倒兩字。

鄭渾傳

又賊靳富等脅將夏陽長邵陵令。并其吏兵入磴山。案馮翊無邵陵縣。若汝南之召陵。則與馮翊遠不相涉。疑卽邵陽之譌。

樂進傳

陽平衛國人也。案衛國漢屬東郡。建安十七年。割衛國益魏郡。尋分魏郡爲東西部。衛當在東部管內。黃初二年。以魏之東部爲陽平郡。故衛國屬陽平也。晉志。衛屬頓邱。頓邱卽故東郡所分。魏晉之際。郡

縣改隸無常如此。

李典傳

遷離狐太守。案離狐縣前漢屬東郡後漢屬濟陰郡。史無置郡之文。蓋建安初暫置而即罷耳。

李通傳

分汝南二縣以通為陽安都尉。案魏略稱通領陽安太守。蓋以都尉行太守事也。趙儼傳袁紹遣使招

誘諸郡。惟陽安郡不動。蓋當時都尉別領縣者亦稱郡矣。

朗陵長趙儼。案漢制大縣置令小縣置長。此與趙儼傳稱朗陵長而田豫傳稱除朗陵令當有一誤。

閻溫傳

天水西城人也。案天水無西城縣蓋即西縣。

任城王彰傳

注帝受禪封為中牟王。據本傳彰子楷嘗封中牟王非彰也。

沛王林傳

沛王林建安十六年封饒陽侯。案武帝紀注引魏書封子豹為饒陽侯。又魏略云杜夫人生沛王豹。

見注。而此傳亦稱林為杜夫人生。是林一名豹。猶趙王幹一名良也。

趙王幹傳

注。良年五歲。而太祖疾困。案。魚豢書稱良五歲失父。當生於建安二十一年丙申矣。然二十年已封亭侯。則五歲之說。未得其實。裴松之言。楚王彪大幹二十歲。據彪以嘉平三年辛未賜死。年五十七。推其生年。當在興平二年乙亥。幹小於彪廿歲。當以建安二十年乙未生也。

楚王彪傳

國除爲淮南郡。案。漢之楚國治彭城。魏之魏國蓋治壽春。卽漢九江郡也。黃初二年。封子邕爲淮南公。以九江郡爲國。三年。進爵爲王。明年。邕徙封陳。當卽爲淮南郡矣。太和六年。彪封楚王。又改郡爲楚國。彪王二十年。以罪廢。復爲郡也。

元年。爲有司所奏。當是青龍元年。史脫青龍二字。

和洽傳

子禽嗣。注。禽音離。禽當爲离字之譌。

杜襲傳

時將軍許攸擁部曲。不附太祖。而有慢言。此當別是一人。非南陽許攸也。

裴潛傳

注。建安初。關中始開詔。分馮翊西數縣為左內史郡。治高陵。以東數縣為本郡。治臨晉。案。劉昭注續漢志。不載此事。

高柔傳

昔仲尼亮司馬牛之憂。亮即諒字。據論語。司馬牛憂無兄弟。而子夏解之。此云仲尼。未審所出。

孫禮傳

歷山陽平原平昌琅邪太守。案。續漢志無平昌郡。宋志。魏文帝分城陽立平昌郡。而晉志載魏文增置郡七。不及平昌者。以置郡未久。旋復并省也。

高堂隆傳

今若有人來告權備竝修德政。案。隆上疏在明帝景初改元以後。蜀先主殂謝久矣。云備誤也。通鑑備作禪。周禮。天府掌九伐之則。以給九式之用。案。周禮天官有大府。無天府。九賦之財。給九式。鄭氏注。大府。文也。伐當為賦。則當為財。天府亦大府之譌。

田豫傳

公孫瓚使豫守東州令。東州當作東州。縣名。屬河間。遷弋陽太守。據此傳。弋陽置郡。當在建安之世。晉志謂魏文帝所置。似未然。

郭淮傳

討蜀護軍夏侯霸督諸軍屯爲翹。爲翹當作鳥翹。胡三省云。鳥翹。要地也。魏屯兵守之。嘉平元年。降蜀將句安於翹上。卽此地也。陳泰傳亦作爲翹。

徐邈傳

文帝踐阼。歷譙相平陽安平太守。案晉志。平陽郡。魏少帝置。據此傳。則文帝時已有此郡矣。或云平陽

當爲陽平。

舉善而教。仲尼所美。案魏晉人引論語。多於教字斷句。如倉慈傳注。舉善而教。恕以待人。魏略令

傳。舉善以教。風化大行。陸績傳注。臣聞唐虞之政。舉善而教。晉書衛瓘傳。聖王崇賢。舉善而教。皆是也。孤邵傳

劉馥傳。舉善而教。不能則勸。雖引成文。亦似以四字爲句。考應劭風俗通載。汝南太守歐陽歙下教云。

蓋舉善以教。則不能者勸。則漢時經師句讀已然矣。

胡質傳

楚國壽春人也。壽春縣。兩漢屬九江郡。魏以九江爲楚王國。故屬楚也。吳志。蔣欽稱九江壽春人。則據

漢郡縣言之。

王昶傳

今屯苑去襄陽三百餘里。苑當作苑。

子渾嗣。案承祚之志。范滂稱其辭多勸戒。然如何夔、裴潛、鄭渾、杜畿、陳矯、衛覬、賈逵、王昶諸傳。頗多溢美之詞。蓋由諸人子孫在晉顯達。故增加其美。而李豐、張緝輩。忠於曹氏。乃不得立傳。曹爽、何晏、鄧騭之惡。亦黨於司馬者飾成之。初非實錄。其亦異於良史之直筆矣。

毋邱儉傳

大戰梁口。注。梁音渴。梁字不當有渴音。疑誤。

諸葛誕傳

黃初中。利城郡反。殺太守徐箕。文帝紀作徐質。

管輅傳

輅至列人典農于宏直許。此宏直二字名。而下文單稱直。蜀先主傳先書同宗劉德然父元起。而後書起。孫策傳先書吳人嚴白虎。而後書虎。皆非史例。疑傳寫脫去。

其日乙卯。則長子之候也。於卦位卯屬東方震。震爲長男。

申未爲虎。案虞仲翔說坤爲虎。坤位西南。在未申之間也。於天文參爲白虎。位亦在申。內方外員。五色成文。含寶守信。出則有章。文與章非韻。疑成文二字當爲文成也。

夫餘傳

注昔北方有稷離之國。後漢書作索離國。章懷云。索或作藁。藁蓋藁之譌。南至施掩水。後漢書作掩澗水。

高句麗傳

其官有相加對盧沛者。古難加主簿。優台丞使者。皐衣先人。古難加。後漢書作古難大加。謂掌賓客之

官也。優台下無丞字。皐作帛。

有涓奴部。後漢書作涓奴。下同。

州郡縣歸咎於句麗侯綯。綯當作驪。下同。

遼東太守蔡風。後漢書作蔡諷。

官死。子伯固立。後漢書。官死。子遂成立。遂成死。子伯固立。此文疑有脫誤。

今句麗王宮是也。案。承祚作志之時。位宮久已破亡。不應云今王。蓋承舊史之文。

東沃沮傳

東部都尉治不耐城。漢志作不而。



廿二史考異卷十六

三國志二

蜀

劉二牧傳

并州殺刺史張益。梁州殺刺史耿鄙。案後漢書靈帝紀中平五年休屠各胡攻殺并州刺史張懿。此作張益。蓋避晉宣帝諱改之。紀又稱中平四年涼州刺史耿鄙討金城賊韓遂。鄙兵大敗。不言被殺。與此傳異。漢時無梁州。此稱梁者。晉之譌也。

及太倉令會巴西趙睦棄官俱隨焉。華陽國志無會字。以太倉令下屬當從之。

先主傳

中山靖王勝之後也。勝子貞。元狩六年封涿縣陸城亭侯。案漢書王子侯表陸城侯貞。以元朔二年六月封。志誤。又西京無亭侯之名。亭亦衍文也。地理志中山國有陸城縣。卽此陸城侯國。蓋本中山之地。貞以王子封侯。因改隸涿郡。其後耐金夫侯。地人於漢爲縣。宣元之世。中山絕而更封。仍以縣還中山也。

使爲青州刺史田楷。以拒冀州牧袁紹。爲字誤。當是助字之譌。

彼州殷富戶口百萬。華陽國志作鄆州。登下邳人。下邳屬徐州。故云鄆州也。彼字誤。

青州刺史袁譚。先主故茂才也。汝南在豫州部。先主領豫州牧。故得舉譚茂才。

先主亦推璋持鎮西大將軍。持當作行。

分遣將軍吳蘭雷同等入武都。周羣傳作雷銅。

大破淵軍。斬淵郤及曹公所署益州刺史趙顯等。此時張郃未死。郃字衍。

左將軍領長史。鎮軍將軍臣許靖。領字衍。彼傳不書鎮軍將軍。史之漏也。

臣父羣未亡時。言西南數有黃氣。直立數丈。案此奏列名者。有劉豹、向舉、張裔、黃權、殷純、趙祚、楊洪、何

宗、杜瓊、張爽、尹默、譙周等。而忽稱臣父。果何人之父邪。華陽國志云周羣父未亡時。似當從之。又案周

羣傳云。子巨亦傳其術。或臣爲巨之譌。而上脫周字邪。惜不得善本校之。

光祿勳黃權。案上文已有偏將軍黃權。不應重見。考楊戲輔臣贊注。先主爲漢中王。用零陵賴恭爲太

常。南陽王柱爲光祿勳。漢嘉王謀爲少府。此傳三人連名。必是王柱。非黃權也。黃權傳亦無除光祿勳

事。

後主傳

延熙十六年大將軍費禕爲魏降人郭循所殺費禕傳同魏志循作修。

十八年維卻住鍾題鄧艾傳作鍾提姜維傳亦作題

然經載十二而年名不易軍旅屢興而赦不妄下不亦卓乎注臣松之以爲赦不妄下誠爲可稱至於年名不易猶所未達建武建安之號皆久而不改未聞前史以爲美談經載十二蓋何足云案昭烈之歿政由葛氏禮樂征伐自下出者十餘年以曹馬之輩當此其改元自立必矣自古大臣握重權者身死之後嗣君親政亦必改元更革其舊後主信任武侯不以存沒有聞張邈上書詆亮下獄誅死其任賢勿疑有足稱者孔明卒於建興十二年前此不改元孔明事君之忠也繼此不改元後主知人之哲也君明臣忠此承祚所謂卓也不然建興之號終於十五何不云十五而云十二乎裴氏所譏殊未達其旨趣。

二主妃子傳

先主甘皇后案先主甘皇后穆皇后後主敬哀皇后張皇后皆稱皇后而孫吳諸后則降稱夫人又蜀志稱昭烈曰先王安樂公曰後主後主之太子璿特爲立傳且正其太子之號吳志則曰權曰亮曰休曰皓皆斥其名可見承祚原以天子之制予蜀未嘗儕蜀於吳也。

諸葛亮傳

琅邪陽都人也。漢司隸校尉諸葛豐後也。案亮瑾誕兄弟分仕三國，各爲立傳。傳首皆著其郡縣。亮誕兩傳又皆云諸葛豐之後。蓋三書可合可分，取其首尾完具，不嫌重複也。魏志鍾繇與子會各有傳，傳首俱云潁川長社人，則重沓無當矣。

侍中侍郎郭攸之、費禕、董允等。案諸葛亮出師疏，本傳已載其全文，而侍中郭攸之、費禕、侍郎董允等云云，復載允傳、將軍向寵云云，又載向寵傳，亦重出也。

注：幾敗伯山。汲古閣本，伯作北，聲之譌也。胡三省云：幾敗伯山，謂與烏桓戰於白狼山時也。古書伯與白通。

關羽傳

將軍傅士仁屯公安。案楊戲季漢輔臣贊并注及孫權呂蒙傳俱無傳字，蓋其人士姓而仁其名也。此傳仁與糜芳竝舉，而下文但稱芳仁，亦可證傳爲衍字矣。

張飛傳

羽年長數歲，飛兄事之。案關張二人，史不載其卒年，志於蜀臣書年者，自諸葛亮、龐統、法正、馬超而外，勳德如蔣琬、董允、費禕、武略如關、張、黃、忠、趙雲，皆不書年。許靖、譙周年逾七十，於敘事偶及之，初不關乎義例。杜瓊年八十餘，孟光年九十餘，以上壽故書。馬良兄弟死於非命，故亦書之，皆隨便文，非以爲

褒貶也。

馬超傳

右扶風茂陵人也。案兩漢書例，惟官名稱左右，若稱人籍貫，但云馮翊扶風而已。此傳云右扶風茂陵

人。法正傳，右扶風郿人，兩右字當省。

因爲前都亭侯。前字疑衍。先主傳亦稱都亭侯。

趙雲傳

注，沔陽長張翼。沔陽當作江陽。

法正傳

子邈，官至奉車都尉，漢陽太守。漢陽卽天水也。三國屬魏，更名天水。法邈蓋遙領之。若楊儀遙署恆農

太守，張翼領扶風太守之類耳。

許靖傳

吳郡都尉許貢。孫策傳作吳郡太守。

麋竺傳

曹公表竺領嬴郡太守。嬴郡領五縣，蓋分泰山置。竺旣去官，郡亦旋廢。故晉志不及之。

秦宓傳

秦宓字子勅。後漢書董扶傳作秦宓。

陳震傳

蜀既定，為蜀郡北部都尉。因易郡名為汶山太守。案後漢書西南夷傳：毋騶夷者，武帝所開。元鼎六年，以為汶山郡。漢書作文山宜帝省并蜀郡，為北部都尉。靈帝時，復分蜀郡北部為汶山郡，是汶山立郡。其來已久。或漢末仍復并省，至先主定蜀後，復為郡也。

廩立傳

中郎郭演長。演長當是攸之字。

李嚴傳

注：行前監軍、征南將軍臣劉巴。案：劉子初卒於章武二年，而李平之廢，乃在建興九年，蓋別是一人，姓名偶同耳。

行護軍、征南將軍、當陽亭侯臣姜維。征南當作征西。

劉琰傳

以琰為固陵太守。固陵即巴東也。華陽國志：初平元年，劉璋分胸忍至魚復為固陵郡。建安六年，魚復

襄允尹巴名，乃改固陵爲巴東。是劉璋時已名巴東矣。據此傳，知先主定蜀，復爲固陵，故華陽志又云：章武元年，胸忍徐慮，魚復蹇機，以失巴名，上表自訟。先主聽復爲巴東也。

魏延傳

儀等令何平在前，何平卽王平也。

楊儀傳

建安中，爲荊州刺史，傳羣主簿，背羣而詣襄陽太守關羽。此荊州刺史傳羣，蓋曹公所授。

杜微傳

王元泰、李伯仁、王文儀、楊季休、丁君幹、李永南兄弟、文仲寶等。案伯仁、君幹、仲寶三人不見於本志，常

璩華陽志有丞相參軍文恭、字仲寶，梓潼人，君幹疑卽出師表所稱丁立也。

來敏傳

敏隨姊夫奔荊州，姊夫黃琬，是劉璋祖母之姪。此又一黃琬。

李譔傳

與同縣尹默俱游荊州，從司馬徽、宋忠等學。案尹默傳云：遠游荊州，從司馬德操、宋仲子等受古學，一稱其名，一稱其字，雖文可互見，要爲體例未一，且不免重出之病。

譙周傳

泰始五年。子嘗爲本郡中正。清定事訖。求休還家。往與周別。案承祚撰蜀志。不立敘傳。惟於此傳一見。爲郡中正事。又泰始十年。撰定諸葛亮集。上表一篇。附見亮傳。自署平陽侯相。晉書云。補陽平令者。誤。周長子熙。熙子秀。字元彥。案桓溫以晉穆帝永和三年丁未歲平蜀。上表薦秀。秀年及八十。而承祚修史。大約在太康之世。卽云在太康末。秀亦纔弱冠。又無名位。何用書其名字。當是裴氏注。後來攙入正文耳。

郤正傳

假文見義。號曰釋讖。承祚志以簡質勝。然如曹植責躬應詔之詩。郤正之釋讖。華覈之草文。薛瑩之獻詩。魏文帝策吳王九錫文。吳主罪張溫之令。許靖與曹公之書。周劭譎曹休之詞。略統理張溫之表。胡綜托吳質之文。事無繁乎興亡。語不關於勸戒。準之史例。似可從刪。楊戲季漢輔臣贊。既全錄其文。而志不立傳者。復注其行事於下。西州文獻。藉以不墜。厥功誠偉矣。然自我作古。亦非前史之例也。

馬忠傳

初建寧郡殺太守正昂。縛太守張裔於吳。後主及張裔傳俱作益州郡。考益州郡之改名建寧。在丞相亮南征以後。此時不當云建寧也。

張嶷傳

初越嶺郡自丞相亮南征高定之後，更夷數反，殺太守。是後太守不敢之郡，只住安定縣。去郡八百餘里。

案兩漢晉宋諸志，益州部無安定縣，以華陽國志考之，蓋安上縣也。安上縣屬越嶺，晉志亦不載。

蘇祁邑君冬逢，漢志作蘇示。

鄧芝傳

義陽新野人。案義陽不在蜀境內，漢末亦未有義陽郡。蓋史據魏晉之郡縣書之。來敏傳亦云義陽新野人。

芝為大將軍二十餘年。案芝止為車騎將軍，未嘗為大將軍。大字衍。

張翼傳

高祖父司空浩，浩當作皓。

翼曰可止矣，不宜復進。進或毀此大功。維大怒曰：為蛇畫足。案華陽國志為蛇畫足，亦是翼語。此以為

維語，似失之。

楊戲傳

自此之後卒者，則不追諡。故或有應見稱紀，而不在乎篇者也。追諡猶言追美也。蔣公琰、費文偉、鄧伯

苗、宗德、豔、馬德信、王子均、張伯岐之屬，皆卒於延熙四年以後，故不著於贊。

注鄧方爲庾隆都督住南昌縣。案南昌縣不見於兩漢志。華陽國志朱提郡有南昌縣。故都督治。有鄧安遠城。此縣蓋先主所置矣。宋書州郡志南秦縣本名南昌。晉太康元年更名。據常璩書。朱提屬縣五。有南昌。又有南秦。璩蜀人所言當不誤。宋志未可信也。

楊威才幹。案注費觀爲振威將軍。二文當有一誤。

贊杜輔國周仲宣。案杜微字國輔。周羣字仲直。皆見本傳。與此互異。

注輔元弼爲巴郡太守。巴郡當作巴東。華陽國志章武元年南郡輔匡爲巴東太守。

注習文祥歷雜郡令南廣漢太守。案蜀有南廣郡。延熙中置。無南廣漢郡。

廿二史考異卷十七

三國志三

吳。

孫破虜討逆傳

三十六萬一旦俱發。萬當作方。見後漢書皇甫嵩傳

中平三年遣司空張溫行車騎將軍西討章等。後漢書靈帝紀在二年。

表拜懷義校尉。案漢時城門校尉司隸校尉任寄最重而屯騎越騎步兵長水射聲諸校尉亦典兵之

官號爲五校西京更有胡騎虎賁二校尉故云七校若命將出征則大將軍營五部部皆有校尉不常

置也邊塞則有護羌校尉護烏桓校尉西域有戊己校尉靈帝置西園八校尉有上軍中軍下軍典軍

助軍左助軍右左校右校之名自後校尉漸多曹操爲驍騎校尉周秘爲督軍校尉蓋勳爲討虜校尉

公孫瓚亦爲討虜校尉應劭爲袁紹軍謀校尉皆見於後漢書其見於魏志者夏侯惇折衝校尉曹仁

厲鋒校尉曹洪騰揚校尉賈詡討虜校尉樂進討寇校尉于禁平虜校尉見於吳志者孫策爲懷義校

尉又爲折衝校尉孫權爲奉義校尉劉基輔義校尉孫靜魯肅皆奮武校尉孫瑜恭義校尉孫輔揚武

校尉孫詔丞烈校尉張紘正義校尉陸遜定威校尉陸抗陸凱皆建武校尉賀齊平東校尉全琮奮威校尉周魴昭義校尉是儀忠義校尉見於蜀志者法正軍議校尉費禕昭信校尉來敏典學校尉周羣儒林校尉大率皆武職也蜀先主置司鹽校尉較鹽鐵之利亦名鹽府校尉則名雖爲校尉實非典軍之職王連呂乂岑述皆嘗爲之

已而更用丹陽陳紀此別是一人非潁川陳紀也

吳主傳

建安十年權使賀齊討上饒分爲建平縣案晉志無上饒及建平縣宋書州郡志鄱陽郡有上饒縣吳立太康地志有王隱地道無疑初立縣名建平後改爲上饒也

十三年分歙爲始新定犂陽休陽縣注吳錄曰晉改休陽爲海寧案太平寰宇記吳避孫休名改休陽爲海陽晉平吳改爲海寧吳錄考之未詳也犂陽賀齊傳作黎陽

十五年分長沙爲漢昌郡以魯肅爲太守屯陸口案是時長沙爲劉備所據建安十九年權始得長沙

三郡漢昌仍併入長沙不別立郡矣宋書州郡志長沙郡有吳昌侯國後漢立曰漢昌吳更名考兩漢志無漢昌縣蓋漢末所立也子弟碑之云周懷碑陰有長沙漢昌審祗字宜胡三省云隋廢吳昌入羅縣唐武德八年又省羅縣入湘陰則知吳立漢昌郡在唐岳州湘陰縣界也水經注江水左逕烏林南

又東。右岸得蒲磯口。卽陸口也。

十九年。獲廬江太守朱光。及參軍董和。此又一董和。非蜀之董和。

黃武二年。魏以爲斬春太守。案。宋書州郡志。吳立斬春郡。尋陽縣屬焉。據此志。則斬春郡蓋魏所置。而

吳因之耳。宋志。晉太康元年省斬春郡。以尋陽屬武昌。改斬春之安豐爲高陵。及邾縣。皆屬武昌。然則吳之斬春郡。領斬春。尋陽。安豐。邾四縣也。

五年分三郡惡地十縣爲東安郡。以全琮爲太守。案。水經注。黃武四年。孫權以富春爲東安郡。分置諸

縣。沈約州郡志亦云。黃武四年。以富春爲東安郡。與此相差一歲。蓋分郡之議在四年。而全琮爲守在五年也。郡治富春縣。其九縣無考。太平寰宇記。建德。桐廬二縣。俱黃武四年分富春置。當是東安屬縣也。

黃龍三年。會稽南始平言嘉禾生。案。宋書州郡志。臨海郡有始豐縣。吳立曰始平。晉武帝太康元年更

名。卽此志所云南始平也。宋書符瑞志作南平始謨。俱倒兩字。臨海本屬會稽東部。

太元二年四月。權薨。案。蜀志稱先主後主而不名。吳主權亮休睦皆斥其名。蜀先主稱殂。而吳主稱薨。

此承祚書法之別也。

三嗣主傳

太元元年冬。權寢疾。明年四月。權薨。太子卽尊號。大赦改元。是歲於魏嘉平四年也。閏月。以恪爲帝。太傅案。是年二月。權改元神鳳。及亮卽位。改元建興。此傳閏月之上。當有建興元年四字。以孫休傳書永安元年冬十月。孫皓傳書元興元年八月例之。可見。

太平三年。與太常全尙將軍劉丞謀誅繚。孫繚傳作劉承。承丞古通用。

永安元年。威遠將軍授爲右將軍縣侯。孫繚傳授作據。

鳳皇三年。會稽妖言章安侯奮當爲天子。案。孫奮被誅。并及其五子。亦當書於皓傳。

天璽元年。遣兼司徒董朝。兼太常周處。至陽羨縣。封禪國山。史能之毗陵志云。碑有大司空朝。而無處

名。案。處傳。處仕吳。止東觀。令無難督。無兼太常之事。豈史氏見處爲陽羨人。輒附益邪。當以碑爲正。

士燮傳

交州刺史朱符。爲夷賊所殺。案。薛綜傳。故刺史會稽朱符。多以鄉人分作長吏。侵虐百姓。強賦於民。百姓怨叛。山賊竝出。攻州突郡。符走入海。流離喪亡。不云爲賊所殺。兩傳蓋互見也。

妃嬪傳

植宣成侯。宣成當作宣城。

宗室傳

孫壹入魏。黃初三年死。案壹以孫亮太平二年奔魏。卽魏甘露二年也。距文帝黃初三年壬寅已三十年矣。此云黃初必誤也。魏志高貴鄉公紀。甘露四年十一月。車騎將軍孫壹爲婢所殺。蓋壹入魏三年而死。爾黃初二字當是衍文。

張昭傳

凡在庶幾之流。無不造門。王弼以庶幾爲慕聖。何晏解論語。亦云庶幾聖道。王充論衡云。孔子之門。講習五經。五經皆習。庶幾之才也。顧邵傳。自州郡庶幾。及四方人士。往來相見。晉書王羲之傳。母兄鞠育。得漸庶幾。蓋魏晉人好用庶幾字。

顧邵傳

烏程吳粲起於微賤。邵拔而友之。吳粲卽吾粲也。吳吾音相似。潁川周昭著書。稱吾粲由於牧豎。豫章揚其善。以竝陸全之列。謂此也。

張秉。雲楊太守。案雲陽縣卽漢吳郡之曲阿。嘉禾三年更名。其置郡當在嘉禾以後也。晉志敘吳所置郡。不及雲陽。蓋不久卽省矣。

顧譚傳

陷沒五營將秦兒軍。兒當作兒。見吳主傳

步騭傳

明德慎罰。哲人惟刑。哲當作折。用呂刑折民惟刑語。

張紘傳

注。吾欲圖徐州。宜近下也。案。秣陵與廣陵隔江相對。而廣陵屬徐州部。權意欲都秣陵。以圖廣陵。故云欲圖徐州。裴氏譏之。殆未審於地理矣。

薛綜傳

南海黃蓋為日南太守。此別是一人。非黃公覆也。

後得零陵賴恭。先輩仁謹。不曉時事。案。賴恭仕蜀。官至太常。而志不立傳。以士燮傳及此傳參考之。蓋建安中。劉表承制授恭交州刺史。為蒼梧太守。吳巨所逐。乃歸先主也。

呂蒙傳

使普肅萬人屯益陽。普當作魯。

韓當傳

遷偏將軍。領永昌太守。永昌郡屬益州。蓋遙領之。下文又云領冠軍太守。冠軍縣屬南陽。權亦未能有其地。

蔣欽傳

以經拘昭陽爲奉邑。案吳諸將食邑如孫皎賜沙羨雲杜南新市竟陵爲奉邑孫韶食曲阿丹徒二縣呂蒙食下雋劉陽漢昌州陵徐盛賜臨城縣爲奉邑朱治以婁由拳無錫毗陵爲奉邑呂範以彭澤柴桑歷陽爲奉邑又改溧陽懷安寧國之類皆縣名也經拘昭陽漢時無此縣名宋志邵陵郡有邵陽縣吳立曰昭陽卽欽所食邑矣經拘未詳。

陳武傳

廬江松滋人。案班志廬江郡有松滋縣續漢志無之則東京已省此縣疑漢末復置也晉志松滋屬安豐郡東晉於尋陽僑置松滋郡遙隸揚州安帝省爲松滋縣屬尋陽郡則江北之松滋移於江南矣東晉又於漢武陵郡孱陵縣之上明地僑立河東郡所領有松滋縣沈約云疑是有流民寓荆土故名今荊州府之松滋縣蓋沿其名非漢魏之松滋也。

陳表傳

以表領新安都尉。案孫權於建安十三年立新都郡晉太康平吳始改新安此云新安蓋新都之譌因下文有會稽新安縣相涉而誤耳諸葛瑾傳注引吳書云新都都尉陳表。

在會稽新安縣。此新安卽衢州信安縣沈約志東陽郡信安縣漢獻帝初平三年分太末立曰新安晉

武帝太康元年更名東陽。本會稽西部都尉。故云會稽新安縣。若新都郡本丹陽之地。不得系以會稽也。

甘寧傳

拜西陵太守。領陽新下雒兩縣。此西陵郡。蓋分漢江夏郡之地。陽新縣亦吳置。今與夔州地也。陸抗拜鎮軍將軍。都督西陵。步闡爲西陵督。此西陵卽漢之夷陵縣。黃武元年改名。與此非一地。

潘璋傳

遷豫章西安長。案兩漢晉宋志。豫章郡並無西安縣。太平寰宇記。西安縣故城在分寧縣西二十里。漢獻帝建安中置。開皇元年廢。寰宇記又云。武寧縣古西安縣也。後漢建安中。分海昏縣立西安縣。晉太康元年改爲豫寧。

權卽分宜都至秭歸二縣爲固陵郡。至當作巫。魏氏春秋云。建安二十四年。吳分巫秭歸爲固陵郡是也。

丁奉傳

三年奉貴而有功。三年下脫卒字。

虞翻傳

注鄭元所注尙書以顧命康王執瑁古曰即冒字與日似同從誤作同既不覺定復訓爲杯案今本尙

書同瑁連文同爲爵名瑁爲天子執瑁之瑁各是一物仲翔謂古曰似同鄭氏從誤作同又訓爲酒杯

以此譏鄭之失則古本只有瑁字古文作同而鄭作同也今本尙書出於梅賾或亦習聞仲翔說兼取

二文以和合鄭虞之義乎馬融本亦作同漢人又有加金旁作銅字者並見仲翔說

成王疾困憑几洮類爲濯以爲澣衣成事洮字虛更作濯以從其非案濯卽古洮字周禮春官守祧古

文祧爲濯詩桃桃公子韓詩作耀耀蓋古文兆旁與翟旁多相通用仲翔譏鄭更字非也

又古大篆苜字讀當爲柳古柳苜同字而以爲昧案說文苜象開門苜古文象閉門苜爲春門萬物已

出苜爲秋門萬物已入苜苜二文相似漢人往往誤讀堯典宅西曰昧谷伏生今文本作柳穀鄭康成

依賈逵所奏定爲昧谷昧苜莫飽切聲相近故仲翔譏之謂其誤苜爲苜也考周禮縫人衣絮柳之材鄭

注引書度西曰柳穀爲證又尙書大傳秋祀柳穀鄭注柳聚也齊人語則康成亦讀爲柳未嘗與頭混

也

分北三苗北古別字案說文火別也从二八火北字形相似故誤爲北

太尉山陰鄭公謂鄭巨君

決曹掾上虞孟英三世死義案後漢書孟嘗會稽上虞人其先三世爲郡吏伏節死難史不著其名英

蓋其一也。

劉歊候主簿任光。案字書無劉字。蓋鄧之譌。鄧莫候切。此歊候二字。當作莫候反。本小字夾注。誤入正文。又誤合莫反二字為歊也。

故太尉上虞朱公。謂朱儁。

昔越王翳讓位。逃於巫山之穴。會稽志。巫山在山陰縣北一十八里。

鄧大里黃公。潔已暴秦之世。高祖卽阼。不能一致。惠帝恭讓。出則濟難。案陳留志。夏黃公姓崔。名廣。字

少通。齊人。隱居夏里修道。故號曰夏黃公。仲翔以為會稽鄧人。仲翔去西京未遠。當得其實。

處士鄧盧。敍弟犯公憲。自殺乞代。案鄧非會稽屬縣。當是鄧存之譌。乾道四明圖經亦以為鄧人。惟盧

作虞為異。二字形相涉。正史固多舛譌。圖經亦傳寫之本。未能決其是非也。

嘗越騎校尉。累遷廷尉。湘東河閒太守。曷廷尉。尚書。濟陰太守。案河閒濟陰二郡不在吳封內。蓋入晉

以後所授官也。於史例不當書。

朱據傳

孫亮時。二子熊損。各復領兵。為全公主所譖。皆死。案妃嬪傳。太平中。孫亮知朱主為全主所害。問朱主

死意。全主懼曰。我實不知。皆據二子熊損所白。亮殺熊損。孫琳傳云。亮內嫌琳。乃推魯育。朱據所尙見

殺本末。責怒虎林督朱熊、熊弟外部督朱損不匡正。孫峻乃令丁奉殺熊於虎林、殺損於建業。以二傳推之。熊損之死。出於亮意。非由全主所譖。謂全主誘罪二人則可。謂之譖不可也。

吳主五子傳

注。元遜諸葛才而疏。子嘿顧精而很。叔發謝辨而浮。孝敬范深而狹。後四人皆敗。案。謝景范慎二人未

見敗事。

霸二子基、壹。案。孫靜之孫亦名壹。於霸子爲族父。似不應同名。

賀齊傳

時王朗奔東治。治嘗作冶。

候官旣平。而建安、漢興、南平復亂。漢興卽吳興縣。後屬建安郡。沈約云。吳興、漢末立。曰漢興。吳更名。此

別一吳興。非烏程之吳興也。

全琮傳

黃武七年。權到皖。使琮與輔國將軍陸遜擊曹休。破之於石亭。是時丹陽吳會山民復爲寇賊。攻沒屬縣。

權分三郡險地爲東安郡。琮領太守。至明賞罰。招誘降附。數年中得萬餘人。權召琮還牛渚。罷東安郡。

案。吳主傳。黃武五年。分三郡惡地十縣置東安郡。以全琮爲太守。平討山越。七年三月。罷東安郡。蓋

琮從陸遜擊曹休。在罷郡還牛渚之後。此傳於破曹休下。始敘分置東安郡云云。失其次矣。

鍾離牧傳

少爰居永興。爰。易也。春秋傳。晉於是作爰田。說文。爰作迺。迺。田易居也。陸瑁傳。同郡徐原爰居會稽。魏遣漢髮縣長郭純。髮當作葭。漢葭。縣名。屬涪陵郡。通鑑作漢葭。蓋溫公所見本不誤。

陸凱傳

赤烏中。除儋耳太守。儋耳郡。晉宋二志皆不載。

陸敬宗傳

天策元年。三嗣主傳作天冊。

是儀傳

郡相孔融嘲儀言。氏字民無上。可改爲是。乃遂改焉。案。氏是本一字。猶如與弋。嬴與盈。姑與邛。可以互用。徐衆譏其忘本誣祖。由於未通古文。

南魯二宮初立。儀以本職領魯王傅。儀嫌二宮相迫切。乃上疏。案。赤烏五年。立子和爲太子。霸爲魯王。權寵愛霸與和無殊。故有二宮之稱。和廢徙後二年。乃封南陽王。則霸已賜死久矣。南魯之文。於義不通。當云東宮與魯王初立。下文乃稱二宮。斯得之。

諸葛恪傳

白陽長胡伉得降民周遺。案丹陽郡無白陽縣恐有譌字。至於子張子路子貢等七十之徒亞聖之德然猶各有所短。今人稱孟子為亞聖蓋本於趙岐題辭不知子張子路子貢諸賢當時皆有亞聖之目也。

孫峻傳

將軍孫儀孫邵、綝、珣等。綝當作林。

孫綝傳

遣從兄慮將兵逆據於江都。下文云峻從弟慮蓋峻之從弟於綝為從兄實一人也。三嗣主傳作孫憲。憲與慮字形相涉而誤。當以憲為正。孫權之次子慮封建昌侯。此峻從弟不應與同名也。綝遷大將軍假節封永寧侯。三嗣主傳作永康侯誤也。同時張布封永康侯。

王蕃傳

丞相陸凱上疏曰常侍王蕃黃中通理。凱疏已見本傳此重出。

賀邵傳

會稽山陰人也。案邵為後將軍賀齊之孫依史例當於篇首著其世系不應更書郡縣也。或於齊傳末

書孫邵有傳。

皓疑其託疾。收付酒藏。掠考千所。邵卒無一語。竟見殺害。晉書賀循傳。元帝與循言及吳時事。因問曰。孫皓常燒鋸截一賀頭。是誰邪。循未及言。帝悟曰。是賀邵也。循流涕曰。先父遭遇無道。循創痛巨深。無以上答。此傳不載燒鋸截頭事。裴注亦不之及。

韋曜傳

注。曜本名昭。史爲晉諱改之。案。三國志於晉諸帝諱。多不回避。如后妃傳。惟色是崇。不本淑懿。高堂隆傳。故宜簡擇。留其淑懿。吳主王夫人傳。追尊大懿皇后。步夫人傳。有淑懿之德。以至太師。軍師。昭烈。昭獻。昭文。昭德。昭告之類。不勝枚舉。蜀後主傳。景耀六年。改元炎興。亦未回避。而諸臣傳。但稱景耀六年。不書炎興之號。最爲得體。此韋曜之名。注家以爲避晉諱。予考。書中段昭。董昭。胡昭。公孫昭。張昭。周昭。輩皆未追改。何獨於曜避之。疑宏嗣本有二名也。

華歆傳

熙光紫園青瓊是憑。案。憑依字古作馮。本讀如蓬。後轉爲符風切。此文以憑與庸隆中風崇重融穹爲韻。馮翊之馮。唐人亦入東韻。

廿二史考異卷十八

晉書一

宣帝紀

南郡太守同郡楊俊。按魏志俊爲南陽太守，非南郡也。

太和四年，泝沔而上，至於胸臆，拔其新豐縣。此非京兆之新豐，其地當在巴東郡。而晉宋二志皆無此縣。太平寰宇記開州開江縣，本漢胸臆縣地。蜀先主建安二十一年，於今縣南二里置漢豐縣，以漢土豐盛爲名，當卽此新豐也。魏雖拔之而不能守。

諡曰文貞，後改諡文宣。按禮志魏朝初諡宣帝爲文侯，景帝爲武侯，文王表不宜與二祖同，於是改諡宣文忠武。然則初諡文無貞字也。禮志及文帝紀竝稱舞陽宣文侯。宋書禮志同此云文宣亦轉寫之誤。

景帝紀

及宣帝薨。按宣景文三帝之卒，紀皆書崩，用陳承祚魏志之例也。此薨字乃後人所改。

諡曰武公。按仲達子元皆封舞陽侯，而諡云武公者，以官三公故也。宣帝諡曰文貞，貞亦當爲公之諡矣。禮志稱文侯武侯，則以爵稱之。

武帝紀

泰始二年詔本爲縣侯者傳封次子爲亭侯爲鄉侯爲關內爲亭侯之下不當有爲字

三年本紀例當書而遺漏者如諸州分置皆書而泰始三年分益州爲梁州太安二年復分益州爲寧州竝失書諸王初封皆書而泰始中封隨王邁職官志作萬惠帝時封新野王歆南平王祥淮陵王權懷帝

時封豫章王詮豫章王端元帝時封譙王承竝失書諸帝廟號皆書而孝武廟號烈宗失書三公薨皆書而義熙三年司徒揚州刺史王謐薨失書南渡以後荊州都督刺史皆書而太元九年桓石民除荊州失書河西張氏子弟嗣立皆書而太寧元年張茂卒兄子駿嗣失書

七年分益州之南中四郡置寧州按地理志分益州之建寧與古雲南交州之永昌合四郡爲寧州紀不及交州略也

九年二月立安平亭侯隆爲安平王本傳作平陽亭侯

咸寧元年八月以故太傅鄭沖太尉荀顛司徒石苞司空裴秀驃騎將軍王沈安平獻王孚等及太保何曾司空賈充太尉陳騫中書監荀勗平南將軍羊祜齊王攸等皆列於銘饗按鄭沖傳咸寧初有司奏沖與安平王孚等十二人皆存銘太常配食於廟荀顛傳咸寧初詔論次功臣將配饗宗廟所司奏顛等十二人銘功太常配饗清廟石苞傳咸寧初詔苞等竝爲王功列於銘饗裴秀傳咸寧初與石苞

等竝爲王公。當作功配享廟庭。荀勗傳。咸寧初。與石苞等竝爲佐命功臣。列於銘饗。賈充傳。與石苞等爲王功。配饗廟庭。又安平王孚。齊王攸傳。竝有配饗太廟之文。獨王沈。何曾。陳騫。羊祜四傳。略不及之。昔漢宣帝圖畫功臣於麒麟閣。班史於蘇武傳。未述其事。列敘十一人官位姓名。它傳及本紀。不復更書。明帝圖畫中。與二十八將於南宮雲臺。范史亦僅一見於馬武傳末。蓋史例之簡嚴如此。今鄭冲等銘饗事。已見本紀。而傳復重述之。且又有書有不書。文旣餘複。而絳漏之譏。轉難免矣。

三年正月。立安平穆王隆弟敦爲安平王。按安平王孚傳。隆立四年。咸寧二年薨。無子國絕。又常山王衡傳。無子。以安平世子邕第四子敦爲嗣。依二傳所言。隆以無子國除。而敦所嗣者。乃常山王衡也。今考隆以咸寧二年薨。次年卽立其弟承安平之封。蓋邕爲孚世子。太宗不可絕。故以敦後之。隆雖無子。國固未嘗絕也。若衡之卒。在泰始二年。距咸寧三年。已十載矣。又不應至是始爲立嗣也。禮志。咸寧二年。安平穆王薨。無嗣。以母弟敦繼獻王後。此可證二傳之誤。

五年十月。汲郡人不準掘魏襄王冢。得竹簡小篆古書十餘萬言。藏於祕府。按東晉傳作太康二年。衛恆傳作太康元年。與紀互異。趙明誠金石錄。據太公廟碑。及荀勗序穆天子傳。俱云太康二年。以正晉紀年月之誤。其說固確。然亦未檢束衛兩傳也。杜預春秋後序亦作太康元年

太康九年十二月。立河閒平王洪子英爲章武王。按河閒王洪傳。洪二子威。混。威嗣。徙封章武。其後威

繼義陽王望更立混爲洪嗣。未知孰是。又齊王問子有名英者。不應與章武同名。此英字疑誤。

惠帝紀

永平元年春正月乙酉朔。按年號當以後改者爲定。是年正月詔改永熙二年爲永平元年。其三月誅太傅楊駿等。大赦改元。以諸志傳參校之。蓋改永平爲元康也。永平紀元僅二月餘。元康紀元乃有九年。其不應書永平審矣。又史書改元之例。凡年號已冠於年首者。不更書。如武帝紀。咸寧元年春正月戊午朔。大赦改元。太康元年三月乙酉。大赦改元。不云改元咸寧。改元太康也。若一歲頻改元者。則以後改之元冠於年首。而不更書。其餘則書以別之。如惠帝紀。永興元年春正月。改元永安。七月。改元建武。冬十一月。留臺改元。復爲永安。十二月。大赦改元。不云改永興者。已冠年首故也。今此年於正月改元。則書永平。三月改元。不書元康。正與永興元年之例相合。可證古本亦必以元康冠年首。校書家不知而妄改爾。

五月甲戌。毗陵王軌薨。按武十三年傳。毗陵悼王軌年二歲而夭。太康十年。追加封諡。以楚王瑋子義嗣。又武帝紀。太康十年十一月。立始平王子儀爲毗陵王。楚王瑋初封始平王。儀與義古字相通。卽一人也。軌之薨。不當在惠帝時。紀殆誤矣。

八月己巳。進西陽公柔爵爲王。按地理志。西陽縣屬弋陽郡。別無西陽郡之名。蓋志之漏也。以柔傳考

之。元康初，義由西陽縣公進封郡王。惠帝還洛，以汝南、期思、西陵益其國。永嘉初，復以邾、蘄、春、益之期思、西陵、邾、蘄、春四縣元屬弋陽，則西陽卽弋陽所分矣。而傳以期思、西陵繫之汝南，是此二縣又嘗改隸汝南，亦志所不載也。成帝咸和初，義降爲弋陽縣王，而西陽國除爲郡。紀傳所載西陽太守有蔣巽、樊峻、鄧嶽、曹據、何元度、桓沖、桓嗣、孟懷玉、徐浩諸人。

三年十月，太原王泓薨。按：太原王輔傳，子宏立。元康中，爲散騎常侍，後徙封中邱王。三年薨，以紀證之。則太原未有徙封之事，而名亦互異，此必有一誤矣。高密王泰傳，封隴西王，改封高密，而惠帝紀、元康九年，仍書隴西王泰薨，亦紀傳牴牾之證。

五年十月，武庫火。五行志在閏月庚寅。

永康元年正月己卯，日有食之。按：上書正月癸亥朔，則己卯爲月之十七日，必無日蝕之理。恐傳寫錯亂耳。天文志亦與此同。

永寧元年三月，倫遣其將閻和出伊闕，張泓、孫輔出堽坂。按：齊王冏傳，倫遣其將閻和、張泓、孫輔出堽坂。趙王倫傳，孫輔等率兵七千，自延壽關出，張泓、閻和等率九千人，自堽坂關出，皆與紀異。地理志，陽城縣有堽坂關，卽堽坂也。新城縣有延壽關，卽伊闕。

六月，封路季小黃公，衛毅平陰公。齊王冏傳，路季作路秀，平陰作陰平。

八月徙南平王祥為宜都王。按吳王晏傳子祥嗣淮南王允其初封南平改封宜都傳俱不載。

永興元年十二月詔齊王冏前應還第長沙王又輕陷重刑封其子紹為樂平縣王以奉其嗣。按齊王

冏傳永興初赦其三子超冰英還第封超為縣王以繼冏祀超與紹本一人轉寫之譌當以超為正也。

二年四月詔封樂平王紹為齊王。按齊王冏傳光熙初追復王本封以子超嗣爵未詳孰是。

八月驃騎將軍范陽王虓逐冀州刺史李義。按本傳虓為劉喬所破自拔渡河王浚表虓領冀州刺史

蓋即逐義而代之也虓既得冀州引兵再渡河而喬遂敗此先後之可考者紀先書逐李義於八月而

於九月書劉喬破虓於許昌似失其次。李義當作溫羨以劉琨溫羨二傳證之可知。

光熙元年八月驃騎將軍范陽王虓為司空。本傳作司徒。

懷帝紀

太熙元年封豫章郡王。按武帝紀太康十年立皇子熾為豫章王此誤。

光熙元年十一月立妃梁氏為皇后。史不為后立傳不知其本末。按太平御覽引臧榮緒晉書云梁皇

后諱蘭暨安定人祖桓漢季儀同三司父芬司徒后初為豫章王妃懷帝即位為皇后永嘉中沒於賊。

此條可補晉書之闕。

十二月己亥封彭城王植子融為樂城當作縣王南陽王模殺河間王顥於雍谷。按河間王顥傳永嘉

初詔書以顥爲司徒。乃就徵南陽王模遣將梁臣於新安雍谷車上扼殺之。并其三子。詔以彭城元王植子融爲顯嗣。改封樂成縣王。薨。無子。建興中。元帝又以彭城康王釋子欽爲融嗣。又成帝紀。咸和五年九月甲辰。徙樂成王欽爲河間王。六年六月景申。復故河間王顯爵位。封彭城王植子顥疑顯字爲樂成王。此二紀一傳之文。皆舛錯不完。今參而考之。樂成王融之封。本以顯嗣。而懷紀乃書於顥被殺之前。顯方就徵。且有三子。必不豫爲立後。且雍谷之殺。與樂成之封。必非一日。紀所書旣未足信。傳云永嘉初詔書以顥爲司徒。考永嘉改元。尙在光熙後一年。顥已先死矣。此又傳之失也。懷帝時旣爲顯立後。當復其爵位矣。何以咸和六年始云復顯爵位。蓋河間郡也。樂成縣也。樂成之封。本由罪降。至咸和五年。欽始復河間本封。因請追復顯爵。此事理之應有者。而其下又云封彭城王植子顥爲樂成王。則恐有誤。欽已嗣顯。不當更有嗣樂成者。且亦不當與顯同名。殊可疑也。

永嘉元年七月。以平東將軍琅邪王容爲安東將軍。都督揚州江南諸軍事。假節鎮建鄴。按元帝紀。東海王越之收兵下邳也。假帝輔國將軍。尋加平東將軍。監徐州諸軍事。鎮下邳。俄遷安東將軍。都督揚州諸軍事。越西迎大駕。留帝居守。永嘉初。用王導計。始鎮建鄴。是琅邪鎮建鄴以前。已轉安東將軍矣。王導傳。帝出鎮下邳。請導爲安東司馬。此其證也。

八月。分荊州江州八郡爲湘州。按地理志。懷帝分長沙、衡陽、湘東、零陵、邵陵、桂陽、及廣州之始安、始興、

臨賀九郡置湘州。是九郡非八郡也。其長沙六郡舊俱屬荊州。惠帝元康元年分桂陽屬江州。紀稱分荊州江州不及廣州。誤矣。

四年十一月加涼州刺史張軌安西將軍。按軌傳永興中已加安西將軍。及王彌寇洛陽。軌遣北宮純

等率州軍擊破之。懷帝嘉其忠。進西平郡公。不受。然則永嘉四年所加者。乃西平之封。非安西將軍也。

六年七月歲星熒惑太白聚於牛斗。天文志熒惑歲星太白聚牛斗之間。按元帝紀永嘉中歲鎮熒惑太白聚牛斗之間。

王廙傳亦云。臣以壬申歲。永嘉六年歲在壬申。見用為鄱陽內史。七月四星聚於牽牛。然則此紀及天文志竝脫

鎮星二字矣。予友褚刑部寅亮言。七月斗建申。日在鶉尾之次。去星紀極遠。太白在日前後。最遠不過

四十五度。何緣違日而在斗牛女之間。若在九月十月之交。或有此事耳。恐七月當為十月之譌。

愍帝紀

建興元年五月詔琅邪王曰。前得魏浚表。時浚屯兵洛北石梁塢。劉琨承制假浚河南尹。故得上表長

安。或疑為王浚之譌者。非是。

十月荊州刺史陶侃討杜弼黨。杜曾於石城。以杜弼杜曾二傳考之。曾不與弼同黨。

二年六月劉曜趙母寇新豐諸縣。劉聰載記作趙染。

元帝紀

建武元年，幽州刺史左賢王，渤海公段匹磾。匹磾傳不言封渤海公。

單于廣甯公段辰，遼西公段眷。段辰者，涉復辰也。段眷者，疾陸眷也。各稱一字者，省文。

太興元年十二月，彭城內史周撫殺沛國內史周默以叛。此周撫一名堅，沛人，非周訪之子撫也。

永昌元年四月，吳國內史張茂。此又一張茂，與涼州刺史同姓名。

七月，王敦自加兗州刺史，郗鑒爲安北將軍。按，鑒非敦之黨，且亦不可云自加也。以敦傳考之，當是自

領江州牧，與郗鑒事初不相涉，蓋傳寫有脫文。

成帝紀

咸和四年八月，劉曜將劉允等帥衆侵石生。此與江州刺史劉允同時，而又同姓名。

九年六月乙卯，太尉長沙公陶侃薨。侃傳作七年，誤也。

咸康四年八月，分寧州置安州。考，地理志是時所分者，牂柯、夜郎、朱提、越嶲四郡也。前此惠帝太安二

年，華陽國志作元年復置寧州，不書於本紀，則此寧州無根矣。志又載李壽分寧州，與古永昌、雲南、朱提、越嶲、

河陽六郡爲漢州。考，咸康四年，正李壽僭位之日，雖立此州，亦未能盡有其地也。

七年十二月，罷安州。地理志在八年。

穆帝紀

永和四年九月景申。慕容皝死。子雋嗣僞位。按。皝雖稱燕王。尚稱臣於晉。雋嗣位之始。未僭帝號。於例不當書僞位也。

五年二月。征北大將軍褚裒使部將王龕北伐。褚裒傳作徐龕。按。太山太守徐龕先已爲石勒所殺。當從紀。

七月。王龕、李邁及石遵將李農戰於代陂。李農、裒傳作李莧。

七年八月。拜閔豫州牧張遇以許昌來降。按。是時洛陽亦入於晉。故九月卽有修復山陵之使也。洛陽晉之故都。準以史法。其得與失。皆當大書於本紀。乃晉史於永和七年。太元九年。收復洛陽。皆略而不書。失輕重之宜矣。考永嘉五年辛未。劉聰陷洛陽。厥後淪於劉石者。凡四十年。至永和七年辛亥。石氏亂。而晉復有之。桓溫因有移都之議。越十有四年。爲興寧三年乙丑。而爲慕容恪所陷。苻堅滅慕容氏。洛陽又入於秦。前後陷沒。凡十有九年。至太元九年甲申。苻氏亂。而晉再有之。越十有五年。爲隆安三年己亥。復爲姚興所陷。又十有七年。爲義熙十二年丙辰。劉裕北伐。後秦將姚光以洛陽降。而晉三有之。及宋武受禪。洛陽猶在晉域也。東晉君臣雖偏安江左。猶能卓然自立。不與劉石通使。舊京雖失。旋亦收復。視南宋之稱臣稱姪。恬不爲恥者。相去霄壤矣。詎可以清談輕之哉。

簡文帝紀

咸安元年十一月，以冠軍將軍毛武生都督荊州之河中、揚州之義成諸軍事。按：毛穆之傳，武生，穆之小字。徙

督揚州之義成、荊州五郡、雍州之京兆軍事、襄陽、義成、河南三郡太守。紀不書雍州京兆者，闕也。荊州

五郡，謂南陽、襄陽、新野、義陽、順陽也。據桓沖傳。孝武太元中，僑置雍州於襄陽，刺史常兼督襄陽諸郡。

二年七月，立會稽王昌明為皇太子。按：孝武紀，帝諱曜，字昌明。此稱字不稱名，蓋以字行也。

孝武帝紀

太元四年十二月己酉朔，日有蝕之。天文志作閏月。

十四年六月，使持節都督荆益寧三州諸軍事、荊州刺史桓石虔卒。以列傳考之，石虔但為豫州刺史，

其為荊州刺史者桓石民也。

安帝紀

隆安三年十一月，妖賊孫恩陷會稽，吳國內史桓謙、臨海太守新蔡王崇、義興太守魏隱竝委官而遁。吳

興太守謝邈、永嘉太守司馬逸皆遇害。安孫恩傳，桓謙作桓謹，魏隱作魏僞，司馬逸作謝逸。南史孝

司馬逸之

元興元年二月，桓玄敗王師於姑孰，譙王尚之、齊王柔之竝死之。按：桓玄傳，玄至姑孰，攻譙王尚之，尚

之敗，玄入京師，矯詔加已總百揆，侍中、都督中外諸軍事、丞相、錄尚書事、揚州牧。據本紀，於是玄入居

太傅府害毛泰、泰弟遂、荀遜、庾楷父子、袁遵、譙王尙之等。然則尙之之死，在三月亥入京師之後，不當在二月也。

義熙五年，慕容超將慕容與宗寇宿豫。陽平太守劉千載、南陽太守趙元竝爲賊所執。按南陽與宿豫相去甚遠，宋書武帝紀作濟南，似爲近之。予考是時陽平與濟陰皆寓治宿豫，則趙元當是濟陰太守，不特非南陽，恐亦非濟南也。

廿二史考異卷十九

晉書一

天文志上

考之徑一。不啻周三率。周百四十二。而徑四十五。此周徑之率。蓋王蕃所創。其後祖沖之定密率。徑一百一十三。周三百五十五。約率。徑七。周廿二。較此數稍弱。
天徑三十二萬九千四百一里。按。周天一百七萬一千里。以徑四十五。周百四十二之率約之。當云徑三十三萬九千四百一里。此二字當是三之譌。

天文志中

安帝隆安五年閏月癸丑。天東南鳴。十六年九月戊子。天東南又鳴。按。隆安紀元止於五年。其明年改元元興矣。此云十六年誤。

永熙元年四月庚申。帝崩。按。武惠二紀俱云以己酉崩。相差十一日。且是歲正月改元太熙。四月。武帝崩。太子卽位。乃改永熙。以先帝之崩。繫之後君之年。亦非也。

安帝隆安二年。郗恢遣鄧啓方等。本紀作鄧啓。

義熙元年十一月，荊州刺史魏詠之卒。此卷書詠之卒，而下卷書詠之薨。此卷書左僕射孔安國薨，下

卷書卒，又下卷永和五年征北大將軍褚裒卒，其下即書裒薨，史之無定例如此。

七年七月，朱齡石剋蜀，蜀人尋反，又討之。按安帝紀，齡石以義熙八年西伐，九年七月克蜀，此云七年，

誤也。下條即有九年七月朱齡石滅蜀之文，其不相檢照如此。下卷亦引齡石克蜀事，誤與此同。

惠帝光熙元年十二月，太白犯填星，是後河間王為東海王越所殺。按河間王顥為南陽王模所殺，模

雖黨於越，未可便稱越殺之。

天文志下

孝武太元二年九月壬午，太白晝見在角，角，兗州分野。升平元年五月大赦。按升平在太元之前，大赦

亦與上事無涉，當是錯簡。

義熙十二年七月，劉裕伐姚泓，十三年八月擒姚泓，十四年劉裕還彭城，受宋公。十一月，紀作十月左僕射

前將軍劉穆之卒。明年西虜寇長安，雁州刺史朱齡石陷沒，十二月帝崩。按穆之卒亦在十三年，而

朱齡石陷沒及安帝崩，俱十四年事，義熙紀元終於十四年，不得更有明年，志皆誤。

地理志上

始皇初并天下，削罷列侯，分天下為二十六郡。三川、河東、南陽、南郡、九江、鄡郡、會稽、潁川、碭郡、泗水、薛郡、東郡、琅邪、齊郡、上谷、漁陽、右北平、遼西、遼東、代郡、鉅鹿郡。

郡上黃太原雲中九原雁門上郡隴西北地漢中巴郡蜀郡黔中長沙凡三十五郡與內史爲三十六郡也 此史臣本注蓋用裴駟說王伯厚云三川漢

河內河南南郡鄆郡漢丹陽郡碭郡漢梁國泗水漢沛郡薛郡漢魯國九原漢五原郡黔中漢武陵郡

內史漢三輔及恆豐郡予按漢志武陵郡高帝置不云卽秦之黔中後漢書南蠻傳秦昭王使白起伐楚略取蠻夷始置黔中郡漢興改

爲武陵王氏說本此而丹陽郡但云故鄆郡不云秦郡疑鄆郡亦漢初所置也

於是與師踰江平取百越又置閩中南海桂林象郡凡四十郡按漢志本秦京師爲內史分天下作三

十六郡是內史不在三十六郡之內也漢志言秦所置郡凡三十三合南海三郡爲三十六閩中則漢

武平閩粵後虛其地而不有故漢志不之數也此以鄆黔中爲秦置并內史爲三十六郡合閩中南海

諸郡爲四十皆與漢志異

漢祖革秦之敝分內史爲三部更置郡國二十有三桂陽江夏豫章河內魏郡東海楚國平原梁國定襄勃海廣漢涿郡合二十三也三內史河上渭南中地也地理志曰高祖增二十六武帝改河上渭南中地以爲京兆馮翊扶風是爲三輔也按志以內史分三部與新置

郡國二十三適合二十六之數故引漢志以實之然漢志謂文景各六武帝二十六與此皆不相應單

舉斯語未免傳會又考漢志梁國卽秦碭郡非高帝所增信都國亦無高帝置之文則仍不能強合也

河上渭南中地三郡雖高帝所置然未幾而廢仍爲內史三輔之分實自武帝始

文增厥九廣平城陽淄川濟南膠西膠東河間廬江衡山武帝改衡山曰六安按廣平非文帝所置當置於武帝初王溫舒爲廣平都尉

此其證也。後爲平干國文帝建國九其一乃濟北也武帝時并入泰山郡膠西國宣帝改曰高密。

景加其四。濟北濟陰山陽北海也宣改濟北曰東平按景帝建國九濟川濟東山陽濟陰江都中山廣平清河常山也置郡

一北海也中山清河常山皆高帝所置郡濟川後廢故漢志云景帝增六也志失舉江都廣川又誤以

濟東爲濟北不知濟北乃文帝所置也濟東國除爲大河郡宣帝改爲東平國此云改濟北曰東平大

謬廣川卽信都信都國立於元哀之世而志謂高帝時已有之亦誤。

武帝開越攘胡初置十七。南海蒼梧鬱林合浦交趾九真日南珠崖儋耳九郡平西南夷置牂柯拓土分

疆又增十四。恆農臨淮四河朔方酒泉陳留安定天水元菟樂浪廣陵敦煌武威張掖按廣陵卽景帝所置江都國非武帝初置武帝建

國三平干。即廣平真定泗水也志皆失舉。

昭帝少事又增其一也。金城至平帝元始二年凡新置郡國七十有一與秦四十台一百一十有一按漢

志所載郡國一百三正元始二年以前之制此云百一十有一者誤也珠崖儋耳沈黎汶山四郡後廢

南海鬱林日南卽秦之南海三郡而閩中郡則漢未嘗置王伯厚謂除此八郡正合漢志一百三之數

愚以爲猶未盡也分內史爲三輔視秦僅增其二梁國卽秦碭郡不當重出而武帝所置真定泗水志

猶遺之秦泗水郡漢改爲沛郡漢之泗水國則分東海置非一地也。以後漢書光武紀續漢郡國志

光武投戈之歲在彫秬之辰郡國蕭條并省者八城陽淄川高密膠東六安真定泗水廣陽

參考之光武所省郡國凡十。此志尙失載河間、廣平二國，或疑河間以復置，故不書，則廣陽後亦復置，何以仍載乎。

明帝置一也。永昌章帝置二。任城按分會稽置吳郡，在順帝時志以爲章帝置，蓋承續漢志之文，而誤以

吳郡當之，不知章帝所置任城之外，固有阜陵國也。志於揚州篇仍云順帝分會稽立吳郡一卷之中，前後自相牴牾。

和順改作，其名有九。和置濟北，廣陽順改淮陽爲陳，改楚爲彭城，濟東爲東按和帝所置尙有河間國，

志卻失載臨淮爲下邳，天水爲漢陽，明帝所改也。淮陽爲陳，楚爲彭城，千乘爲樂安，和帝所改也。明帝改信都爲樂成，安帝又改爲安平，東平則西京舊國也。志竝以爲順帝所改，失之甚矣。

而郡國百有八焉。省前漢八，分置五，改舊名七。按前漢郡國百有三，自光武至順帝并省者八。真定城

淄川高密膠省而復置者二。河間分置者四，永昌任城。改舊名六。因舊八十九。又屬國別領比郡者六。廣漢屬國後爲陰平郡，蜀郡屬國後爲漢嘉郡，犍爲屬國後爲朱提郡，居延屬國後爲西海郡，遼東屬國後爲昌黎郡，張掖屬國後不見。故續志云郡國百五也。此志皆誤。

桓靈頗增於前，復置六郡。桓高陽高涼博陵，靈南安郡，陽盧陵。按博陵郡桓帝延熹元年分中山置。本紀有明文，靈帝中平五年分漢陽置南安郡，見秦州記。劉昭此外別無置郡之證。劉昭注續漢志云：興平二年孫策分豫

章立廬陵郡，建安十五年孫權分豫章立鄱陽郡。二十五年分合浦立高梁郡。本高涼縣皆在獻帝之世，而

高陽國則晉泰始元年所置。見本志此以為桓靈增置者誤也。後漢書西南夷傳靈帝時以蜀郡屬國為漢嘉郡。又分蜀郡北部為汶山郡。劉昭以為安帝延光三年置此二郡志反失之。

魏武定霸三方鼎立。生靈版蕩。關洛荒蕪。所置者十二郡。新興樂平西平新平略陽陰平所省者七。上郡帶方譙樂陵章武南鄉襄陽

五原雲中定襄漁陽雁門按新興省雲中定襄五原朔方置樂平析上黨地西平析金城地新平析安定右扶風

地略陽析漢陽地。本名廣魏晉初更名陰平即廣漢屬國帶方析樂浪地譙析沛郡地樂陵析平原地章武析勃

海河間地南鄉析南陽地襄陽析南郡地考新平郡獻帝初平元年置其時曹公尚未得政帶方郡則

公孫度所置與魏無涉又獻帝初平四年分漢陽置永陽郡興平二年置西海郡建安三年置城陽郡

志皆失之又按本志西平新平二郡下俱云漢置魏武定霸猶奉漢號謂漢置可謂魏武置亦可也樂

平陰平章武三郡下俱云晉置則與此文相戾矣。

而文帝置七。朝歌陽平弋陽魏興新城義陽安豐朝歌本河內地。晉改為汲郡陽平本東郡地建安中割以益魏郡及文帝受

禪乃復析之魏志稱文帝分魏郡東部為陽平郡西部為廣平郡此不數廣平者漏也弋陽析江夏汝

南地魏興新城皆析漢中地義陽析南陽地。即漢末之考陳郡安豐故廬江地考魏志田豫為弋陽太守在太

祖時則建安之末已有弋陽郡而劉靖黃初中為廬江太守則亦嘗置廬江郡矣。

明及少帝增二。明上庸少平陽按蜀置西城房陵上庸三郡魏文并為新城郡以降將孟達為太守明帝誅達

復分其地爲上庸、錫郡、錫郡旋廢。故志不及也。平陽析河東置。又本志稱魏置者，尙有廣平、城陽、汝陰、魏置昌黎，即漢之遼東屬國。四郡。

得漢郡者五十四焉。按續漢志所載郡國百有五，蜀得其十一，吳得其十八，其餘七十有六，魏武省其

七。則魏所得漢郡當爲六十九矣。漢司隸部之河南、河內、河東、恆農、京兆、馮翊、扶風、豫州之潁川、汝南、梁國、沛國、陳國、魯國、冀州之魏郡、鉅鹿、常山、中山、安平、河間、清河、趙國、勃海、兗州之陳留、東郡、東平、任城、泰山、濟北、山陽、濟陰、徐州之東海、琅邪、彭城、下邳、廣陵、青州之濟南、平原、樂安、北海、東萊、齊國、荊州之南陽、揚州之九江、并州之上黨、太原、西河、雁門、涼州之隴西、漢陽、即天水、武都、金城、安定、北地、武威、張掖、酒泉、敦煌、張掖、居延二屬國、幽州之涿郡、廣陽、代郡、上谷、右北平、遼西、遼東、元菟、樂浪、昌黎、即遼東屬國皆魏所有，不止五十四也。

蜀先主於漢建安之間，初置郡九。巴東、巴西、梓潼、江陽、汶山、漢嘉、朱提、宕渠、涪陵。按巴東、巴西皆析巴郡置。江陽本犍爲、枝江、

郡尉。此三郡皆置於劉璋時。汶山郡漢武所立。後廢靈帝復立。漢嘉即蜀郡屬國。亦靈帝所立。非始於先主也。朱提即犍爲屬國。亦稱犍爲南部。見華陽國志涪陵初稱巴東屬國。與宕渠皆析巴郡地。梓潼析廣

漢地。

後主增二。雲南、興古。按雲南郡分建寧、永昌置。興古郡分建寧、牂柯置。皆在建興三年。建寧、漢之益州郡也。

志云劉禪改廣漢屬國為陰平郡。見益州篇此以陰平為魏武所置。故不數。又華陽國志稱劉氏延熙中分

置東廣漢。咸熙初省及南廣郡。志皆不及。

得漢郡者十有一焉。謂巴蜀、漢中、廣漢、犍為、牂柯、越巂、益州、永昌、及蜀郡、犍為二屬國也。

吳主大皇帝初置郡五。臨賀、武昌、珠崖、新安、臨南臨賀、蒼梧地。武昌、析江夏地。新安、析丹陽地。本名新都。晉廢

陵南部即晉之南康郡也。漢武置珠崖、儋耳二郡。元帝時罷。孫氏置郡。亦不見於陳壽志。惟陸凱傳云

赤烏中除儋耳太守。意者合珠崖、儋耳為一郡乎。孫權嘗改合浦為珠官郡。孫亮時復舊名。此珠官非珠崖也。廬陵、鄱陽、高涼三郡

亦孫氏所置。志誤。以為桓靈時置。故不及。權又嘗置西陵郡。以甘寧為太守。置彭澤郡。以呂範為太守。

置東安郡。以全琮為太守。皆不久而省。

少帝景帝各四。少臨川、臨海、衡陽、湘東、景天門、建安、建平、合浦、北部臨川即豫章東郡。臨海即會稽東部。衡陽即長沙西部。湘東

即長沙東部。建安即會稽南部。天門、析武陵地。建平、析宜都地。吳錄。孫休永安三年。分合浦立北部尉。

領平山、興道、寧浦三縣。晉志。寧浦郡。吳置。即此合浦北部也。廣州記。建安廿三年。吳分鬱林

歸命侯亦置十有二郡。始安、始興、郡陵、安成、新昌、武平、九德、吳興、東陽、桂林、樂陽、宜都始安即零陵南部。始興即桂陽南部。郡陵即零

陵北部。安成、析長沙、豫章、廬陵地。新昌、析交阯地。九德、析九真地。吳興、析吳丹陽地。東陽、析會稽地。桂

林、析鬱林地。武安、則扶巖地也。宜都郡。本劉備分南郡置。張飛、孟達、樊友相繼為太守。建安廿四年人

吳在孫權時非皓所置也。蔡陽非吳地。畢中丞沅以爲營陽之譌。良然。然志云穆帝分零陵立營陽郡。宋志亦云江左分零陵立。則亦非皓所置矣。

得漢郡者十有八。謂南郡、江夏、零陵、桂陽、武陵、長沙、丹陽、會稽、吳、豫章、南海、蒼梧、鬱林、合浦、交阯、九真、日南、實十七郡。而云十八未詳。

晉武帝太康元年。既平孫氏。凡增置郡國二十有三。蔡陽、上洛、頓邱、臨淮、東莞、襄城、汝陰、長廣、廣寧、昌黎、略陽、樂平、南平。蔡陽析河南地。即漢末之蔡陽都尉也。上洛析京兆地。頓邱析東郡地。臨淮析下邳地。東莞

析琅邪地。襄城析潁川地。汝陰析汝南地。長廣析東萊地。廣寧析上谷地。昌黎即遼東屬國。新野、隨、義

陽皆析南陽地。毗陵析吳郡地。宣城析丹陽地。南康即廬陵南部。晉安析建安地。寧浦即合浦北部。始

平析京兆扶風地。略陽即廣魏改名。南平則因吳南郡改名也。義陽、樂平皆魏置。而又入增置之列。陰

平亦以爲魏武置。而又重出。前後不檢照如此。又檢本志。晉初分廣漢立新都郡。分河間立高陽國。分

勃海立章武國。此處皆未之及。高陽、章武已入漢魏所置之列。新都一郡不宜遺漏也。

凡十九州郡國一百七十三。仍吳所置二十五。仍蜀所置十一。仍魏所置二十三。今據續漢志與本志參互考之。後

漢郡國一百五。并省者八。陳、漁陽、上郡、五原、雲中、定襄、朔方、張掖屬國也。改舊名者十二。漢陽即東、高

平即山、淮南即九、天水即漢、范陽即燕、建寧即益州、陰平即廣漢屬國、漢嘉即蜀郡屬國、朱提即隴

國蜀改 西海即居延屬國漢未改 昌黎即遼東屬國魏改 也。漢末增置者六。博陵、新平、西平、南安、汝山也。魏置者十五。

平陽、廣平、陽平、譙、弋陽、安豐、樂陵、帶方度置、新興、襄陽、新城、魏興、上庸、廣魏、南鄉也。蜀置七。巴、東、巴

西、江陽皆劉璋置、梓潼、涪陵、雲南、興古也。吳置二十六。廬陵、鄱陽、宜都本劉備置、天門、建平、衡陽、湘東、邵陵、武昌

安成、吳興、東陽、新都、臨海、建安、臨川、新昌、武平、九德、臨賀、始安、始興、桂林、高涼、高興、寧浦也。新置二十

二。滎陽、上洛、汲、頓邱、襄城、汝陰、章武、高陽、廣寧、樂平、始平、新都、城陽、長廣、東莞、臨淮、義陽、南平、宣城、毗

陵、晉安、南康也。義陽東莞章武汝陰城陽長廣諸郡魏時皆有之志以為晉置悉未盡然或中廢而復立耳 又改廣魏曰略陽。南鄉曰順陽。吳之新

都曰新安。其仍漢舊名者八十五郡耳。又按本志。司州統郡國十二。兗州八。豫州十。冀州十三。幽州七。

平州五。并州六。雍州七。涼州八。秦州六。梁州八。益州八。寧州四。青州六。徐州七。荊州二十二。揚州十八。

交州七。廣州十。合計之。止一百七十二。蓋青州脫北海一郡。

凡周天積百七萬九百一十三里。徑三十五萬六千九百七十里。此古法徑一周三之率。七十下當有

一字。天文志。周天一百七萬一千里。徑三十五萬七千里。亦是古率。而與此小異。

陽平郡清泉縣。本清淵。避唐諱改。敦煌郡灑泉作深泉亦避唐諱

隋立河東郡。統安邑、聞喜、永安、臨汾、恆農、譙、松滋、大戚八縣。大戚即廣戚。隋避煬帝諱改。

臨留國。魏武帝封。袁廷橋曰。武帝嘗作元帝。即常道鄉公也。晉受禪。封為陳留王。追諡元皇帝。

濟陽郡漢置。統縣九。按漢無濟陽郡。蓋濟陰之誤。卞壺傳。濟陰冤句人。宋書州郡志。於城武。離狐二縣。竝云晉太康地志屬濟陰。可證今志作濟陽爲傳寫之譌也。惠帝分陳留爲濟陽國。領濟陽。考城諸縣。與此郡全不相涉。晉志亦失書。

東平國剛平縣。續漢志。濟北國有剛縣。前漢屬泰山郡左傳。哀八年。齊人歸闕。杜預注。在東平剛縣北。是晉時仍名剛也。而隱五年。衛師入鄆。注又云。東平剛父縣西南有鄆鄉。此志又云剛平。未審孰是。

泰山郡南武城縣。按續漢志。泰山郡南城縣。故屬東海。漢書本作南成。後漢始加土旁。不知何時增入武字。考景獻羊皇后。惠羊皇后。羊祜傳。宋書羊欣。羊元保傳。竝云泰山南城人。武帝分泰山郡置南城郡。封羊祜爲南城郡公。亦以縣得名也。宋齊州郡志。隋地理志。皆稱南城。無云南武城者。惟晉志多一武字。始因下文有南武陽縣。相涉而誤也。杜預注。哀十四年傳云。泰山南城縣西北有輿城。其注襄十九年經城武城。則云泰山南武城縣。二文似相抵牾。然劉昭注續漢志。引襄十九年注。亦云南城縣。初無武字。則杜注此條武字。亦後人所增也。南城本春秋武城之地。史記亦有南武城之稱。見仲尼弟子列傳。但晉世祇名南城。不名南武城。

新泰縣故曰平陽。漢志。泰山郡有東平陽縣。云東者。別於河東之平陽。山陽之南平陽也。續漢志無此縣。蓋嘗并省。未審何時重立。春秋宣八年。城平陽。杜預注。今泰山有平陽縣。卽此平陽矣。其改名新泰。

據水經注。在晉武帝元康九年。元康、惠帝年號。或太康之譌。

東牟縣故牟國。東字衍。考兩漢志。泰山郡有牟縣。卽春秋牟國也。與東萊之東牟非一地。羊祜傳。詔以泰山之南武陽牟。南城。梁父。平陽五縣爲南城郡。是晉時亦名牟縣也。

明帝以郗鑒爲刺史。寄居廣陵。置濮陽。濟陰。高平。泰山等郡。後改爲南兗州。按晉南渡後。僑置徐兗諸州。俱不加南字。劉裕滅南燕。收復青徐故土。乃立北青。北徐州。而僑置之名如故。是時兗境亦收復。不別立北兗州。但以刺史治廣陵。或治淮陰。而遙領淮北實郡。義熙末。乃以兗州刺史治滑臺。而二兗始分。然僑立之州。猶不稱南。至永初受禪以後。始詔除北加南。沈休文州郡志。謂晉成帝立南兗州。寄治京口時。又立南青州及并州。此特據後來之名追稱之。非當時有南兗南青之名也。此志乃謂成帝後改南兗州。則自郗鑒以後。領兗州刺史者。紀傳一一可考。曷嘗有稱南兗者乎。蓋唐初史臣誤。何宋代追稱爲晉時本號。著之正史。沿譌者千有餘年。至予始覺其謬。願讀史者共審之。

□□分廣陵郡之建陵。臨江。如臬。寧海。蒲濤五縣置山陽郡。屬□□□□宋志考之。安帝義熙中。分廣

陵立山陽郡。所統者山陽。鹽城。本鹽濱。安帝改。東城。左鄉四縣也。又分廣陵立海陵郡。所統者則建陵。臨江。如

臬。寧海。蒲濤五縣也。志誤。

置南新蔡郡。屬南豫州。按晉世無南豫之名。宋武經略中原。以豫州鎮壽陽。而遙領淮北諸實郡。豫猶

未分。至永初受禪後，分淮東西爲二，乃有南豫之稱。此志亦誤。以宋人追稱爲晉時本號也。宋志江州有南新蔡，卽是此郡。晉屬豫州，至宋改屬江州耳。

章武國，秦始皇元年置。按序稱魏武置十二郡，章武其一也。杜恕坐事徙章武郡。杜魏嘉平元年，是章武郡不始於晉矣。

燕國安國縣國相劉禪封此縣公。安國當作安樂，卽漁陽之安樂也。魏武省漁陽郡，蓋并入燕郡。其近塞地則棄之。

代郡富城縣，富城當作當城。

穆帝永和五年，慕容儁僭號於薊，是爲前燕。七年，儁移都於鄴。按本紀，永和八年，儁僭帝號於中山，稱燕。與此不同。考載記，儁以永和五年僭卽燕王位，其時尚都龍城，未得薊也。其徙都薊，蓋在永和六年。次年克中山，又次年克鄴，儁帝號。然猶都薊城也。儁之遷鄴，當在升平二年以後。志未得其實。

咸寧二年十月，分昌黎、遼東、元菟、帶方、樂浪等郡國五置平州。按帝紀，泰始十年二月，分幽州五郡置平州。年月不合。考衛瓘傳，瓘除征北大將軍，都督幽州諸軍事，幽州刺史。至鎮，表立平州。後兼督之，則分立平州之議出於瓘。瓘以泰始七年八月被命之鎮，是平州當置於泰始，不當在咸寧也。

惠帝改新興爲晉昌郡。新興郡治九原，此并州之晉昌也。志又云，惠帝元康五年，分敦煌、酒泉爲晉昌。

郡。此涼州之晉昌也。同時有兩晉昌郡。或有一誤。

京兆郡陰槃縣。即漢之陰槃也。續漢志作陰盤兩漢皆屬安定。宋敏求長安志。臨潼縣東新豐故城。即高帝為

太上皇所立。後漢靈帝末。徙安定郡陰槃縣。寄治於此城。今亦謂之陰槃城。

安定郡西川縣。兩漢無此縣。

有秦國流人至江南。改堂邑為秦郡。僑立尉氏縣屬焉。按宋志。安帝改堂邑為秦郡。此志繫於元帝。考

王國寶。毛泰為堂邑太守。竝在安帝時。則堂邑之改秦郡。是安帝非元帝審矣。尉氏為陳留屬縣。考義

熙中。檀韶向彌。檀祇竝為秦郡太守。北陳留內史虞邱進。亦以秦郡太守。督陳留郡事。則陳留僑郡亦

在堂邑界。當是義熙九年土斷時。省陳留郡。以其縣入秦郡也。

武威郡揖次縣。當作摺次。孟康摺指為子如切漢隸胥身二字多相亂。故譌為揖。隋開皇初。改廣武縣曰邑次。又

因揖邑同音而譌也。

西海郡故屬張掖。漢獻帝興平二年。武威太守張雅請置。按劉昭注續漢志。以為建安末立。

陰平郡。秦始皇中置。統縣二。陰平。平廣。按志。敘魏武置郡十二。陰平居其一。而益州篇云。劉禪建興二年。

分廣漢屬國為陰平郡。此又云。秦始皇中置。一卷之中。三處互異。又考宋書州郡志。北陰平領陰平。平武

二縣。平武蜀立。本曰廣武。晉武帝太康元年更名。此志作平廣。亦誤。

江左分梁爲秦寄治梁州。按孝武立秦州寄治襄陽安帝世始治梁州之漢中南鄭耳據宋志江左又僑立安固懷寧二郡屬南秦志卻未及。

安帝時又立新巴汝陽二郡。按宋志荊州有汝陽郡先屬梁州卽此郡也。但何承天志云新立似非晉所置南齊書蠻傳云桓溫割以爲郡又不當安帝時。

又有北新巴華陽南陰平北陰平四郡。按華陽郡宋志云永初郡國何志竝無徐志新立則非晉所立矣。上文稱晉人流寓於梁益者仍於二州立南北二陰平郡此復舉南陰平北陰平亦似重出。

其後又立巴渠懷安宋熙白水。上洛北。上洛南宕渠懷漢新興安康等十郡。按十郡之名竝見宋志然巴渠懷安宋熙北。上洛彼志皆云新立則非晉所置矣。且宋熙之名不應晉末先有之也。白水郡永初郡國何志皆無之。徐志始有則亦宋所立非晉置矣。懷漢宋孝建二年立新興宋末省晉昌郡立安康亦宋末立皆非晉置蓋晉志敍江左僑置州郡多不可信。

獻帝初平元年劉璋分巴郡立永寧郡建安六年改永寧爲巴東以巴郡爲巴西二十一年劉備分巴郡立固陵郡蜀章武元年又改固陵爲巴東郡巴西郡爲巴郡。按華陽國志初平元年征東中郎將安漢趙穎三國志作趙越建議分巴爲二郡穎欲得巴舊名故白益州牧劉璋以墊江以上爲巴郡龐羲爲太守治安漢以江州至臨江爲永寧郡胸忍至魚復爲固陵郡巴遂分矣。建安六年魚復蹇允白璋爭巴名。

璋乃改永寧爲巴郡。以固陵爲巴東。徙義爲巴西太守。是爲三巴。然則固陵郡亦劉璋所分。特初分三郡時。以故巴郡爲永寧。治江州。而移巴郡之名於安漢。出於趙穎私意。故永寧、固陵二郡民起而爭之。由是巴郡還復其舊。而以新置之巴郡爲巴西。固陵爲巴東。此三巴。初設之本末也。水經注云。漢獻帝初平元年。分巴爲三郡。可證三郡之分。始於劉璋。而三郡俱有巴名。則在建安六年。此志云云。非其實矣。又考。劉焉以興平元年卒。子璋始爲益州牧。則初平元年。璋尙未牧益州。諸書俱屬之劉璋。未免有誤。或初平當爲興平之譌乎。譙周巴記。初平六年。初平紀元止於四年。此云六年。誤。趙穎分巴爲二郡。欲得巴舊名。故郡以墊江爲治。安漢以下爲永寧郡。建安六年。劉璋分巴。以永寧爲巴東郡。墊江爲巴西郡。今按。晉宋二志。安漢竝屬巴西。不屬巴東。宋志。墊江漢舊縣。建安六年度巴西。劉禪建興十五年復舊。蓋初平以安漢、墊江屬新置之巴郡。建安六年。改新巴郡爲巴西。則兩縣俱隸巴西矣。又考。晉宋二志。巴郡領縣四。江州、臨江、墊江、枳。惟墊江由巴西改屬。乃在蜀後主之世。若臨江、江州。皆永寧郡之屬縣。而後來竝屬之巴郡。豈非永寧後改巴郡之明證乎。三國志。張飛至江州。破璋將巴郡太守嚴顏。是巴郡仍治江州也。法正與劉璋牋言。張益德數萬之衆。已定巴東。又云。今此全有巴東。廣漢、犍爲過半。已定巴西一郡。復非明將軍之有。是巴郡之外。又有巴東、巴西。劉璋時已然矣。而華陽志云。巴東郡先主入益州。改爲江關都尉。建安二十一年。以胸忍、魚復、羊渠、及宜都、巫北、井六縣爲固陵郡。章武元年。胸忍、徐慮、魚復

塞機以失巴名。上表自訟。先主聽復爲巴東。此則蜀先主之世。又改固陵。復以郡人言。仍稱巴東也。

太和八年。復爲晉有。太和當作太元。苻堅之敗。在太元八年。其後二年。始復梁益。史約略言之耳。

隆安二年。又立晉熙。遂寧。晉寧三郡。按。梁州篇稱。桓溫平蜀之後。於德陽界東南置遂寧郡。此復載於

益州篇。或初置屬梁州。後乃改屬益州乎。又安帝立始康郡。義熙中。時延祖嘗爲始康太守。志失載此郡。

太安二年。惠帝復置寧州。又分建寧以西北七縣別立爲益州郡。永嘉二年。改益州郡曰晉寧。分牂柯立平

夷。夜郎二郡。按。宋書州郡志。太安二年。復立增牂柯。越嶲。朱提三郡。志不載增領三郡。其失一也。王

遜傳。遜以地勢形便。上分牂柯爲平夷郡。分朱提爲南廣郡。分建寧爲夜郎郡。分永昌爲梁水郡。又改

益州郡爲晉寧郡。事皆施行。志惟載平夷。夜郎。不及南廣。梁水二郡。其失二也。且王遜以永嘉四年除

寧州刺史。踰年乃至鎮。宋志以爲永嘉五年所分。與遜傳相應。此志作二年。恐是轉寫之誤。

地理志下

濟南郡漢置。統縣五。平壽。下密。膠東。卽墨。祝阿。按。漢之濟南。治東平陵。今歷城縣地。領縣十四。與此所領無

一同者。輿地記云。晉以平壽爲濟南郡治。考其屬邑。乃漢北海。平原。膠東地。非濟南地也。于欽齊乘引之。據此。

似晉之濟南。與漢之濟南。名同而實異矣。及讀宋志濟南太守領廣城。當作朝陽。著土鼓。逢陵。平陵。卽東

平陵六縣。土鼓、逢陵二縣下云晉無。則歷城四縣皆晉所有也。朝陽縣下云晉曰東朝陽。太康地志屬

樂安。則歷城諸縣在晉俱屬濟南也。又北海太守領都昌、膠東、劇、即墨、下密、平壽六縣。惟劇縣下云晉

太康地志屬琅邪。今志屬東莞其餘五縣不云改屬。則晉時平壽諸縣仍屬北海也。又考杜預左傳集解。濟

南郡有歷城縣。見桓十有平陵縣。見莊十年。有於陵縣。昭十有濕陰縣。哀十而平壽。見襄四年。及即墨縣。襄六

北海王是北海與濟南竝置。今志有濟南無北海。始悟此志本有脫文。後人以北海所領之縣。誤連綴

於濟南郡下。或遂謂晉之濟南不治歷城。乃治平壽。豈其然乎。惟祝阿一縣。杜元凱明云今屬濟南郡。

永初郡國志。濟南郡亦有祝阿。則不當列於平壽四縣之下。蓋文字爛脫之餘。後人妄為補綴耳。後讀

魏書地形志。濟南郡之歷城。著今本誤作著平陵、朝陽四縣。俱云二漢晉屬。句。太原郡之祝阿縣。則云二漢

屬平原。晉屬濟南。正與予言合。惟北海郡之下。密都、昌平、壽、膠東四縣。皆云晉屬齊郡。後屬似此數縣。

晉世嘗併於齊郡。後乃仍歸北海。然亦是齊郡。非濟南也。

長廣郡。咸寧三年置。按三國志何夔傳。太祖時遷長廣太守。則漢末已有長廣郡。但晉之長廣郡止領

三縣。而夔上言所領六縣。似晉時郡境視魏為削矣。

又分城陽之黔、陬、壯武、淳于、昌安、高密、平昌、營安、昌邱、大劇、臨胸十一縣為高密國。按營邱以下五縣。

皆隸東莞不隸城陽恐有脫文也東莞有廣縣此云大者疑亦避隋諱改之

以僑立州為南青州而後省南青州而北青州直曰青州按晉無南青州之名說已見前此亦誤承宋

志追稱以為本號也省青州入兗州在永初受禪以後不應闕入晉史

東莞郡太康中置按三國志太祖禽呂布以尹禮為東莞太守臧霸黃初中胡質為東莞太守胡質明

帝時張緝為東莞太守張既而司馬晃為東莞太守亦在魏代晉書則漢末至魏已有東莞郡矣晉武

帝即位之初封叔父伯也東莞王是晉初本有東莞郡非太康始置也但咸寧三年徙東莞王伯為琅

邪王即以東莞益其國自後東莞不為郡者九年至太康四年伯薨而後東莞復為郡耳北海之劇縣

而太康地志云屬琅邪者大康之初東莞并於琅邪也水經注東莞縣魏文帝黃初中立為東莞郡不知建安中已有之

元帝渡江之後徐州所得惟半乃僑置淮陽陽平濟陰北濟陰四郡按淮陽四郡宋志皆在徐州部內

即晉末之北徐州彼志云淮陽晉義熙中土斷立北濟陰宋孝武孝建元年立則皆非元帝僑置矣安帝紀義

熙五年慕容超將慕容興宗寇宿預陽平太守劉千載為賊所執此陽平僑置淮北之證淮陽領甬城

宿預等縣去京都水七百陸五百五十亦淮北地也志既云臨淮淮陵淪沒石氏乃置此四郡則四郡

宜在淮南微獨與宋志不合即與安帝紀亦自相抵牾矣宋未失淮北始僑立北淮陽北濟陰於廣陵陽平於山陽志殆誤初宋末僑置之郡以為元帝所立乎

以江乘置南東海、南琅邪、南東平、南蘭陵等郡。分武進立臨淮、淮陵、南彭城等郡。屬南徐州。又置頓邱郡。屬北徐州。按元帝之世，蔡豹爲徐州刺史，鎮下邳，豹死，而卞敦以刺史鎮泗口，尋退保盱眙，未聞有南北徐之分，此一誤也。當時僑立諸郡，或在江南，或在江北，雖非故土，而不加南字，義熙收復全徐，由是有北彭城、北琅邪、北蘭陵之稱。永初受禪，乃詔郡縣寓立於南者，聽以南爲號，以北爲名者，悉除之。而志謂元明之世，已有南琅邪、南東平、南蘭陵、南彭城、南下邳、南東莞諸名，此二誤也。頓邱本屬司州，即使僑立徐土，徐州刺史得兼督之，而未經土斷，當猶存司州之名，不得云屬北徐州，此三誤也。東平本屬兗州，雖僑置江南，與東海、琅邪、蘭陵之元屬徐州者有別，未經土斷，當猶屬兗州，不得云屬南徐州，此四誤也。

南漢陽、南太平、南泰山。按晉無太平郡，當是廣平之誤。宋志謂永初郡國有廣平郡，寄治丹徒，後省爲縣，屬南泰山者是也。

義熙七年，始分淮北爲北徐州，淮南仍爲徐州，統彭城、沛、下邳、蘭陵、東莞、東安、琅邪、淮陽、陽平、濟陰、北濟陰十一郡。是時徐州全境俱已收復，分爲二州，畫淮爲界，志稱淮南仍爲徐州，可見前此無南徐之稱也。彭城以下十一郡，皆北徐州所統。當時本稱北彭城、北沛、北下邳、北蘭陵、北東莞、北琅邪、北志依永初詔書除北字。宋志尙失數東海一郡，而北濟陰爲宋孝建所立，不應義熙已有之。當去北濟陰，而增東海爲十一郡也。其徐州仍寄治京

口而遙領廣陵、山陽、海陵、盱眙、鍾離諸實郡。志不言北徐州所統郡，而直以彭城等十一郡繫於徐州之下。豈誤切彭城等爲淮南僑置之郡乎？然徐州所統合僑郡實郡計之，實不止十一，而淮陽以下四郡皆在淮北，不在淮南，進退皆失據矣。

晉武平吳，分南陽立義陽郡。

下文云義陽郡太康中置。太康元年，即平吳之歲也。

按武帝泰始元年，即封從伯父望爲義陽王，是

義陽置郡，不始於太康，當是因魏之舊耳。敍例以爲魏文帝置。考三國志黃初三年，改封章陵王據爲義陽王。景初元年，分襄陽之郡葉縣屬義陽郡。又鄧艾義陽棘陽人，來敏、鄧芝俱云義陽新野人，是魏有義陽郡矣。

順陽郡太康中置。

按順陽卽南鄉郡。水經注：漢建安中，割南陽右壤爲南鄉郡。逮晉封宣帝孫暉爲順

陽王。

在大康十年。

因爲立順陽郡，而南鄉爲縣。舊治鄆城，永嘉中丹川浸沒。至永和中徙治南鄉故城。本志亦云：建安十三年，魏武得

荊州，分南陽西界立南鄉郡。晉武帝平吳，改南鄉爲順陽郡，則此云太康中置者，非也。但順陽郡名則定於太康耳。杜預注左傳云：穀國在南鄉，筑陽縣北。又云：商密，今南鄉丹水縣。又云：析，今南鄉析縣。又云：陰縣，今屬南鄉郡。蓋杜氏注左時，猶未有順陽之封也。敍例：太康元年，增置郡國二十三，不數順陽，以順陽卽南鄉也。

義陽郡統縣十二。水經注引關駟十三州志云：晉太始中，割南陽東鄙之安昌、平林、平氏、義陽四縣置

義陽郡於安昌城。與此多寡迥異。考杜元凱注左傳云：「蓼國今義陽棘陽縣東南湖陽城。」又云：「鄧國今義陽鄧縣。」又陳壽蜀志來敏、鄧芝俱云：「義陽新野人。」皆與此志合。駟所說恐未足據。

惠帝又分義陽立隨郡。分南陽立新野郡。按義陽本領十二縣：新野、穰、鄧、蔡陽、隨、安昌、棘陽。一作棗陽。厥

西、平氏。厥西是一縣。平氏是一縣。今本或誤。西平氏為一縣。誤。義陽、平林、朝陽是也。後分新野、穰、蔡陽、鄧、棘陽等縣立新野

郡。則新野亦義陽所分矣。即云義陽故屬南陽。而以例言之。當云分義陽。不當云分南陽也。水經注：晉

封扶風武王少子歆為新野郡公。割南陽伍屬陽、穰、鄧、山都封焉。按本志又云：穆帝時以義陽流

傳歆始封縣公。其進封郡王。乃在惠帝時。與水經注不合。伍屬二字亦闕。人在南郡者立為義陽郡。安帝又僑立南義陽、東義陽郡。是晉時有四義陽矣。又按隨穆王整傳：「整封

清泉侯。先薨。武帝以義陽國一縣追封為隨縣王。子邁嗣。太康九年以義陽之平林、益邁為隨郡王。則

隨郡之分在武帝時。非惠帝所分矣。宋志亦云：太康年分義陽為隨國。

桓溫又分南郡立武寧郡。按宋志：武寧太守晉安帝隆安五年桓玄以沮漳降蠻立。桓玄傳亦載此事。

此云桓溫誤也。

義熙十三年省湘州。置置字長沙、衡陽、湘東、零陵、邵陵、營陽。還入荊州。按宋志：晉懷帝永嘉元年立湘

州。成帝咸和三年省。安帝義熙八年復立。十二年又省。此志於咸和省併。義熙復立。皆闕而不書。疏漏

甚矣。

秦始皇并天下，以置鄣、會稽、九江三郡。項羽封英布爲九江王，盡有其地。按：項羽封英布，但得九江一郡耳，非能盡有楚故地也。是時羽自稱西楚霸王，王梁楚九郡，若盡以與布，羽更有何地乎？史漢皆無此語。

景帝四年，封皇子非爲江都王，并得鄣、會稽郡，而不得豫章。按：漢書地理志，廣陵縣下云：江都，易王非、廣陵厲王胥皆都此，并得鄣郡，而不得吳。吳卽會稽郡也。而會稽郡下又云：景帝四年，屬江都。二文自相矛盾。考江都，易王傳稱：吳已破，徙王江都，治故吳國，謂江都王所治，卽吳王濞故都，非能盡有其地也。嚴助、朱買臣爲會稽太守，其時江都國尙無恙，則會稽之不屬江都明矣。

明帝太寧元年，分臨海立永嘉郡，而揚州統丹陽、吳郡、吳興、新安、東陽、臨海、永嘉、宣城、義興、晉陵十一郡。今自丹陽至晉陵數之，止十郡，蓋脫會稽一郡。

改陵陽爲廣陵，廣陵當作廣陽。

廿二史考異卷二十

晉書二

律麻志上

應鍾之數四十二，蕤賓之數五十七，大呂之數七十六，夷則之數五十一，夾鍾之數六十八，無射之數四十五，中呂之數六十。此皆約其大數言之。若論三分損益之密率，則應鍾之數四十二又三分之一，蕤賓之數五十六又九分之八，大呂之數七十五又二十七分之二十三，夷則之數五十又八十一分之四十六，夾鍾之數六十七又二百四十三分之一百三，無射之數四十四又七百二十九分之六百九十二，中呂之數五十九又二千一百八十七分之二千三十九也。凡餘分之數，過半以上，當進之，不及半，當棄之。今應鍾之餘分過半，而祇云四十二，夾鍾之餘分不及半，而即云六十八，於算例未密，或傳寫之譌。

揚子雲曰：聲生於日，謂甲己爲角，乙庚爲商，丙辛爲徵，丁壬爲羽，戊癸爲宮也。按太玄又云：甲己之數九，乙庚八，丙辛七，丁壬六，戊癸五。證以史記徵九，商八，羽七，角六，宮五之文，則甲己當爲徵，丙辛爲羽，丁壬爲角也。

律歷志中

造黃初歷以四千四百八十三爲紀法。千二百五十爲斗分。按宋志千二百五爲斗分。此多一十字。誤也。韓翊本謂乾象減斗分太過。故稍益之。非謂四分當復。今用斗分千二百五十。不惟強於四分。且強於三統。理所必無。故知宋志爲是也。

至平中。劉洪改爲乾象。至平當作熹平。或至下脫熹字。

黃初二年六月二十七日戊辰。加時未日蝕。天文志作戊辰晦。蓋二十九日也。若二十七日。去合朔尙遠。豈有合朔之理。此傳寫差誤。

三年十一月二十九日庚寅。天文志作庚申晦。此作寅。誤。

二年七月十五日癸未日加壬。月景蝕。當云月加景。景者丙也。避唐諱改丙與壬衝。故月蝕。此脫一加字。

乾象歷乾法千一百七十八。諸本脫八字。今以意增。蓋倍紀法爲乾法也。

周天二十一萬五千一百四十。四十當作三十。

通數四十一。四當作三。

日法四百五十七。當云千四百五十七。脫千字。

餘歲三千九十。餘歲當作餘數。三統術所謂策餘也。

章月二百四十五。四當作三。

會日萬一千四十五。會日當作會月。

閏餘十二以上歲有閏。有本或作不誤。

求二十四氣。置冬至小餘。加大餘十五。小餘五百一十五。滿二千三百五十六。從大餘。按乾象以五百

八十九爲紀法。二千三百五十六者。四因紀法也。置餘數三千九十。以二十四氣平分之。各得百二十

八。又四分之三。數有奇零。不便布算。故以四因之。五百一十五者。四因百二十八。又納餘分三也。小餘

滿紀法爲日。小餘既四因之。故亦四因紀法爲日法也。當云置冬至大餘四其小餘。今本脫此四字耳。

求次沒。加大餘六十九。小餘六十。當云小餘六十四。

求次月。小月加度二十二分二百五十八。月行每日十三度二百一十七分。積二十九日。行三百八十

七度四百三分。滿周天去之。餘二十二度二百五十八分也。

求次月。加度二十九。大分三百一十二。小分滿會數。從大分。大分滿紀法。從度。大分三百一十二之下。

疑脫小分二十三。五字。法以章歲乘法。如會數而一。得一萬七千三百九十二。又四十七分之二十

三。卽小分也。以紀法除所得數。得積度二十九。又不盡數三百一十二。是爲大分。大分以紀法爲分母。

小分以會數^{七十}爲分母。每月月行一周天。又多行二十九度五百八十九分之三百一十二。又四十

七分之二十三也。

以章閏乘餘年。滿章月爲積閏。章月當作章歲。以比例之理言之。章歲與章閏。若積年與積閏也。若以章月爲法。則當以章閏乘積月。滿章月得積閏。法爲章月與章閏。若積月與積閏。

五滿會率得一月。五字衍。蓋因上文而重出耳。

推卦用事日。因冬至大餘倍其小餘。坎用事日也。加小餘千七十五。滿乾法。從大餘。中孚用事日也。求次

卦。一本坎作坎誤次各加大餘六。小餘百三。其四正各因其中日。而倍其小餘。按六十四卦用事直日之法。本

之京房。而乾象景初。正光諸術皆用之。其法以坎離震兌用事。在分至之首。得八十分日之七十三。餘

卦皆六日八十分日之七。惟頤晉井大畜皆五日八十分日之十四。較它卦少七十三分。所少之數。卽

四正卦。坎離震兌用事之分數也。乾象術推卦用事。以乾法千一百七十八當一日。千一百七十八分日之

千七十五。卽八十分日之七十三強也。千一百七十八分日之百三。卽八十分分之七弱也。必倍其小餘

者。乾象推冬至術。以紀法五百八十九爲日法。今以千一百八十八爲日法。是倍紀法之數。故必倍其

小餘。乃可入算也。景初術推卦用事。因冬至大餘六。其小餘與乾象異。何也。曰景初推冬至以紀法千

八百四十三爲日法。其推卦用事。則以元法萬一千五十八爲日法。元法乃六倍紀法之數。故亦六其

小餘。無二理也。正光術推冬至與推卦用事。竝以菑法六千六十爲日。故卽因冬至大小餘。與乾象。景

初數殊而理不殊也。

推五行用事。置冬至大小餘。加大餘二十七。小餘九百二十七。滿二千三百五十六。從大餘。此亦四因。

紀法爲日法也。當云因冬至大餘。四其小餘。

滿其法。得一度辰。度字衍。

一日十四度十分。月行分三百七十六。三當作二。月行分者。每度以十九乘之。加入餘分。則一日所行之分也。

益二十二。每日月平行十三度十九分度之七。以十九通之。得二百五十四。是爲小周。月行分在盈限。以過於小周爲益。不及小周爲損。其在縮限。則反之。不及小周爲益。過於小周爲損。損之益之。亦恰合小周之數也。

五日十四度八分。八分兩字衍。

八日十三度七分損四。月行一轉。惟第八日第二十二日。此兩日恰合平行之數。無所損益。然月行由益而損。正在此日。故不云損若干。但云損也。損下不當有四字。第二十二日亦然。

朔行大分一千八百一。大分下脫萬字。以周半即半小周乘通法。得五百四十六萬四千三百二。如通數。而一。得十七萬六千二百六十七。又三十一分之二十五。以厯周減之。得一萬一千八百一。是爲朔行大

分。又餘二十五爲小分也。此文之下。當有小分二十五字。

以上元積月乘朔行大小分。滿通數四十一。從大分。大小分下當更有小分二字。四十當作三十。

求次月。加一日。日餘五千二百三十三分二十五。當云日餘五千八百三十二。蓋朔小餘千四百五十

分之七百七十三。其比例如五千九百六十九日即周之法之三千一百六十六又三十一之二十五也。以

周虛加之。得五千八百三十二爲日餘。二十五爲小分。

求弦望。各加七日。日餘二千八百八十三。小分二十九半。弦望小餘千四百五十七之五百五十七半。

其比例加五千九百六十九之二千二百八十三。又小分二十九半也。當云日餘二千二百八十三。

十三日限餘三千九百一十三。微分一千七百五十二。諸本微作微誤此爲後限。今按術家食限之說。蓋防於

此乾象術。月行十三日七千八百七十四分日之五千二百有三。而一入交。朔入交則日蝕。望入交則

月蝕。入交前後一日有奇。皆爲可食之限。過此則不食矣。限餘謂日小餘以此爲限也。有後限則必有

前限。下文云入厓在前限餘前。後限餘後者。月行中道也。此有前限之證也。元嘉月行陰陽法。本依洪

術。其於入厓二日之下。有前限餘及微分之數。十三日之下。有後限餘及微分之數。可證乾象元有前

限。當在二日之下。而傳寫脫之耳。然則前限限餘及微分之數。亦可考乎。曰。前限者。交後之限也。後限

者。交前之限也。凡交前交後之限。必相等。何承天祖沖之術並同今以後限餘減月周。餘三千九百六十一。併周

日分五千二百三。其得九千一百六十四。滿七千八百七十四分。即月收爲一日。餘一千二百九十分。又借一分。作二千二百九。即微分法減後限微分。尙餘微分四百五十七。是距交一日一千二百九十分。內爲食限矣。然則前限餘當在第二日。日餘千二百九十弱也。宜於二日之下。添注一十九字。云限餘千二百八十九。微分四百五十七。此爲前限。則前後之文相應矣。

朔合分萬八千三百二十八。微分九百一十四。微分法二千二百九。以周天乘朔望合數。得二億二百

四十二萬七千三百三十。如會月而一。得一萬八千三百二十八。卽朔合分也。又餘萬一千四十五分。之四千五百七十。約之。以五約之爲二千二百九分之九百一十四。故以二千二百九爲微分法。九百一十

四爲微分。微分今本皆作微分。誤也。後放此。

其餘不滿麻周者。爲入陽麻。餘去之。餘當作滿。

求次月。加二日。日餘二千五百八十。置朔合分。以月周除之。得二日又七千八百七十四分日之二千

五百八十。則每月陰陽麻一周之後。入麻日及日餘也。

入麻在前限餘前。後限後者。月行中道也。後限下脫餘字。當依元嘉術增入。

其餘三日而一爲少。日字衍。

升分乘周率爲升分。此篇云升分者。皆斗分之譌。隸書斗作升。與升似。故傳寫易混。

以合月法朔小餘并之。合月法下當有乘字。

生度數度餘。當云五生度數度餘。蓋星字爛脫。止存下半。又脫去五字。

減多爲度餘分。以周天乘之。以日度法約之。所得爲度。不盡爲度餘。木火土以周率減日率餘。爲度餘

分。金水周率大於日率。則即以周天乘日率。以日度法約之。爲度數及度餘也。

過周天法之及十分。法當作去。十當作斗。

木。日餘三百三十八萬四千四十六。三十當作四十。又四千下脫六百二字。

火。斗分四十九萬四千二十五。二十當作一十。

土。日度法二百七萬八千五百八十。八十下當有一字。

水。日餘六百三十一萬九百六十七。三十當作四十。

不減滿歲中。卽合其年。減字衍。

律麻志下

章月二百四十五。四當作三。

會通七十九萬百一十。以通數除之。得五月又十三萬四千六百三十分月之十一萬六千九百六十

而一食。較之古術二十三分之二十稍弱。亦不相遠也。以章歲乘會通。如章月而一。得積年六萬三千

八百八十一，尚有餘分五十五，難以入算，故不立會歲之日約之，則七十九萬百一十月，有十三萬四千六百三十食也。

朔望合數六萬七千三百一十五，此以通數當會率，故即以半通數今人所謂望策爲朔望合數。

入交限數七十三萬二千七百九十五，三當作二，依宋志改。

甲子紀第一，景初術六紀而爲一元，甲子、甲戌、甲申、甲午、甲辰、甲寅皆紀首日名也。通數乘紀月，滿日法而一，得六十七萬三千一百五十，是爲紀日，卽周天也。以六十去之，尙餘十日，必更六紀，而天正朔且冬至復於甲子也。

其日蝕望者，定小餘，如在中節者，定小餘如所近中節間限數，限數以下者，算上爲日，日蝕當作月蝕。如在中節以下八字，疑是衍文，宋志無之，定小餘法，見後推合朔交會篇。又按中節限數間限之分，始於景初，冬至日出辰初，故限數最多，夏至日出寅正，故限數最少，其餘中節，各以日出早晚，分限數之多少，不及此限者，夜漏未盡，猶爲前日也。

劉子駿造三正麻，以修春秋，卽三統麻也。

又六千餘歲，輒益一日，凡歲當累日爲次，而故益之，此不可行之甚者。按三統以三百八十五爲斗分，較之四分術，率六千一百五十六歲而益一日，此亦微分累積而成，非無故而增一日也。元凱似未喻

推步之原，故所修長曆，有類置兩閏者。

斗分六百五。當改大字別爲一行，不應分注沒法之下。

周天八十萬五千二百二十。此文重出，八十下脫九字。

曆周四十萬七千六百一十。此半周天之數也，四十下脫四字。

會率一千八百八十三。三當作二，倍朔望合數爲會率也。

通周十六萬七千六百三。六百當作六十，以日法除之，得二十七日又六千六十三分之三千三百六

十二。是爲周日日餘則月行遲疾一周之日數也。

周日日餘三千三百六十三。六十三當作六十二。

五星約法據出見以爲正，不繫於元本。古術日月五星交會，俱起於一元，至姜岌乃有五星約法，止據

出見，不襲求元。郭守敬授時術不立積年，蓋濫觴於此矣。

禮志上

可依準王景侯所撰喪服變除。謂王肅也。肅爲晉武之外祖父，故稱諱而不名。

魏元帝咸熙元年，進文帝爵爲王，是年八月，文帝崩，是年當在明年。

武帝泰始元年十二月，追尊宣王妃張氏爲宣穆皇后，景王夫人羊氏爲景皇后。按武帝紀，泰始二年

正月辛丑。尊景皇帝夫人羊氏曰景皇后。宮曰弘訓。不與追尊同時。且弘訓皇后后紀傳作弘訓太后以咸寧四年崩。秦始初固無恙也。不當入追尊之列。

於是追祭征西將軍、豫章府君、潁川府君、京兆府君。漢人稱郡守曰府君。晉宣帝之曾祖暹、豫章太守。祖雋、潁川太守。父防、京兆尹。故皆稱府君。而征西獨稱將軍。不相混也。然永和二年。有司奏稱征西、豫章、潁川三府君。領司徒蔡謨議。亦稱四府君。則征西亦稱府君矣。宋書禮志。高祖開封府君。曾祖武原府君。皇祖東安府君。皇考處士府君。七世右北平府君。六世相國掾府君。開封、武原皆縣令。而相國掾。處士皆冒府君之稱。自後士大夫敘述先世。遂以府君爲通稱矣。

成帝咸康五年。始作武悼皇后神主。祔於廟。配饗世祖。按帝紀。悼后配饗。在咸康八年。后紀傳則云七年。蓋定議於七年。至八年三月。始奉主入廟耳。志云五年。誤。

武帝咸寧五年十一月。弘訓羊太后崩。本紀在四年六月。

禮志中

孝武寧康中。崇德太后褚氏崩。按褚后崩在太元九年。此云寧康中。誤。

博士徐藻議。此議已見后妃傳。而志又載之。文之複也。宋志作徐恭。

尙書左僕射何澄、右僕射王雅、尙書車胤、孔安國、祠部郎徐廣議。按宋志。此議祇有徐廣一人。而廣傳

亦載其文。蓋主議者廣。而澄雅諸人附和之耳。此議亦見后妃傳。而志又載之。皆當刊去其一。成風顯夫人之號。昭公服三年之喪。昭公事未詳。當是文公之譌也。后妃傳及宋志竝與此同。惟宋書

徐廣傳作僖公。然成風薨於文公四年。不當僖公之世。亦未可爲據。

謂宜同於爲祖母後。齊衰朞。后妃傳作齊衰三年。宋書志傳亦皆作三年。此云朞者。誤也。

太康七年秋。扶風王亮薨。按本紀。是年九月。扶風王駿薨。非亮也。

孝武帝太元四年九月。皇后王氏崩。帝紀。后妃傳俱在五年。

禮志下

司空張華等。按武帝太康元年。華未爲司空。其時司空則齊王攸也。且司空上公。不當列於尙書之後。蓋後人妄改。

職官志

建安四年。以執金吾榮郃爲尙書。左僕射。僕射分置左右。蓋自此始。按宋書百官志。以榮郃爲尙書。左

僕射。衛臻爲右僕射。此志脫一句。郃字形相涉。當以郃爲正。

中領軍。將軍魏官也。漢建安四年。魏武丞相府自置。按宋志。漢有南北軍。衛京師。武帝置中壘校尉。掌

北軍營。先武省中壘校尉。置北軍中候。監五校營。魏武爲丞相。相府自置領軍。非漢官也。蓋領軍卽漢

北軍中候之職。但漢之中候。秩止六百石。魏晉以後之領軍。則以貴臣爲之。自領護之權重。而執金吾。遂廢不置。衛尉亦爲閒曹矣。此志敝領軍原委。不如宋志之詳備。且建安四年。魏武未爲丞相。志亦誤。資重者。爲領軍。護軍。資輕者。爲中領軍。中護軍。按宋志。領護資重者。爲領軍。護軍將軍。此脫將軍二字。文帝初。置中衛。及魏武帝受命。分爲左右衛。此晉武帝事。非魏武帝也。魏字衍。文帝亦謂晉文帝。非魏文帝。

晉以領護。左右衛。驍騎。游擊爲六軍。上文所列伏波。撫軍。鎮軍。龍驤。典軍。上軍。輔國諸將軍。雖有名號。而無職司。此領護等六軍。及四軍五校。皆典軍之官。故別爲一類。

輿服志

史臣曰。昔者乘雲效駕。按天文。地理。律曆。禮樂。職官。食貨。五行。刑法諸序首。或引書傳。或自立論。未有冠以史臣者。獨輿服一篇有史臣曰三字。此義例之未衷於一也。

古之貴者。不乘牛車。漢武帝推恩之末。諸侯寡弱。貧者至乘牛車。其後稍見貴之。自靈獻以來。天子至士。遂以爲常乘。按古制。乘車。兵車。田車。皆曲轅。駕駟馬。惟平地任載之車。駕牛。乃有兩轅。考工記所謂大車之轅。擊其登。又難者也。牛車本庶人所乘。史記平準書言。漢興。接秦之敝。自天子不能具鈞駟。而將相或乘牛車。則漢初貴者已乘之矣。晉時御衣車。御書車。御輅車。御藥車。畫輪車。皆駕牛。則并施於

鹵簿。隋書閻毗傳言。屬車八十一乘。以牛駕車。不足以益文物。是自晉至隋。屬車皆駕牛也。石崇傳。崇與王愷出游。爭入洛城。崇牛迅若飛禽。愷絕不能及。密貨崇帳下。問其所以。答曰。牛奔不遲。良由馭者逐不及。反制之。可聽驅轅則駛矣。王衍傳。衍引王導共載。在車中攬鏡自照。謂導曰。爾看吾目光在牛背上矣。王導傳。導營別館以處衆妾。妻曹氏將往焉。導恐妾被辱。遽命駕。猶恐遲之。以所執麈尾驅牛而進。世說。劉尹臨終。外請殺車中牛祭神。答曰。某之禱久矣。南史。劉瑀傳。與何偃同從郊祀。偃乘車在前。瑀踢馬及之。謂偃曰。君轡何疾。偃曰。牛駿馭精。所以疾耳。徐湛之傳。與弟淳之共車行。牛奔車壞。朱楨之傳。至建業。奔牛墜車折腳。劉德順傳。善御車。嘗立兩柱。使其中劣通車軸。乃於百餘步上振轡長驅。未至數尺。打牛奔從柱前直過。梁本紀。常乘折角小牛車。蕭琛傳。郡有項羽廟。前後二千石。皆於聽拜祠。以輓下牛充祭。北史。高允傳。特賜允蜀牛一頭。四望蜀車一乘。彭城王勰傳。登車入東掖門。度一小橋。牛傷。人挽而入。北海王詳傳。宣武之親政。詳與咸陽王禧。彭城王勰。竝召入。共乘犢車。常景傳。齊神武以景清貧。特給車牛四乘。妻孥方得達鄴。元仲景傳。兼御史中尉。每向臺恆駕赤牛。時人號赤牛中尉。余朱世隆傳。今且爲令。王借車牛一乘。車入到省西門。王嫌牛小。繫於關下槐樹。更將一青牛。駕車。畢義雲傳。高元海遺犢車。迎義雲入北宮。琅邪王儼傳。魏氏舊制。中丞出。千步清道。王公皆遙住。車去牛。頓軛於地。以待中丞過。其或遲違。則赤棒棒之。和士開傳。遣韓寶業以犢車迎士開入內。牛宏傳。

弟弼常醉射殺宏駕車牛。藝術傳。天興五年牛大疫。輿駕所乘巨犗數百頭。同日斃於路側。此則自晉至隋王公士大夫競乘牛車之證也。

食貨志

荀羨爲北府都督。鎮下邳。起田於東陽之石鼈。公私賴之。按。荀羨傳。除北中郎將。徐州刺史。監徐兗二州。揚州之晉陵諸軍事。尋北鎮淮陽。屯田於東陽之石鼈。又領兗州刺史。鎮下邳。則屯田石鼈。乃在移鎮下邳之前也。羨以北中郎將都督諸軍。故有北府之稱。省文也。

五行志上

安帝元興二年十二月。桓玄篡位。其明年二月庚寅。夜濤水入石頭。商旅方舟萬計。漂敗流斷。骸骨相望。三年十月己丑朔。夜濤水入石頭。漂沒殺人。大航流敗。按。元興二年之明年。卽三年也。庚寅後己丑。止一日。蓋一事而重出耳。

廿二史考異卷二十一

晉書四

后妃傳

惠羊皇后。賈后既廢。孫秀議立后。后外祖孫旂與秀合族。又諸子自結於秀。故以太安元年立爲皇后。

按。帝紀。永康元年十一月。立皇后羊氏。正當倫秀專政之日。其明年。孫秀伏誅。又明年。始改元太安。則此傳云太安者。誤矣。五行志亦稱永康元年。

成恭杜皇后。諱陵陽。按。宋書州郡志。杜皇后諱陵。此衍一陽字也。咸康四年。以后諱。改宣城之陵陽縣爲廣陽。可證后名無陽字。

太尉王夷甫外孫。按。成帝諱衍。故史家於王夷甫字而不名。此舊史本文。唐史臣亦因而不改爾。章太妃周氏。哀帝卽位。詔有司議貴人位號。太尉桓溫議。宜稱夫人。尙書僕射江彪議。應曰太夫人。

案。禮志。桓溫議。宜稱太夫人。江彪謂可言皇太夫人。與傳不同。當從志。哀靖王皇后。興寧二年崩。本紀在三年。

廢帝孝庾皇后。太和六年崩。本紀在元年。

孝武文李太后。左僕射何澄等議。應同於爲祖母後。齊衰三年。禮志作齊衰期。宋書徐廣傳亦稱齊衰三年。

安德陳太后。太元十五年薨。贈夫人。追崇曰皇太后。案帝紀。追尊在安帝隆安三年。此有脫文。

王祥傳

漢末遭亂。扶母攜弟。覽避地廬江。隱居三十餘年。案祥以泰始五年薨。年八十五。上溯漢建安九年。祥始二十歲。即使避地。要在其前。距爲徐州別駕之日。祇二十餘年耳。此三十當爲二十之誤也。

徐州刺史呂虔。檄爲別駕。祥年垂耳順。固辭不受。覽勸之。案魏志。呂虔爲徐州刺史。在文帝時。計文帝黃初元年。祥纔三十有六耳。卽被徵在黃初之末。亦止四十餘。何得云耳順也。王隱晉書云。祥始出仕。年過五十。蓋據舉秀才。除溫令而言。非指爲別駕之日也。

虔委以州事。於時寇盜充斥。祥率厲兵士。頻討破之。案魏志。呂虔請祥爲別駕。民事一以委之。討利城叛賊。斬獲有功。此傳云寇盜充斥。卽謂利城叛賊也。劉知幾以爲漢建安中。徐州未靖時事。蓋未考魏志耳。

泰始五年薨。紀在四年四月。

王覽傳

以覽爲宗正卿。案漢以太常光祿勳衛尉宗正廷尉太僕大鴻臚大司農少府爲九卿而官名無卿字。魏晉宋齊竝因漢制梁武帝增置十二卿始於官名下繫以卿字。今晉史諸傳閒有稱某卿者如王覽傳以覽爲宗正卿何遵傳遷太僕卿衛瓘傳轉廷尉卿司馬允之傳追贈太常卿山濤傳除太常卿何攀傳廷尉卿諸葛冲摯虞傳父模魏太僕卿虞爲衛尉卿太常卿周浚傳父斐少府卿卞敦傳父俊歷位廷尉卿謝安傳父哀太常卿孫綽傳轉廷尉卿皆唐初史臣不諳官制隨意增加非當時本稱。子裁撫軍長史王導傳父裁鎮軍司馬。

何曾傳

文帝爲晉王曾與高柔鄭冲俱爲三公將入見曾獨致拜盡敬二人猶揖而已。案高柔卒於景元四年。司馬昭未爲晉王至咸熙元年封王其時三公則太尉王祥司空荀顛也傳誤。

賈充與庾純因酒相競曾議黨充而抑純以此爲正直所非。今以庾純傳考之曾與荀顛齊王攸議云純不求供養於禮律未有違惟譏其荒酒肆忿之失石苞則詆其榮官忘親不忠不孝矣。史於苞傳無貶詞而獨責曾一人抑何自相刺謬也。

石苞傳

泰始八年薨。紀在九年二月。

石崇傳

初崇家稻米飯在地經宿皆化爲螺。時人以爲族滅之應。案衛瓘傳初瓘家人炊飯墮地盡化爲螺。歲餘及禍二事正相類。又裴楷傳初楷家炊黍在飯或變爲拳或作血或作蕪菁子其年而卒事亦相近也。

羊祜傳

詔以秦山之南武陽、牟、南城、梁父、平陽五縣爲南城郡。案南城置郡以封羊祜祜固辭不拜郡亦旋廢。

故地理志不載此郡。

故太尉廣陵公準黨翼賊倫禍加淮南。案羊祜衛瓘皆稱姓而陳準不書姓脫文也。考惠帝紀淮南王允被害之後陳準始除太尉錄尚書事其黨於趙王倫可知又淮南王允傳允率兵圍相府太子左率陳徽勒東宮兵鼓譟於內以應允徽兄淮時爲中書令遣麀駒虞幡以解鬪所云淮者卽準字之譌是淮南之敗準實爲之矣。

陳壽傳

元康二年薨。案本紀壽以太康二年十一月薨元康惠帝年號壽不及事惠帝也。

衛恆傳

魏初有鍾胡二家，爲行書法。謂鍾繇、胡昭也。

河間王洪傳

混小子滔，初嗣新蔡王確，亦與其兄俱沒。後得南還，與新蔡太妃不協。太興二年，上疏以兄弟竝沒在遼東，章武國絕，宜還所生。混封章武王太妃訟之，事下太常。云：詔還襲章武。案：元帝紀，建武元年十一月，封汝南王子弼爲新蔡王。太興元年十一月，薪蔡王弼薨，弼之嗣新蔡。在滔還襲章武之後，弼旣薨於太興元年，則滔上疏請還本生事，斷不在太興二年矣。

太原王輔傳

魏末爲野王太守。案：地理志，魏所置郡無野王之名。

下邳王晃傳

咸寧六年薨。咸寧，武帝年號也。晃事惠帝，由尙書令遷司空。紀書元康六年正月薨。此云咸寧，誤。

高陽王珪傳

詔以太原王輔子緝襲爵。案：晉宗室諸王多同名者，有高陽王緝，又有中山王緝，有南宮王承，又有謙王承。

高密王略傳

略子元簡。案高密孝王略字元簡。而本紀書高密王簡。沛順王景字子文。而本紀書沛王子文。城陽懷王景字景度。而本紀書城陽王景度。蓋當時諸王有以字行者。

新蔡王騰傳

封東嬴公。案惠帝紀。光熙元年九月。進東嬴公騰爵爲東燕王。本傳失書。

范陽王綏傳

咸寧五年薨。本紀在四年。

范陽王斌傳

永興三年暴疾薨。惠帝紀。斌薨於光熙元年十日。按是歲十月改元光熙。則當書光熙爲正。

任城王陵傳

泰始元年封北海王。三年轉封任城王。案武帝紀。咸寧三年八月。徙北海王陵爲任城王。傳云泰始三年轉封。未審誰是。

咸寧五年薨。本紀在太康四年四月。

西河王斌傳

武帝受禪封陳王。三年改封西河。案西河之封據帝紀亦在咸寧三年與任城同時。此傳下有咸寧四年之文則亦以爲泰始三年矣。

賈充傳

初充伐吳時常屯項城軍中忽失充所在。案晉史好采小說而此傳蕪累尤甚蓋由作史者惡充之姦故於賈后傳及此篇縷述其女淫穢之迹然左氏史公亦道中書之言曷嘗宥俗若此乎項城軍中爲鬼所錄叩頭請命益誕妄不足信矣。

劉寔傳

元康九年策拜司空。惠帝紀在永康元年。

王渾傳

及誅楊駿崇重舊臣乃加渾兵渾以司徒文官主史不持兵持兵乃吏屬絳衣自以偶因時寵權得持兵非是舊典皆令阜服。案職官志諸公及開府從公加兵者主簿已下令史已上皆絳服太尉雖不加兵吏屬亦皆絳服渾以司徒加兵於法吏屬當絳衣乃辭而不居者以一時誤恩非由功賞且政出多門恐爲權倖所忌耳。

王濟傳

與甄德妻長廣公主。案晉諸公贊云甄德字彥孫司馬景王以女妻德早亡文王復以女繼室即京兆

長公主也。見魏志后妃傳注。此云長廣公主封號互異。

王濬傳

太子洗馬孟康。此與注漢書之孟康未審即一人否。

山濤傳

及羊祜執政時人欲危裴秀濤正色保持之由是失權臣意。案秦始初羊祜為尙書右僕射故云執政也。祜傳云王佑賈充裴秀前朝名望祜每讓不處其右此傳所言似秀之危出於祜意且以權臣目祜與彼傳殊相矛盾矣羊公盛德何致有此。

王戎傳

父渾涼州刺史。同時有兩王渾一太原人一琅邪人。

樂廣傳

值世道多虞朝章紊亂清已中立任誠保素而已。案趙王倫之篡位廣與滿奮崔隨進纒綬於倫可謂之清已中立乎。

崔洪傳

薦雍州刺史郤詵代己爲左丞。案郤詵傳洪薦詵爲左丞累遷雍州刺史據此傳似先爲刺史而後爲左丞矣。

李重傳

於時內官重外官輕兼階級錄多重議之見百官志。案晉書有職官志不稱百官志且亦不載李重之議又司馬彪傳秦始皇初武帝親祠南郊彪上疏定議語在郊祀志考晉書不立郊祀志惟有禮志亦不載彪議也張亢傳領佐著作述厥贊一篇見律厯志今志初無其文摯虞傳表論封禪見禮志又議玉輅兩社事見輿服志今考禮志載衛瓘等奏請封禪表列諸臣名初不及虞若玉輅之議則輿服志亦無之惟兩社議見於禮志然亦非輿服志也蓋自唐以後修史不出一人之手志傳之文不相檢照至於如此敬播諸臣未免失其職矣。

阮籍傳

景元四年冬卒。稽阮歿於魏世又非佐晉創業如魏荀彧宋劉穆之之比系之晉史義例安在。

劉伶傳

劉伶字伯倫。劉知幾曰舊晉史本無劉伶畢卓傳皇家新撰以補前史所闕。

皇甫方回傳

王敦遣從弟虞代陶侃。虞既至荊州，大失物情，百姓叛虞迎杜弢。案陶侃傳，敦留侃不遣，左轉廣州刺史，以王虞爲荊州。侃之佐吏將士，詣敦請留侃，敦怒不許。侃將鄭攀、蘇溫、馬儁等不欲南行，遂西迎杜曾以距虞。王虞傳，王敦左遷陶侃，使虞代爲荊州將吏馬儁即馬儁、鄭攀等上書請留侃，敦不許。虞爲俊等所襲，奔於江安，賊杜曾與俊攀北迎第五猗以距虞。杜曾傳，王虞爲荊州刺史，曾距之，以三傳參考。則荊州將吏距王虞迎杜曾，乃在虞未到州之先，且所迎者杜曾，非杜弢也。

束皙傳

漢太子太傅疎廣之後也。王莽末，廣曾孫孟達避難，自東海徙居沙鹿山南，因去疎之足，遂改姓焉。說文，疏從流從疋，以疋得聲，隸變疏爲疎，與束縛之束本不相涉。疋，古胥字，古人胥疏同聲，故從疋聲也。疏之改束，自取聲相轉，如耿之爲簡，奚爲之稽耳。唐人不通六書，乃有去足之說。

其紀年十三篇，記夏以來至周幽王爲犬戎所滅，以事接之。事上當有晉字，刊本脫。三家分，仍述魏事，至安釐王之二十年。今世所傳竹書紀年，起黃帝，而此云夏以來，然則黃帝至唐虞事，出於後人附益，非汲冢之舊矣。紀年附注，相傳出於沈約，然梁書南史約傳備載所撰述，初不及此書。隋經籍、唐藝文志載紀年，或云十二卷，或云十四卷，俱不言約有附注，則附注亦非休文所作也。

郤詵傳

郤詵字廣基，濟陰單父人也。案郤从谷，谷與臙同。漢隸从谷旁者，或變爲丞，故郤或作郤，與从希之郤。音義全別。今晉書刊本，郤字亦譌爲郤，而郤郤二姓遂溷而無別。今考定，望出河南濟陰者，讀如郤。郤正，郤詵是也。望出山陽高平者，讀如絺。郤慮，郤鑒是也。陸魯望詩：一段清光染郤郎。此用郤詵事，當爲仄音，而黃伯思譏其誤讀，又不然矣。

陸雲傳

成都王穎表爲清河內史。晉時郡置太守，王國則置內史，行太守事。然名稱率相亂，如陸雲稱清河內

史，亦稱太守。陸氏異林桓彝稱宣城內史，城帝紀及本傳亦稱太守。桓溫蘇峻傳蘇峻稱歷陽內史，本傳亦稱太守。成帝孫默稱琅邪太守，元帝紀亦稱內史。石勒載記郗存稱武邑內史，亦稱太守。劭續傳周廣稱豫章內史，元帝紀亦稱太守。華軼傳王曠稱丹陽太守，陳敏傳亦稱太史。顧榮傳王承稱東海太守，王湛傳亦稱內史。名士傳

夏侯湛傳

乃作昆弟語。夏侯考若昆弟語，模擬尙書，乃王莽宇文泰大誥之流，詞最淺劣，不知史家何以錄之。

潘岳傳

謚二十四友，岳爲其首。案二十四友姓名已具賈謚傳，而石崇、潘岳、劉琨諸傳又及之，無怪乎叢冗之譏矣。況謚傳二十四人以石崇爲首，亦自相矛盾。

江統傳

建武中，以馬援領隴西太守討叛羌，徙其餘種於關中，居馮翊河東空地。案後漢書西羌傳，徙置天水、隴西、扶風三郡，與此異。

故何熙、梁覲戎車屢征，覲當作謹。

由是於彌扶羅求助於漢。彌字衍，於扶羅即劉元海之祖也。

羅憲傳

師事譙周，周門人稱爲子貢。事亦見文立傳。

追封西鄂侯。三國志注引襄陽記云：晉王拜憲凌江將軍，封萬年亭侯。泰始元年，改封西鄂縣侯。此傳云追封者，誤也。

羅尙傳

太康末，爲梁州刺史。李特載記作涼州。

又攻尙於成都，尙退保江陽。以李特載記考之，尙無退保江陽之事。

荊州刺史宗岱，惠帝紀及李特載記並作宋岱。

乃使兵曹從事任銳僞降。李特載記作任明，蜀錄作任叡。予謂當以叡爲本名，晉人避元帝諱，易之，銳

取同音。明取同義也。

俄而尙卒。雄遂據有蜀土。惠帝紀。雄自鄆城攻尙。尙委城而退。李雄載記亦云尙留牙門羅特固守。尙委城夜遁。蓋尙之棄成都。在李雄嗣立之後。可證前此未嘗退保江陽也。

汝南王亮傳

西晉之政亂朝危。雖由時主。然而煽其風。速其禍者。咎在八王。故序而論之。案。晉史以汝南王亮。楚王瑋。趙王倫。齊王冏。長沙王乂。成都王穎。河閒王顥。東海王越。八人總爲一傳。不與宣文武諸子同篇。蓋因晉時有八王故事一書。隋志不言撰人。劉孝標注世說屢引之。故取其名。然於勸善懲惡之旨。殊未當也。趙王倫。晉之亂賊。當與桓玄同科。齊王冏起義討倫。雖以驕溢致敗。較諸成都。河閒。東海之大失。臣節者。不可同年語矣。史乃以趙倫齊冏竝稱。何其不分阜白乎。汝南王亮爲賈后所害。本無大過。亦不當以煽風速禍責之。

牽秀傳

武邑。觀津人。案。武邑。觀津二縣皆屬安平國。志不載分置武邑郡事。然邵續傳先稱兄子武邑。內史存。後稱帝假存武邑太守。則當時固有武邑郡矣。賈謐傳稱安平牽秀。則舉其故郡而言。

劉琨傳

琨乃說冀州刺史溫羨，使讓位於虢。惠帝紀：范陽王虢逐冀州刺史李義，今以溫羨及琨傳證之。虢所代者，實溫羨，非李義也。

匹磾從弟末波。段匹磾、邵續傳作末杯，杯波聲相近，譯音無定字也。

祖納傳

平北將軍王敦聞之，遺其二婢。案：王敦未嘗為平北將軍，傳誤也。此事見世說德行篇，但云王平北，不著其名。劉孝標注以為王父也。王衍傳父父，為平北將軍。世說稱王敦必云王大將軍，晉史好采世說，豈此例尚未之知邪。

李矩傳

聰因憤恚發病而死。是時劉聰強盛，小挫未至大創，何至憤恚而死，此夸大之詞，不足信。

段匹磾傳

東郡鮮卑人，郡當作部。

父務勿塵。北史徒河傳作務目塵，古讀勿如沒，與目聲相近。

以務勿塵子疾陸眷襲號。石勒載記及北史竝作段就六眷，就疾聲相近，故下文亦稱就陸眷。

魏浚傳

東郡東阿人也。地理志東阿屬濟北國。

清河王遐傳

四子覃、籥、銓、端、懷。懷帝紀立豫章王詮爲皇太子，卽銓也。偏旁小異。

吳王晏傳

乃貶爲賓徒縣王，後徙封代王。倫諫，詔復晏本封。案帝紀永寧元年六月復封賓徒王晏爲吳王，不見徙封代事。賓徒縣屬昌黎郡。

東海王沖傳

其以小晚生奕繼哀王爲東海王。案哀王沖於明帝爲昆弟，今成帝以己子繼之，於哀王爲大父行，故有小晚生之稱也。琅邪王煥，元帝子，而元帝令云晚生，臆弱，是晉人呼其子爲晚生之證也。海西公紀不言繼哀王事，此史文之漏。

廿二史考異卷二十二

晉書五

王導傳

桓彝初過江。見朝廷微弱。謂周顛曰。我以中州多故來此。欲求全活。而寡弱如此。將何以濟。憂懼不樂。往見導。極談世事。還謂顛曰。向見管夷吾。無復憂矣。案溫嶠傳亦云。江左草創。綱維未舉。嶠殊以爲憂。及見王導。共談歎然。曰。江左自有管夷吾。吾復何慮。此一事而傳聞異辭也。裴秀傳末云。王導爲司空。旣拜。嘆曰。裴道期。劉王喬在。吾不得獨登此位。劉隗傳末云。王導初拜司徒。謂人曰。劉王喬若過江。我不獨拜公也。此一事而重出也。丁潭傳云。王導嘗謂孔敬康有公才而無公望。丁世康有公望而無公才。盧騷傳又云。王導嘗謂騷曰。孔愉有公才而無公望。丁潭有公望而無公才。此亦一事而重出也。齊王攸傳。攸薨。帝哭之慟。馮統侍側曰。齊王名過其實。而天下歸之。今自薨隕。社稷之福也。陛下何哀之過。帝收淚而止。馮統傳。帝聞攸殞。哀慟特深。統侍立。因言曰。齊王名過於實。今得自終。此乃大晉之福。陛下何乃過哀。帝收淚而止。此亦一事而重出也。

溫嶠傳

古鎮將多不領州。皆以文武形勢不同故也。宜選單車刺史別撫豫章。專理黎庶。案刺史不督軍者。謂之單車刺史。南齊書百官志。晉太康中。都督知軍事。刺史治民。各用人。惠帝末。乃并任。非要州。則單爲刺史。隋書百官志。其庶姓爲州。若無將軍者。謂之單車刺史是也。考之晉初。羊祜以車騎將軍都督荊州諸軍事。而別有荊州刺史楊肇。王渾以安東將軍都督揚州諸軍事。而別有揚州刺史應綽。及周浚。山簡以征南將軍都督荆湘交廣四州諸軍事。而別有荊州刺史王澄。王浚以寧朔將軍都督幽州諸軍事。而別有幽州刺史石堪。此都督與刺史竝置之證也。南渡以後。都督例領本州刺史。其兼督它州。則視權任之輕重。而損益焉。亦有都督而非刺史者。如紀瞻以鎮東長史。加揚威將軍。都督京口以南至蕪湖諸軍事。應詹以南平太守督南平。天門。武陵三郡軍事。李矩以滎陽太守都督河南三郡軍事。桓豁以新野。義成二郡太守督沔中七郡軍事。謝琰以會稽內史都督五郡軍事。桓伊以淮南太守督豫州之十二郡。揚州之江西五郡軍事是也。然事權較之刺史輕矣。

劉隗傳

謹按。行督運令史淳于伯刑血著柱。遂逆上。終極柱末二丈三尺。郭璞傳作丞相令史。蓋本丞相府之令史。以督運獲罪也。

郭璞傳

身與鬼并。精見二午。案。遯爲乾宮二世卦。六二丙午。九四壬午。二爻俱變。故云精見二午也。世爲身。火爲官鬼。故云身與鬼并也。遯之蠱。蠱九二辛亥。亥水克午火。故有被創之象。又歲涉午位。金家所忌。是歲歲在壬午。晉以金德王。金畏火。故忌午。

庾冰傳

以本號開都督江荆寧益梁交廣七州。豫州之四郡軍事。領江州刺史。案。晉自南渡以後。僑立豫州諸郡於江淮之間。故江州刺史常兼督豫州諸郡。謝尙傳。庾冰薨。復以本號督豫州四郡。領江州刺史。哀帝紀。興寧三年二月。以桓冲監江州。荆州之江夏隨郡。豫州之汝南西陽新蔡潁川六郡軍事。江州刺史。桓嗣傳。冲旣代豁。西鎮。詔以嗣督荆州之三郡。豫州之四郡軍事。江州刺史。桓伊傳。桓冲卒。遷都督江州。荆州十郡。豫州四郡軍事。江州刺史。王恭傳。會稽王道子。以其司馬王愉爲江州刺史。割庾楷四郡使愉督之。何無忌傳。義熙二年。遷都督江荆二州江夏隨義陽綏安。豫州西陽新蔡汝南潁川八郡軍事。江州刺史。所云豫州四郡者。西陽新蔡汝南潁川也。四郡之中。惟西陽爲豫州舊郡。西陽縣漢屬潁川郡。魏晉分置弋陽郡。改屬豫州。其餘皆僑置也。

桓彝傳

嘗過輿縣。縣宰東海徐寧。傳未又附徐寧事。凡百二十言。與此略同。若於此文竟歷顯職之下。增入八

字云終左將軍江州刺史而後條則盡芟之則文省而事亦無漏矣。

桓豁傳

溫既內鎮以豁監荆揚雍州軍事領護南蠻校尉荆州刺史以本紀考之是時豁所監者僅揚州之義成雍州之京兆二郡非盡督揚雍二州傳所書意在省文而不知非其實也其後進監寧益軍事又進督交廣并前五州軍事及其卒也紀但書都督荆梁寧益交廣六州諸軍事不及雍揚者以所督止兩郡也豁傳不載進督梁州蓋史失之豁卒以其弟冲代之傳稱都督江荆梁益寧交廣七州揚州之義成雍州之京兆司州之河東軍事而本紀但云都督荆江梁益寧交廣七州諸軍事不及揚雍司三州是其例也地理志孝武始於襄陽僑立雍州仍立京兆始平扶風河南廣平義成北河南七郡桓宣傳宣與李陽平襄陽陶侃使宣鎮之以其淮南部曲立義成郡此義成京兆兩郡得在荆州界內也義成本以淮南人戶立故繫之揚州。

桓冲傳

遷督荆州之南陽襄陽新野義陽順陽雍州之京兆揚州之義城當作七郡軍事此所謂沔中七郡也。

桓豁傳督沔中七郡

遷振威將軍江州刺史領鎮蠻護軍西陽譙二郡太守頃之進監江荆隨豫三州之六郡軍事以哀帝

紀考之六郡者。荊州之江夏、隨、豫州之汝南、西陽、新蔡、潁川也。嘗云監江州及荊、豫二州之六郡軍事。文義乃安。

於是改授都督。徐兗、豫、青、陽五州之六郡軍事。車騎將軍、徐州刺史。以北中郎府并中軍鎮京口。案本紀。寧康三年五月。以中軍將軍、揚州刺史、桓沖爲鎮北將軍、徐州刺史。鎮丹徒。是時未爲車騎將軍也。先是徐兗二州刺史。常以北中郎將領之。或加號平北、安北將軍。沖名位既重。故加號鎮北。四鎮在四安。四平之上。以中軍將軍兼領鎮北將軍。不別置鎮北府。其北中郎府官吏皆并入中軍府也。今書改授車騎將軍。則與并中軍之文不相應。又此時徐兗、豫、青皆無實土州。所治者揚州之晉陵耳。所云六郡不知何所指也。自桓溫、刁彞、王坦之領徐兗二州。皆鎮廣陵。其單稱徐州刺史。自沖始。移鎮京口。亦自沖始。而京口遂專北府之名矣。嗣後王蘊代沖爲徐州刺史。鎮京口。謝玄除兗州刺史。鎮廣陵。而徐兗遂分兩鎮。

謝尙傳

俄而復轉西中郎將、督揚州之六郡諸軍事、豫州刺史。六郡謂淮南、廬江、歷陽、安豐、堂邑、宣城也。永和中。出爲都督江西淮南諸軍事。前將軍、豫州刺史。鎮歷陽。加都督豫州揚州之五郡軍事。前云六郡。此云五郡者。不數宣城也。六郡惟宣城在江東。此云都督江西淮南。則宣城不在所督之內矣。

謝安傳

乃以桓石民爲荊州。改桓伊於中流。石虔爲豫州。是時桓伊爲豫州刺史。改除江州。以石虔代之。云云。流者。江州介荆揚之中也。然詞意未甚明白。

謂所親曰。昔桓溫在時。吾常懼不全。忽夢乘溫輿。行十六里。見一白鷄而止。乘溫輿者。代其位也。十六里止。今十六年矣。白鷄主酉。今太歲在酉。吾病殆不起乎。案。桓溫以寧康元年癸酉薨。安始代之。至太元十年乙酉。祇十有三年耳。

謝琰傳

至義興。斬賊許允之。迎太守魏郡還郡。孫恩傳作魏儻。儻與郡通。本紀作魏隱。隱儻聲亦相近。以琰爲會稽內史。都督五郡軍事。五郡者。會稽。新安。東陽。臨海。永嘉也。

謝玄傳

進據白馬。與賊大戰。破之。今寶應縣西白馬湖。卽晉時白馬也。

進封玩豫寧伯。宋書州郡志。豫章郡有豫寧縣。晉武帝太康元年更名。而晉志不載。據此。則晉時固有豫寧矣。

桓宣傳

東府赫然更遣猛將。此在元帝未即位以前。帝以鎮東大將軍領揚州刺史。故稱東府也。其後以京都所在。刺史不加征東鎮東之號。而東府之名猶存。故揚州治所稱東府城也。

毛穆之傳

桓沖使穆之督梁州之三郡軍事。右將軍。西蠻校尉。益州刺史。領建平太守。假節。戍巴郡。梁州三郡。謂巴西。梓潼。宕渠也。見殷仲堪傳。

陳壽傳

出補陽平令。案。秦始十年。壽上表。稱平陽侯相。此云陽平令。恐誤。壽爲張華所知。武帝之世。華未爲司空。傳云司空張華。亦誤也。

孫盛傳

祖楚。馮翊太守。楚自有傳。以例言之。當云馮翊太守楚之孫。而刊去太原中都人一句。父恂。潁川太守。孫楚傳作洵。據此傳。恂爲潁川太守。在郡遇賊被害。而楚傳云洵未仕而早終。二文自相矛盾。考之晉陽秋。則潁川太守爲是。而名當爲洵也。

著晉陽秋。寫兩定本。寄於慕容儁。案。盛以書枋頭事。忤桓溫。諸子私改之。故與定本多不同。枋頭之役。在慕容暉時。儁已先死久矣。

王維傳

東海剡人。魏衛將軍肅之曾孫也。祖隆。後將軍。剡嘗作郟考。三國志注。隆爲肅子虔之子。則雅實肅之

玄孫。

王恭傳

以恭爲都督兗、青、冀、幽、并、徐州、晉陵諸軍事。平北將軍。兗、青二州刺史。假節。鎮京口。案。晉南渡已後。徐
兗二州刺史。或鎮京口。或鎮廣陵。或鎮下邳。率以一人領之。太元二年。以王蘊爲徐州刺史。鎮京口。謝
玄爲兗州刺史。鎮廣陵。始分爲二。未幾。謝兼領徐州。仍合爲一。朱序代謝玄。以青、兗二州刺史。鎮淮陰。
不帶徐州者。以會稽王道子領徐州刺史故也。序旣移鎮。以譙王恬爲青、兗二州刺史。鎮京口。而兗州
之名移於江南。恬卒。乃以王恭代之。安帝卽位。道子解徐州。其刺史當卽恭兼領。恭敗。以劉牢之代爲
都督。別除謝琰徐州刺史。琰死。司馬元顯領徐州。元顯爲桓玄所害。乃以桓脩爲徐、兗二州刺史。鎮京
口。桓宏爲青州刺史。鎮廣陵。自是徐、青二州隔江分治。義熙初。劉裕領徐。嘗以青州刺史諸葛長民鎮
丹徒。宋旣受禪。遂以京口爲南徐州治。廣陵爲南兗州治。而二州始有實土矣。王恭出鎮之日。晉陵尙
屬揚州。嘗云揚州之晉陵。史有脫文爾。

初都督以北爲號者。累有不祥。故桓沖、王坦之、刁彝之徒。不受鎮北之號。案。徐、兗二州都督。例以北爲

號。故有北府之稱。如褚裒號征北大將軍。荀羨、郗曇號北中郎將。皆卒於鎮。范汪號安北將軍。以罪免。庾希號北中郎將。以罪誅。郗愔號平北將軍。亦以病去官。此皆在桓沖諸人之前者也。孝武寧康元年九月。刁彞以北中郎將鎮廣陵。次年正月卒。其二月。王坦之以北中郎將鎮廣陵。次年五月卒。其月。除中軍將軍。桓沖爲鎮北將軍。徐州刺史。鎮丹徒。沖以刁王二人皆以北爲號。相繼殞。乃辭鎮北之號。仍前中軍將軍。故沖傳云。以北中郎府并中軍也。刁彞、王坦之皆爲北中郎將。未嘗加鎮北之號。不受鎮北者。獨桓沖一人。論歷官之年月。則刁最在先。王次之。桓又次之。此傳慎到錯誤。以帝紀及三人傳參考之。黑白了然矣。

庾楷傳

楷上疏。以江州非險塞之地。而西府北帶寇戎。不應使愉分督。是時楷以西中郎將領豫州刺史。鎮歷陽。考南渡以後。豫州或治歷陽。或治壽春。或治姑孰。而都督例以西爲號。桓溫傳。詔以西府經袁真事。故軍用不足。結世子熙布三萬匹。米六萬斛。此稱壽春爲西府也。此傳云西府北帶寇戎。此稱歷陽爲西府也。劉毅傳。西府二局。文武盈萬。此稱姑孰爲西府也。南史謝朓傳。爲齊隨王子隆鎮西功曹。轉文學。因事求還。道中爲詩寄西府。子隆時鎮荊州。則荊州亦有西府之稱矣。西府北府原無定所。但以當時軍府之號爲目耳。

劉敬宣傳

軍次黃獸。宋書次遂寧郡之黃虎。去成都五百里。此作黃獸。避唐諱也。南史作黃武。

劉毅傳

詔以毅爲都督豫州揚州之淮南歷陽廬江安豐五郡諸軍事。豫州刺史。文稱五郡。而實四郡。蓋脫堂

邑一郡。

俄進拜衛將軍。開府儀同三司。案宋書武帝紀。撫軍將軍劉毅抗表南征。公與毅書止之。似無進拜衛

將軍之事。或進拜而辭不受也。

俄進毅爲都督荆寧秦雍四州之河東河南廣平揚州之義城當作成四郡諸軍事。衛將軍。荆州刺史。案

桓沖傳稱司州之河東。宋書劉道規傳稱司州之河南。則此四州下當脫司州二字。

何無忌傳

義熙二年。遷都督江荆二州江夏隨義陽綏安豫州西陽新蔡汝南潁川八郡軍事。江州刺史。增督司州

之恆農揚州之松滋。案江夏四郡皆屬荆州。當云都督江州荆州之江夏。云云。豫州之西陽。云云。恐

後人妄改之也。地理志云。舊江州督荆州之竟陵郡。及何無忌爲刺史。表以竟陵去州遼遠。去江陵三

百里。荆州所立綏安郡人戶入境。欲資此郡助江濱戍防。以竟陵郡還荆州。又司州之恆農揚州之松

滋二郡寄在尋陽人戶雜居。竝宜建督。安帝從之。與此傳正合。

張茂傳

太寧三年卒。案本紀失書茂之卒。通鑑太寧二年五月甲甲茂薨。蓋據十六國春秋之文。當得其實。

張駿傳

太寧元年駿猶稱建興十二年。案愍帝建興元年歲在癸酉。至明帝太寧元年癸未。止十有一年。不當稱十二年。且茂傳云以太寧三年卒。則太寧元年駿尙未嗣位。其躋駿顯然。今據通鑑。茂實以太寧二年薨。而駿嗣其位。仍用建興之號。則與十二年之數恰合矣。此元年亦是二年之譌。

又分州西界三郡置沙州。東界六郡置河州。案地理志。張茂以校尉玉門。大護軍三郡三營爲沙州。張駿分與晉金城武始南安永晉大夏武成漢中凡八郡爲河州。與此互異。

張重華傳

以書誘宛戍都尉宋距。距當作矩。忠義傳矩字處規。

進封福祿縣伯。前已云封福祿伯。此不當云進封。恐重出耳。

時年二十七。在位十一年。案穆帝紀永和二年五月涼州牧張駿卒。子重華嗣。九年十月重華卒。子耀靈嗣。是重華在位僅八年耳。傳云父卒時年十六。今考重華嗣位不及十一年。則所載年歲亦不足信。

李暹傳

元盛以安帝隆安四年立。是歲庚子。至宋少帝景平元年滅。是歲癸亥。據河右凡二十四年。案北史武昭王以魏道武天興二年立。當云三年。此後主以明元太常五年而亡。據河右凡二世二十一年。較之晉史相差三歲。考元盛以晉義熙十三年薨。即魏太常二年。見安帝紀。又三年而宋受禪。是歲西涼亡。本傳乃云士業立年而宋受禪。此所以誤多三年也。

孝友傳

顏含。琅邪莘人也。地理志琅邪無莘縣。含曾孫延之。南史稱琅邪臨沂人。

良吏傳

潘京。太守趙歊嘗問曰。貴郡何以名武陵。京曰。鄙郡本名義陵。在辰陽縣界。與夷相接。數為所攻。光武時移東出。送疑是字得全完。共議易號。傳曰。止戈為武。詩稱高平曰陵。於是名焉。案京所答者。委巷相傳之言。劉昭注續漢志。已疑其無所據矣。予考漢志。武陵郡本有義陵縣。而後漢無之。蓋光武時所并省。其故城想在辰陽縣界。因譌為此說耳。或前漢武陵郡本治義陵。光武中興。乃徙治臨沅。故以是實其言乎。

儒林傳

劉兆，濟南東平人。東平下嘗脫陵字。濟南在青州部內，故傳云兆儒德道素，青州無稱其字者，非竟州之東平也。予向疑地理志濟南郡下有脫簡，今檢解系傳及此傳，則濟南有著縣，有東平陵縣，本書已有明證矣。

有五子，卓、烱、燿、育、臍。兆諸子既無表見，何必更列其名？史家徵人譜牒，而不加刊削，往往有此失。徐邈，東莞姑幕人。案地理志姑幕屬城陽郡，蓋南渡後省城陽入東莞也。邈與廣兄弟各有傳，則篇首敘所居郡縣，當刪去其一。又邈字仙民，傳當書而失書。

文苑傳

李充，父矩，江州刺史。此又一李矩，非平陽之李矩也。

伏滔，平昌安邱人也。案地理志安邱屬東莞郡，又云惠帝元康十年置平昌郡，亦不言所領何縣。以宋志考之，則安邱、平昌、東武、琅邪、朱虛五縣皆隸平昌也。又考三國志孫禮歷平昌太守，則魏時亦嘗置平昌郡。

隱逸傳

孟陋，武昌人也。孟陋與孟嘉兄弟也。一稱江夏鄒人，一稱武昌人。

藝術傳

戴洋。王導遇病。召洋問之。洋曰。君侯本命在申。案。王導傳。咸和五年薨。時年六十四。計其生平。則武帝泰始三年丁亥歲也。與本命在申之說不合。

元帝將登阼。使洋擇日。洋以爲宜用三月二十四日景午。太史令陳卓奏用二十二日。言昔越王用甲辰。三月反國。今與此同。洋曰。云云。乃從之。今案。元帝紀。建武元年三月辛卯。卽晉王位。大赦改元。以術推之。是月癸未朔辛卯。乃月九日也。其二十四日丙午。卻非卽位之日。又太興元年三月景辰。百寮上尊號。是日卽皇帝位。以術推之。是月丁未朔丙辰。則月十日也。三月無丙午日。丙午乃二月二十九日。與洋所言無一合者。

辛德在南方。酉受自刑。辛與丙合。丙祿在巳。巳爲南方。

太寧三年正月。有大流星東南行。洋曰。至秋。府當移壽陽。及王敦作逆。約問其勝敗。案。王敦作逆。及祖約退守壽陽。俱太寧二年事。

佛圖澄。又令一童子繫齋七日。取麻油合臙脂。躬自研於掌中。舉手示童子。粲然有輝。童子驚曰。有軍馬甚衆。見一人長大白皙。以朱絲縛其肘。澄曰。此卽曜也。今俗傳圓光之術。蓋出於此。

列女傳

在諸僞國。暫阻王猷。天下之善。足以懲勸。亦同搜次。附於卷末。謂劉聰妻以下諸人也。然僞諸國。非

晉聲教所及。其夫既殊而異之。其妻妾又引而近之。於義未安。竊謂劉聰妻劉氏。斬康女。苻堅妻張氏。苻登妻毛氏。慕容垂妻張氏。段豐妻慕容氏。呂纂妻楊氏。呂紹妻張氏。事關家國。皆當見於載記。張天錫妻閻氏。薛氏。李元盛后尹氏。亦當附書本傳。惟蘇若蘭。陝婦人。王廣女。三人無可附麗。不妨存之卷末。

桓溫傳

雄又與將軍桓沖戰白鹿原。又爲沖所破。案穆帝紀。苻雄悉衆及桓溫戰於白鹿原。王師敗績。此云爲桓沖所破。非其實也。

溫自江陵北伐。行經金城。見少爲琅邪時所種柳皆已十圍。溫少時嘗爲琅邪太守。宋書州郡志。晉亂。琅邪國人隨元帝過江千餘戶。太興三年。立懷德縣。成帝咸康元年。桓溫領郡鎮江。乘之蒲洲。上求割丹陽之江乘縣境立郡。則溫所治之琅邪。在江南之江乘。金城亦在江乘。今上元縣北境也。溫自江陵北伐。何容取道江南邪。推其致誤。乃因庾信枯樹賦有昔年移柳。依依漢南之語。遂疑金城爲漢南地耳。不知賦家寓言。多非其實。卽以此賦言之。殷仲文爲東陽太守。在桓玄事敗之後。而篇末乃言桓大司馬聞而歎曰。豈非子虛亡是之談乎。此事出世說言語篇。但云北征。本無江陵字。孟嘉。嘉不預溫逆謀。非沈充於王敦可比。何故附溫傳之末。當改入文苑。

慕容廆載記

宇文悉獨官。北史作遜昵延。

八年廆卒。史於僭偽之主皆書死。惟慕容廆、姚弋仲二人書卒。以其爲晉臣也。

慕容儁記載

拜儁爲使持節侍中大都督、都督河北諸軍事、幽冀并平四州牧。穆帝紀但云幽平二州牧。

苻登載記

廆之族孫也。此稱族孫。而後文屢稱曾孫。不可解。

與將死告同成曰。與卿累年共擊逆羌。事終不克。何恨之深。可以後事付卿小弟司馬。案苻不載記載

毛興爲諸羌所殺。何緣臨終付登後事。一卷之中。自相抵牾如此。

姚萇載記

自謂以火德承苻氏木行。案魏承漢爲土德。晉承魏爲金德。苻氏稱木行者。蓋以前後趙爲一代當水

德也。

姚興載記

先是苻登使弟廣守雍。予崇屯胡空堡。聞登敗。各棄守走。登無所投據。遂奔平涼。此事已見苻登載記。

當云符登奔平涼。

遂割南鄉、順陽、新野、舞陰等十二郡歸於晉。案晉宋二志俱不言有舞陰郡，當是姚興所立。此四郡為

實土，餘皆僑郡也。

呂光載記

乾歸弟軻彈來奔，乞伏乾歸載記作軻彈。

呂纂載記

道士句摩羅耆婆，耆婆即羅什之別名也。句鳩聲相近。然下文又稱鳩摩羅什，一篇之中，名氏互異，亦

一病也。六朝稱僧為道人，此道士當為道人之譌。鳩摩羅什傳亦云道士之操。

乞伏國仁載記

置武城、武陽、安固、武始、漢陽、天水、略陽、強川、甘松、匡朋、白馬、苑川十二郡。案天水、略陽、晉舊郡，武始則

張駿所置，漢陽即天水郡，國仁析而二之。苑川在天水勇士縣。

乞伏乾歸載記

兵猶火也，不戢將自焚。案乞伏父子生長西徼，不習華書，而史紀國仁言先人有奪人之心，乾歸言兵

猶火也，不戢將自焚，又言孤遠蹇叔，以至於此，詞人文飾失其本真，大率如此。

項羽斬慶子以寧楚。慶子者，卿子冠軍也。史記徐廣注：卿一作慶。古書慶與卿通。建安元年，建安當作隆安。

馮跋載記

蠕蠕勇斛律。蠕蠕卽柔然也。魏書作蠕蠕。宋齊梁書皆作芮芮。周書作茹茹。北史有蠕蠕傳，而諸傳聞

有作茹茹者，蓋譯音無定字。

蠕蠕斛律爲其弟大但所逐。魏書、北史俱作大檀。

今大魏威制六合。案燕與魏爲敵國，其臣子必多指斥之詞，而北燕太史令張穆言大魏威制六合，南

燕尙書潘聰言滑臺北通大魏，西接強秦，中書侍郎韓範言可以西并強秦，北抗大魏，此皆魏史臣所

改。張穆事見魏收書潘聰韓範之語當出崔鴻十六國春秋皆魏臣也唐人修晉史不當沿襲其文。

禿髮烏孤載記

初壽闔之在孕，母胡掖氏因癡產於被中，鮮卑謂被爲禿髮，因而氏焉。案禿髮之先與元魏同出，禿髮

卽拓跋之轉，無二義也。古讀輕唇音如重唇，故赫連佛佛卽勃髮，从茂得聲，與跋音正相近。魏伯起

書尊魏而抑涼，故別而二之。晉史亦承其說。

廿二史考異卷二十三

宋書一

武帝紀上

慶忌生陽城蕭侯岑。案漢表陽城釐侯慶忌薨子颯嗣王莽敗絕未見有名岑者殆東京紹封宗室侯之一乎。

高祖以晉哀帝興寧元年歲次癸亥三月壬寅夜生。案孝穆趙皇后傳興寧元年四月二日生高祖與紀異。

以高祖爲中兵參軍軍郡如故。軍謂建武將軍郡謂下邳太守也。晉自南渡以後軍府僚佐皆帶本州守相取其榦祿。故高祖以北府參軍得領下邳太守及建義之後幕僚如劉穆之爲錄事參軍堂邑太守徐羨之除琅邪內史仍爲從事中郎劉懷慎爲鎮軍參軍彭城內史劉粹爲鎮軍參軍沛郡太守孟懷玉爲鎮軍參軍下邳太守高祖時領徐州刺史諸人所領皆徐州郡也文帝以西中郎將鎮荊州張邵爲司馬領南郡相謝晦爲荊州刺史請庾登之爲長史南郡太守南郡荊州治也張茂度爲司馬休之平西司馬河南太守休之爲荊州刺史而河南亦僑立於荆部也始興王濬鎮湘州以庾炳之爲司

馬領長沙內史。羊希爲廣州刺史。請其女夫蕭惠徽爲長史。帶南海太守。皆其例也。亦有以幕僚而領縣令者。如劉榮祖參世子征虜軍事。領遂成令。周顥爲益州刺史。蕭惠開府主簿。帶肥鄉。成都二縣令。齊高帝爲南兗州刺史。荀伯玉爲鎮軍中兵參軍。帶廣陵令。梁武帝爲雍州刺史。張宏策爲錄事參軍。帶襄陽令也。

封公第三子義隆爲北彭城縣公。史例。諸帝皆不稱名。而以諱字代之。此紀義隆字屢見。蓋校書者妄改也。此書北彭城而後。但書彭城。蓋依永初詔書去之。

增都督南秦凡二十二州。案宋武於元興三年起義時。都督揚徐兗豫青冀幽并八州。又加督江州。義熙元年。加督荆司梁益寧雍涼。併前爲十六州。二年。加督交廣二州。五年。加北青北徐二州。八年。加督湘州。至是增督南秦。是爲二十二州也。胡三省注通鑑。不詳考本紀。輒舉南徐。南豫。南兗。郢以足之。不知晉時僑立諸州本無南字。且其時兗豫未分爲二。郢州宋孝建中始立。晉末無此州也。徐州雖分爲兩。然南燕克復之後。增置北徐州。未嘗以京口之徐爲南徐。胡所舉皆誤也。秦州僑立於漢中。稱南秦者。以別於仇池之北秦。晉末但稱秦州。史家據宋制追稱之。

又加公北雍州刺史。晉南渡。僑立雍州於襄陽。今將北伐關中。故遙立北雍州領之。義真既還。爲佛佛虜所迫。卽赫連勃勃也。古讀佛如彌。彌勃聲相近。

武帝紀下

永初元年七月。平西將軍乞佛熾盤。乞佛卽乞伏也。

八月。諸舊郡縣以北爲名者。悉除。寓立於南者。聽以南爲號。案。義熙十二年。以徐州之彭城、沛、蘭陵、下

邳、兗州之高平、魯、泰山諸郡封宋國。此寓立於南之郡也。十三年。以徐州之北琅邪、北東莞、北東海、北

譙、北梁、豫州之北潁川、北南頓諸郡益宋國。此以北爲名之郡也。晉世僑置郡縣。皆無南名。州郡志稱

晉明帝立南下邳郡。成帝立南沛郡。又云南義陽太守。晉未以義陽流民僑立。又云南河東太守。晉成

帝咸康三年。征西將軍庾亮以司州僑戶立諸南字。皆永初以後所加。而休文追稱之。非晉時已有此

名也。晉志。元帝以江乘置南東海、南琅邪、南東平、南蘭陵等郡。分武進立南彭城郡。明帝又立南沛、南

清河、南下邳、南東莞、南平昌、南濟陰、南濮陽、南太平。當作廣平南泰山、南濟陽、南魯等郡。皆永初以後所加。

唐人修晉史者。誤切爲晉制。殊憤憤矣。

三年二月。左衛將軍張紀爲湘州刺史。紀當作邵。

少帝紀

武帝長子也。案。紀傳書諸帝。皆稱廟號。獨此紀書武帝者四。而仍有稱高祖者。又它篇例稱魏爲索虜。

而此紀一云魏軍克滑臺。一云魏主拓跋嗣薨。全非休文之例。又如義熙十二年正月。以豫章公世子

爲西中郎將、豫州刺史。三月，除征虜將軍、徐兗二州刺史，鎮京口。十四年六月，除中軍將軍、副貳相國府。若宜見於本紀，而略不及，卷末無史臣論，其非休文書顯然。蓋此篇久亡，後人雜采它書以補之，故義例乖舛如此。又文帝紀首稱武帝第三子，孝武帝紀稱文帝第三子，前廢帝紀稱孝武帝長子，明帝紀稱文帝第十一子，後廢帝紀稱明帝長子，順帝紀稱明帝第三子，以至武三王、文九王、文五王、孝武十四王、明四王，二凶傳篇首皆稱諡，餘文則仍稱廟號。此於史例殊爲可議。或後來校書者以意輒改，非休文本意也。長沙王道憐傳稱高祖中弟臨川王道規傳稱高祖少弟，此當是休文本文。

景平二年五月，江州刺史檀道濟、揚州刺史王弘入朝。案：是時道濟爲南兗州刺史，非江州。弘爲江州刺史，非揚州也。揚州治蓋下時，以司空徐羨之領之，紀所書皆誤。

文帝紀

改授都督荆益寧雍梁秦六州、豫州之河南廣平、揚州之義成松滋四郡諸軍事，西中郎將、荊州刺史。永初元年，進督北秦，并前七州。又進督湘州。案：宋世荊州刺史常都督荆湘雍益梁秦南北秦八州諸軍事，惟謝晦不督梁州。臨川王義慶、南郡王義宣不督湘州，故但云七州。義宣後亦進督湘州。雍州刺史常都督雍梁南北秦四州，惟劉道產止督三州，不督北秦也。州郡志止有秦州，無南北之分。今考秦州本治隴西，晉南渡後，寄治漢中，常以梁州刺史兼之，是爲南秦，卽志所載秦州也。仇池氏楊氏世授北秦州刺

史其地不入版圖。故不載於志。然南北秦之名。昉於何代。史家宜詳述之。不應竟闕。晉志云。江左分梁爲秦。寄居梁州。又立氏池爲北秦州。則北秦之名。東晉已有之。蓋自義熙三年授楊盛始矣。南徐。南兗之名。皆起宋初。則秦州加南字。亦必在永初以後矣。

元嘉六年五月。以撫軍司馬檀道濟爲益州刺史。案檀道濟時爲江州刺史。未嘗除益州。此當爲劉道

濟也。監本作劉

九月於秦州置隴西。宋康二郡。劉道產傳同案州郡志。秦州無宋康郡。又紀稱元嘉九年於廣州立宋康郡。

是同時有兩宋康矣。

十八年省南徐州之南燕。濮陽。廣平郡。案州郡志。南徐州有南濮陽郡。不言何時省併。與紀不相應。志

又不載南燕郡。僑立本末。考晉書謝玄傳云。都督徐兗青三州。揚州之晉陵。幽州之燕國。諸軍事。燕國

與晉陵連文。疑卽僑立於晉陵界。虞邱進傳元興三年從定京邑除燕國內史

二十七年四月。安北將軍徐兗二州刺史武陵王贊當作諱降號鎮軍將軍。案孝武紀亦云。坐汝陽戰敗。

降號鎮軍。及以百官志證之。則中鎮撫三號比四鎮。班在四安四平之上。由安北改鎮軍。乃是敘遷。非

左降也。至次年降號北中郎將。乃爲真降耳。

二十九年九月。撫軍將軍徐兗二州刺史蕭思話加冀州刺史。兗州如故。是時冀州刺史張永失律。思

話爲統帥亦當任咎。故解徐州。除冀州刺史。代永。仍兼領兗州也。紀所書未核。

孝武帝紀

徙都督雍梁南北秦四州。荊州之襄陽。竟陵。南陵。順陽。新野。隨。六郡諸軍事。南陵當作南陽。

元嘉三十年六月。以司州刺史魯爽爲南豫州刺史。案。是時無南豫州。南蓋衍文也。自元嘉二十二年。

罷南豫州并壽陽。至孝武大明三年。始復分置。中間無南豫者計十年。

大明五年四月。雍州刺史海陵王休茂殺司馬庾深之。舉兵反。義成太守薛繼考討斬之。案。休茂傳。繼考爲休茂盡力攻城。及休茂死。詐稱立義。乘驛還都。事泄伏誅。則繼考乃黨於休茂者。紀所書誤矣。南史云。參軍尹元義起義。斬之。爲得其實。

明帝紀

泰始元年。將肆梟獍之禍。聘商頓之心。商謂商臣。頓謂冒頓也。

後廢帝紀

秦豫元年閏月。割南豫州南汝陰郡屬西豫州。西豫州廬江郡屬豫州。案。州郡志。秦豫元年。以南汝陰度屬豫州。豫州之廬江度屬南豫州。初無西豫之名。然南史。廬陵王義真傳。稱得志日。以慧琳道人爲西豫州刺史。南齊書。張岱傳。宋明帝初。以岱堪幹舊才。除使持節督西豫州諸軍事。輔國將軍。西豫州

刺史南齊州郡志太祖以西豫吏民寡刻分置兩州損費甚多又永明四年冠軍長史沈憲啓二豫分置以桑棵子亭爲斷潁川汝陽在南譙歷陽界內悉屬西豫廬江居晉熙汝陰之中屬南豫求以潁川汝陽屬南豫廬江還西豫則當時本有西豫之稱殆以壽陽故稱西府因以西豫呼之而宋齊二志不以西豫標目者以其未著甲令也南齊書魚腹侯子響傳前稱出爲豫州刺史後稱在西豫時

順帝紀

昇明三年正月新除給事黃門侍郎蕭諱爲雍州刺史謂文惠太子也約書成於永明六年其時武帝無恙而不敢斥言宮諱其於諸王則名之

三月崇太傅爲相國總百揆封十郡爲齊公宋書稱齊高帝曰齊王武帝曰齊王世子此變其文云太傅者不得云以齊王爲齊公也下文云以中軍大將軍諱爲南豫州刺史齊公世子副貳相國亦變其文避不辭也

律志

律志序自孟堅合律麻爲一志後之作史者皆因之休文序例不言更分爲二則亦因固彪之舊矣此志三卷首篇當題律麻上次篇爲中末篇爲下今以首篇爲律志下二篇爲麻上麻下蓋後人妄改非休文之旨也序爲八志總例列於卷首著作之體宜爾汲古閣本題作律志尤爲乖妄

黃初中鑄工柴玉巧有意思。形器之中多所造作。協律都尉杜夔令玉鑄鐘。其聲清濁多不中法。數毀改作。玉甚厭之。謂夔清濁任意更相。訴白於魏王。此魏王謂魏武也。魏武當國之時。安得有黃初之號。蓋采三國志夔傳之文。而誤會其旨也。考夔傳先云太祖以夔爲軍謀祭酒。參大樂事。教習講肄。備作樂器。後云黃初中爲太樂令。協律都尉。此言夔所終之官也。後又云漢鑄鐘工柴玉云云。乃追敘夔造樂器時。與玉有卻。而文帝愛待玉。因不悅夔之由。非謂鑄鐘在黃初中也。休文博識。何不子細乃爾。

麻志上

其冬下旬。夕在張心。暑也。暑也當作署之。四分乾象術俱有此文。隋書刑法志。晦朔。八節。六齊。月在張心。日竝不得行刑。月在張心。非推步不能知。故司天署其日言於朝。古人之慎刑如此。

晉江左時侍中平原劉智。智字子房。司空寔之弟也。仕武帝朝。非江左時志誤。

禮志一

書曰。若稽古帝舜。曰重華。建皇授政改朔。考太平御覽八十一卷。引尚書中候。考河命篇云。曰。若稽古帝舜。曰重華。欽翼皇象。又李善文選注。引尚書中候云。建黃授政改朔。是此一十五字。皆出中候。高堂隆所引。偶脫中候二字。朱錫鬯欲移此文於舜典之首。以代姚方興二十八字。殆非也。建皇。文選注作建黃。皇甫謐謂以土承火。色尚黃也。此作皇。疑誤。

禮志二

司徒長史王申。申當作甲。王甲李乙丙丁皆設為姓名。毛本作王申。尤誤。監本正作王申。

豐浴謂以香薰草藥沐浴也。周禮本作豐。豐即覺之省也。薰覺聲相近。

晉孝武太元元年。崇德太后褚氏崩。元年當作九年。字形相涉而譌。

大學博士徐恭議。晉志作徐藻。

故成風顯夫人之號。昭公服三年之喪。昭公。徐廣傳作僖公。然成風之薨。不在僖公之世。且安帝於李

后為祖母。非僖公於成風之比。竊謂當是文公之誤也。

謂應同於為祖母後。齊衰朞。徐廣傳作齊衰三年。

博士邱邁之議。案。吳商議。閏月亡者。應以本正之月為忌。謂正閏論雖各有所執。商議為允。此條當有

脫文。商議主六月為忌。未見有主七月者。何云各有所執乎。

禮志五

晉武帝問侍臣。旄頭何義。彭推對曰。秦國有奇怪。觸山截水無不崩潰。唯畏旄頭。故武士服之。案。史記

秦本紀。文公伐南山大梓。豐大特。正義引錄異傳云。秦文公時。雍南山有大梓樹。文公伐之。樹斷。中有

一青牛出。走入豐水中。其後牛出豐水中。使騎擊之。不勝。有騎墮地。復上。髮解。牛畏之。人不出。故置鬘

頭。漢魏晉因之。彭推之說。蓋出於此。

樂志一

東平憲王蒼總定公卿之議曰。宗廟宜各奏樂。不應相襲。所以明功德也。承文始五行武德。爲大武之舞。又制舞哥一章。薦之光武之廟。案。范史。明帝永平三年十月。烝祭光武廟。初奏文始五行武德之舞。不云大武之舞。東觀書載東平王蒼議。雖有宜曰大武之舞一語。而下文卽云不宜以名舞。其所制歌詩。又仍稱武德舞。則蒼定議。正謂宜名武德之舞。所云廟樂不相襲者。特謂樂章不宜沿舊辭耳。故明帝詔稱驃騎將軍議。可進武德之舞如故也。休文似未審上下文義。雖刪取東觀書。卻失東觀之旨。

哥師尹胡能哥宗廟郊祀之曲。說文。哥。聲也。古文以爲譌字。篇中樂歌字皆作哥。蓋用古文。

晉中書令王珉與嬖婢有情。愛好甚篤。嬖捶婢過苦。嬖卽嫂字。禮。食三老五更於太學。蔡邕以爲五更也。列子黃帝篇。禾生子伯出行。宿於田更商邱開之舍。注。更當作叟。莊子達生篇。視其後者而鞭之。崔譔本。鞭作趨。云匿也。史記韓世家。虜得韓將饒申。差於濁澤。徐廣云。饒一作鯁。則更叟二文相通久矣。王右軍帖亦以嬖爲嫂字。

空侯初名坎侯。言其坎坎應節奏也。後言空者。訛也。予謂坎空聲相近。說文引詩。鞀鞀舞我。鞀鞀卽坎坎也。而鞀卽从鞀得聲。鞀與鞀同則坎之爲空。又何疑焉。休文精於四聲。而未達四音相轉之理。故動多窒

礙。

天文志一

周天一百七萬一千里。一度爲二千九百三十二里七十一步二尺七寸四分四百八十七分分之三百

六十二。每度里步尺寸分數皆以四分舊術推之。置周天里數四因之爲實。千四百六十一爲法。如

法而一。得二千九百三十二里。餘數以三百乘之三百步爲里也爲實。如法得七十一步。餘數又以六乘之六尺

爲步也爲實。如法得二尺七寸四分又千四百六十一分之一千八十六。卽四百八十七之三百六十二

也。分母分子皆以三約之

則天徑三十二萬九千四百一里一百二十二步二尺二寸一分七十一分分之十。以周百四十二徑

四十五之率求之。當云徑三十三萬九千四百一里一百二十二步三尺二寸一分七十一分分之九

也。此文尙有差誤。

天體圓如彈丸。而陸績造渾象。其形如鳥卵。今歐邏巴橢圓之說。似出於此。

劉向五紀說夏曆。以爲列宿日月皆西移。列宿疾而日次之。宋儒言日月五星皆左旋。日行速。月行遲。

蓋本於此。

案。此說應作軒昂之軒。而作昕。所未詳也。昕軒聲相近。休文未悟古音。故云未詳。

符瑞志下

晉成帝咸康八年。廬江春穀縣畱珪。夜見門內有光。取得玉鼎二枚。案晉志。春穀縣屬宣城。不屬廬江。蓋南渡後。曾僑立廬江郡於此。而史失載爾。志又載。穆帝永和元年。廬江太守路永上言。於春穀城北。見水岸邊有紫赤光。永和。在咸康之後也。又云。成帝咸和元年。宣城春穀縣山岸崩。獲石鼎。咸和在咸康之前。其時春穀尚屬宣城。蓋自蘇峻祖約作亂之後。淮南流人始移江南。此廬江置郡。必於咸和四年以後矣。

五行志五

元帝太興初。又有女子陰在腹上。在揚州。性亦淫。京房易妖曰。人生子陰在首。天下大亂。在腹。天下有事。在背。天下無後。此下又一條云。晉中興初。有女子。其陰在腹。當齊下。自中國來江東。性甚淫。而不產。京房易妖曰。人生子陰在首。天下大亂。在腹。天下有事。在背。天下無後。此一事兩見。當刪而未刪者也。

州郡志一

何徐州郡。案何承天。徐爰皆撰宋書。竝有州郡志。承天撰史。在元嘉之世。所撰志。惟天文律曆。餘皆奉朝請山謙之作也。爰書起自義熙之初。訖於孝武之末。休文志州郡。大較以孝武大明八年爲正。蓋因徐氏之舊。而亦兼載宋末事。然如湘州之廣興。臨慶。既皆依明帝改名。而江州之晉安。何以不用改名。

此亦自亂其例矣。

揚州 丹陽尹秦鄣郡治。今吳興之故鄣縣。案漢志但言故鄣郡不言秦所置。裴駟注史記始以鄣郡當秦三十六郡之一。此志與裴說同。

海寧令孫權分歛爲休陽縣。晉武帝太康元年更名。案太平寰宇記引邑圖云吳避孫休之名改爲海陽縣。晉平吳之後改爲海寧縣。志失書吳改名一節。

南徐州 永初二年郡國志又有南沛、南下邳、廣平、廣陵、盱眙、鍾離八郡。今數之止六郡。蓋脫海陵、山陽二郡。

南蘭陵太守 案休文志州郡於諸州書去京都水陸若干於諸郡則書去州水陸若干去京都水陸若干。唯州所治郡不云去京都水陸若干者。已見於州也。南徐州領郡十七。南東海爲州所治。此外則南琅邪、晉陵、義興皆有實土。故有水陸里數。南蘭陵以下十三郡有戶口而無水陸里數者。僑寓無實土也。諸州皆放此。

廣陵 令前漢屬泗水。陵當作凌。廣字衍。

南彭城太守 江左僑立。晉明帝又立南下邳郡。成帝又立南沛郡。孝武以二郡並併南彭城。案宋武帝先世彭城人。過江居丹徒縣之京口里。永初元年詔曰。彭沛、下邳三郡首事所基。情義繙繙。彭城桑梓。

本鄉。加隆攸在。優復之制。宜同豐沛。其沛郡。下邳可復。租布三十年。此則彭、沛、下邳皆僑立於京口矣。劉康祖、彭城呂人。劉毅、彭城沛人。劉粹、沛郡蕭人。史稱其家在京口。孝穆、趙皇后下邳僮人。家亦必在京口也。劉穆之、秀之、東莞莒人。徐邈、東莞姑幕人。孟懷、玉平昌安邱人。檀詔、高平金鄉人。史亦言其世居京口。卽此州之南東莞、南平昌、南高平矣。僑郡無實土。故不言所治。

文帝八年。省廣平郡爲廣平縣。當云文帝元嘉十八年。此脫三字。

徐州。元徽元年。分秦郡之頓邱、梁郡之穀孰。歷陽之鄼。立新昌郡。案南齊書州郡志。新昌郡領頓邱、

穀孰、尉氏三縣。無鄼縣。

平昌太守。後廢。帝元徽元年立。平昌當作新昌。

南兖州。南濮陽、南泰山、濟陽、南魯山郡。南魯下衍山字。

永初郡國又有輿、肥如、路、真定、新市五縣。竝二漢舊名。肥如屬遼西。路屬上黨。路當作潞。

新市、永初郡國云四縣。本屬遼西。新市下有脫文。當云二漢晉屬中山。

孝武大明五年。分廣陵爲沛郡。治肥如縣。時無復肥如縣。當是肥如故縣處也。二漢晉太康地志。竝無肥如縣。案志於廣陵郡下云。肥如漢舊名。屬遼西矣。此云竝無肥如者。謂沛郡自漢晉以來。竝無肥如

一縣。非謂漢無肥如也。肥如本遼西縣名。因晉末僑立遼西郡於廣陵界。後經省併。故廣陵得有肥如。

縣符瑞志。元嘉十九年。廣陵肥如石梁澗中出石鍾九口。何承天修志。訖於元嘉二十年。其時尙有肥如。故志云何有肥如。新市。然則肥如之省。其在拓跋南侵之後乎。此條云時無復肥如者。謂孝武之時。廣陵已無肥如。乃以其地立沛郡耳。細檢此二條之文。初無矛盾。說者多援以爲口實。是不然矣。

沛郡宜是大明五年以前省。其時又立也。案徐州篇云。文帝元嘉中。分南沛爲北沛。屬南兗。而南沛猶屬南徐。孝武大明四年。以南沛併南彭城。與此文可互證。蓋當時沛郡流人。或家江北。或家江南。初無實土。而徐州刺史亦兼領江北。迨文帝分南徐。南兗二州。畫江爲界。故以南沛之寄治廣陵者。別爲北沛。屬之南兗。而江南之南沛。仍如故也。孝武時。省江南之南沛。而以廣陵之北沛爲南沛。又分肥如地立爲郡治。而南沛始有實土矣。何云北沛。徐云南沛。各據當時之名書之。其實只是一郡。而休文所云大明五年以前省者。乃省江南之南沛。非省江北之沛也。肥如今之天長縣。

北淮太守宋末僑立。淮下脫陽字。

兗州。永初郡國有東郡、陳留、濮陽三郡。而無陽平郡。領白馬、涼城、東燕三縣。白馬三縣當屬東郡。此領字上蓋脫東郡二字。

州郡志二

南豫州。永初二年。分淮東爲南豫州。治歷陽。淮西爲豫州。此下當有治壽陽三字。

文帝元嘉七年又分五年割揚州之淮南宣城又屬焉徙治姑孰。此條當有脫文以本紀及南平王鑠傳考之文帝元嘉七年罷南豫州并豫州十六年復分豫州之淮南爲南豫州二十二年復南豫州并壽陽孝武大明三年分淮南北復置二豫州五年移南豫州治淮南於湖縣于湖卽姑孰也。當云文帝元嘉七年合二豫州爲一十六年又分二十二年又合孝武大明三年又分五年割揚州之淮南宣城又屬焉則首尾相應矣。

秦始皇四年以揚州之淮南宣城爲南豫州治宣城。案帝紀秦始皇五年分豫州揚州立南豫州蓋分豫州之歷陽揚州之淮南宣城也。事見廬江王禕傳志失書歷陽郡又誤以爲四年事。

七年復分歷陽淮陰南譙南兗之臨江立南豫州。案本紀孝武大明七年割歷陽秦郡置臨江郡。以歷陽爲江秦郡之懷德二縣置前廢帝永光元年罷臨江郡。此後未見復置之文。

南汝陰太守江左立。此汝陰治合肥。本紀秦始皇七年妖寇宋逸攻合肥殺汝陰太守王穆之是也。

南梁太守晉孝武太元中僑立於淮南。此淮南謂壽春也。東晉故曰壽陽避鄭太后諱。向靖傳義熙八年督馬頭淮西諸軍事龍驤將軍安豐汝陰二郡太守梁國內史戍壽陽劉粹傳永初三年督豫司雍并四州南豫州之梁郡弋陽馬頭三郡諸軍事豫州刺史領梁郡太守鎮壽陽。此梁郡僑立壽陽之證也。壽春本漢舊縣自太元移梁郡於此并立睢陽縣爲治所而壽春遂不爲縣名矣。

安帝始有淮南故地，屬徐州。武帝永初二年，還南豫。案：太元初，苻堅兵敗，已復淮南，其後仍沒於慕容氏。至安帝義熙中，劉裕平南燕，淮南復入版圖。志云始有者，晉自南渡以後，壽陽屢復屢失，至是始爲晉有也。此地本屬揚州江左，嘗以豫州刺史鎮之。義熙中始改屬徐州。宋初仍屬豫州，故云還。

文帝元嘉二十五年，以豫部蠻民立茹由、樂安、光城、雩婁、邊城、史水、開化、邊城七縣，屬弋陽郡。邊城字

重出，當去其一。雩婁下邊城兩字當刪。

徐志有邊城兩，領雩婁、史水、開化、邊城兩縣。此上下兩字皆誤，詳其文義，謂立邊城郡，領雩婁等四縣

也。上兩字疑郡字之譌，下兩字疑四字之譌。

豫州，永初郡國，何徐寄治睢陽。睢陽卽壽陽也。晉末，僑立南梁郡於壽陽，并置睢陽縣。後乃省壽陽

入睢陽，名實之混淆如此。凡豫州屬郡，言去州水陸若干者，皆據壽陽而言。

江州，豫寧侯相。漢獻帝建安中立，吳曰要安。晉武帝太康元年更名。案：晉志，豫章郡有豫章縣，無豫

寧。此轉寫之譌。考王曇首以誅徐羨之等功，追封豫寧縣侯。子僧綽、孫儉皆襲豫寧之封。此志以豫寧

爲侯國，正相符合。南史僧綽及儉傳，竝稱豫寧侯。而宋書僧綽傳、齊書儉傳，乃作豫章，亦誤也。南齊志

豫章郡亦有豫寧縣。南史王亮封豫寧縣公，裴之橫封豫寧侯。則豫寧縣名自晉訖梁未之改也。要安

當爲西安之譌。太平寰宇記，武寧縣，古西安縣也。後漢建安中分海昏立西安縣。晉太康元年改爲豫

寧三國志潘璋傳遷豫章西安長是吳時縣名西安之證

南康公相案劉穆之以佐命功追封南康郡公子孫世襲晉宋之制郡為王國則置內史為公國則置

公相其職與太守同此郡既為公國而所領南康縣又稱公相蓋其時別有封南康縣公者

南新蔡太守江左立去州水二百晉志孝武因新蔡郡入於漢九江王黥布舊城置南新蔡郡即此郡

也元和郡縣志九江故城在黃梅縣西南七十里漢九江王黥布所築

青州廣城令漢舊縣當作歷城

司州恆農領恆農陝宜陽颍池盧氏曲陽凡七縣今數之止六縣

河內寄治河南領溫野王軹河陽沁水山陽懷平皋朝歌凡十縣東京兆寄治滎陽領長安萬年新豐藍

田蒲版凡六縣合十六縣今數之河內止九縣東京兆止五縣

州郡志三

荊州刺史漢治武陵漢壽魏晉治江陵案魏之荊州治襄陽不能得江陵也志誤

文帝世又立宋安左郡案司州環水縣下云宋安本縣名孝武大明八年省義陽郡所統東隨二左郡

立為宋安縣屬義陽明帝立為郡而豫州蠻傳亦云世宗初即位西陽蠻田益之義之等起義攻郢州

克之以蠻戶立宋安光城二郡以義之為宋安太守是宋安郡實明帝所立矣此云文帝立宋安左郡

而南豫州光城左郡下亦云。大明八年省光城左郡爲縣。屬弋陽。則兩郡先已有之。孝武時省爲縣。至明帝而復立也。

巴東公相譙周巴記云。初平六年。初平紀元無六年。巴記誤。

荆州帳下司馬趙曄。荆州當作益州。

建議分巴郡諸縣。漢安以下爲永寧郡。建安六年。劉璋改永寧爲巴東郡。漢安當作安漢。考晉宋二志。

安漢屬巴西。不屬巴東也。據華陽國志。魚復。胸忍。諸縣。初平中始分爲固陵郡。建安六年。魚復。蹇。允白。

璋爭巴名。乃改固陵爲巴東。若永寧之分。雖與固陵同時。其後改稱巴西。與巴東不相涉。

汝陽太守何志新立。先屬梁州。梁一作渠。渠誤。文帝元嘉十一年度案。南齊書蠻傳。汝陽本臨沮。西界二百里。

中水陸迂狹。魚貫而行。有數處不通騎。而水白田甚肥腴。桓溫時割以爲郡。西北接梁州新城。東北接。

南襄陽。南接巴巫。然則汝陽郡晉時已有之。何承天以爲新立者。非也。

南河東太守。晉成帝咸康三年。征西將軍庾亮以司州僑戶立。案。晉志。渡江後。以河東人南寓於漢武。

陵郡。孱陵縣界上明地。僑立河東郡。卽此郡也。桓沖爲荆州刺史。都督司州之河東軍事。亦指此。宋初。

僑立諸郡。例加南字。

湘州。晉懷帝永嘉元年。分荆州之長沙。衡陽。湘東。邵陵。零陵。營陽。建昌。江州之桂陽八郡立。案。晉志。湘。

州始置凡九郡有始安始興臨賀而無營陽建昌與此不合考營陽郡晉志以爲穆帝立此志亦云江左分零陵立則懷帝時不應有營陽矣

重安侯相案南齊書王敬則傳始封重安縣子邑三百五十戶後增封爲千三百戶又增至二千五百戶又加五百戶戶增則爵宜序遷據此志有重安侯相知敬則在宋末已封重安侯而傳不書者漏也齊初封敬則尋陽郡公止三千戶又知二千餘戶之必爲侯國矣

雍州元嘉二十六年割荆州之襄陽南陽新野順陽隨五郡爲雍州案隨郡本屬荆州孝武建元年度屬郢前廢帝永光元年度屬雍明帝泰始五年還屬郢改爲陽隨後廢帝元徽四年度屬司州見下是元嘉廿六年隨未嘗屬雍也又考宋時雍州刺史如劉遵考劉道產蕭思話武陵王駿俱稱都督荆州之南陽竟陵順陽襄陽新野隨六郡諸軍事蓋在元嘉二十六年以前雍州未有實土也隨王誕以元嘉二十六年除刺史柳元景以元嘉末孝建初兩除刺史武昌王渾以孝建元年除刺史劉延珍以孝建二年除刺史竝云都督荆州之竟陵隨二郡諸軍事不及南陽等四郡者已在雍州管內也而隨郡仍繫之荆州可證元嘉時隨未嘗屬雍矣至大明二年除海陵王休茂五年除永嘉王子仁及劉秀之八年除晉安王子勛竝稱都督竝州之竟陵隨二郡則此二郡孝武時屬郢州之證也及前廢帝永光元年五月割郢州隨郡屬雍州自後湘東王彧沈攸之除雍州刺史但云都督郢州之竟陵不言

隨郡。至明帝泰始五年四月，隨郡又改屬郢州。故張與世傳復云都督郢州之竟陵、隨二郡也。袁詒以永光元年九月，張永以泰始四年除刺史。本傳稱都督郢州之竟陵、隨二郡。巴陵王休若以泰始二年除刺史。本傳稱都督荊州之竟陵、隨二郡，皆誤。

沔陽。令晉武帝太康五年立，屬南鄉。仍屬順陽。案晉志順陽郡無沔陽。

華山。太守胡人流寓。孝武大明元年立。案梁書康絢傳，宋永初中，康穆舉鄉族三千餘家入襄陽之峴南。宋爲置華山郡。藍田縣寄居於襄陽。是華山立郡不始於孝武也。孝武始分實土郡縣，以爲僑郡縣境。故史以爲孝武所立。

州郡志四

寧州。南廣太守晉懷帝一本作武帝非是分朱提立。據晉書王遜傳，分朱提爲南廣，亦遜所請也。

西平。太守晉懷帝永嘉五年，寧州刺史王遜分興古之東立。何志晉成帝立，非也。案王遜傳不言分立。

西平郡。華陽國志，西平郡刺史王遜時，鑿量保盤南，遜出軍攻討，不能克。遜薨後，刺史尹奉募徼外夷，刺殺量，盤南平，乃割興古、雲南之盤江、南如、南零三縣爲郡。是西平非遜所分矣。

東河陽。太守晉懷帝永嘉五年，寧州刺史王遜分永昌、雲南立。案王遜傳不言分立東河陽郡。

梁水。太守晉成帝分興古立。案王遜傳，遜以地勢形便上，分永昌爲梁水郡。此云晉成帝立，又以爲分

興古地皆不合。洪亮吉曰：案水經注，劉禪分興古之盤南置郡於梁水縣，則蜀時已有此郡。東晉復立耳。

百官志上

魏及晉西朝置十九人，江左初減為九人，皆不知掌何經。案魏晉十九博士固無可考，若江左之九人，則禮志載大興初議欲修立學校，唯周易、王氏、尚書、鄭氏、古文、孔氏、毛詩、周官、禮記、論語、孝經、鄭氏、春秋、左傳、杜氏、服氏各置博士是也。論語孝經合置博士一人，何云不知所掌乎。

百官志下

寧朔至五威、五武將軍。五威者，建威、振威、奮威、揚威、廣威也。五武者，建武、振武、奮武、揚武、廣武也。寧朔將軍班在五威五武之上，而前卷敘列將軍獨遺之，此傳寫偶脫一行耳。南齊志：寧朔將軍列於輔國之後，據此志官品先後次之，似寧朔當在龍驤之後矣。

廿二史考異卷二十四

宋書二

后妃傳

少帝司馬皇太妃。以前廢帝何皇后，後廢帝江皇后例之，當稱司馬皇后。目錄亦書皇后，而傳作太妃，必刊本之譌。

吳興長公主諱榮男。史家之例，惟帝后書諱，諸王皆直書名。休文此傳云：吳興長公主諱榮男，臨川長公主諱英媛，豫章康長公主諱欣男，新蔡公主諱英媚，皆以公主而稱諱，非禮也。公主可以不名，即欲名之，當如本傳會稽宣長公主與弟，義興恭長公主惠媛，東陽獻公主英娥之例，不應自亂其法。南史因休文元文，不加刊削，均失之矣。

劉穆之傳

臣契闊屯秦，旋觀始終。按：契闊字見於詩擊鼓篇。毛傳云：契闊，勤苦也。六朝人好用此二字，如王弘傳、綢繆先眷、契闊屯夷、范泰傳、契闊戎陣、顛須艱危、王僧達傳、契闊歷朝、綢繆眷遇、顏師伯傳、契闊大難、宜蒙殊報、劉延孫傳、契闊唯舊、幾將二紀、南齊書褚淵傳、契闊屯夷、綢繆終始、王儉傳、契闊艱運、義重

常懷皆取勤苦之義。

王弘傳

奏彈謝靈運曰。世子左衛率康樂縣公謝靈運。力人桂興。淫其嬖妾。殺與江浹。棄尸洪流。請以見事免靈運所居官。按靈運傳。遷相國從事中郎。世子左衛率。坐輒殺門生免官。卽其事也。六朝人所謂門生。卽僮僕之屬。然徐湛之傳。門生千餘人。皆三吳富人子。姿質端妍。衣服鮮麗。每出人行遊。塗巷盈滿。泥雨日。悉以後車載之。靈運傳又云。奴僮既衆。義故門生數百。則門生與僮奴亦自有別。南史王琨傳。琨爲吏部郎。吏曹選局。貴要多所屬。請琨自公卿下至士大夫。例爲用兩門生。王思遠傳。內外要職。竝用門生。陸慧曉傳。王晏選門生補內外要局。是門生亦有入官之路。高於僮僕一等也。

檀道濟傳

以建義勳。封吳興縣五等侯。按五等之封。但假虛號。未有戶邑。蓋出一時權宜之制。如長沙王道憐。初封新興縣五等侯。後封新渝縣男。食邑五百戶。檀道濟初封吳興縣五等侯。後封作唐縣男。食邑四百戶。王鎮惡初封博陸縣五等子。後追封漢壽縣子。食邑五百戶。向靖初封山陽縣五等侯。後封安南縣男。食邑五百戶。劉粹初封西安縣五等侯。後封攝陽縣男。食邑五百戶。孟龍符初封平昌縣五等子。後封臨沅縣男。食邑五百戶。劉鍾初封安縣五等侯。後封永新縣男。食邑五百戶。虞邱進初封龍川縣五

等侯。後封望蔡縣男。食邑五百戶。胡藩初封吳平縣五等子。後封陽山縣男。食邑五百戶。是五等侯尙在縣子縣男之下也。

又增督青州徐州之淮陽。下邳。琅邪。東莞。五郡諸軍事。文云五郡。而實四郡。當有脫誤。謝晦傳稱青州徐州之淮陽。下邳。琅邪。東莞。七郡。七字亦誤。

遷都督江州之江夏。豫州之西陽。新蔡。晉熙。四郡諸軍事。征南大將軍。江州刺史。江州下當有荊州二字。是時江夏屬荊州。孝武紀稱荊州之江夏是也。

謝晦傳

及同黨庾登之。孔延秀。周超等竝伏誅。按下文云。庾登之。殷道鸞。何承天竝皆原免。則登之實未誅也。

王鎮惡傳

索虜野坂戍主異朔公。異當作黑。黑朔公子子栗磾也。栗磾爲河內鎮將。好操黑稍。以自標。宋武帝與之書。題曰黑稍公。麾下魏因拜爲黑稍將軍。朔稍聲相近。亦卽槩字。

檀韶傳

高平金鄉人也。韶與弟祇。道濟三人各有傳。傳首皆云高平金鄉人。王弘與弟曇首。曇首子僧綽。弘子僧達各有傳。傳首皆云琅邪臨沂人。謝瞻與弟晦。謝弘微與子莊各有傳。傳首皆云陳郡陽夏人。劉懷

肅與弟懷慎各有傳。傳首皆云彭城人。顏延之與子竣各有傳。傳首皆云琅邪臨沂人。袁淑與兒子顓
榮各有傳。傳首皆云陳郡陽夏人。此類甚多。刪而存其一可矣。

都邑既平。爲鎮軍將軍。加寧遠將軍。是時宋武帝爲鎮軍將軍。詔爲其府參軍。不當云爲鎮軍將軍也。
依史例。當云轉鎮軍參軍。此傳寫之譌。非史本文之誤。寧遠則雜號將軍。班秩本卑。故詔以參軍得帶
之。

遷龍驤將軍。秦郡太守。北陳畱內史。按向彌。檀詔。檀祇。竝除秦郡太守。北陳畱內史。虞邱進亦除秦郡
太守。督陳畱郡事。而彌有成堂邑之文。則北陳畱與秦郡皆僑治堂邑矣。州郡志。秦郡有尉氏縣。又稱
永初郡。縣領平邱。外黃。離邱。浚儀諸縣。此皆陳畱縣名。可證晉末本有陳畱郡。殆義熙九年。土斷僑流
郡縣時。并入秦郡也。

向靖傳

名與高祖同。宋武帝王父名靖。當云名與高祖祖諱同。

劉懷慎傳

仍督江北淮南諸軍事。前將軍。南晉州刺史。晉當作青。是歲青州刺史檀祇卒於廣陵。故以懷慎代之。
高祖遷都壽春。晉書恭帝紀。元熙元年八月。劉裕移鎮壽陽。卽其事也。宋雖建國。猶在臣位。不當遽云

邊郡。

劉粹傳

封潁縣男。袁廷構曰：潁下脫陽字。州郡志：江夏郡有潁陽縣。徐羨之傳：作潁陽縣男。

孟懷玉傳

義熙八年，遷江州刺史。尋督江州豫州之西陽、新蔡、汝南、潁川、司州之松滋六郡諸軍事。庾悅傳亦云：六郡，今數之，止五郡。且松滋郡屬揚州，不屬司州。蓋有脫文也。考義熙初，何無忌都督江州，表稱司州之恆農、揚州之松滋二郡寄在尋陽。人戶雜居，竝宜建督。安帝從之。庾悅承無忌之後，而懷玉繼之，皆兼督恆農、松滋二郡，并豫州四郡。故云六郡。傳文當云司州之恆農、揚州之松滋。今本脫去五字耳。義熙土斷以後，省恆農、松滋二郡，皆爲縣。屬尋陽。故檀韶、王弘鎮江州，但云督豫州之西陽、新蔡二郡，不更言恆農、松滋也。

朱齡石傳

臧熹、敬皇后弟，咸服高祖之知人。南史：臧熹、敬皇后弟也。亦命受其節度。及戰剋捷，衆咸服帝知人。此文敬皇后弟下當有脫文。

尋進監益州、巴西、梓潼、宕渠、南漢中、秦州之安固、懷寧六郡諸軍事。按：巴西以下四郡，晉時屬梁州。宋

元嘉以後始改隸益州。酈石時為益州刺史而兼監梁州之四郡。秦州之二郡。故云六郡也。益州當為梁州。州下脫之字。以吉翰、張茂度傳證之。可見。安國懷寧二郡晉書地理志俱失載。

傅弘之傳

晉武帝太康三年復立靈州縣。按晉志北地無靈州縣。

垣護之傳

以為督冀州之濟南、樂安、太原三郡諸軍事。寧遠將軍冀州刺史。是時冀州寄治歷城。領廣川、平原、清

河、樂陵、魏郡、河間、頓邱、高陽、勃海九郡。而濟南、樂安、太原三郡乃在青州管內。太原郡寄治濟南。太原山境內。常以冀

州刺史兼督之。張永、申恬傳竝云督冀州青州之濟南、樂安、太原三郡諸軍事。冀州刺史。可證也。此冀

州下當有青州二字。

俄遷大司馬、輔國將軍、領南東海太守。大司馬下當有脫文。是時江夏王義恭以大司馬領南徐州刺

史。除護之為大司馬僚佐兼郡守。非遷大司馬也。

進督徐州之東莞、闕二郡軍事。時護之以青冀二州刺史鎮歷城。故事。青州刺史常兼督徐州之東安、

東莞二郡。則此闕文當為東安二字。

宗室傳

長沙王道憐。時北青州刺史劉該反。按此時青州之地尙爲慕容氏所據。北青州當僑立於徐州境。

代諸葛長民爲并州刺史。義昌太守。按晉末僑置并州於江北。義熙初劉道規除督淮北諸軍事。并州

刺史義昌太守道規移鎮江州。而諸葛長民代之。長民移青州。因以道憐代之。但假以軍號。仍領石頭

戍也。晉書長民傳不云爲并州刺史。蓋史之闕漏。永初九年。晉并州入南兗。

臨川王義慶。元嘉十六年改授都督江州之西陽。晉熙。新蔡三郡諸軍。衛將軍。江州刺史。當云豫州

之西陽。晉熙。新蔡。史脫豫州二字。

庾悅傳

盧循逼京都。以爲督江州。豫州之西陽。新蔡。汝南。潁川。司州之松滋。六郡諸軍事。建威將軍。江州刺史。

司州下有脫文。當云司州之恆農。揚州之松滋也。一本六郡作五郡。蓋校書者不知史有脫字。而以意

改之耳。

褚叔度傳

出爲使持節。監雍。雍。梁。南。北。秦。四州之南陽。竟陵。順陽。義陽。新野。隨。六郡諸軍事。征虜將軍。雍州刺史。是

時南陽六郡皆屬荊州。志於四州下脫去荊州二字。

子儼一作尙太祖第六女琅邪貞長公主。按后妃傳。王藻尙太祖第六女。臨川長公主。諱英媛。藻下獄

死。主再適豫章太守庾沖遠。未及成禮。而沖遠卒。琅邪、臨川俱稱第六女。恐有一誤。

張永傳

永及申坦竝為統府撫軍將軍。蕭思話所收。繫於歷城獄。時永為冀州刺史。而思話以徐兗二州刺史。持節監徐兗青冀四州。故云統府。褚叔度傳。交州刺史杜慧度以事言統府。時叔度以廣州刺史。都督交廣二州也。

起永督青州之東安、東莞二郡諸軍事。輔國將軍、青州刺史。按東安、東莞二郡屬徐州。不屬青州。當云督青州徐州之東安、東莞二郡。史脫徐州二字。以杜驥顏師伯傳證之。可知也。一本作樂安、東萊兩郡。元在青州管內。何須更書。此校書者以意妄改耳。

臧熹傳

子羨。尚書主客郎徐羨之征西功曹。為攸之盡節。事在攸之傳。徐羨當作沈攸。攸之傳所載功曹臧寅。即其人也。寅與寅同休文為齊臣。故於袁粲。沈攸之皆以反叛書。而臧寅為攸之盡節。特書以美之。直道之在人心。不可泯也。

徐廣傳

廣子豁。在良吏傳。按良吏傳。豁乃廣兄子。晉太子右衛率邀之子也。史脫兄字。

傅隆傳

遷御史中丞。按南齊書陸澄傳云宋世左丞羊玄保彈豫州刺史管義之譙梁羣盜免義之官中丞傳隆不糾亦免隆官此傳不載免官事殆糾而未行也。

范泰傳

順陽山陰人也。按州郡志順陽無山陰縣梁書范雲范縝傳竝云南鄉舞陰人南鄉與順陽本一郡似

山陰當為舞陰之譌而州郡志舞陰屬南陽未詳其故。

穎川陳載已辟太保掾而國子取為助教即太尉准之弟。准當作準史家避順帝諱改準為淮因譌為

淮耳荀伯子傳故太尉廣陵公陳淮亦準之譌。

荀伯子傳

故太保衛瓘本爵蕭陽縣公。蕭陽晉書作菑陽考晉書地理志不見此二縣名。

武王傳

義宣別有傳。義宣上當有義康二字。

廬陵王義真乃以義真行都督雍涼秦三州之河東平陽河北三郡諸軍事安西將軍雍州刺史。按

晉志河東平陽二郡屬司州河北縣本屬河東郡蓋是時析置為郡也三州下當有司州二字。毛德祖督司州

之河東平陽河
北見宋碑傳

又進督并東秦二州、司州之東安定、新平二郡諸軍事、領東秦州刺史。按東安定、新平二郡、暫置旋失。故不見於州郡志。然考晉志、安定、新平皆雍州屬郡。而營浦侯遵考傳云、長安平定、以督并州、司州之北河東、北平陽、北雍州之新平、安定五郡諸軍事。則此二郡當屬雍州、非司州矣。彼傳云五郡而數之、止四郡、蓋脫一郡。以此傳前後文參證之、則所脫者即河北郡也。

王華傳

以長弟終紹封。南史終作修。

何尚之傳

孟顓字彥重、本昌安人。按武帝紀稱平昌孟昶、昶族弟懷玉傳云平昌安邱人。南史謝靈運傳附見孟顓事、亦云平昌安邱人。此本字當爲平之譌、安下又脫邱字。

顓之尚太祖第四女臨海惠公主。按趙倫之傳、倫之孫情、尚文帝第四女海鹽公主、與臨海未審即一人否。或與趙離婚之後、再嫁何氏、又進封臨海也。

謝靈運傳

申譖事於周王。譖當作讚。申伯食采於謝、爲謝氏得姓之始。故引詩齊聲申伯王續之事。

造步兵而長想。步兵當作步邱。

作山居賦，并自注以言其事。按宋世文士以謝顏爲首，故各立專傳，而靈運傳載其兩賦，山居一篇，并自注亦詳載之。休文之傾倒於謝至矣。此例前史未有，繼之者張淵之天象，顏之推之觀我生，十七史中，唯此三賦有注耳。

兩習通沼，習字不見字書，訪之通人，亦無知者。

武二王傳

南郡王義宣。元嘉十三年，出都督江州豫州之西陵、晉熙、新蔡三郡諸軍事，鎮南將軍、江州刺史。西陵蓋西陽之譙州郡志，西陽本屬豫州。孝武孝建元年度郢州，明帝泰始五年又度豫，後又還郢。考漢之西陽，在淮水之南，卽今光山縣地。晉南渡後，荊州刺史庾翼表移西陽新蔡二郡荒民，就陂田於尋陽，而江州界內，遂有僑立之西陽郡矣。自後西陽與新蔡、汝南、潁川謂之豫州四郡，江州刺史常兼督之。義熙土斷，省汝南、潁川兩郡，又分廬江立晉熙郡，故自義熙十二年，訖元嘉之末，除江州督者，必兼督豫州之西陽、新蔡三郡也。孝武之世，晉熙王昶、晉安王子助、始安王休仁，除江州刺史，則云都督郢州之西陽、豫州之新蔡、晉熙三郡，其時西陽已度郢州矣。王景文以泰始二年除刺史，西陽尚屬郢州。及泰始六年，桂陽王休範出爲都督江郢司廣交五州，豫州之西陽、新蔡、晉熙、湘州之始興四郡

諸軍事、江州刺史。則西陽仍屬豫州也。元徽元年，晉熙王燮爲使持節，監郢州、豫州之西陽、司州之義陽、二郡諸軍事、郢州刺史。其時西陽尙屬豫州，而卻在郢州部內矣。

沈攸之傳

今遣新除使持節、督郢州之義陽諸軍事、平西將軍、郢州刺史黃回。按黃回傳，督郢州、司州之義陽諸軍事。此脫司州二字。

柳元景傳

除寧朔將軍、京兆廣平二郡太守。於樊城立府舍，率所領居之。時京兆、廣平二郡皆僑治襄陽。

沈慶之傳

領軍將軍劉湛之。之字衍。下文及湛之被收同。

蕭思話傳

聚黨於東莞發干縣。按州郡志，發干屬東安，不屬東莞。

南漢中太守蕭諱。此傳稱蕭諱者，齊高帝之父承之，追諡宣帝者也。略陽清水氏傳，思話使司馬蕭諱先驅進討，亦謂承之。

文五王傳

廬江王禕。都督廣交二州。荊州之始興臨安二郡諸軍事。平越中郎將。廣州刺史。按臨安非郡名。當云荊州之始興臨賀始安三郡。傳寫脫誤耳。州郡志於始興臨賀始安郡。竝云晉成帝度荊州。宋元嘉二十九年度廣州。據此傳。知元嘉二十九年。特以廣州刺史兼督此三郡。其地猶屬荊州也。

孝武十四王傳

始安王子眞。監廣交二州。始興始安臨賀三郡諸軍事。平越中郎將。廣州刺史。按是時始興三郡屬湘州。當云湘州之始興始安臨賀。此脫去三字。以臨海王子瑱傳證之。可知也。

王景文傳

高祖第五女新安公主。先適太原王景深。離絕。當以適景文。固辭以疾。故不成婚。按褚叔度傳。弟湛之。尙高祖第七女始安哀公主。主薨。復尙高祖第五女吳郡宣公主。吳郡主以姊繼妹。必是改醮。始始封新安。進封吳郡耳。徐湛之母會稽長公主。永初三年。詔稱永興公主。亦是始封永興。進封會稽也。王僧綽尙東陽獻公主。而王儉傳稱嫡母武康公主。當亦始封武康。進封東陽也。孝武女山陰公主。廢帝時改封會稽長公主。史所載獨此一事。餘皆無明文。

讀論語。至周監於二代。外祖何尙之戲之曰。耶耶乎文哉。六朝人呼父爲耶。梁世費翹詩云。不知是耶非。簡文謂翹不識其父。見顏氏家訓。今本應作旭。傳寫之譌。此亦以父名戲之也。說文。饘。有文章也。論語。郁乎

文哉。本當作穢。後人省去有旁。隸變為彘。荀彘字文若。王彘字景文。皆取斯義。讀此傳。知六朝論語本為彘字。今以郁夷字代之。音同而義別矣。

絢即答曰。草翁毛本作翁誤風必偃。南史云。草翁風必舅。蓋尚之子名偃。於絢為舅也。此作偃。乃校書者妄改。

殷孝祖傳

遷西陽王子尚撫軍寧朔將軍南濟陰太守。撫軍下營有脫文。是時子尚以撫軍將軍都督南徐兗二州。南濟陰即南徐州屬郡。孝祖蓋為撫軍府僚佐。而帶南濟陰太守也。

沈文秀傳

景和元年。遷督青州之東莞。東安二郡諸軍事。建威將軍。青州刺史。當云督青州。徐州之東莞。東安二郡。史脫徐州二字。下文詔書可證。

遣將慕容輿白曜。南北史俱作慕容白曜。容輿聲相近。

袁粲傳

王蘊謂粲已敗。即便散走。齊王以報敬則。率所領收蘊殺之。并誅伯興。按。是時劉韞為領軍將軍。直門下省。卜伯興為直閣。故粲欲令二人率宿衛兵攻蕭道成。而道成亦以王敬則為直閣。防二人之變。此

敬則所殺者劉韞非王蘊也。王蘊自石頭逃鬪場，被禽斬於秣陵市，與伯興非同時。傳因上文有蘊謂蔡已敗云，故誤爾。當從南史。

恩倖傳

戴法興，山陰有陳載者，家富。南史作陳戴。

阮佃夫，李道兒，新淦縣侯。南史作新淦，或是新淦之譌。州郡志新淦、新淦皆侯相。

荆雍州蠻傳

有雄谿、構谿、辰谿、西谿、舞谿。南史作武漢。

天門淩，中令宗僑之。南史作宋矯之。

南陽太守朱曇韶。南史作朱韶。

且渠蒙遜傳

武威人焦朗入姑臧。晉書作魏安人，魏安當是張氏呂氏所置郡縣名也。

蒙遜攻焦朗殺之。晉書云攻朗克而宥之，與此傳不同。

追到西支間。晉書作解支澗，解當作鮮，西聲相近也。

蒙遜第三子茂虔。茂虔，北史作牧健，茂牧聲相近，健與虔同音。

自序

昔金天氏有裔子曰昧，生允格、臺駘、臺駘能業其官，帝顓頊嘉之，封諸汾川。其後四國沈屺、葑黃、沈子國。今汝南平輿、沈亭是也。案：休文自序家世，謂出少昊之裔，而唐書宰相世系表言：沈氏出自姬姓，周文王第十子聃叔季，食采于沈。今汝南平輿、沈亭，卽其地也。二說互異，考：臺駘封於汾川，沈國亦當近汾，與汝南相去甚遠。古讀沈如耽，耽與聃又相通用，則唐表較之休文序爲可信矣。但唐表謂魯成公八年爲晉所滅，沈子逞奔楚，生嘉，嘉二子尹丙、尹戊，爲楚左司馬，則謬妄已甚。蔡滅沈，以沈子嘉歸，在魯定公四年，而沈尹將中軍，乃在魯宣公時。若沈尹戊與吳戰死，卽蔡滅沈之歲也。表以戊爲嘉子，又改戊爲戌，且沈尹本以官爲氏，乃割尹字連下爲名，尤極荒唐，不如休文自序之當也。

刺史褚升度至，升當作叔。

桓玄、譙縱、盧循、馬魯之徒，身爲晉賊，非關後代。案：司馬休之、魯軌忠於晉室，奈何稱爲晉賊，使與桓譙同科。且休文修史，已在易代之後，非有回避，而不爲別白。良史之義，豈其然乎？徐爰、宋書今已失傳，據此表，知列傳託始桓玄、兼及譙縱、盧循、司馬休之、魯軌、吳隱之、謝混、郗僧施、劉毅，何無忌、魏詠之、檀憑之、孟昶、諸葛長民諸人，蓋沿陳壽、范蔚宗之例，而沈約非之。自後南北八史列傳，祇述開國功臣，皆用沈法。至新舊唐書，乃復遵兩漢之例，以李密、王世充等列於功臣傳之前矣。又考：恩倖傳、爰初議本以

桓玄比新莽。入之晉書。孝武詔引項籍聖公之例。令入宋典。而休文自序稱。臧質、魯爽、王僧達諸傳。皆孝武所造。然則唐人修晉書。題云御撰。亦有前例也。

廿二史考異卷二十五

南齊書

高帝紀

於是爲南蘭陵蘭陵人也。此重言蘭陵者。郡縣兼舉也。呂安國廣陵廣陵人。曹虎下邳下邳人。周盤龍北蘭陵蘭陵人。蕭景先、蕭謚、蕭坦之、蕭惠基皆南蘭陵蘭陵人。張緒吳郡吳人。庾易新野新野人。劉懷慰平原平原人。皆兼書郡縣之例。監本少蘭陵二字。蓋刊書者妄去之。州郡志。南徐州無南蘭陵郡。蓋齊初併省。

僞馮翊太守蒲旱子。宋書蕭思話傳作蒲旱子。

新安王子鸞有盛寵。簡選僚佐爲北軍中郎中兵參軍。按子鸞以北中郎將領南徐州刺史。太祖爲其僚屬。當云北中郎中兵參軍。此多一軍字。

武帝紀

永明六年。以宕昌王梁彌承爲河涼二州刺史。按齊高帝父名承之。而南琅邪郡有承縣。未聞改易。至建武三年。方省併。此宕昌王名彌承。亦直書不諱高帝名道成。而第六子晃封安成王。州郡志有安成

郡及夷道、棘道、利成、綏成、始成諸縣。蓋齊世遵古二名不偏諱之禮也。文惠太子傳轉祕書丞，以與宣帝諱同，不就此在。未受宋禪以前，尙沿宋制。若受禪以後，則官名如中丞、左丞、右丞之類，皆無所避矣。薛道淵避太祖偏諱，但稱淵。陳承叔避宣帝諱，改名嗣叔，俱在宋世。

北兗、北徐、豫、司、青、冀八州，當爲六州，或上有脫文。

十一年，孝子順孫義夫節婦。梁武帝父名順之，故子顯修史，多易爲從字，如天文志五星從伏，太白從行，熒惑從行，歲星太白俱從行，辰星從行之類。宋順帝亦作從帝，今汲古閣本。惟祥瑞志、豫章王焜、王琨傳各兩見。劉休傳一見。飯篇多作順帝，蓋後人所改。監本於此數處亦改爲順字矣。百官志漢順帝，宋本亦作從。州郡志從陽郡從陽縣，汲古閣改爲順陽，唯監本尙是從字，而張敬兒、陳顯達傳中仍爲順陽。陳顯達傳南鄉縣故順陽郡治也宋本作從陽此紀及明帝紀俱有順孫字，元本必作從孫，後來校書者以意改易耳。

明帝紀

永明五年，爲持節監豫州、郢州之西陽、司州之汝南二郡軍事，右將軍、豫州刺史。按州郡志，司州汝南郡寄州治，州治卽義陽，似非豫州所當兼省，而齊世除豫州者，例兼督司州之汝南，未審其故。

東昏侯紀

永元三年，光祿大夫張環鎮石頭，環當作瓌。

和帝紀

中興元年。以黃門郎蕭澹行荊州府州事。澹當作儻。

禮志上

故驃騎大將軍王敬則。故鎮東大將軍陳顯達。按敬則、顯達二人此時見存。不應加故字。校刊者妄意。

配饗廟庭之人。必已身故。謬加此字耳。

故太子祔太廟。既無先准。宋順帝諱準。故沈約史準皆作准。南齊史先准前准舊准等。皆準之省也。州郡

志庚准為刺史百官志平准令張緒傳不可以為准則

既迨尊所不及。迨當作追。

樂志

又納音數一言得土。三言得火。五言得水。七言得金。九言得木。抱朴子內篇云。按玉策記及開名經。皆

以五音六屬。知人年命之所在。子午屬庚。卯酉屬己。寅申屬戊。丑未屬辛。辰戌屬丙。己亥屬丁。一言得

之者。宮與土也。三言得之者。徵與火也。五言得之者。羽與水也。七言得之者。商與金也。九言得之者。角

與木也。子按納音之數。生於納甲。虛乾坤不用。惟取六子。震納庚子午。巽納辛丑未。坎納戊寅申。離納

己卯酉。艮納丙辰戌。兌納丁巳亥。皆本數。故屬土。戊子午。己丑未。丙寅申。丁卯酉。甲辰戌。乙巳亥。皆距

本數三位。故屬火。丙子午、丁丑未、甲寅申、乙卯酉、壬辰戌、癸巳亥。皆距本數五位。故屬水。甲子午、乙丑未、壬寅申、癸卯酉、庚辰戌、辛巳亥。皆距本數七位。故屬金。壬子午、癸丑未、庚寅申、辛卯酉、戊辰戌、己巳亥。皆距本數九位。故屬木也。五行志：丁卯陽徵，甲寅陽羽，壬辰陽羽，辛巳陽商，甲辰陽徵，丁酉陽徵，庚申陰角，庚寅陽角，己巳陽角，皆依納音而言。

天文志上

太史令將作匠文孝建陳天文奏曰：文孝建似是人姓名，然孝建乃孝武年號，不應以命名，恐有誤。

州郡志上

南徐州鎮京口。吳置幽州牧，屯兵治焉。按：吳孫詔鎮京口，加領幽州牧，特寵以虛名，非置幽州於此地也。

淮陵郡。甄城。按：宋州郡志無此縣，若云郵城之譌，則已見南濮陽，不當重出也。

晉末以廣陵控接三齊，故青兗同鎮。按：晉南渡，僑立徐兗二州，常以一人領之。太元十二年，朱序以青兗二州刺史鎮淮陰，此青兗同鎮之始。序移鎮，而譙王恬王恭相代為青兗二州刺史，皆鎮京口，不聞治廣陵也。桓玄以桓宏為青州刺史，治廣陵，不兼兗州。及劉裕平桓氏，自領徐青兗三州，後又以兗州授劉藩，青州授諸葛長民，兩鎮仍分，而長民還治京口。及劉藩誅，而劉道憐復為青兗二州刺史，鎮京

口。義熙八年，檀祗爲青州刺史，鎮廣陵。又不兼兗州，祗卒而劉懷慎代之，亦不兼兗州。此云青兗同鎮者，謂義熙末兩刺史同治廣陵，非以一人兼領也。宋初省青入兗，而廣陵常爲南兗州治所矣。

有平陽石鼈，田稻豐饒，所領惟平陽一郡。據下文，當爲陽平郡，轉寫慎倒耳。周山圖傳亦云於石鼈立陽平郡。

陽平郡寄治山陽。按，陽平郡治石鼈，在山陽境內。

州郡志下

梁州當帶南秦州刺史。當蓋常字之譌。

百官志

國相。當作相國。

諸曹有錄事、記室、戶曹、倉曹、中直兵、外兵、騎兵、長流、賊曹、城局、法曹、田曹、水曹、鎧曹、集曹、右戶十八曹。今數之，止十六曹。

凡諸小號，亦有置府者。冠軍以下，皆小號將軍也。若出鎮方州，則亦開府置官屬。罷鎮則止。

自令僕以下，五尚書八座。令僕射、并吏部、度支、左民、都官、五兵、祠部六尚書爲八座。若置左右僕射，則減祠部尚書一人，亦八座也。

領軍將軍。晉宋以來，將軍有二等。自驍騎至龍驤將軍，皆虛號，非持節出鎮，不得領兵。此領護、左右衛、驍游前後左右軍將軍，則皆主兵之官也。

皇后傳

宣孝陳皇后，魏司徒陳矯後。當云司徒矯，不宜更安陳字。崔祖思傳稱崔琰七世孫。

豫章王嶷傳

太祖帶南兗州鎮軍府長史蕭諱在鎮，憂危既切，期渡江北起兵。監本但云太祖在鎮，無帶南兗州以下十一字。惟汲古閣本有之。按是時齊祖爲中領軍，在都參機務，雖領南兗州刺史，鎮軍將軍，初不之鎮。故以長史蕭順之行州府事，而蒼梧凶暴，齊祖恐不自全，故又欲還鎮起兵。南兗州治廣陵，故云江北也。若云太祖在鎮，則已到江北，無緣更欲渡江，且與下意矛盾矣。蓋史之難讀，由於校書者之無學，而任意刪改如此者，不少矣。

第四子子行洸陽侯，早卒。子元琳嗣。按嶷子十六人，長子子廉，諡哀世子，未及嗣爵。嗣豫章之封者，嶷孫元琳也。南史以元琳爲子廉之子，今乃係元琳於洸陽侯子行之下，似元琳爲子行之子，而嗣封洸陽矣。子顯，嶷之第八子，述其家事，不宜有誤。蓋文簡而意不達爾。

堂堂烈考，德邁前蹤。嶷爲子顯之父，故有烈考之稱。然傳中序列諸子，不及子顯名。

褚淵傳

父湛之驍騎將軍。尚宋武帝女始安哀公主。按湛之初尚始安公主。繼尚吳郡公主。見淵弟澄傳。吳郡亦武帝女。

淵少有世譽。復尚文帝女南郡獻公主。按下文云淵妻宋故巴西公主。一傳之中。前稱南郡。後稱巴西。而王儉撰淵碑文。又云選尚餘姚公主。餘姚縣名。南郡巴西皆郡名。蓋由縣主進封郡主。而南郡巴西前後互異。又何說也。

王儉傳

儉察太祖雄異。先於領府衣裾。時齊祖為中領軍。故云領府。

天應人順。人順。宋本作民從。

柳世隆傳

出為虎威將軍。監本作武威。

輔國將軍。驍騎將軍蕭諱。汲古閣本注鸞字。今以宋書沈攸之傳考之。乃蕭順之。非齊明帝也。順之。梁

武之父。故諱其名。

垣崇祖傳

敕崇祖修治苟陵田。苟當作芍。

張敬兒傳

乃以敬兒爲持節督雍梁二州郢司二郡軍事。按雍州刺史常兼督郢州之竟陵司州之隨郡。非盡督郢司二州也。柳世隆傳稱持節督雍梁二州郢州之竟陵司州之隨郡諸軍事。征虜將軍寧蠻校尉雍州刺史新除鎮軍將軍張敬兒。蓋得其實。此傳但云郢司二郡。殊未核也。敬兒初鎮雍州。官征虜將軍。本傳亦未之及。

王敬則傳

敬則之來。聲勢甚盛。裁少日而敗。時年七十餘。按南史。時年六十四。

劉懷珍傳

平胡中郎將。王元載爲徐州刺史。亦帶平胡中郎將。而宋齊志俱未載此官名。

李安民傳

祖嶷。衛軍將軍。子顯。父名嶷。此書於嶷字亦不避。

王元邁傳

秦始初遷輔國將軍。清河廣平二郡太守。幽州刺史。按宋州郡志未見僑立幽州之文。蓋僑置未久而

旋廢也。

劉善明傳

族兄乘民。按善明父名懷民而族兄亦名乘民。乘民子又名懷慰。蓋疏屬不相回避。

乘民病卒。按劉懷慰傳云父乘民死於義嘉事難。與此互異。嘗有一誤。

出爲輔國將軍。西海太守。行青冀二州刺史。按宋州郡志。泰始七年。割贛榆置鬱縣。立西海郡。隸僑青

州。故善明以西海太守。行青冀二州刺史也。齊志無西海郡。蓋後來併省。

封新塗伯。塗當作滄。

蘇侃傳

蘇侃字休烈。祥瑞志侃作侃。侃卽侃之俗體。侃字休烈而弟名烈。亦可疑也。

周盤龍傳

北蘭陵蘭陵人也。宋世土斷屬東平郡。按史稱南蘭陵者。南徐州之蘭陵也。稱北蘭陵者。徐州之蘭陵

也。宋志徐州蘭陵郡領昌慮承合鄉三縣。不見蘭陵縣。疑志有脫漏矣。宋泰始以後。淮北陷沒。僑立淮

南。土斷改屬東平。故齊志無北蘭陵之名也。

薛淵傳

明帝遷右軍司馬。此時明帝尙未卽位。當有舛譌。考明帝紀。永明五年。爲右將軍。豫州刺史。淵殆爲其府司馬耳。當云遷明帝右軍司馬。

轉大司馬。濟陽太守。按齊世除大司馬者。唯豫章王嶷。王敬則二人。非淵所得授此。蓋蒙上右軍司馬之文。由右軍司馬轉爲大司馬府之司馬也。

桓康傳

以康爲持節督青冀二州。東徐之東莞琅邪二郡。胸山戍。北徐之東海漣口戍諸軍事。青冀二州刺史。按州郡志。止有南徐。北徐。初無東徐之名。惟青州有東莞琅邪二郡。治胸山。蓋齊初嘗別爲東徐矣。志又稱建元初以東海郡屬冀州。今考桓康出鎮在建元四年。其時東海尙屬北徐。雖爲青冀刺史。所督猶未改隸冀州。志所書恐非其實。

曹虎傳

遷南中郎司馬。加寧朔將軍。南新蔡太守。永明元年。徙爲安成王征虜司馬。餘官如故。按安成王暕以建元四年。出爲南中郎將。江州刺史。永明元年。進號征虜將軍。虎蓋由員外常侍。出爲暕府司馬。南新蔡江州屬郡。故府僚得兼領之也。暕旣進號征虜將軍。而虎仍爲其府司馬。府名雖改。職事如故。傳乃云徙爲安成王征虜司馬。似南中郎別是一人矣。當云遷安成王南中郎司馬。次云隨府轉征虜司馬。

於例乃協。

二年進督爲監。宋書百官志晉世都督諸軍爲上，監諸軍次之，督諸軍爲下。

王僧虔傳

巴峽流民多在湘土，僧虔表割益陽、羅、湘西三縣緣江民立湘陰縣，從之。按湘陰置縣在宋明帝時，宋書州郡志失載。

臨川王映傳

仍復爲冠軍將軍、南兗州刺史、假節都督，復爲監軍督五州如故。此亦進督爲監也。上文假節都督字兩見，俱當爲假節督，誤衍都字耳。

長沙王晃傳

遷爲持節、監豫司二州之西陽諸軍事、西中郎將、豫州刺史。當云監豫司二州、郢州之西陽諸軍事，傳

脫郢州之三字。

劉俊傳

彭城安上里人也。彭城劉同出，楚元王分爲三里，以別宋氏帝族。按宋武帝出自彭城綏里，其二里則安上、叢亭也。宣帝子暉爲楚孝王，其曾孫居巢侯般，般子太尉愷，愷子司空茂，徙居叢亭里。唐時知幾

秩迅皆其裔也。叢亭劉雖出自漢，卻非楚元王之後。

魚復侯子響傳

都督豫州郢州之西陽汝南二郡軍事、冠軍將軍、豫州刺史。按州郡志：郢州但有汝南縣，隸江夏郡，而無汝南郡。以明帝紀：崔慧景、王廣之、蕭遙欣、蕭遙昌諸傳證之，知當云司州之汝南。傳脫司州之三字。進南豫州之歷陽、淮南、潁川、汝陽四郡。進下當有督字。州郡志：潁川、汝陽二郡皆屬豫州，不屬南豫。

巴陵王子倫傳

永明十年，遷北中郎將、南琅邪彭城刺史、二郡太守。刺史二字衍，蓋罷南豫而領兩郡守也。

周顥傳

益州刺史蕭惠開賞異顥，攜人蜀，為厲鋒將軍，帶肥鄉成都二縣令。按宋齊二志，成都無肥鄉縣。

徐孝嗣傳

竝為太子劭所殺。汲古閣本無太子。注云：宋本作太祖，予謂太祖乃太初之譌。元凶僭號，改元太初，史敘元凶朝事，多稱太初。王僧虔傳云：兄僧綽為太初所害，與此文同。刊本譌為太祖，後人以意改為太子劭耳。

蕭遙欣傳

仍爲督豫州之西陽、司州之汝南二郡、輔國將軍、豫州刺史。當云督豫州、郢州之西陽、司州之汝南二郡。傳有脫文。

王秀之傳

出爲晉平太守。按宋書明帝紀：泰始四年，山陽王休祐改封晉平王，改晉安郡爲晉平郡。而宋齊州郡志並不載晉平之名。此史之漏也。據子顯書：王秀之、虞愿、邱仲起皆爲晉平太守。張融與吏部尚書王僧虔書云：阮籍愛東平土風，融亦欣晉平閑外。皆宋季事。至齊武帝卽位，封子子懋爲晉安王，則晉平復爲晉安。當在齊初矣。

陸慧曉傳

未嘗卿士大夫，或問其故。慧曉曰：貴人不可卿，而賤者可卿。汲古閣本，卿作輕。誤。

謝朓傳

沈昭略謂朓曰：卿人地之美，無忝此職。但恨今日刑于寡妻。按文義當以朓妻懷刀欲殺之，故援刑于語以相諫。南史改云：但恨不可刑于寡妻。詞拙而意淺矣。此云沈昭略，南史以爲范縝，亦異。

王奐傳

祖僧朗，宋左光祿儀同。當云左光祿大夫，開府儀同三司。史省文。

江夏王寶玄傳

少帝送少姬二人與之。按江夏王寶玄、鄱陽王寶劼二傳皆前稱東昏。後稱少帝。裴叔業傳海稱東昏爲少主。魏虜傳亦稱少帝。蕭坦之傳稱鬱林王爲少帝。茹法亮傳二少帝竝居西殿。謂鬱林與海陵也。梁書江淹傳前稱蒼梧王爲少帝。後稱鬱林王爲少帝。

鄱陽王寶劼傳

中興二年謀反誅。按寶劼起兵不克。薛魏事見魏史。此云誅者。據梁人之詞。以爲寶劼已死。其在魏者僞也。魏書作寶寅。不從夕。據其字智亮。當以寅爲是。

文學傳

祖沖之。唐世冬至日在合宿之左五十許度。伐之初。卽秦麻。宋志云。漢代之初。卽用秦麻。此譌代爲伐。又脫漢用二字。合當作今。

良政傳

劉懷慰。平原平原人。按劉懷珍、劉善明二傳俱云平原人。此獨書平原平原。於例亦未盡一。

高逸傳

顧歡。道士與道人戰儒墨。道人與道士辯是非。按六朝呼僧爲道人。宋書後廢帝紀。晚至新安寺。就

曇度道人飲酒。廬陵王義真傳。與慧琳道人周旋異常。西南夷傳。有曇標道人。與羌人高闡謀反。又有慧嚴慧議道人。竝在東安寺。齊書孝義傳。誌公道人。魏虜傳。玄高道人。道人法秀。南史東昏侯紀。蔣山定林寺。一沙門。病不能去。爲軍人所得。應時殺之。左右韓暉光曰。老道人可念。梁后妃傳。瑤光寺智遠道人。宋宗室傳。前稱慧琳道人。後門沙門慧琳。梁宗室傳。道人釋惠思。恩倖傳。宋時道人楊法持。與高帝有舊。昇明中。以爲僧正。海南諸國傳。宋世名僧有道生道人。又有慧嚴。慧議道人。是道人即沙門之別稱。不通於羽士。此傳云道士與道人戰。儒墨。而南史陶貞白傳亦云。道人道士竝在門中。道人左。道士右。則道人與道士之別較然矣。

孝義傳

吳欣之。晉陵利城人也。按利城縣本屬東海。晉南渡僑立江南。宋齊州郡志俱屬南東海郡。

魏虜傳

雍州。涼州。秦州。沙州。涇州。華州。岐州。河州。西華州。寧州。陝州。洛州。荊州。郢州。北豫州。東荊州。南豫州。西兗州。東兗州。南徐州。東徐州。青州。齊州。濟州。二十五州在河南。湘州。懷州。秦州。東雍州。肆州。定州。瀛州。朔州。并州。冀州。幽州。平州。司州。十三州在河北。按自雍至濟。數之止廿四州。蓋脫一州也。據通鑑注。則濟州之下。當有光州。然以魏收地形志考之。光州。延興五年改爲鎮。景明元年復。子顯所載者。魏太和

初之疆域。其時似不當有光州矣。河南有秦州。而河北又有秦州。亦必有誤。湘當作相。世號爲索干都。索干卽桑乾之轉。

目錄序

臣等因校正其譌謬。今本南齊書卷十五。州郡志下。卷卅五。高十二王傳。卷四十四。徐孝嗣傳。卷五十八。高麗傳。各闕一葉。卷五十九。史臣論。亦有闕文。曾子固序。但云校正譌謬。不云文有脫落。則宋時蕭史固完善也。又按史通序例篇云。沈宋之志序。蕭齊之序錄。雖皆以序爲名。其實例也。則子顯書當有序錄一篇。劉知幾猶及見之。而今失其傳矣。晉書亦有序例一篇。今本皆無之。

臣恂。臣寶。臣。臣穆。臣藻。臣洙。臣覺。臣彥若。臣鞏。此序曾鞏所作。其云彥若者。趙彥若也。覺者。孫覺也。洙者。孫洙也。藻者。錢藻也。寶。臣者。丁寶臣也。

廿二史考異卷二十六

梁書

武帝紀上

仰生太傅望之。當云太子太傅。脫太子二字。

隸江州刺史王廣。當云王廣之。脫之字。

魏帝自率大衆。此稱魏帝。下文又稱魏主。於例似不畫一。

獸眛其間。思廉避唐諱。凡虎字皆改爲獸。或爲武。此紀獸眛、天獸、獸步、獸牙、神獸、門仁獸闕。獸而傅翼。皆本虎字。回避改易。而篇中又有持白虎幡、勢同履虎、餌之虎口、虎賁之士、剋虎牢城云云。皆明人不學。擅改本文也。

先是東昏以劉山陽爲巴陵太守。按蕭穎達、柳忱傳竝作巴西。

以豫州之梁郡、歷陽、南徐州之義興、揚州之淮南宣城吳興會稽新安東陽十郡。今數之止九郡。蓋脫一郡。

齊聖廣淵。梁陳書避唐諱。皆改淵爲深。此淵字蓋後來校書者所改。劉峻傳墜之淵泉。

武帝紀中

天監三年八月，魏陷司州，詔以南義陽置司州。按是歲，司州刺史蔡道恭爲魏人所圍，曹景宗不能救，道恭卒，城遂陷。四年，以鄭紹叔爲司州刺史。紹叔傳云：義陽爲魏所陷，司州移鎮關南，紹叔創立城隍，廣田積穀，招納流民，百姓安之。紹叔所治，卽南義陽也。其六年，紹叔徵還，以馬仙琕代之。七年，魏人以懸瓠城內附，詔仙琕以兵赴之。旣而魏人破懸瓠，仙琕退走。魏軍進據三關，明年，仙琕徵還，以夏侯亶持節督司州諸軍事，司州刺史領安陸太守。蓋自南義陽徙鎮安陸也。十二年，亶召還，當以張惠紹代之。其後惠紹徵還，而康絢代之。竝領安陸太守。絢以天監十八年徵還，代之者未審何人。普通七年，除夏侯夔持節督司州諸軍事，司州刺史亦領安陸太守。大通二年，魏郢州刺史元願達以義陽內附，詔改爲北司州，以夔爲刺史，兼督司州。蓋梁之失義陽，計二十有五年，而復得之。中大通二年，夔徵還，而除陳慶之都督南北司。西豫、豫、四州諸軍事，南北司二州刺史。自是義陽復爲重鎮。

五年五月，張惠紹克魏宿預城。按宿預城得而不能守，紀但書克，不書陷。此史臣粉飾之詞。

九年正月，以輕車將軍晉安王諱簡文爲南兗州刺史。按簡文帝紀：天監八年，爲雲麾將軍，領石頭戍事。九年，遷使持節都督南北兗、青、徐、冀、五州諸軍事，宣毅將軍，南兗州刺史。不云嘗爲輕車將軍也。

十二年閏月，特進中軍將軍沈約卒。按約傳但云爲特進左光祿大夫，侍中行太子少傅，不云除中軍。

將軍今考南史本傳稱加特進遷中軍將軍丹陽尹侍中特進如故則傳有脫文矣。

武帝紀下

普通四年六月分霍州置義州。按紀書普通二年義州刺史文僧明以州叛入於魏則義州之名先已
有之。

中大通元年五月魏主元子猷棄洛陽。子猷當作子攸。陳慶之傳亦作子攸。

六年三月以行河南王可沓振爲西秦河二州刺史河南王。按可沓振名不見諸夷傳。

大清元年二月魏司徒侯景求以豫章章字廣穎洛陽當作西揚東荆北荆襄東豫南兗齊等十三

州內屬。按侯景傳載景降表云與豫州刺史高成廣州刺史暴顯潁州刺史司馬世雲荊州刺史郎

椿襄州刺史李密兗州刺史邢子才南兗州刺史石長宜齊州刺史許季良東豫州刺史邱元征洛州

刺史朱渾願揚州刺史樂恂北荊州刺史梅季昌北揚州刺史元神和等今本脫去暴顯以下十四字

考異作余朱渾願當從之此十三州之名也紀有西揚傳作北揚紀有東荆傳但云荆未審誰是。

二年九月景寅唐人修史避諱改丙丁之內爲景今監本梁書皆作丙蓋後來校書者所改獨此年九

月景寅十一月景戌簡文帝紀大寶二年四月景子元帝紀太清三年九月景寅數處偶未改易汲古閣本

皆用景字

元帝紀

太子舍人蕭歆。歆當作詔。

式哥且誦。哥古歌字。

何必西瞻虎據。此卷內獸賁緹騎。爲獸傳翼。如貌如獸。諸獸字皆虎字也。此虎據字又明人所改。

敬帝紀

太平二年正月。分尋陽、太原、齊昌、高唐、新蔡五郡置西江州。卽於尋陽仍充州鎮。按尋陽本江州治所。侯瑱爲刺史。移鎮豫章。瑱爲余孝頃所敗。詣闕。孝頃遂據新吳。稱刺史。故此紀稱孝頃爲南江州刺史。而陳書周文育傳稱爲新吳洞主也。西江州之設。蓋以備孝頃。其刺史疑卽以周文育爲之。故孝頃疑懼。舉兵以應蕭勃。及孝頃退走。卽正授文育江州刺史也。隋志不載西江州之名。亦以其不久卽廢也。梁時置太原郡於彭澤縣。齊昌郡今蘄州。高唐郡今宿松縣。新蔡郡今黃梅縣地。

史臣侍中鄭國公魏徵曰。按思廉修梁陳書。皆因其父察所撰而續成之。梁史諸論。述其父說。必稱陳吏部尙書姚察曰。仿孟堅漢書稱司徒掾班彪之例也。其但稱史臣者。出自思廉新意。惟列傳弟二十七王僧孺四人論。稱史臣陳吏部尙書姚察。疑是傳刻之誤。察非唐臣。不應係以史臣之名也。陳書惟高祖世祖二紀論爲姚察所作。餘皆思廉自撰。本紀終篇別有總論一篇。出於魏徵之手。徵亦同時兼

領史局者故稱史臣而著其名。梁陳二史俱有史臣侍中鄭國公魏徵總論一篇。北齊書稱鄭文貞公魏徵總而論之云云。蓋百藥本紀已亡。後人取北史補之。李延壽進史之應。魏鄭公已先歿。故稱其諡也。周隋二史皆無魏徵總論。豈本有而後來失之乎。陳書張貴妃傳。末稱史臣侍中鄭國公魏徵考覽記書。參詳故老云云。凡六百餘言。以大臣領史事。而不攘人之善以爲己作。鄭文貞洵不可及矣。

后妃傳

高祖德皇后郗氏。歸葬南徐州南東海武進縣東城里山。按太祖后張氏傳稱葬武進縣東城里山。此傳并詳其州郡。史家之例。當前詳而後略。今乃前略而後詳何也。

丁貴嬪。普通七年十月庚辰薨。武帝紀作十一月。傳誤。

徐妃之無行。自致殲滅。宜哉。按徐妃失行。不見於本傳。而論忽及之。疑傳文有漏落也。

哀太子大器傳

中大通三年。封宣城郡王。武帝紀作四年。

太清三年六月癸酉。立爲皇太子。簡文紀作丁亥。

王茂傳

歷後行軍參軍。當云後軍行參軍。傳寫倒爾。

開府同三司之儀。諸紀傳除儀同者。或書開府儀同三司。或書開府同三司之儀。似有區別。據此傳。先書開府同三司之儀。本紀亦同而詔書直稱開府儀同三司。則是文異而實同也。

蕭穎達傳

起家冠軍。兄穎胄。齊建武末。亦為西中郎外兵參軍。俱在西府。按夏侯詳傳稱南康王長史蕭穎胄。柳忱傳亦稱西中郎長史蕭穎胄。夏侯竄傳稱長史蕭穎胄。則其時穎胄實以長史行州府事。非外兵參軍也。起家冠軍句亦不成文。疑此段文有脫落。或穎胄為長史。而穎達為外兵參軍乎。

楊公則傳

魯山城主孫樂祖。晉本或作曾誤武帝紀作張樂祖。

鄧元起傳

蕭藻將至。上云蕭深藻。此但云蕭藻者。本名淵藻。以避諱。或改為深。或省一字。猶貞陽侯淵明。或單稱明。或稱深明也。

范雲傳

南鄉舞陰人。按宋齊二志俱無南鄉郡。而有南鄉縣。為順陽郡治所。舞陰則南陽之屬縣也。蓋梁時避武帝父諱。改順陽郡為南鄉耳。

我與范尚書少親善。申四海之敬。蓋用論語四海之內皆兄弟語。

沈約傳

初約久處端揆。有志台同。六朝人以僕射爲端揆。台司謂三公也。

貴則景魏蕭曹。景魏謂丙吉魏相也。許懋傳。湯又不應傳外景。外景卽外丙。思廉避唐諱改。

張稷傳

時雍州刺史曹武度樊城岸。以稷知州事。據此。則知州之名。六朝時已有之。但不過權攝之稱。非如宋

世竟爲正官也。

王瑩傳

復爲黃門侍郎司馬。司馬者。驃騎府之司馬也。蓋蒙上驃騎長史之文。

馬仙琕傳

豫州人。白早生。殺其刺史琅邪王司馬慶曾。安成王秀傳作司馬悅。

推鄉人胡遊爲刺史。本記作胡遜。

十一年。遷持節督豫北豫蠶三州諸軍事。信武將軍。豫州刺史。領南汝陰太守。是時豫州治合肥。南汝

陰郡亦僑置於合肥。馮道根傳。天監八年。假節督豫州諸軍事。豫州刺史。領汝陰太守。亦當爲南汝陰。

史缺南字耳。道根徵還。而仙璉代之。

宗夫傳

宗夫字明敷。蓋取夫揚於王庭之義。諸本作史。誤。

祖景。景即炳字。南史避唐諱。稱少文而不名。

父繁。西中譚議參軍。西中下脫郎字。

隆昌末。少帝見誅。按江淹宗夫二傳俱稱鬱林王為少帝。

劉坦傳

天監三年。遷西中郎。卒。宋齊以後。四中郎將皆皇子弟為之。庶姓無除授者。坦蓋由平西司馬遷西中

郎司馬耳。

劉季連傳

遂遂寧太守。譙希淵。此卷內淵字屢見。皆校書者所改。陳伯之子。虎牙。本紀改作獸牙。此卷仍書虎牙。

亦非思廉元本。王志等補。淵為司徒。

王志傳

志家世居建康禁中里馬蕃巷。馬蕃。南史作馬羹。

王泰傳

仍遷仁威長史。南蘭陵太守。行南康王府州國事。王遷職。復爲北中郎長史。行豫章王府州國事。大守如故。按天監十年。以南康王績爲都督南徐州刺史。進號仁威將軍。十六年。徵還。以豫章王綜爲北中郎將。南徐州刺史。泰先爲南康王長史。繼爲豫章王長史。六朝時。府僚多領郡縣職。泰在南徐爲幕僚之長。故領南蘭陵太守。南蘭陵本隸南徐州也。凡諸王冲幼出鎮開府。多以長史行州府事。或府主以事它出。亦以府僚行事。楊公則爲湘州刺史。帥師赴夏口。以劉坦爲輔國長史。行湘州事是也。

張充傳

張緒少有清望。誠美選也。然東士比無所執。東士包頗難解。南史云。南士由來少居此職。較明白。

柳惲傳

琅邪王元長見而嗟賞。按柳惲。徐勉二傳於王融。皆字而不名。疑當時避齊和帝諱。史家未及更易。

臨川王宏傳

天監四年。高祖詔北伐。以宏爲都督南北兗北徐青冀豫司霍八州北討諸軍事。按武帝紀。天監六年。

分豫州置霍州。則其時尚無霍州。

會征役久。有詔班師。梁史於宏洛口潰師之役。皆諱而不書。不如南史之直筆。

長沙嗣王業傳

高祖長兄懿之子也。懿字元達。按長沙王懿以忠獲咎。齊書既不爲立傳。其在梁朝。猶光武之伯升也。史僅附見其子業傳。而敘事亦多脫落。其自益州罷還。爲西中郎長史。行郢州事。武帝遣張宏策說以自全之計。固執不從。雖別見本紀及它傳。乃并郢州行事亦失書之。

周捨傳

南津獲武陵太守白渦書。南史作始興相白渦。

徐勉傳

徐勉少而厲志。按勉與周捨同傳。而論不及捨一字。不無偏枯之病。何敬容與謝舉同傳。論亦不及舉。

明山賓傳

庾桑方有係。庾疑庚之譌。

殷鈞傳

南郡范雲。南郡當作南鄉。

裴之橫傳

又隨僧辯追景平郢魯江晉等州。按魯晉二州。本紀失書建立年月。

夏侯竇傳

都督豫州緣淮南豫霍義定五州諸軍事。按本紀失書定州建立年月。安成王秀傳。司州叛蠻田魯生弟魯賢超秀據蒙籠來降。以超秀爲定州刺史。魏收志。南定州蕭衍置治蒙籠城。卽隋之麻城縣也。

夏侯夔傳

譙州刺史湛僧智。圍魏東豫州刺史元慶和於廣陵。此廣陵乃魏僑立之廣陵。魏書地形志。東豫州。太

和十九年置治廣陵城。隋志。汝南郡之新息縣。後魏置東豫州。卽廣陵城所在矣。武帝紀。中大通四年。

改魏南兗州爲譙州。以羊鴛仁爲刺史。卽今亳州。據此傳。則譙州之名。先已有之。但不知治於何所耳。

二年魏郢州刺史元願達請降。按上文云八年者。普通之八年也。此云二年。則大通二年也。本紀普通

無八年。蓋其年三月。卽改元大通。傳旣不言改元。則二年上須添大通字。

轉使持節督豫淮陳穎建霍義七州諸軍事。按淮陳穎建四州。本紀失書建立年月。據隋志。汝南郡之

新息縣。後魏置東豫州。梁改西豫州。又改淮州。而汝南之城陽縣。有廢白狗縣。梁時亦置淮州。汝陰郡

之穎陽縣。梁時爲陳州。陳留郡。而汝南郡之朗山縣。梁時亦置陳州。未知夔所督者何地也。穎州卽汝

陰郡汝陰縣。建州卽弋陽郡之殷城縣地。義州卽弋陽郡之定城縣地。

刺史蕭淵明引爲府長史。淵明彭城戰歿。此戰沒謂沒於魏。非身死也。思廉避唐諱。當云深明。化傳及

傳岐王僧辯侯景諸傳作淵明皆校書者所改謝微傳臨汝侯淵賦

南康王會理傳

都督南北兗北徐青冀東徐譙七州諸軍事。按東徐州之名本紀末見考魏志東徐州蓋置於宿豫郡。

廬陵王續傳

又出爲使持節都督荊郢司雍西北秦梁巴華九州諸軍事荊州刺史。按西秦疑是南秦之譌巴華二州建立年月本紀失書據杜則傳父懷寶官至梁州刺史大同初魏梁州刺史元羅舉州內附懷寶復進督華州則華州蓋置於大同初矣華州之名隋志亦無之。

邵陵王綸傳

時年三十三百姓憐之。按綸被害在大寶二年辛未距天監十三年甲午始封之歲已三十八年矣史稱年三十三必誤也且梁武諸子綸次居六元帝次居七元帝生於天監七年綸旣長於元帝計其卒時最少亦當四十四五歲也。

陳慶之傳

又表省南司州。按慶之卒於大同五年而羊鴉仁傳大同七年除都督南北司豫楚四州諸軍事北司州刺史則其時尙有南司州至太清元年鴉仁始爲司豫二州刺史鎮懸瓠南司之省蓋在太清初慶

之歿已久矣。

蘭欽傳

中昌魏人也。按南齊書州郡志。梁州有東昌魏郡。又新城郡有昌魏縣。初不見中昌魏之名。

西魏相宇文黑泰。本名黑獺。獺泰聲相近。

王僧孺傳

起爲安西成王參軍。此句有脫誤。

張率傳

與管安王諱令曰。近張新安又致故。其人才筆弘雅。亦足嗟惜。隨弟府朝東西日久。尤當傷懷也。比人物零落。特可濟慨。屬有今信。乃復及之。此語已見到洽傳。

劉孝綽傳

范雲年長繪十餘歲。其子孝才與孝綽年並十四五。按范雲傳。子孝才嗣。孝季字形相似。疑卽一人。先聖以衆惡之必監焉。衆好之必監焉。此用論語。改察爲監。避其家諱也。

張纘傳

改爲使持節都督湘桂東寧三州諸軍事。湘州刺史。按東寧州之名。本紀亦失書。隋志始安郡義熙縣

舊曰齊熙。置齊熙黃水二郡及東寧州。

都督雍梁北秦東益郢州之竟陵司州之隨郡諸軍事。按諸夷傳大同元年剋復漢中楊智慧遣使上

表求率四千戶歸國。詔許焉。卽以爲東益州。蓋北秦東益二州皆仇池楊氏之地。

蕭子恪傳

所謂殷鑒不遠。在夏后之代。按思廉修史。在貞觀之世。於太宗偏名初不回避。此文改世爲代。乃高宗

以後人轉寫移易。非梁史元本。

蕭子範傳

其年。葬簡皇后。使與張纘俱製哀策文。今以纘傳考之。其時纘未能還都。無緣有製文事。

謝舉傳

世人爲之語曰。王有養炬。謝有覽舉。養炬。王筠王泰小字也。此語已見王筠傳。不應重出。

何敬容傳

祖攸之。宋太常卿。按南史。敬容之祖攸之位侍中。與此異。南齊書亦作攸之。疑此傳誤也。儒林傳有何

攸之。蓋別是一人同姓名者。

朱异傳

論。朱异、賀琛並起微賤。按：賀琛直言時政，非權倖比，不宜與朱异合傳。

元法僧傳

都督廣越交桂等十三州諸軍事。十三州之名，紀傳俱未詳。

元願達傳

仕魏爲中書令、司州刺史。本紀作郢州刺史，此誤。魏之郢州與梁之司州本一地，但地從主人，不可假借也。

王神念傳

歷武陽宜城內史。武陽疑武陵之譌。

羊侃傳

時秦州羌有莫遮念生者，莫遮、魏書作莫折，聲之轉也。

除西晉州刺史，破郭元建於東關，遷使持節、信武將軍、東晉州刺史。按：東西晉二州，當是元帝所置。隋志：同安郡，梁置豫州，後改曰晉州，初不見東西之名。

羊鴉仁傳

都督南北司、豫楚四州諸軍事。按：本紀失載楚州建立年月。魏志：西楚州，蕭衍置，治楚城，領汝陽、仵城。

城陽三郡。卽此楚州也。

詔鴉仁督士州刺史桓和之、仁州刺史馮海珍等。按士仁二州。本紀未載建立年月。武帝紀稱兗州刺

史桓和。

仍爲都督豫司淮冀殷應西豫等七州諸軍事。司豫二州刺史。按冀殷應諸州。本紀未詳置立年月。隋志。項城縣。東魏置揚州。梁改殷州。卽鴉仁所督之殷州也。

到溉傳

彭城武原人。按溉與弟洽各立傳。洽傳云。彭城武原人也。宋驃騎將軍彥之曾孫。祖仲度。驃騎江夏王從事中郎。父坦。齊中書郎。溉傳又云。彭城武原人。曾祖彥之。宋驃騎將軍。祖仲度。驃騎江夏王從事中郎。父坦。齊中書郎。溉從父弟沆傳又云。彭城武原人。曾祖彥之。宋將軍。何其詞之不憚煩也。當依謝舉王承二傳之例。乃爲簡而有法。

頃之。坐事左遷金紫光祿大夫。按金紫光祿大夫似非左遷之官。

許懋傳

又禮記云。三皇禪奕奕。謂盛德也。五帝禪亭亭。謂特立獨起於身也。三王禪梁甫。連延不絕。父歿子繼也。按禮記無此文。當作禮說。禮說者。禮緯也。下文云異乎禮說。可證記爲說之譌矣。亭之言特。梁之言

連皆取聲相近。

鄭玄有參柴之風。論語柴也愚。參也魯。蓋譏其愚魯。

劉孺傳

彭城安上里人也。列傳例書郡縣。此書里而不書縣。亦變例。

尋陽王大心傳

出爲使持節都督郢南北司定新五州諸軍事。本紀不見新州之名。隋志江夏郡舊置郢州。梁分置北

新州。卽此新州也。

王僧辯傳

率巴州刺史淳于量、定州刺史杜龔、宜州刺史王琳、郴州刺史裴之橫等。按隋志巴陵郡。梁置巴州。鬱

林郡。梁置定州。亦稱南定州。夷陵郡。梁置宜州。惟桂陽郡云平陳置郴州。不云梁所置。裴之橫傳亦不云爲

郴州刺史。疑此傳誤也。梁時益部亦有巴州。治閬中。又謂之北巴州。司部亦有定州。蠻田氏所據。

世祖乃命羅州刺史徐嗣徽、武州刺史杜勳。按隋志湘陰縣。梁置羅州。武陵郡。梁置武州。下邳郡。梁亦

置武州。據前傳。由武州刺史遷鎮蠻護軍。武陵內史。則必武陵之武州矣。

文盛傳

督梁南秦沙東益巴北巴六州諸軍事、仁威將軍、秦州刺史。按晉宋以來、梁秦二州同治漢中都督常兼領二州刺史。天監三年、夏侯道遷叛、而梁失漢中地、乃移梁州於西城。大同元年、漢中復為梁有。隋志、西城郡、梁置梁州。據天監三年以後言之也。又云、尋改曰南梁州、則據大同元年以後、梁州復治漢中、當以西城為南梁矣。文盛除秦州、未知治所、然受命東討、初未之任也。

杜岸傳

世祖以為持節、平北將軍、北梁州刺史。按隋志未見北梁州之名、蓋大同初、梁州復治漢中、以西城為南梁、而漢中遂有北梁之稱。

杜龜傳

世祖以為持節、忠武將軍、郢州刺史。按郢州之名、本妃及隋志俱失書、龜叔幼安、世祖以為西荊州刺史。西荊州亦隋志所失載也。

孝行傳

劉曇淨、彭城莒人也。按彭城郡無莒縣。莒屬東莞縣莒當作呂。

劉霽、父聞慰、齊工員郎。工當作正。

弟查、在文士傳。文士當作文學。

文學傳上

劉昭。歷爲宣惠豫章王中軍、臨川記室。臨川下脫王字。

何遜。東海剡人也。剡當作郟。

周興嗣。河南獻舞馬。詔興嗣與待詔到沆張率爲賦。高祖以興嗣爲工。按張率傳云高祖以率及興

嗣爲工。且傳中載賦全篇。則率之賦尤工於興嗣矣。且亦重出。

文學傳下

劉峻。父珽。宋始興內史。珽。南史作琰之。魏書劉休賓傳作旋之。

劉杳。祖乘人。宋冀州刺史。按杳與霽歆昆弟三人。一在孝行傳。一在文學傳。一在處士傳。霽傳云平

原人。祖乘民。宋冀州刺史。父聞慰。齊正員郎。杳傳云平原人。祖乘人。宋冀州刺史。父懷慰。齊東

陽太守。有清績。在齊書良政傳。歆傳云祖乘民。宋冀州刺史。父聞慰。齊正員郎。文旣重杳。而或云聞慰

或云懷慰。名亦互異。乘民之爲乘人。蓋避唐諱改易。然思廉史成於貞觀之世。於太宗二名初未偏諱。

此人字後人據南史改之。非思廉本文。

謝徵。徵當爲微字之譌。

又爲臨汝侯淵猷製放生文。淵當爲深。此後人所改。

處士傳

孟子曰。今人之於爵祿。得之若其生。失之若其死。今本無。

何點傳

亦隱居吳郡默邱山。默邱卽虎邱。避諱改。

初褚淵王儉爲宰相。唐人避諱。改淵爲深。褚源或稱其字。南史載此文。云回旣世族。此作淵。亦後人所

改。

何子季傳

今遣領軍司馬王果。王果。南史作王杲之。

止足傳

魚豢。魏略知足傳。方田徐於管胡。則其道本異。謝靈運晉書止足傳。先論晉世文士之避亂者。殆非其人。

惟阮思曠遺榮好道。遠恥辱矣。宋書止足傳有羊欣王徽。咸其流亞。按魚豢謝靈運之書。今已不傳。

魚書蓋以田疇。徐庶。管寧。胡昭四人標爲知足也。沈約宋書。羊王與張敷同傳。初未標止足之目。不知

思廉所稱宋書。果何人作。

良吏傳

庾蕞。父深之。宋應州刺史。按宋時無應州。此必誤也。南史深之。宋義興太守。袁廷麟曰。當何遠。東海剡人也。刻當作郟。

西北戎傳

河南。子休運籌襲爵位。休運當作伏連。

宕昌。天監四年。王梁彌博來獻甘草當歸。按武帝紀。天監元年。安西將軍宕昌王梁彌領進號鎮西

將軍。此在彌博之前。而傳不及之。

武興。紹先死。子智慧立。大同元年。克復漢中。智慧遣使上表。求率四千戶歸焉。詔許焉。即以爲東益州。

按武帝紀。大同元年十二月。以平西將軍秦南秦二州刺史。武興王楊紹先進號車騎將軍。平北將軍。北益州刺史。陰平王楊法深進號驃騎將軍。則大同初。紹先尙存。楊法深當是楊定之後襲封者。而傳不及之。皆史之躋駁也。

侯景傳

又有柔玄鎮兵吐斤洛周。魏書。北史俱作杜洛周。當從此傳。吐斤本代複姓。聲譌爲杜。

越常之貢來臻。常卽裳字。說文。常。下幫也。或從衣。

西求救於黑秦。秦當作秦。

又曰。吾昨夜夢吞土。卿試爲思之。不害曰。昔重耳饋塊。卒反晉國。陛下所夢。將符是乎。此語已見簡文帝紀。

高祖常夜夢中原牧守皆以地來降。舉朝稱慶。寤甚悅之。旦見中書舍人朱异說所夢。此段問答亦見朱异傳。而此較詳。

廿二史考異卷二十七

陳書

目錄

列傳第四周鐵虎。唐人避諱改虎爲武。此鐵虎之名。蓋後來校書者所改。周文育傳作鐵武。此思廉元文。

高祖紀上

仍命高祖監宋隆郡。所部安化二縣元不賓。按隋志信安郡平興縣舊置宋隆郡。領初寧、建寧、熙穆、崇德、召興、崇化、南安等縣。未見安化之名。或云卽南安崇化二縣各舉下一字。猶稱山陰會稽爲稽陰也。使持節都督六郡諸軍事軍師將軍南江州刺史。此南江州未審置於何所。余孝頌亦爲南江州刺史時寧都人劉藹等。按杜僧明周文育諸傳作劉法尙。

齊平秦王中流矢死。此平秦王不著姓名。高歸彥封平秦王。其時無恙。

齊送貞陽侯淵明。唐人避廟諱改淵爲深。或但稱明。此紀與徐陵傳俱有淵明字。亦校書者所改。

公龍驤虎步。此虎字亦後人追改。韓擒虎北史但作韓擒。而陳書後主紀陳慧紀高宗諸子後主諸子。

任忠、樊猛、魯廣達諸傳俱稱擒虎，皆後人追改。

高祖紀下

永定元年長城縣公道譚。前卷作道談。

二年正月北徐州刺史唱義之初首爲此職。唱當作昌。昌義之梁時爲北徐州刺史。蓋嘗任左右驍騎

者。校書者不知昌義之爲人姓名。妄於昌旁加口。又增一初字。淺陋可笑。

四月江陰王薨。按梁敬帝之弑。陳史但書薨。南史易薨爲殂。而以陳志繫之。又衡陽王昌傳。天嘉元年

三月入境。詔令主書舍人緣道迎接。景子濟江於中流。船壞。以溺薨。南史則云濟江於中流。殞之。使以

溺告。延壽直筆。勝於思廉遠矣。梁書高祖紀。臨川王宏傳於洛口潰師之役。皆諱而不書。姚氏父子修

史於易代之後。何必諱飾乃爾。

十二月割吳郡鹽官、海鹽、前京三縣置海寧郡。屬揚州。按隋志失載此事。前京縣不見於宋齊志。大約

梁所置也。隋志於常熟縣下云。梁置信義郡。平陳廢。并所領海陽、前京、信義、海虞、興國、南沙入焉。似梁

時前京屬信義郡。與此紀異。

以安成所部廣興、六洞置安樂郡。按隋志亦失載此事。南齊志廣興縣屬安成郡。隋志無此縣。疑平陳

後所廢。

以寧遠將軍北江州刺史熊曇朗爲開府儀同三司。按曇朗傳無除北江州刺史之文。陳時北江州治南陵。而曇朗據豐城新淦之地。與南陵隔遠蓋遙。以州名授之。

世祖紀

天嘉元年三月分荊州之天門義陽南平郢州之武陵四郡置武州。其刺史督沅州。領武陵太守。治武陵郡。其都尉所部六縣。爲沅州別置通寧郡。以刺史領太守。治都尉城。按梁末已有武州。蓋中廢而立也。據此文武州與沅州非一地。而隋志云武陵郡梁置武州。後改曰沅州。似不然矣。通寧郡之名隋志亦未見。

五月改桂陽之汝成縣爲廬陽郡。分衡州之始興安遠二郡置東衡州。按以侯安都傳考之。當時東衡州實領三郡。始興安遠及廬陽也。紀文尙未該備。汝成當作汝城。宋齊志及安都傳皆作城字廬陽隋志作廬陽。監本亦是盧字。又考歐陽顛傳稱梁元帝承制以始興郡爲東衡州。則東衡州實置於梁末。不知何年省入衡州。至是復置耳。

械樸載哥。哥古歌字。

二年四月分荊州之南平宜都羅河東四郡置南荊州。鎮河東郡。河東郡治松滋縣。南荊州之名隋志失書。羅郡志亦未見也。南平郡前年已改隸武州。

十一月以武昌國川爲竟陵郡以安流民。此僑置之竟陵。隋志亦失書。

三年六月以會稽、東陽、臨海、永嘉、新安、新寧、晉安、建安八郡置東揚州。按梁時已置東揚州。陳武帝平張彪之後。命文帝都督會稽十郡。遂省東揚不置。至是又復其舊也。考陳文帝於梁末建節。稱都督十郡。其後徐度、沈恪、沈欽鎮會稽。則云九郡。九郡之名。見於徐度、沈恪傳。較此紀多信安一郡。十郡則史未詳其名。

四年二月以平南將軍華皎爲南湘州刺史。本傳但云湘州刺史。南字疑衍。

六年七月臨川太守駱文牙。本傳及陳寶應傳但稱駱牙。

九月罷豫章郡。此事疑有誤。宣帝子有豫章王叔英。可證豫章郡未嘗罷也。

廢帝紀

光大二年正月罷吳州以鄱陽郡還屬江州。按陳時有兩吳州。廢帝所廢之吳州治鄱陽。後主所置之吳州治吳郡。

宣帝紀。依高祖世祖之例。當以高宗題目。而諸本俱題宣帝。目錄亦然。皆誤也。

太建五年五月石梁城降。按上書徐愷克石梁城。此又云石梁城降。複沓甚矣。通鑑作瓦梁城。蓋溫公所見本不誤。當據以改正。隋志六合縣有後齊所置瓦梁郡。

北高唐郡城降。按隋志同安郡宿松縣。梁置高唐郡。今本唐誤作塘又江都郡清流縣有廢樂鉅。高塘二縣。初不見北高唐郡之文。

六月。豫章內史程文季克涇州城。胡三省曰。齊涇州治石梁。是年四月。徐樓已克石梁城。

七月。周昺克巴州城。隋志黃岡縣有後齊所置巴州。

淮北絳城及穀陽士民竝誅其渠帥。以城降。胡三省謂絳城蓋虹縣城。又引彭城郡之穀陽縣證此。穀陽其實皆非也。此文承周昺克巴州城之下。昺傳本云江北諸城。淮絳二字蓋轉寫之誤耳。穀陽亦當在江北。與蘄黃相近。

八月。罷南齊昌郡。按隋志蘄春縣。後齊置齊昌郡。而無南齊昌之名。此紀有南齊昌。又有齊昌。則當時實有二郡。隋志遺其一耳。

九月。陽平城降。按是年四月。已書陽平郡城降。此又云陽平城降。是有兩陽平矣。考隋志江都郡安宜縣。梁置陽平郡。又魏志楚州所領有陽平郡。領陽平。濮陽二縣。或前所書者。安宜之陽平。後所書者。鍾離之陽平乎。東魏楚州治鍾離城

高唐太守沈善度。通鑑作善慶。

左衛將軍樊毅克廣陵楚子城。按魏收志東豫州。太和十九年置。治廣陵城。樊毅所克者。當指此。非江

郡之廣陵也。

十月以黃城爲司州治。下爲安昌郡。滹湍爲漢陽郡。三城依梁爲義陽郡。竝屬司州。按胡三省通鑑注。引魏收志。譙州下蔡郡有黃城縣。以爲黃城在壽陽西。又引水經注。柴水東逕黃城西。東北入於淮。謂之淮口。以證成其說。以予考之。乃大謬也。考隋志。黃陂縣。後齊置南司州。後周改曰黃州。又有安昌郡。則黃城卽黃陂城。因後齊嘗置南司州。故陳亦仍司州之名也。隋志於黃陂縣下。又云。後齊置產州。陳廢之。此紀所云滹湍者。卽後齊之產州。彼志但言廢州。不言改置漢陽郡者。史之闕漏也。隋志木蘭縣。下云。梁置梁安郡。又有永安、義陽二郡。卽此紀之義陽郡也。周書杞國公亮傳。大象初。與章孝寬等伐陳。亮自安陸道攻拔黃城。黃城與安陸相近。則必爲黃陂城。非淮口之黃城矣。當時北征。元有兩路。吳明徹大軍由壽陽趨彭沛。而周吳魯天念輩別取江北蘄黃之地。紀傳所載。本不相混。胡氏乃以下蔡之黃城當之。則安昌、漢陽、義陽皆風馬牛不相及矣。

七年三月。及南豫江郢所部在江北諸郡。按南豫州之歷陽、臨江、江州之齊昌、新蔡、高唐、郢州之齊安、西陽。所謂江北諸郡也。

改梁東徐州爲安州。武州爲沅州。梁之東徐治宿豫。此武州當治下邳郡。非武陵之武州也。隋志下邳縣。梁置武州下邳郡。魏改州曰東徐。後周改曰邳州。而不見沅州之名。

移譙州鎮於新昌郡。隋志所謂南譙州，卽今之滁州。

五月分北譙縣置北譙郡。領陽平所屬北譙西譙二縣。合州之南梁郡。隸入譙州。北譙卽今全椒縣。隋

志。廬江郡慎縣東魏置平梁郡。陳曰梁郡。卽此紀之南梁郡也。西譙縣則隋志無之。

八年十二月分江州晉熙、高唐、新蔡三郡爲晉州。按晉熙郡梁末已置晉州。後爲北齊所有。改爲江州。今仍復其舊也。

十年八月改秦郡爲義州。十月罷義州及琅邪、彭城二郡。立建興、領建安、同夏、烏山、江乘、臨沂、潮熟等六縣。屬揚州。按義州之廢置及建興郡。隋志皆缺而不書。

十一年十二月。南北兗晉三州及盱眙、山陽、陽平、馬頭、秦、歷陽、沛、北譙、南梁等九州。九州當作九郡。

十二年八月。周使持節、上柱國、鄖州總管、滎陽郡公司馬消難。以鄖隨溫應土順沔儂岳等九州。周時鄖州置總管府。隋志漏而不書。并鄖州亦不知所在。胡三省謂周置鄖州於沔陽。亦以意度之耳。州所領有安陸、城陽二郡。城陽卽應城縣見隋本紀。而消難之降。陳授以大都督。總督安隨等九州。八鎮諸軍事。尋

又改安陸郡爲南司州。疑周之鄖州總管府卽置於安陸矣。隨州卽晉宋之隨郡。溫州卽隋京山縣。應州卽隋應山縣。土州卽隋土山縣。順州卽隋順義縣。沔州。隋志未見。疑卽沔州郡。儂當作濃。濃州卽隋吉陽郡。岳州卽隋孝昌縣。

十一月其丹陽、吳興、晉陵、建興、義興、東海、信義、陳留、江陵等十郡。今數之止九郡。

十三年四月分衡州始興郡為東衡州，衡州為西衡州。按天嘉元年已分置東衡州，中間未見併省，非

史有脫漏，則重出矣。

十月改鄱陽郡為吳州。按後主禎明元年割吳郡置吳州，不應同時有兩吳州，蓋鄱陽復置吳州之後

未幾即罷，而史家失書也。

後主紀

五就莫來，五能不至。五能當作八能。

杜僧明傳

城破，斬二侯。按二侯謂交州刺史武陵侯蕭諮、廣州刺史新渝侯蕭映也。武帝紀作新喻傳不書諮之爵，則二

侯字無根。南史同

周文育傳

監州王勳以文育為長流令。按廣州無長流縣，南史文育傳無令字，蓋衍文也。都督府有長流參軍，不

言參軍者，省文，後人妄加令字。

高祖以侯瑱擁據溫州，溫州蓋江州之譌，南史作江州。

侯安都傳

徐嗣徽等復入丹陽。至湖熟。高祖追安都還。率馬步拒之於高橋。今江寧府通濟門外二十里有高橋門。即古高橋也。

而勃戾不悛。勃與悖同。

侯瑱傳

都督江晉吳齊四州諸軍事。江州刺史。晉州治晉熙郡。吳州治鄱陽郡。惟齊州不見於隋志。

歐陽頴傳

改授都督廣交越成定明新高合羅愛建德宜黃利安石雙十九州諸軍事。按以隋志證之。廣州治南海。

交州治龍編。越州治合浦。成州治封川。定州治鬱林。明州治交谷。新州治新興。高州治高涼。合州治

海康。羅州治石龍。愛州治九真。建州治安遂。德州治九德。黃州治安平。利州治金寧。安州治欽江。惟宜

石雙三州無考。舊唐志。梁分建州之雙頭洞立雙州。

吳明徹傳

可都督豫合建光朔北徐六州諸軍事。是時豫州治壽陽。合州治合肥。建州治包信。光州治光城。

即光。北徐蓋治臨沂。惟朔州不見於隋志。按魏收志。南朔州。蕭衍置。治齊坂城。領梁。新蔡。邊城。義陽。新

城、黃川六郡。梁郡領新息縣。而黃川郡。據隋志。乃光山縣地。則朔州蓋在光息之間矣。

程靈洗傳

出爲高唐、太原二郡太守。按梁陳之際。僑立高唐郡於宿松。太原郡於彭澤。故靈洗以郡守鎮南陵。

程文季傳

尋乘金翅助父鎮郢城。金翅。舟名。

又督北徐仁州諸軍事。北徐州刺史。按隋志。琅邪郡舊置北徐州。而仁州無可考。今據魏收志。仁州。蕭

衍置。治赤坎城。領臨淮一郡。郡領已吾、義城二縣。而已吾爲州郡治。則已吾卽赤坎城矣。隋志。彭城郡

之穀陽縣。舊有已吾、義城二縣。後齊併以爲臨淮縣。大業初併入。則已吾卽穀陽縣地。又彭城郡之蘄

縣。後齊置仁州。大業中州廢。穀陽與蘄當亦相去不遠也。

黃法蕤傳

太平元年。割江州四郡置高州。以法蕤爲高州刺史。鎮於巴山。按世祖紀。天嘉四年。罷高州。隸入江州。

與此文相應。而梁書敬帝紀。隋書地理志。竝不載此事。史之漏也。巴山郡。梁置。領大豐、新安、巴山、新建、

興平、豐城、西寧七縣。餘三郡未詳。胡三省以爲臨川。安成、豫寧。不審何據。考是時江州刺史侯瑱。爲余

孝頃所逼。棄州詣闕。則析置高州。所以分孝頃之勢也。然前此周迪據有臨川之地。梁元帝授以高州。

刺史則高州之名不始於此矣。

淳于量傳

都督郢巴南司定四州諸軍事。此南司州即隋之黃陂縣。宣帝紀所謂黃城也。此定州即魏收志所云

南定州治蒙籠城者。隋改名麻城。麻蒙聲相近。

胡穎傳

以穎爲五原太守。五原郡未詳所在。

徐敬成傳

尋復爲持節都督安元潼三州諸軍事。安州刺史鎮宿預。此安州即梁之東徐州。治宿預。潼州治夏邱。

元州蓋卽下邳郡。隋志下邳梁置武州而陳書宣帝紀。太建七年改武州爲沅州。其時荆部已有沅州。以此傳證之。當爲元州矣。隋志不載元州之名亦漏也。

沈恪傳

光大二年遷使持節都督荆武祐三州諸軍事。平西將軍。荊州刺史。按祐州之名不見於隋志。宣帝紀。

太建十二年淳于陵克祐州城。未知卽此祐州否。

都督廣衡東衡交越成定新合羅愛德宜黃利安石雙等十八州諸軍事。按歐陽顥傳都督十九州。此

有衡東衡而無明高建及南康嗣王方泰都督十九州。本傳云廣衡交越成定明新合羅德宜黃利安建石崖數之實十八州。蓋史有脫文。後主末年除王勇總督衡廣交桂武等二十四州諸軍事。則史家不能悉數之矣。

徐世譜傳

除通直散騎常侍、衡州刺史、資鎮河東太守。鎮嘗作領梁陳之間。往往有以刺史資領郡守縣令者。程靈洗以譙州刺史資領新安太守。徐世譜以衡州刺史資領河東太守。陳詳以青州刺史資領廣梁太守。熊曇朗以桂州刺史資領豐城縣令。黃法甌以交州刺史領新淦縣令。錢道戡以東徐州刺史領錢塘餘杭二縣令。章昭達先除定州刺史而後爲長山縣令。亦是以刺史資領縣令也。又有以刺史資監別州者。陳擬以雍州刺史資監南徐州。華皎以新州刺史資監江州是也。魯悉達傳。

梁元帝授持節、仁威將軍、散騎常侍、北江州刺史。此北江州當置於晉熙郡。及悉達濟江而歸。高祖授以北江州刺史。則移治江南。隋志所云南陵郡、陳置北江州是也。

齊遣行臺慕容紹宗以衆三萬來攻鬱口諸鎮。按慕容紹宗之死在齊未受禪以前。安得此時尙存。此史家傳聞之誤。南史亦承舊文而未據北史以正之。

周敷傳

梁內史始興藩王蕭毅。按梁書及南史始興王憺薨世子亮嗣無名毅者。

周昞傳

授戎威將軍定州刺史帶西陽武昌二郡太守。梁置定州成江北蒙籠城陳初畫江為界未得有其地。

昞蓋鎮武昌而遙帶州名耳。

進授使持節西道都督安蘄江衡司定六州諸軍事安州刺史。此安州當是安陸郡蘄州即蘄春又為

齊昌郡江州即永安郡隋志謂之北江州衡州即齊安郡司州即黃陂隋志謂之南司州其時皆未入版圖方議北伐

遙假六州之名耳。

以衆二萬出自巴蘄。隋志黃岡縣有後齊所置巴州即此傳之巴州非巴陵之巴州也。

衡陽王昌傳

尋與高祖俱往荊州。高祖當作高宗。

又與高祖俱遷關右。高祖當作高宗。

南康愨王曇朗傳

上曰不承則上刑。上刑南史作上測。按隋書刑法志載陳時律令其有賊驗顯然而不款則上測立。立測者以土為塚高一尺上圓劣容囚兩足立鞭二十笞三十訖著兩械及杻上塚一上測七刻日再上。

蔡景歷傳

衡陽獻王時為吳興郡。昌年尚少。當移昌字於衡陽獻王之下。

禎明元年。配享高祖廟庭。本紀不載此事。疑所配享乃高宗也。

王通傳

父琳。司徒。左長史。此別一王琳。

劉仲威傳

隨莊入齊。終於鄴中。按。仲威仕於蕭莊。莊敗。隨入北齊。義不臣陳。嘗附梁史劉之遴傳。不應入陳書。

沈炯傳

字禮明。南史作初明。

馬樞傳

梁邵陵王綸為南徐州刺史。素聞其名。引為學士。按。梁時東宮有學士。據此傳。則王府亦有學士也。又

梁有壽光殿學士。士林館學士。西省義學士。陳有嘉德殿學士。姚察。沈不宣。明殿學士。姚察。天保殿學

士。陸德教殿學士。裴翼。陸從。阮卓。撰史學士。顧野王。傅緯。五禮學士。沈德威。而東宮亦有學士。有義省學士。

華皎傳

尋詔督尋陽太原高唐南北新蔡五郡諸軍事尋陽太守。此南北新蔡郡當在江北黃梅縣。而隋志無其文。黃梅縣本名永興。隋開皇初改曰新蔡。蓋因舊郡名以名縣耳。

蕭乾傳

陳寶應在建晉。建晉謂建安。晉安也。褚玠傳。稽陰大邑。久無良宰。謂會稽山陰也。

謝嘏傳

陳郡夏陽人也。夏陽當作陽夏。

蕭引傳

靖卽悟旨。盡遣兄弟下都爲質。按蕭引奉使廣州。在太建末。及後主至德初。仍命陳方慶以兵襲靖。誅之。陳氏武功之不振。蓋由於此。

陸子隆傳

東昌縣人。修行師。按隋志廬陵郡有東昌縣。

周弘正傳

出爲鄴令。梁之鄴縣。未審所在。袁廷禧曰。鄴疑是鄴字。

世祖九王傳

二男早卒。本書無名。思廉所稱本書，當即其父察撰述之本。

初高祖兄始興昭烈王道談，梁紹泰二年，追贈侍中、使持節、都督南兗州諸軍事、南兗州刺史，封義興郡公。按高祖紀，梁太平二年，詔贈高祖兄道談散騎常侍、使持節、平北將軍、南兗州刺史、長城縣公。與此互異。敬帝以紹泰二年改元太平，始進封陳霸先義興郡公，則道談贈官必在太平以後。且紀於永定元年，嘗追贈皇兄長城縣公道談太尉，封始興郡王，似無追封義興郡公之事。又高祖紀稱梁太平二年，贈弟休先本或作休光南徐州刺史、武康縣侯，而南康王曇朗傳稱休先追封武康縣公，疑亦傳誤。

高宗二十九王傳

晉熙王叔文，荊州刺史陳紀，即陳慧紀也。史脫一字。

蕭摩訶傳

封廉平縣伯。按隋志，廉平縣屬清遠郡。

任忠傳

改封梁信都郡公。南史無都字。考隋志，梁有梁信郡，領梁信縣，隋為封川縣。

孝行傳

謝貞，孤子，覺禍所集。按貞以母憂去職，父已先亡，而自稱孤子，可證溫公書儀母亡稱哀子。唐以後

始有之。

儒林傳

沈不害。尋兼文林著士。按陳時學士之外。又有著士。張正見、阮卓皆爲撰史著士。據此傳。則文林館亦有著士矣。

王元規。姻不失親。古人所重。此以因作婚姻解。與論語孔安國義異。

文學傳

何之元。驃騎王琳崇立後嗣。雖不達天命。然是其忠節。今以如干卷爲後嗣王。按何之元梁典自敬帝禪陳。卽繼以會稽王莊。稱爲後嗣主。其直筆非思廉所及。



廿二史考異卷二十八

魏書一

序紀

神元皇帝元年歲在庚子。是歲魏文帝受漢禪。改元黃初。

昭成皇帝。司馬昭死。衍子千齡僭立。按魏收史於慕容元真石大雅苻永道僞文通皆稱字。避魏諱也。晉哀帝名丕無所回避。何以亦稱字。

太祖紀

登國三年渡弱落水。弱落卽饒樂聲之轉。

世祖紀下

太平眞君三年征南將軍東安公刁雍東趨廣陵。此非揚州之廣陵。在今光州息縣。魏時嘗置東豫州於此。

高祖紀上

延興元年劉彧將垣崇祖率衆二萬自郁洲寇東兗州。此東兗州治瑕邱卽劉宋之兗州。魏泰常中已

置兗州於滑臺。故此加東字。游明根傳。由都督兗州諸軍事。瑕邱鎮將。就拜東兗州刺史是也。

二年。以萬安國爲大司馬。大將軍。封安城王。安城當作安成。安國傳亦誤作安城。

太和元年。廣川公皮懽喜。本傳作皮喜。

高祖紀下

十六年。詔祀唐堯於平陽。虞舜於廣寧。夏禹於安邑。周文於洛陽。周文當爲周公之譌。北史亦誤

十八年。可詔荆郢東荆三州。勒敕蠻民。是時荆州治魯陽。郢州治南安。今葉縣東荆州之名。不見於地形

志。據蠻傳。延興中。大陽蠻酋桓誕擁沔水以北。蠻葉以南。八萬餘落。遣使內屬。高祖拜誕征南將軍。東

荆州刺史。治於朗陵。太和十年。移居潁陽。而隋志云。淮安郡。後魏置東荆州。其地即隋之比陽縣。未審

孰是。房亮。楊大眼。薛真度。酈道元。寇治。元顯恭。陸恭之。杜顯。張熠。裴佗。俱嘗爲東荆州刺史。

二十年。廣州刺史薛法護南叛。按地形志。廣州。永安中置。治魯陽。據此紀。則廣州之名。先已有之。但其

時魯陽爲荆州治所。未知廣州治何城也。太宗時公孫表爲廣州刺史。

世宗紀

太和二十三年。南徐州刺史沈陵南叛。按是時沈陵據宿豫以叛。則南徐州治宿豫也。而地形志謂宿

豫郡。高祖初立東徐州。似誤。太和之世。東徐治圍城。不應更置於宿豫也。

肅宗紀

熙平二年，城青徐、兗、涇、平、營、肆七州所治。東陽、歷城、瑕邱、平涼、肥如、和龍、九原七城。按：諸州治所，地形志具載之。惟涇州，志云治臨涇城，而紀作平涼，未詳。

正光二年，南荊州刺史桓叔與自安昌南叛。按：南荊州不載於地形志，安昌蓋其治所也。隋志：春陵郡，後魏置南荊州，西魏改爲昌州，卽此。

孝昌三年，東秦州刺史潘義淵以汧城降。按：地形志：北華州，太和十五年置東秦州，後改治杏城，則東秦卽北華也。而此紀下文卽有賊帥胡引祖，據此華州以應之之語，似別有一東秦州。

出帝紀

永熙元年，夏州徙民郭遷據宥州反。宥，非州名，通鑑作青州，當從之。以侍中、驃騎大將軍封陰之，任祥竝爲儀同三司。陰之，當是隆之之譌。

二年，都督河渭部三州諸軍事、驃騎大將軍、世襲河州刺史梁景叡。按：部，非州名，恐是鄴字之譌。孝靜紀

天平元年，以魏郡、林慮、廣平、陽邱、汲郡、黎陽、東濮陽、清河、廣宗等郡爲皇畿。按：地形志：無陽邱郡，當是陽平頓邱二郡各脫一字耳。志亦無東濮陽，東下當脫郡字。志尙有北廣平一郡，紀亦脫之。

元象元年。豫州刺史堯雄攻揚州。拔之。揚當作陽。地形志。陽州領宜陽、金門二郡。

興和二年。西魏行臺宮延和。陝州刺史宮元慶率戶內屬。置之河北。按地形志。汲郡汲縣有陳城。興和

二年。恆農人率戶歸國。仍置義州於城中。卽此事也。汲郡在河北。恆農卽陝州。天平末。陝州入西魏。興

和中。乃立義州。置恆農、新安、渾池、宜陽、金門諸郡。以撫其流民也。魏收孝靜紀已亡。後人據它書補之。

其於西魏事例書寶炬。獨此書西魏。蓋沿舊文而未及改更耳。

四年。封祖裔爲尙書右僕射。祖裔卽隆之也。此獨書其字。

武定七年。相譚侯蕭退來降。相譚當作湘潭。

皇后傳

景穆恭皇后郁久閭氏。河東王毗妹也。外戚傳。閭毗本蠕蠕人。蠕蠕姓郁久閭氏。後改稱閭氏。此傳猶

仍舊稱。蓋非魏收本文也。高宗紀但云母閭氏。

昭成子孫傳

常山王素。於涿鹿之陽。立平原郡以處之。此事地形志不載。

可悉陵。沮渠茂虔令一驍將。茂虔卽牧健。譯音無定字。但魏收史皆用牧健字。此作茂虔。蓋後人以

它書補綴。未及檢改。

陳留王崇。子建。建子琛。位恆朔二州刺史。按魏宗室多同名者。陳留王崇之孫名琛。而隴西輪公之子亦名琛。文成之孫又有河間王琛。任城王澄之孫名朗。而章武王彬之孫亦名朗。即後廢帝南安王楨之孫長廣王名从日。从華。而咸陽王禧之孫亦與同名。昭成之孫有毗陵王順。而任城王澄之子亦名順。道武之子有陽平王熙。而中山王英之子亦名熙。道武之子有河間王脩。而廣平王懷之子亦名脩。即帝武昌王鑒之子名亮。而江陽王繼之孫亦名亮。烈帝之後有東陽王丕。而明元之子又有樂平王丕。明元之子有建寧王崇。而昭成之後亦有陳留王崇。昭成子有秦王翰。而太武子又有東平王翰。亦嘗封秦王。南安王楨之孫有章武王融。而陽平王新成之孫亦名融。河南王曜之曾孫有武昌王鑒。而安樂王長樂之孫亦名鑒。文成子有廣川王略。而中山王英之子亦名略。獻文子有趙郡王幹。而昭成之後亦有新蔡公幹。高陽王雍之孫有濟北王徽。而咸陽王長壽之孫亦名徽。秦王翰之孫有中山王纂。而南平王渾之孫亦名纂。中山王略之弟又名纂。河南王曜之子有武昌王提。而臨淮王譚之子亦名提。烈帝之後又有樂城侯提。廣陽王淵之子名湛。而章武王融之弟亦名湛。明元之子有新興王俊。而章武王彬之孫亦名俊。道武之子有清河王紹。而常山王遵之曾孫亦名紹。常山王遵之孫有城陽公忠。而樂浪王萬壽之曾孫亦名忠。臨淮王提之子名昌。而咸陽王禧之子亦名昌。太武之子有臨淮王譚。而趙郡王幹之子亦名譚。淮南王他之孫名顯。而武昌王平原之孫亦名顯。淮南王他之曾孫名均。

而汝陰王天賜之孫亦名均。衛王儀之子有南陽王良。而樂安王範之子亦名良。陽平王新成之子名欽。而彭城王勰之孫亦名欽。至若景穆之子。陽平濟陰二王俱名新成。因稱濟陰為小新成以別之。此其尤異者也。廣陽王深本名淵。後人避唐諱追改。非與趙王深同名。

道武七王傳

禹。東海太守。帶嗣。晤。戍主。嗣當作嗣。本司吾。後人加山旁。

伯和。諡曰哀王。此下脫一葉。

景穆十二王傳中

任城王澄。澄奏宜以東中帶滎陽郡。南中帶魯陽郡。西中帶恆農郡。北中帶河內郡。此奏在肅宗朝。

既未見納。然元菴於世宗時。已為北中郎將。帶河內太守矣。臨濟都以南中郎將帶魯陽太守。未詳何時。楊津肅宗時除北中郎將帶河內太守。

天網恢恢。疏而不漏。今本老子皆作不失。惟景龍石刻本作不漏。

東阿公順。廣陽王淵。姦徽妻于氏。此傳及肅宗紀。李崇。崔光。辛纂。賀拔勝。儒林。文苑傳俱云廣陽王

淵。而太武五王傳作深。蓋魏史太武五王傳已亡。後人取北史補之。北史避唐諱。改淵為深。而校書者

不知追改也。

景穆十二王傳下

中山王英。衍中軍大將軍。臨川王蕭宏。按魏史於諸帝之諱。皆回易本字。如崔宏稱元伯。慕容恪稱元恭。是也。而紀傳於蕭宏之名。多不回避。必非魏收元文。當從麴夷傳作蕭密爲是。餘皆後人據南史追改。

貴平。除北平將軍。南相州刺史。按地形志不載南相州之名。

獻文六王傳上

咸陽王禧。高祖以諸弟典三都。三都謂中都、內都、外都也。三都大官皆典獄訟者。

孝文五王傳

清河王懌。囚懌於門下省。誣懌罪狀。據此文。知胡后傳所書逼幸懌事。出於元叉誣陷。不足信也。此卷文多殘闕。如懌子亶襲王爵。孝武西奔。亶承制行事。皆當見於本傳。又廣平王懷傳全篇俱闕。汝南王悅傳亦有脫文。卷末又無史臣論讚。

崔玄伯傳

加周兵將軍。按魏初將軍之號。有晉兵、奚斤、樓伏連、薛提、吳兵、公孫表、楚兵、叔孫建、鄭兵、奚秦兵、賀狄、宋兵、周魯兵、安衛兵、王陳兵、尉眷、周兵、崔玄伯、勝兵、張義兵、封又正直將軍叔孫建、功勞將軍元屈、直意將軍王洛兒、忠意將軍車路頭、黑稍將軍於栗磾。皆前代所未有也。

顯祖以爲安南將軍、南冀州刺史。按劉宋冀州治歷城。魏因崔道固故官授之。信都有冀州。故加南字。

尉古真傳

出爲平西將軍、東涼州刺史。按地形志無東涼州。

古弼傳

賜名曰筆。取其直而有用。後改名弼。言其輔佐材也。北人讀弼如筆。譯音無定字。非必別有取義。

陸真傳

都督沃野、武川、懷朔三鎮諸軍事、安北將軍、懷朔鎮大將。按江陽王繼高祖時。由撫冥鎮都大將。轉都

督柔元、撫冥、懷荒三鎮諸軍事、柔元鎮大將。陸延於正始初。由武川鎮將。除都督沃野、武川、懷朔三鎮

諸軍事、懷朔鎮大將。宇文福亦爲都督懷朔、沃野、武川三鎮諸軍事、懷朔鎮將。是六鎮之中。又以柔元

懷朔爲要鎮也。其後置朔州於懷朔鎮。慕容契爲都督朔州、沃野、懷朔、武川三鎮三道諸軍事、朔州刺

史。楊椿爲都督朔州、撫冥、武川、懷朔三鎮三道諸軍事、朔州刺史。

于栗磾傳

都督兗、桓二州諸軍事、鎮南將軍、枋頭都將。桓當作相。

高湖傳

漢太傅哀之後。按唐書宰相世系表。後漢渤海太守高洪。居渤海薊縣。四世孫襲。字宣仁。太子太傅。此卽湖之祖也。此太傅上當有太子二字。漢時太傅爲上公。除授者甚少。安得有高哀其人乎。哀亦襲之俗體字。易。哀多益寡。唐石經作襲。

都督壽徐齊濟兗五州諸軍事。壽當作青。地形志無壽州。

崔浩傳

今茲害氣在揚州。不宜先舉兵。是歲歲在庚午。午害丑。丑爲星紀。吳越之分。又雪之消液。纒不斂塵。纒不通鑑作僅能。

李順傳

平東將軍西兗州刺史。此西兗州治滑臺。非地形志之西兗州也。志之西兗治定陶。乃孝昌中所置。仍除北雍州刺史。按地形志無北雍州。

正光二年。南荊州刺史桓叔興驅掠城民。叛入蕭衍。衍資以兵糧。分築谷陂城。以立洛州。逼土山戍。梁置洛州於南荊境內。尋爲魏人所陷。故隋志不載。

司馬楚之傳

奚斤旣平河南。以楚之所率戶民。分置汝南、南陽、南頓、新蔡四郡。以益豫州。是時豫州治虎牢。楚之屯

據汝穎間距南陽尚遠蓋僑置也。

殺姚縱夫於壽春。通鑑作登夫。

開府儀同三司雲中鎮大將朔州刺史。魏初置朔州於雲中楚之及子金龍寶龍相繼為刺史。

刁雍傳

延和二年立徐州於外黃城置譙梁彭沛四郡九縣。按地形志陽夏郡濟陽縣有外黃城延和二年置

徐州皇興初罷蓋徐州治外黃者三十餘年至皇興初薛安都以彭城入魏乃移州治彭城也。

臣鎮去沃野八百里。刁雍時為薄骨律鎮將表稱臣鎮去沃野八百里則沃野與薄骨律非一地而通

鑑注引宋白云太和十年改薄骨律鎮為沃野鎮不知何據。慕容契正始初除都督沃野薄骨律二鎮諸軍事沃野鎮將

遵少不拘小節自此以下複述遵事遙接上文遵字奉國襲爵旬而間以遵弟獻獻弟融融弟肅云云

太史公列傳敘事往往如此刊本以融弟肅提行而遵少不拘小節云云即承其上汲古閣本遂疑遵

字乃肅字之誤大不然矣楷尚整皆遵之子非肅子也。

蕭衍新化太守杜性新化令杜龍振平陽令杜臺定等率戶三千據地內附。按刁遵時為洛州刺史治

上洛則此新化郡當距上洛不遠考地形志南郢州宕都郡有西新化東平陽二縣疑即梁之新化郡也。

薛辯傳

長子初古拔。曰車轂拔。初與車古與轂聲相近。汲古閣本麟作輅誤。

除冠軍將軍、南豫州刺史。南豫州治懸瓠。卽地形志之豫州也。

與南兗州刺史游明根。明根傳作東兗。此誤也。正光中始置南兗州於譙城。延興時尙無南兗之名。

自徙都洛邑。鳳子兄弟移屬華州河西郡焉。按地形志華州無河西郡。

贈都督冀定太三州諸軍事、車騎將軍、冀州刺史。太州蓋天平中所置。而地形志無之。監本太作泰

和因表立東夏州。世宗從之。據地形志東夏州延昌二年置。

寇讚傳

拜譚安遠將軍、南雍州刺史。治於洛陽。立雍州之郡縣以撫之。按南雍州之置。地形志亦闕而不書。

遷建威將軍、郢州刺史。及高祖南遷。郢州地爲王畿。除弘農太守。按高祖遷洛之後。於洛京置司州。罷

懷陝郢北豫東雍諸州屬焉。仿古王畿千里之制也。魏史避顯祖諱。皆稱恆農。此獨不回避。蓋後人妄

改楊播傳亦有作弘農者

劉休賓傳

稍遷幽州刺史、鎮梁鄒。此劉宋僑立之幽州。無實土。宋志亦不載。

房法壽傳

加法壽綏邊將軍、魏郡太守。此魏郡僑置於齊地。地形志所謂東魏郡、治歷城、後徙臺城者也。

以兼侍中房靈賓督清河廣川郡事。戍盤陽。地形志東清河郡治盤陽城。故房士隆亦以東清河太守

帶盤陽鎮將。崔勗以清河太守帶槃陽鎮將。槃與盤同。

以功賜爵壯武侯。加平遠將軍。按上文法壽已授平遠將軍矣。不應更加平遠之號。前後當有一誤。考

房彥謙碑述其先世云。法壽以魏郡太守立功歸魏。封莊武侯。壯莊二文古相通。使持節、龍驤將軍、東冀州刺

史。然則後所加者。蓋龍驤將軍也。平遠將軍弟四品。龍驤將軍弟三品。故云加。

韋閔傳

又有武功蘇湛。按韋閔傳未附見武功蘇湛。天水姜儉二人。刊本誤以蘇湛提行。而又有武功四字贅

於前文之下。不可通矣。

裴駿傳

出爲平南將軍、郢州刺史。詢以凡司戍土蠻。魯田朴特地居險要。衆踰數萬。足爲邊捍。遂表朴特爲西郢

州刺史。按西郢州之置。不載於地形志。據此傳。蓋在肅宗時也。隋志比陽縣又有比陽故縣。置西郢

州。西魏改爲鴻州。卽此。

辛紹先傳

孝昌初，釋褐南司州龍驤府錄事參軍。按地形志，南司州，魏正始元年爲郢州，孝昌三年陷，蕭衍改爲司州。武定七年復，乃有南司之名。辛子馥仕孝昌初，其時無南司州也。

後除給事中，南冀州防城都督。此南冀州治聊城，地形志，平原郡，武泰初立南冀州，永安中罷州，路思令傳，割冀州之清河、相州之陽平、齊州之平原以爲南冀州。

持節爲南濟冀濟青四州慰勞使。南濟州未詳所在。

許彥傳

武定末，東陽平太守。東陽平郡屬兗州。

西高陽太守。按地形志，瀛州、青州皆有高陽郡，以地望準之，瀛州之高陽在西。

李訢傳

父崇，此又一李崇。

以崇爲平西將軍，北幽州刺史。北幽州未詳所在。

高允傳

京兆韋閔友規，閔傳作友觀。

允秋月巡境問民疾苦至邵縣邵縣即邵上郡此時罷為縣屬河內郡允為懷州刺史正其屬縣也允與從叔濟族兄毗及同郡李金俱被徵按篇末竝舉三人名乃但敘濟毗而不及金何也若云金事別見李叔虎傳則此文又為繁複矣濟字叔民毗字子翼已見前徵士頌而又書之是不可省乎徵士頌金

欽作

崔鑒傳

孝昌末冀州流民聚於河外因立東冀州除秉為刺史東冀州未詳所在

尉元傳

散騎侍郎張引領卒二千守茱萸按地形志彭城郡呂縣有茱萸山

元表淮陽郡上黨令韓念祖按尉元在徐州表稱南濟陰郡睢陵縣人趙憐等乞念祖為令詔聽如請

然地形志無上黨睢陵二縣并未見南濟陰郡名考沈約州郡志淮陽郡有上黨縣本流寓郡併省來

配濟陰郡有睢陵縣皆屬徐州徐州又有北濟陰郡故稱南也魏初得徐兗諸州其郡縣大率因宋舊

後來郡縣有併省又多析置之州名目紛然考證益難矣茹皓寓居淮陽上黨

以山陽在畿內改為博陵郡開國公按孝文遷洛之後畿內郡國不以分封故河南王幹徙封趙郡類

川王雍徙封高陽平陽公丕徙封新興山陽公尉詡改封博陵榮陽侯李冲改封陽平河東侯薛達改

封華陰。

韓茂傳

先是河外未賓，民多去就，故權立東青州，爲招懷之本。新附之民，咸受優復，然舊人姦逃者，多往投焉。均表陳非便，朝議罷之。東青州未詳所在，顯祖初游明根爲東青州刺史。

劉昶傳

除其一子爲郢州雲陽令。按地形志，雲陽縣屬廣州定陵郡。太和中，郢州治南安，其時未有廣州也。

李孝伯傳

遷之於兗豫之南，置淮陽郡以撫之。是時魏未得淮北之地，兗州治滑臺，豫州治虎牢，此淮陽郡亦僞置，非東楚州之淮陽也。

崔挺傳

又除都督三荆諸軍事。三荆謂荊州、東荆、南荆也。荊州亦稱西荆。辛纂行西荊州事。

武泰初，改郡爲唐州。

按地形志，晉州、孝昌中置唐州，建義元年改武泰之元年，即孝昌四年也。其年即

改建義，則平陽之爲唐州不及一年。

變子鵠傳，余朱榮向洛假節都督河東正平軍事，行唐州刺史，建義初拜晉州刺史。

以本將軍出除管州刺史，管當作營。

楊播傳

建義初。除冠軍將軍、東雍州刺史。其年州罷。據此傳。東雍州於建義初始罷。而地形志云東雍州太和

中罷。未詳誰是。

出除都督雍南豳二州諸軍事。本將軍、雍州刺史。按地形志無南豳州。

永熙中。以本將軍除北雍州刺史。按地形志無北雍州。

薛安都傳

永平初。分梁州晉壽爲益州。按地形志。益州。正始中置。永平元年。卽正始五年也。

田益宗傳

都督光城、弋陽、汝南、新蔡、宋安五郡諸軍事。按地形志。東豫州領汝南、東新蔡、弋陽、長陵、陽安六

郡。與此互異。志所據者。武定之郡縣。傳所書者。太和之郡縣也。

與祖太和未。亦來歸附。景明中。假郢州刺史。及義陽置郢州。改授征虜將軍、江州刺史。治麻城。與祖卒。益

宗請隨與代之。世宗不許。罷并東豫。隋時立麻城縣。蓋因此名。地形志有北江州。未審卽其地否。

王肅傳

除都督豫關東鄆三州諸軍事。本將軍、豫州刺史。按太和十八年。置東鄆州於汝陰。治社亭城。

加都督豫南、兗、東、荆、東、豫四州諸軍事。此南兗州治渦陽，非地形志之南兗治譙城者也。志之南兗州，正光中置。

邢辯傳

河間鄭人也。鄭當作鄭。

蕭淵藻是羣劇少年。北史作蕭履少年。此云羣劇，疑後人妄改。

李平傳

頓邱人也。彭城王嶷之長子。按皇后、外戚二傳俱云梁國蒙縣人。而此傳及李崇傳俱云頓邱人。此里

居之互異也。嶷封彭城王。外戚傳亦失之。

李崇傳

許昌縣令兼紆麻戍主陳平玉南引衍軍。按地形志揚州潁川郡之許昌縣有硤石山。即此傳之許昌。

非曹魏建都之許昌也。

崔亮傳

高祖聞之嘉其清貧。詔帶野王令。魏世京職俸薄。亮雖任中書侍郎、尚書左丞。而幹祿猶不如縣令之

饒裕。故令其帶野王令。同時北中府長史裴聿亦帶溫令。

崔休傳

青州九郡民。按地形志。青州領齊、北海、樂安、渤海、高陽、河間、樂陵七郡。

裴延儻傳

孝莊初爲廣州防蠻都將。行廣漢郡事。廣漢當作漢廣。

袁纘傳

皇興中東陽州平。隨文秀入國。按青州治東陽城。東陽非州郡之名。當云青州平。或云東陽平。詞意乃通。

劉藻傳

在任八年遷離城鎮將。太和中改鎮爲岐州。按地形志。岐州太和十一年置治雍城鎮。則岐州本雍城鎮也。據此傳。藻爲雍城鎮將。在任八年。乃遷離城鎮將。則離城與雍城非一地。岐州乃離城鎮所改。與志自相矛盾。

傅豎眼傳

南徙渡河。家於磐陽。磐陽卽盤陽。漢之般陽縣也。東清河郡治此。

拜靈越鎮遠將軍。青州刺史。貝邱子。鎮羊蘭城。按地形志。滄州樂陵郡之厭次縣。有羊蘭城。韓均傳謂

河外未賓。權立東青州者。疑卽此。皇興初。慕容白曜定青州。因於此加東字。

蕭衍遣其信武將軍、衡州刺史張齊。按南史齊爲南梁州刺史。都督梁西益巴三州諸軍事。按地形志無西益州。

李神傳

累遷威遠將軍、新蔡太守、領建安戍主。按地形志豫州、東豫州、潁州、霍州、南定州、蔡州、揚州、南朔州、南建州皆有新蔡郡。梁書夏侯詳傳建安戍爲魏所圍以詳爲建安戍主帶邊城新蔡二郡其後席法友爲安豐、新蔡二郡太守、建安戍主。法友去而胡景略代之。其時建安戍尙屬齊。景明元年魏始得壽陽。移兵攻建安。景略請降。自是建安始屬魏。而李神亦以新蔡太守領建安戍主。是新蔡郡常治建安矣。此新蔡疑是揚州之新蔡。據地形志所領有新蔡、固始二縣。一統志云新蔡廢郡在固始縣東者也。轉寧遠將軍、陳留太守、領狄邱戍主。此陳留疑亦揚州之陳留。

夏侯道遷傳

衍以王鎮國爲刺史。鎮當作珍。

楊大眼傳

以功封安成縣開國子。按楊大眼造像記石刻作安戎縣。安戎屬略陽郡。與仇池爲近。此作成。傳寫之譌也。北史作安城亦誤。

余朱榮傳

太祖初以南秀容川原沃衍欲令居之。南秀容蓋肆州之秀容。都督并肆汾廣恆雲六州諸軍事。按廣州治魯陽非榮所得督當是燕字之譌。則彭章伊霍夫何足數。彭章謂大彭豕章也。監本章作韓誤。

余朱仲遠傳

兼尙書左僕射、三徐州大行臺。三徐者徐州及北徐東徐也。

余朱度律傳

復除軍州刺史。軍字誤。

張普惠傳

衍又遣定州刺史田超秀、田僧達等竊陷石頭戍。徑據安陂城。按地形志南朔州之邊城郡治石頭城。

卽石頭戍也。

樊子鵠傳

乃分兵擊衍苞州、然州、宕州、大澗、蒙縣等五城。此梁所置諸城當去譙城不遠。

賀拔勝傳

都督三荆、二郢、南襄、南雍七州諸軍事。按地形志無南雍州。

尋兄可泥。即賀拔允也。

尋詔岳都督陝、北、幽、二夏四州諸軍事。按地形志無北幽州。

加岳都督三雍、三秦、二岐、二華諸軍事、雍州刺史。後魏置北雍州於華原、東雍州於鄭縣。據隋志併雍州。

爲三雍也。三秦之名未詳。據地形志。但有秦與南秦、太和中嘗置東秦、即北華也。

詔岳都督雍、華、北華、東雍、二岐、幽、四梁、二益、巴、二夏、蔚、寧、南益、涇二十州諸軍事。四梁謂梁及東梁、南

梁、北梁也。周書魏廢帝三年改東梁爲金州、南梁爲隆州、北梁爲靜州。今地形志無北梁。史之闕也。寧

與南益二州。地形志亦失書。

常景傳

仍詔景爲幽安元等四州行臺。幽安元止三州。而云四州。恐有誤。地形志亦無元州。

外戚傳上

李峻。峻與五弟誕、嶷、雅、白、永等前後歸京師。峻封頓邱公。雅、嶷、誕物皆封公位。顯後進峻爵爲王。按

魏收史外戚傳上卷已亡。後人以它書補綴。故嶷等封號及事迹皆不詳。考顯祖紀和平六年封繁陽

侯李嶷爲丹陽王。皇興元年進馮翊公李白爵梁郡王。而李平傳云彭城王嶷之長子。則嶷初封丹陽

王又改封彭城也。李崇傳云：襲爵陳留公崇，為誕之子，則陳留必誕之封號也。高祖紀：太和四年，頓邱王李鍾葵有罪，賜死。此峻之後襲爵者，而傳亦不載。

良吏傳

杜纂。又詣赭陽、武陰二郡，課種公田。武陰疑是舞陰之譌，地形志無此二郡，蓋後來省併。

術藝傳

劉靈助。破西胡於韓陵山。西當作四。四胡謂余朱天光、余朱兆、余朱度律、余朱仲遠也。

劉裕傳

遣其黨俞伯奇出頓大電。大電疑大雷之譌。

蕭道成傳

圍寶卷輔國將軍、北新安豐二郡太守胡景略於建安城。北新下脫蔡字。

蕭衍傳

衍將蕭昞寇淮陽。梁書有吳平侯景，即此蕭昞也。唐人避諱，追改。

荊州刺史桓叔興。當作南荊州，脫南字。

益州刺史蕭潤猷。潤當作淵。

黑獺亡山之走。亡嘗作芒。

氏傳

後稱藩於晉。永和十年。改初爲天水公。此篇以東晉永和、太和、咸安紀年。後乃用登國之號。又稱晉國號。不斥晉帝姓名。蓋非魏收史之舊。後人取北史補入。

匈奴宇文莫槐傳

子邱不勳立。尙平文女。按序紀。邱不勳妻平帝綽女。非平文帝律體女。此傳誤。北史亦與此同。

自序

成帝世終鉅鹿太守。此成帝謂漢成帝也。魏歆仕於漢成帝朝。而其子悅乃仕於元魏太武之世。此理之所必無者。伯起亦通人。何至憤憤乃爾。良由魏史自序久亡。後人節取北史補之。而北史又有脫簡。後人無從校正爾。

於是與通直常侍房延祐、司空司馬辛、元植、國子博士刁柔、裴昂之、尙書郎高孝幹。按魏收上十志啓。啓末列名者。有辛元植、刁柔、高孝幹。而無房延祐、裴昂之。又多前西河太守綦母懷文一人。前後二表一啓焉。按史例。序論表啓皆出收一人之手。此二表一啓下。當有獨出於收四字。



廿二史考異卷二十九

魏書一

天象志三

皇始二年六月庚戌月掩金於端門外。此卽前卷所書月掩太白事。占驗亦略同。蓋魏收志第三第四卷闕失。後人以張太素書補之。太素天文志祇有兩卷。凡月與五星變異。但依年代順敘。不復區別。與魏收志體例各殊。故此卷月掩犯多與前兩卷重出。

由是魏爲北帝。而晉氏爲南帝。按太素唐人。故於南北朝無偏黨之詞。其書蕭衍起兵襄陽。推南康王寶融爲帝。則稱東昏爲東主。和帝爲西君。其書東西魏事。則云由是分爲二國。又云東西帝割據山河。又云梁魏三帝皆大赦改元。非若魏收之黨於鄴都。魏澹之黨於關西也。

明年齊將陳達伐我南鄙。陷澧陽。澧陽本紀作醴陽。陳達卽陳顯達也。當是唐人避諱去顯字。

天象志四

是時渤海王歡起兵信都。魏收史稱高歡爲齊獻武王。此志前書渤海王歡。後書大丞相歡。

地形志上

今錄武定之世以爲志焉。按伯起志州郡不述太和全盛之規轉錄武定分裂之制至秦雍以西不在

東魏疆域之內乃據永熙館籍以足之未免自亂其例矣。

魏尹 貴鄉天平二年分館陶置治趙城有東中郎將治。按孝靜帝紀天平元年初置四中郎將於疆

石橋置東中蓋即貴鄉縣地。

東郡秦置治滑臺城。按志載州郡所治皆舉城名而不言其縣故考證爲難今略言其可知者滑臺城

即東郡之白馬縣也。晉州治白馬城則平陽之禽昌縣也。太平寰宇記後魏擒赫連昌於白馬城置禽昌縣

濮陽郡 城陽二漢晉屬濟陰 城當作成。

常山郡 孝章建初中爲淮陽永元二年復。按後漢無改常山爲淮陽之事此魏收之誤卷末考證一

條已詳言之蓋宋館閣諸臣劉放范祖禹輩所駁正也。

鉅鹿郡 藁城有肥壘。按漢志真定有肥壘縣晉以後蓋省入藁城當云有肥壘城後人轉寫作壘又

脫城字誤以爲壘壁之壘矣。

鄴二漢晉屬有鄴城 鄴不成字當作鄴說文鄴鉅鹿縣从邑鼻聲漢志作鄴與鼻文異而音義同

渤海郡 脩前漢晉屬號脩後改。脩與漢晉無異文何以云改據列傳高氏封氏皆稱渤海蓍人乃知

晉以前本作脩後魏改從艸耳上脩字當作蓍。

武邑郡。灌津。前漢屬信都。漢書灌作觀。

北五城郡。五城之五。隋志皆作伍。五城。定陽。本汾州屬郡。孝昌中。寄治西河。并移西河郡於平陽界。興和中。又析置北五城。定陽郡。皆在隋之臨汾縣地。

汾州。延和二年爲鎮。太和十二年置州。治蒲子城。按。穆羆傳。高祖時爲吐京鎮將。後改吐京鎮爲州。仍以羆爲刺史。然則魏初本爲吐京鎮。蒲子城。卽吐京鎮也。汾州之治西河。自裴良始。

吐京郡。真君九年置。按。水經注。吐京郡治卽土軍縣之故城也。漢西河郡有土軍縣。字隨聲而譌。

東雍州。世祖置。太和中罷。天平初復。按。前晉州平陽郡下云。真君四年。置東雍州。太和十八年罷。然則世祖所置之東雍州。在平陽。此天平復置之東雍州。乃在邵郡。名雖同而地實異矣。

安州。皇興二年置。治方城。天平中陷。元象中。寄治幽州北界。按。通鑑。梁普通七年。魏安州石離。穴城。斛驪。三戍兵。反應杜洛周。衆合二萬。洛周自松峴赴之。卽魏孝昌二年也。則安州之陷。似當在孝昌中。與燕營二州之陷同時矣。今考。江文遙傳稱。文遙爲安州刺史。善於綏撫。甚得物情。時杜洛周。葛榮等相繼叛逆。幽燕已南悉沒。唯文遙孤城獨守。百姓皆樂爲用。卒官。長史許思祖等復推其子果行州事。遣使奉表。莊帝嘉之。旣而賊勢轉盛。救援不接。乃攜諸弟。并率城人東奔高麗。天平中。詔高麗送果等。蓋至是始聞安州之陷。故志系之天平中也。其後招其遺民。寄治幽部。故地迫近庫莫奚。遂爲甌脫矣。

密雲郡。治提攜城。按漢志漁陽郡有庠奚縣。孟康讀庠爲題。卽此提攜也。此云郡治提攜城。而白檀縣下又云郡治。則白檀卽提攜城矣。漢時白檀。庠奚本是兩縣。蓋後來省庠奚入白檀縣。又移縣治於故庠奚城也。

廣陽郡。燕樂州郡治。按上文云安州治方城。而此燕樂爲州郡治。則燕樂城亦卽方城矣。而普泰元年又別置方城縣。蓋孝昌淪陷之後。僑立此縣。非卽燕樂故地也。

南汾州。按南汾州領北吐京、西五城、南吐京、西定陽、定陽、北鄉、五城、中陽、龍門九郡。志不言何時置。又不言治何城。考隋志文城郡、東魏置南汾州。其首縣曰吉昌。後魏爲定陽縣。并置定陽郡。則南汾州當

治定陽城矣。卽今吉州此志有定陽郡。而無定陽縣。所未詳也。孝莊紀永安三年。以元顯恭都督晉建南汾三州諸軍事。晉州刺史。則南汾之置。當亦在永安初矣。

南營州。孝昌中營州陷。永熙二年置。寄治英雄城。按英雄城未詳所在。隋志上谷郡遂城縣。舊曰武遂。後魏置南營州。則英雄城卽遂城也。但後魏上谷郡無武遂縣。惟冀州武邑郡有之。本漢縣。屬河間。後

漢晉屬安平。後齊廢縣入武疆。與上谷之武遂。似非一地。

東燕州。太和中分恆州東部置燕州。孝昌中陷。以穆羆傳考之。燕州蓋治廣寧也。天平中領流民置。寄治幽州宣都城。按幽州無宣都城。一木作宜都。亦誤。當是軍都之譌。隋志涿郡昌

平縣舊置東燕州。考兩漢及晉軍都昌平各自爲縣。後魏軍都縣有昌平城。則已并昌平於軍都。隋又改軍都爲昌平也。

建德郡。真君八年置。治白狼城。按世祖紀。延和元年。車駕至和龍。馮文通石城太守李崇。建德太守王

融十餘郡來降。則建德郡後燕已有之。魏特因其故名耳。志無石城郡。蓋并入建德矣。

營邱郡。正光末置。按世祖紀。延和元年。徙營邱。成周。遼東。樂浪。帶方。玄菟。六郡民三萬家於幽州。開倉以賑之。是營邱郡後燕所置。而志以爲正光末置者。世祖滅燕之後。營邱。成周。帶方。玄菟諸郡皆已併省。正光末又復置耳。

蔚州。永安中改懷荒。禦夷二鎮置。按六鎮改州。魏收史言之不詳。惟懷朔爲朔州。禦夷。懷荒爲蔚州。薄骨律爲靈州。見於本志。

廓州。武定元年置。治肆州敷城界廓城。一本作郭城按隋志。雁門郡崞縣。後魏置。曰石城。東魏置廓州。有廣

安。永定。建安三郡。寄山城。與此志云治敷城。似不合。考敷城。石城俱肆州秀容郡之屬縣。蓋隋時并敷城入石城。因附書於下也。

武州。武定元年置。治雁門川。武定三年。始立州城。按隋志。雁門郡繁峙縣。後魏置。并置繁峙郡。有東魏武州。及吐京。齊新安三郡寄在城中。此志之雁門川。卽繁峙郡。且寄治郡城。非別立州城也。

地形志中

兗州。後漢治山陽昌邑。魏晉治廩丘。今本脫廩字。

劉義隆治瑕邱。漢山陽郡有瑕邱縣。劉宋元魏皆以瑕邱爲兗州治所。而不置瑕邱縣。至隋始復置焉。即今滋陽縣也。

青州。司馬德宗治東陽城。魏因之。東陽城即今益都縣。

廣川郡。劉裕置。魏因之。領縣三。武強、索盧、中水。此齊州之廣川郡。即隋長山縣地。非冀州之廣川也。

太原郡。劉義隆置。宋志。文帝元嘉十年。割濟南太山立。隋志。長清縣有東太原郡。即此郡也。劉宋嘗置

并州於此。房法壽傳。劉彧以房崇吉爲并州刺史。領太原太守。治升城。

太原。司馬德宗置。魏因之。治升城。有靡溝。垣城。當云垣苗城。史脫苗字。慕容白曜傳。既至升城。垣苗。靡

溝。二戍拒守不下。是二城距升城不遠也。靡靡音相近。

潁川郡。長社。按。南史魯爽傳。宋武帝定長安。魯軌奔魏。魏以軌爲荊州刺史。鎮長社。軌死。爽代爲荊州

刺史。鎮長社。是魏初嘗置荊州於此。志亦失書。

濟州。治濟北碭礮城。秦常八年置。今長清縣西北有廢礮礮城。

平原郡。武泰中立南冀州。永安中罷州。按。南冀州。分冀州之清河、相州之陽平、濟州之平原置。以路思

令爲刺史。永安中，葛榮滅，而州亦省也。

南清河郡。晉泰寧中分平原置。治莒城。按晉世紀元有太寧，而無泰寧。考房亮傳，普泰中濟州刺史張

瓊表所部置南清河郡，乃知晉字本普字之譌。又衍一寧字耳。

東濟北郡。孝昌三年置。按鄭輯之孝靜初除東濟北太守，帶肥城戍，主則郡治肥城也。

光州。治掖城。皇興四年分青州置。延興五年改爲鎮。景明元年復。按呂豹子爲東萊鎮將，後改鎮爲州。

行光州事。是光州未復之時，爲東萊鎮也。

東牟郡。孝昌四年分東郡陳留置。治雍邱。孝昌以下十三字，當在陽夏郡下，誤重出於此。

梁州。治大梁城。大梁城卽浚儀城也。

汝南郡。上蔡州郡治。上蔡城卽懸瓠城。

義陽郡。永安三年置。郢州。天平四年罷州置。此義陽非梁之司州。蓋孝昌末，卽梁大郢州刺史元願達

以義陽叛入於梁，乃僑立郢州及義陽郡於豫州界，卽隋眞陽縣地。隋志，眞陽縣舊置郢州。東魏廢州

置義陽郡，卽此。

新蔡郡。晉置。孝昌中陷。後復。治石母臺。按太平寰宇記，石母臺在平輿縣西北五十步。

城陽郡。太和三年置。後罷。武定初復。按章珍傳，破崔慧景，擁降民七千餘戶內徙，表置城陽、剛陵、義陽

三郡以處之。即太和三年置城陽郡事也。剛陵、義陽二郡當與城陽俱罷。故志不及之。天平四年所置之義陽與韋珍表置之義陽非一地。故志不言復置也。

廣陵郡與中分東豫州置。按魏之東豫州本治廣陵城。孝昌三年州沒於梁。故與和中別置廣陵郡。以招撫流民。志云分東豫置。不知與和之世東豫已不屬魏矣。

南陽平郡治沛南界。後寄治彭城。按薛曇尙熙平二年除徐州穀陽戍主。行南陽平郡事。則穀陽爲南陽平治所。即沛南界矣。隋志云彭城郡之穀陽縣。後齊置穀陽郡。此即舊南陽平郡所治。又云彭城縣。後周并沛及南陽平二郡入。則據後來寄治而言。

南兗州正光中置。治譙城。據范紹傳。蓋析徐豫二州置。

陳留郡。小黃、劉裕置。魏因之。有曹騰墓、曹嵩墓、鄧艾祠。此陳留郡。僑置於譙郡。故小黃有曹氏墓。浚

儀有城父城。谷陽有老子廟。若梁州之陳留。則漢舊郡也。

馬頭郡。司馬德宗置。魏因之。正光中陷。天平中復。治建平城。按漢沛郡有建平縣。章懷太子云。建平故

城在今亳州鄆縣西北。一名馬頭城。後漢書缺即此馬頭郡也。魏時淮南北皆有馬頭郡。此南兗州之

馬頭。領蕪、已吾、下邑三縣。在淮北。又楚州治鍾離亦有馬頭郡。領蕪、平預二縣。在淮南。今懷遠縣西南有

馬頭城是也。

膠州。永安二年置。治東武陵。陵當是城字之譌。

南青州。治國城。顯祖置爲東徐州。太和二十二年改。國城。通鑑作園城。胡三省云。園城當在唐沂州沂水縣界。園戶困翻。予按。高閭傳。以本官領東徐州刺史。與張讜對鎮園城。劉休賓傳亦云。東徐州刺史張讜所戍園城。領二郡。則國城當爲園城之譌。或作園城。亦誤。

北徐州。永安二年置。此州不言治所。按。隋志。琅邪郡舊置北徐州。蓋治琅邪之卽邱矣。

東楚州。司馬德宗置宿豫郡。高祖初立東徐州。後陷。世宗初改爲鎮。後陷。武定七年復改爲宿豫郡。按。隋志。宿豫郡。後魏置南徐州。梁改爲東徐州。東魏又改曰東楚州。與此志異。考。皇興元年。宿豫始入於魏。正始三年。梁將張惠紹拔宿豫。仍不能守。永平元年。成景儻殺宿豫戍主。以城降梁。自是不隸魏者。四十餘年。及侯景之亂。始歸東魏。乃有東楚州之名。

高平郡。治大徐城。按。杜顥傳。正光中。遷盱眙太守。帶大徐戍主。疑卽此大徐也。大徐城。隋爲徐城縣。今泗州地也。

朱沛。武定七年改蕭衍朱沛。修儀。安豐三郡置。修儀。隋志作循儀。

東豫州。太和十九年置。治廣陵城。孝昌三年陷。武定八年復。按。廣陵城。今光州息縣地。考。出益宗傳。太和十七年。奉表歸款。十九年。拜都督光城。弋陽。汝南。新蔡。宋安五郡諸軍事。南司州刺史。後以益宗旣

渡淮北不可仍爲司州。乃於新蔡立東豫州。以益宗爲刺史。是廣陵城卽新蔡地矣。梁大通元年卽魏
年。三。譙州刺史湛僧智圍魏東豫州刺史元慶和於廣陵。慶和舉城降。以僧智領東豫州刺史。自是廣陵
屬梁。又改爲西豫州。太清元年。以北廣陵爲淮州。卽此廣陵也。又二年。有侯景之亂。而廣陵又入於魏。
此志所云武定七年復正其時也。

義州。蕭衍置。武定七年內屬。此州不言治所。亦無所領郡縣。隋志。羅田縣。梁置義州義城郡。當卽此。通
鑑。梁普通二年。義州刺史文僧明擁所部降魏。魏以爲西豫州刺史。胡三省謂此義州當置於齊安郡
木蘭縣界。蓋以意度之。未及檢隋志也。

汝陰。弋陽二郡。蕭衍置雙頭郡。魏因之。雙頭郡者。兩郡同治。一人帶兩郡守也。此本汝陰郡地。又僑立
弋陽郡。宋志所謂帖治。

北陳留。潁川二郡。蕭衍爲陳州。武定七年改置。隋志。汝陰郡潁陽縣。梁曰陳留。并置陳留郡及陳州。東
魏廢州。卽此陳州也。本雙頭郡。隋志止舉陳留。而不及帖治之郡。他皆類此。

譙州。景明中置渦陽郡。孝昌中陷。武定七年復置州。治渦陽城。按。渦陽。隋爲山桑縣。今之蒙城縣也。隋
志云。後魏置渦州。梁改西徐州。東魏改譙州。此志無置渦州之文。又孟表爲蕭鸞馬頭太守。太和十八
年。據郡歸誠。除南兗州刺史。領馬頭太守。鎮渦陽。則太和中嘗置南兗於渦陽。而志亦未之及也。

伊陽郡。武定二年置。治伏流城。後陷。寄治州城。按隋志。河南郡陸渾縣。東魏置伊川郡。領南陸渾縣。開皇初。廢郡改縣。曰伏流。是伏流城。卽南陸渾縣也。彼志云伊川郡。此云伊陽。未審孰是。州城不知所在。據隋志。陸渾縣又有東魏北荊州。則州城距伏流當亦不遠。

南司州。劉彧置司州。正始元年。改爲郢州。孝昌三年。陷。蕭衍又改爲司州。武定七年。復改置。此宋齊梁之司州。魏正始初始得之。改爲郢州。其後又入於梁。梁末喪亂。復爲東魏所得。乃仍司州之名。鄴中已有司州。故此加南字。若梁之南司州。治安陸。與此初不相涉。

齊安郡。保城。劉駿置。魏因之。宋志作寶城。鄆有石城山。漢晉宋志皆作鄆。

鍾離。陳留二郡。灌邱有郡陽城。郡陽當是邵陽之譌。

汝陰郡州治。州治卽合肥城也。宋志。南汝陰郡汝陰縣所治。卽二漢晉合肥縣。

南陳郡州治。此志以南陳郡爲霍州治。而隋志於霍山縣下云。梁置霍州。及岳安郡。岳安縣。豈南陳郡後亦併入霍山乎。

睢州。蕭衍置。灌州。武定元年。平。改置。治取慮城。元年。監本作九年。考武定紀。元止於八年。則以爲九年者。誤矣。據下文淮陽。穀陽。睢南。臨潼諸郡。俱云六年置。則睢州之置。亦當在六年。字形相涉。誤爲九年。

取慮城在今虹縣北。

南定州蕭衍置。魏因之。治蒙籠城。按南史梁安成王秀傳。司州叛蠻田魯生、魯賢、超秀據蒙籠來降。武

帝以魯生爲北司州刺史。魯賢北豫州刺史。超秀定州刺史。是梁時但稱定州。至魏始加南字。以別於中山之定州也。今麻城縣西有故蒙籠城。州所領郡五。而弋陽郡爲州治。隋志於麻城縣下云陳置定州。不知梁與東魏已有之。又不言曾立弋陽郡。皆其疏也。

西楚州蕭衍置。魏因之。治楚城。按隋志汝南郡城陽縣。後魏置城陽郡。梁置楚州。東魏置西楚州。蓋以楚王城得名。今息縣西有成陽廢縣。一名楚子城。孝靜紀。天平三年。侯景攻克楚州。獲刺史桓和。卽此州也。

作城郡蕭衍置。魏因之。隋志城陽縣有梁置伍城郡。卽此作城也。五與午古字通。

西淮州蕭衍置。魏因之。治豫州界白狗堆。按隋志眞陽縣又有白狗縣。梁置淮州。後齊廢州以置齊興郡。郡尋廢。開皇初改縣曰淮川。卽此淮州也。淮陰有淮州。故此加西字。州領淮川一郡。眞陽。梁興二縣。而淮川爲州治。故隋改縣爲淮川。而眞陽名縣亦因乎此。

譙州蕭衍置。魏因之。治新昌城。此淮南之譙州。所謂南譙州也。隋志清流縣舊曰頓邱。置新昌郡及南譙州。開皇初改爲潞州。卽此。

臨徐郡治葛城。徐當作潞。

梁郡州治。宋志南梁郡睢陽縣所治。即二漢晉壽春縣。

淮州蕭衍置。魏因之。治淮陰城。隋志山陽縣有後魏淮陰郡。即此。

仁州蕭衍置。魏因之。治赤坎城。此州唯領臨淮一郡。志以已吾縣為州郡治。則已吾即赤坎城矣。隋志

彭城郡之穀陽縣舊有已吾。義城二縣。後齊併以為臨淮縣。然則梁所治仁州。即隋穀陽縣也。太平寰

宇記。赤坎故城在虹縣西南一百九十五里。梁天監八年置赤坎戍。大同二年廢戍置仁州。

光州蕭衍置。魏因之。治光城。此志州名相同者。有兩光州。一治掖城。有兩秦州。一治上封。一

治蒲坂。後見有兩譙州。一治渦陽。一治新昌。有兩義州。一寄治汲郡。一不言治所。有兩洛州。一治洛陽。

一治上洛。有兩梁州。一治大梁。一治南鄭。有兩南郢州。一治赤石關。一領北遂安。馮翊。江夏等郡。不言治所。

南朔州蕭衍置。魏因之。治齊坂城。此州未審所在。州領梁新蔡邊城。義陽新城。黃川六郡。考隋志光山

縣有舊黃川郡。蓋即朔州所領之黃川矣。梁無北朔州。此南字魏所加。

南建州蕭衍置。魏因之。治高平城。按隋志殷城縣。梁置義城郡及建州。并所領平高。當作高平新蔡新城三

郡。即此南建州也。梁時本稱建州。南字蓋東魏所加。以別於高都之建州也。據此志。新城郡乃南朔州

所領不隸於南建。蓋隋志之誤。然即此可證朔建二州相距不遠也。

南郢州。蕭衍置。魏因之。治赤石關。按州所領有定城、邊城、光城三郡。隋志定城縣。後齊置南郢州。武定

八年。即齊天保元年。故隋志以為後齊置。據此志。則南郢之名實始於梁也。

沙州。蕭衍置。魏因之。治白沙關城。此州未審所在。今光山縣西南有白沙關。與麻城縣界。疑即梁所置

沙州也。隋志麻城縣有建寧郡。蓋即沙州所領之建寧郡。蕭衍傳景明四年衍將吳子陽寇白沙中山王英大破之。

北江州。蕭衍置。魏因之。治鹿城關。湘州。蕭衍置。魏因之。治大治關城。按隋志木蘭縣。梁置梁安郡。又有

永安、義陽二郡。後齊置湘州。後改為北江州。則湘與北江即一州而更名。據此志。北江州領義陽、齊昌、

新昌、梁安、光城、齊興六郡。而義陽之義陽縣為州郡治。湘州領安蠻、梁寧、永安三郡。而安蠻之新化縣

為州郡治。則明係兩州。不可混而為一。蓋梁時本是二州。魏末因梁舊。亦分湘北江為二。迨後齊并省

州郡。以北江入湘。又移北江之名於湘爾。

汴州。蕭衍置。魏因之。治汴城。此州未審所在。州領沛。汲古閣本臨淮二郡。沛郡領蕭、潁川。相三縣。考隋志。

梁郡。虞城縣。後魏曰蕭。後齊廢。又後魏置沛郡。後齊廢。疑即梁時所置汴州也。

廿二史考異卷三十

魏書二

地形志下

雍州。此卷所載三十三州。皆西魏疆域。不在東魏版圖之內。故皆無戶口實數。

京兆郡。山北。北縣姚興所置。見太平寰宇記。

陰槃。二漢屬安定。晉屬。寰宇記。昭應縣東十二里故城。即漢新豐縣。後漢靈帝末。移安定郡陰槃寄理於此。則京兆之陰槃。與安定之陰槃非一地。

咸陽郡。寰宇記。苻堅於今縣東北長陵城置咸陽郡。後魏太和二十年。移咸陽郡於涇水北。今涇陽縣也。

南岐州。志不言所治。以隋志考之。當治固道郡之梁泉縣。永熙中有南岐州刺史盧侍伯。武定中有南岐州刺史堯難宗。

廣業郡。案南岐州領三郡。志唯於固道郡云延興四年置。餘皆闕之。考皮豹子傳。子喜。高祖初。拜都督秦雍荆梁益五州諸軍事。仇池鎮將。曾帥強奴子等各率戶歸附。于是置廣業。固道二郡以居之。則廣

業郡亦延與中置矣。

槃頭郡。隋志作盤頭。

洛聚郡。隋志作落叢。

益州。正始中置。案魏未得蜀地。置益州於晉壽。所謂小益州也。

巴州。郡縣闕。此州不載所治及建立之年。案正始二年。邢巒請於巴西立巴州。事未及行。其後竟以巖

始欣爲巴州刺史。蓋在正始永平之間。

梁州。蕭衍梁秦二州。正始初改置。宋齊以後。梁秦二州刺史常以一人領之。以南鄭爲治所。正始二年。

梁將夏侯道遷據南鄭入魏。魏始立梁州。其治所蓋仍在南鄭也。

南梁州。郡縣闕。此州不載所治及建立之年。考通鑑。梁中大通元年。即魏永安元年。魏子建奏以隆城鎮爲南

梁州。胡三省以爲卽閬中城。未知然否。

東梁州。此州亦不載建立之年。據淳于誕傳及寰宇記。蓋置于孝昌三年。其治所當在安康也。

隨平郡。隋志作趙平。

鶉鶩。前漢屬山城。鶉鶩當作觚。山城當作北地。

河州。有伏乾。諸本乾下闕二字。案乞伏國仁嘗自稱河州牧。當云乞伏乾歸置。有蓋乞之譌。

渭州。志失書置州之年。前廢帝紀有渭州刺史侯莫陳悅。其治所當在隴西襄武縣。

南安陽郡。此陽字疑衍。隋志隴西縣舊曰內陶。陶即中陶置南安郡。

高平郡。領縣二。高平。里亭。案隋志平高縣。後魏置太平郡。後改爲平高。周書李穆除原州刺史。又以賢

子爲平高郡守。遠子爲平高縣令。叔姪三人皆牧宰鄉里。然則此郡縣名皆當爲平高。而上文原州治

高平城。亦當爲平高也。

鄯州郡縣闕。鄯州卽舊西平郡。孝莊時有鄯州刺史侯莫陳悅。

瓜州郡縣闕。瓜州卽故敦煌地。孝莊紀有瓜州刺史元太榮。又高昌王世子光亦爲瓜州刺史。

華州。太和十一年分秦州之華山。澄城。白水置。刊本華山作山山山謾此州不言治所。以安定王燮傳考之。蓋初治

李潤堡。世宗時移治古馮翊城也。

秦州。此秦州不言治所。以水經注考之。蓋治蒲坂也。考志中州名相同者。多加東西南北以別之。太和

改洛爲司。因以上洛爲洛。天平以大梁爲梁。其時南鄭之梁已失。非同時有兩洛州。兩梁州也。惟光義

謙。南郡係武定新附之州。治蕭梁舊名。未及更正。故有重複耳。獨兩秦州。竝置者六十餘年。何以不議

改易。且延和元年改雍州爲秦州。其時赫連定甫平。秦州初入版圖。豈有復置秦州之理。予積疑者數

載。後讀食貨志。稱并肆汾建晉秦陝東雍南汾九州。靈徵志。天平四年。秦州并溢。太和二年。秦州獻五

色狗。薛辯傳。贈都督冀定秦三州諸軍事。汲古閣本。秦作大。出帝紀。秦州刺史。万俟普撥。又齊書。莫多婁貸文。傳。仍爲汾陝東雍晉秦五州大都督。周書。薛端傳。高祖謹。秦州刺史。侯植傳。父欣。秦州刺史。史言秦州者多矣。而地形志無之。乃悟蒲坂之秦州。當爲秦州之譌。字形相涉。讀史者不能是正。非一日矣。

陝州。太和十一年置。治陝城。八年罷。當云十八年罷。蓋遷洛之後。以畿內罷州也。

恆農郡。北陝。後漢晉曰陝。有曲沃城。此非桓叔始封之曲沃。水經注云。春秋文公十三年。晉侯使詹

嘉守桃林之塞。處此以備秦。時以曲沃之官守之。故曲沃之名。遂爲積欠之傳矣。

洛州。太延五年置。荊州。太和十一年改。當作太和十八年。字誤。

荊州。太和中治穰城。案。上卷魯陽郡云。太和十八年。改爲荊州。二十二年罷置。然則太和十八年以前。

荊州仍治上洛。及遷都洛陽。移洛州於上洛。而荊州徙治魯陽。二十二年。克南陽。始遷荊州于穰城。則

在太和末年矣。此云太和中治穰城。尙脫改治魯陽一節。合前後文考之。方得其實。

襄城郡。一方城。有赭陽城。案。襄州之襄城郡。云蕭道成置。魏因之。治赭陽城。其所領方城。郟城。伏城。舞

陰。翼陽。赭城。六縣。亦與此同。疑孝昌中析荊州置襄州。其實一地也。

北清郡。清當作消。肅宗紀。北消懸危。南陽告急。楊大眼傳。出爲荊州刺史。北清郡嘗有虎害。大眼搏而

獲之。

恆農郡。國。國當作圉。字之譌也。宋志。雍州之恆農郡。寄治五壘。領邯鄲。圍。盧氏三縣。

襄州。孝昌中置。案。隋志。潁川郡之葉縣。後齊置襄州。據此志。則襄州之置。不始於後齊矣。州治赭陽城。

今裕州地。

南安郡。太和十三年置郢州。十八年改爲南中府。天平初罷府置。後陷。案。隋志。葉縣有東魏置定南郡。

據此志。則東魏所置。本名南安郡。領南安。南舞。葉。南定四縣。初無定南郡也。二志未審誰是。魏收仕於

東魏。其述東魏郡縣。當得其實。南安縣一本作安南。

南襄州。此志不言治所。隋志。春陵郡之湖陽縣。後魏置西淮安郡及南襄州。當卽此。唐并湖陽入棗陽。

西淮安郡。隋志作西淮安郡。

南廣州。案。隋志不見南廣州之名。孝莊紀有南廣州刺史鄭先護。周本紀。魏廢帝三年。改南廣爲涪州。

郢州。案。魏以梁之司州卽義陽爲郢州。此州蓋孝昌中義陽淪沒之後僑置者。隋志。真陽縣舊置郢州。東

魏廢州置義陽郡。卽此郢州也。縣又有後魏安陽縣。卽此州所領之安陽郡也。

南郢州。此州未詳何年建立。考。韋肅爲荆郢和驩大使。南郢州刺史。在肅宗朝。而孝武時有南郢州刺

史史寧。西魏有南郢州刺史耿令貴。韋瑱。此州之置。當在正光孝昌以前矣。周本紀。魏廢帝三年。改南

郢爲歸州。周武帝天和二年。省歸州入唐州。其地當在今隨州西北。

江夏郡領縣二。屈陽、郢陽。案隋志：淮安郡慈邱縣，後魏曰江夏，并置江夏郡。蓋卽南郢州之江夏郡也。永安郡案南郢州所領十二郡，今刊本殘闕，失其二。又有兩永安郡，所領縣各不同，而不加東西南北以別之。六朝郡縣僑置，雖多重複，然一州領郡若干，未有同名者。獨南廣州有兩襄城，與此兩永安皆可疑也。

析州案隋志：浙陽郡，西魏置浙州，卽此。後人加水旁耳。據此志，則後魏已有之，不始於西魏矣。西魏所置州郡，非魏收史所當書也。考周書：泉企傳，以破蕭寶寅功，遷左將軍，浙江刺史，則浙州之置當在永安初矣。

脩陽郡案孝武帝名脩，而此有脩陽郡、脩陽縣，蓋此州及所領郡縣皆置於孝武以前。魏收仕於東魏，以孝武播遷失國，不以君禮待之，故不爲諱也。宋志：順陽郡，永初郡國有朝陽、武當、鄠陰、汎陽、筑、析、陽八縣，則脩陽郡蓋析、順、陽置也。水經注：浙水逕脩陽縣故城，北縣卽浙之北鄉也。

析陽郡案北史：韋孝寬傳，普泰中，從荊州刺史源子恭鎮穰城，以功除浙陽郡守。時獨孤信爲新野郡守，同隸荊州，是普泰之世，析陽又隸荊州，蓋魏末分爭，州郡之隸屬無常，史家不能悉紀也。

律麻志上

世祖平涼州，得趙歐所脩元始麻，後謂爲密，以代景初。案魏收志不載元始術，唐一行大衍議言元始

術氣分二千四百四十三。又言元始術因劉洪紀法增十一年以爲章歲而減閏餘十九分之七。然則元始術章歲六百章閏二百廿一章月七千四百二十一也。

歲中十三年一十二次。當云歲中十二年一十二次。誤并二一爲三字。

推合又交會月蝕去交度。

案正光術凡七篇。推月朔術第一。推二十四氣術第二。推合朔入厯遲疾盈

縮第四。推日月合朔弦望度術第五。推五行沒滅易卦氣候上朔術第六。推五星六通術第七。獨不見第三。蓋推合朔交會去交度以下本別爲一篇。當云推交會術第三。列于此行之前。轉寫遺脫爾。加法得一爲少。加當作如。

以定并少爲半驅。定當作之。

禮志二

淹中之經。孔安所得。唯有卿大夫士饋食之篇。而天子諸侯享廟之祭。禘祫之禮盡亡。案漢藝文志云。禮古經者。出於魯淹中及孔氏。與十七篇文相似。多三十九篇。及明堂陰陽王史氏記所見。多天子諸侯卿大夫之制。雖不能備。猶瘞倉等推士禮。而致於天子之說。蓋禮古經本五十六篇。較之高堂生所傳十七篇。實多三十九篇。今孫惠蔚謂孔氏所得。唯有卿大夫士饋食之篇。則誤以高堂生所傳十七篇爲孔安國所得矣。六朝文詞唯取偶儷。往往割截名字以足句。此稱孔安國爲孔安。亦其類也。

禮志四

傳重者主宗廟。非謂庶人祭于寢也。兼累世承嫡。方得為嫡子嫡孫耳。不爾者。不得繼祖也。案嫡孫持重之服。主有宗廟者而言。劉芳之議。自不可易。今庶人無爵。而以孫上陵諸父。非禮意也。惟周之士。不顯奕世。此許叔重所引。奕字較亦義為長。

樂志

湯武所以。此下闕一葉。

食貨志

其司冀雍華定相秦洛豫懷兗陝徐青齊濟南豫東兗東徐十九州。此時司州治平城。洛州治洛陽。豫

州治虎牢。則懸瓠為南豫矣。兗州治滑臺。則瑕邱為東兗矣。東徐州即南青州。穆亮都督豫洛南北豫徐兗六州諸軍事謂虎

牢與懸瓠也

幽平并肆岐涇荆涼梁汾秦安營豳夏光郢東秦。此時荊州治上洛。東秦州治杏城。即北華州梁州蓋治洛

谷。郢州未詳所治。地形志。南安郡。太和十三年置郢州。十八年改為南中府者是也。其地當在今葉縣。

司州萬年。雁門。上谷。靈邱。廣甯。平涼郡。魏初都平城。置司州。其所領郡縣。魏收志皆闕而不書。今據此

志。知萬年等六郡當時皆隸司州。又皇興中。置平齊郡于平城西北。當亦隸司州也。

懷州郡郡上郡之長平白水縣。案地形志。皇興四年。置郡上郡。太和中併河內。孝昌中改郡郡。此文當

云郡上郡。誤多一郡字。長平。地形志作萇平。郡上郡本屬懷州。地形志亦未載。

青州北海郡之膠東縣。平昌郡之東武。平昌縣。高密郡之昌安。高密。夷安。黔陬縣。案地形志。平昌。高密

二郡皆屬膠州。膠州置於永安二年。太和之世。尙未立膠州也。地形志。東武。平昌二縣屬高密郡。昌安

屬平昌郡。與此志亦異。

秦州河東之蒲坂。汾陰縣。案地形志。汾陰屬北鄉郡。不屬河東。

北地郡之三原。雲陽。銅官。宜君縣。案地形志。北地郡無三原縣。

徐州北濟郡之離狐。豐縣。東海郡之贛榆。襄賁縣。當作北濟陰郡。志脫陰字。地形志。東海郡屬海州。襄

賁別屬海西郡。亦隸海州。

靈徵志上。

桓州刺史穆泰等。桓當作恆。

司州之河北。河東。正平。平陽。案孝文遷洛。以洛陽爲司州。其所領郡縣。不載於地形志。今據此志。州所

領有河南。河北。河東。正平。平陽。潁川。汲。恆農。滎陽。

永平三年。南秦州廣業。仇池郡大風。案地形志。南秦州無廣業郡。南岐。東益二州皆有之。

太和三年。雍湖二州大霜。案地形志。朔州本秦五原郡。延和二年置爲鎮。後改爲懷朔。孝昌中改爲州。是太和以前未有朔州。而此志太和中屢見朔州。蓋卽雲州也。地形志雲州舊置朔州。太和八年。冀州相三州好妨害稼。冀州之州字誤。

靈徵志下

景明三年。秦州上言。南稻。新興二縣木連理各一。案地形志未見此二縣。

釋老志

有仙人成公興。不知何許人。案殷紹上四序墟輿表云。臣以姚氏之世。行學伊川。遇遊道大儒成公興。從學九章算術。興字廣明。自云膠東人也。蓋卽其人。

目錄序

故房延祐。辛元植。陸仲。刁柔。裴昂之。高孝幹。皆不工纂述。案序傳及收上十志。啓俱無陸仲名。其書亡逸不完者。無慮三十卷。今據刊本目錄。闕者本紀第三。明元第十二。孝靜列傳第一。后第二。神平文第三。昭成第五。明元第六。太武第七上。景穆第十。文成第十一。孝文第十三。長孫第廿二。王洛子孫第三。子孫第五。六王第六上。五王第七上。二王第八。五王第十。五王第十三。嵩等第廿二。兒等第
六十九。蘇第七十。李等第七十一上。外第七十一下。外第七十三。文第七十四。孝第七十五。節第
十七。酷第八十九。氏等第九十。四第九十一。蠅第九十二。序志第三。天象第四。天象凡二十六卷。不

全者。列傳第七十二、儒林第七十九、藝術第八十、列女凡三卷。

臣攸、臣恕、臣燾、臣祖禹謹序目錄。臣攸者劉攸也。臣恕者劉恕也。臣祖禹者范祖禹也。二劉與范皆長於史學。故此書考證校它史爲精審。

廿二史考異卷三十一

北齊書

神武帝紀

齊高祖神武皇帝。案李百藥北齊書本紀八篇。列傳四十二篇。共五十卷。今據世所傳本審正之。惟本紀第四文宣列傳第五趙郡王第八段榮第九斛律第十孫騰第十一賀拔第十二張瓊第十三高乾之第十四李元第十五魏蘭根第十六孫季第十七張纂第卅三暴顯第卅四陽斐第卅五李雅第卅六儒林第卅七文苑第四十二恩偉凡十八篇。係百藥元本。其餘大抵取北史補足之。其列傳第十八薛斌第十九萬俟第廿一李渾第廿二崔暹第卅二尉文與北史異。而無論贊第卅八循吏第卅九酷吏第四十外戚第四十一方伎亦與北史異。而有序無贊。似經後人刪改。或百藥書亡。而以高氏小史補之乎。凡紀傳中有史臣論。有贊。及稱高祖。世宗。顯祖。肅宗。世祖。廟號者。皆李史之舊文。其稱神武。文襄。文宣。孝昭。武成者。則北史之文。晁公武謂百藥避唐朝名諱。不書世祖。世宗之類。不知承規修史。在貞觀初。其時世字竝不回避。李勣之名。至高宗朝始去世字。梁陳周書皆不避世祖。世宗字。承規與思廉。德棻同時。何獨異其例乎。蓋嘉祐校刊諸史之時。此書久已殘闕。而雜采它書以補之。卷首神武

紀卽是北史之文。晁氏不加詳審。遽以爲例有不一。其實非也。以史例言之。高祖上不當係以齊字。此亦沿北史之文。而未及芟削者。監本卷首無齊字

鎮將遼西段長。常奇神武貌。謂曰。君有康濟才。終不徒然。便以子孫爲託。案。段長。龐蒼鷹二事。齊書在。蔡儻傳。北史移入神武紀。

文襄帝紀

臣等詳文襄紀。其首與北史同。而末多出于東魏孝靜紀。其間與侯景往復書。見梁書景傳。其所序列。尤無倫次。蓋雜取之。以成此書。非正史也。此宋嘉祐校刊諸臣所記。南監本本紀第五、第七、列傳第二、第四、第六、第七、第廿五、第廿六、第廿七卷末。俱云此卷與北史同。又列傳第二十卷末云此卷牽合北史而成。第廿一卷末云此卷雖非北史。而無論贊。疑尙非正史。第廿九卷末云此傳與北史同。但不序世家。又無論贊。疑非正史。汲古閣本皆無之。或明人校刊者所題也。百藥修史在唐貞觀初。乃南監本每卷首題云隋太子通事舍人李百藥撰。明人之無學如此。

文宣帝紀

乾明元年二月丙申。葬于武寧陵。諡曰文宣皇帝。廟號威宗。武平初。又改爲文宣。廟號顯祖。案。乾明初。上諡號曰高祖文宣皇帝。天統元年。改諡景烈皇帝。廟號威宗。武平元年。復改顯祖文宣皇帝。此紀有

脫文。

論曰。案百藥史論。皆稱史臣曰。其稱論曰者。皆北史之文也。齊史八紀已亡其七。惟此篇猶是百藥之舊。而論不著史臣。蓋校書者依前後篇之例改之。

孝昭帝紀

孝昭皇帝。此篇亦北史之文。本紀例書廟號於篇首。而孝昭紀不書肅宗。肅字亦無回避。未審其故。皇建元年。詔以故太師尉景。故太師竇泰。故太師太原王婁昭。故太宰章武王庫狄干。故太尉段榮。故太師方俟普。故司徒蔡儁。故太師高乾。故司徒莫多。婁貸文。故太保劉貴。故太保封祖裔。故廣州刺史王懷。十三人配饗太祖廟庭。故太師清河王岳。故太宰安德王韓軌。故太宰扶風王可朱渾道元。故太師高昂。故大司馬劉豐。故太師方俟受洛干。故太尉慕容紹宗。七人配饗世宗廟庭。故太尉河東王潘相。樂。故司空薛修義。故太傅破六韓常。三人配饗顯祖廟庭。是時以文宣爲高祖。此顯祖當爲高祖之誤。清河王岳傳云配饗高祖。此云配世宗。當是傳誤。蔡儁傳云贈司空。此云司徒。未知孰是。封祖裔卽隆之也。方俟普。普子受洛干。高乾。乾弟昂。封隆之。劉豐。潘樂。薛循義。破六韓常諸傳。俱失書配饗事。

後主紀

武平四年。殺侍中崔季舒。張雕虎。儒林傳稱張雕。蓋避唐廟諱。此虎字後人所加。或本是武字也。北史

儒林傳作張雕武。汲古閣本、虎作唐。尤誤。

鄭文貞公魏徵總而論之曰。百藥書當依梁陳史之例。稱史臣侍中鄭國公魏徵。此卷本據北史。北史成於高宗朝。故稱其諡。

文襄六王傳

河南康舒王孝瑜。康舒。北史作康獻。

趙郡王叔傳

孝昭臨崩。百藥書例稱諸帝廟號。此稱孝昭。亦後人所改。

庫狄干傳

子士文嗣。案。士文。隋之酷吏。隋史已爲立傳。不應闕入齊書。蓋後人以庫狄干傳亡。取北史補之。而不知限斷之例。遂并士文傳牽連入之。昔人云。作奏雖工。宜去葛龔。校書之無學。其謬累至於如此。

斛律金傳

留金守信都。領恆雲燕朔顯六州大都督。此六州卽神武所領六鎮兵。趙郡王琛傳所云六州大都督。六州九酋長大都督孫騰傳。六州流民大都督。皆此六州也。但六州之名。尙少其一。史有脫文。蓋脫蔚州也。

高祖使金統劉豐、大汗步辭等。大汗步辭卽步大汗薩也。步大二字儻倒轉寫之謬。菩薩字本於釋氏書。薩字不知所从。蓋卽辭字聲轉爲桑割切。六朝唐人碑刻。薩旁無从產者。而辭亦或書爲薩。可證辭薩本一字。唐元應一切經音義云。菩薩本或作扶辭。此傳步大汗薩亦作辭。此古字之僅存者。監本改爲薩。於文雖畫一。而古字日亡矣。列傳有辭孤延。亦代人。複姓辭孤。唐初人有薩孤吳仁。薩孤辭孤疑卽一族。

詔金第二子豐樂。豐樂本名羨。而詔稱其字。當時風俗敦樸。不以稱字爲嫌也。齊書多稱人字。如万俟受洛干。洛可朱。渾道元。元高乾。乾高。敖曹。昂。楊遵彥。惜封祖裔。隆之高仲密。懷邢子才。郟段孝先。爾王元景。昶。祖孝徵。瑛。源文宗。彪。李寶鼎。鉉。蘇珍之。瓊之類。皆上下通稱。故史家因之。

斛律光傳

庸國公可叱雄等。北史王雄傳。賜姓可頻氏。

賀拔允傳

與弟岳。殺賊帥衛可肱。北史作衛可瓌。瓌肱聲相近。高阿那肱傳。雖作肱字。世人皆稱爲瓌音。此其證也。

庫狄盛傳

割并州之石艾縣、肆州之平寇縣、原州之馬邑縣各數十戶。案魏隋二志所載原州後爲平涼郡，與馬邑相距甚遠。魏志無馬邑縣，隋志有馬邑郡而無馬邑縣。

張保洛傳

牒舍樂武成初開府儀同三司營州刺史封漢中郡公戰歿關中武成疑是武威之譌此段附出諸臣各著里居不應舍樂獨殊其例當云武威人而其下尙有脫文爾此傳既附見舍樂事而慕容儼傳末敘尔朱將帥歸順立功者又有武威牒舍樂名云牒舍樂少從尔朱榮爲軍主統軍後西河領民都督尔朱兆敗率衆歸高祖拜鎮西將軍金紫光祿大夫以都督隸侯景破賀拔勝于穰城又與諸將討平青兗荆三州拜鎮西將軍營州刺史天保初封漢中郡公後因戰沒于關中史之重複不檢照如此。

堯雄傳

白苟堆梁之北面重鎮。梁置西淮州於白苟堆今正陽縣地淮陰爲淮州治所故此加西。揚州刺史史寶。北史本傳作是寶。宇文貴傳作是云寶。云育聲相近。

王則傳

天平初行荊州事都督三荆二襄南雍六州軍事。案魏收志荊州之外惟有北荊州而北荆置於武定二年則天平初未有也。此三荆蓋指南荆東荆併荊州爲三。隋志春陵郡後魏置南荊州西魏改爲昌

州。淮安郡。後魏置東荊州。西魏改爲淮州。賀拔勝。獨孤信傳所稱三荊。皆指此。二襄謂襄及南襄也。南雍之名。魏志亦不載。隋志。春陵郡之蔡陽縣。梁置蔡陽縣。後魏置南雍州是也。

慕容紹宗傳

梁武帝遣其兄子貞陽侯淵明等。當云貞陽侯明。後人加淵字。

士肅弟建中。襲紹宗爵。建中。北史作三藏。三藏蓋建中小字。入周隋後。以小字行爾。

薛循義傳

薛循義。北史作修義。孝昭紀亦作修義。魏齊碑刻。人旁字多从彳旁。故修循二文多相混。

天平初。除衛將軍。南中郎將。帶汲郡太守。頓邱。淮陽東郡。黎陽五郡都督。淮陽與汲郡回遠。恐是濮陽

之譌。北史孝靜紀。天平元年。初置四中郎將。於礪石橋置東中。蒲泉置西中。濟北置南中。洛水置北中。

魏收志惟云魏郡貴鄉縣有東中郎將治。餘皆失書。

步大汗薩傳

大安狄郡人也。北史作代郡西部人。大安。神武。廣寧皆六鎮改州所置之郡。統言之。則爲代人。大率皆

鮮卑也。

慕容儼傳

西荊州爲梁將曹義宗所圍。魏時荊州治穰城。對東荊而言。故曰西荊。

時北育太守宋帶劍謀叛。北育蓋荊州屬郡。魏志荊州領郡八。有北清。而無北育。蓋傳寫之譌。當爲北

清也。此傳清去水旁。

高乾傳

徙居河濟之間。魏因置東冀州。案魏志不見東冀州之名。

長子繼叔襲祖洛城縣侯。案乾父翼封樂城縣侯。此稱洛城。前後互異。河間有樂城縣。疑卽翼所封。

高季式傳

老字安德。鬲人。安德郡名。非老之字。蓋校書者妄加字耳。

封隆之傳

隆之弟子孝琬。父祖曹。案北史孝琬父興之。字祖胄。以隆之字祖裔推之。當以胄爲正。傳失書其名爾。

李元忠傳

分廣平易陽。襄國。南趙郡之中邱三縣爲易陽郡。此事在永安中。魏收志失載。

盧文偉傳

以功授儀同三司。揚州刺史。鎮宜陽。揚當作陽。

陳元康傳

天保元年修起居注。天保當是天平之譌。

杜弼傳

竊唯道德二經。闡明幽極。案老子道德五千言。河上公、王弼注本。皆以上篇爲道經。下篇爲德經。子家藏唐人石刻景龍二年本。開元御注本。皆分道經德經爲二。後魏杜弼注老子上表。亦稱道德二經。賈公彥周禮疏。亦引道經德經云云。可證唐以前本。皆有道經德經之分也。

徐遠傳

刺史陸士茂詐殺室韋八百餘人。汲古閣本室作失。

王紘傳

乾明元年。昭帝作相。齊書例稱孝昭爲肅宗。此稱昭帝。亦後人妄改。

平鑿傳

卽啓授征西懷州刺史。征西下當有脫文。

韋子粲傳

諧與粲俱入國。粲富貴之後。遂特棄道諧。道諧、子粲皆二名。不當單舉一字。且與上下文例不一。蓋傳

寫脫落也。

元坦傳

齊天保初。此係齊史。不當著齊字。此卷屢見齊字。蓋後人采北史以補齊書之闕。偶未芟削爾。

元弼字輔宗。魏司空之子。弼乃暉業之父。終於魏朝。不當闕入齊史。更不當列于暉業之後。此由校書

之人無學。徒知擣搗北史。而不顧先後之倒置也。又考北史。弼字邕明。不字輔宗。其父鬱亦未爲司空。或諸元別有仕齊名弼者。而後人妄牽合之。

元韶傳

元韶字世胄。當云彭城王勰之孫。

贊曰。元氏蕃熾。憑茲慶靈。道隨終運。命偶淫刑。此卷惟存贊語十六字。傳文與論俱亡。後人以北史補之。

李繪傳

未幾。遂通急就章。汲古閣本脫去三百餘字。誤以高隆之傳文僞入。又文宣紀末亦脫去一葉。詞意不

屬。當從監本。

李璵傳

子詮、韞、誦。案北史敍傳、璵子詮、詮弟謚、謚弟誦、誦弟世韞、詮字世良、謚字世安、誦字世業、則世韞當亦以字行者。傳失載謚一人、又以韞爲誦兄、皆不若北史之可信。傳載韞與陸令萱女弟私通、得授太子舍人、誦以女妻穆提婆子、超遷臨漳令、北史皆沒而不書、非實錄也。

高德政傳

汝兄如虎。此虎字後人追改。

王昕傳

邢邵後見世宗。此傳稱廟號、或是齊書元文、弟晞傳則全是北史、亦無論贊。

王琳傳

乃遣使奉表詣齊。此篇乃後人取南史足成、故多外齊之詞。

蕭明傳

封須陽侯。須當作滇、卽貞陽也。北史無蕭明傳、此篇當是百藥元文、自蕭祇以下、皆以北史補入。

裴讓之傳

裴讓之字士禮。案裴讓之、張宴之、陸印、王松年、辛術傳皆不著本貫郡縣、蓋校書者但知寫北史以補

足卷數、而不及檢其先世郡望、幾於智昏菽麥矣。

邢邵傳

靈太后令曰。案。太昌之世。靈太后死已久矣。此傳本出於北史。而北史文亦脫落。誤以李崇傳雜入。其實子才初無請立明堂事也。

祖珽傳

范陽適人也。適當作迺。汲古閣本作狄道。尤誤。

暴顯傳

遣與步汗薩、慕容儼等。步汗薩卽步大汗薩也。

與梁秦州刺史嚴超達。秦當作秦。

從攝口入江。攝當作瀉。

盧叔武傳

盧叔武。北史作叔彪。唐人諱虎。史家多改爲武。亦有作彪者。此人蓋名叔虎也。

袁聿修傳

出除信州刺史。卽其本鄉也。案。隋志。淮陽郡項城縣。東魏置揚州及丹楊郡。梁改曰殷州。東魏又改北揚州。後齊改信州。聿修陳郡人。故稱本鄉。

未曾受升酒之饋。升當作升，卽斗字。

李稚廉傳

除濟陰郡守，帶西兗州刺史。西兗州治濟陰郡。

儒林傳

齊時儒士罕傳尚書之業。徐遵明兼通之。遵明受業于屯留王總，傳授浮陽李周仁，及渤海張文敬，及李鉉，權會竝鄭康成所注，非古文也。下里諸生，略不見孔氏注解。案魏晉以後，經學莫盛於北方，鄭康成易書詩三禮，惟河北諸儒篤信而固守之。小王之易偽，孔之尚書，雖風行江左，不能傳於河朔。春秋亦宗服子慎，故當時有寧道周孔誤，諱言鄭服非之諺。見唐書元行沖傳隋世河間信都二劉，兼通南北學，唐初諸儒多出二劉之門，由是撰定正義，以王易、孔書、杜春秋列諸學官，而鄭服之義亡矣。

文苑傳

樊遜。未若龍駕虎服。此虎字後人追改。下文彫獸畫龍之獸，亦本虎也。校書者又不能改。顏之推。非社稷之能衛。此下脫一句。監本有小字注童汪錡三字。

昵狄牙而亂起。狄牙卽易牙。

實未改于弦望。遂□□□□及都□而昇降。諸本俱闕六字。

次曰敏楚。敏當作敏。卽愍字之推。又有子名游秦。蓋入周後所生。陸豫。廣韻。陸字下不云又姓。它書亦未見陸姓者。然諸本皆从目旁。

酷吏傳

邱珍。從高祖起義。此傳稱高祖。不稱神武。疑百藥書止存序及邱珍一篇。宋游道以下。取北史補之。

廿二史考異卷三十二

周書

文帝紀下

魏廢帝三年正月改北華爲鄜州。隋書鄜作敷。

南夏爲長州。隋志朔方郡長澤縣有後魏大安郡及置長州。不云嘗爲南夏州。志之漏也。

北梁爲靜州。此州未詳所在。

陽都爲汾州。此語未詳。魏之汾州本治西河。其地不屬西魏。據隋志則文城今吉州龍泉今臨州二郡。後周

俱曾置爲汾州。未知紀所云陽都在何地也。

南汾爲勳州。勳州卽玉壁城。章孝寬以管州刺史移鎮玉壁。兼攝南汾州事。是玉壁嘗爲南汾州矣。而

隋志失書。

南幽爲寧州。南幽卽魏志之幽州也。西魏置幽州于白土卽隋新平縣。而此加南字。

南廣爲清州。隋志清陽郡。西魏置蒙州。汲古閣本仁壽中改曰清州。未知卽此清州否。

東巴爲集州。隋志漢川郡難江縣。後周置集州。不云嘗爲東巴州。

北應爲輔州。隋志：淮安郡桐柏縣。西魏置淮陽郡及輔州。不云嘗爲北應州。此州疑是梁所置。梁置應州於應山縣。故此有北應之稱矣。

恆州爲均州。案：西魏有三恆州。隋志：北地郡三水縣。西魏置恆州。尋廢。一也。又宏化郡歸德縣。西魏置恆州。後周廢。二也。此紀之恆州。蓋在山河北境。而隋志失書。均州後省入唐州。

沙州爲深州。寧州爲麓州。義州爲巖州。此三州未詳所在。

江州爲沔州。隋志：沔陽郡甑山縣。西魏置江州。不云後改沔州。志之漏也。裴寬爲沔州刺史。卽此。

肆州爲塘州。塘當作唐。

揚州爲潁州。此西魏所立之揚州。未審治所。

司州爲憲州。案：隋志不見憲州之名。惟安陸郡吉陽縣下云：梁置義陽郡。西魏改爲南司州。尋廢。豈卽

此司州乎。周武帝天和二年。以憲州入昌州。志亦不載。

南平爲昇州。案：隋志：春陵郡湖陽縣。後魏置西淮安郡及南襄州。後郡廢。州改爲南平州。西魏改曰昇

州。後又改曰湖州。是湖州卽昇州矣。據此紀。改南襄爲湖州。南平爲昇州。則南襄與南平實是兩州。隋

志混而爲一。非也。

南郢爲歸州。案：魏志：南郢州領北遂安、馮翊、江夏、香山、永安、新平、宜民諸郡。不言治所。隋志：漢東郡唐

城縣西魏立肆州尋曰唐州後周省均款滇歸四州入今隨州西北有唐城廢縣後魏之南郢當亦在隨州西北也。

凡改州四十六今自華州至眉州數之止四十五蓋有脫誤。

明帝紀

二年河北置虞州隋志河東郡河北縣舊置河北郡不云曾置虞州。

武帝紀上

保定元年南寧州遣使獻滇馬及蜀鎧案保定二年又書分南寧州置恭州而隋志無南寧州之名惟

隄爲郡開邊縣云大業初廢恭州協州入焉疑卽此紀之恭州矣。

天和二年省東南諸州以潁州歸州潁州均州入唐州案隋志漢東郡唐城縣西魏立肆州尋曰唐州

後周省均款滇歸四州入改曰唐州此四字疑譌又安貴縣梁置北郢州西魏改爲款州此紀有潁無款款

與潁行書相似未知孰是又考隋志武當縣梁置興州後周改爲豐州開皇初改爲均州則周時武當

尚無均州之名不知天和所併之均州又在何地。

油州入純州隋志不見油州之名考純州卽隋桐柏縣縣有舊置淮南縣開皇末改爲油水蓋卽舊油

州矣。

隄州入襄州。案隋志襄陽郡南漳縣西魏立南襄陽郡後周置沮州尋廢沮與隄古字通用左傳江漢隄漳隄卽沮也。

五年大將軍鄭恪率師平越巂置西寧州。案隋志越巂郡後周置巖州開皇六年改曰西寧州據此紀則西寧州後周所置不始于隋也。

建德元年三月景辰誅大冢宰晉國公護。案是年三月癸卯朔丙辰則月十四日也護傳云三月十八日與紀異唐人避諱改丙爲景今刊本有作丙者乃後人追改。

武帝紀下

五年是日詔曰此下刊本皆脫數行。

六年關東平合州五十五郡一百六十二縣三百八十五戶三百三十萬二千五百二十八。案隋志後齊國滅州九十有七郡一百六十縣三百六十五戶三百三萬與周史異。

宣帝紀

大象元年河陽幽相豫亳青保七總管保嘗作徐。

靜帝紀

大象二年詔南定北光衡巴四州民此衡巴二州後齊所置在今黃岡縣地。

昌黎郡置魏州。昌黎當作昌樂。

皇后傳

武帝朱皇后。太祖以后賜高祖。後稍得親幸。大象元年二月。改爲天元帝太后。案。親幸之下。當云生宣帝。宣帝宣政元年七月。尊爲帝太后。

晉蕩公護傳

及汝姑兒賀蘭盛洛。案。賀蘭祥傳。字盛樂。父初真。尙太祖姊建安長公主。卽此盛洛也。洛樂文異音同。

代襲王達傳

所管澧州刺史蔡澤。案。後周無澧州。疑是豐州之譌。澤爲祐之弟。

李弼傳

侯景率河南六州來附。案。文帝紀亦云舉河南六州來附。而王思政傳乃云分布諸軍。據景七州十二

鎮。疑思政傳誤。

于謹傳

曾祖婆。魏懷荒鎮將。祖安定。平涼郡守。高平郡將。父提。隴西郡守。在平縣伯。案。北史。于栗磾傳。栗磾孫致。致弟天恩。天恩子仁生。位太中大夫。仁生子安定。平原郡太守。高平郡都將。安定子子提。隴西郡守。

茂平縣伯。唐書宰相世系表。于天恩生太中大夫仁。仁生高平郡都將子安。子安生隴西郡守子提。與北史世次略同。則周書以婆爲謹曾祖者。誤矣。謹之祖名安定。周書北史竝同。而唐表作子安。則表之誤。

怡峯傳

拜東西北三夏州諸軍事。夏州刺史。案隋志但有東夏與夏州。無西夏北夏之名。長孫儉爲秦州長史時。西夏州仍未內屬。而東魏遣許和爲刺史。儉以信義招之。和乃舉州歸。時太祖以儉爲西夏州刺史。總統三夏州。是西夏卽夏州。對東夏。故云西夏也。魏志有西夏州。寄治并州界。此東魏所置。與此無涉。

王德傳

涇州所部五郡。案魏志涇州領安定、隴東、新平、隨平、平涼六郡。未知此時省何郡也。

豆盧寧傳

武成元年。遷都督利沙文三州諸軍事。利州刺史。案趙剛傳。孝閔帝踐祚。出爲利州。總管利沙方渠四州諸軍事。沙文方三州不見於隋志。

楊忠傳

其西義陽郡守馬伯符以下。澆城降。案宋志。荊州有南義陽郡。晉末以義陽流民僑立。領厥西、平氏二

縣卽此西義陽也。隋志：漢東郡唐城縣。後魏曰澠西。置義陽郡。西魏改澠西爲下澆。據此傳，梁武喪敗之後，義陽始入西魏。則隋志云後魏置義陽郡者，考之未審矣。澠西卽厥西。宋齊以來，舊縣名義陽郡，亦非後魏始置也。

乃授忠都督三荆、二襄、二廣、南雍、平信、隨、江、二郢、浙十五州諸軍事，鎮穰城。案：隋志：湖陽縣。後魏置西淮安郡及南襄州。後郡廢，州改爲南平州。此有二襄。又有平州。蓋隋志誤合南襄與平州爲一。若江陵當陽縣。後周亦置平州。此時尙未屬魏也。梁於巴東郡置信州。此時亦未屬魏。不知忠所督信州置於何所。隋志：甌山縣。梁置梁安郡。西魏改曰魏安郡。置江州。卽此江州矣。

攻梁齊興郡及昌州，皆克之。齊興郡卽武當縣也。隋志：春陵郡。後魏置南荊州。西魏改曰昌州。據此，知其地曾入於梁，而昌州之名，亦因梁舊矣。

汝南城主李素。此非豫州之汝南。隋志：安陸郡吉陽縣。梁置曰平陽。及立汝南郡。蓋卽邵陵王綸所據之汝南也。

乃拜總管涇、幽、靈、雲、鹽、顯六州諸軍事，涇州刺史。案：幽州與涇絕遠。當是幽字之譌。

司馬消難傳

尋出爲交州總管。交州當爲邗州之譌。卽鄖字也。

所管邛、隨、溫、應、士、順、沔、環、岳九州。士當作土。環當作滾。

陳宣帝以爲都督安趙九州八鎮。趙當作隨。

盧辯傳

孝武至長安。上文云及帝入關，卽謂魏孝武也。依史例，當前書孝武，後書帝。

李賢傳

遂於平州北築汶陽城以鎮之。案陽雄傳，蠻帥文子榮竊據荊州之汶陽郡，又侵略南郡之當陽、臨沮等數縣，詔遣開府賀若敦等討平之，卽以其地置平州。隋志：南郡之當陽縣，後周置平州，而夷陵郡之遠安縣，舊置汶陽郡，二郡地本相接也。

李遠傳

尋授都督義州，恆農等二十一防諸軍事。義州當作義川。隋志：恆農之盧氏縣，西魏置義川郡。

李基傳

孝閔帝踐阼，出爲海州刺史。此後周之海州，未審治所。

梁臺傳

大統十五年，拜南夏州刺史。案隋志不載南夏州，周本紀：魏廢帝三年，改南夏爲長州。

史寧傳

建康袁氏人也。此涼州之建康，非揚州之建康也。袁氏當是表氏之譌。

轉通直散騎常侍、東義州刺史。東魏亦以故胡黎苟為東義州刺史，寧僅得入州，黎苟亦至，寧迎擊破之。

斬其洛安郡守馮善道。此東義州未知所在。洛安郡，隋志亦未見。權景宣傳：東魏又以土民章默兒為義州刺史，鎮父城。

權景宣傳

迺授并安、肆郢、新、應六州諸軍事，并州刺史。此并州治隨郡，西魏所置，非太原之并州也。

除輔國將軍、南州刺史。南下脫荆字，後魏本以魯陽為廣州，至是郭賢以南荆州刺史鎮魯陽，其後轉

廣州刺史，改從舊名，非移鎮也。

宇文盛傳

出為延綏、丹三州三防諸軍事。三防謂武安、伏夷、安民也。

于翼傳

轉陝熊等七州十六防諸軍事，宜陽總管。據此，則宜陽嘗置總管府，建德五年移於陝州也。隋志不及

宜陽置總管事，亦史之闕。

尋即除洛懷等九州諸軍事，河陽總管。案河陽置總管府，隋志亦失書。

仍敕河陽、襄州、安州、荊州、泗州總管。泗當作四。襄、安、荊三州并河陽爲四。後周無泗州也。

韋孝寬傳

大統八年轉晉州刺史。隋志絳縣。後周置晉州。建德五年廢。

元定傳

魏安西將軍、務州刺史。案魏志無務州。務字疑譌。

裴寬傳

保定元年出爲汾州刺史。尋轉魯山防主。汾當作沔。陳書程靈洗傳可證也。周本紀魏廢帝三年改江

州爲沔州。隋志於沔陽郡餽山縣云西魏置江州。而不及改沔州事。亦爲疏漏。

楊敷傳

還授使持節、蒙州諸軍事、蒙州刺史。此州蓋在荊州部內。後周之荆州治穰城隋志清陽隋西魏置蒙州是也。

崔說傳

除使持節、崇德安義等十三防。熊和忠等三州諸軍事。崇德防主。忠當作中。隋志新安縣。後周置中州。

薛端傳

基州地接梁陳。隋志竟陵郡豐鄉縣。西魏置。又置基州及章山郡。

王士良傳

俄除鄜州刺史。隋志上郡。後魏置東秦州。後改爲北華州。西魏改爲敷州。卽此州也。鄜。敷字異音同。

令狐整傳

豐州舊治。不居人民。賦役參集。勞逸不均。整請移治武當。詔可其奏。豐州舊治。蓋席固所據齊興郡城也。

郭彥傳

屬純州刺史樊舍卒。案。蠻傳。魏廢帝初。蠻酋樊舍舉落內附。以爲淮州刺史。卽其人也。淮州後改爲純州。

蘇亮傳

亮弟湛。字景備。案。蘇湛終於魏世。未嘗仕周。且其事迹已見魏書。不當闕入周史。

宇文神舉傳

所部東壽陽縣土人相聚爲盜。率其黨五千人。來襲州城。案。隋志并州壽陽縣下云。開皇十年。改州南受陽縣爲文水。分州東故壽陽置壽陽。考。壽陽縣本西晉所置。後魏改名受陽。卽開皇初改爲文水者也。其云故壽陽者。當卽此傳之東壽陽。未審置於何代。隋初併省此縣。因有故壽陽之目耳。

庾信傳

陸士衡聞而撫掌。是所甘心。張平子見而陋之。固其宜矣。先大父青文公云。撫掌與甘心對。陋之與宜對。此體唐初人多有之。王勃滕王閣詩序。龍光射牛斗之虛。徐孺下陳蕃之榻。龍光牛斗。徐孺陳蕃。亦句中自爲對也。又蘭亭已矣。梓澤邱墟已矣。疊韻也。邱墟雙聲也。兩虛字對兩實字。與庾子山賦同格。

鎮北之負譽於前。風颺懷然。注庾集者。皆以鎮北爲邵陵王綸。非也。以梁史考之。當指鄱陽王範而言。範嘗爲鎮北將軍。以合州刺史鎮合肥。屢啓言侯景姦謀。爲朱异所抑。及景圍京邑。範遣世子嗣入援金陵。失守。範泝江西上。至溢城糧盡。憤悲而薨。世子嗣據晉熙。與賊將任約力戰。中流矢卒。故有才子并命之語。

蕭撝傳

都督益梁秦潼安瀘青戎寧華信渠萬江新邑楚義十八州諸軍事。此十八州。惟益梁秦沿朱齊之舊。餘皆梁末增置。尉遲迥都督十八州。亦即謂此。以隋志考之。潼州卽金山郡。安州卽普安郡。瀘州卽瀘川郡。青州卽通義縣。戎州卽犍爲郡。信州卽巴東郡。渠州卽宕渠郡。萬州卽通川郡。江州卽隆山縣。新州卽新城郡。楚州卽巴郡。邑疑巴字之譌。梁置北巴州于閬中。而清化郡舊亦爲巴州也。志稱越嶲郡。

隋開皇六年改西寧州。疑卽此寧州。惟華義二州未詳。

韋祐傳

鎮九曲城。今宜陽縣東有故九曲城。魏元傳。洛安民雍方雋據郡外叛。攻破郡縣。元率恆農、九曲、孔城、伏流四城士馬破走之。孔城在今洛陽縣南。伏流在今嵩縣北。皆當時要鎮也。

韓雄傳

除東徐州刺史。此西魏所置之東徐州。非地形志之東徐治下邳者也。據下文云東魏東雍州刺史郭叔略與雄接壤。則其地去東雍不遠。東魏之東雍治正平。則東徐蓋在洛陽之西北。正平之南矣。

除使持節都督中徐、虞、洛、四州諸軍事。中州刺史。案後周置中州於新安。虞州于河北。洛州卽洛陽。徐州疑卽東徐州也。又考司馬裔傳。大統三年裔于溫城起義。遣使送款。六年授河內郡守。尋加使持節。平東將軍。北徐州刺史。則西魏又嘗置北徐州於河內矣。

魏玄傳

十三年與開府李義孫攻拔伏流城。又剋孔城。此大統之十三年。卽東魏武定五年。傳不書大統者。闕文也。魏志伊陽郡。武定二年置治伏流城。後陷。又新城郡。天平中置治孔城。後陷。據此傳。則二城之陷。皆在武定五年矣。

轉和州刺史。伏流防主。案本紀。保定二年。於伏流城置和州。故以刺史領伏流防主也。

泉企傳

上洛豐陽人也。案魏志。豐陽縣爲上庸郡治。而上庸郡本名東上洛郡。永平中始改上庸。史從其初之。累遷左將軍。浙州刺史。浙當作浙。

李遷哲傳

軍次并州。梁并州刺史杜滿各望風送款。此與權景宣之并州。又非一地。隋志通川郡宜漢縣下云西魏置并州。及永昌郡者是也。據此傳。則梁代已有之。

進圍疊州。剋之。獲刺史冉助國等。此疊州當在今興安之南。夔州之北。隋志不載此州。其臨洮郡疊川縣下云。後周置疊州者。乃別一疊州。本吐谷渾地也。

楊乾運傳

梁大同元年。除飄武將軍。西益潼刺史。據此。則梁時有西益州。而隋志無之。尋轉信武將軍。黎州刺史。黎州卽後魏所置之益州。治東晉壽。

太清末。遷潼南梁三州刺史。梁置潼州於涪南。梁州于南安。而西城亦爲南梁。乾運除刺史。在收復南鄭之後。南梁州當在西城矣。三當作二。

又遣其婿樂廣鎮安州。

隋志：普安郡，梁置南梁州，後改安州。

即南安

大約宋齊以來，梁州常治南鄭。天監

初，夏侯道遷以南鄭降魏，而梁州移治西城，其後析置州郡，以南安爲南梁州，及大同元年，魏梁州刺史元羅以南鄭降，梁州復治南鄭，遂移南梁之名於西城，而改南安之南梁爲安州。史雖未見改置年月，可以意度之也。

扶猛傳

割二郡爲羅州，以猛爲刺史。羅州，隋竹山縣地，二郡之名未詳。

轉綏州刺史。案：後周有兩綏州，一在雕陰，一在房陵。扶猛爲刺史，則房陵之綏州也。

陽雄傳

上洛邑陽人也。魏志：上洛郡無邑陽縣。隋志：朱陽郡有邑陽縣。

遷西寧州總管。案：隋志未見西寧州。

席固傳

梁元帝嗣位江陵，遷興州刺史。此興州當置于齊興郡。隋志：武當縣舊僑置始平郡，後改爲齊興郡。梁置興州，後周改爲豐州，蓋席固以地入西魏，魏卽以本州授之，其時已置興州於順政郡，故易其名，非徙其地也。

尋拜昌歸憲三州諸軍事、昌州刺史。案隋志歸州後省入唐州、憲州不見於隋志、據本紀蓋西魏末以司州改置也。

蕭管傳

王琳又遣其將雷又柔襲陷監利郡。太守蔡大有死之。案隋志監利縣屬沔陽郡、不言梁嘗置郡。

蠻傳

魏廢帝初蠻酋樊舍舉落內附、以為淮北三州諸軍事、淮州刺史、淮安郡公。案隋志淮安郡、後魏置東荆州、西魏改為淮州、其治所在比陽縣、此一淮州也。又桐柏縣、梁置曰淮安、并立華州、又立上川郡、西魏改州為淮州、後改為純州、此又一淮州也。此樊舍所授刺史、乃桐柏之淮州、代王達傳、出為荆淮等十四州十防諸軍事、則比陽之淮州也。

目錄序

臣寮、臣安國、臣希味死謹上。臣寮者、安寮也。臣安國者、王安國也。臣希者、林希也。此序不云史有殘闕、今考紀傳、每篇皆有史臣論、惟列傳第十六、魏第十八、長孫第二十三、寬第二十四、申第二十五、康等無之、蓋非德棻元本、其廿三、廿四兩卷、全取北史、廿五卷亦取北史、而小有異同、十六、十八兩卷與北史多異、而十六卷尤多脫漏。

廿二史考異卷三十三

隋書一

高祖紀上

漢太尉震八代孫鉉。北史代作世案。隋史成於唐太宗時。其時不避世字。如王世積、陰世師、馮世基、薛

世雄、虞世基諸人。傳皆未回避。此紀風骨不似代閒人。代稱純孝。彰不代之業。精采不代。周輔乃宏道

于代。代俗之徒。德爲代範。與代推移。行歌避代。皆唐人追改。而風流映世。世子世孫、世祿、世人、及章世

康、王世積、虞世基之類。仍用本文者。蓋唐以後人又據它書回改。而改之復不能盡也。民部尙書之民

不諱。而啓民可汗則改爲啓人。賀若弼、柳謩、薛世雄、皆因校書者展轉改易。非史家之例不一也。

方置文深之柱。非止尉佗之拜。此用馬援銅柱事。援字文淵。避諱改爲深字。

開皇元年三月。和州刺史、新義縣公韓擒虎。本文不當有虎字。蓋後人增入。毛本無虎字是也。仁壽三

年詔云風雲之從龍虎。亦當是武字。皆後人所改。

高祖紀下

十九年四月。突厥利可汗內附。十月。以突厥利可汗爲啓人可汗。利可汗當作突利可汗。史脫突字。啓

人。煬帝紀作啓民。突厥傳及它傳亦多作啓民者。

煬帝紀下

大業九年十月。改博陵爲高陽郡。地理志失載。

禮儀志四

後周保定三年。陳養老之禮。以太傅燕國公于謹爲三老。有司具禮擇日。高祖幸太學以食之。事見謹傳。案五代志旣編入隋書。與周史各自爲部。當云事見周書于謹傳。於例乃合。否則似隋書有謹傳矣。

音樂志上

中庸表記坊記。緇衣。皆取子思子。案緇衣。或云公孫尼子所作。考文選注引子思子云。民以君爲心。君以民爲體。又引子思子云。詩云。昔吾有先正。其言明且清。今其文皆在緇衣篇。則緇衣爲子思子之言信矣。坊記一篇。引春秋者三。引論語者一。春秋。孔子所作。不應孔子自引。而論語乃孔子歿後諸弟子所記錄。更非孔子所及見。竊意表記坊記二篇。所稱子言之。子曰者。皆子思子之言也。

音樂志中

故曹妙達。安未弱。安馬駒之徒。至有封王開府者。安未弱。北史恩幸傳作何朱弱。

音樂志下

其歌曲有陽伴。陽伴卽所謂楊叛兒也。

律麻志上

圓周益數二丈一尺四寸一分五釐九毫二秒七忽。二丈當作三丈。

銘八十二字。今數之止八十字。

王顯達獻古銅權一枚。上銘八十一字。案黃帝初祖以下凡七十九字。并律權石重四鈞六字計之。則爲八十五字矣。

律麻志中

中左兩音迭有增損。中左謂中原江左也。然割裂不成文。

律麻志下

朔晨百三半。晨當作辰。今人所謂時也。以十二除朔日法得之。氣朔日法各不同。故朔辰與氣辰數亦異。要皆十二分日法之一也。

日限十一。當作十二。考李淳風甲子元術推日躔卽寫焯法。其云進綱者卽盈汛也。云退紀者卽虧總也。而皆以十二乘之。知此文日限當爲十二矣。

就徑求望者。加日十四。餘九百五十半。下弦加日二十二。餘百八十四。餘九百五十半。下弦加五十九。

當云下弦加日二十二，餘百八十三，太，句四餘九以下皆衍文也。五十九之數，於義無當，或當云求後月朔，加日二十九，餘六百五十九。

分餘滿法，從日度，一句百度有所滿，則從去之。百當作日。毛本作日

度準三百四十八，四當作三，度準者，歲率之半也。

又準度乘朔餘，加之。準度當作度準。

又十二乘辰餘，四為小太，亦曰少，五為半少，六為半，七為半太，八為大少，亦曰太，九為太。此太字當作大十為大

太，十一為窮辰少，辰餘之下，當有一二三之名，不應便從四起，蓋脫文也。凡以十二乘者，即以十二

為法母，十二之三，即四分之一也，故為少，而二為小少，四為小太矣，十二之六，即四分之二也，故為半，

而五為半少，七為半太矣，十二之九，即四分之三也，故為大，而八為大少，十為大太矣，十一為窮辰少，

則一為沾辰太矣。後世有士元，當援吾言以補之。

每加日十五，餘萬一百九十秒三十七。此二十四氣恆日及餘也。置歲數，以二十四約之，又以氣日法

收之，得十五日萬一百九十二分又四十八分之三十七也。當云餘萬一百九十二，脫二字。

小寒節，陟五十三。當云陟四十三。

交月二千七百二十九，率四百六十五。以交率除交月，得五月四百六十五之四百有四，而一食也。古

法五月二十三之二十而一食。三統四與此率相課則萬六百九十五月之中古法得九千三百食。阜極得九千二百九十二食。視古率微弱。

交復日二十七。餘二百六十三秒三千四百三十五。交日十三。餘七百五十三秒四千六百七十九。史失載秒法之數。今以意補之。蓋倍交日之秒數。九千三百減交復日之秒數。其餘數五千九百二十三。是爲秒法也。

交限日十三。餘三百五十五秒四百七十三半。三百當爲五百。據下文。入交二日。餘百九十八以下。入交十三日。餘五百五十五以上。皆爲食限。以五百五十五減朔日法。四千二百餘六百八十七。并交日餘七百五十三。爲一千四百四十。滿日法爲一日。餘百九十八。與前限相等。是爲交前交後之食限。

五行志下

周大象二年。尉遲敗於相州。卽尉遲迴也。魏書官氏志。尉遲氏後改爲尉氏。宇文當國。凡代北姓。皆令復舊。故迴仍稱尉遲氏。而當時猶有尉迴之稱。楊義臣本姓尉遲氏。而詔稱尉義臣。鮑宏傳亦云尉義臣。

神武行殿中將軍曹魏諫曰。北史神武紀作曹魏祖。此脫祖字。

百官志中

周太祖命尙書令盧辯制六官。以魏恭帝三年始命行之。所設官名。訖於周末。多所改更。竝見盧傳。不復重序云。案周書載官制名號。命數于盧辯傳。以本書無志。故存其事於傳中也。及長孫无忌等承詔爲五代志。事從其類。宜改入百官志。不當闕其文。而取徵于列傳矣。其後五代志編入隋書。此語猶仍不改。書別兩朝。文取互見。揆之體裁。詎爲允當。且周末改更之制。傳未悉載。不得云竝見盧傳也。

百官志下

上中州減上州吏屬十二人。王懋竑曰。隋文帝父名忠。并中字亦諱之。侍中改爲納言。中書省改爲內史。殿中改爲殿內。中舍人。中常侍。中謁者。俱改爲內。皆其顯然可考者。而上中州。中上州。中中州。中下州之類。仍作中。此必非當時本文。或史官以其不辭而改之也。

地理志上

天監十年。有州二十三。謂揚、南徐、荆、江、雍、郢、南兗、湘、豫、司、北兗、北徐、青、梁、益、交、廣、南梁、寧、衡、桂、越、霍也。安定郡。舊置荊州。案後周嘗置總管府。志失書。上郡內。部縣。舊置敷州及內。部郡。內。部本中。部。避隋諱。改朔方郡。長澤縣。西魏置闡熙郡。又有後魏。太安郡。及置長州。案周本紀。魏廢帝三年。改南夏爲長州。是後魏置南夏州于此。西魏改爲長州也。志有脫誤。

天水郡上邽縣。故曰上邽。大業初改名。當云故曰上封。魏志。天水郡有上封縣。犯太祖諱。蓋上邽本漢舊縣。後魏避道武嫌名。改爲上封。至大業初。復稱上邽也。

隴西郡隴西縣。舊城內陶。城當作曰。內陶本中陶。避諱改。

枹罕郡。舊置河州。案。後周保定四年。置總管府于河州。五年。廢河州總管。改置總管于洮州。俄廢。仍遷總管府于河州。見周書李賢傳。

武威郡昌松縣。後魏置昌松郡。後周廢郡。以榆次縣入。榆次當作摺次。因并州有榆次縣。相涉而誤。敦煌郡常樂縣。後魏置常樂郡。後周併涼興。大至。冥安。閭泉合爲涼興縣。大至卽廣至。避隋煬帝諱。以廣爲大也。冥安當作宜安。閭泉蓋卽淵泉。史家避唐諱改之。

漢川郡。舊置梁州。此晉宋以來之梁州也。梁天監三年。夏侯道遷叛入于魏。大同元年。仍爲梁。有梁末。又入西魏。

西城郡。梁置梁州。尋改曰南梁州。案。天監初。失漢中。因移梁州于西城。大同初。梁州復治漢中。而西城遂有南梁之稱。

房陵郡。西魏置光遷國。後周廢。光遷國未詳何人所封。河池郡。後魏置南岐州。後周改曰鳳州。案。周書。魏廢帝三年。改南岐爲鳳州。是時周末受禪也。後周嘗

作西魏。

順政郡。後魏置東益州。梁爲武興蕃王國。武興卽仇池氏楊氏所據。

義城郡。後魏立益州。世號小益州。梁曰黎州。西魏復曰益州。又改曰利州。案周書魏廢帝三年改西益

爲利州。是西魏以此益州爲西益州也。

金山郡。西魏置潼州。案梁書武陵王紀傳。太清五年。西魏將尉遲迴帥衆逼涪水。潼州刺史楊乾運以

城降之。則梁時已有潼州。不始于西魏也。

巴西郡。梁置南梁北巴州。此條似有脫文。當云梁置南梁州。後改爲北巴州也。考天監八年。以北巴西

郡置南梁州。見梁書本紀。其改名北巴。則史未詳其年。當是大同初。復收漢中之後。以西城爲南梁。因

改此州爲北巴耳。志于普安郡下。又云梁置南梁州。後改爲安州。此則莫能詳其建置之本末矣。

閬內縣。本閬中。隋避諱改。

梁置北巴郡。當依梁書作北巴西。

巴郡。梁置楚州。案梁置楚州于淮南之楚城。而巴郡又立楚州。是同時有二楚州。

隆山郡。西魏置陵州。西魏當作後周。

資陽郡。西魏置資州。西魏當作後周。考周書閔帝紀。元年正月。于劍南陵并置陵州。武康郡置資州。遂

寧郡置遂州。志于遂州。書後周置。陵賚二州。書西魏置。蓋考之未審也。武康郡名志亦失書。
越嶲郡。後周置巖州。開皇六年。改爲西寧州。案周書本紀。天和五年。大將軍鄭恪率師平越嶲。置西寧州。則西寧州乃後周所置。非始于隋也。

地理志中

河南郡陝縣。後魏置。及置陝州恆農郡。案後周嘗于陝州置總管府。志失書。

陸渾縣。東魏置伊川郡。領南陸渾縣。開皇初郡廢。改縣曰伏流。大業初改曰陸渾。又有東魏北荊州。後周改曰和州。開皇初又改曰伊州。案魏志。北荊州領伊陽、新城、汝北三郡。伊陽郡領南陸渾一縣。與此志正合。惟伊陽伊川郡名小異爾。周本紀。保定二年。于伏流城置和州。可證後周之和州在陸渾。不在襄城也。而志于襄城郡。又云東魏置北荊州。後周改曰和州。開皇初改爲伊州。未免複而舛矣。

濟陰郡。後魏置西兗州。案魏初置兗州于滑臺。其後青兗內附。因稱滑臺爲西兗。太和中始罷。此濟陰之西兗州。乃孝昌中所置也。

襄城郡郟城縣。舊曰龍山。東魏置順陽郡。及南陽郡南陽縣。此廣州僑置之順陽。南陽。非荊州之順陽。南陽也。

汝南縣。有後魏汝南郡及符壘縣。竝後齊廢。此僑置之汝南。魏志廣州有汝南郡。永安元年置。治符壘。

城卽此。

魯縣。後魏置荊州。尋廢立魯陽郡。後置魯州。案魯陽之置荊州。在太和十八年。至二十二年。移荊州于

穰城。而以魯陽爲郡。永安中。置廣州于魯陽。而齊周因之。史未見魯州之名。當爲廣州之誤也。

潁川郡葉縣。又東魏置定南郡。後周廢爲定南縣。大業初省入。案魏志。襄州有南安郡。領安南。南舞。葉

南定四縣。太和中。嘗置郢州于此。疑卽此。志所謂定南郡。而二史郡名互異。未知其審。

汝南郡真陽縣。舊置郢州。東魏廢州。置義陽郡。案魏以梁之司州爲郢州。治義陽。孝昌末。郢州復入于

梁。乃僑立郢州于此。天平中罷州。仍立義陽郡。以撫其遺民。故真陽亦有義陽郡。

新蔡縣。東魏置終蔡州。終字衍。

淮陽郡項城縣。東魏置揚州。及丹楊郡秣陵縣。梁改曰殷州。東魏又改曰北揚州。案此條東魏字兩見。

疑上東字當爲後字之誤。魏志北揚州。天平二年置治項城。不言嘗置揚州。

恆農郡盧氏縣。後魏置漢安郡。西魏置義州郡。開皇初郡廢。州改爲號州。志云州改。而不言何時置州。

蓋有脫文。考權景宣傳。郭賢從王思政鎮恆農。授使持節。行義州事。當州大都督。此義州當卽治義州

郡。

浙陽郡。西魏置浙州。案魏志有析州。卽此浙州也。魏書以關西爲僞。西魏所置州郡。皆棄而不書。析州

之名。既見于魏收書。則不始于西魏矣。

南陽郡。舊置荊州。案南郡亦云舊置荊州。南陽之荊州。後魏之荊州也。南郡之荊州。晉宋齊梁之荊州也。

淮安郡比陽縣。又有後魏城陽縣。置殷州城陽郡。案魏志未見殷州之名。惟郢州領安陽、城陽、汝南三郡。或疑卽此殷州。然志于此縣下。又云又有比陽故縣。置西郢州。西魏改爲鴻州。則西郢與殷州又似各別。魏收志有南郢。而無西郢。是一是二。不可考矣。

慈邱縣。後魏曰江夏。并置江夏郡。案魏志南郢州有江夏郡。領屈陽、郢陽二縣。而無江夏縣。未知卽此否。

東平郡雷澤縣。舊曰城陽。城當爲成。

勃海郡滴河縣。滴當作滴。讀如商。

清河郡漳南縣。有後魏故素盧城。素當作索。

清泉縣。本清淵。史家避唐諱追改。

汲郡汲縣。東魏僑置七郡十八縣。後齊省以置伍城郡。魏志。興和二年。置義州。寄治汲郡陳城。領五城、秦寧、新安、澠池、恆農、宜陽、金門七郡。與此志合。伍城卽五城也。

黎陽縣。後魏置黎陽郡。後置黎州。案周書武帝紀。宣政元年。分相州黎陽郡置黎州。則黎州乃周所置。

魏世無此州也。當云後周置黎州。脫周字。

長平郡。丹川縣。舊曰高都。後齊置長平。高都二郡。案魏志。長平。高都二郡。魏永安中置。非始於後齊。

上黨郡。鄉縣。又有後魏南垣州。尋改豐州。後周廢。此州不見於魏收志。或是西魏所置。

絳郡。稷山縣。又有後周勳州。置總管。後改曰絳州。勳州即玉壁城。

文城郡。昌寧縣。後魏置。并內陽郡。案魏志。南汾州中陽郡有昌寧縣。隋人避諱。改中為內。

馬邑郡。雲內縣。後魏立平齊郡。尋廢。案平齊郡。皇興初置。領懷寧。歸安二縣。其廢當在遷洛之後。

樓煩郡。秀容縣。舊置泗州。泗當作肆。

襄國郡。鉅鹿縣。開皇六年。置南蠻縣。蠻當作變。

趙郡。廩陶縣。舊曰廩遙。開皇六年。改為陶。案廩陶本漢舊縣。後魏永安二年。分廩陶置廩遙縣。治楊城。

其廩陶故縣。不見於隋志。蓋廢于齊周之世矣。隋改遙為陶。雖取故名。其實非一地。

河間郡。舊置羸州。羸當作瀛。

文安縣。有狐狸液。液當作淀。

清苑縣。舊曰樂鄉。後齊省樊與。當作北新城。清苑。樂鄉入永寧。改名焉。開皇十八年。改為清苑。案清苑。

縣、魏太和元年分新城置。即北後齊與新城、樂鄉俱省入永寧。又即永寧故城。而更其名曰樂鄉。隋開皇中。又改名清苑。實即後魏之永寧城也。魏志謂太和中改樊輿爲扶輿。此志仍作樊輿。與魏志亦不合。

上谷郡遂城縣。後魏置南營州。淮營州置五郡十都。此八字屬建德郡。襄平、新昌、屬遼東郡。永安屬樂浪郡。富平、帶方、永安屬營邱郡。今考魏志當云置南營州及五郡十一縣。龍城、廣興、定荒、屬昌黎郡。石城、廣都屬建德郡。此志蓋脫十五字。又譌四字也。襄平以下與魏志同。但魏志襄平作太平。似當從此志。

後齊唯雷黎一郡。當云昌黎。脫昌字。

地理志下

彭城郡符離縣。有竹邑縣。梁置睢州。案。梁之睢州治竹邑城。東魏之睢州治取慮城。隋爲夏邱縣地。有女山、定陶山。案。晉宋之際。僑置南濟陰郡及定陶縣于此。山蓋以縣得名。魯郡博城縣。舊置泰山郡。後齊改郡曰東平。開皇初。郡廢。大業初州廢。案。志云州廢。不云何時置州。蓋有脫文。以王劭舍利感應記證之。當置秦州于此。

琅邪郡。舊置北徐州。案。梁之北徐州治鍾離。此則後魏所置。魏志北徐州。永安二年置。領東泰山、琅邪

二郡不言州所治。據此志。蓋治卽邱也。

沂水縣。舊置南青州及東安郡。案。魏皇興初。置東徐州于圍城。其後以下邳爲東徐州。而改東徐爲南青州。

東海郡。漣水縣。舊曰襄賁。置東海郡。東魏改曰海安。海安當作海西。魏志。襄賁縣。蕭鸞置東海郡。武定二年。改置海西郡。

下邳郡。夏邱縣。又梁置潼州。後齊改曰睢州。案。魏志。睢州。武定元年。改置。當云東魏。不當云後齊。

淮陽縣。又有梁臨清、天水、浮陽三郡。東魏并爲甬城縣。甬城。魏志作角城。太平寰宇記。角城在今宿遷

縣東南百一十一里。縣道記云。舊理在淮之北。泗水之西。亦謂之泗城。晉義熙中。于此置淮陽郡。仍置角城縣。梁改角城爲淮陽縣。後魏改爲角城縣。

江都郡。山陽縣。有後魏淮陰郡。東魏改爲淮州。案。魏志。淮州。蕭衍置。魏因之。治淮陰城。則淮州乃梁所置。非東魏所改。且淮陰諸郡。自侯景之亂。始入于魏。永熙以前。非魏所有也。

盱眙縣。舊魏置盱眙郡。案。盱眙郡。晉安帝所立。非始于魏。魏字衍。

六合縣。舊曰尉氏。置秦郡。後齊置秦州。案。梁書杜嗣傳。齊將郭元建。攻秦州。刺史嚴超遠于秦郡。則秦州之名。梁末已有之矣。陳書高宗紀。太建十年八月。改秦郡爲義州。十月。罷義州。志亦失書。

永福縣。梁置涇城、東陽二郡。陳廢州。并二郡爲沛郡。此處有脫文。胡三省通鑑注引此云。梁置涇州。領涇城、東陽二郡。當從之。北史潘樂傳。涇州舊在石梁。侯景改爲淮州。樂獲其地。仍立涇州。此梁置涇州之證也。

鍾離郡。後齊曰西楚州。此梁之北徐州也。當云舊置北徐州。史脫文也。楚州治鍾離城。見于魏收志。亦當云東魏改楚州。皆志之脫漏。

淮南郡。舊曰豫州。後魏曰揚州。梁曰南豫州。東魏曰揚州。此宋齊之豫州也。東昏時。裴叔業以州降魏。改爲揚州。普通七年。梁復取之。仍爲豫州。而以合肥爲南豫州。太清元年。侯景內附。乃移豫州于懸瓠。而以壽陽爲南豫。改合肥爲合州。其明年。懸瓠仍入東魏。又明年。壽陽亦入東魏。仍爲揚州矣。

弋陽郡。定城縣。後齊置南郢州。後廢。案。魏志。南郢州有二。此南郢卽治赤石關者。武定八年。卽齊天保元年。故此志以爲後齊所置。其實始于梁末也。

般城縣。梁置義城郡及建州。并所領平高、新蔡、新城三郡。平高當作高平。考。魏志。南建州。蕭衍置。魏因之。領高平、新蔡、陳留、魯、南陳、光城、清河七郡。而新城郡別屬南朔州。與此志互異。

斬春郡。沛水縣。宋志作希水。

和郡縣志九江故城在黃梅縣西南七十里漢九江王鯨布所築然則隋改縣名曰新蔡因晉宋郡名也。

廬江郡梁置南豫州又改爲合州案梁天監五年章叡取合肥移豫州治焉普通七年改爲南豫州太清元年改合州

同安郡梁置豫州後改曰晉州案齊末失壽陽乃于晉熙立豫州梁天監五年移豫州治合肥蓋晉熙之爲豫州僅六七年耳大寶元年鄱陽王綽以晉熙爲晉州

宿松縣梁置高塘郡高塘當作高唐陳書高宗紀大建九年分江州晉熙高唐新蔡三郡爲晉州是也程靈洗傳出爲高唐太守

丹陽郡當塗縣舊置淮南郡平陳廢郡并襄垣平湖樊昌西鄉入焉平湖當作于湖樊昌當作繁昌宣城郡綏安縣梁末立大梁郡又改爲陳畱平陳郡廢省大德故鄆安吉原鄉四縣入焉案陳書高祖紀永定二年以廣梁郡爲陳畱郡卽此大梁也又陳詳傳割故鄆廣德爲廣梁郡蓋在梁敬帝之世故云梁末也志改廣爲大蓋避隋煬帝名而陳畱郡不云陳所改則考之未審矣大德卽廣德亦避隋諱改。

吳郡烏程縣舊置吳興郡梁末嘗于吳興置震州尋省史失書

東陽郡金華縣。舊曰長山。置金華郡。平陳郡廢。案。梁陳之際。有東陽郡。而無金華郡。陳後主子有東陽

王怪。可證陳時仍爲東陽郡也。志云。舊置金華郡。誤。又陳初嘗于東陽置縉州。志亦失書。

南郡松滋縣。江左舊置河東郡。陳時嘗置南荊州于河東郡。志失書。

春陵郡春陵縣。舊置安昌郡。北史蠻傳云。延昌元年。拜桓叔與南荊州。居安昌。是南荊州治安昌也。魏

志無此州。

湖陽縣。後魏置西淮安郡及南襄州。後郡廢。州改爲南平州。西魏改曰昇州。後又改曰湖州。案。周本紀。

魏廢帝三年。改南襄爲湖州。南平爲昇州。是南襄與南平明是兩州。隋志似混而爲一。

蔡陽縣。梁置蔡陽郡。後魏置南雍州。案。魏之南雍州治蔡陽。魏收志無之。

漢東郡唐城縣。又有東魏南□州。魏志亦無此州。

永安郡黃陂縣。後齊置南司州。後周改曰黃州。案。陳書。太建五年。以黃城爲司州。治下爲安昌郡。蓋因

後齊南司州之名。卽此黃陂也。黃州本因黃城得名。隋開皇初。乃移于齊安。

義陽郡鍾山縣。舊曰鄆。後齊改曰齊安。仍置郡。案。魏志。南司州。齊安郡。齊安縣。俱正始元年置。是齊安

之名。不始于後齊也。

江夏郡。梁分置北新州。尋又分北新立土、富、洞、豪、泉五州。案。漢東郡土山縣。梁置土州。而此地又立土

州。一在江北。一在江南。豈同時有兩土州乎。

蒲圻縣。梁置上雋郡。又有沙陽縣。置沙州。案。魏志。沙州領建寧、齊安二郡。蕭衍置。魏因之。治曰沙關城。

其地在今光山麻城二縣界。而江夏之沙陽。又置沙州。然則梁時江北江南各有沙州矣。

澧陽郡房陵縣。舊曰作塘。塘當作唐。

安鄉縣。舊置義陽郡。平陳郡廢。案。宋志。荊州有南義陽郡。晉末以義陽流民僑立。領厥西、平氏二縣。其

地在漢東郡。唐城縣志稱。唐城。後魏曰潑西。置義陽郡者是也。此安鄉之義陽郡。宋齊二志俱無之。未

詳何代所置。

廿二史考異卷三十四

隋書一

經籍志一

周易二卷。魏文侯師卜子夏傳。殘缺梁六卷。按阮孝緒七錄。撰於梁普通中。志所云梁者。阮氏書也。梁有魏司農卿董遇。注周易十卷。按漢魏至宋齊。九卿官名。皆不繫以卿字。至梁。乃有司農卿。少府卿之稱。此志載魏司農卿董遇。吳太常卿徐整。晉少府卿華嶠。魏衛尉卿應璩。晉衛尉卿石崇。晉太常卿潘尼。晉太僕卿王嶠。宋太常卿蔡廓之類。皆史臣不諳官制。以意增之。

詩神泉一卷。本名神淵。見後漢書。趙長君撰。唐人避諱改。

毛詩義疏二十九卷。沈重撰。周書儒林傳作二十八卷。

周官禮義疏四十卷。沈重撰。周書儒林傳作三十一卷。

喪服疑問一卷。樊氏撰。按周書樊深傳。喪服間疑一卷。蓋卽此書。

禮記義疏四十卷。沈重撰。周書儒林傳作三十卷。

禮記文外大義二卷。祕書學士褚暉撰。按儒林傳。吳郡褚暉。與暉同。煬帝時。爲太學博士。撰禮疏一百卷。

與此互異。

王氏史氏記二十一篇。漢書作王史氏。王史，複姓也。漢有新豐令王史音。見廣韻。此衍一氏字。

春秋土地名三卷。晉裴秀客京相璠等撰。按志中一書而重出者。如京相璠春秋土地名三卷。一見春

秋類。一見地理類。李槃戰國春秋二十卷。一見古史類。一見霸史類。裴子野衆僧傳二十卷。一見雜傳

類。一見雜家類。諸葛武侯集誠二卷。總集作一卷衆賢誠十三卷。總集作十卷女鑒一卷。婦人訓誠集十一卷。娣

如訓一卷。曹大家女誡一卷。貞順志一卷。俱一見儒家類。一見總集類。又如服虔春秋漢議駁二卷。兩

收於春秋類。趙陝甲寅元麻序一卷。兩收於麻數類。庚季才地形志。兩收於五行類。而前云八十七卷。

後云八十卷。本傳作八十七卷皆史臣舛疏之失。唐宋而後。志藝文者。重複益甚矣。

梁有漢劉歆。犍爲文學。中黃門李巡。爾雅各三卷。犍爲文學。卽舍人也。陸德明云。犍爲郡文學。卒史臣

舍人。漢武帝時待詔。蓋其人姓名人。

白虎通六卷。禮儀志引白武通。蓋唐初史臣避諱。改虎爲武。此志亦當作武。後來校書者輒改。

七經義綱二十九卷。樊文深撰。七經論三卷。樊太深撰。質疑五卷。樊文深撰。按周書儒林傳。深撰七經

異同說三卷。義經略論并目錄三十一卷。與此志名目互異。

江都集禮一百二十六卷。按潘徽序此書云。凡十二帙。一百二十卷。此衍六字。且此書本爲議禮而作。

乃不入禮家，又不入儀注，而附於論語之末，亦失其倫。

而又有尙書中候、洛罪級、五行傳、詩推度災、汜麻樞、含神務、孝經勾命決、勾與鈞同援神契、雜讖等書。按詩推度災以下五篇，即在七經緯三十六篇之內。五行傳乃伏生尙書大傳中之一篇，非緯書也。洛罪級之名，它書未見。

孔子曰：必也正名乎。名謂書字。鄭康成論語注云：正名謂正書字也。古者曰名，今世曰字。禮記曰：百名以上，則書之於策。孔子見時教不行，故欲正其文字之誤。後魏書：世祖始光二年，初造新字千餘，詔書引孔子名不正則事不成之語。江式論書表亦引孔子曰：必也正名乎。此漢儒相承之詰訓。許氏說文序云：於其所不知，蓋闕如也。則亦以正名爲正文字矣。許君在鄭之前，知其說不始於鄭氏也。北齊書李鉉傳：鉉以去聖久遠，文字多有乖謬，感孔子必也正名之言。

自後漢佛法行於中國，又得西域胡書，能以十四字貫一切音，文省而義廣，謂之婆羅門書。按華嚴字母之法，蓋濫觴於此。其初本十四音，後乃益爲四十二也。

凡六藝經緯六百二十七部。按孔穎達詩正義序稱全緩、劉軌思、劉醜、劉焯俱有義疏。春秋正義引衛冀隆難、杜秦道靜釋、蘇寬義疏、劉炫規過、賈公彥儀禮疏引黃慶、李孟、扈二家章疏。陸德明經典釋文有周宏正周禮音，已上諸書，唐初儒者皆見之，而隋志不載，并不在亡書之數何也。又沈重毛詩音二

卷、周禮音一卷、儀禮音一卷、禮記音二卷、儀禮義三十五卷、喪服經義五卷、樊深孝經問疑一卷、熊安生周禮義疏廿卷、禮記義疏四十卷、孝經義疏一卷、見於周書、明克讓孝經義疏、劉焯五經述議、劉炫春秋攻昧十卷、何妥孝經義疏三卷、辛德源集注春秋三傳三十卷、張沖孝經義三卷、劉善經四聲指歸一卷、見於隋書、而志皆遺之、或謂志所錄者、僅唐初所收東都圖籍、漂沒之餘、固宜漏落、然史臣自言於舊錄之外、更有附入、則有附有否、難辭絳漏之咎矣。

經籍志二

史記音義十二卷、宋中散大夫徐野民撰。即徐廣也。隋人避諱。因稱其字。然廣又有晉紀四十五卷、車服雜注一卷、亦在本卷內、卻稱名不稱字。蓋唐時修史。不出一手。故多駁文。又如民字避唐諱。例當作人。而農家類或云四人。月令或云齊民要術。春秋類有尙書左人郎荀訥。此徐野民仍用本字。則由後來校書者妄改。又不能盡改也。

漢書續訓三卷、梁北平譚議參軍韋稜撰。北平當作平北。

梁史五十三卷、陳領軍大著作郎許亨撰。今以許善心傳考之。此書目錄凡百卷。撰成上祕閣者。僅六帙五十八卷。蓋未成之書。然卷數亦不合。

淮海亂離志四卷、蕭世怡撰。按北史蕭圓肅撰淮海亂離志。不云世怡所撰。劉知幾又以爲蕭大圓作。

未審孰是。世怡本名泰，鄱陽王恢之子。圓肅者，武陵王紀之子。大園則簡文子也。

古今注八卷。伏無忌撰。章懷注。後漢書。屢引之。所謂伏侯古今注也。

托跋涼錄十卷。不著撰人。當是紀南涼事。禿髮卽托跋聲之轉也。

梁舊事三十卷。內史侍郎蕭大環撰。環當作圓。

汝南君諱議二卷。按三國志張昭傳注云。汝南主簿應劭議宜爲舊君諱。論者互有異同。張昭著論非

之。漢人以郡守爲君也。

道人善道開傳一卷。善當作單。

齊諧記七卷。宋散騎侍郎東陽元疑撰。元當作无。廣韻。東陽無疑撰齊諧記。

洛陽圖一卷。晉懷州刺史楊佺期撰。按晉無懷州。當是雍州之譌。

京口記二卷。宋太常卿劉損撰。唐志作劉損之。

隋王八河記六卷。隋當作隨。此校書人妄改。

湘州記一卷。郭仲彥撰。唐志彥作產。

宋武北征記一卷。戴氏撰。戴名延之。見水經注。

北伐記七卷。諸葛穎撰。巡撫揚州記七卷。諸葛穎撰。按穎傳云。撰鑾駕北巡記三卷。幸江都道里記一

卷蓋卽此兩書而書名卷數俱不合。

隋區宇圖志一百二十九卷。按崔頤傳大業五年受詔與諸儒撰區宇圖志二百五十卷奏之帝不善之更令虞世基許善心衍爲六百卷。是此書曾經再修然皆非百廿九卷也。

凡史之所記八百一十七部。按史部之見於列傳者如于仲文漢書刊錄三十卷張冲前漢書義十二卷許善心梁書七十卷榮建緒齊紀三十卷杜臺卿齊紀廿卷王劭齊書紀傳一百卷平賊記三卷皇隋靈感志三十卷柳晉王北伐記十五卷明克讓古今帝代記一卷續名僧記一卷宇文愷東都圖記廿卷明堂圖議二卷劉善經酬德傳三十卷諸劉譜三十卷諸葛穎洛陽古今記一卷志皆遺之。

經籍志三

正論六卷漢大尙書崔寔撰。按後漢書崔寔作政論亦無大尙書之名此志大尙書崔寔凡再見。

正訓二十卷內訓二十卷志皆不著撰人蓋辛德源所撰也本傳正作政。

長洲玉鏡二百三十八卷大業初祕書館學士虞綽祕書郎虞世南著作佐郎庾自直等奉詔撰見虞綽傳。

太公六韜五卷周文王師姜望撰。按三代以前男子無稱姓者稱太公望曰姜望此魏晉以後俚俗之言。

金輅十卷。志不著撰人。蓋劉祐所撰。見藝術傳。

陰策二十二卷。大都督劉祐撰。本傳作二十二卷。按志傳卷數互異者。如蕭吉樂譜集二十卷。傳作十

二卷。傳無集字張冲論語義疏二卷。傳作十卷。傳無疏字王劭齊志十卷。傳作廿卷。魏彥深後魏書一百卷。傳作

九十二卷。庾季才靈臺祕苑一百一十五卷。傳作一百二十卷。蕭吉相經要錄二卷。傳作一卷。薛道衡

集三十卷。傳作七十卷。李元操集十卷。傳作廿卷。魏彥深集三卷。傳作三十卷。諸葛穎集十四卷。傳作

廿卷。李德林集十卷。傳作五十卷。柳詵集五卷。傳作十卷。辛德源集三十卷。傳作廿卷。蕭欣集十卷。周

書本傳作三十卷。

錄軌象以頌其章一卷。此不似書名。疑有譌。

垂象志一百四十八卷。志不著撰人。蓋庾季才所撰。本傳作一百四十二卷。

綴術六卷。志不著撰人。當是祖冲之撰。

五經算術一卷。志不著撰人。蓋甄鸞所撰。

八會堪餘一卷。按周禮疏引堪輿大會有八。小會有八。即此書也。輿餘音同。

產乳書二卷。志不著撰人。甄術傳。劉祐著產乳志三卷。疑即此。

地動圖一卷。志不著撰人。甄術傳。臨孝恭著地動銅儀經一卷。

黃帝素問八卷，全元越注。袁廷構曰：越當作起。

凡諸子合八百五十三部。按：子部見於列傳者，如何安莊子義疏三卷、辛德源注揚子法言廿三卷、張
暉道言五十二篇、王劭讀書記三十卷、柳晉法華元宗廿卷、劉焯滑極十卷、麻書十卷、諸葛穎馬名錄
二卷、來和相經四十卷、耿詢烏情占一卷、蕭吉宅經八卷、葬經六卷、相手板要決一卷、太一立成一卷、
臨孝恭敬器圖三卷、九宮五墓一卷、遯甲月令十卷、元辰經十卷、元辰厄一百九卷、百怪書十八卷、祿
命書二十卷、九宮龜經一百一十卷、太一式經三十卷、孔子馬頭易卜書一卷、劉祐觀臺飛候六卷、元
象要記五卷、律麻術文一卷、婚姻志三卷、式經四卷、四時立成法一卷、安麻志十二卷、歸正易十卷、志
皆遺之。

經籍志四

晉太傅郭象集二卷。袁廷構曰：太傅下脫主簿二字。

益陽令吳商集五卷。按：禮類有晉益壽令吳商禮難十二卷、益陽縣名、屬衡陽郡、作益壽者誤。

宋徵士宗景集十六卷。宗炳字少文、避諱改爲景。

元真處士劉許集一卷。許當作許。

文海五十卷。志不著撰人、按：北史、蕭圓肅撰時人詩筆、爲文海四十卷、卽此。

百賦音十卷。宋御史褚詮之撰。按。宋子京校漢書揚雄三賦。屢引諸詮音。蓋卽此書。譌褚爲諸。又脫之字耳。子京未必親見此書。蓋采諸蕭該漢書音義也。顏氏家訓勉學篇云。習賦誦者。信褚詮而忽呂忱。亦指此書而言。

大隋封禪書一卷。志不著撰人。蓋何妥所撰。見儒林傳。

西府新文十一卷。梁蕭淑撰。按。顏氏家訓文章篇。梁元帝在藩邸時。撰西府新文紀志。云蕭淑者。當是元帝幕僚奉命撰集者。

凡集五百五十四部。按。集部見於列傳者。如李文博治道集十卷。明克讓集廿卷。劉臻集十卷。庾白直集十卷。孫萬壽集十卷。志皆遺之。

鄭譯傳

內史中大夫烏丸軌。按。周時功臣多賜代北姓。如王軌。賜姓烏丸氏。史於鄭譯。梁士彥。宇文忻。賀若弼。達奚長儒。元巖。來和。傳書烏丸軌。於崔仲方。和洪。傳書王軌。竇毅。賜姓紇豆陵氏。史於高祖紀。書竇毅。於李德林。傳書紇豆陵毅。此亦例之不一也。

前後所論樂事。語在音律志。按。牛里仁傳亦云。與姚察。許善心。何妥。虞世基等。正定新樂。事在音律志。又裴政傳云。嘗與長孫紹遠論樂。語在音律志。今隋史有音樂志。有律厯志。無所謂音律志也。何稠傳。

云。大業初。營造輿服羽儀。事見威儀志。閻毗傳云。毗立議輦輅車輿。多所增損。語在輿服志。今隋志祇有禮儀志。無所謂威儀輿服志也。史不出一人之手。欲其首尾義例無一踳駁。固是難事。然不應如是之甚也。

長孫晟傳

以其子雍閭爲葉護可汗。突厥傳作雍虞閭。

長子行布。次子恆安。按唐書宰相世系表不見此二人名。

韓擒傳

擒本名豹。唐人諱虎。史多改爲武。或爲獸。或爲彪。此獨更爲豹者。欲應黃班之文也。虎豹皆有斑。黃韓聲亦許近。

賀若弼傳

陳將魯達。周智安。任蠻奴。陳書作魯廣達。此避諱去一字。蠻奴本名忠。亦避諱稱其小字。

盧愷傳

於是除名爲百姓。此避唐諱。改民爲百姓也。隋書成於貞觀之世。其時二名不偏諱。而此傳及酷吏田式傳竝云除名爲百姓。

令狐熙傳

熙以州縣多有同名者。於是奏改安州爲欽州。黃州爲峯州。利州爲智州。德州爲驢州。東寧爲融州。按地理志。開皇十八年。改黃州曰玉州。改興州曰峯州。此傳恐有脫文。

李景傳

天水休官人也。地理志。天水郡無休官縣。

閻毗傳

帝嘗大備法駕。嫌屬車太多。按毗所奏大駕。法駕屬車之數。及煬帝改大駕三十六乘。法駕十二乘事。已見禮儀志。不當重出。

誠節傳

劉子翊。擢授治書侍御史。切諫忤旨。遣於上江督運。爲賊吳基子所虜。子翊說之。因以衆首。復遣領首。賊清江。遇煬帝被殺。賊知而告之。子翊弗信。斬所言者。賊又欲請以爲主。子翊不從。羣賊執子翊至臨川城下。使告城中云。帝已崩。子翊反其言。于是見害。按唐書林士宏傳。隋季。與鄉人操師乞起爲盜。大業十二年。據豫章。隋遣治書侍御史劉子翊討賊。射殺師乞。士宏收其餘衆。復戰彭蠡。子翊敗。死之。是子翊死於大業十二年。其時煬帝尙無恙。與隋書所載。絕不相符。豈同時有同姓名而同爲治書侍

御史者乎。恐二書必有一誤。

儒林傳

元善。祖又魏侍中。父羅。初為梁州刺史。按羅與又為昆弟。故有夜叉羅利之稱。不得為父子也。據北史。

善之父名舒。不名羅。

文學傳

王貞。孝逸生於戰爭之季。貞與齊王啓。不稱名而稱字者。避隋廟諱。以字行也。隋文帝祖名禎

藝術傳

庾季才。與王褒。庾信同補麟趾學士。此稱庾信。後又稱宗人信。於例未安。

外戚傳

獨孤陶。弟整。官至幽州刺史。按唐書外戚傳。整仕隋為涿郡太守。蓋大業初改幽州為涿州。刺史為

太守。名殊而實同也。

高昌傳

初蠕蠕立闕伯周為高昌王。此稱蠕蠕。後又稱茹茹。史駁文。

王充傳

王充字行滿。本名世充。避唐太宗名。單稱一字。隋史於世字不諱。而獨去世充者。嫌篇中多醜詞也。然於越王侗、張衡、楊汪、薛道衡、王韶、李密諸傳。仍稱世充。而傳載道士桓法嗣。取莊子人閒世。德充符二篇上之。云上篇言世。下篇言充。此卽相國名。則亦未之諱也。



廿二史考異卷三十五

南史一

宋本紀上

武帝。劉裕龍行虎步。唐人修晉梁陳齊周隋諸史。避廟諱。改虎爲武。或爲獸。或爲猛獸。或爲彪。南史於此字多不避。如宋武帝紀。龍行虎步。忠臣碎于虎口。潛構崎嶇。過于履虎。寧州獻虎魄枕。梁武帝紀。龍行虎步。陳武帝紀。龍驤虎步。龍行虎步。宣帝紀。此人虎頭。當大貴。趙伯符傳。如與虎狼居。蕭惠開傳。蜀人號曰臥虎。王僧虔傳。優者龍鳳。劣猶虎豹。黃回傳。朝廷畏之如虎豹。梁宗室傳。寧逢五虎入市。任昉傳。彪虎嘯而清風起。媿人靈于豺虎。羊侃傳。郎官謂卿爲虎。豈羊質虎皮乎。試作虎狀。侯景傳。太極殿前作虎視。以及蕭琛傳之虎皮靴。臧熹傳之白虎通。范蔚宗傳之虎帳。王僧辯傳之白虎艦。皆後來校書者所改。非延壽本文也。宋文帝紀。猛獸入郭內。劉湛傳。小字猛獸。顧憲之傳。獸而冠耳。獸卽虎字。梁宗室傳。但畏合肥有韋武。韋叡傳。且願兩武勿復私鬪。武亦虎字。袁顛傳。今日之行。本願生出彪口。彪亦虎字。此類則校書者不知而仍存之。宋齊梁陳本紀俱有虎賁之士三百人。殷淑儀。長沙王道憐。臨川王道規。江夏王義恭。豫章王嶷傳俱有虎賁班劍。劉穆之。徐孝嗣。章陵王子良。劉懷珍傳俱有

虎賁中郎將齊高帝紀。虎賁劍戟。文惠太子傳。虎賁雲罕之屬。皆校者追改。而宋前廢帝紀。武賁劍戟。劉師知傳。武賁鼓吹。恩倖傳。武賁中郎將。仍未改。齊高帝紀。索白虎幡。王儉傳。發白虎幡。蕭穎胄傳。朝廷以白虎幡追我。柳仲禮傳。以白虎幡解軍。亦皆追改。而王曇首傳。應須白獸幡。仍未改。宋少帝紀。魏軍剋虎牢。梁武帝紀。進剋虎牢。王鎮惡傳。破虎牢。到彥之傳。魏滑臺虎牢洛陽守兵竝走。彥之留尹冲守虎牢。柳元景傳。魯爽向虎牢。沈慶之傳。虎牢洛陽自然不固。皆追改。而宋文帝紀。魏剋武牢。仍未改。江夏王義恭傳。登虎邱山。謝舉傳。自虎邱山出赴之。復爲虎邱山賦。顧協傳。游虎邱山。皆追改。而何子季傳。至吳居武邱山。顧協傳。棲隱于武邱山。仍未改。宋武帝紀。好出神武門內。梁敬帝紀。起雲龍神武門。陶貞白傳。脫朝服挂神武門。陳宣帝紀。改作雲龍神獸門。梁丁貴嬪傳。詣神獸門。奉牋致謁。江夏王義恭傳。諸子竝神獸門外。傅亮傳。見客神獸門外。鄭鮮之傳。詣神獸門求啟事。王茂傳。羣盜燒神獸門。張惠紹傳。夜燒神獸門。張宏策傳。至夜燒神獸門。神武。神獸本神虎也。今本丁貴嬪。王茂。張惠紹傳。或有作神虎者。亦後人所改。沈攸之傳。率軍據虎檻。五軍在虎檻。建安王休仁屯虎檻。胡三省云。虎檻。洲中。燕湖之西南也。而建安王休仁傳。云出據獸檻。鄧琬傳。云自武檻進。據赭圻。有改有不改。王瑩傳。前云猛獸。入郭。後云虎象來格。亦有改有不改。周鐵武本名鐵虎。本傳。及王琳。周文育傳。俱作武字。而陳文帝紀。故護軍將軍周鐵虎。獨改虎字。曹武本是曹虎。本書皆作武字。而范元琰傳。徵爲曹武平西參軍。今刊。

本亦有改爲虎者。北史韓擒虎但稱韓擒，去下一字。南史魯廣達、任忠、樊猛傳稱隋將韓擒者，延壽本文也。而陳本紀及太子深、孔範傳作韓擒虎，亦後人所添。今本魯廣達傳亦或有加虎字者，皆緣校書之人不知史臣當避諱，而以意改易，又不能盡改也。

丙辰，候城門開。晉書北史避唐諱，改丙爲景。惟南史仍作丙，亦後人追改。獨陶貞白傳以宋孝建三年景申歲夏至日生，此景字未及改。

五月，至下邳。上文云經客下邳逆旅，又云以帝爲下邳太守，皆謂江左僑置之下邳。此以北伐浮淮入泗，乃至下邳，則是漢晉之故郡也。

帝率舟師南伐，使劉毅監太尉留府。按宋書是歲六月，更授公太尉中書監，加黃鉞，餘固辭。至次年，改授太尉中書監，乃受命。則南伐盧循之時，只是中軍將軍，未爲太尉，不當云監太尉留府也。晉書劉毅傳但云知內外留事。

於是改授太尉中書監，乃受命，奉送黃鉞。按前年已有太尉中書監，加當作黃鉞之命，惟受黃鉞，餘皆不受。故此云送黃鉞，又云乃受命也。南史刪去上一節，則送黃鉞之語無著。下文不得云又假黃鉞矣。率衆西討，復加黃鉞，領荊州刺史。加當作假。晉宋之制，使持節得殺二千石以下，假黃鉞則可專戮節將矣。宋武西伐劉毅，已假黃鉞，毅平，仍奉還之。至是伐司馬休之，又假黃鉞，毅與休之皆持節大臣，必

假黃鉞乃可行戮。南史於毅平之後，刪奉還黃鉞一節，則此文復加黃鉞，又無著矣。

以桂陽公義真爲雍州刺史，鎮長安。是時義真以安西將軍都督軍事，安西司馬王鎮惡、安西長史王脩、安西中兵參軍沈田子皆義真府之僚屬也。延壽於此處刪安西將軍四字，至關中亂後，乃云遣朱齡石代安西將軍桂陽公義真爲雍州刺史。前略而後詳，敘事亦不明白。若移安西將軍於此文雍州刺史之上，則前後貫串有法矣。李氏刪省舊文，往往未當，略舉一二以見義。

永初元年，詔曰：彭城桑梓，敦本斯隆，宜同豐沛。其沛郡、下邳各復租布三十年。此彭城、沛、下邳三郡皆僑置於江南者。宋書州郡志：南徐州、南彭城郡、江左僑立。晉明帝又立南下邳郡，成帝又立南沛郡。宋孝武以二郡并南彭城，按此三郡有戶口而無道里，大約僑居京口。

三年，進江州刺史王弘衛將軍，開府儀同三司。按本紀書除免者，唯三公、尚書令、僕射、儀同三司，其餘皆不書。此王弘以儀同三司，故特書，而永初元年左光祿大夫孔季恭、元嘉十六年特進左光祿大夫王敬宏、大明七年驃騎大將軍柳元景，皆加開府儀同三司，紀何以不書。此史例之可議者也。

宋本紀中

文帝。元嘉七年十月，魏剋金墉城。十一月，又剋虎牢。按景平元年，金墉、虎牢二城已爲魏所取矣。至是年北伐，乍復而旋失，史既不書二城之得，又何必書二城之陷乎。

孝武帝。孝建三年立皇弟休範爲順陽郡王。休若爲巴陵郡王。皇子子尙爲西陽郡王。按皇子封王者皆郡王也。紀皆不書郡。獨此條有郡字。梁簡文帝大心等始封皆書郡王。及遇害仍不書郡。此亦體例之可議者。

宋本紀下

明帝。泰始元年江州刺史晉安王子勛舉兵反。按湘東弒君自立子勛舉兵討之。義也。當時朝野具有公論。明帝謂蔡興宗曰。諸處未定。蔡琰已復同逆。興宗曰。逆之與順。臣無以辨。宋書蔡興宗傳蕭惠開自益州至都。明帝問其故。惠開從容答曰。臣唯知逆順。不識天命。南史蕭惠開傳此斯民之直道。百世不可揜者也。紀書子勛舉兵反。其黨皆云同逆。竝據宋書舊文。事隔數朝。不當猶徇曲筆。

四年改封山陽王休祐爲晉平王。按宋齊二志俱不載晉平郡。史之闕也。以六年改臨賀郡爲臨慶郡之例準之。亦當書改晉安郡爲晉平郡。此刪省之失當也。

六年改臨賀郡爲臨慶郡。賀與禍音相似。故改之。猶改駟爲駟也。

七年以皇子躋繼江夏文獻王義恭。義恭傳失書此事。

帝疾間。王懋竝曰。前不書有疾。而後云疾間。非史例也。後廢帝。孝武帝二十八子。明帝殺其十六。餘皆帝殺之。通鑑考異云。孝武諸子。十人早卒。二人爲景

和所殺。餘皆太宗殺之。無及蒼梧時者。南史誤也。予按沈約書本無此文。延壽采它書益之。考宋書孝武十四王傳。秦始皇六年。詔曰。世祖繼體。陷憲無遺。今以第九子智隨奉世祖爲子。則孝武之嗣。絕于明帝之世。史固有明文矣。

齊本紀上

高帝。建元二年正月戊戌朔。以司空褚彥回爲司徒。十二月戊戌。以司空褚彥回爲司徒。二文重出。蓋承南齊書之誤。

武帝。建元四年六月。進封江陵公子懋爲晉安王。據此。則晉平之復爲晉安。當在其時。臨慶之爲臨賀。廣興之爲始興。大約皆在齊初。子顯志竝略而不書。失之太簡矣。

皇孫昭業爲河南郡王。河字衍。上文立河南王長懋爲皇太子。亦當爲南郡王之誤。

永明十年。按是年四月辛丑。大司馬豫章王嶷薨。紀失書。

齊本紀下

廢帝海陵王。漢文帝晏駕。而鼎業傾移也。漢字誤。文帝謂文惠太子也。

廢帝東昏侯。永元二年四月。以新除尙書右僕射蕭懿爲尙書令。十月。殺尙書令蕭懿。按長沙王懿傳。授中書令。東昏將加酷害。徐曜甫勸令西奔。懿不從。曰。古皆有死。豈有叛走中書令耶。初。不言除尙

書令。然梁書安成王秀傳。懿入平崔慧景。爲尙書令。居端右。則實爲尙書令。恐懿傳誤耳。

和帝。中興二年三月。誅邵陵王寶攸。晉熙王寶貞。按。南齊書本紀。書邵陵王寶攸。晉熙王寶嵩。桂陽

王寶貞伏誅。此紀蓋有脫文。寶攸。列傳作寶脩。

梁本紀上

武帝。時宋帝昏虐。齊高謀出外。皇考肅順以爲一旦奔亡。則危幾不測。不如因人之欲。行伊霍之事。齊

高深然之。按。南齊書豫章王嶷傳。太祖帶南兗州鎮軍府長史蕭口順之在鎮。憂危既切。期渡江北

起兵。嶷諫曰。主上狂凶。人下不自保。單行道路。易以立功。外州起兵。鮮有克勝。物情疑惑。必先人受禍。

今於此起計。萬不可失。此二說意略相同。一以爲順之。一以爲嶷。未詳孰是。南史嶷傳亦載此語。

時上長兄懿罷益州還。仍行郢州事。乃使張宏策詣郢陳計于懿。語在懿傳。按。長沙王懿傳。永元二年。

裴叔業據豫州反。懿以豫州刺史。領歷陽。南譙二郡太守。討之。武帝時在雍州。遺典籤趙景悅說懿與

晉陽之甲。誅君側之罪。懿不答。傳中初未有罷益州還。仍行郢州事之文。亦未有遣張宏策陳計之語。

其語乃在宏策傳。非懿傳也。

天監元年四月。改南東海爲蘭陵郡。按。蕭整渡江。居武進縣之東城里。齊梁二代。皆其後裔。自稱南蘭

陵南蘭陵上郡中都里人。南齊志不載南蘭陵郡。則齊世嘗併省。至是改南東海爲蘭陵郡。治京口。而

改武進爲蘭陵縣。郡縣皆有實土矣。

閏月以行宕昌王梁彌邕爲安西將軍、河涼二州刺史、正封宕昌王。西戎傳無彌邕名。

梁本紀中

武帝中大遙元年五月元顥入京師。僭號建武。閏月魏將余朱榮攻殺元顥。京師反正。此梁史。非魏史。當以梁都爲京師。不嘗以魏都爲京師。依史法。當云元顥入洛陽。改元建武。顥旣爲梁所立。卽不可斥爲僭也。京師反正之語。尤爲無謂。延壽意雖內北而外南。然於此等書法。則所謂自亂其例。不如姚思廉書法之當矣。

西應見卯。金來剋木。卯爲陰賊。鬼而帶賊。非魔何也。按坤卦上六。癸酉立世。六三。乙卯爲應。坤爲土。乙卯木。坤之鬼也。卯又爲陰賊。見漢書翼奉傳故云鬼而帶賊。

梁本紀下

元帝承聖三年十二月魏人戕帝。南北史諸帝崩。例書年若干。惟宋順帝、齊海陵王、梁元帝、陳文帝、西魏廢帝、恭帝、齊後主闕之。此紀前書天監七年八月丁巳生。其年歲在戊子。則承聖三年戌甲午。四十有七。無可疑也。齊海陵王、陳文帝、西魏廢帝、恭帝。史不言其生年。則年壽遂無可考矣。南北諸帝紀。中生年月日俱有者。宋武帝、孝武帝、明帝、前後廢帝、順帝、齊武帝、梁簡文帝、元帝、陳廢帝、宣帝、長城公。

魏道武帝、孝文帝、孝明帝、齊後主、隋文帝，有年月而無日者。魏文成帝、獻文帝、宣武帝、齊幼主、周靜帝，有年而無月日者。宋營陽王、文帝、齊高帝、梁武帝、陳武帝、魏明元帝、太武帝、周閔帝、明帝、武帝、宣帝，其餘皆不言生年。

敬帝，太平元年七月，以開府儀同三司侯瑱爲司空。梁書同。按瑱傳不載此事。陳本紀，永定二年正月，以車騎將軍、開府儀同三司侯瑱爲司空，則梁時不應先有司空之拜。

十月，魏相安定公薨。按高歡薨書名，而宇文泰不書名，延壽意蓋以周爲正也。自東西魏分峙以後，東魏元象、興和、武定紀元，皆不書於南史。齊旣受禪，南史亦不載齊之紀年，而於周改元，則必書之。周諸帝稱崩，而齊諸帝稱殂，延壽之尊周而抑齊如此。

后妃傳上

鬱林王何妃。按宋三廢帝、陳廢帝、後主之后，皆稱皇后。東昏褚后亦稱皇后，獨鬱林、海陵二后稱妃而不稱后。雖沿齊書之文，終失史法。或謂王之下不可更安皇后字，則東昏亦是侯國，何以得書皇后乎。但云鬱林何皇后、海陵王皇后，於辭亦無所嫌。

后妃傳下

武丁貴嬪。傳當書生昭明太子統及簡文皇帝云云，傳寫失之。

武宣章皇后。武帝先娶同郡錢仲方女。早卒。按仲方女。武帝永定元年。追諡昭皇后。依宋武敬臧皇后之例。亦宜立傳。不當附見也。

宋宗室諸王傳上

長沙王道憐。故青州刺史。龍陽縣公王鎮惡。本紀及鎮惡傳皆作龍陽縣侯。又按元嘉九年。以長沙王道憐等配饗廟庭詔書。已載于本紀。而此傳又具列其名。殊重複無當。此詔配饗六人。長沙臨川二王。劉穆之。王鎮惡俱已歿。王宏。檀道濟尙無恙。其後道濟以罪誅。竟不得與配食之典。齊武帝永明十年。詔以褚淵。王儉。柳世隆。王敬則。陳顯達。李安民配享太祖廟庭。敬則。顯達後皆以謀反誅。與道濟事正同。

臨川王義慶。鮑照字明遠。東海人。上文已云東海何長瑜。鮑照則照為東海人可知。不必更云東海

人也。照當人文學傳。附見此篇。亦失其倫。此亦因沈約舊文。沈書不立文苑一篇。故因事附見。

文帝以為中書舍人。按鮑照為中書舍人。在孝武時。見恩傳。此云文帝者。誤也。照為義慶所賞。及為舍人。

義慶薨已久矣。延壽因義慶薨於文帝時。并疑鮑照得官亦在文帝之世耳。

營浦侯遵考。及北伐平定。以為并州刺史。領河東太守。鎮蒲坂。按宋志不載此州。以其暫置而旋失

也。據宋書本傳。是時所督者。司州之北河東北平陽。北雍州之新平安定諸郡。皆非實土。

江夏王義恭。廢帝率羽林兵於第害之，并四子。按義恭十六子，元凶殺其十二，廢帝又殺其四，其封號事狀，具載沈約史。延壽何故闕而不書，且孝武以第四子綏嗣義恭之世子劼，明帝又以第八子躋繼義恭為孫，皆傳所宜書者，而南史皆失之，與它傳例亦不一，恐轉寫有脫簡耳。

宋宗室諸王傳下

元凶劼。初潘母卒，命潘淑妃養以為子。前文云潘淑妃生始興王濬，則潘實潘妃所生，宋書二凶傳亦無養子之說。延壽据它書增入，以致自相矛盾。

臨慶王休倩。以第五皇子智井為東平王，繼休倩，未拜薨。按本紀智井薨後，明帝又以第八子智渙繼之，此傳失書。

孝武帝二十八男，安陸王子綏、南平王子產、廬陵王子輿竝出繼。按子產繼南平王鑠，子綏繼江夏王義恭，子輿繼廬陵王義真，俱為明帝所害。史於鑠傳附書子輿事，而義恭義真二傳不及子綏子輿，亦為疏漏。

明帝十二男，智井、變、躋、贊竝出繼。按宋書本紀泰始六年十月，以第八皇子智渙繼臨慶王休倩。七年十月，以第八皇子躋繼江夏文獻王義恭，蓋智渙即躋之小字，初繼臨慶，改嗣江夏也。

劉穆之傳

謂所親曰貧賤常思富貴富貴必踐機危今日思爲丹徒布衣不可得也。晉書諸葛長民傳長民卽長人南史避諱以此爲長民之語通鑑從晉書胡三省謂長民琅邪陽都人僑居京口故有丹徒布衣語然長民傳不言僑居所在予後讀南史諸葛璿傳云琅邪陽都人世居京口以是推之長民之僑居京口可無疑也。

劉瑀傳

至江陵與顏竣書曰朱脩之三世叛兵一日居荊州青油幕下作謝宣明面相向使齋帥以長刀引吾下席按瑀爲益州刺史在孝建三年其時朱脩之爲荊州刺史都督梁益諸州瑀以統府之禮參謁故有此言也修之祖序爲苻堅所執脩之又嘗仕魏故云三世叛兵宋世常以諸王鎮荊州庶姓惟謝晦與脩之二人朱門望遠出謝下瑀心尤不能平也。

劉秀之傳

時定制令隸人殺長吏科隸當依宋書作疑人殺長吏謂部民殺官長也南北史避民字如尙書左民曹多改爲左戶或爲左人諸葛長人徐野人李安人劉遣人之類皆改民爲人時議者謂民殺長吏會赦宜以徙論秀之以爲民敬官長比之父母若遇赦而徙便與悠悠殺人曾無一異宜長付尙方窮其天命也人民義異而文相混特爲別言之。

贈司空諡忠成公。秀之封康樂縣侯。而諡忠成公者。以贈三公故也。徐湛之本枝江縣侯。以贈司空。諡忠烈公。何尚之。本都鄉侯。以贈司空。諡簡穆公。袁湛。晉寧縣男。以贈開府儀同三司。諡敬公。王元謨。曲江縣侯。以開府儀同三司。諡莊公。袁淑。袁昂。殷景仁。王敬宏。皆無封爵。淑以贈太尉。昂以司空。景仁以贈司空。敬宏以贈開府儀同三司。故皆諡曰公。若位非台司。又無五等之封。而得諡者。例稱子。如張緒。諡簡子。裴子野。諡貞子之類是也。

徐孝嗣傳

八歲襲爵枝江縣公。按湛之封枝江縣侯。身後亦未見加封之文。其子何以得襲公爵。又考宋書州郡志。枝江止云侯相。不云公相。疑此誤也。

以廢立功。封枝江縣侯。上文不書齊受禪例。除封爵一節。則此文便難曉。

檀道濟傳

進位司空。鎮壽陽。壽陽當作尋陽。宋書云。還鎮尋陽。

王瞻傳

武帝笑稱。疑小名多王。疑小名阿玉。見梁本紀。此文誤。

謝晦傳

時謝琨風華爲江左第一。琨當作混。混字叔源。當从水旁。彭城大會之時。混已先歿。南史敘事。往往失次。

永初二年。坐行璽封鎮西司馬南郡太守王華而誤封北海太守球板。免晦侍中。是時文帝以鎮西將軍領荊州刺史。華爲其府司馬。兼領南郡太守。華傳但云代張邵爲司馬。不稱鎮西。又不云南郡太守。史之略也。球傳亦不載除北海太守。

謝宏徵傳

混仍世宰相。一門兩封。按南史諸帝紀。諸王三公而下。惟尙書令。左右僕射拜罷卒皆書。蓋令僕位居端揆。當時固以宰相目之。混祖安石位正台司。爲晉名相。而混父瑛亦嘗任尙書左僕射。贈司空。混又爲中領軍。尙書左僕射。故云仍世宰相。南史所載王儉爲左僕射。領選時已稱宰相。徐孝嗣何敬容皆以尙書令僕稱宰相。王亮爲尙書左僕射。梁武有焉。用彼相之譏。則僕射可稱宰相矣。王僧達孝武時爲右僕射。自負才地。三年間便望宰相。此宰相謂三公也。亦有官至令僕。而不預機密者。若謝舉屢居端揆。未嘗肯預時政。王敬宏關署文案。初不省讀。則人亦不以宰相目之矣。混父瑛封望蔡縣公。兄峻又封建昌縣公。故云一門兩封。

與琅邪王慧王球竝以簡淡稱。王慧卽王惠也。古文惠與慧通。南史齊文惠太子或作文慧。謝靈運傳王

崔慧景或作惠景。王瑩傳。任昉傳想慧莊之清塵。謂惠施莊周也。今內府本作王惠。

謝瀟傳

苟得其人。自可流涵千日。劉俊父名勔。流涵音與劉勔同。因俊斥其父名。故亦以是報之。汲古閣本作

沈涵。非也。張景陽七命傾壺一朝可以流涵千日。

謝舉傳

任昉出為新安郡。別舉詩云。詎念耄嗟人。方深老夫託。按劉孝綽傳。孝綽為歸沐詩贈任昉。昉報曰。彼

美洛陽子。投我懷秋作。詎慰耄嗟人。徒深老夫託。直史兼褒貶。轄司專疾惡。九折多美疾。匪報庶良藥。

則此二語乃昉答劉孝綽詩。非別舉詩也。此傳誤。



廿二史考異卷三十六

南史二

王弘傳

子錫嗣。卒。僧亮嗣。僧亮弟僧衍。僧衍弟僧達。據此文。似僧達爲錫之子。今以前後勘校。則僧達實弘之少子。與錫昆弟行。其證有五。僧達傳。文帝欲以爲秦郡吏部郎。庾仲文曰。弘子不宜作秦郡。一證也。僧達答詔曰。亡父亡祖。司徒司空。謂祖珣爲司徒。父弘爲司空。二證也。僧達欲誘族子確殺而埋之。從弟僧虔知其謀。禁呵乃止。僧虔。曇首子。而僧達。弘子。故稱從弟。三證也。僧達傳云。兄錫質訥。乏風采。又云。與兄錫不協。四證也。蔡興宗傳云。王錫妻范。以書讓錫弟僧達。五證也。南史本文當云。錫弟僧達。校書者誤。切以僧排行。妄改錫爲僧衍耳。或又疑僧亮僧衍亦弘之子。今檢宋書。稱僧達爲弘少子。而僧亮爲錫子。嗣父爵。齊受禪。降爵爲侯。休文生于宋代。其述王氏家世。必不舛誤。而僧衍之孫沖。南史稱爲弘玄孫。則僧衍與僧亮均爲弘孫。與僧達非昆弟行矣。晉人如羲之。獻之。父子不嫌同名。卽如王徽亦弘之從子。徽弟名僧謙。而徽兄子卽名僧祐。豈可妄意有僧字者。卽皆昆弟乎。

王籍傳

梁天監中爲輕車湘東王諮議參軍。隨府會稽郡。按梁元帝紀失載都督會稽事。梁書元帝紀初爲寧遠將軍會稽太守。不云爲輕車將軍。亦史之闕也。考隋書百官志。梁置一百二十五號將軍。輕車在十四班。寧遠在十三班。蓋由寧遠進號輕車矣。

王儉傳

昇明二年爲長史兼侍中。按晉宋以來三公儀同三司及都督軍事者俱有長史。長史之名雖同。而品秩輕重各別。諸列傳除長史者必繫本府名。在內如太尉左右長史。司徒左右長史。在外如鎮西長史。輔國長史之類。未有單稱長史者。儉自司徒右長史出爲太守。還爲黃門郎。轉吏部郎。已非長史之職。昇明初遷長兼侍中。長兼者未正授之稱。晉書劉隗傳。太興初長兼侍中。孔愉傳。長兼中書令。是長兼之名自晉已有之矣。南史添一史字。試問儉所授者何府之長史乎。此傳前後多有長史字。當由後人轉寫相涉而誤。非延壽本文也。南齊書本無此字。或轉據南史增益之。不獨昧於官制。亦大非闕疑之旨。

趙充國猶能自舉西零之任。西零卽先零。西先聲相近。

遺詔以儉爲侍中尚書令鎮軍。鎮軍下當有將軍二字。下文云進號衛將軍。謂由鎮軍將軍進號將軍也。

王僧虔傳

父曇首與兄弟集會子孫。任其戲適。僧虔累十二博。碁既不墜落。亦不重作。僧綽採蠟燭珠爲鳳凰。僧達奪取打壞。亦復不惜。伯父弘曰。僧虔必至公。僧綽當以名義見美。或云。僧虔採燭珠爲鳳皇。弘稱其長者云。按。延壽史多采雜書。或兩說異同。亦兼存之。此後一說出蕭子顯書也。本傳。高帝與僧虔賭書。畢。謂曰。誰爲第一。對曰。臣書第一。陛下亦第一。帝笑曰。卿可謂善自爲謀。或云。帝問我書何如。卿答曰。臣正書第一。艸書第二。陛下艸書第二。而正書第三。臣無第三。陛下無第一。前一說出蕭子顯書。劉璉傳。與友人會稽孔邊同舟。遇一女子。邊目送曰。美而豔。璉曰。斯豈君子所宜言乎。非吾友也。于是解裳自隔。或曰。與友孔徹同舟入東。徹留觀岸上女子。璉舉席自隔。不復同坐。後一說出蕭子顯書。王茂傳。人或譖茂反。遣視其甲稍。則塵網焉。乃誅譖者。或云。茂與帝不睦。帝諸腹心多勸除之。而茂少有驍命。帝又惜其用。乃命腹心鄭紹叔候之云云。此兩說姚思廉史皆無之。張纘傳。嘗預東宮盛集。太子戲命曰。丈人謚聿皆何在。纘從容曰。纘有謚聿。亦殿下之衡定。或云。纘從兄聿及彌愚短。湘東王在坐。問纘曰。丈人二從聿彌。孰業何如。纘曰。下官從弟雖竝無多。猶賢殿下之有衡定。此兩說思廉書亦無之。

王志傳

志家居建康禁中里馬糞巷。馬糞。梁書作馬蕃。

王藻傳

謝莊殆自害於矇叟。殷冲幾不免於強鉏。按謝莊傳無尙主事。疑謝殷二人一以目疾辭。一以足疾辭。遂停尙主也。

姆嫁爭媚。按南史多俗語。如呼父爲爹。梁始興王憺傳音徒我反。又爲阿爺。侯景呼乳母爲姥。王藻布施爲餽。張融

舉移爲擱。齊東晉侯紀。之類。字之俗者如鑷爲鑷。齊薛林王紀范蔚宗羅逸傳。盤爲杵。劉稹吝爲慙。何敬容樵爲藥。朱百

熏爲燠。侯景傳是也。

王亮傳

下官以犯諱被代。未知明府諱。若爲攸字。當作無散尊傍犬。爲犬傍無散尊。若是有心攸。無心攸。乞告示。予謂無散尊者。曾也。曾傍犬爲猷。犬傍曾爲猶。有心無悠。無心爲攸。攸悠猷猶四字同紐同音。亮父名攸。續之伴爲不知。問是何字。頻觸其諱。且以犬傍戲之也。世俗讀攸悠二字如憂音。而史文遂難通矣。

王華傳

及王宏輔政。而宏弟曇首爲文帝所任。與華相埒。華常謂己力用不盡。每歎曰。宰相頓有數人。天下何由得安。考是時王宏以侍中司徒錄尙書事。固是三公之職。曇首以侍中領驍騎將軍。華以侍中領護

軍將軍而華稱宰相頓有數人。劉洪傳。洪爲侍中時。王華。王曇首。殷景仁亦爲侍中。文帝曰。此四賢一時之秀。同管喉舌。恐後世難繼。沈演之傳。演之爲右衛將軍。范蔚宗爲左衛將軍。對掌禁旅。同參機密。尋加侍中。文帝謂之曰。侍中領衛。望實華顯。此蓋宰相便坐。卿其勉之。似當時以侍中爲宰相矣。然同時如范泰。王球輩亦爲侍中。而時人未以宰相目之。則知侍中之職。雖爲清切。亦視人主倚任何如耳。孝武選王彧。謝莊。阮韜。何偃四人爲侍中。初未預參機密。官職之隨人重輕。自昔然矣。子定侯嗣。卒。子長嗣。按。王僧綽傳云。王華子新建侯嗣才劣。位遇亦輕。則嗣乃華子之名。此云定侯嗣。似定侯爲其名矣。

王琨傳

出爲會稽太守。加都督。坐誤竟囚。降爲冠軍。按。南齊書本傳。出爲督會稽。東陽。新安。臨海。永嘉五郡軍事。左軍將軍。會稽太守。坐誤竟囚。降號冠軍。蓋自晉以後。都督必帶將軍號。而軍號又有高下之分。琨本以左軍將軍督會稽五郡。坐事降號冠軍將軍。而督軍如故。齊史所書本甚分明。今刪去左軍將軍一語。而降爲冠軍之文。不可通矣。予嘗謂延壽似未通南北朝官制。故諸傳刪省。多未得其要領。此類是也。

王儉爲宰相屬。琨用東海郡迎吏。按。當時州郡除代。皆有迎吏。謝述傳。宋武帝臨豫州。諷中正以爲迎

主簿。王規傳爲本州迎主簿。到洽傳年十八爲徐州迎西曹。江綽傳南康王爲徐州召爲迎主簿。劉孺傳本州召迎主簿。王謚傳沈曇慶爲徐州辟謚爲迎主簿。又爲州迎從事。徐勉傳舊揚徐首迎主簿。盡選國華中正。以勉子崧充南徐選首。蔡徵傳陳武帝爲南徐州召補迎主簿。隋書百官志陳依梁制年未滿三十者不得入仕。唯諸州光迎主簿西曹左曹得仕。其諸郡唯正王任丹陽尹經迎得出身庶姓尹則不得可證迎吏亦入官之一途也。謝方明自晉陵太守遷南郡相而景陵送故主簿宏季咸徐壽之竝隨在西。宋孝武去鎮顏師伯以主簿送故隨。王子隆自荊州代還以庾於陵爲送故主簿。則當時又有送吏矣。

王景文傳

以景文及會稽孔顛俱南北之望。按琅邪王氏雖僑居江南猶自稱北人而以三吳人士爲南士。張緒善談玄。王儉云緒過江所未有。北士可求之耳。齊高帝欲用緒爲右僕射。王儉曰南士由來少居此職。裴松之傳琅邪王茂之會稽謝輅皆南北之望。竝以南北對舉。其時南人仕宦多不達。不如北士之通顯也。

王績傳

景文封曲阜侯績襲其本爵爲始平縣五等男。按景文傳云封江安縣侯非曲阜也。本爵之語亦未詳。

景文初襲伯父封建陵子，非始平男。

王通傳

仕梁，爲黃門侍郎。按通弟質以帝甥甲□亭侯，固以帝甥封莫□亭侯，俱載本傳，惟通封武陽亭侯不書，此例之不一也。

王秀之傳

秀之祖父敬弘致仕，隱吳興。敬弘居餘杭之舍亭山，餘杭，吳興屬縣也。

王鎮之傳

爲征西道規司馬，南平太守。道規上當有劉字，道規以征西將軍都督荊州，鎮之爲其府司馬，而帶南平太守也。南平郡屬荊州。

王晏傳

初爲建安國左常侍，稍至車騎。按稍至車騎四字，文義難曉。考齊書本傳云：宋大明末，起家臨賀王國常侍員外郎，巴陵王征北板參軍，安成王撫軍板刑獄，隨府轉車騎，蓋晏初仕臨賀國常侍，再任巴陵王府參軍，又任安成王府刑獄參軍也。安成王順帝初除撫軍將軍，揚州刺史，晏在府板授撫軍刑獄參軍。元徽二年，王進號車騎將軍，卽授車騎刑獄參軍，所謂隨府轉也。今刪去安成王撫軍板刑獄一

語。又改隨府遷為稍至。而文理難通矣。齊史云臨賀國。此云建安國。亦當以臨賀為是。宋孝武大明七年立第十八皇

子子產為臨賀王。

王思遠傳

臨海太守沈昭略。按昭略傳不云為臨海太守。

王准之傳

范泰嘲之。卿唯解彈事耳。准之正色答。猶差卿世載雄狐。按范蔚宗傳云。素有閭庭論議。朝野所知。故門胄雖華。而國家不與姻。准之雄狐之譏。蓋謂此也。又王僧虔傳。甲族由來多不居憲臺。王氏分支居烏衣者。位宦微減。僧虔為御史中丞。乃曰。此是烏衣諸郎坐處。我亦可試為耳。蓋當時甲族簿中丞而不為。故范泰以唯解彈事嘲之。

王懿傳

見仲德。驚曰。漢已食未。輟耕錄云。今人謂賤丈夫曰漢子。引北史。魏該遷青州刺史。固辭。文宣帝大怒。曰。何物漢子。與官不就。據此傳。則晉時已有漢之稱。亦非賤詞也。

到搗傳

隨王子隆帶彭城郡。搗問訊。不修部下敬。為有司舉免官。按三國志。秦宓與太守夏侯纂書稱。民請為

明府陳其本紀晉人法帖多有自稱民者到攜彭城武原人於彭城守當修民敬南史避唐諱故改稱部下劉凝之傳臨川王義慶衡陽王義季鎮江陵竝遣使存問凝之答書曰頓首稱僕不爲百姓禮人或譏焉亦是避諱改民爲百姓也。

到沆傳

武帝宴華光殿命羣臣賦詩獨詔沆爲二百字按是時被詔賦二十韻詩者尙有任昉蕭琛到洽三人

見洽傳不得云獨也。

垣崇祖傳

元凶弒逆嗣輔國將軍張柬嗣字誤當是隸字。

袁粲傳

粲剋日謀矯太后令韞伯興率宿衛兵攻齊高帝于朝堂回率軍來應彥節彥節劉秉字也南史避唐諱稱字候伯等竝

赴石頭事泄按宋書粲傳于竝赴石頭之下云本期夜發其日秉恆擾不知所爲晡後便束裝未暗

載婦女席卷就粲由此事泄南史刪去二十九字詞意未足而下文王蘊聞彥節已奔句亦無根矣。

袁昂傳

昂字千里雍州刺史顓之子也。雍州刺史四字可省。

袁泌傳

臨終戒其子芳華。袁廷禱曰：陳書作蔓華。

孔靖傳

累遷吳興太守，加冠軍。冠軍下當有將軍二字。

褚彥回傳

嫡母吳縣主求之。吳縣當作吳郡。

領尚書、右衛將軍。按：彥回在明帝時，嘗爲吏部尚書及右僕射。此云領尚書，則當時無此官也。

後爲吳郡太守。吳郡當作吳興。南齊書本傳及王儉碑文俱無守吳郡事。蓋傳寫之譌。下文亦有出爲

吳興之語。

彥回初爲丹陽，與從弟炤同載。按：南齊書本傳，明帝卽位，轉侍中，遷散騎常侍，丹陽尹，延壽刪去遷丹

陽尹一節，則此語無根。

又詔彥回妻宋故巴西主。按：王儉撰淵碑文，云：選尚餘姚公主。此傳前云：尚南郡獻公主。後云：巴西主。

蓋初封餘姚公主，進封南郡，齊受禪後，又例降封巴西，封號雖異，其實一人也。

褚蒹傳

八年改封巴東郡侯。按彥回本封南康郡公，秦初襲父爵，至是以南康爲王國，而改秦爲巴東公，見齊武帝諸子傳。此云郡侯，恐誤。

蔡興宗傳

廬江內史周朗以正言得罪。周朗傳作廬陵內史。

三吳舊有鄉射禮。元嘉中，羊元保爲吳郡，行之，久不復脩。興宗行之。是時興宗爲會稽太守，三吳謂吳郡、吳興、會稽也。本水經注王鎮之傳：時三吳饑荒，遣鎮之銜命賑卹，而會稽太守王愉不奉符旨。會稽在三吳之中明矣。

元嘉初，中書舍人秋當詣太子詹事王曇首，不敢坐。按列傳卷廿二以爲張敷事，彼傳秋作狄，字之譌也。廣韻秋字注：又姓。宋中書舍人秋當，宋書興宗傳亦譌作狄。

其後，中書舍人宏興宗爲文帝所愛遇，上謂曰：卿欲作士人，得就王球坐，乃當判耳。按球傳云中書舍人徐爰不言興宗，亦無就坐舉扇事。

太原孫敬玉，位至尚書右丞，子廉，仕梁，以清能，位至御史中丞。按循吏傳有孫廉，亦爲御史中丞，其父名奉伯，東莞人，此別一孫廉。

外甥袁顓，始生子象，而妻劉氏亦亡，興宗姊卽顓母也。按袁象爲顓弟，顓之子，此兩顓字當作覲，因前

文有外甥袁顥相涉而譌耳。顥與顥爲親兄弟，則顥母卽顥母。顥顥皆爲興宗甥，無可疑者。此後人傳寫之譌，非史家之失也。宋書興宗傳誤與此同。

何尙之傳

義宣司馬竺超。按南郡王義宣、張暢、暢子融傳俱作竺超人。考宋書本名超民，南史避唐諱，或改民爲人，或去下一字。

何點傳

吳國張融少時免官。按上文已有吳國張融，此又舉其望，重複非法。何子季傳、汝南周顥前後兩見，伏唯傳前稱樂安任昉，後稱樂安任遙，遙子昉一篇之中，再舉郡望，何不檢照乃爾。

何昌寓傳

父修之位侍中。此別是一人，非儒林傳之修之也。

張岱傳

母年八十，籍注未滿，岱便去官，從實還養。按何子平傳，母本側庶，籍注失實，實未及養，而籍年已滿，便去職歸家，顧說之謂曰：尊上年實未滿八十，親故所知，州中差有微祿，當啓相留。據此二文，則古者父母年八十，有歸養之令也。

張緒傳

常云何平叔不解易中七事。此文似未完。南齊書云何平叔所不解易中七事。諸卦中所有時義。是其一也。緒舉斯語。必有所為。二史文皆簡略。無以知之。三國志注引管輅別傳云何尚書自言不解易九事。南史伏曼容傳亦云何晏疑易中九事。此云七事。未許孰是。子完。南齊史作克。

張瓌傳

宋征北將軍。南兗州刺史。永之子也。宋征北以下十字可省。

安陸王綏臨雍州。綏與緬同。

張稷傳

山賊唐寓之作亂。梁書作唐瑤。誤。梁宗室傳作唐瑤。之類。誤為瑤也。

封江安縣子。梁書作江安縣侯。

張邵傳

初為晉琅邪內史。王誕龍驤府功曹。按王誕傳不云為龍驤將軍。史之漏也。

張暢傳

隊主張世營救得免。卽張興世也。本單名世。

張沖傳

以沖爲舒州刺史。按齊無舒州。舒當作郢。

張融傳

四月八日建齋并灌佛。僚佐觀者多至一萬。觀與覘同。廣韻。覘。施也。

荀伯子傳

故太尉廣陵公陳淮。淮當作準。

裴子野傳

沈約所撰宋書稱松之已後無聞焉。今宋書無此文。蓋與子野釋恨之後。改去之耳。

沈懷文傳

爲治書侍御史。南史避唐高宗名。故治書侍御史。此文後人所添。梁本紀。道賜位南臺

治書侍御史。亦後人所添。

周捨傳

於是勉捨同參國政。兩人俱稱賢相。按徐勉官至尙書僕射。中書令。固可稱宰相。周捨官止太子右衛

率右衛將軍及太子詹事而亦得賢相之稱。蓋當時宰相無常職。惟預機密者便得稱之。其真拜三公及儀同三司者。班秩雖高。未必預聞國政也。

周弘正傳

弘正諂附王偉。又與周石珍合族。避景諱。改姓姬氏。按弘正爲侯景太常。改氏爲姬。固於行檢有玷。然當時受僞命者。豈獨弘正一人。至於諂附王偉。與周石珍合族。則或者傳聞已甚之辭。南史所采異聞。如梁臨川王宏與武帝女永興主私通。遂謀弑逆。陳後主通蕭摩訶之妻。蕭韶爲幼童。庾信愛之。有斷袖之歡。北史辛德源與裴讓之相愛。兼有龍陽之重。祖珽飲酒。藏銅壘二面。皆舊史所無。未可盡信。北齊書祖珽傳已亡。後人以北史補入。

庾仲文傳

始興王濬當鎮湘州。以仲文爲司馬。濬不之任。仍除南梁太守。司馬如故。按仲文爲濬後軍司馬。濬不之湘州。改除南豫州。故仍以司馬領南梁太守。南梁豫州屬郡也。史但云濬不之任。不云移鎮南豫。則無緣遙帶南梁郡守矣。此亦延壽不諳官制之一證。

顧說之傳

嘗於文帝坐論江東人物。言及顧榮。袁淑謂說之曰。卿南人性懦。豈辦作賊。說之正色曰。卿乃復以忠義

忠人淑有愧色。按袁氏世無失德。淑後來又以忠義著。何愧之有。此事出宋書本傳。休文南人。左祖鄉先達。故載斯語。然史家不分皁白。大率如此。

羊戎傳

官家恨狹。更廣八分。按八屬重唇。分屬輕唇。而配爲雙聲。下文銅池搖颺句。銅屬舌頭。池屬舌上。而亦配爲雙聲。今人所謂類隔也。凡雙聲必依其類。今所傳字母者。聲之類也。字母三十六字。唐以後始有之。然六朝人精於雙聲。當時必有譜。僧守溫輩竊而名其學。鄭漁仲不考其本末。妄謂字母出於梵音。不知梵音四十二母。與中華之三十六母。迥乎不同也。今以此傳及魏收傳所載雙聲。合之後來字母。官家見母也。恨狹。匣母也。八分。邦母也。清泚。清母也。銅池。定母也。搖颺。喻母也。當得。端母也。劇。羣母也。懋。魏。疑母也。衰收。審母也。是誰。禪母也。鼻平。竝母也。飯房。奉母也。答籠。來母也。箸札。照母也。嘲玊。知母也。蓋孫炎製反切。沈約辨紐字以來。士大夫多能言之。更溯而上之。則參差。叮。啗。拮。拮。閑。關。詩三百篇隨舉。卽是。股肱。既。隍。見於尙書。饕餮。窮。奇。載於左氏。天下之口相似。古今人不相遠也。何待西域沙門。始泄其祕哉。

沈慶之傳

視諸沈爲劫首者數十人。士悉患之。慶之詭爲置酒大會。一時殺之。於是合境肅清。按慶之雖預顧命。

未領揚州刺史。又不還鎮鄉郡。所謂合境者。果何指乎。此事宋書所無。難以深信。

沈昭略傳

王晏嘗戲昭略曰。賢叔可謂吳興僕射。賢叔謂文季也。上文未見文季事。則此語無根。且吳興僕射之嘲。亦見文季傳。而答語各異。若以此段并入文季傳。則詞不費而意亦顯矣。

宗支傳

祖少文。名列隱逸傳。宗之妻。大父少文。名列隱逸。不與懋支合傳。沈初明之大父。稱名列循吏。不與初明合傳。皆與全書體例不相應。

劉悛傳

夏侯恭叔上書。以柳元景中興功臣。劉勔殞身王事。官存封爵。詔以與運隆替。不容復厝意也。此事又見垣崇祖傳。

劉繪傳

爲晉安王征北長史。南海太守。行南徐州事。南海當作南東海。脫東字。

劉孝綽傳

武帝謂舍人周捨。按。周捨傳不言除舍人。據梁書。蓋爲中書通事舍人。

劉孝儀傳

出為豫州內史。豫州疑豫章之誤。

齊宗室傳

臨汝侯坦之。少帝微聞外有異謀。此少帝謂鬱林王也。王元謨傳稱宋前廢帝為少帝。桓康傳稱後

廢帝為少帝。江淹傳前稱宋蒼梧王為少帝。後稱齊鬱林王為少帝。宗奭傳亦稱鬱林王為少帝。與紀

傳稱謂互異。

左將軍沈約。五更初聞難。馳車走趨西掖門。按沈約傳。齊時為左衛將軍。不為左將軍。

齊高帝諸子傳

始興王鑑。初封廣興郡王。後改封始興。廣興即始興郡。宋明帝改始為廣。齊初仍復故名。非改封也。

齊武帝諸子傳

廬陵王子卿。徙都督荊州刺史。始興王為益州。子卿解督。按齊書本云都督荊湘益寧梁南北秦七

州。則益州在所督之內。其云解督者。特解益州。非去都督之號也。南史既刪所督諸州之名。則解督一

節。亦可從省。

明帝諸子傳

邵陵王寶修。中興二年。謀反。宣德皇后令賜死。按梁武誅齊宗室。誣以反謀。齊書修于梁代。目爲謀反。不得不爾。延壽不當仍以反目之。

論。望其擇位扶危。擇當作釋。

陳顯達傳

後以太尉判鄱陽郡公爲三公事。而職典連率。人以爲格外三公。按宋齊之世。三公出典方州者多矣。非始于顯達也。五等封爵無判事之職。云判鄱陽郡公亦非也。齊史本無此文。延壽采自它書。殊未可信。

焦度傳

父明。與千餘家隨居襄陽。乃立天水郡略陽縣以處之。此卽宋志雍州之南天水也。彼志失書建立之年。隋志襄陽郡上洪縣。宋僑立略陽縣。梁又立德廣郡。然則梁之德廣郡卽宋之南天水矣。

周盤龍傳

永明五年。爲大司馬。此時豫章王嶷爲大司馬。盤龍何以得代之。蓋爲嶷府之僚佐。史脫其文耳。

胡諧之傳

卒諡肅侯。按齊書諧之爵關內侯。故諡稱肅侯。此刪去爵關內侯句。則侯字無根。

陸慧曉傳

婦父領選始作尚書郎。按婦父謂張岱也。子倕稱岱爲外祖可證。

遷西陽王征虜。巴陵王後軍。臨汝公輔國三府長史。行府州事。按西陽王子明。永明六年除冠軍將軍。南兖州刺史。八年進號征虜。臨汝公昭文。永明十年除輔國將軍。南豫州刺史。巴陵王子倫。以永明七年除南中郎將。南豫州刺史。此云後軍不同。蓋軍號遞遷。史家不能悉書也。

陸襄傳

殺廣晉令王筠。此別一王筠。

庾杲之傳

嘗兼侍中夾侍。柳世隆謂齊武帝曰。庾杲之爲蟬冕所映。彌有華采。陛下固當與其卽真。此兼字當讀去聲。蓋假職未真授之稱。與一人兼兩職之兼有別。舊唐書職官志。職事解散官欠一階不至。爲兼其兩職事者。亦爲兼。頗相錯亂。其欠一階之兼。古念反。其兩職事之兼。古恬反。字同音異耳。

劉懷珍傳

伯父奉伯。宋世位至陳南頓二郡太守。按下文懷慰傳又云。祖奉伯。宋元嘉中。爲冠軍長史。蓋以長史帶郡守也。然一篇之中。前後重出。當刪此而存彼。

庾肩吾傳

北地傅弘、東海鮑至等。按上文已有鮑至名。此又舉其郡望。於史例未當。

劉虬傳

表虬及同郡宗測、宗尚之、庾易、劉昭五人。按上文已云同郡宗測。此文重見。庾易、新野人。劉昭、平原人。又不當蒙上同郡之文。

廿二史考異卷三十七

南史三

梁宗室傳上

吳平侯景。祖道賜以禮讓稱。居鄉有爭訟。專賴平之。又周其疾急。鄉里號曰墟王。皆竊言其後必大仕。宋終於書侍御史。齊末追贈左光祿大夫。道賜卽梁武之祖。其事迹當見於梁本紀。乃別出於吳平侯傳。非史例也。

長沙王懿。至五月。有司方奏追皇考皇妣尊號。本紀有司奏追尊考妣在閏四月。

臨川王宏。正立弟正表。封封山侯。後奔樂山。表弟正信。按北史。正表在梁。封山陰縣侯。而梁書。南史俱作封山侯。此北史誤也。樂山二字誤。當云後奔東魏。表上脫正字。

梁宗室傳下

安成王秀。殺豫州刺史司馬懷悅。懷字衍。

鄱陽王範。誰當作天子。艸覆車邊已。範字从竹。不从艸。隸書相溷耳。右旁从已。不从己。童謠多別字。大率如此。

武帝諸子傳

昭明太子。太子以爲疑。命僕射劉孝綽議其事。按。孝綽官太子僕。非僕射也。射字衍。下文屢稱劉僕。不稱僕射。可證。

豫章王綜。綜改名纘。北史。纘作贊。當從之。綜既自稱東昏子。必不肯與梁武諸兒同从糸旁。

南康王績。天監十年。爲南徐州刺史。按。刺史都督軍事者。必加將軍號。乃得開府置官屬。如長史。司馬。諮議。參軍之屬。皆以本府號爲稱。王僧孺傳。爲仁威南康王長史。以績鎮南徐州時。加仁威將軍也。僧孺又爲北中郎諮議參軍。其時亦在績府。以北中郎將領南兗州刺史也。傳於仁威將軍。北中郎將之號。皆削而不書。而僧孺傳之文。遂難通矣。南史於刺史軍號。什去其七八。或并不書都督。於例皆未畫一。不如姚思廉書之詳善。略舉一條。餘可類推。

邵陵王綸。復歸齊昌。行收兵至汝南。按。隋書地理志。安陸郡之吉陽縣。梁立汝南郡。卽此傳之汝南。非漢晉之汝南也。

及廬陵之沒。綸。觴望滋甚。於是伏戎于莽。用伺車駕。按。邵陵以險躁專殺。再致削爵。然思廉書初不言。其曾有逆謀。南史始於傳末及之。其實全不可信。綸卽有觴望。當在免官奪爵之日。若廬陵之薨。在太清元年。其時綸方鎮南徐。中大同元年。綸由丹陽尹除南徐州刺史。至太清二年。始移湘州。未行而侯景亂。作南史俱失書。竝無失意之事。廬陵又非

以罪死。何故使生觥望。若云廬陵既沒。以次當立。當先謀害東宮。豈宜輒行構逆。此情理所必不然者。思廉論於邵陵。雖譏其險躁。仍嘉其忠孝。豈有謀逆之人。而晚節乃存忠孝者乎。延壽好采它書。而不察事理之有無。其失往往如此。

簡文諸子傳

尋陽王大心。幼而聰明。善屬文。按御覽引三國典略云。大心小名英童。與大器同年。十歲竝能屬文。

嘗雪朝入見。梁武帝詠雪。令二童各和。並援筆立成。此事姚李二史皆失載。

汝南王大封。魏剋江陵。遇害。按梁書無大封傳。北史蕭大圖傳云。于謹軍至。元帝乃令大封充使。大圖副焉。其實質也。周保定二年。大封爲晉陵縣公。是江陵陷後。大封初未遇害。南史元帝紀云。汝南王大封。尚書左僕射王褒以下。竝爲俘。以歸長安。與北史小異。亦不云被害。蓋延壽雜采它書。傳聞異詞。彼此多不相照也。

曹景宗傳

臘月。於宅中使人作邪許逐除。邪許。梁書作野庖。野庖卽邪許之轉聲。

鄧元起傳

初元起在荊州刺史。隨王板元起爲從事。別駕庾纂堅執不可。按庾纂傳。梁州人益州刺史鄧元起。功

勳甚著。名地卑瑱。始興忠武王儋爲州將。元起位已高。而解巾不先州官。則不爲鄉里所悉。元起乞入籍出身州從事。輩不從。與此傳事略同。而一云隨王。一云始興王。當有一誤。考始興鎮荊州。卽梁武昌入建康之日。輩旣爲荊州別駕。無緣復在都城內。且輩以天監元年卒。其時方爲會稽行事。則任別駕必在齊代。此傳以爲隨王子隆板授從事者。蓋得之。但永明之世。元起未爲益州刺史。功勳初不甚著。又籍隸南郡當陽。非梁州人。輩傳所云。皆失其實。

庾子輿傳

巴東有淫預石。淫預卽灑預也。淫豔聲相近。後人又加水旁。

呂僧珍傳

東海范陽人也。梁書無陽字。按東海固不得有范陽縣。而考之宋志。范縣亦隸東平。非東海也。漢志范縣屬東

沈約傳

轉加建威將軍。河東太守。此河東郡屬荊州。與上文河東太守據蒲坂者各一地。宋書州郡志。南河東郡。晉征西將軍庾亮以司州僑戶立。去州水一百二十者。卽此河東也。隋志。松滋縣。江左舊置河東郡。永初三年卒。少子璞嗣。按宋書自序。林子封漢壽縣伯。子邵嗣。邵卒。子侃嗣。侃卒。子整應襲爵。齊受禪。

國除，是璞未嘗嗣林子之封也。南史誤。

其制自序大略如此。此篇首全用沈約自序，蓋仿漢書司馬遷、揚雄傳之例。愚意當以沈田子、林子標目，與王鎮惡諸人同卷，而以約衆附之，乃合本書之體例。

又爲征西記室，帶關西令。關西當作厥西。

南郡范雲，郡當作鄉。

進號征虜將軍，南河清太守。河清當作清河。

謝玄暉善爲詩，任彥昇工於筆，約兼而有之。謝任二人稱字不稱名，非史法。

范雲傳

南鄉舞陰人，晉平北將軍汪六世孫也。

按范泰傳云順陽人，泰爲汪之孫，雲爲六世孫，而籍貫互異者。

南鄉卽順陽，梁代避諱改名也，以南史之例言之，雲亦當類敘於泰傳之後。

孫伯翳，太原人。按上文已云太原孫伯翳，此又云太原人，未免重複之病。

韋叡傳

賊已至城下，方復求軍。梁書此下有臨難鑄兵，豈及馬腹二句，詞意乃足。

初帝勅景宗曰：韋叡卿鄉望，宜善敬之。按景宗，新野人，韋爲京兆望族，與新野遠不相及，而云鄉望者。

晉南渡後，僑立京兆郡於襄陽西界，因以襄陽爲雍州，割南陽、新野諸郡屬焉，故有鄉望之目。景宗傳亦云爲人自恃尙勝，雖公卿無所推，唯以韋叡年長，且州里勝流，特相敬重。

載弟鼎。

按韋鼎在隋書藝術傳，當依姚僧垣父子、徐文伯祖孫之例，以鼎別入北史。僧垣在北史，子察才在北史。若吳明徹、裴忌之徒，兵敗被執，周隋雖嘗廢以官爵，實與閒廢無異，其事迹具在南朝，又不

可闕而不書，延壽列諸南史，自爲允當，未可以一偏之見輕議也。

江淹傳

齊受禪，復爲驃騎豫章王記室參軍。梁書作驃騎建安王記室，帶東武令。考是時豫章王嶷爲驃騎大將軍，都督揚南徐二州諸軍事，淹爲其府記室，因帶東武令。東武屬南平昌郡，正在南徐州部內。梁書作建安王者，蓋轉寫之譌。延壽所見本尙未誤也。但南史於記室參軍下，別敘掌國史事五十餘言，乃云又領東武令，參掌詔策，則失其倫次矣。當時府僚無不帶守令者，南史諸傳中，芟去幾什之六七，此又不書於記室參軍之下，似東武令別一清要之職者，殊可深怪。予嘗譏李氏昧於官制，證之此傳益信。

王儉嘗謂曰：卿年三十五，已爲中書侍郎。按淹以天監四年乙酉卒，溯其生年，當在宋元嘉二十一年甲申，計齊受禪之歲，已三十有六矣。又閱二三年，乃遷中書侍郎，不得云年三十五也。此語不載於梁

史延壽別采它書益之未可盡信。

襄陽人開古冢得竹簡古書字不可識王僧虔善識字體亦不能讀直云似是科斗書淹以科斗字推之則周宣王之簡也按王僧虔傳雍州有盜發古冢獲竹簡書以示僧虔云是科斗書考工記周官所闕文也此卽一事而傳聞互異齊梁之世雍州治襄陽非兩地也

爲宣城太守時罷歸按淹爲宣城太守在齊明帝時南史於上文旣刪去出守一節則此語無根

王僧孺傳

魏衛將軍肅八世孫也曾祖雅晉光祿大夫儀同三司按晉書雅爲肅之曾孫而僧孺又雅之曾孫并肅數之似止七世予以三國志注引晉諸公贊推之則肅子虔虔子隆隆子景景子雅雅實肅之玄孫自肅至僧孺正是八世晉書偶誤爾

祖準之宋司徒左長史晉書作散騎侍郎琅邪王氏亦有準之或作准之避宋順帝諱姓名同而望各異也侍郎金元起欲注素問金當作全

徐勉傳

慧日十住等旣應營昏慧日十住當是兩子小字十住疑卽悱也悱嘗爲晉安內史故云近修東邊兒孫二宅乃藉十住南還之資

聞汝所買湖熟田地甚爲烏鹵。湖熟、梁書作姑熟。當以湖熟爲正。漢時丹陽郡有湖熟縣。今上元縣南五十里。地名湖熟。卽漢故城所在。

陳慶之傳

時魏濟陰王元徽業。徽當作暉。

蘭欽傳

中昌魏人也。按齊魏二志未見中昌魏之名。

徐陵傳

後主銜之。至是。諡曰章僞侯。按陳書諡曰章。無僞字。周書諡法篇亦無以僞爲諡者。恐未足信。

陳宗室諸王傳

方泰。上曰不承則叵測。叵當作上。

岳陽王叔愷。隋遣內陽公薛胄爲湘州刺史。內陽、陳書作中牟。考之武史薛胄傳。胄襲封文城縣公。

亦未嘗爲湘州刺史。當有一誤。

義陽王叔達。武德中位侍中。封江國公。歷禮部尚書。卒。按褚亮、歐陽詢、虞世南、姚思廉之徒。雖名見南史。而不言唐官。惟陳後主太子深云武德初爲祕書丞。卒。官及叔達此傳耳。

黃法𩑦傳

梁元帝承制授交州刺史資領新淦縣令。按梁末增置之州多而刺史資亦輕。又遙授非實土。故有以刺史資而領郡者。程靈洗以譙州刺史資領新安太守。徐世譜以衡州刺史資領河東太守是也。法𩑦以刺史資領縣令。又異數矣。

錢道戢傳

封永嘉縣侯。陳書作永安。

駱文牙傳

駱文牙。陳書無文字。

封臨安縣侯。陳書作常安。

宗元饒傳

時合州刺史陳喪。喪陳武帝從子。封鍾陵縣侯者。

謝岐傳

弟嶠。篤學爲通儒。按謝嶠仕陳。爲國子祭酒。撰爾雅音。見陸氏經典釋文。隋書經籍志又有謝嶠喪服義十卷。

循吏傳

杜驥。亡高祖因晉氏喪亂播遷涼土。按坦與驥爲昆弟。上文云曾祖耽避難河西。此云亡高祖播遷

涼土。前後互異。

虞愿。出爲晉安太守。晉安當作晉平。

儒林傳

伏挺。父友樂安任昉。按挺父暉傳已書樂安任昉。則此樂安字當省。韋放傳稱吳郡張率。其子粲傳

又稱吳郡張率。亦當省去其一。

沈文阿傳

春秋禮記孝經論語義記七十餘卷。陸元朗云。梁東宮學士沈文阿撰春秋義疏。闕下祓。陳東宮學士

王元規續成之。

文學傳

宋史不立文學傳。按宋書無儒林文苑之目。齊書有文學而無儒林。故延壽史儒林自梁始。文學則宋

世竟無一人。皆承襲舊史。無所增益。竊謂宋之文士無過謝顏。既各有專傳。若鮑照之詩賦。山謙之蘇

寶生。徐爰之史。皆一時作者。以冠文苑。良無愧詞。而延壽未見及此。錄錄因人。是可怪也。

高爽。孫抱東莞人。父廉。吳興太守。按孫廉名見循吏傳。彼傳載高爽作履謎事。若移入此傳。則事類相比。而文亦可省。且亦爲良吏隱惡也。

賈希鏡。祖弼之。晉員外郎。父匪之。驃騎參軍。按王僧儒傳言。晉太元中。員外散騎侍郎平陽賈弼。篤好箒狀。弼子太宰參軍匪之。匪之子長水校尉深。世傳其業。希鏡卽深字也。本名淵。史家避諱。或舉其字。或易爲深耳。彼傳單名弼。此云弼之。亦小異。

劉昭。祖伯龍。官至少府卿。按孝義傳。伯龍嘗爲盱眙太守。

昭集後漢同異。以注范蔚宗後漢。世稱博悉。按宣卿本注范史。范史無志。乃借司馬舊志注以補之。傳云集注後漢一百八十卷。合司馬志言之也。隋志。後漢書一百二十五卷。梁劄令劉昭注。卷數與此不同。自章懷改注。而劉注失傳。惟續志三十卷。則章懷以非范氏譌。故不注。而劉本遂流傳到今。

鍾嶸。時居士。何子季築室若邪山。山發洪水。漂拔樹石。此室獨存。元簡令嶸作瑞室頌以旌表之。此事已見子季傳。但據彼傳。則室當在秦望山。非若邪山也。

何思澄。每宿昔。作名一束。曉便命駕。名謂名刺。漢魏人所謂爵里刺也。

孝義傳上

郭原平。太守蔡興宗臨郡。以私米饋原平。及山陰朱百年妻。各百斛。原平誓死不受。百年妻亦固辭。

按百年妻辭饋米已見隱逸傳此重見。

江泌。梁武帝以爲南康王子琳侍讀。梁當作齊。

孝義傳下

褚脩。吳郡錢唐人也。褚氏望出河南。過江以後。多居錢唐。裕之彥回傳稱河南陽翟人者。舉其望。此與

伯玉竝稱吳郡錢唐人者。據其實也。宋文帝言天下有五絕。而皆出錢唐。褚欣遠模書。褚嗣園棋居其二焉。今杭州城內有褚家塘。相傳遂良宅也。

父仲都。善周易。隋書經籍志有褚仲都周易講疏十六卷。

隱逸傳上

陶潛字淵明。或云字深明。名元亮。上淵字亦當爲深。此後人追改。或云以下當云名深明。字元亮。傳寫
慎到耳。

江州刺史檀道濟往候之。按道濟爲刺史。在宋元嘉初。傳書此事於爲鎮軍建威參軍之前。先後失次。

考宋書無此事。延壽采之。它書不及檢照年月。

雷次宗。子肅之。頗傳其業。按隋志。梁有禮記義疏三卷。宋豫章郡丞雷肅之撰。

關康之。河東楊人也。世居京口。寓居南平昌。按宋書。孟懷玉。平昌安邱人。而世居京口。蓋南平昌卽

僑立京口，非有兩地。

顧歡，吳興鹽官人也。按鹽官縣屬吳郡，不屬吳興郡。陸氏釋文亦云吳郡人。

隱逸傳下

徐伯珍，世呼爲婦人巖。二年，伯珍移居之。二年字於上下文不相屬，疑有誤。

阮孝緒，所著七錄，削錄等一百八十一卷。按隋志正史削錄九十四卷，七錄十二卷。

陶弘景，以宋孝建三年景申歲夏至日生。按本傳陶以梁大同二年卒，年八十五。溯其生年，當是元

嘉二十九年壬辰，前後自相矛盾。且史例諸臣傳亦無書其生年者。

恩倖傳

孝武以來，士庶雜選。如東海鮑照，以才學知名，又用魯郡巢尚之、江夏王義恭以爲非選。按六朝人重

門第，故寒族而登要路者，率以恩倖目之。鮑明遠以才學爲中書舍人，已不免士庶雜進之嫌。徐爰有

史才，生平亦無大過。沈休文列諸恩倖，或以修史之嫌，有意貶抑。南史因而不改，殊未得好惡之平矣。

杜文謙忠於王室，致命遂志，乃附見茹法亮傳，尤非善善惡惡之義。

廿二史考異卷三十八

北史一

魏本紀一

神元帝。元年。歲在庚子。魏文帝黃初元年也。

帝乃告諸大臣。爲與晉和親計。四十二年。遣子文帝如晉。是歲。晉景元二年也。景元。魏常道鄉公年號。

其時。晉未受禪也。魏收書。晉字皆作魏。此誤。

平文帝。元年。歲在丁丑。晉元帝建武元年也。

昭成帝。建國元年。晉成帝咸康四年也。是年。歲在戊戌。

聘慕容晃女爲皇后。是時。什翼犍自稱代王。其妻不應有皇后之稱。魏史追書之耳。晉書。晃作銑。銑俗

字。

劉務桓死。其弟闕頭立。僞傳作闕陋頭。

十二月。至雲中。旬有二日。皇子寔君作亂。帝暴崩。按。晉書苻堅載記。涉翼犍即什翼犍戰敗。遁於弱水。退還

陰山。其子翼圭。縛父請降。堅以翼犍荒俗。未參仁義。令入太學習禮。以翼圭執父不孝。遷之於蜀。是翼

健嘗被執至長安。魏史諱而不言爾。延壽生於唐世。無所諱忌。乃不取本朝御撰之書。而仍伯起曲筆之史。是其短也。

道武帝。元年。葬昭成皇帝於金陵。自什翼健被執。道武逃竄賀蘭部。僅得存活。代之無主者九年。魏

收於昭成沒後。即稱道武帝元年。以至九年。誕妄之甚也。北史不當仍之。明人編通鑑綱目前編。以夏少康始生之歲。即為元歲。蓋

仿魏收之例。然自古未有無國而稱元年者。

登國元年。劉顯遣弟允泥。后妃傳作允漚。

三年。慕容垂遣使朝貢。按登國三年四年。再書垂遣使朝貢。亦沿魏收之文。是時拓跋雖自立國。猶臣

屬於燕。乃以燕使至為朝貢。何顏之厚乎。明元永興三年五年。神瑞元年。屢書姚興遣使朝貢。秦於魏

為敵國。亦不當云朝貢。此皆宜改而不改也。

皇始二年。賀弟賀麟。將妻子走西山。賀麟一名麟。晉書後燕載記所謂趙王麟也。劉庫仁傳。後奔慕容麟。麟徒之中山。管僞

傳亦稱趙王麟。

城內共立慕容普鄰為主。晉書載記所謂慕容詳也。

明元帝。母曰劉貴人。按后妃傳云。登國初。納為夫人。未見貴人之稱。

魏本紀二

文成帝。母曰閭氏。按后妃傳景穆皇后郁久閭氏河東王毗妹也。郁久閭本蠕蠕之族。太和中改稱閭氏。外戚傳亦但稱閭毗。唯后妃傳稱郁久閭。於史例殊不畫一。

興安元年十一月皇^王或作王^謨妣閭氏薨。按后妃傳少以才選入東宮。有寵。生文成皇帝而薨。文成即位。追尊號諡。是閭氏之薨。在文成即位以前。紀書於即位之後。自相矛盾。

魏本紀三

孝文帝。太和二十二年正月。拔新野。斬其太守劉忌。南齊書作劉思忌。

魏本紀四

孝明帝。皇曾孫故臨洮王寶暉世子釗體自高祖。寶暉當是京兆王愉之子。愉得罪死。後追封臨洮王。史不言何人嗣王。蓋卽寶暉也。寶暉之子。於孝文爲曾孫。故稱皇曾孫。

論。比之漢世安順宣武之後。繼以元成。按延壽史論多襲舊史之文。此篇前半用魏收世宗紀論。後半用肅宗紀論也。世宗論末云。比夫漢世元成安順之儔歟。肅宗論首云。宣武已後。政綱不張。延壽本用其語。後來轉寫。偵到。又爲妄人改竄。文義遂不可通。當依魏書正之。

魏本紀五

永安二年。遷文穆皇帝及文穆皇后神主于太廟。按自古帝王由藩國入繼。雖或追崇本生。未有升祔。

太廟者。元魏孝莊始尊其父爲文穆皇帝。遷主太廟。而以孝文爲伯考。此末季黷禮之事。不足爲訓。魏收錄以爲戒。而論復申言之。以爲高祖不祀武宣享廟。知其福祿之永不。可謂深切著明矣。其時臨淮王彧上表切諫。言漢祖翦業。香街有太上之廟。光武中興。南頓立舂陵之寢。元帝之於光武。疏爲絕服。猶尙身奉子道。入繼大宗。高祖之於聖躬。親實猶子。陛下旣纂洪緒。豈宜加伯考之名。帝竟不納。明嘉靖議禮。正用孝莊故事。永嘉諸臣。猖狂罔忌。識見更出元魏禮官下矣。

文帝。大統元年。立妃乙氏爲皇后。后妃傳作乙弗氏。乙弗本複姓。太和中。改稱乙氏。乙渾亦稱乙弗。傳見陸麗高九

孝靜帝。天平元年。以魏郡、林慮、廣平、陽邱、汲郡、黎陽、東漢陽、清河、廣宗等郡爲皇畿。陽邱當作頓邱。魏志無東漢陽。蓋謂東郡、漢陽郡也。東下脫郡字。

齊本紀上

神武帝。六世祖隱。晉元菟太守。隱生慶。慶生泰。泰生湖。按高湖事無足取。魏收以齊獻武之曾祖。特爲立傳。延壽刪之。是也。但慶泰兩世皆有名位。湖賜爵東阿侯。諡曰敬。皆應敘於紀中。而全不書。則又失之略矣。神武祖謚贈太尉公。諡武貞。父樹生。贈太師。渤海王。諡文穆。亦紀所不應略者。

抵揚州。邑人龐蒼鷹。此揚州縣名。在并州界中。高孝緒封揚州縣開國公。卽此。神武從祖兄子永樂。太昌初封陽州縣伯。進爵

公爲

遠近聞之。皆稱高儀同將兵整肅。按上文無除儀同三司一節。則此語爲無根。

遂西剋潼關。執毛洪賓。賀拔勝傳作毛鴻賓。鴻賓亦有傳。鴻洪古通用字也。魏孝武紀亦作洪賓。

齊本紀中

文宣帝。天保元年六月。封司空。潘相樂爲河東王。司空潘相樂爲司徒。六年六月。河東王潘相樂薨。

按本傳。樂字相貴。不名相樂。然魏孝靜帝紀。齊書文宣紀。俱作相樂。

孝昭帝。幼主即位。乃卽朝班。幼主卽廢帝也。一篇之中。兩稱幼主。一稱少主。一稱廢帝。

周本紀上

文帝。普回因狩。得玉璽三紐。文曰皇帝璽。普回以爲天授己。獨異之。按後周之先。出自匈奴宇文。而

紀所述世系。與匈奴宇文莫槐傳互異。紀稱普回子莫那。莫那九世至侯豆歸。爲慕容晁所滅。傳稱莫

槐弟普撥。普撥子邱不勤。邱不勤子莫庖。晉書作莫圭莫庖子遜昵延。晉書作遜昵延父子世雄漠北。又先

得玉璽三紐。自言爲天所相。每自誇大。遜昵延死。子乞得龜立。別部人逸豆歸殺乞得龜。而自立。爲慕

容晁所敗。遠遁漠北。自是散滅。兩篇所述。人名世系。無一同者。一據周書。一據魏書也。延壽生於唐初。

去周末遠。何以不考乃爾。

夏州刺史解拔彌俄突。

解當作斛。周書齊本紀天平三年神武襲西魏夏州禽其刺史賀拔俄彌突即

此人也。斛賀聲相轉。

都督彌姐元進。彌姐，羌複姓也。見廣韻。

遣儀同李諱。按舊唐書令狐德棻傳德棻嘗從容言於高祖曰陛下既受禪於隋復承周氏祿數國家

二祖功業竝在周時如文史不存何以貽鑒今古此修史之議所由昉也其後德棻專司周書雖不便

爲二祖立傳乃其功績敘述亦復寥寥北史所載大率因周書舊文如是年遣儀同李諱與李弼趙貴

等討曹泥於靈州諱引河水灌之大統四年開府李諱念賢等爲後軍及李諱等至長安李弼傳使持

節太尉柱國大將軍大都督尙書左僕射隴右行臺少師隴西郡開國公李諱王盟傳趙雀之亂盟

與開府李諱輔太子出鎮渭北皆謂李虎也周本紀天和六年以大將軍李諱爲柱國此謂李昞也凡

校書須仍元文周書於李諱字皆改爲虎并天和六年李諱亦作虎則謬妄之甚矣唐書稱周閔帝受

禪虎已卒乃追封唐國公安得至武帝朝且虎在西魏時爲八柱國之一豈待天和中始授柱國乎

恭帝元年魏史柳虬執簡書告於朝曰按宇文泰於孝武躬行弑逆較之高歡之逐君罪又甚焉柳虬

之簡盧辯之誥矯誣詐僞乃王莽大誥之流何足汚史策乎南北史刪改入書凡詔牋賦頌之類多所

芟落然尚有當刪而不刪者如顧歡袁粲佛老之辯徐勳戒子之書劉峻之廣絕交王劭之表符命衛

操之立碑。蘇綽之大誥。皆是也。

孝閔帝。元年正月。天王卽位。史失書卽位之日。據周書。乃辛丑日也。魏恭帝以十二月庚子遜位。次年正月辛丑。周主卽位。蓋月之一日。

明帝。武成元年正月。初改都督諸州軍事爲總管。王懋竑曰。前此都督結銜。皆云都督幾州軍事。某州刺史。北史變其例。云都督某州刺史。取省文耳。自改稱總管以後。史但書某州總管。不云刺史。似結銜亦異於前矣。然考周書。蔡國公廣傳。除秦州總管十三州諸軍事。秦州刺史。齊王憲傳。除益州總管。益寧巴盧等二十四州諸軍事。益州刺史。李弼傳。李暉總管梁洋等十州諸軍事。梁州刺史。李儼總管延綏丹三州諸軍事。延州刺史。尉遲綱傳。除涇州總管五州十一防諸軍事。涇州刺史。又爲陝州總管七州十三防諸軍事。陝州刺史。侯莫陳瓊傳。遷金州總管六州諸軍事。金州刺史。轉荊州總管十四州八防諸軍事。荊州刺史。據此。則止改都督爲總管。而其職任不異。本紀但云某州總管者。止以所治之州冠於總管之上。以取簡便。非當日結銜之本然也。隋有揚并益荆四大總管。又有諸總管。皆以某州總管爲名。似與周異。然考隋書。秦王俊傳云。揚州總管四十四州諸軍事。并州總管二十四州軍事。蜀王秀傳云。益州刺史。總管二十四州諸軍事。皇甫績傳云。信州總管十二州諸軍事。則仍與周同。但史家例書某州總管。惟列傳偶一見之耳。大昕按。北史於總管結銜。亦有全書者。長孫儉傳。授總管荆襄

等五十二州諸軍事、行荊州刺史、轉陝州總管七州諸軍事、陝州刺史、李弼傳、出爲總管延綏丹三州諸軍事、延州刺史、侯莫陳穎傳、拜桂州總管十七州諸軍事、王謙傳、授益州總管十八州諸軍事、權景宣傳、授荊州刺史、總管十七州諸軍事、尉遲迥傳、除秦州總管秦渭等十四州諸軍事、韋孝寬傳、除徐兗等十一州十五鎮諸軍事、徐州總管崔彥穆傳、拜安州刺史、總管十二州諸軍事、又除金州刺史、總管七州諸軍事、又爲襄州刺史、總管六州諸軍事、令狐熙傳、拜桂州總管十七州諸軍事、王慶傳、總管汾石二州五鎮諸軍事、汾州刺史是也、但其時設州既多、加以鎮防名色紛繁、不能如晉宋諸書之例、史家競趨簡易、約舉數州、後之考地理者、仍無從舉其名目耳、唐時諸州都督結銜、猶依舊式、如尉遲敬德碑云、授襄都鄆浙唐五州都督、襄州刺史、贈使持節、都督并蔚嵐代等四州諸軍事、并州刺史、王洪碑云、贈使持節、都督瀘榮溱珍四州諸軍事、瀘州刺史、楊志本碑云、除都督潭衡等七州諸軍事、潭州刺史、皆其明證、而史家省文、祇書某州都督而已、

隋本紀上

文帝、魏初爲武川鎮司馬、因家於神武樹頰焉、樹頰、縣名、屬神武郡、魏書地形志作殊頰、蓋避高歡父諱、

以東魏之逼、與信俱歸、紀不書莽梁事、史臣諱之、

以隋州之崇業、郟州之安陸城陽、温州之宜人、應州之平靖上明、順州之淮南、士州之永川、昌州之廣昌、安昌、申州之義陽淮安、息州之新蔡建安、豫州之汝南臨潁廣寧初安、蔡州之蔡陽、郟州之漢東、二十郡爲隋國。按：郟州之名不見於隋志。據隋志：安陸、城陽二郡皆屬安州，則郟州卽安州矣。崇業、宜人、永川、建安四郡，隋志皆無之。士州，志作士州，未知孰是。

開皇六年，山南荆浙七州水。浙當作浙。周隋置浙州於浙陽，卽後魏析州也。浙非州名，此轉寫之譌。十八年，杞宋陳亳曹戴潁等州水。戴州卽濟陰之成武縣。開皇十六年置州。

隋本紀下

煬帝。王懋竑曰：此紀全是隋書之文，略無增減。詔令載於南北史者，較本書不過什之二三。獨此紀皆載全文。大業八年征遼，詔千有餘言，亦備載不遺一字。疑北史闕此卷，後人以隋書補之耳。北史本紀例稱帝，此篇獨稱上，亦一證也。大昕按：北史紀傳後皆有論曰：獨此篇稱史臣曰。

后妃傳上

三嬪視三卿，六嬪視六卿，世婦視中大夫。按：靈太后初入掖庭，爲承華世婦，旣誕明帝，進爲充華嬪。明帝充華潘氏，亦稱潘嬪。是嬪與世婦皆別有嘉名，史家不能悉舉耳。

魏文成皇后馮氏，父朗，秦雍二州刺史，西城郡公。外戚傳作遼西郡公。

太后立文宣王廟於長安。按外戚傳。馮朗追贈燕宣王。立廟長安。文宣當爲燕宣之譌。

故杞道德王遇。張祐。苻承祖等。杞道德卽抱嶷也。恩幸傳。嶷字道德。其先姓杞。

文成皇后李氏。梁國蒙縣人。李崇傳作頓邱人。頓邱蓋其族望。而家於蒙縣也。

母頓邱王峻之妹也。母字衍。

宣武靈皇后胡氏。時太后逼幸清河王擇。按元又傳言。擇以親賢輔政。每欲黜又。遂令通直郎宋維。

告司染都尉韓文殊欲謀逆立擇。擇坐禁止。後窮案無實。又恐擇終爲己害。乃與侍中劉騰密謀。詐言。

擇貨中黃門胡度等金帛。令以毒藥置御食中。以害帝。帝信之。初不言。太后逼幸事。清河王擇傳亦言。

元又恃寵驕盈。擇每抑黜之。又黨人希旨。告擇謀反。禁擇門下。訊問左右。得釋焉。正光元年。又與劉騰。

逼孝明於顯陽殿。閉靈太后於後宮。囚擇於門下。省擇罪伏。遂害之。亦不言宮壺事。然則逼幸清河一。

節。乃元又輩誣讎之辭。未可信爲實然也。

文帝后乙弗氏。高祖莫瓊擁部落入附。拜定州刺史。封西平公。莫瓊卽乙瓊也。已見列傳十三卷。三。

世尚公主封號。俱於彼傳詳見之。此云莫瓊拜定州刺史。而彼傳不書。蓋西魏四后皆魏收書所無。延。

壽別采它書增益之。故前後不相檢照。并不悟莫瓊與瓊之卽一人也。

后妃傳下

齊武明皇后婁氏。及茹茹公主至，后避正室處之。茹茹與蠕蠕音本相似，然北史紀傳諸篇皆依魏收書作蠕蠕，無有作茹茹者。惟后妃傳序例云：神武所聘茹茹女，稱茹茹公主。此篇亦有茹茹公主之文，而上文即云神武逼于蠕蠕，欲娶其女，此後仍書蠕蠕公主。一卷之中，不相檢照如此，難免後人之指摘矣。

周文皇后元氏。魏孝武之妹也。初封平原公主。按魏本紀，孝武從妹不嫁者三，一曰平原公主明月。

南陽王同產也。是同時有兩平原公主。

張瓊傳作平原公主。

宣華夫人陳氏，容華夫人蔡氏。按前卷序隋文置三夫人，九嬪之名，無云宣華容華者。

魏諸宗室傳

宜都王目辰。乙渾謀亂，目辰順陽公謀殺之。順陽上當有與字。

華山王鷲。咸陽王坦謂鷲曰：孔雀老武官，何因得王？鷲答曰：斬反人元禕首，是以得之。按鷲封王在

孝莊時，距咸陽王禕之誅已二十八年矣。本傳及禕傳俱不載斬禕事，恐未可信。魏書此卷已亡，即

用北史補之，疑此延壽所增，非魏書本文。

子思。尋魏書崔琰傳、晉文陽傳、殿傳皆云：既爲中丞，百寮震悚。按三國志崔琰傳、殿二傳，並不云爲

御史中丞。晉文陽或疑晉陽秋之譌，然殿魏人，非晉人也。

昭成皇帝九子。庶長曰寔君。次曰明元帝。明元當作獻明。

禎。後拜南豫州刺史。南豫州治懸瓠城。魏書地形志但稱豫州。無南字。

素。休屠郁原等叛。素討之。斬渠。率徒千餘家於涿鹿之陽。立平原郡以處之。此平原郡在幽州界內。

魏收志失載。

可悉陵。沮渠茂虔令一驍將與陵相擊。茂虔紀傳皆作牧韃。牧茂聲之轉。韃虔音同。

紹。宣武詔令檢趙修獄。以修佞幸。因此遂加杖罰。令其致死。按趙修傳不見元紹姓名。

壽興。洛陽男子。姓元。名景。按壽興名景。不見於史。當由名犯唐諱。故書其字。此銘作韻語。不可稱字。

乃以景代之耳。

嶷。斷嶷要而出。要下有闕文。當是要帶之類。魏書此篇亡。後人取北史補之。要字下注闕。

淑。秦州河東。杼柚代春。按魏初置秦州於河東。故有秦州河東之謠。監本秦作秦。蓋據魏書地形志。

校改。然其時自有秦州。治天水。不應同時有兩秦州。當以秦爲正。

道武七王傳

江陽王繼。大都督。節度西道諸軍事。據此。則節度之名。元魏已有之。不始於唐也。

太武五王傳

廣陽王深。深本名淵。唐人避諱追改。北史列傳中鄧彥海侯深張深皆名淵。或改爲深。或稱其字。

景穆十二王傳下

東阿公順。僕射李思冲尙與王洛誠同傳。以此度之。卿亦應繼其卷下。按元順所舉。當是魏書舊本。崔鴻諸人所修。今魏收史列王叡於恩倖。而李冲別爲傳。不如舊史臣之直筆矣。

文成武王傳

安樂王長樂。皇興四年。封建昌王。此事本紀失書。

鑿。斬首傳洛。詔改姓元氏。莊帝初。許復本族。按元爲國姓。鑿以謀反絕其屬籍。不當仍姓元氏。魏書云改其元氏。似爲得之。

獻文六王傳

廣陵王羽。今解卿長兼。可光祿大夫。守尙書。按長兼與守皆非正授之名。據此傳。于果以長兼尙書。降爲守尙書。則守下於長兼一等矣。

廣陵王欣。恭帝初。遷大丞相。魏本紀不載此事。且是時宇文泰擅權。未必以大丞相之名假人。恐不可信。

彭城王勰。嫡子劭。字子訥。襲封。按總第三子子攸。封長樂王。卽孝莊帝也。子攸弟子正。封始平王。於

河陰遇害。又孝莊兄子小字伽邪，封陳留王，傳皆失書。

劭子韶，襲封彭城王。按：韶弟襲武定元年封武安王，傳亦失書。

大誅元氏，自昭成已下，竝無遺焉。按：元文遙、元景安俱昭成之後，賜姓高氏。元懣、道武之後，以女嫁孝

昭，苦請得免，賜姓步孤氏。又元士將，昭成之後，武成時，官將作大匠。元景皓亦昭成之後，以不肯改姓

誅，家屬徙彭城，則其時仍有漏網者矣。此傳云前後死者七百二十一人，當得其實。齊本紀云殺三千

人，恐史家已甚之詞。

北海王詳，妃宋王劉昶女。按：咸陽王禧傳，詳聘吏部郎中滎陽鄭懿女。

孝文六王傳，孝文諸子京兆王愉之子爲西魏文帝，廣平王懷之子爲孝武帝，清河王懌之孫爲孝靜

帝，而篇中皆不見其名，知此卷文字脫漏多矣。

京兆王愉，孝武初爲護軍將軍，孝武當作宣武。

於是孝武攝愉禁中，孝武當作宣武。

孝武詔尙書李平討愉，孝武當作宣武。

後靈太后令愉之四子皆附屬籍，追封愉臨洮王，寶月乃改葬父母，追服三年，愉四子，其一爲臨洮王

寶暉，其一爲南陽王寶炬，其一當是寶月，其一不可考矣。寶月上當有脫文。

清河王懌。孝武初拜侍中。孝武當作宣武。

又言於孝武曰。孝武當作宣武。

孝武笑而不應。孝武當作宣武。

聞懌之喪。爲之旆面者數百人。按本紀。正光四年。追封懌爲范陽王。尋復爲河間王。其子竇嗣封清河。

史不著其年月。大約在孝莊朝也。普泰元年。以竇爲太傅。永熙元年。爲司徒。孝武西遷。齊神武推竇爲

大司馬。承制行事。未幾。立竇子善見爲帝。卽孝靜帝也。天平三年。竇薨。興和二年。封皇兄景植爲宣陽

王。皇弟威爲清河王。謙爲潁川王。皆懌孫也。

廣平王懷。闕。此傳全篇已亡。僅存三十二字。不知所謂。考本紀。懷以太和二十一年封。明帝卽位。由驃

騎大將軍進司空。遷太保。領司徒。熙平二年薨。孝昌二年。封懷長子誨爲范陽王。官至左僕射。爲余朱

兆所殺。文帝大統中。有廣平王贊。疑亦懷之子。

汝南王悅。此篇亦多脫文。悅以景明四年封。熙平二年。爲儀同三司。坐殺人免官。皆不書。此闕漏之顯

然者。

悅乃爲大劉確。置於州門。此悅都督徐州時事。其上又有脫文。

孝武以廣陵頗有德望。以悅屬尊地近。內懷畏忌。故前後害之。廣陵謂節閔帝也。廣陵安定。東海皆嘗

登大位。悅亦爲梁所立。故孝武忌而害之。豈以其德望及屬尊故邪。東海安定於屬本疏。又無德望。何亦死於非命。史所言失其實矣。

廿二史考異卷三十九

北史二

衛操傳

魏、軒轅之苗裔。言桓穆二帝統國御衆威禁大行。此傳載衛操所立碑。文古質可誦。中多韻語。極似漢碑。惜爲史臣改竄。失其本真。篇首云魏、軒轅之苗裔。考其時未有魏號。以文義度之。當云鮮卑拓跋氏也。碑爲猗缶而立。必書晉所授官爵。及猗缶猗盧二人名。篇內稱桓穆二帝。亦史臣所改。

莫含傳

世稱莫含壁。含音譌。或謂之莫回城云。含回聲相近。

尉古真傳

明元初爲鴻飛將軍鎮大洛。按魏書官氏志。太祖制定官號。不依舊名。諸曹走使。謂之鳧鳴。取飛之迅疾。以伺察者爲候官。謂之白鷺。取其延頸遠望。此以鴻飛爲將軍之號。亦當取迅疾之義。太武卽位。命眷與散騎侍郎劉庫仁等八人分典四部。此又一劉庫仁。

穆崇傳

從太武田擘山有虎突出。北史避唐諱，改虎爲武，或爲獸，或爲猛獸，或爲彪，或爲豹。今刊本間有虎字，如隋本紀，西方以白虎，南方以朱雀，崔浩傳，欲以駒犢齒虎口，封軌傳，黃圖白虎通，高昂傳，高敖曹地上之虎，王慧龍傳，義隆畏將軍如虎，楊大眼傳，北涪郡常有虎害，深山之虎，尙所不免，奚康生傳，贊以熊虎之姿，奮征伐之氣，綦連猛傳，本欲尋山射虎，張定和傳，贊虎嘯風生，庾季才傳，吾今嘗騎虎，誠不能下矣，皆校書者妄改，非李氏元文。又如韓擒虎史，皆作韓擒，而王頒傳有韓擒虎字，此傳前云有虎突出，後云有力如武，皆後人率爾妄改，又不能盡改也。

長孫儉傳

後移鎮荊州，授總管荆襄等五十二州諸軍事，行荊州刺史。按周明帝武成元年，始改都督諸州軍事爲總管，儉鎮荊州，尙在周末受禪以前，而云總管者，史家追書之。

長孫平傳

賀若弼鎮壽陽，帝恐其懷貳，遣平代之，弼果不從，平麾壯士執弼送京。按賀若弼傳無不從被執事。

長孫幼傳

孝文以其幼承家業，賜名幼，字承業。幼本稚字，延壽避唐諱，改之，唐人重廟諱，南北史於嫌名皆不書，如長孫稚改爲幼，李稚廉改爲幼廉，孔稚孫改爲幼孫，謝稚改爲孺子，孔稚珪單稱珪，以稚治音同也。

宗炳字少文，庾炳之字仲文，劉秉字彥節，皆書其字，以炳秉與丙音同也。沈澥字仲高，只書仲高，以澥虎音同也。魏宗室傳引漢書宣秉傳，仍作秉，乃校書者所改，非延壽本文。南史江秉之，北史崔秉或亦後人所改。

尋而正平郡蜀反，復假承業鎮西將軍，討蜀都督，頻戰有功。按本紀，孝昌三年六月，絳蜀陳雙熾聚眾反，自號始建王，曲赦平陽、建興、正平三郡，詔假鎮西將軍都督長孫承業討雙熾，平之。正平即絳也。雙熾本蜀人，而僑居於絳，故有絳蜀之稱。胡三省云：蜀人徙居絳，都者謂之絳蜀。

長孫晟傳

以宗女封安義公主，以妻之。安義，突厥傳作義安。

于栗磾傳

遷豫州刺史。此豫州治洛陽。

宋隱傳

隱弟宣，與盧元、高允、崔建從子愔，俱被徵拜中書博士。後拜侍郎，行司徒。袁延禧曰：校尉卒，諡曰簡侯。宣子謨襲爵，傳失書宣之封爵，以高允徵士頌考之，蓋封中都侯也。

愔歷中書博士，員外散騎常侍，爵列人子。高允傳作列人侯。按魏書，隱第三子溫，世祖時，徵拜中書博士，卒，追贈列人定侯，疑溫與愔本一人耳。

刁應傳

遷徐州刺史。賜爵東安伯。魏書作東安侯。此云伯者。誤也。又下文云。子遵襲爵。太和中。例降爲侯。而

傳不見進爵爲公之文。疑有脫誤。魏書同

唐和傳

晉西宜安人也。晉西當作晉昌。

寇讚傳

讚弟謙。有道術。太武敬重之。即天師寇謙之也。傳脫之字。

拜讚南雍州刺史。軹縣侯。於洛陽立雍之郡縣以撫之。此州魏志不載。蓋在宋武已殂。奚斤入洛陽之

後。與洛豫二州同置。

源懷傳

臣有家勳。不露茅土之錫。按懷父賀。封隴西王。賀辭老。詔懷受父爵。後例降爲公。中間無罷黜之事。又

考太和十六年。制異姓爲王者。皆降爲公。公爲侯。侯與伯。即傳所云例降也。陸麗與源賀皆異姓爲王

者。自當依例得公爵。乃麗子叡。以自訟得之。懷以丁艱。不容及例。直至宣武之世。上表陳請。始得授北

馮翊郡開國公。此事之可疑者。細檢諸傳。稱封爵者。皆不言食邑。獨陸叡封鉅鹿郡開國公。食邑三百

戶源懷封馮翊郡開國公。食邑九百戶。竊意魏制公侯五等皆虛名。無食邑。懷雖身襲公爵。而未有邑。故云不需茅土之錫也。又官氏志開國郡公第一品。散公從第一品。則散公與開國公班位亦有別矣。

司馬休之傳

晉宣帝季弟譙王進之後也。晉渡江之後。進子孫襲封譙王。按進卒於魏世。官止中郎。其子遜。於武帝初。始封譙王。傳所書誤也。

司馬楚之傳

奚斤既平河南。以楚之所率人戶。分置汝南、汝陽、南頓、新蔡四郡。以益豫州。此時豫州治虎牢。魏收志所謂北豫州也。

蕭贊傳

贊字德文。本名綜。南史贊作纘。蓋承梁書之譌。梁武諸子名皆从系旁。綜既自稱東昏侯子。而蕭寶夔爲之更名。必不从系旁矣。南北史各爲立傳。而北史較略。蓋仍姚思廉魏收之舊文也。南史既不可略。則北史之傳可刪。

盧玄傳

曾祖洪，晉司空劉琨從事中郎。洪當作諛。監本作諛

彥卿，貞觀中位石門令，東宮學士。北史載唐初事，如隋恭帝紀，楊愔皇后蕭氏，周宣帝皇后元氏，靜帝

皇后司馬氏，隋齊王暕子愔，裴矩，何稠諸傳，皆述後事，以畢前文，合於史例。若長孫晟傳，大唐貞觀中，

追贈司空上柱國，諡曰獻，竇毅傳，武德元年，詔贈毅司空云云，齊清河王勸傳，大唐褒顯前代名臣，追

贈都督四州諸軍事定州刺史，此以唐之外戚而特書。房彥謙傳，貞觀初，以子玄齡著勳庸，贈徐州都

督云云，魏長賢傳，貞觀中，贈定州刺史，此以唐之元勳而特書，猶有說也。盧彥卿之流，仕隋不顯，在唐

亦無可稱道，書之不勝書矣，且於全書之例無當。

盧勇傳

再遷揚州刺史，鎮宜陽。揚州當作陽州，下同。

高允傳

古人云，方一里，則爲田三頃七十畝，方百里，則田三萬七十畝。按古法，一里三百步，三三而九，爲田九

萬步，以畝法二百四十步除之，得三百七十五畝，舉大數言之，故云三頃七十畝。

范陽祖邁，徵士三十四人，有名無字者，祖邁、劉策、許琛、宋悛、潘符、杜熙、張綱、王道雅、閔弼郎、苗侯辯、呂

季才。

崔仲方傳

謹案晉太康元年歲在庚子晉武帝平吳至今開皇六年歲次庚午合三百七載庚午當作景午開皇

六年歲在丙午唐人避諱稱景午也自庚子至丙午恰三百有七年隋書本

陳氏草竊起于庚子至今庚午按陳武帝以丙子歲自爲丞相錄尚書事明年受禪此庚子庚午亦景

子景午之譌蓋校書者不知景卽丙字疑庚與景聲相近而妄改之

張洪傳

燉煌深泉人也卽涇泉縣避諱改

劉延明傳

昭王好尙文典涼武昭王單稱昭王猶諸葛亮諡忠武而世稱武侯也

燉煌實錄二十卷隋書經籍志涼書十卷記張軌事僞涼大將軍從事中郎劉景撰又燉煌實錄十卷

劉景撰疑卽一書而志析爲二也延明本名昞唐人避諱或稱其字或改爲景

鄭羲傳

出爲西兗州刺史魏書地形志東郡治滑臺城天興中置兗州此傳云西兗州者指此非志之西兗州

也志之西兗治定陶酸棗鄆城爲東郡所屬故羲得表薦之高祐爲西兗州刺史鎮滑臺亦在高祖朝

鄭述祖傳

初述祖父爲兗州。於鄭城南小山起齋亭。刻石爲記。述祖時年九歲。及爲刺史。往尋舊迹。得一破石。有銘云。中岳先生鄭道昭之白雲堂。按述祖之父道昭。歷光青二州刺史。未嘗爲兗州。其大父羲。則爲兗州刺史。然羲爲兗州治滑臺。與齊之兗州非一地。疑兗當作光。字之誤也。

鄭譯傳

內史中大夫烏丸軌。每勸帝廢太子。周初功臣。賜代北姓者甚多。北史皆書其本姓。不書所賜姓。如王軌。賜姓烏丸氏。惟鄭譯。宇文忻。梁士彥。元巖。達奚長儒。來和。傳稱烏丸軌。皆沿隋書之文也。隋本紀。王軌言。普六茹堅有反相。此述當時之語。當爾。若紀事之文。但稱楊堅。不云普六茹。

皮豹子傳

道明第八弟懷喜。魏書高祖紀作懷喜。本傳單名喜。

田益宗傳

乃於新蔡立東豫州。以益宗爲刺史。地形志。東豫州。大和十九年置。治廣陵城。梁史所謂北廣陵也。在淮水之北。今光州息縣地。

孟表傳

除南兗州刺史、領馬頭太守、鎮渦陽。渦陽今蒙城縣，在淮水之北。地形志：楚州有馬頭郡，領蘄、平、預二縣。此淮南之馬頭也。在懷遠縣西南南兗州有馬頭郡，治建平城，領蘄、已吾、下邑三縣。此淮北之馬頭，卽渦陽也。

裴駸傳

子宜，爲益州刺史，綏撫甚得戎羌之心。後晉壽更置益州，改宣所位爲南秦州。按地形志：益州，正始中置，領東晉壽、西晉壽、新巴南、白水、宋熙五郡。卽此傳所云晉壽更置益州也。志又云：南秦州，眞君七年置仇池鎮。太和十二年爲渠州。正始中置治略谷城。裴宜佐益州，當在正始初。志云渠州，疑益州之誤。

劉休賓傳

及立平齊郡，乃以梁鄒人爲懷寧縣，以休賓爲令。按地形志不載平齊郡，而列傳往往見之。崔道固傳：徙齊土望共道固守城者數百家於桑乾，立平齊郡於平城西北新城，尋徙居京城西南二百餘里，舊陰館之西。刊本陰誤作除，今據水經注校改房景伯傳：獻文時，三齊平，隨例內徙爲平齊人。劉芳傳：梁鄒降，芳北徙爲平齊人。崔亮傳：慕容曰：曜平三齊，內徙桑乾爲平齊人，是也。水經注：濕水逕陰館縣故城西，縣故樓煩鄉也。魏天安三年，齊平，徙其民於縣，立平齊郡，則道元著書之時，郡尙無恙矣。地形志：肆州雁門郡，原平縣有陰館城樓城魏書房崇吉傳：及立平齊郡，以歷城民爲歸安縣，崇吉爲縣令，是懷寧之外，又有歸安縣也。

房彥謙傳

漢王構逆。罹罪者多。彥謙見張衡當途。而不能匡救。以書諭之。有云。若審知外內。無虞嗣后。纂統。而好亂樂禍。妄有覬覦。則管蔡之誅。當在於諒。同惡相濟。無所逃罪。梟縣孛戮。國有常刑。遂使籍沒流移。恐爲冤濫。恢恢天網。豈其然乎。罪疑從輕。斯義安在。按隋書。國有常刑之下。尙有二十字。云其間或有情非協同。力不自固。或被擁逼。淪陷凶威。蓋彥謙之意。以同惡者罪無可逃。被逼者自從輕典。所謂籍沒流移。恐爲冤濫。乃指情非協同者而言。北史刪此數言。失其旨矣。

韓子熙傳

除伯華東太原太守。此齊州之太原。故稱東太原。

程駿傳

父肇。呂光人部尙書。人部本是民部。避諱改。

楊素傳

進爵郢國公。眞食長壽縣千戶。按下文云。改封楚公。眞食二千五百戶。又云。別封一子義康。郡公。邑萬戶。素以宰相封國公。僅食千戶。而其子封郡公。邑乃萬戶。蓋五等封邑。皆虛名。非真有食戶也。唐人結銜。有食邑。食實封之別。蓋因於此。宋則并所食實封者。謂亦有名而無實矣。

楊玄感傳

汲郡贊治趙懷義等。胡三省曰。隋志。煬帝改州爲郡。郡置太守。罷長史司馬。置贊務一人。貳之。贊務卽

贊治也。隋書成於唐臣。避高宗諱。故改治爲務。北史皆作贊務。惟此傳作治。亦是後人所改。非李史元文。

楊寬傳

都督東雍州刺史。卽本州也。楊氏恆農華陰人。後魏置東雍州於鄭縣。并立華山郡。華陰蓋其屬縣。故

稱本州。

劉懋傳

孝昭初。大軍攻硤石。孝昭當作孝明。

常爽傳

武成西征涼土。爽與兄士國歸款軍門。武成嘉之。武成當作太武。

常景傳

肇尙平陽公主。按。高肇傳。尙高平公主。

仍詔景爲幽安元四州行臺。幽安元止三州。而云四州。疑有脫誤。

邢邵傳

後楊愔與魏元叉及邵請置學。奏曰：「二蠻兩學，盛自虞殷。」按：史敘此事於太昌之後。太昌孝元叉死已

久矣。北齊書以為魏收者為近之。然考之魏書李崇傳，此奏實出於崇。與楊愔、邢邵、魏收諸人初不相

涉。其文云：「伏聞朝議以高祖大造區夏，道侔姬文，擬祀明堂，式配上帝。蓋孝明熙平二年，太師高陽王

雍等議以高祖配明堂，故有此奏。其時靈太后臨朝攝政，元叉亦用事，故有靈太后之令也。竊意自請

置學，至累遷尚書令，加侍中，凡六百六十七字，皆李崇傳文，錯入此篇耳。

武帝在京輔政，武帝當作文襄。

宣武富於春秋，宣武亦文襄之譌。下文宣武甚親重之，宣武還，以邵言告暹，暹即啟宣武，並仿此。

李崇傳

東荆州蠻樊安聚衆於龍山。按：東荆州之名，不見於地形志。麟道元、薛真度、房亮、慕容儼俱嘗為東荆

州刺史。隋志：淮安郡，後魏置東荆州，西魏改淮州者是也。治比陽

進討西荆，諸蠻悉平。魏隋二志俱不載西荆州。

後北鎮人破落汗拔陵反。紀作破六韓拔陵。六韓與落汗聲相近。

崔光傳

祖曠，仕宋為樂陵太守，於河南立冀州。宋志州治歷城置郡縣，即為東清河鄆人。縣分易，更為南平原，貝邱人也。

按宋書州郡志冀州所領有平原清河二郡貝邱與鄒皆屬清河初無南平原東清河之稱魏書地形志有東清河郡鄒與貝邱皆屬焉有東平原而無南平原二志既小異而貝邱之屬南平原則二志皆未載也。趙隱傳清河後改爲平原

崔亮傳

徐州刺史元暉撫御失和北史避唐諱改暉爲景此暉字亦後人輒改

淳于誕傳

其先太山中人也袁廷構曰中當作博

張讜傳

出爲東河間太守此青州之河間因劉宋僑置之名故加東以別之

劉藻傳

遷離城鎮將太和中改鎮爲岐州雖當作雍字相涉而譌

傅豎眼傳

拜靈越青州刺史貝邱子鎮羊蘭城地形志樂陵郡厭次縣有羊蘭城

靈越爲太原太守升城守下當更有守字

尋假鎮南休軍。休當作將。

贈吏部尚書、左齊州刺史。左字疑衍。或有脫文。

張烈傳

荊州刺史廣陽王禧。禧當作嘉。本傳亦不云爲荊州刺史。

袁翻傳

神龜末遷涼州刺史。時蠕蠕主阿那瓌、後主婆羅門竝以國亂來降。朝廷問安置之計。按本紀及蠕蠕傳。阿那瓌以正光元年來降。婆羅門以次年來降。蓋翻以神龜末遷刺史。至正光之世。上表言邊事耳。

袁聿修傳

出爲信州刺史。卽其本鄉也。隋志。項城縣。東魏置揚州。又改北揚州。後齊改曰信州。袁氏世爲項人。故云本鄉也。是時齊周皆有信州。齊之信州在淮北。周之信州在巴東。

陽休之傳

魏收監史之日。立神武本紀。取平四胡之歲爲齊元。當時稱尒朱爲契胡。四胡謂尒朱兆。與天光。度律。仲遠也。李百藥齊書敘韓陵戰功。每稱破四胡。北史亦因之。蓋承當時俗語。神武雖專國政。猶終臣位。自當效曹馬史例。用元氏紀年。且神武本封勃海王。初無齊名。齊元之說。理不可通。伯起自我作古。意

主諂媚，休之駁改，得其當矣。

祖珽傳

嘗爲冀州刺史，万俟受洛製清德頌。受洛卽受洛于也。彼傳失書冀州刺史一節。

參軍元景獻，故尙書令元世儁子也。魏宗室傳失載景獻名。

是魏孝靜帝故博陵長公主所生，故當作姑。

尒朱榮傳

北人語譌，語尒朱爲人主。人尒聲相近。七音譜，皆闕日母。

詔百官議榮配饗，司直劉季明白晉王，若配永安，則不能終臣節，以此論之，無所配。此述季明語，當有

脫文。通鑑載其議云：若配世宗，於時無功；若配孝明，親害其母；若配莊帝，爲臣不終。詞意完善。永安、孝

莊年號也。孝莊之諡，定於孝武。當世隆議配享之日，不當卽稱莊帝。北史作永安，爲得之。

文略嘗大遺魏收金，請爲父作佳傳，收論榮比韋彭伊霍，蓋由此也。此事重見魏收傳，然收初未以伊

霍比尒朱榮，亦謗史者已甚之詞。

尒朱仲遠傳

封清河公、徐州刺史，兼尙書左僕射、三徐大行臺。三徐者，徐與東徐、北徐也。徐州治彭城，東徐州治下

邳北徐州當治卽邱。

余朱世隆傳

今日爲令王借車牛一乘。世隆稱令王者官尙書令又封王也。楊愔亦尙書令封公。故稱令公。斛律光、和士開皆官丞相封王。故稱相王。當時稱謂之不假借如此。

賀拔允傳

字可泥。齊神武呼允爲阿鞠泥。見齊本紀。

其賊僞署王衛可瓌。北齊書作衛可肱。周書太祖紀作衛可孤。孤肱瓌皆一聲之轉也。高阿那肱傳云。

雖作肱字。世人皆稱爲瓌音。

賀拔岳傳

乃謂余朱氏一人爲元帥。謂當作請。

毛遐傳

北地三原人也。此曹魏僞置之北地郡。非秦漢北地郡。魏志。豳州有西北地郡。秦昭王置。而雍州亦有

北地郡。魏文帝分馮翊之殿。祔置卽此北地也。西魏置北雍州于此。

授遐南幽州刺史。幽當作豳。

毛鴻賓傳

改三原縣爲建中郡。中當作忠。

辛雄傳

齊神武至洛。於永寧寺大集朝士。責雄及尙書崔孝芬、劉歊、楊機等曰。爲臣奉主。匡危救亂。若處不諫諍。出不陪隨。緩則耽寵。急便竄避。臣節安在。乃誅之。此語已見齊本紀。當刪此存彼。

辛德源傳

尙書僕射楊遵彥。殿中尙書辛術皆一時名士。竝虛襟禮敬。按德源卽術之族子。附見術傳之後。乃忽有一時名士。虛襟禮敬之語。此豈可施於族父與族子者乎。

廿二史考異卷四十

北史三

齊宗室諸王傳

趙郡王勰。其母魏華山公主也。下文云母元氏華陽長公主。封號互異。

清河王岳。王懋竑曰。高岳爲鄴中四貴之一。其恃權放縱。蓋亦相當。而傳不言其事。此以士廉故諱之。

也。于氏長孫氏多佳傳。則以志寧與无忌之故。長孫晟傳最餘冗。而略不筆削。後梁主諸傳皆無貶詞。

房彥謙與張衡書。蕪雜多難解。而全載之。又以蕭瑀房喬故也。魏長賢魏史不載。以文貞故。特爲立傳。

薛聰。薛孝通於魏史之外。多有增益。亦必本之薛收家傳。以此推之。凡所褒稱。未必皆當其實。大昕按。揚雄父

子之得佳傳。以恭仁故也。令狐整父子之得佳傳。以德棻故也。

子勸襲爵清河王。改封安樂侯。按齊書。以清河地在畿內。改封樂安王。此云安樂侯者。誤。

南安王思好。所骨光弁奉使至州。廣韻。漢複姓有所胥氏。何氏姓苑云。今平陽人。此作骨。字相似而

譌也。恩倖傳作研胥光弁。研又斫之譌。卽一人。

神武諸子傳

永安王浚。保定初進爵爲王。保定當作天保。

彭城王浟。史君在滄州曰。漢人稱刺史爲使君。以其奉使刺舉而言。六朝人多稱刺史爲史君。則以官名有史字故也。子家藏東魏興和二年敬顯傷碑。額題敬史君。字畫分明。高浟爲滄定二州刺史。亦在東魏時。傳稱史君與石刻正合。監本改史爲使。所謂少所見多所怪也。

文襄諸子傳

廣寧王孝珩。齊叛臣乞扶令和。乞扶卽乞伏也。

文宣諸子傳

范陽王紹義。遂卽皇帝位。稱武平元年。元年當作九年。蓋後主以武平八年失國。紹義逃奔突厥。至次年。因高寶寧上表勸進。乃稱帝。仍用武平之號。不自改元也。通鑑書此事於前一年。乃云改元武平。殊失其實。然因此知北宋本已誤九爲元。而溫公亦未能校正也。

破六韓常傳

單于之裔也。按齊書常字保年。附化人。延壽削而不書。則總論中保年之於關右今刊本關爲關又脫右字遂不可句

義異策名二句。殊無謂矣。

初呼廚貌入朝漢。貌當作泉。泉譌爲兒。後人又妄加豸旁。

其子孫遂以潘六奚爲氏，後人譌誤，以爲破六韓。潘破聲相近，奚何聲相近，何又轉爲韓也。

尉長命傳

子興，字敬興，便弓馬，有武藝，位冠軍將軍。按齊書，長命子興敬，高祖引爲帳內都督，高祖攻周文帝於

邙山，興敬因戰爲流矢所中，卒。贈涇岐豳三州軍事，諡曰閔莊。北史綦連猛傳附載尉興慶事云：芒山

之役，興慶救神武之窘，爲軍所殺。超贈儀同涇州刺史，諡曰閔壯。神武本紀亦載興慶事，亦是興慶即興敬矣，乃不

附其父，而別見它傳，豈誤切與慶興敬爲兩人乎？齊書作興敬，蓋避齊廟諱，此傳作敬興，則轉寫倒耳。

任祥傳

祥字延敬，齊書作任延敬，不云名祥。

張保洛傳

贈前官，追復本封。按齊書，保洛子默言嗣，武平末衛將軍，此傳失書。

從神武出山東，又有賀拔仁、麴珍、段琛、尉標子，相貴，康德、韓建業、封輔相、范舍樂、牒舍樂。按齊書無賀

拔仁、范舍樂，而有乞伏貴和、令和兄弟，北史別爲乞伏慧立傳，即令和也，故不及焉。康德、齊書作王康

德，封輔相事，又見范陽王紹義傳。

張瓊傳

瓊子欣尚魏平陽公主。除駙馬都尉。與公主情好不篤。尋爲孝武所害。按后妃傳。魏孝武妹平原公主。適開府張歡。歡遇之無禮。帝殺歡。改封爲馮翊公主。以配周文帝。卽此公主也。齊史避諱。改歡爲欣。惟公主封號一云平原。一云平陽。不免抵牾。

慕容紹宗傳

吾自數年已還。恆有蒜髮。蒜不成字。當作蒜。

元景安傳

魏昭成皇帝之五世孫也。北史於元氏子孫仕它姓者。雖世系可考。皆各自爲傳。不附入魏宗室篇。殊有深意。

高隆之傳

齊受禪。進爵爲王。上文不云封平原郡公。而忽云進爵爲王。與它傳例異。延壽刪改舊史之文。往往失當。略舉一隅。可徵舊史之不可廢。

庫狄士文傳

刺史羅殺政。司馬蝮蛇瞋。羅殺卽羅刹也。
趙彥深傳

隱字彥深。避齊廟諱。故以字行。齊神武六世祖名隱也。竇泰、尉興慶皆歿於魏世。故不避。

魏收傳

自序。漢初。魏無知封高良侯。子均。均子恢。恢子彥。彥子歆。歆子悅。按。魏悅與李孝伯同時。孝伯以女妻之。蓋在太武之世。自漢初至後魏太武時。計六百餘年。而無知至子悅。僅傳六世。此理之所必無者。魏收自序。今已不傳。後人又取此篇補之。要之。必有脫文矣。無知封高良侯。亦班史所無。唐書宰相世系表作高梁侯。

正光五年。南北二秦城人莫折念生、韓祖香、張長命相繼構逆。地形志有秦州。有南秦州。未見北秦之

名。蓋對南而言。以秦州爲北秦也。敘傳李彥爲秦州刺史。正光五年。城人薛珍等害彥。推其黨莫折大提爲帥。

則韓彭伊霍。夫何足數。魏書尒朱榮論本作彭韋。謂大彭、豕韋也。此作韓彭。亦後人妄改。

其後羣臣多言魏史不實。武成復敕更審。收又迴換。遂爲盧同立傳。崔綽反更附出。楊愔家傳本云有魏以來一門而已。至是加此八字。又先云恆農華陰人。乃改自云恆農人。以配王慧龍自云太原人。此其失也。按。史云加此八字。不知所加何文。今據魏書楊氏家傳。未云一家之內。男女百口。總服同龔庭。無間言。魏世以來。惟有盧淵兄弟及播昆季。當世莫逮焉。乃悟有魏以來一門而已八字。乃是收之元本。至是去此文。而加入盧淵兄弟以配之耳。方天保之世。楊愔當國用事。收爲其家立佳傳。并稱其家門。豈睦。獨冠魏朝。故愔感其意。以仰塞謗史者。及武成時。愔已見殺。而盧思道前以謗史獲辜。今稱其

家門之美。盧湖思道之父也。欲以釋憾於思道也。王松年前亦訟史不平。故改書楊氏。自云恆農人。以配王氏。

自云太原人。亦以釋憾於松年也。松年。龍之後。崔綽附見其子鑒傳。

博陵崔巖。嘗以雙聲嘲收。曰遇魏收衰。曰愚魏。齊書祇有愚魏衰收四字。愚與魏同聲。衰與收同聲。

此文重沓不倫。當改從齊書。

飯房笞籠。著孔嘲玎。孔與著非雙聲。當是札之譌。或云著當作看。

魏澹傳

詔澹別成魏史。為十二紀。七十八列傳。別為史論及例各一卷。合九十二卷。按隋志魏彥深後魏書一

百卷。卷衍數與此不合。

尉諸王傳

齊王憲。斛律明月時在華容。華容當作華谷。斛律光傳。武平元年冬。率步騎五萬。於玉壁築華谷。龍

門二城。

李密傳

共你論相殺事。何須作書傳雅語。按你字古書所書。北史始屢見之。李幼廉傳。齊文襄謂陳元康曰。我

教你好長史處。許善心傳。我好欲放你。敢如此不遜。突厥傳。你能作幾年可汗。隋書五行志。武平元年。

童謠曰：狐截尾，你欲除我，我除你。二年，童謠曰：和士開，七月三十日，將你向南臺，皆齊隋人語也。廣韻：你，乃里切。秦人呼傍人之稱。

宇文愷傳

堂脩二七博四脩一。此引考工記，改廣爲博，避煬帝名也。下文引胡伯始注漢官，亦避廣字，因稱其字。

侯莫陳崇傳

隋文大業初，以譴流配嶺南。文字衍。

王盟傳

父罷，伏波將軍。此又一王罷。

賀蘭祥傳

拔其洮陽、洪和二城，以其地爲洮州。隋志：澆河郡、河津縣，後周置洮河郡，開皇初郡廢，而不詳洮州建

立本末。

史寧傳

轉東義州刺史。東魏亦以胡黎苟爲東義州刺史。按：魏收志有兩義州，一寄治汲郡，一不言所領郡縣。但云蕭衍置，武定七年，內屬。據隋志：羅田縣，梁置義州義城郡，當卽此矣。而未見東義州之名。

斬其洛安郡守馮善道。洛安蓋東義州屬郡。魏志亦未見。

權景宣傳

迺授并安肆郢新應六州諸軍事并州刺史。此西魏所置之并州。治隨郡。非晉陽也。安州治安陸郡。肆州治下澧。皆西魏置。新應二州。則梁所置也。新州本新陽縣。梁置州及梁寧郡。今京山縣。應州本永陽縣。梁置州。即今應山縣。

永州刺史蕭世怡。此永州在汝南。隋志。汝南郡城陽縣。後魏置城陽郡。梁置楚州。東魏置西楚州。後齊曰永州。魏收志。西楚州治楚城。即此永州也。

王思政傳

并州刺史。行臺如故。仍鎮玉壁。是時西魏未得并州。思政以并州刺史鎮恆農。又移玉壁。皆遙領。非實土也。

尉遲迥傳

紀安州刺史樂廣。以州先降。按隋志。普安郡。梁置南梁州。後改爲安州。

樂運傳

南陽清陽人。按魏隋二志。南陽郡無清陽縣。清當作消。

遂左遷運爲廣州滙陽令。此廣州當治魯陽，而隋志不見滙陽縣之名。

蘇威傳

治書侍御史梁毗，劾威兼領五職。北史避唐諱，治書侍御史皆去治字。惟此傳及皇甫誕、劉昉傳有治

字，亦校書者所增。

韋孝寬傳

拜右將軍、南幽州刺史。幽當作豳。唐永傳，行臺蕭寶寅表爲南幽州刺史，亦豳字之譌。魏時無南幽州也。

以功除浙陽郡守。浙當作浙。

遣其揚州刺史牛道恆。按東魏置揚州於宜陽，此揚字當爲陽。

孝寬因令曲巖作謠歌曰：百升飛上天，明月照長安。百升，斛也。又言高山不摧，祖挺傳作推自崩，櫛樹不扶，自

豎，令謀人多齎此文遺之於鄴。祖孝徵既聞，更潤色之。此事已見祖珽、斛律光傳。三處重複，何不去

二存一。

韋壽傳

歷位恆尾二州刺史。尾當作毛。隋置毛州於館陶縣。

章洸傳

及陳平拜江州總管。隋時江州嘗置總管府。而隋志失書。

韋師傳

於時廣爲雍州刺史。存望第以司空楊雄。尙書左僕射高頴竝爲州都督。引師爲主簿。州都下疑衍督字。魏晉以後。諸州皆置大中正。以甄別流品。隋時避諱。改爲州都。而去中正之名。後人校書。不達州都爲何語。妄加督字。隋書旣然。北史亦爾。眞所謂以不狂爲狂也。高頴自言勃海蓆人。而得爲雍州州都者。頴賜姓獨孤。獨孤爲代北貴族。周隋之世。代人例稱京兆人也。韋氏京兆望門。師又爲州主簿。而世約位在師下。故世康以州都不平爲恨。此何與都督事乎。據本紀。煬帝時爲雍州牧。非刺史。當從隋書作牧爲是。

王勇傳

大軍不利。惟胡仁、及王文達、耿令貴三人力戰。大軍上脫邛山之戰四字。

劉雄傳

臨洮子城人也。魏志臨洮郡無子城縣。

泉仲遵傳

遂於上津置南洛州。按隋志西城郡豐利縣下云。梁置南上洛郡。西魏改郡曰豐利。後周省郡入上津郡。而不言置南洛州。史之漏也。

改巴州爲洵州。隸於仲遵。此巴州非清化之巴州。亦非閩中之巴州。隋志西城郡金川縣下云。後周置洵州。尋廢者。卽此。而不云嘗爲巴州。則志之闕也。

扶猛傳

猛仕梁。位南洛、北司二州刺史。據此。則梁時亦有南洛州。大約置於蠻地。

割二郡爲羅州。隋志房陵郡竹山縣。梁曰安城。西魏入焉。置羅州。卽此州也。二郡之名未詳。

席固傳

後轉湖州刺史。此湖州治春陵郡之湖陽縣。卽後魏之南襄州也。

豆盧寧傳

羌帥傍乞鐵公。趙剛傳作傍乞鐵忽。

韓禽傳

拜禽盧州總管。盧州置總管府。隋志失書。

申徽傳

先是東陽王元榮爲瓜州刺史。其女壻劉彥隨焉。令狐整傳作鄧彥。

元定傳

父道龍。鉅鏹郡守。按史漢鉅鹿之鹿。皆不从金旁。俗人因上一字例加之。然漢尹宙碑分趙地爲鉅鏹。則東漢已有此字矣。後魏孝文弔比干文碑陰有鉅鏹伯魏祐。

楊勰傳

正平高涼人也。按魏志高涼亦郡名。與正平同隸東雍州。

南汾二絳。二絳謂南絳北絳也。

劉璠傳

嘗於新渝侯宅。因酒後。詬京兆杜杲曰。寒士不遜。按杜杲祖父世杜魏朝。杲又未嘗流竄江左。何緣在

梁新渝侯宅乎。周書作杜騫。當從之。

高頴傳

俄而上柱國王積以罪誅。卽王世積也。王懋竑曰。北史例不避世字。此卷世室作代室。王世積去世字。與它卷例異。李德林傳稱晉王諱而不名。亦與它傳異。每卷末各有總論。而此卷無之。疑北史闕此卷。後人別據它書補之。

牛里仁傳

晉祕書監荀勗定魏內經。更著新簿。勗著中經簿。此稱內經者。避隋諱也。隋文帝父名忠。并諱中字。祖名禎。并諱貞字。李孝貞字元操。開皇初。以犯廟諱稱字。

黃曰神升。升當作斗。

案。晉內書監荀勗。本中書監。避諱改。

李德林傳

神武公紇豆陵毅。即竇毅也。此傳獨書賜姓。與它篇異。

宜作大丞相。假黃鉞。都督內外諸軍事。是時隋未受禪。不當避中字。蓋史家追改之。下文云授丞相府

從事內郎。亦是追改。

初德林稱其父為太尉。譖議。以取贈官。李元操陰奏之曰。德林父終於校書。妄稱譖議。按。隋志。校書郎

正九品。親王譖議參軍事。則正五品。

郭衍傳

先屯京口。於貢州南與賊戰。敗之。隋書作貴洲。

袁充傳

唐堯景辰生。景子年受命。按：哀充以唐堯受命在丙子歲。本於汲冢紀年。其云堯四十九年甲子天正十一月庚戌冬至。未審出何書也。今世俗以甲辰爲堯元載。出於皇甫謐帝王世紀。而劉恕通鑑外紀又以戊辰爲堯元年。世代懸遠。宣尼所不言。史遷所未錄。皆當在存而不論之例。

李雄傳

父棠。名列誠義傳。按：北史有節義傳。無誠義傳。延壽於外戚、文苑、良吏、酷吏諸篇。有家傳可附者。例皆歸并。李棠父子何以獨殊。亦不可解。

段文振傳

北海期原人也。按：隋志北海無期原縣。

樊子蓋傳

會來護等救至。按：周法尚、衛文昇、樊子蓋諸傳。及總論。皆稱來護兒爲來護。是當時有此稱。非史脫文。

李景傳

天水休官人也。隋志天水無休官縣。

張翥傳

本名犯廟諱。南北史於犯諱改名。皆不言本名。獨此傳及之。蓋本名大淵。避諱。連爲一字。

宇文述傳

時鐵勒契斃，歌稜攻敗吐谷渾，契斃即契苾也。

宇文化及傳

時士及在公主第，弗之知也。士及爲唐宰相，史家曲筆爲之解脫，恐非其實。

外戚傳

今以劉羅辰、李峻等附其家傳。按李崇傳略不及峻事，與此文不相應。

又檢楊騰、乙弗繪附之魏末。按乙氏自有家傳，繪又無事迹可稱，正當類敘，以省繚複，何須別入外戚。

邢、李氏徒見魏澹書有此二人，亟爲附益，而不知乙弗氏之卽乙氏，乙弗莫瓊之卽乙瓊。若以乙弗后

與乙瓊兩傳參校，去其重沓，又以繪附其父瓊之後，庶幾簡而有法矣。予嘗論史家先通官制，次精輿

地，次辨氏族，否則涉筆便誤。

馮熙，聿同產弟，風幼養於宮，文明太后特加愛念，數歲賜爵至北平王。按孝文紀太和二年正月，封

昌黎王，馮熙第二子始興爲北平王，始興與風殆一人也。紀稱始興爲熙第二子，今據此傳，熙子誕，誕

弟脩，脩弟聿，聿弟風，則風爲第四子，但誕脩皆公主所生，而聿與風庶出同母，聿爲廢后同產兄，其年

未必小於脩，傳以聿爲脩弟，恐未必然。

胡長仁。先是太白食昴。占者曰：昴爲趙分，不利胡王。長仁未幾死。按：胡長絜傳，除趙州刺史，先是望氣者上言太白食昴，尙書左僕射徐之才語和士開曰：昴，趙分，或云趙地有災。古者王侯各在封邑，故分野有災，當其君長。今吾等虛名，竟不之國。刺史專令一境，善惡所歸，比來多以刺史爲驗，未幾而長絜死焉。此卽一事，而傳聞異辭，當以彼傳爲是。長絜爲趙州刺史，星犯趙分，故當其咎，與胡姓何預焉。延壽兼存之，且在一卷之中，未免冗而疏矣。

子君璧，襲爵隴東王。君璧弟君璋。按：祖珽傳，皇后兄胡君瑜，君瑜兄梁州刺史君璧，君瑜與君璋未知卽一人否，而君璧爲梁州刺史，則此傳失書。

儒林傳上

中山張彫武。按：下文敘諸儒通春秋者，祇稱張彫，齊本紀文范傳亦作張彫，崔季舒傳作張雕，蓋本名彫虎，或改爲武，或去其下一字也。雕彫古通用。

又有衛覬、陳達、潘叔虔。此三人皆傳服氏春秋者。衛覬蓋卽衛冀隆也。賈思同傳，國子博士遼西衛冀隆，精服氏學。上書難杜氏春秋六十三事，思同復駁冀隆乖錯者一十餘條，互相是非，積成十卷。思同卒後，魏郡姚文安、樂陵秦道靜復述思同意。今春秋正義往往引衛冀隆、秦道靜說，是二家之書雖亡，而未盡亡也。蘇瓊傳，除南清河太守，每年春總集大儒衛覬隆、田元鳳等講於郡學，覬與冀音義相同。

此傳又脫隆字。

劉獻之。儻不能然。雖復立身之道。有何益乎。雖復下有脫文。魏書云。雖復下帷針股。躡屣從師。正可博聞多識。不過爲土龍乞雨。眩惑將來。其於立身之道。有何益乎。凡多二十七字。

石曜。中山安善人。袁廷構曰。善當作喜。

李業興。梁武帝問尙書正月上日受終於文祖。此時何正。業興對曰。此夏正月。梁武帝問何以得知。業興曰。案尙書中候運衡篇云。日月營始。故知夏正。按業興據中候文證。正月爲建寅之月。以月令孟春日在營室故也。考堯時冬至日在虛。則建寅之月。日躔當在奎婁。已過營室一次。不得云營始。業興未通歲差。故有此言。

九百八十七爲升分。升當作斗。

邢峙。河間鄭人也。鄭當作鄭。權會、黎景熙傳皆誤作鄭。

張景仁。家貧以學書爲業。遂工草隸。景仁工書小技。又非精通六書。如江式之比。不當列於儒林。史家因馬敬德而附及之。篇首敍諸儒傳授。初無景仁名也。目錄當小字分注於馬敬德之下。今刊本皆作大字。別爲一行。殊失史家之旨。

文苑傳

比於建安之徐陳應劉、元元之潘張左東。元元當作元康。

范陽盧思道、安平李德林、河東薛道衡、趙郡李元操。上文已見諸人姓名。元操即李貞也。此更舉其族望於義

無當。

河東柳謩。謩當作習。讀如辯論之辯。此六朝俗字。所謂巧言為辯也。隋書作習。唐人石刻亦多作習字。

李文博。通僂不持威儀。僂即脫字之俗。北史多俗字。考為拷。尉古真段孝言李惠等傳。聽為廳。楊津傳。算為竿。慕容紹宗傳。

傳稱為秤。王羅熊安生傳。呼爾為你。李幼廉許善心李密等傳。

循吏傳

蘇瓊。除南清河太守。隋志高唐縣。後魏置南清河郡。

零陵縣人魏雙成。魏志南清河有零縣。無零陵縣。陵字衍。

藝術傳上

檀特師。大統十七年春初。忽著一布帽。至三月。而魏文帝崩。復取一白絹帽著之。未幾。丞相夫人薨。後

又著白絹帽。尋而丞相第二兒武邑公薨。按宋獻公震傳。大統十六年。封武邑公。其年薨。是卒於魏

文帝之世。與此傳不合。

顏惡頭。兌上天下土。是今日庚辛本宮火。故知下父。予謂兌之履上六。一爻變也。上六丁未土。土生

金爲兌本宮。土則本宮之父也。未土一爻特變。故知爲父。而卜當云兌上六丁未土。譌六丁爲天下。又脫未字也。火當爲父字之譌。

今三月土入墓。又見宗廟爻發。故知死。土生於申。墓於辰。三月建辰。土入墓也。上爻爲宗廟。變見生氣。故知蘇。上爻丁未。變爲壬戌土。土爲本宮父母。卽生氣也。

兌爲言。故父言。故知有言。故父言三字。恐有譌。乾爲父。兌化爲乾。故知父有言。

未化入戌爲土。三月土墓戌。又是本宮鬼墓。兌爲金宮。金以火爲鬼。火墓於戌。故云本宮鬼墓。未後三日至戌。故知三日復死。戌爲鬼之墓。未至戌凡三日。

信都芳。渾天覆觀。以靈憲爲文。蓋天仰觀。以周髀爲法。覆仰雖殊。大歸是一。按渾蓋二家。其原皆出

於馮相氏。而周髀一書。猶存三代之遺言。自揚子雲著論。抑蓋而申渾。後之言天者。多宗之。而蓋天之義。幾晦。近世歐邏巴人入中國。製器有渾蓋通憲之名。而後步天家始知蓋之不悖于渾。然考之梁世。

崔靈恩已有渾蓋合一之論。北齊信都芳亦云覆仰雖殊。大歸是一。則古之人固有先得我心者矣。

陸法和。旣入荊州汝陽郡高要縣之紫石山。按宋書州郡志。汝陽領慎陽。沮陽。高安三縣。隋書地理志。遠安縣舊曰高安。置汝陽郡。此作高要者。誤也。高要在領南。與此不相涉。

藝術傳下

徐審，丹陽人也。家本東莞。與兄文伯等皆善醫藥。按南史稱東海徐文伯，此云家本東莞，當有一誤。南渡後，東海郡僑治京口，故審得爲丹陽人。然南史載宋文帝云：「天下有五絕，而皆出錢唐，其一謂徐道度療疾也。」道度卽文伯之父，則文伯當居錢唐矣。或審與文伯雖爲兄弟行，而所居異地乎？文伯仕南齊，位東莞、太山、蘭陵三郡太守。子雄，員外散騎侍郎。按南史：文伯除鄱陽王常侍，雄位奉朝請，與此傳所載歷官互異。

恩倖傳

王遇，與雷、黨、不蒙俱爲羌中強族。雷一姓也，黨一姓也，不蒙一姓也。魏書太祖紀有羌酋不蒙娥，不蒙或作夫蒙。廣韻：羌複姓有夫蒙氏。後秦建威將軍夫蒙大羌，古音不如拊，故與夫同。

契丹傳

契丹犯塞，文帝親戎北討。文帝當作文宣。

蠻獠傳

延昌元年，拜南荊州刺史，居安昌，隸於東荊。按南荊州不見於地形志考。隋志：春陵郡，後魏置南荊州，其屬縣春陵，舊置安昌郡，此卽延昌所置之南荊也。

氏傳

後爲乞佛乾歸所殺。乞佛卽乞伏也。佛伏聲相近。盛雖蕃于宋，仍奉晉永熙之號。永熙當作元熙。

匈奴宇文莫槐傳

匈奴宇文莫槐，出遼東塞外。按：匈奴宇文氏，徒河段氏，與慕容石氏同時。考其興廢始末，皆在後魏登國以前。魏收意在誇大，皆編入魏書。北史懲收之失，凡劉石苻李諸傳，皆所不取。則此二篇亦當在芟汰之例矣。

突厥傳

號伊利俱盧，設莫何始波羅可汗。一號沙鉢略。予謂沙鉢略卽始波羅之轉，譯語無定字，非有兩號也。處羅侯竟立，是爲葉護。按：長孫晟傳，道晟持節拜處羅侯爲莫何可汗，雍閭爲葉護可汗，與此不同。

敍傳

信孫元曠，仕漢爲侍中，元曠弟仲翔，位太尉。按：晉書涼武昭王傳，稱仲翔漢初爲將軍，此云太尉者，誤也。漢初爲太尉者，惟盧綰、周勃、灌嬰三人。

除唐州下澧郡太守。按：隋志，西魏改澌西縣爲下澧，不言隋置下澧郡。

孝文初，除長安鎮都將，轉西汾州刺史。按：魏志無西汾州。

延寔以太保犯祖諱。

延實祖名實。而辭太保之官。猶唐人譏李賀父名晉肅。不當舉進士也。

廿二史考異卷四十一

唐書一

目錄

本紀第十。哀皇帝。濟陰王之弑也。朱溫諡之曰哀皇帝。本紀書昭宣光烈孝皇帝。則後唐追諡也。不用溫所諡。而稱後唐所加之諡。惡溫之篡弑也。然目錄仍書哀皇帝。諸列傳亦多稱哀帝。

志第一至第十二。舊唐書分禮儀音樂爲二。新史合爲一。

第十三。儀衛、選舉、兵志三篇。舊書無之。

第十四。車服。舊書作輿服。

第三十六至三十九。百官。舊書作職官。

第四十七至五十。藝文。舊書作經籍。

表第一至十五。宰相、方鎮、宗室、世系、宰相世系四篇。舊史皆無之。

列傳第一。武后。舊書有紀而無傳。新史於編年之外。別采事實爲傳。而不去本紀之目。較之沈既濟之說爲優。

- 第二、懿宗淑妃郭氏、恭憲皇后王氏、舊史皆無傳。
- 第三、李涵、李漢、李國貞、李暉、李齊物、李復、李說、舊史俱別傳、李從晦、李戡則新史增入。
- 第四、嗣號王巨、舊史別傳、新目錄不見巨名、脫文也、前史宗室諸王傳各依時代、與諸臣相次、李延壽南北史始彙列於諸臣之前、而唐以後史家皆因之。
- 第五、李恒、李皋、皋子象古、道古、舊史別傳、李之芳舊附蔣王暉傳。
- 第六、李景儉、舊史別傳、嗣薛王知柔、新史增入。
- 第八、舊書無公主一篇、平陽公主附柴紹傳、太平公主附外戚傳。
- 第十三、舊書以裴寂列功臣之首、今更以劉文靜居首、而寂次之、傳未附出諸人、亦承舊史、而增姜寶誼、元仲文、秦行師三人、馬三寶本附柴紹傳、亦移入此篇、劉義節卽世龍也。
- 第十四、唐次次子扶持、培子彥謙、舊史在文苑傳、段文昌子成式、舊史別傳。
- 第十五、劉崇望、崇龜、崇魯舊史別傳。
- 第十六、溫造子璋、舊史別傳、溫庭筠舊在文苑傳、崔善爲、李嗣真舊在方技傳、溫估、溫庭皓、新史增入。
- 第十七、李子和、舊史附梁師都傳、苑君璋附劉武周傳、王君廓附盧江王瑗傳。
- 第二十、高重、新史增入。

第二十一、舊書以杜元穎與孟簡、胡證諸人合傳。審權父子與卑誠、劉瞻、劉瑑、曹確諸人合傳。

第二十二、魏謩、舊史與李讓夷、周墀諸人合傳。

第二十四、樂彥璋、舊史別傳。今附出劉泊傳。李安靜、新史增入。

第二十五、權萬紀、懷恩蔣儼、章弘機、岳子姜師度、強循、張知審、舊史俱在良吏傳。案師度仕玄宗朝知

名。而知審兄弟仕宦乃在武后之世。先後亦稍失次。

第二十六、舊史蕭嵩父子與崔日用、張嘉貞、張九齡諸人合傳。蕭復與張鎰、劉從一、柳渾合傳。蕭俛兄

弟與令狐楚、牛僧孺、李石合傳。蕭遘與孔緯、章昭度、張濬諸人合傳。蕭定在良吏傳。

第二十七、姚璿、舊史別傳。

第二十八、蘇弁、舊史在儒學傳。

第二十九、于休烈、于敖、于琮、舊史別傳。龐嚴本附元微之傳。今亦移附此篇。張易之、昌宗雖爲行成族

孫。而人品清濁懸殊。當別立佞幸傳。與薛懷義輩合爲一篇。而新舊兩史俱附之行成傳。失懲勸之旨

矣。

第三十、長孫順德、舊史別傳。

第三十一、崔知溫、高智周、舊史在良吏傳。趙弘智舊在孝友傳。邢文偉、高子貢舊在儒學傳。劉從一舊

別傳目錄有杜求仁、石仲覽二人。仲覽初無事實，僅於高智周、來濟傳略見其名。本非附傳之體，不當列名目錄。且如蔣子慎及其子縉、孫挺、曾孫洌、玄孫鍊，銖俱附出智周篇中。若依仲覽之例，一一書之，不幾成點鬼簿乎？杜求仁事亦無多。又見徐敬業傳亦無庸列名目錄。蓋修史諸臣欲誇其搜羅之富，而濫書於附目者也。杜咸、趙來章，新史增入。

第三十二、陳子昂、王無競，舊史在文苑傳，趙元，新史增入。

第三十三、裴積、裴倩、裴均，新史增入。

第三十四、竇懷貞，舊史在外戚傳，祝欽明、郭山暉，舊在儒學傳，宗楚客，舊附蕭至忠傳，王珣，舊與李泌、崔造、關播等合傳，璵乃方慶六世孫，且係德宗朝宰相，而躡居方慶之前，殊為不倫。

第三十五、史大奈、馮子猷、契苾明、泉男生、泉獻誠、論弓仁，論惟貞皆舊史所無。李湛，舊附其父義府傳，今移附李多祚傳。

第三十六、薛訥、薛嵩，舊史俱別傳，王方翼，舊在良吏傳。

第三十七、王義方、蘇安恆、王求禮、蔣清，舊史在忠義傳，馮元、常元淑、蔣沈在良吏傳，員半千在文苑傳，柳澤，舊附曾祖亨傳，今反以亨附澤，竝附出從祖範、爽二人。夫史家之有附傳，如列國之附庸，年代以後從前，觀屬以卑附尊，斯為得之。澤仕開元時，而範、爽乃太宗高宗朝臣，先後殊乖刺矣。若以爽與褚

遂良、韓瑗、來濟同篇，而以範附之。或取範事入權萬紀傳，乃合史法。韓思彥、新史增入。

第三十八。徐彥若、舊史別傳，其父商事亦見彥若篇。

第三十九。舊史別立崔慎由傳，父從、伯父能、弟安潛能，子彥曾俱附焉。

第四十。郝處俊相高宗，狄仁傑、朱敬則皆相武后，不當列處俊於仁傑之後。

第四十一。王遂、韋弘景、舊書別傳，李日知舊在孝友傳，杜景佺、舊史作景儉，王搏、陸希聲則新史增入也。

第四十二。吉頊、舊史在酷吏傳，裴仙先、新史增入。

第四十三。韋見素、舊史別傳，以子諤、孫顓附焉。韋維、韓朝宗、宋務光、呂元泰皆新史所增，務光封事，舊

史五行志詳載之，今移入列傳，待其所矣。李渤、裴潏、李甘三人與張廷珪輩年代相隔，當別爲一篇，列于元和長慶朝臣之次。

第四十四。武平一、舊史無傳，賈曾父子舊在文苑傳，白居易與平一輩時代相隔已遠，而文章風節亦

復過之，當與韓愈同傳，而以敏中別入宰相之列。

第四十五。薛季昶、楊元琰、舊史在良吏傳，崔渙、袁高舊皆別傳，盧襲秀、崔禍、新史增入。

第四十七。韋叔夏舊在儒學傳，韋縉、新史增入。

第四十八 韋巨源、趙彥昭舊附韋安石傳、和逢堯舊附良吏傳。

第四十九 姚合、姚勛、舊史無。

第五十 蘇誥、蘇震、蘇幹、舊史無。

第五十一 杜鴻漸、韓滉、張仲方舊皆別傳、滉子皋、弟洸皆附滉傳。

第五十二 張延賞、舊史別傳、子弘靖、孫文規等附焉。

第五十三 許景先、席豫、齊濟舊在文苑傳、潘好禮、倪若水舊在良吏傳、齊抗舊別傳。

第五十四 裴守真、崔沔舊在孝友傳、嚴武、嚴綬舊皆別傳。

第五十五 楊嶠、宋慶禮、楊瑒、崔隱甫、李尚隱舊在良吏傳、裴諤、裴胄舊皆別傳。

第五十六 李峴舊附其兄峴傳、宗室宰相十一人、麟以屬疏、宗閔以朋黨、林甫以儉王、不入此篇、舊史

無此目。

第五十七 劉敦儒舊在忠義傳、柳芳舊附其子登傳、沈既濟舊附其子師傳、今以芳既濟標目、而以

其子附之、較舊史爲長、劉迅著述、已見於元德秀傳、不必更立傳也。

第五十八 郭英義、張獻誠舊皆別傳、獻恭、獻甫、照皆附獻誠傳。

第五十九 盧鉉舊在酷吏傳、今以事附見此篇、不當列名目錄。

第六十一。荔非、元禮、李國臣、張伯儀、白元光、陳利貞、侯仲莊、烏承玳諸人，皆新史增入者。

第六十二。郭承嘏舊史別傳。

第六十三。李嗣業、京兆人，非出於蕃落，舊史與馮盎、契苾何力輩同傳，殊非其倫。新史依時代列於李

郭之後，馬璘、李抱玉之前，亦較舊史爲長。

第六十五。呂誣舊在良吏傳，裴樞等之死，乃朱梁移鼎之漸，樞宜與陸扆、王溥諸人別爲一篇。

第六十六。崔瓘舊別傳。

第六十八。王正雅舊別傳，族孫凝附焉。薛珣舊在良吏傳，元結、戴叔倫、徐申皆舊史所無。

第六十九。裴茂舊別傳。

第七十。黎幹、庾準舊皆別傳，吳通玄舊在文苑傳，嚴郢舊史無。

第七十一。舊史有李吉甫傳，而無栖筠傳，考吉甫傳云：父栖筠，國史有傳，則是本有，而今失之也。

第七十二。王難得舊在外戚傳，卽王子顏之父也。馮河清舊附張鎰傳，李元素舊附李澄傳。

第七十三。張孝忠、田弘正、舊史與田承嗣同傳，李洎、劉澧、王承元、史孝章舊附其家傳，今皆別而出之。

所以獎忠義也。李惟簡乃心國家，亦當移入此篇。康日知、牛元翼舊史無。

第七十四。盧徵、李若初、于頔舊皆別傳。

第七十五、舊史有趙仁本傳。今附見其曾孫憬傳。

第七十六、陸長源、劉全諒、舊皆別傳。袁滋、舊在良吏傳。董溪事、新史增入。

第七十七、李絳、武元衡、當與杜黃裳等同傳。宋申錫亦當別見新史。特以相業不終，類而列之。究不若以時代分先後也。

第八十三、劉闢、當入叛臣傳。

第八十四、吳淩、柳晟、舊在外戚傳。閻濟、美、舊在良吏傳。樊宗師事、據韓退之墓志增入。

第八十五、劉伯芻、舊附其父迺傳。以今迺入忠義。而伯芻父子仍入列傳。崔龜從、舊別傳。

第八十六、徐岱、馮伉、舊在儒學傳。王仲舒、舊在文苑傳。庾敬休、舊在忠義傳。

第八十七、舊史有獨孤郁傳。而無及。顧少連、舊史無。

第八十八、孔緯、舊別傳。

第八十九、崔衍、丁公著、舊在孝友傳。薛萃、舊在良吏傳。盧景亮、王源中、舊史未見。

第九十、舊史有鄧覃傳。而無珣瑜。

第九十一、杜孺休、杜顛、新史增入。

第九十三、陸贄、舊在儒學傳。陳諫等四人附出叔文傳中。不當列名目錄。

第九十四、章溫舊別傳。

第九十五、任迪簡舊在良吏傳、郝玘、史敬奉舊皆別傳。

第九十六、李珙舊別傳、石洪據韓退之墓志增入。

第九十七、范傳正舊在良吏傳。

第一百、張又新舊附其父薦傳、新史以其名在入關十六子之列、故又別而出之、詞多重複、殊無謂也。

第一百一、皇甫湜、盧仝、賈島、劉叉皆新史所增、李翱、李漢亦可移入此篇。

第一百二、崔咸舊在文苑傳、韋表微舊在儒學傳、李景讓兄弟舊附李憺傳、鄭薰、敬晦、韋博皆新史所

增、舊有敬括傳、今附其子晦傳。

第一百三、劉蕢舊在文苑傳。

第一百四、盧商、夏侯孜舊別傳、蕭鄴、盧簡方、韋琮、裴坦、鄭延昌、王溥、盧光啓、韋貽範皆新史所增、予謂

蕭鄴、韋琮、王溥、盧光啓之徒、雖居宰相、初無表見、紀表已列其名、不必更爲立傳。

第一百八、韓偓、舊史無。

第一百十、王鐸舊附王播傳。

第一百十一、周寶、鄧處訥、雷滿、陳儒、劉巨容、馮行襲、趙德誼、楊守亮、楊晟、顧彥朗、彥暉皆舊史所無。

第一百十二。李罕之、王敬武、孟方立皆舊史所無。

第一百十三。楊行密、孫儒、舊史無。朱宣、舊史作瑄。

第一百十四。高仁厚、趙鑾、田頴、朱延壽、舊史皆無。

第一百十五。劉建鋒、成汭、杜洪、鍾傳、劉漢宏、張雄、王潮、劉知謙、舊史皆無。五季十國、惟行密、潮、知謙三人卒於唐世、故入唐臣之列。李茂貞、錢鏐皆終於後唐、故不入唐史。

第一百十六。王行敏、盧士叡、李育德、吳保安皆舊史所無。舊史忠義有王義方、蘇安恆、王求禮、今改入列傳。成三郎、尹元貞、俞文俊附見武后傳。馮立在敬君弘傳。燕欽融、郎崱在王同皎傳。

第一百十七。賈循、雷萬春、舊史無。賈隱林舊在列傳、今附於循傳。

第一百十八。張興、蔡廷玉、孟華、周曾、黃碣、孫揆皆舊史所無。舊史忠義有庾敬休、今改入列傳。甄濟入卓行傳。邵真附見藩鎮傳。趙驩舊史從日旁見其子宗儒傳。劉敦儒見其祖知幾傳。舊有符璘傳、今以其父

令奇標目而璘附之。

第一百十九。舊史無卓行之目。元德秀、司空圖在文苑傳。甄濟在忠義傳。陽城在隱逸傳。權皋見其子

德輿傳。又舊史陽城傳不見何蕃名。新史據韓柳二集附益之。

第一百二十。舊史孝友傳有趙弘智、裴守真、李日知、崔沔、崔衍、丁公著、今改入列傳。羅讓附其父珣傳。

第一百二十。舊史孝友傳有趙弘智、裴守真、李日知、崔沔、崔衍、丁公著、今改入列傳。羅讓附其父珣傳。

王君操、周智壽、智爽見張琇傳。智壽兄弟、舊史姓周、而新史作同歸、同歸、羌複姓、此必校書家不學、以同與周字形相似、而妄改耳。新史增任敬臣、支叔才、程袁師、武弘度、宋思禮、鄭潛曜、沈季詮、許伯會、侯知道、程俱羅、許法慎、林攢、陳饒奴、王博武、萬敬儒、章全益、一十六人。又於張琇傳末增趙師舉、徐元慶、余常安、梁悅康、買得五人。悅及買得、舊史刑法志存之。買得事又見於舊本紀。元慶事則采柳宗元文補入也。知道、俱羅二人本之李華二孝贊。傳末又載李興事、而取柳宗元孝門銘以實之。此諸人名宜著於目錄。序末有張士巖、焦懷肅、張進昭、張公藝四人、亦宜列目中也。舊史有許坦、今未見。

第一百二十一、孫思邈、孟詵、舊在方技傳。武攸緒在外戚傳。賀知章在文苑傳。舊史隱逸傳有王守慎、徐仁紀、孫處玄、王遠知四人。新史移遠知入方技篇、而刪去守慎、仁紀、處玄三人。增入朱桃椎、秦系、張志和、陸羽、陸龜蒙五人。盧鴻、舊史作盧鴻一。

第一百二十二、舊史良吏有崔知溫、高智周、韋機、權懷恩、馮元常、蔣儼、王方翼、薛季昶、張知謩、楊元琰、倪若水、楊嶠、宋慶禮、姜師度、強循、潘好禮、楊瑒、崔隱甫、李尚隱、呂誣、蕭定、蔣沈、薛珏、任迪簡、范傳正、袁滋、薛萃、閻濟美、新史改入列傳、而添羅珣、章丹、盧弘宣、薛元賞、何易于五人。章丹事采韓退之所撰墓志。何易于則采孫可之文也。舊史又有李君球、李潛、楊茂謙三人。新史刪去。以潛附見子麟傳。茂謙附章景駿傳。君球諫親征高麗事、見高麗傳。

第一百二十三。顏師古、孔穎達舊在列傳。賈大隱、公彥之子。舊史以公彥標目。今附張士衡傳。而以大隱題目。谷從政慷慨志士。當在忠義之篇。今附見儒學傳。似非其倫。

第一百二十四。徐堅、馬懷素舊在列傳。徐齊肅、孔若思舊在文苑傳。殷踐猷舊附韋述傳。沈伯儀、彭景直、張齊賢皆舊史所無。

第一百二十五。褚无量、元行沖舊在列傳。徐安貞、陳貞節、施敬本、盧履冰、王仲邱、康子元、侯行果、趙冬曦、尹愔、陸堅、鄭欽說、盧饌、啖助、韋彤、陳京、暢當、林蘊皆舊史所無。敬本、履冰、仲邱、子元皆取舊禮儀志之文。京議禘祫一篇。亦多取禮儀志文。惟增入韓愈、王權二議耳。欽說傳惟載鍾山廣銘一事。然梁大同四年。任昉卒已久。小說荒誕之談。何足采錄乎。舊儒學有邢文偉、高子貢、韋叔夏、祝欽明、郭山暉、徐岱、蘇弁、陸質、馮伉、韋表微。新史皆改入列傳。舊列傳有暢瓘。今附子當傳。

第一百二十六。舊史有文苑篇。今易爲文藝。舊以劉胤之標目。新史改以延祐標目。蓋避宋諱也。舊以杜審言附易簡。今以易簡附審言。杜甫舊在別卷。今移附審言之下。舊文苑有張繡古。今附見謝偃傳。第一百二十七。呂向、鄭虔、蘇源明皆舊史所無。李適子季卿。據舊史爲宰相。李適之子。考宰相世系表。適之子名詵。不名季卿。則舊史誤也。王翰。舊史作澣。此刊本之譌。

第一百二十八。劉太真、邵說、于邵、崔元翰、于公異、李益、李賀舊在列傳。盧綸舊附其子簡辭傳。吳武陵

舊附兄子汝納傳。李觀、歐陽詹、李頻、吳融皆舊史所無也。舊史文苑有郭正一、員半千、陳子昂、賈會、許景先、席豫、齊澣、吳通玄、王仲舒、崔咸、劉蕡、唐次、溫庭筠。新史改入列傳。徐齊聃入儒學傳。賀知章入隱逸傳。元德秀、司空圖入卓行傳。孔紹安附見儒學傳。李巨川附見叛臣傳。李拯附見列女傳。又有孟利、真、董思恭、元思敬、鄧玄挺、喬知之。新史俱刪。

第一百二十九。李淳風舊在列傳。王遠知舊在隱逸傳。杜生、姜撫則舊史所無。舊史方技有崔善爲、李嗣真。新舊改入列傳。孫思邈、孟詵入隱逸傳。僧玄裝、神秀一行則新史刪之。一行造大衍曆議及山河兩戒說則天文曆志詳載之矣。舊史列傳有傅仁均。今附見淳風傳。

第一百三十。房玄齡妻、李奮母、汴女李堅貞、節婦李符鳳妻、玉英、高叡妻、秦、王綝妻、章、盧惟清妻、徐饒娥、金節婦、高愍女、楊烈婦、賈直言妻、董、李孝女、妙法、段居貞妻、謝、楊含妻、蕭、鄭孝女、李廷節妻、崔、殷保晦妻、封、竇烈婦、山陽女、趙、周迪妻、朱延壽妻、王、皆舊史所無。李拯妻、盧、舊史附見拯傳。新書刪拯。而以盧入列女。此其異也。予謂楚王靈龜之妃、房玄齡、高叡、賈直言之妻、李奮之母、皆可附見列傳。史家誇多，分爲二科爾。舊史列女有魏衡妻王氏。新史附薛仁杲傳。女道士李玄真。附越王貞傳。又有宋庭瑜妻魏氏。今檢未見。

第一百三十一。武士彠、楊國忠、李儵舊在列傳。鄭光、舊史所無。光薨、罷朝兩日。則舊史李景讓傳見之。

舊外戚有竇懷貞、吳湊、柳晟。新史改入列傳。竇德明附見竇德玄傳。長孫敞附見長孫无忌傳。王子顏附見王難得傳。吳淑入忠義傳。惟竇覲一傳，新史刪。

第一百三十二。馬存亮、嚴遵美，舊史無。仇士良舊附王守澄傳。劉季述、韓全誨舊附楊復恭傳。劉貞亮即俱文珍也。

第一百三十三。劉克明，舊史無。案宦者十六人，當以時代先後爲次。李輔國宜在程元振之前，王守澄宜在仇士良之前，田令孜宜在楊復光之前。

第一百三十四。崔器舊在列傳。舊酷吏有吉頊，傳游藝。新史以頊入列傳。游藝入姦臣傳。

第一百三十五。舊史無藩鎮之目。新史別立此編，列于四裔之前，所以深惡之。

第一百二十七。劉仁恭，舊史無。

第一百三十九。李祐、董重質，舊史有傳。當附李愬傳末。不應入藩鎮篇。

第一百四十二。薛延陀，舊史稱鐵勒。與骨利幹、白霽、烏羅渾別入北狄篇。拔野古、僕骨、同羅、渾、契苾、多覽、葛、阿跌、葛邏祿、拔悉密、都播、斛薛、黠戛斯皆舊史所無。

第一百四十三。沙陀，舊史無傳。新史以國昌父子之故，特立此篇。然克用有功唐室，不當以沙陀目之。且其後嗣遂有天下，當從魏武、晉宣、齊神武、周文之例，入五代史本紀，則不列於唐書可也。

第一百四十五。流鬼、舊史無。

第一百四十六上。東女舊在南蠻傳。朱俱波甘棠喝盤陀摩揭陀烏茶章求拔悉立皆舊史所無。拓拔

思恭、舊史亦無傳。今附黨項篇。

第一百四十六下。安東安東曹西惠中惠石米何火尋史小史寧遠小勃律舊史闕實下附見勃律國即大勃律也吐火

羅謝颺識匿箇失密骨咄蘇毗師子皆舊史所無。蓋舊史於西域南詔甚疏略。不知新史之該備。

第一百四十七中。六詔惟蒙舍最強。蒙嶲越析浪穹遼賧施浪五詔事。舊史不載。而新史有之。

第一百四十七下。扶南投和瞻博室利佛逝名蔑單兩蠻蠻。烏白蠻、昆明蠻、西原蠻皆舊史所無。

第一百四十八上。舊史無姦臣之目。傳游藝舊在酷吏傳。

第一百四十八下。蔣玄暉、張廷範、氏叔琮、朱友恭皆舊史所無。

第一百四十九上。舊史無叛臣之目。李錡舊附其父國貞傳。

第一百四十九下。朱玫、王行瑜、陳敬瑄皆舊史所無。李巨川舊在文苑傳。

第一百五十上。舊史以安祿山、史思明、朱泚、黃巢、秦宗權五人附高尙孫孝哲殿卷末。而不題逆臣之目。蓋倣

漢王莽、晉王敦、桓玄、梁侯景之例也。新史又益李希烈、董昌二人。皆僭帝號者。

第一百五十中。舊史列傳有姚令言、張光晟、源休、喬琳、蔣鎮、洪經綸、彭偃七人。皆仕朱泚者。新史以令

言、休、光、晟、偃四人附泚傳。而別立喬琳傳。附以鎮與張涉。入諸叛臣之列。經綸僅於泚傳一見而已。此義例之勝於舊史者。彭偃議僧道避役之弊。其言可采。則於李叔明傳附見之。

廿二史考異卷四十二

唐書二

高祖紀

左才相起齊郡，號博山公。唐初羣雄割據，四十八人或滅或降，皆見於本紀。惟才相後事失書，亦紀之疏也。

周文舉據淮陽，號柳葉軍。案紀於武德四年十一月，書杞州人周文舉殺其刺史王孝矩，叛附於黑闥。五年二月，書汴州總管王要漢敗徐圓朗於杞州，執周文舉，豈別有一文舉乎？抑已降而復叛乎？若文舉於武德四年始叛，又不當預書於此也。

張長慈據五原，慈古遜字，列傳作長遜。

武德元年五月，命蕭造兼太尉。唐會要：造官太保，梁國公。諡曰安。

三年九月，梁師都寇延州，鄜州刺史梁禮死之。唐會要：禮贈麟州總管，鄜城郡公。諡曰壯。

四年六月，營州人石世則執其總管管文衍。唐會要：文衍贈禮部尚書，魏郡公。諡曰恭。

六年三月，左難當降。唐會要：難當封戴國公，贈左武衛大將軍。諡曰剛。

十一月張善安襲殺黃州總管周法明。唐會要法明贈幽州都督道國公諡曰懿。

太宗紀

貞觀二十一年三月左衛大將軍牛進達爲青邱道行軍大總管。忠義傳作左衛大將軍唐會要進達封琅邪郡公贈幽州都督諡曰壯。

二十三年五月皇帝崩於含風殿年五十三。案唐會要太宗以隋開皇十八年十二月戊午生於武功別館武德九年八月即位年二十七貞觀二十三年五月二十六日崩於翠微宮含風殿年五十二傳云五十三誤也。

高宗紀

顯慶元年龜茲大將羯獵顛附於賀魯左屯衛大將軍楊胄伐之。唐會要胄封新城縣侯諡曰壯。五年八月左武衛大將軍鄭仁泰及悉結拔也固僕骨同羅戰敗之。唐會要仁泰封同安郡公贈代州都督諡曰襄拔也固亦作拔野古又作勃曳固。龍朔二年二月任雅相薨。唐會要贈荊州大都督樂安縣男諡曰敬。

武后紀

光宅元年十月追諡考魏王曰忠孝。案后妃傳追贈五代及諡獨不及忠孝之諡其上文云后見宗廟。

再贈士彥至司徒。爵周國公。諡忠孝。是士彥之諡忠孝。乃在高宗朝。不在武氏臨朝時也。

永昌元年十月。殺嗣鄭王璒。案高祖諸子傳。璒薨。子希高嗣。不云武后殺之。

長安五年正月。庫部員外郎朱敬則。此別一敬則。

檢校司農少卿兼知總監翟世言。李憺傳未載功臣。有殿中監兼知總監。汝南郡公翟無言。卽其人也。唐人諱世字。當作無言爲是。

睿宗紀

景雲元年七月。追廢安樂公主爲勃逆庶人。勃卽悖字。

玄宗紀

開元二十六年三月。吐蕃寇河西。崔希逸敗之。唐會要。希逸官至河南尹。博陵縣公。諡曰成。天寶十四載十一月。右羽林軍大將軍王承業爲太原尹。唐會要。承業贈太子少傅。諡曰襄。

肅宗紀

至德元載七月。安祿山寇扶風。太守薛景仙擊敗之。唐會要。景仙贈太子少傅。諡忠烈。

代宗紀

廣德元年六月。同華節度使李懷讓自殺。唐會要。贈司空。諡曰勇。

十一月廣州市舶使呂太一反。唐有兩呂太一。魏知古傳。薦洹水令呂太一。後有聞於時。張嘉貞傳。薦中書舍人苗廷嗣。呂太一考功員外郎員嘉靜。殿中侍御史崔訓。所謂令君四俊。苗呂崔員是也。章倫傳。宦者呂太一反嶺南。杜子美詩云。自平宮中呂太一。卽爲市舶使者。

十四年五月辛酉崩。年五十三。案唐會要。代宗以開元十四年十月十三日生。年五十四。

德宗紀

建中四年三月。李希烈寇鄂州。刺史李兼敗之。唐會要兼贈刑部尚書。諡曰昭。

文宗紀

太和元年。太當作大。予見唐石刻。書文宗年號。皆是大字。與魏明帝。晉海西公。後魏孝文。吳楊溥稱太和者各別。今刊本新舊史皆誤爲太矣。

四年正月甲午。王播薨。宰相奏失書。

開成三年十月。義武軍節度使張璠卒。其子元益自稱留後。案裴度傳。易定節度使張璠卒。軍中將立其子元益。度遣使曉譬禍福。元益懼。束身歸朝。如傳所言。則元益未嘗自稱留後。紀所書失其實矣。若從紀所書。則元益初未束身歸朝。度在河東。雖嘗遣使於事無濟。不足書也。二者恐有一誤。

宣宗紀

大中九年正月，成德軍節度使王元逵卒，其子紹鼎自稱留後。潞鎮傳作大中八年。

懿宗紀

大中十三年十二月，翰林學士承旨、兵部侍郎杜審權同中書門下平章事。案舊書本紀是歲十二月，以戶部侍郎、翰林學士杜審權爲檢校禮部尚書、河中晉絳節度等使。咸通元年二月，以河中節度使杜審權爲兵部侍郎、判度支，尋以本官同平章事，與此紀除授年月不合。

僖宗紀

乾符四年四月，江西賊柳彥璋陷江州，執其刺史陶祥。高安制置使鍾傳陷撫州。鍾傳傳自稱高安鎮撫使。予案新史本紀以簡要勝，獨僖昭二篇，錄冗重複，與它卷迥別。蓋刊修諸公誇其采訪之富，欲求勝於舊史，而不知其錄而無當也。今約其事類可省者數端，蓋自黃巢竊以後，豪雄蠭起，逐主將而并其軍，殺長吏而佩其印，朝廷卽因而授之，覆轍相循，亡不旋踵。若時溥、成汭、杜洪、劉建鋒竊據大藩，王建、王潮、馬殷、劉隱、肇、啓、霸業，固宜列名帝紀。此外或據一州，或殺一將，鼠竊狗偷，曾何足算，而紀必一一書之。如乾符四年，江西賊柳彥璋陷江州，執其刺史陶祥。五年，朗州賊周岳陷衡州，逐其刺史徐顯，石長蠻向瓌陷澧州，權知州事呂自牧死之。桂陽賊陳彥謙陷郴州，刺史董岳死之。中和元年，鄆賊鍾季文陷明州，臨海賊杜雄陷台州，永嘉賊朱褒陷温州，遂昌賊盧約陷處州之類，此可省者一也。方

鎮交爭日尋干戈。疆場之地一彼一此。或叛而復降。或失而又得。苟於大局無損。自可置之不論。而紀必一一書之。如蘇常潤三州爲淮南吳越交爭之地。紀所載者。光啓二年正月。鎮海軍將張郁陷常州。五月。武寧軍將丁從實陷常州。逐其刺史張郁。十月。武寧軍將張雄陷蘇州。三年四月。六合鎮遏使徐約陷蘇州。逐其刺史張雄。十月。錢鏐陷常州。文德元年。錢鏐陷潤州。龍紀元年三月。錢鏐陷蘇州。逐刺史徐約。十月。楊行密陷常州。刺史杜稜死之。錢鏐陷潤州。十二月。孫儒陷常潤二州。大順元年七月。楊行密陷潤州。八月。錢鏐殺蘇州刺史杜儒林。楊行密陷蘇州。孫儒陷潤州。九月。楊行密陷潤常二州。閏月。孫儒陷常州。二年正月。甘露鎮使陳可言陷常州。錢鏐陷蘇州。景福元年二月。錢鏐陷蘇州。三月。楊行密陷常州。刺史陳可言死之。二年二月。楊行密陷常州。乾寧三年五月。楊行密陷蘇州。執刺史成及。光化元年九月。錢鏐陷蘇州。自光啓丙午。至光化戊午。首尾十有三年。書蘇事者九。書常事者十。書潤事者六。此可省者二也。河北諸鎮。自相承襲。例書於本紀。所以著王綱之替也。至光啓文德以後。土宇瓜分。各私所據。不特強藩專命。卽一州刺史。亦皆私相授受。方鎮旣例所宜書。刺史自可從略。紀於景福元年。明州刺史鍾文季卒。其將黃晟自稱刺史。二年。昇州刺史張雄卒。其將馮弘鐸自稱刺史。乾寧二年。衢州刺史陳儒卒。其弟岌自稱刺史。光化三年。睦州刺史陳晟卒。其弟詢自稱刺史。天復二年。温州刺史朱褒卒。其兄教自稱刺史。岳州刺史鄧進思卒。其弟進忠自稱刺史。皆一一書之。此可省者三。

也。鹿晏弘、張瓌、鄧處訥、蔡儵、蔡結、陳彥謙、魯景仁之流。或起偏裨。或由羣盜。以攘竊而有其地。又不能守而見殺。既無撫馭之才。亦無節義足錄。此死之輕於鴻毛者。而乃與張巡、許遠諸人書法一例。於褒貶之義何在。愚謂方鎮見殺。當以兩下相殺爲文。此外失地而死者。姓名已具列傳。本紀何必更書。此可省者四也。強藩擅命。各樹私人。背舊歸新。例皆書叛。平心以揣。實多冤抑。如黃巢、董昌身爲戎首。附之者目爲叛臣宜矣。若乃建汀之附王潮閩。蓬渠通果。遂合之附王建。惟強是從。初非得已。朝廷尙予以節旄。乃復責鄰郡以死守。揆諸情理。未得其平。劉鄩請命師範。而後納降。此事古人所取。尤未可詆爲叛也。又如光化元年。衢州刺史陳岌叛。附於楊行密。三年。衢州刺史陳岌叛。附於錢鏐。一人而再書叛。要皆無足重輕。徒費筆墨。此可省者五也。

五年二月。雲中守捉使李克用殺大同軍防禦使段文楚。案沙陀傳載此事在乾符三年。與紀自相牴牾。以舊書懿宗紀考之。蓋在咸通十三年十二月也。新史懿宗紀。咸通十四年正月。沙陀寇代北。正克用殺文楚以後事。

六年。朗州賊周岳陷衡州。逐其刺史徐顥。荆南將雷滿陷朗州。刺史崔蠹死之。石門蠻向瓌陷澧州。權知州事呂自牧死之。桂陽賊陳彥謙陷郴州。刺史董岳死之。此四事已具鄧處訥傳。又廣明元年。江華賊蔡結陷道州。宿州賊魯景仁陷連州。亦見處訥傳。而紀又書之。皆重出也。

廣明元年正月，秦寧軍將段彥善殺其守將宋浩，以常滋爲節度留後。案彥善所殺者，荆南守將，其爲留後者，亦荆南之留後也。紀不書荆南，蓋闕文。考陳儒傳及通鑑，未見有常滋其人者。

中和元年五月，克用寇太原，振武軍節度使契苾璋敗之。鄭從讜傳作契苾通。

九月，鄭延節度使李孝章。案黨項傳作李孝昌，黃巢傳前書孝昌，後書孝章。鄭畋傳作李孝恭。

二年十月，韓簡寇鄆州，天平軍節度使曹全戩死之。部將崔用自稱留後。據通鑑，則全戩死於賊，非死於韓簡，且全戩死後，軍中立其兄子存實爲留後，初無崔用其人者。蓋傳聞之譌。因乾符五年有崔君裕自立事，而附會之耳。

三年二月，魏博軍亂，殺其節度使韓簡，其將樂彥禎自稱留後。案藩鎮傳，韓簡攻河陽，爲諸葛爽所敗，奔歸，疽發背死。紀云軍亂見殺者，誤也。彥禎以中和三年癸卯有魏博，至文德元年戊申見廢，先後祇跨六年，而藩鎮傳云彥禎起凡七年，亦誤也。韓簡之死，舊本紀亦在中和三年二月，惟舊列傳云元年十一月，此舊傳之誤。又河朔諸鎮自立，皆書於本紀，乃是年成德軍節度使王景崇卒，子鎔自稱留後，紀獨失書何也。

十二月，忠武軍將鹿晏弘逐興元節度使牛勛，自稱留後。牛勛，田令孜傳作牛頊。五代史韓建傳作牛叢，舊本紀作牛蔚。蔚，叢皆僧孺之子。蔚嘗爲山南西道節度使。即興元忤中官，以神策將吳行魯代還，不

云爲晏弘所逐也。

四年。濮州刺史朱宣逐天平軍節度使曹存實。自稱留後。案朱宣及藩鎮傳俱云存實與韓簡戰死。宣無逐帥之事。紀既誤以與韓簡戰死屬之全晟。因謂存實爲宣所逐。此疏舛之甚者。

光啓元年四月。武當賊馮行襲陷均州。逐其刺史李燁。劉巨容傳。李作呂。

二年十一月。秦宗權陷鄭州。十二月。秦宗權陷孟州。時孫儒爲宗權將。既取河陽。州。自稱節度使。

三年五月。秦宗權陷鄭州。六月。陷孟州。此事已見上年。蓋重出也。其時宗權爲朱全忠所敗。孫儒亦棄

河陽而遁。故李罕之得入孟州。史因罕之事。而追敘鄭孟二州之陷。竟不檢照前文。亦太疏矣。以此推之。紀所書年月。未必盡可信也。

十月。錢鏐殺周寶。五代吳越世家。鏐遣杜稜等攻常州。取周寶以歸。鏐具軍禮郊迎。館寶於樟亭。寶病卒。不云爲鏐所殺也。

十二月。饒州刺史陳儒陷衢州。是時有兩陳儒。中和二年。荆南軍亂。牙將陳儒自稱留後。此江陵人陳儒也。此陷衢州者。乃舒人陳儒也。

昭宗紀

龍紀元年六月。楊行密陷宣州。宣歙觀察使趙鏐死之。楊行密傳稱刺史趙鏐。蓋觀察使例兼本州刺

史也。

十月錢鏐陷潤州。案文德元年已書鏐陷潤州矣。不應於此更書。當是楊行密取常州之後。乘勝又取

潤州。而紀誤以為鏐也。通鑑是年冬孫儒將劉建鋒逐成及取潤州此錢鏐或孫儒之譌

大順二年正月甘靈鎮使陳可言。楊行密傳作陳可兒。

七月李克用陷雲州。防禦使赫連鐸奔於退渾。退渾即吐渾也。本吐谷渾。語急為吐渾。吐退聲相近。

景福元年二月錢鏐陷蘇州。上年正月已書鏐陷蘇州。此重出。

是歲明州刺史鍾文季卒。僖宗紀。劉漢弘傳俱作季文。

二年二月楊行密陷常州。上年三月已書行密陷常州。此亦重出。史能之毗陵志亦以紀為無據。

乾寧元年九月李克用陷潞州。昭義軍節度使康君立死之。案潞州久屬河東。君立之節度即克用所

授。以忤旨見殺。初未用兵。不當書陷。

二年七月戊午。匡國軍是年升同州為匡國軍節度使王行約奔於京師。庚申。左右神策軍護軍中尉駱全權。劉景

宣。指揮使王行實。李繼鵬。反。行在沙城。案兵志。李克用以其兵伐行瑜等。同州節度使王行實入迫

神策中尉駱全權。劉景宣。及子繼晟。汲古閣本無子字誤與行實縱火東市。又宦者傅克用率師討茂貞。次渭北。

同州節度使王行實奔京師。謂景宣等曰。沙陀十萬至矣。請天子出幸避其鋒。景宣方與茂貞睦。脅帝

狩岐。行實及景宣子繼晟縱火剽東市。帝懼。暮出莎城。又王行瑜傳。行瑜留弟行約宿衛。克用悉兵度河。問行瑜等罪。行實棄同州。趨長安。與行約謀劫乘輿。又不克。皆奔邠州。以兵志及二傳參考之。行實行約均行瑜之弟。其爲同州節度者。則行實非行約也。行約先留宿衛。或卽爲神策軍指揮使。亦未可知。紀云指揮使王行實。疑行約之誤爾。紀書反者有李繼鵬。而宦者傳云劉繼晟。未審卽一人否。

是歲。安州防禦使宣晟陷桂州。靜江軍節度使周元靜部將劉士政死之。案劉建鋒傳稱馬殷收邵衡。永道郴連六州。進攻桂管。執留後劉士政。五代楚世家亦云。乾寧三年。馬殷遣其將秦彥暉、李瓊等。攻連邵郴衡道永六州。皆下之。桂管劉士政懼。遣其將陳可璠、王建武等。率兵守全義嶺。殷遣使聘於士政。使者至境上。可璠等不納。殷怒。遣瓊等以兵七千攻之。擒可璠等。遂圍桂管。虜士政。盡取其屬州。則是士政嘗爲靜江節度。非周元靜部將。且爲馬殷所執。初未死於宣晟也。紀書於乾寧二年。其時馬殷尙未據有湖南。與建鋒傳自相矛盾矣。及考通鑑。乃知是年宣晟襲殺周元靜。而奪其地。士政乃晟部將。又殺晟而代之。紀文顛倒錯亂。恐係傳寫之譌。當云靜江軍節度使周元靜死之。其部將劉士政殺晟。自稱知軍府事。乃得其實。此紀云宣晟通鑑作家晟。未知孰是。至劉士政之見執。乃在光化三年。本紀載光化三年。馬殷陷桂宜巖柳象五州。卽其事也。五代世家係之乾寧三年。亦未然。

三年十一月。忠國軍節度使李師悅卒。其子繼徽自稱留後。繼徽通鑑作彥徽。此紀天復元年。有靜難

軍節度使李繼徽則別是一人。乃李茂貞養子。卽楊崇本也。

四年九月。靜難軍節度使李思諫。思諫本夏州節度使。當云定難軍。靜難則邠寧軍號也。考通鑑。乾寧

三年九月。以前定難節度使李思諫爲靜難節度使。兼鳳翔四面行營副都統。蓋其時方下詔討李茂貞。因以邠寧節授之。至四年正月。以李思諫爲寧塞節度使。則以赦茂貞故。更以延州節授之。而邠寧又爲茂貞所有矣。此又討茂貞故。仍以靜難節度授思諫。其實邠寧爲茂貞守。思諫不能有之也。

光化元年五月。馬殷陷邵衡永三州。刺史蔣勛。楊師遠。唐旻死之。蔣勛三人之死。已見鄧處訥傳。紀不必更書。唐旻處訥傳作唐行旻。

七月。朱全忠陷隋州。執刺史趙匡璘。八月。陷鄧州。執刺史國湘。匡璘二人見執。已見趙德諱傳。紀不必書。

二年十一月。馬殷陷郴連二州。刺史陳彥謙。魯景仁死之。彥謙二人之死。亦見鄧處訥傳。

天復二年九月。武定軍節度使拓拔思恭叛附於王建。五代蜀世家作思敬。思敬蓋夏州節度拓拔思


恭之弟。初爲保大軍節度。不知何時徙鎮武定也。宋人避諱。往往改敬爲恭。遂與思恭二名相溷。五代史李仁福傳。竝夏州之思恭。亦誤改爲思敬矣。

三年正月。崔胤及朱全忠殺中官七百餘人。案宦者傳稱誅第五可範等八百餘人。

天祐元年正月乙巳。崔胤罷。己酉。朱全忠殺太子少傅崔胤。及京兆尹鄭元規。威遠軍使陳班。舊本紀在天復三年十二月。又舊紀胤責授太子賓客。而此云少傅。陳班官飛龍使。而此云威遠軍使。皆小異。

昭宣帝紀

天祐二年正月。楊行密殺平盧軍節度使安仁義。仁義守潤州。以刺史充本州團練使。紀云平盧軍節度。似誤。或行密承制遙授也。



廿二史考異卷四十三

唐書三

禮樂志

太宗時中書令房玄齡、秘書監魏徵、與禮官學士等。藝文志長孫无忌、房玄齡、魏徵、李百藥、顏師古、令

狐德棻、孔穎達、于志寧等撰。

爲吉禮六十一篇。藝文志作六十篇。案五禮篇數已載禮樂志。又載藝文志。去此存彼可也。

高宗又詔太尉長孫无忌、中書令杜正倫、李義府、中書侍郎李友益、黃門侍郎劉祥道、許圜師、太子賓客

許敬宗、太常卿韋琨等增之。案藝文志無杜正倫、李友益。而有博士蕭楚材、孔志約。又許敬宗不稱

太子賓客。而稱侍中。列於李義府之前。

乃詔集賢院學士右散騎常侍徐堅、左拾遺李銳、及施敬本等撰述。麻年未就。而銳卒。吳樞云張說卒蓋

說爲蕭嵩代銳爲學士。奏起居舍人王仲邱撰定。案藝文志無徐堅。而有賈登、張烜、陸善經。

寶應元年。太常卿杜鴻漸、禮儀使判官薛頎、歸崇敬等。請以太祖郊配天地。諫議大夫黎幹爲十詰十難

以非之。此事又見黎幹傳。

神龍元年議立始祖爲七廟而議者欲以涼武昭王爲始祖太常博士張齊賢議以爲不可齊賢議亦見本傳意同而文異劉承慶尹知章之議已見此志而復載於齊賢傳此重出也

睿宗崩博士陳貞節蘇獻等議孝和皇帝宜出爲別廟耐睿宗以繼高宗此議又見貞節傳而文亦異開元十年詔宣皇帝復祔於正室諡爲獻祖竝諡光皇帝爲懿祖案本紀開元十一年八月戊申追號

宣皇帝曰獻祖光皇帝曰懿祖此云十年誤也又獻懿者二祖之廟號志稱諡亦誤

建中二年太學博士陳京請爲獻祖懿祖立別廟至禘祫則享案陳京顏真卿裴郁李鏐柳冕裴樞諸人議獻懿二祖遷祔之說又見陳京傳而傳文較詳

貞元十七年太常卿裴郁議陳京傳作七年

司勳員外郎裴樞此又一裴樞非昭宗朝宰相也

高宗卽位景雲見河水清張文收采古誼爲景雲河清歌亦名燕樂案杜氏通典貞觀中景雲見河水清協律郎張文收製景雲河清歌册府元龜載在貞觀十四年志誤以爲高宗時

車服志

皇太子將釋奠有司草儀注從臣皆乘馬著衣冠左庶子劉知幾議曰古大夫乘車以馬爲駢服魏晉駕牛車如李廣北征解鞍憩息馬援南伐據鞍顧盼則鞍馬行於軍旅戎服所便江左尙書郎乘馬則御

史治之顏延年罷官騎馬出入世稱放誕近古專車則衣朝服單馬則衣褻服皇家巡謁陵廟冊命王公則盛服冠履乘路車士庶有以衣冠親迎者亦時服箱其餘貴賤皆以騎代車比者法駕所幸侍臣朝服乘馬今既舍車而冠履不易何者褻衣博帶革履高冠車中之服也轡而鐙跳而乘非惟整古亦自取驚蹶謂乘馬衣冠宜省太子從之編於令案知幾傳亦載此事凡一百八十餘言當去彼存此

麻志一

戊寅麻章歲六百七十六章閏二百四十九案劉焯皇極術歲率六百七十六月率八千三百六十一除去經月八千一百一十二是六百七十六年有二百四十九閏也仁均之率與皇極同較古法十九年七閏之數稍弱

麻志三上

開元九年麟德麻暑日蝕比不效詔僧一行作新麻案麟德術以日蝕不效詔一行改造乃開元十二年七月十三年十二月暑日蝕皆不蝕一行亦無法以御之詭云君德動天不俟終日可見推步之難而臺官以是貢諛亦可嗤也

僖公五年正月辛亥朔日南至以周麻推之入壬子節第四章以辛亥一分合朔冬至案五經算術云周麻上元丁巳至魯僖公五年丙寅積二百七十五萬九千七百六十九算以元法去之餘歲九百六

十九。滿蓊法而一。得積蓊十二蓊。餘五十七。是爲入壬子蓊。五十八年卽第四章首也。置入蓊年減一。以章月乘之。如章歲而一。得積月七百有五。無閏餘。是冬至與朔同日也。又以蓊日乘積月。如蓊月而一。得積日二萬八百一十九朔。小餘九百四十分之二百三十五。即四分以六十去積日。得大餘五十九。起壬子算外。得天正合朔冬至在辛亥日。加時在卯。故云辛亥一分。

昭公二十年二月己丑朔。日南至。周麻得己丑二分。殷麻得庚寅一分。案。自僖公五年。至昭公二十年。凡一百三十四歲。以周術推之。入庚午蓊第三章。以殷術推之。入辛卯蓊第四章。殷周兩術皆同四分之一分之法。入蓊第一章首無餘分。第二章首大餘三十九。小餘三。第三章首大餘十九。小餘二。第四章首大餘五十九。小餘一。故據周術。則冬至在己丑日二分。據殷術。則冬至在庚寅日一分也。

以元始麻氣分二千四百四十三爲率。元始術。涼趙歇所造。後魏初嘗用之。

以皇極麻氣分二千四百四十五爲率。案。劉焯皇極術。氣日法四萬六千六百四十四。歲數千七百三萬六千四百六十六半。以氣日法除歲數。得三百六十五日。小餘一萬一千四百有六半。以萬分通小餘。滿氣日法。得二千四百四十五有奇也。古術家所立日法各殊。其歲餘之強弱亦異。一行欲齊其率。乃設萬分爲通法。以通其小餘。而各以日法除之。然後古今歲實之強弱。一覽可知。如大衍麻通法三千四十歲。餘七百四十三。以萬分通歲餘。滿通法而一。得二千四百四十四有奇。故云新麻以二千四

百四十四爲率，餘皆放此。

迺因劉洪紀法，增十一年以爲章歲，而減閏餘十九分之一。元始術以六百爲章歲，六百歲中經月七千二百，閏月二百二十一，而餘分俱盡。較祖沖之三百九十一年百四十四閏之率稍強，若依十九年七閏舊率，則八章第十一年尚有閏餘十九分之一，故云減閏餘十九之一也。

秦顛項厯元起乙卯，漢太初厯元起丁丑，推而上之，皆不值甲寅，猶以日月五緯復得上元本星度，故命曰闕逢攝提格之歲，而實非甲寅。案秦術今已不傳，漢太初術元起丙子，東漢以後，太歲不用超辰之法，因命爲丁丑，非太初本法也。史記太初元年，歲名闕逢攝提格，漢志亦云復得闕逢攝提格之歲，蓋當時以歲陰所在紀歲，而太歲自在丙子，歲陰與太歲皆四千六百一十七年而一周，而根原各別，竊意顛項術起甲寅者，亦是太陰之元，其云起乙卯者，乃太歲積年，當時亦必用超辰之數，後人追命爲乙卯耳。東漢以後，術家不知以太陰紀年，又不知太歲當超辰，一行欲彌縫其闕，乃云以日月五緯復得上元本星度，故命曰闕逢攝提格之歲，其實不然也。

南北之揆七月，月當作同。

古厯冬至昏明中星去日九十二度，春分秋分百度，夏至百一十八度。案四分及祖沖之術，冬至昏明中星大率去日八十二度，此云九十二度，疑誤。

魯宣公十五年丁卯歲。顓頊第十三部首。案。顓頊術已不傳。依此文。則宣公十五年。距上元九百一十二算。其元首在春秋前七百八十四年乙卯歲也。術家多上溯開闢。此獨始於殷代。故云斷取近距。凡三百八十歲。得顓頊麻壬申部首。案。術家皆起冬至。以甲子日爲部首。其二十部名見於續漢志。惟顓頊術起立春。以己巳日爲部首。其二十部之名。一己巳、二戊申、三丁亥、四丙寅、五乙巳、六甲申、七癸亥、八壬寅、九辛巳、十庚申、十一己亥、十二戊寅、十三丁巳、十四丙申、十五乙亥、十六甲寅、十七癸巳、十八壬申、十九辛亥、二十庚寅。自宣公十五年丁卯歲入丁巳部。至秦始皇三十二年丙戌歲終五部。故次年入壬申部也。

自此推僖公五年。魯麻以庚戌冬至。案。魯術元起庚子。其積年之數未聞。難以布算。據上文。氣議云。魯麻南至。又先周麻四分日之一。而朔後九百四十分日之五十一。故僖公五年辛亥爲十二月晦。壬子爲正月朔。是魯術推僖公五年冬至在壬子矣。而此云以庚戌冬至。前後自相矛盾。又合朔議云。僖公十六年正月戊申朔。與殷麻魯麻合。今算僖公五年。盡十五年。積月一百三十六。經月一百三十二。閏月四。積日四千一十六。大餘五十六。起壬子算外。得次年天正戊申朔旦。殷魯二術。朔晦多同。辛亥南至。殷朔後一日。魯必不異。至又當在朔後。則此云庚戌冬至。其誤明矣。

開元大衍曆演紀上元闕逢困敦之歲。距開元十二年甲子。積九千七百九十六萬一千七百四十算。

七百九十六萬。舊志作六百六十六萬。當從舊志。

策實百一十三萬三百四十三。一十三萬當從舊志作一十一萬。

用差萬七千八百二十四。八百當作一百。策餘卽氣盈分。用差卽朔虛分。竝之爲一歲之閏餘也。

象統二十四。卽秒法。

凡四分一爲少。分爲大。分爲大當云三爲太。

凡歸餘之掛五萬六千七百六十以上。其歲有閏。十字衍。歲有閏餘三萬三千零六十七。加五萬六千

七百零六。則滿揲法。而成一月。故知其年有閏也。

辰法七百六十。日法三千四十。卽週法以十二辰除之。各得二百五十三又三分之一。數有奇零。難以入

算。故以分母三通全分。納分子一。得七百六十爲辰法。

曆志四下

九執麻者。出於西域。開元六年。詔太史監瞿曇悉達譯之。斷取近距。以開元二年二月朔爲麻首。案九

執以二月朔爲首者。以春分爲歲首也。今回回、歐邏巴術。皆自春分白羊宮初度起算。猶用九執遺法。

又考通鑑目錄。是歲閏在二月後。三月朔直穀雨。則春分當在二月晦。不得在朔。或九執置閏在正月

後。故春分得在二月朔也。

周天三百六十度無餘分。今回回、歐邏巴術用三百六十整度。蓋本九執之法。其布算用字書。不用籌策。亦九執法也。或言三百六十度本於邵堯夫皇極經世書。不知堯夫又本西域。非能自創新率也。

歷志五

五紀通法千三百四十。此卽用李淳風麟德術通法卽麟德之總法。策實卽麟德之期實。揲法卽麟德之常朔實。辰法卽麟德之辰率。其數竝同。

交終日二十七。餘二百八十四秒三千七百六十七。交中日十三。餘八百一十二秒千八百八十三半。

此亦與麟德同。而秒數異者。彼以三百爲奇率。此以一萬爲秒法。三百分之百十三。卽萬分之三千七百六十七弱也。三百分之五十六半。卽萬分之千八百八十三強也。

正元揲法三萬三千三百三十六。三千當作二千。

五行志

乃取其五事皇極庶證。證卽徵字。宋人避仁宗嫌名改之。

高宗嘗內宴太平公主。紫衫玉帶。卓羅折上巾。具紛礪七事。歌舞於帝前。帝與武后笑曰。女子不可爲武官。何爲此裝束。此事又見公主傳。

肅宗上元二年，有羗聚於揚州城門上，節度使鄧景山以問族弟珽，對曰：羗，介物，兵象也。此事亦見景山傳，彼傳珽作班。

證聖元年正月丙申夜，明堂火，武太后欲避正殿，徹樂，宰相姚璿以爲火因人，非天災也，不宜貶損，后乃御端門觀酺，此事又見璿傳。

貞觀十七年春，齊王祐爲齊州刺史，好畜鴨，有狸嚙鴨頭，斷者四十餘，此事又見祐傳。

咸通中，吳越有異鳥，極大，四目三足，鳴山林，其聲曰羅平，此事又見董昌傳，志云其聲曰羅平，傳云其鳴曰羅平天冊，志云咸通初，而傳云中和時，皆互異。

武德七年，河間王孝恭征輔公祏，宴羣帥於舟中，孝恭以金盃酌江水，將飲之，則化爲血，孝恭曰：盃中之血，公祏授首之祥，此事又見孝恭傳。

天寶六載，少陵原楊慎矜父墓封域內，草木皆流血，慎矜令浮圖史敬思禳之，退朝裸而桎梏於叢棘間，此事又見慎矜傳，傳稱敬思胡人，志以爲浮屠，恐誤。

竇建德未敗時，有謠曰：豆入牛口，勢不得久，此事又見建德傳。

貞觀十四年，交河道行軍大總管侯君集伐高昌，先是其國中有童謠曰：高昌兵馬如霜雪，漢家兵馬如日月，日月照霜雪，回首自消滅，此謠又見西域傳，而詞小異。

調露初。京城民謠有側堂堂。橈堂堂之言。太常丞李嗣真曰。側者不正。橈者不安。自隋以來。樂府有堂堂曲。唐再受命之象。此事又見嗣真傳。

太和九年。京師譏言鄭注爲上合金丹。生取小兒心肝。密旨捕小兒無算。往往陰相告曰。某處失幾兒矣。此事又見楊虞卿傳。

廿二史考異卷四十四

唐書四

地理志一

凡乾元後所置州。皆無郡名。案自武德至開元。有州無郡。天寶元年。改州爲郡。乾元元年。復改郡爲州。綜唐二百十九年間。稱郡者僅十有六載耳。志凡稱某州某郡者。謂本是某州。中間曾改爲某郡耳。非州郡之名同時竝立也。乾元以後。新置之州。未經改郡。故無郡名耳。宋承唐制。以州領縣。而仍留郡名。以備王公封號之用。故地理志每州亦有郡名。然有名無實。較之唐志。似同而實異。

靈州。有朔方軍經略軍。當云朔方經略軍。多一軍字。

警州。景福元年。靈威節度使韓遵表爲州。遵當爲遜字之譌。回鶻傳。昭宗幸鳳翔。靈州節度使韓遜表回鶻。請率兵赴難。卽其人也。五代史。韓遜當唐末。據有靈鹽。唐卽以爲節度使。

地理志二

汝州魯山縣。武德四年。以魯山。滎陽。復置魯州。貞觀九年廢。案舊志。州廢於貞觀元年。此云九年。誤。葉縣。武德五年。隸北澧州。貞觀八年。隸魯州。案上條云。貞觀元年廢魯州。此貞觀八年。又有魯州者。武

德之魯州治魯山。貞觀之魯州治方城。非一地也。此魯州與北澧州卽一地而改名。

地理志三

河中府安邑縣有鹽池。大厯十二年。生乳鹽。賜名寶應靈池。叛臣傳作寶應靈慶。據石刻鹽池靈慶公碑證之。則靈慶是而慶靈非也。

澤州晉城縣。天祐二年。更曰丹川。案。舊唐書哀帝紀。改晉城曰高都。未詳孰是。

地理志四

河州西百餘里。鷓窠城。有振威軍。案。舊志。振威軍在鄯州西三百里。

鄯州鄯城縣。有天威軍。軍故石堡城。開元十七年置。初曰振武軍。二十九年。沒吐蕃。天寶八載克之。更名。

案。吐蕃傳。信安王禕出隴西。拔石堡城。置振武軍。其後吐蕃攻振武軍。蓋嘉運不能守。天寶中。哥舒

翰攻拔石堡。更號神武軍。即天寶八載志云天威軍。恐誤。

洮州西八十里。磨禪川。有神策軍。兵志作磨環川。

地理志五

淮南道爲州十二。案。唐六典。淮南道領十四州。志少濠沔二州者。沔州後省入鄂州。濠州以隸徐州節度。改屬河南。元和郡縣志以濠申光入河南。蘄黃安沔入江南者。據當時藩鎮所隸疆域而言。濠爲徐

州節度之屬。申光爲蔡州節度之屬。斬黃安河爲鄂岳觀察之屬。故淮南管内祇有七州也。舊志有濠州。無沔州。實十三州。

鄂州漢陽縣。本沔州漢陽郡。建中二年。州廢。四年復置。寶曆二年。州又廢。案舊志。大和七年。鄂岳節度使牛僧孺奏。沔州與鄂州隔江都管一縣。請併入鄂州。從之。此云寶曆二年。州廢。與舊志異。考舊敬宗紀。寶曆二年四月。鄂岳觀察使牛僧孺奏。當道沔州與鄂州隔江相對。纔一里餘。其州請竝省。其漢陽。汶當作汶字之譌。川兩縣隸鄂州。從之。然則新志不誤。而舊志誤也。節度使例兼觀察之職。故或稱節度。或稱觀察。僧孺以寶曆元年。由宰相出鎮武昌。大和四年正月。復入相。六年十二月。復出鎮淮南。未嘗再鎮武昌。則舊志之誤審矣。

地理志七

巖州常樂郡。汲古閣本作長樂。案福州已改長樂郡。不應更與同名。舊志亦作常字。毛本誤。

選舉志

太宗時。冀州進士張昌齡。王公謹有名於當時。考功員外郎王師旦不署以第。太宗問其故。對曰。二人者。皆文采浮華。擢之。將誘後生。而變風俗。其後二人者。卒不能有立。此事又見昌齡傳。惟傳云王公治。此云公謹爲異。

百官志一

李勣以太子詹事、同中書門下三品，謂同侍中中書令也。而同三品之名，蓋起於此。案太子詹事與侍中中書令階皆正三品，然惟侍中中書令爲宰相，故云同中書門下三品，以別於他三品也。大厯以後，升侍中中書令爲二品，自是無同中書門下三品之稱。

別置學士院，專掌內命，凡充其職者，無定員。案學士無定員，見於李肇翰林志，然舊唐書職官志稱翰林例置學士六人，內擇年深德重者一人爲承旨，白居易詩有同時六學士之句，則非無定員也。自諸曹尚書下至校書郎，皆得與選。案尚書正三品，校書郎正九品，謂自三品至九品官，皆得除學士也。

唐之學士，弘文、集賢分隸中書門下省，而翰林學士獨無所屬。案學士無品秩，但以它官充選，又爲天子私人，故不隸三省。唐六典不載翰林學士，學士亦差遺，非正官也。舊志附於中書省之後。

太師、太傅、太保各一人。案宰相表，天寶以前無真除三師者，太保自廣德二年僕固懷恩始。太傅自太和三年王智興始，太師惟李克用一人。若檢校官至三師者，班次尚在真三公之下，故表略而不書，亦猶使相之不列於表也。

郎中各一人，從五品上。郎中上當有左右司三字。

皇姑爲大長公主。姊爲長公主。姊下脫妹字。

龍朔二年。改禮部曰司禮。祠部曰司禋。膳部曰司膳。此下脫主客曰司藩五字。

凡刑法之書有四。一曰律。二曰令。三曰格。四曰式。此語又見刑法志。

一免者一歲三番役。再免爲雜戶。案唐六典。一免爲番戶。再免爲雜戶。番戶一年三番。雜戶二年五番。

百官志二

侍中二人。正二品。案唐六典。侍中中書令竝正三品。杜氏通典。侍中中書令舊班正三品。大厯二年。升爲從二品。舊唐書職官志。大厯二年十一月。升爲正二品。此志於侍中中書令。但書後定之品。而同中書門下三品之稱。遂難通矣。

門下侍郎二人。正三品。案通典。門下中書侍郎舊制正四品。大厯二年。升從三品。唐會要。黃門侍郎。大厯二年十一月四日。復爲門下侍郎。其月九日。升爲正三品。紫微侍郎。大厯二年十一月十四日。升爲正三品。五年九月。復爲中書侍郎。又考于志寧傳。貞觀三年。爲中書侍郎。太宗宴近臣。問志寧安在。有司奏。敕召三品。志寧品第四。帝悟。特詔領宴。因加散騎常侍。此中書侍郎在唐初居第四品之明證。史但書後定之品。則與志寧傳文不相應。

左散騎常侍二人。正三品下。散騎常侍本從三品。廣德二年五月。升爲正三品。中書門下省各加置四

員。興元元年，各加一員。貞元四年，敕依舊四員。此皆見於舊志及會要。志當書而不書。

左諫議大夫四人。正四品下。唐六典，諫議大夫，正五品上。唐會要載會昌二年十二月，檢校司徒兼太子太保牛僧孺奏，自大厯二年，門下中書侍郎爲正三品，兩省遂闕四品。其諫議大夫，請升爲正四品下，分爲左右，以備兩省四品之缺。敕依。

左補闕六人。左拾遺六人。案唐六典，左右補闕，拾遺各二人。舊書職官志，左補闕二員，左拾遺二員。又稱天后垂拱元年，置左右補闕各二員，左右拾遺各二員。天授二年，加置三員。通前五員。大厯四年，補闕拾遺各置內供奉兩員。七年五月，敕補闕拾遺宜各置兩員。蓋自有此官以來，未有置六員者。此六人當爲二人之譌。侍御史置內供奉，志旣書之。此補闕拾遺亦有內供奉，何以闕而不書乎。

右補闕六人。右拾遺六人。六當作二。

史館修撰四人。案舊書文宗紀稱，故事，史官不過三員，或止兩員。太和六年，王彥威、楊漢公、蘇滌、裴休四人竝命論者非之。據此志，則史官四人本有定員，不知何時裁省也。

祕書郎三人。當作四人。

司天臺監一人。正三品。少監二人。正四品上。案舊志，司天監本太史局令，從五品下。乾元元年，改爲監。升從三品。一如殿中祕書品秩。少監本曰太史丞，從七品下。乾元升少監與諸司少監同品。考殿中祕

書內侍諸監皆從三品。少監皆從四品上。則志以司天監爲正三品。少監爲正四品者。誤矣。

內官。貴妃、惠妃、麗妃、華妃各一人。內官宜另起一行。不應承典直之下。

宮官。尙宮局。宮官亦應另起。

百官志三

御史臺大夫一人。正三品。中丞二人。正四品下。御史大夫本從三品。中丞本正五品上。會昌二年。敕御

史大夫。準六尙書例。升爲正三品。中丞升正四品下。志所書者。皆依後改之品。

凡冤而無告者。三司詰之。三司謂御史大夫。中書門下也。此沿唐六典之文。考尙書刑部職云。凡鞠大

獄。以尙書侍郎。與御史中丞。大理卿爲三司使。又刑法志云。永徽以後。武氏得志。當時大獄。以尙書刑

部。御史臺。大理寺雜案。謂之三司。即今所謂三法司。與此不同。蓋三司鞠獄。出於臨時遣使。故六典不著爲令。

而於刑部篇言。凡有冤滯不申。欲訴理者。先由本司。或隨近官司斷決。不伏。乃至尙書省。左右丞爲申

詳之。又不伏。乃經三司陳訴。又不伏。乃上表。受表者又不達。聽搗登聞鼓。正與此文互相證明。

崇元署。掌京都諸親名數。親當作觀。

百工。就谷。庫谷。斜谷。太陰。伊陽監。百工監在陳倉。就谷監在王屋。庫谷監在鄆縣。太陰監在陸渾。伊陽

監在伊闕。竝見舊志。惟斜谷監不言所在。

百官志四

左右羽林軍。龍朔二年置。志失書。

左右神武軍。兵志。元和二年。省神武軍。而昭宗時。崔胤判六軍。仍有左右神武之名。則是并省未久而復置也。

左右神策軍。案。神策軍本隴右道十八軍之一。代宗時。始歸禁中。又分爲左右廂。貞元二年。改爲左右神策軍。志俱失書。

左右龍武。左右神武。左右神策。號六軍。案。兵志。肅宗至德二載。置左右神武軍。補元從扈從官子弟。不足。則取它色帶品者。同四軍。總曰北衙六軍。彼志所謂四軍者。指左右羽林。左右龍武而言。其時尚無左右神策也。貞元中。置左右神策。左右神威。并前六軍爲左右十軍。元和中。省神武。神威四軍。則以左右羽林。左右龍武。左右神策爲六軍矣。其後朱全忠誅宦官。廢神策軍。因以左右羽林。左右龍武。左右神武爲六軍。而宰相判之。與此志六軍之名。皆不合。

太子少師。少傅。少保各一人。從二品。案。東宮三少。據六典及舊志。皆正二品。

廿二史考異卷四十五

唐書五

兵志

諸府總曰折衝府。凡天下十道置府六百三十四。皆有名號。而關內二百六十一。今據地理志所載軍府數之。關內道二百七十三。又延州新置府二。河南道六十二。河東道一百四十一。河北道三十。山南道十。右道二十九。淮南道六。江南道二。劍南道十。嶺南道三。實止五百六十六。而關內乃有二百七十三。與志頗不相應。而百官志云。三輔及近畿州都督府皆置府。凡六百三十三。則又與兩數俱別。杜氏通典州郡篇云。折衝府五百九十三。職官篇則云五百七十四。府。王溥唐會要云。關內置府二百六十一。又置折衝府二百八十。通計舊府六百三十三。陸宣公奏議云。太宗置府八百。在關中者五百。杜牧原十六衛篇云。外開折衝府五百七十有四。王伯厚引鄭侯家傳云。諸道共六百三十府。又引理道要訣云。五百九十三。理道要訣十卷杜佑撰。唐人述府兵之數。言人人殊。宜乎史家莫適從也。唐初兵之戍邊者。大曰軍。小曰守捉。曰城。曰鎮。而總之者曰道。此所云道者。謂節度也。唐初分天下爲十道。不皆有屯戍之兵。平盧。范陽皆屬河北道。河西。安西。北庭皆屬隴右道。初無道之名。志當云以節

度統之。而後云某節度統某某軍，某某守捉，乃爲得之。

若盧龍軍一、東軍等守捉十一，曰平盧道。案平盧節度統平盧、盧龍二軍，及東軍、北口、洪水、鹽城、燕郡、

渝關、汝羅、懷遠、巫閭、襄平、安東十一守捉，志不及平盧軍，誤也。

橫海、北平、高陽、經略、安塞、納降、唐興、渤海、懷柔、威武、鎮遠、靜塞、雄武、鎮安、懷遠、保定軍十六，曰范陽道。

案舊書地理志：范陽節度使統經略、威武、清夷、靜塞、恆陽、北平、高陽、唐興、橫海等九軍。此云軍十六，而又少清夷、恆陽，與舊志異，竊意鎮安、懷遠、保定三軍在營平二州界內，似不當屬范陽。且志所載皆天寶以前之制，而鎮安軍本燕郡守捉，貞元二年改名，尤不應闕入也。清夷軍，垂拱中置，恆陽軍，開元中置，則此志轉遺之，皆不若舊史之可據。又地理志：幽州昌平縣有防禦軍，嬀州懷戎縣有寧武、廣邊二軍，此志不載，當是肅宗以後增置也。

天兵、大同、天安、橫野軍四、岢嵐等守捉五，曰河東道。案河東道有岢嵐、忻州、代州、雲中、樓煩、清塞六守捉，此云五者，不數清塞也。

朔方經略、豐安、定遠、新昌、天柱、宥州經略、橫塞、天德、天安軍九，三受降、豐寧、保寧、烏延等六城，新泉守捉一，曰關內道。朔方經略，一也。宥州經略，一也。併豐安等爲九軍。地理志：豐州中受降城，西有天安軍。天寶十二載置。此關內之天安軍也。代州西有天安軍。天寶十二載置。此河東之天安軍也。此二軍同

名又同時置。其地又不相遠。或地理志重出。此又展轉相因耳。舊地理志。新泉軍隸河西節度。而朔方節度管內尙有安北都護及振武軍。

赤水、大斗、白亭、豆盧、墨離、建康、寧寇、玉門、伊吾、天山軍十。烏城等守捉十四。曰河西道。案地理志。涼沙

諸州守捉有烏城、張掖、交城、百帳、豹、文山、蓼泉、酒泉、威遠、羅護、赤亭、獨山、張三城。凡十二名。赤水、白亭、

同城三守捉。則開元天寶之際。已改爲軍。赤水即大斗軍。白亭即白亭軍。同城即寧寇軍。此云守捉十四。殊未合也。天山、伊吾

二軍。舊地理志隸北庭節度。

瀚海、清海、靜塞軍三。沙鉢等守捉十。曰北庭道。案地理志。靜塞軍。大曆六年置。此所舉軍名。皆天寶以

前所置。不宜及靜塞也。守捉十。謂沙鉢城、馮洛、耶勒城、俱六城、張堡城、烏宰、葉河、黑水、東林、西林也。

保大軍一。鷹娑都督一。蘭城等守捉八。曰安西道。案地理志。安西都護府有蘭城、次城、葱嶺、于術、榆林、

龍泉、東夷僻、西夷僻、赤岸九守捉。此云守捉八。所未詳也。安西節度統龜茲、焉耆、于闐、疏勒四鎮都督

府。此獨舉鷹娑都督。亦未詳。

鎮西、天成、振威、安人、綏戎、河源、白水、天威、榆林、臨洮、莫門、神策、寧邊、威勝、金天、武寧、曜武、積石軍十八。平

夷、綏和、合川守捉三。曰隴右道。案地理志。無綏戎軍。當是威戎之譌。地理志。鄯州西北三百五十里

有威戎軍是也。舊地理志。隴右節度所統九軍。亦有威戎。無綏戎。

威戎、安夷、昆明、寧遠、洪源、通化、松當、平戎、天保、威遠軍十、羊灌田等守捉十五、新安等城三十二、犍爲等鎮三十八、曰劍南道。案地理志無安夷軍。惟資州有安定軍。又漢州有威勝軍。彭州有鎮靜軍。遂州有靜戎軍。此志皆不載。又考地理志。劍南道有羊灌、田朋、笮繩橋、彭白沙、彭合江、穀埕、三谷、翼乾溪、白望、暗桶、赤鼓溪、石梯、達節、驕口、質臺、駱它、通耳、爪平、乾溪、侏儒、箭上谷口。雜乾溪兩見疑有譌澄川、南江、姚二十四守捉。七盤、安遠、龍溪、彭新安、三阜、沙野、蘇祁、保塞、羅山、西瀘、蛇勇、遏戎、巒晏山、邊臨、統塞、集重、伐謀、制勝、龍游、尼陽。雅武侯廓清、銅山、肅寧、大定、要衝、潘倉、三礪、杖義、瑠璃、和孤、黎峨、和白岸、都護、祚鼎、翼符、堅維三十六城。犍爲、沐源、寺莊、牛徑、銅山、曲灘、隴和、平戎、依名、利雲、溶川、羅護、柘林、大池、雞心、龍溪、賴泥、可陽、婆籠、馬鞍、始犁、峨眉、嘉和川、始陽、靈關、安國。雅定蕃飛越、和孤、黎隴東、益登、清溪、禦藩、吉超、翼寧塞、姜維、維石門、龍騰、和戎、馬湖、移風、伊祿、義賓、可封、泥溪、開邊、平寇戎四十七鎮。與此志數皆不合。

嶺南、安南、桂管、邕管、容管、經略、清海軍六。曰嶺南道。嶺南五管各置經略軍。竝清海爲六。

平海軍一、東牟、東萊守捉二、蓬萊鎮一。曰河南道。地理志登州有平海軍。亦曰東牟守捉。此志分爲二。

非也。東萊守捉以萊州刺史領之。東牟守捉以登州刺史領之。天寶以前河南初無節度之名也。

玄宗以萬騎平韋氏。改爲左右龍武軍。皆用唐元功臣子弟。唐元卽唐隆溫王年號也。史避明皇諱。改。

崔日用傳云。唐元之際。日用實贊大謀。

郭子儀之婿。端王傅吳仲孺。唐會要。仲孺官太子詹事。諡曰襄。

昭宗伐李茂貞。乃用嗣覃王允爲京西招討使。神策諸都指揮使李鐵副之。案。昭宗紀。景福二年。嗣覃王嗣周爲京西面招討使。神策大將軍李鐵副之。以討李茂貞。宦者傅以嗣覃王戒丕爲京西招討使。嗣覃王之名。三處互異。今考本紀。乾寧四年八月。韓建殺嗣覃王嗣周。嗣延王戒丕。嗣丹王允。而十一宗諸子及沙陀傳俱有嗣延王戒丕。嗣丹王允之文。則嗣覃王之名。當從本紀。

食貨志一

凡授田者。丁歲輸粟二斛。稻三斛。謂之租。丁隨鄉所出。歲輸絹二匹。綾絕二丈。布加五之一。縣三兩。麻三斤。非蠶鄉。則輸銀十四兩。謂之調。盧學士召弓曰。此志約舊志及通典之文。殊未明晰。蓋歲輸粟二斛。謂之租。稻卽粟也。粟二斛之外。何以又加稻三斛乎。丁隨鄉所出。或出絹絕二丈。或不出絹絕。而出布加五之一。則二丈四尺也。時實徵二丈五尺。輸絹絕者。兼調縣三兩。輸布者。麻三斤。非蠶鄉者。則出布矣。亦無輸銀之理。又考唐律疏義引賦役令。每丁租二石。調絕絹二丈。縣三兩。布二丈五尺。麻三斤。又唐六典戶部下云。課戶每丁租粟二石。其調隨鄉土所產。綾絹絕各二丈。布加五分之一。輸綾絹絕者。縣三兩。輸布者。麻三斤。關內道京兆同華岐四州。調絲絹。餘州布麻。河南道陳許汝潁。調以絕絲。唐州麻布。

餘竝以絹及縣可見綾絹絕三者不竝徵也。皆無稻三斛、銀十四兩之文。新志妄增之。其流毒恐有不可言者。唐時唯蠻州用銀。中國未以此爲市易。何由徵之。通典載土貢。惟海南諸郡貢銀。大率二十兩。間有三十兩、五十兩者。獨始安郡百兩。夫一郡二十兩。一丁乃當其三分之一。有是事乎。歐宋諸公。不應荒唐至此。得無鈔胥之妄增邪。

食貨志三

唐開軍府以扞要衝。因隙地置營田。天下屯總九百九十二。司農寺每屯三頃。州鎮諸軍每屯五十頃。

盧學士召弓曰。案通典開元今諸屯隸司農寺者。每三十頃以下。二十頃以上。爲一屯。今云每屯三頃。以三頃之少。而說屯官屯副以主之。不太煩乎。大昕案三下當脫十字

上地五十畝。瘠地二十畝。稻田八十畝。則給牛一。盧學士召弓曰。此又誤也。通典云。土軟處。每一頃五十畝。配牛一頭。強硬處。一頃二十畝。配牛一頭。其稻田給牛之數。則與志同。今以土軟土硬改爲上地瘠地。未盡失也。而兩句皆脫去一頃二字。則於牛力甚有餘。而以一牛博瘠地二十畝之所入。何以相當乎。

刑法志

凡斷屠日及正月、五月、九月。不行刑。斷屠日。謂每月一日、八日、十四日、十五日、十八日、二十三日、二十

四日、二十八日、二十九日、三十日也。

帝以問大理卿劉德威對曰：律失入減三等，失出減五等。今失入無辜，而失出爲大罪，故吏皆深文。此事又見德威傳。

開元三年，黃門監盧懷慎等又著開元格。至二十五年，中書令李林甫又著新格。凡所損益，數千條。明年，吏部尚書宋璟又著後格，皆以開元名書。案藝文志：開元後格十卷，宋璟等刪定，以開元七年上。開元新格十卷，李林甫等刪定，以開元二十五年上。是宋璟著後格，在林甫之前矣。又據璟傳：璟以開元二十五年卒，卽林甫進新格之歲也。安得於明年更預撰述乎？此敍次偵倒之甚者。

左臺御史周矩上疏曰：比姦儉告許，習以爲常，推勅之吏，以深刻爲功，鑿空爭能，相矜以慮，泥耳囊頭，摺脅蠶爪，懸髮燻耳，臥鄰穢瀾，刻害支體，糜爛獄中。號曰獄持，閉絕食飲，晝夜使不得眠，號曰宿囚。殘賊威暴，取快目前，被誣者苟求得死，何所不至。爲國者以仁爲宗，以刑爲助。周用仁而昌，秦用刑而亡。願陛下緩刑用仁，天下幸甚。武后不納。此疏又見酷吏傳。此云左臺御史，而彼云右臺，官名小異。此云后不納，而彼云后寤，獄乃稍息，何其相刺謬也。

藝文志一

易類。何安講疏十三卷。安當作安。南監本不誤。

樂類。釋智匠古今樂錄十三卷。舊志作智邱。

小學類。蔡邕今字石經論語二卷。一類之中前後重見。

藏文志二

正史類。李喜漢書辨惑三十卷。舊志作李善。善與喜字形相涉。下文又有李善漢書辨惑二十卷。恐

卽一書而重出也。

謝吳姚察梁書三十四卷。吳、隋志作吳。姚思廉傳作吳。編年類有又謝吳梁典二十九卷起居注類有謝吳梁皇帝實錄五卷雜家類有謝吳物始十卷。

卷。

章懷太子賢注後漢書一百卷。注云。賢命劉訥言。格希玄等注。注書諸人名已見章懷本傳。此重出而

文又不備。

司馬貞史記索隱三十卷。注云。開元潤州別駕。案。劉知幾傳有博士司馬貞。

僞史類。劉昫燉煌實錄二十卷。此書又見雜傳記類。

武敏之三十國春秋一百卷。卽賀蘭敏之也。

雜史類。王粲漢書英雄記十卷。漢書當作漢末。

虞溥一作傳誤江表傳五卷。又見雜傳記類作三卷。

郭頒魏晉代說十卷。代卽世字。篇中如帝王代紀之類。皆避諱改。而劉義慶世說。劉孝標續世說。仍不避。

劉涪先聖本紀十卷。涪當作緡。見南史。

南卓唐朝綱領圖一卷。注云。字昭嗣。大中黔南觀察使。上卷樂類。有南卓羯鼓錄。注當在彼。

起居注類。晉崇寧起居注十卷。舊志亦作崇寧。晉時無此年號。故讀者疑之。予謂崇寧當爲崇安。卽

隆安也。唐人避明皇諱。往往改隆爲崇。以晉史考之。隆安紀元。正在太元之後。元興之前。此卷又有晉

崇安元興大享副詔八卷。足明崇寧當爲崇安矣。雜史類有周祇崇安記二卷。王韶之崇安記十卷。亦

紀晉安帝事也。此上文有晉隆和興寧起居注五卷。仍書隆字。所謂史駁文。

文宗實錄四十卷。注云。盧告字子有。弘宣子也。歷吏部侍郎。案弘宣傳已有之。但此云吏部侍郎。而傳

云終給事中。爲異爾。

故事類。葛洪西京雜記二卷。又見地理類。

雜傳記類。圈稱陳留風俗傳三卷。又見地理類。

章懷太子列藩正論三十卷。儒家類。列藩正論三十卷。列于武后所撰諸書之末。章懷太子所撰之前。

蓋重出而又舛誤也。舊志儒家類無此書。

唐臨夏報記二卷。又見小說類。

劉餗國朝傳記三卷。小說家類有劉餗傳記三卷。一作國史異纂。疑卽一書。

儀注類。章公肅禮閣新儀二十卷。注云。元和人。公肅官名時代。已見本傳及禮樂志。此注重出也。

王涇大唐郊祀錄十卷。注云。貞元九年。上時爲太常禮院修撰。此注重出。已見禮樂志。凡注文重出。吳氏所糾者不更及。

袁郊二儀實錄。衣服名義圖一卷。注云。字之儀。滋子也。昭宗翰林學士。郊官位已見袁滋傳。又宰相世

系表。郊字之乾。號州刺史。與此注互異。

刑法類。開元後格十卷。注云。吏部侍郎兼侍中宋璟。侍郎當作尙書。

目錄類。羣書四錄二百卷。注云。殷踐猷。王愜。韋述。余欽。母暎。劉彥直。王灣。王仲邱撰。元行冲上之。此

事已見元行冲傳。

譜牒類。賈執百家譜。又姓氏英賢譜一百卷。案。柳冲傳。晉太元中。散騎常侍賈弼撰姓氏簿狀。十八

州百十六郡。合七百一十二篇。傅子匪之。匪之傅子希鏡。希鏡撰姓氏要狀十五篇。希鏡傅子執。執更作姓氏英賢譜一百卷。又著百家譜。執傳其孫冠。冠撰梁國親皇太子序親簿四卷。是賈氏世系先後分明。志列賈冠所撰於前。或緣帝王族親。以類相從。不拘子孫之次。若希鏡所撰。列於執書之後。則失

之不考矣。

大唐山氏族志一百卷。注云。高士廉。韋挺。岑文本。令狐德棻撰。又姓氏譜二百卷。注云。許敬宗。李義府。孔志約。楊仁卿。史玄道。呂才撰。此兩書撰人名。已見高士廉。李義府二傳。此注重出。但云某人等撰可矣。地理志。括地志五百五十卷。注云。魏王泰命著作郎蕭德言。祕書郎顧胤。記室參軍蔣亞卿。功曹參軍謝偃。蘇勛撰。此事已見漢王泰傳。而注復重出。傳惟少蘇勛一人。

藝文志三

儒家類。章懷太子春秋要錄十卷。秋當作宮。

張太玄平臺百一寓言三卷。太玄。舊志作太素。

楊倞注荀子二十卷。注云。汝士子。大理評事。案。宰相世系表。汝士子有知溫。知遠。知止。汝士子傳三人。無名倞者。

元和辨謗略十卷。注云。令狐楚。沈傳師。杜元穎撰。此事已見唐次傳。

儲光義正論十卷。注云。兗州人。案。別集類云。包融與儲光義皆延陵人。里居互異。

道家類。張志和玄真子十二卷。案。神仙門又有志和玄真子二卷。疑卽一書。

鄭雲千清虛真人裴君內傳一卷。雲千。舊志作子雲。

玄應大唐衆經音義二十五卷。今釋藏本題云一切經音義。宋藝文志亦作一切經音義。

農家類。賈思協齊民要術十卷。案下文有李淳風續齊民要術。此民字亦當爲人。疑校書者所改也。

五行類。又有李淳風四民福祿論。道家類有劉遺民玄譜。

小說家類。劉齊釋俗語八卷。齊當作霽。

醫術類。李氏本草二卷。案于志寧傳云。別錄者。魏晉以來。吳普。李當之所記。弘景合而錄之。此李氏

卽李當也。

孟詵必効方十卷。舊史說傳云三卷。

司空輿發烙錄一卷。注云。圖父。大中時。商州刺史。案司空圖傳。父輿。官戶部郎中。不云爲商州刺史。

藝文志四

別集類。王泚集十卷。卽文藝傳之王翰也。舊史文苑傳亦作泚。

寶叔向集七卷。注云。字遺直。與常袞善。袞爲相。用爲左拾遺。內供奉。及貶。亦出溧水令。案寶羣傳云。父

叔向。以詩自名。代宗時。位左拾遺。若以此注云云。改入本傳。則文省而無重出之累矣。

包融詩一卷。注云。江寧有右拾遺孫處玄。舊史隱傳有孫處玄。新史刪去。卽此人也。此云江寧。而彼

云潤州者。江寧時隸潤州也。

張文成龍筋鳳髓十卷。文成、養之字也。字而不名。非例。

總集類。司馬相如上林賦一卷。上林賦以下八部。不當入總集。

褚令之百賦音一卷。令當作證。

元思敬詩人秀句二卷。文史門又有元兢古今詩人秀句二卷。疑卽一書。思敬見舊史文苑傳。

5

三十一

廿二史考異卷四十六

唐書六

宰相表上

武德元年六月，將作大匠、襲陳國公竇抗本官兼納言，黃門侍郎陳叔達判納言。兼判皆未正授之稱。考叔達以是年判納言，明年乃兼納言，則判又在兼之下也。

四年十月，世民加司徒天策上將。案武德元年，世民已爲太尉，太尉在司徒之上，此云加司徒者，以太尉兼領司徒也。九年二月，元吉爲司徒，則世民但爲太尉，不兼司徒矣。

貞觀六年三月，君集以喪罷。十一月，君集起復。案唐時宰相居喪，無不奪情起復者，然君集起復，相距猶八月。若八年長孫无忌起復，十七年房玄齡起復，咸亨元年李敬元起復，乾元二年呂譔起復，相距二年。韋貽範起復，則相距三月。貞觀二十二年褚遂良起復，相距四月。大約百日卒哭之後，卽有詔起復也。龍朔三年七月戊戌，李義府以母喪罷。九月丁丑，卽起復，止隔四十日，未免太促，或其中有閏月，則亦百日矣。

永淳元年十月，黃門侍郎劉景先同中書門下平章事。案高宗武后紀俱作劉齊賢，宰相世系表云齊

賢更名景先。蓋高宗時避章懷太子諱改名。而齊賢本傳不書。此史之漏也。紀書初名。表書改名。於例殊未盡一。

萬歲登封元年乙未。案是歲一月改元證聖。九月改元天冊萬歲。其明年臘月改元萬歲登封。三月改元萬歲通天。史家之例。年號以後改者爲定。此乙未歲當書天冊萬歲元年。表云萬歲登封。誤。

宰相表中

天寶十一載十一月。林甫死。春秋之法。內諸侯稱薨。內大夫稱卒。外諸侯亦稱卒。雖宋文公。魯桓公。仲遂。季孫意如之倫。書薨卒無異辭。所謂直書而善惡自見也。歐公修唐書。於本紀亦循舊史之例。如李林甫書薨。田承嗣。李正己書卒。初無異辭。獨於宰相表變文。有書薨。書卒。書死之別。欲以示善善惡惡之旨。然科條既殊。爭端斯啓。書死者固爲巨姦。書薨者不皆忠讜。予奪之際。已無定論。紫陽綱目。頗取歐公之法。而設例益繁。或去其官。或削其爵。或奪其諡。書法偶有不齊。後人復以己意揣之。而讀史之家。幾同於刑部之決獄矣。

宰相表下

開成四年五月。陳夷行罷爲吏部侍郎。本傳作吏部尙書。
大中十三年十二月。敏中守司徒。兼門下侍郎。同中書門下平章事。凡前宰相再入。例書姓。如蕭瑀。高

士廉、姚元之、唐休璟諸人是也。白敏中自荆南節度使再入相，不書姓。此史文之闕。舊唐書懿宗紀不載敏中入相事。

廣明元年二月，從讜檢校司空、兼平章事、河東節度行營招討等使。鄭從讜傳作檢校司徒，誤也。舊唐

書本紀亦作司空。

乾寧二年三月，戶部侍郎、判戶部王搏爲中書侍郎、同中書門下平章事。案舊書本紀，搏拜相在景福二年十二月。乾寧元年十月，出爲湖南節度使。二年六月，復爲中書侍郎、平章事。新史祇有此年入相事，不云罷而復相。又舊史稱六月復相，而此書於三月皆不相合。蓋宣宗以後，實錄散亡，傳聞互異，新舊兩史之抵牾者，難以更僕數矣。

方鎮表一

開元九年，置朔方軍節度使，領單于大都護府、夏鹽綏銀豐勝六州。定遠豐安二軍，東中西三受降城。唐會要：開元元年十月，敕朔方行軍大總管，宜準諸道例，改爲朔方節度使。其定遠豐安軍，東西中城，單于豐勝靈夏鹽銀匡長安樂等州，竝受節度。此表云九年，其所領州亦互異。未審孰是也。地理志：靈州有朔方軍，黃河外有豐安、安遠、新昌等軍。安遠當爲定遠之譌。朔方軍置於靈州，則靈州必在所領之內。恐表有脫文。

二十二年以安樂二州隸原州。此州以安樂爲名，非兩州也。二字衍。

至德元載置京畿節度，領京兆、同、岐、金、商五州。案天寶元年以前，乾元元年以前，稱郡不稱州。當云京

兆、馮翊、鳳翔、安康、上洛五郡，餘仿此。

是年以金、商、岐州隸興平。案第七卷云：興平節度使領上洛、安康、武當、房陵四郡，則岐州不在興平管

內。此文疑誤也。

別置關內節度使，以代採訪使，徙治安化郡。以呂崇賁爲使，未幾，改命王思禮。安化時已改名順化矣。

乾元二年置陝虢華節度，領潼關防禦團練鎮守等使。是時安慶緒再陷東京，以關陝要地，除來瑱爲

節度使鎮之。其明年，瑱移鎮山南，除郭英乂陝西節度、潼關防禦等使，尋兼神策軍節度使。其後英乂

入朝，而神策隸於觀軍容部下，遂爲禁軍，非州郡兵矣。

上元二年以華州置鎮國節度，亦曰關東節度。廣德元年罷鎮國軍節度。案舊史本紀：廣德元年有同

華節度使李懷讓，懷讓死，而周智光繼之。至大曆二年，智光伏誅，始不除節度。表云：廣德元年罷節度

者，非也。同州本隸河中。上元二年改隸鎮國軍，此表不云領同州，亦漏也。

大曆五年，涇原節度使馬璘訴地貧，軍廩不給，遙領鄭穎二州。依前後文例，但當云涇原節度遙領鄭

穎二州。且璘傳已云涇軍乏財，帝諷李抱玉讓鄭穎，則此文尤可省也。抱玉時以澤潞帥權鳳翔隴石

節度使兼領兩鎮。而璘亦權知鳳翔。隴右節度副使。故得分其地以益涇原也。及段秀實代璘。忤宰相楊炎。因奪其潁州。秀實既受代去。竝鄭州亦罷之。此事理之想當然者。

十四年。析置河中。振武。邠寧三節度。是時德宗初立。罷郭子儀副元帥。以李懷光爲河中尹。邠寧慶晉絳慈隰等州節度觀察使。以常謙光兼靈州大都督。西受降城定遠軍。天德鹽夏豐節度等使。渾城爲單于大都護。振武東中二受降城鎮北及綏銀麟勝等軍州節度營田使。蓋於朔方管內。析置邠寧。振武二節度。河中卽在邠寧管內。并朔方爲三鎮也。是歲十一月。又除杜亞爲河中尹。晉絳慈隰都防禦觀察使。則河中別爲一鎮矣。乃第六卷河中篇不云是年置都防禦使。與此文不相應。

建中二年。置河陽三城節度使。以東都畿觀察使兼之。領懷。鄭。汝。陝。四州。尋置使。增領東畿五縣及衛州。亦曰懷衛節度使。案舊本紀。是年正月。以路嗣恭爲鄭汝陝河陽三城節度。東畿觀察使。卽表所云置河陽三城節度。以東都畿觀察使兼之也。其五月。以李芄爲河陽三城懷州節度使。仍割東畿五縣隸焉。於是河陽別爲節鎮。不領於都畿。而鄭汝亦不在所管之內。上文云以汝州隸河陽。尋復舊正指此事。東畿五縣謂河陽。河清。濟源。温。汜水也。其兼領衛州。則紀傳所未及。衛州本在田悅管內。時李芄受詔討悅。遙假以名。非能有其地也。

四年。置京畿渭南節度觀察使。領金商二州。是年。兼渭北鄜坊丹延綏五州。未幾。罷五州及金州爲京畿。

商州節度使。今案通鑑是歲十月德宗幸奉天。以渾瑊爲行在都虞候。京畿渭北節度使以李昌巖爲京畿渭南節度使。尋加瑊京畿渭南北金商節度使。表所云兼渭北鄜坊等五州者。卽指渾瑊而言。其瑊以渭北帥兼渭南。非渭南兼渭北也。興元元年三月。始以尙可孤爲神策京畿渭南商州節度使。則京畿商州之別置帥。乃在次年。表併書於一年。非也。

以隴州置奉義軍節度使。尋廢。奉義軍以韋皋爲帥。次年皋召還。此軍遂廢。

復置渭北節度。如上元之舊。尋罷。未幾復置。徙治鄜州。其後置都團練觀察防禦使。渭北帥領鄜坊丹

延四州。此上元舊制也。是歲渾瑊除京畿渭北節度使。而又有鄜坊節度使李建徽。通鑑亦稱渭北節度將兵入

援。殆瑊所將者。行營之兵。而建徽乃其本帥乎。興元元年建徽軍爲李懷光所奪。而以李晟兼渭北鄜

坊丹延節度觀察使。其年又除唐朝臣鄜坊丹延節度使。至貞元二年。朝臣移鎮振武。乃除論惟明爲

鄜坊都防禦觀察使。其明年惟明卒。仍書鄜坊節度使。則是鄜坊初無罷而復置之事也。

興元元年。以同州爲奉誠軍節度。領同晉慈隰四州。是年罷。奉誠軍以康日知爲帥。

以華州置潼關節度使。駱元光爲鎮國軍節度使。通鑑在前年十一月。至貞元九年。元光卒。而華州不

除節鎮。

貞元元年。置陝虢都防禦使。治陝州。踰月。又爲都防禦觀察陸運使。是歲。陝虢節度使張勣爲其所

殺以李泌爲陝虢都防禦水陸運使尋加觀察使不除節度而除防禦故云罷陝西節度使置陝虢都防禦使也表書廢陝西節度於上年似誤分爲兩事

罷河陽節度使置都團練使時河陽帥李芑卒因不置節鎮

二年升東都畿汝州都防禦使爲都防禦觀察使案舊本紀貞元元年以賈耽兼東都留守都畿汝州防禦使二年加東都留守賈耽東都畿唐汝鄆都防禦觀察使蓋耽本以留守兼防禦止領汝州至是始進爲都防禦增領唐鄆二州也表於上年已書都防禦增領唐鄆似不如舊紀之得其實矣是歲耽移鎮義成其明年除嗣曹王皋爲山南東道節度使乃割唐鄆隸之

三年罷保義節度置都團練觀察防禦使與元元年李晟爲鳳翔隴右節度使至是罷晟兵柄以其都虞候邢君牙爲鳳翔尹本府團練使君牙資望尙輕故未授以旄節然傳云俄嶺節度表亦云未幾復置節度則君牙建節殆即在此年乎

德宗置行秦州以刺史兼隴右經略使治普潤以鳳翔節度使領隴右支度營田觀察使案貞元三年吐蕃陷隴右四年以瀋闕節度使李元諒即光也兼隴右節度使臨洮軍使治良原良原涇州縣也九年元諒卒於良原十年乃以劉潼爲秦州刺史隴右經略軍使理普閭縣即表所云行秦州也地理志普潤縣有隴右軍貞元十年置十一年以縣隸隴右經略使獨不云置行秦州亦史文之漏也表不書

於貞元十年而附見此年亦未核。

置夏州節度觀察處。置押蕃落使。領綏鹽二州。案舊本紀。是年七月。以韓潭爲夏州刺史。夏綏銀等州

節度使。此表亦有銀夏節度之名。惟此條失書銀州。

六年。涇原節度領四鎮北庭行軍節度使。案。自馬璘移鎮涇原以來。涇帥常兼四鎮北庭行營節度。表

皆不書。至是。安西北庭皆沒於吐蕃。故特書之。其時節度使則劉昌也。

十二年。以天德軍置都團練防禦使。領豐會二州。三受降城。豐州別置都防禦。以李景略爲使。

復置河陽懷節度。治河陽。案。是年河陽除帥。不見於舊本紀。惟十五年三月書以河陽三城節度使李

元爲昭義軍節度使。疑元除節度。卽於十二年矣。

元和元年。升隴右經略使爲保義軍節度。是年。劉潼由經略使進節度。其明年。潼卒而罷節鎮也。

析丹州置防禦使。案舊本紀。元和七年。以元義方爲鄜坊丹延觀察使。是丹州析置防禦未久。仍隸鄜

坊。而表失書也。又考。元和三年以前。鄜坊帥皆稱節度。七年以後。元義方。薛伾。裴武。李銛。相繼爲觀察。

至十二年。韓公武復除鄜坊丹延節度。其罷而復置。宜見於表史。皆闕而不書。

九年。河陽節度增領汝州。徙汝州。時憲宗將用兵淮西。以河陽節度烏重胤兼汝州刺史。徙治焉。十

二年。淮西平。十三年。除鄭綱東都留守。都畿汝防禦使。則汝仍隸東畿。而重胤還治河陽矣。

十三年。罷河陽節度。今案。舊本紀。元和十三年。重胤移鎮滄州。以令狐楚代之。十四年。楚入相。而魏義通代之。十五年。以田布爲河陽節度。長慶元年。布移鎮。而郭釗代之。二年。釗移鎮。而陳楚代之。三年。楚入爲龍武統軍。史不見交代姓名。以紀傳參考。當是崔弘禮代之。寶曆二年。楊元卿爲節度。太和五年。元卿移鎮。而溫造代之。八年。蕭洪爲節度。開成二年。河陽軍亂。逐其節度使李泳。以李執方代之。會昌三年。則王茂元爲節度。此二十五年之中。河陽凡更十二帥。初未聞罷而更置也。表於是年書罷河陽節度。直至會昌三年復置。殊爲疏舛。且與文宗紀河陽軍亂。逐節度之文。亦不相應。

長慶元年。東都畿防禦罷領汝州。二年。東都畿復領汝州。案。長慶元年。李絳代鄭綱判東都尙書省事。

東都留守。都畿防禦使。結銜內不帶汝州。次年。裴度代絳留守東京。乃復帶之。

大和三年。以陝虢地近京師。罷陝虢都防禦使。案。舊本紀。大和五年八月。以崔成爲陝州防禦使。詔陝州舊有都防禦觀察使額宜停。兵馬屬本州防禦使。表書於三年。誤也。嗣後李絳。舒元興皆止稱陝州防禦使。至開成元年。復除鄭肅爲陝虢都防禦觀察使。

會昌三年。復置河陽節度。徙治孟州。河陽節度本治懷州。是年。始於河陽置孟州。爲節度治所。表云復置者。誤。

大中三年。邠寧節度以南山平夏部落叛。徙治寧州。及內附。復徙故治。據通鑑。邠寧還故治。在大中九

年。

咸通五年。秦州隸天雄軍節度。此天雄軍置於秦州。非魏博之天雄軍。

中和二年。渭北節度賜號保大軍節度。增領翟州。地理志坊州鄜城縣。唐末置翟州。渭北卽鄜坊也。是歲。鄜坊節度使李孝昌。與夏州節度使拓拔思恭。同盟起兵討黃巢。故賜其軍號曰保大軍。夏州曰定難軍。

以延州置保塞軍節度。通鑑。中和三年五月。建延州爲保塞軍。以保大行軍司馬。延州刺史李孝恭爲節度使。表書于二年。未知孰是。

三年。升陝虢防禦觀察使爲節度使。以王重盈爲帥。

光啓元年。邠寧節度賜號靜難軍節度。通鑑。在中和四年。其時朱玫爲節度使。

三年。升東畿觀察兼防遏使爲佑國軍節度。時張全義爲河南尹。置佑國軍節度。令全義兼領之。通鑑。在文德元年。

龍紀元年。賜陝虢節度爲保義軍節度。光啓三年。王重榮爲其下所殺。重盈移鎮河中。以其子珙領陝虢帥。

乾寧元年。涇原節度賜號彰義軍節度。案。通鑑。在大順二年。蓋據昭宗實錄。故與表異也。先是大曆七

年涇原節度使劉昌築胡谷堡改名彰義堡彰義之名蓋出於此時張鈞爲節度使鈞卒兄鐸代之鐸卒子璉代之又有珂代璉爲留後其後爲李茂貞所併

二年升同州爲匡國軍節度通鑑於乾寧元年十二月已書匡國節度使王行約行約行瑜之弟也光化元年以華州置鎮國軍節度領同華二州兼興德尹今案通鑑大順元年張濬用兵河東時韓建已爲鎮國軍節度使非於此時始置節度也其兼領同州節度亦在乾寧四年惟興德尹之稱則於是年始授蓋改州爲府因進刺史爲尹耳

更保塞軍節度曰寧塞軍節度案通鑑乾寧四年正月以李思諫爲寧塞節度使在光化紀元之前三年罷鎮國軍節度及興德尹案天復元年朱全忠始克華州舊本紀天祐三年敕華州鎮國節度觀察處置等使額及興德府名竝宜停廢復爲華州刺史仍隸同州爲支郡表書於光化三年誤之甚矣置佑國軍節度案佑國軍置於光啓三年不應更云置當爲罷字之譌蓋天祐元年昭宗遷洛河南尹不帶留守因移佑國軍於長安而張全義亦改除天平節度使此罷佑國節度事或在天復三年而表誤係之光化三年耳

天祐元年以京畿置佑國軍節度使領金商二州案舊本紀天祐三年敕西都佑國軍作鎮已來未有屬郡其金州商州宜隸爲屬郡蓋置鎮在元年其領金商二州則在三年也

三年置義勝軍節度使領耀鼎二州。耀州本京兆之華原縣。鼎州本京兆之美原縣。皆李茂貞所置。并於耀州置節鎮。以李彥韜爲使。卽溫韜也。

廿二史考異卷四十七

唐書七

方鎮表二

景雲二年北都長史領持節、和戎大武等諸軍州節度使。案開元十一年始以太原爲北都都置留守都督府。乃有長史。此文當云并州大都督府長史。或言文作并州長史不當云北都長史也。大武軍後改大同軍。開元五年領天兵軍大使。時并州長史張嘉貞言突厥九姓新內屬雜處太原北請置天兵軍綏護其衆。詔以嘉貞領天兵使。八年嘉貞入相除張說并州長史天兵軍節度大使代之。

十八年更太原府以北諸軍州節度爲河東節度。漢之河東郡在今平陽府後魏周隋之河東郡卽蒲州。自唐設節鎮而太原遂兼河東之名。其後升蒲州爲河中府分爲兩鎮而河東縣猶爲蒲州治所。唐會要開元十八年十二月宋之悌除河東節度使已後遂爲定額。

至德元載置河南節度使。是歲始以嗣吳王祗爲陳留太守河南道節度采訪使。未幾以嗣虢王巨代祗。未幾又以賀蘭進明代巨節度。次年以宰相張鎰領河南節度采訪使代進明。乾元元年鎰左遷以崔光遠代之。其冬光遠爲魏州刺史城陷出奔表云乾元元年廢河南節度當在光遠改官之後也。

置淮南西道節度使。以來蹟爲之。

置青密節度使。青州時爲北海郡。當云北海節度使。史據後改稱之。鄧景山傳。至德初。擢拜青齊節度使。卽表所稱青密節度也。

置鄆齊兗三州防禦使。治齊州。此與河南淮西諸節度同時置。而彼稱郡名。此稱州名。體例殊不畫一。

考舊本紀。乾元元年九月。以能元皓爲齊州刺史。齊兗鄆等州防禦使。凡節度防禦團練使帶刺史卽是所治之州。疑表書此事。本在乾元元年。時已改郡爲州。故不稱郡而稱州。傳刻之譌。漏入前兩格耳。

乾元元年。淮南西道徙治鄭州。是時魯炆以襄鄆節度兼領淮西。而鄭州別置節度。以季廣琛爲帥。史所稱鄭蔡節度也。

別置豫汝許節度使。治豫州。案舊本紀。乾元二年四月。以興平軍節度李奐兼豫許汝等州節度使。此與廢淮西節度蓋一時事。表書於元年。疑誤。

青密節度增領滑濮二州。以許叔冀爲節度使。

二年。置汴滑節度使。治滑州。領州五。滑、濮、汴、曹、宋。又置河南節度使。治徐州。領州五。徐、泗、海、亳、穎。是歲三月。以滑州刺史許叔冀充滑汴曹宋等州節度使。蓋滑汴與青密分爲二也。又以鄆州刺史尙衡爲徐州刺史。充亳穎等州節度使。卽表所稱河南節度也。

置鄭陳節度使。領鄭陳毫穎四州。治鄭州。尋增領申光壽三州。未幾。以三州隸淮西。是歲四月。以魯炅為鄭陳穎毫節度使。炅本領襄鄧。淮西二鎮。今解襄鄧。祇領鄭陳四州節度。蓋以相州師潰之故。表所稱置鄭陳節度也。六月。以彭元曜為鄭州刺史。充陳鄭申光壽等州節度使。蓋炅死而元曜代之。表所謂增領三州也。其九月。以王仲昇充安沔等州節度使。表所謂復置淮南西道節度。以三州還隸淮西是也。

青密節度使增領淄沂海三州。是歲四月。以徐州刺史尙衡為青州刺史。充清淄密登萊沂海等州節度使。即表所云增領三州也。

升鄆齊兗三州都防禦使為節度使。能元皓自鄆防禦升節度使。治兗州。故史稱兗鄆節度。

上元二年。置滑衛節度使。治滑州。乾元二年。滑汴節度使許叔冀降賊。至是。令狐彰以滑州歸朝。因授滑衛相魏德貝六州節度。

淮南西道節度使增領陳鄭穎毫汴曹宋徐泗九州。徙治安州。號淮西十六州節度使。今案。寶應元年。淮西帥王仲昇為賊所虜。乃除來瑱。淮西南十六州節度使。來瑱傳云十五州。無而以裴茂代瑱鎮

襄陽。既而瑱竟不行。則河南淮西必別置帥。故表又有寶應元年復置河南節度之文。其實祇一年中事耳。據肅宗紀。王仲昇與史朝義將謝欽讓戰於申州。敗績。在寶應元年建卯月。而來瑱移鎮淮西之

命乃在仲昇敗沒以後。則此表以廢河南節度。乃淮西增領十六州事屬之上元二年者。其誤顯然矣。置淄沂節度使。案舊本紀。殷仲卿爲淄州刺史。淄沂滄德棣等州節度使。在上元元年十月。

平盧軍節度使侯希逸引兵保青州。授青密節度使。據通鑑。在寶應元年。平盧軍本置於營州。至是移駐青州。而淄青節度遂兼平盧之號。猶鳳翔兼隴右。涇原兼四鎮北庭行營也。

寶應元年。復置河南節度使。治汴州。以田神功爲節度使。淮西節度增領許隨唐三州。是歲七月。以李忠臣爲淮西十一州節度。尋加安州刺史。

以鄭州隸澤潞節度。乾元二年九月。李抱玉爲鄭陳潁亳節度使。至是。除澤潞節度。仍以鄭隸之。申州隸蔡汝節度。蔡州卽豫州。是年代宗卽位。避諱改名。節度使則李忠臣也。

是年。廢兗鄆節度。本以田神功代能元皓爲兗鄆帥。神功移鎮汴州。因以兗鄆所領。分隸神功與侯希逸也。

廣德元年。析相貝別置節度。魏博別置防禦。相貝魏博諸州爲賊所據。雖領於令狐彰。實不能有其地。至是。薛嵩。田承嗣始以州歸朝。因授以節鎮也。滄德亦侯希逸遙領。至是。始隸魏博。

永泰元年。淄青平盧節度增領押新羅北海兩番使。北海當作渤海。大曆十一年。廢河南節度使。是歲。汴宋留後田神玉卒。其將李靈耀拒命。詔諸道兵討之。李正己取曹

兗鄆濮徐五州。李忠臣取汴州。卽以其地益之。李勉本兼汴宋節度。所得惟宋泗二州耳。

淮西節度增領汴州。徙治汴州。李忠臣徙治汴。蓋欲伺隙兼取汴宋故地。

十四年。淮西節度使復治蔡州。更號申光蔡節度使。汴州隸永平軍節度。是歲。李希烈逐忠臣。卽以三州與之。仍以汴還永平軍。令李勉移治之。

建中二年。置宋毫穎節度使。治宋州。時永平將劉洽有功。析三州除節鎮。

三年。廢淄青平盧節度使。是時李納拒命。下詔討之。故析其地爲三鎮。徐海沂密四州亦在淄青管內也。興元元年。納歸命。仍復其舊。

興元元年。宣武軍節度使徙治汴州。時劉洽破李希烈。取汴州。卽以其地與之。

賜河東節度號保軍軍節度。時馬燧爲節度使。賜軍號以寵之。貞元三年。燧罷兵柄。因去軍額。

貞元四年。置徐泗濠三州節度使。徐州本在淄青管內。李洧始以州歸國。至是因李泌言。於徐州置鎮。以張建封爲節度使。濠當作豪。地理志。濠州字初作豪。元和三年。改從濠。建封除帥。在元和以前。其時未加水旁。韓退之有徐泗豪三州節度掌書記廳壁記。退之在建封幕中所作也。建封傳亦作濠。史家失於考正耳。

十六年。廢徐泗濠三州節度使。未幾。復置泗濠二州觀察使。隸淮南。徐州領本州留後。是歲。張建封卒。

軍中請立其子愔爲留後。德宗不許。命將討之。故廢節度。而以濠泗隸淮南。旣而師出無功。乃除愔刺史。知留後事。而濠泗別立觀察也。

元和二年。廢濠泗二州觀察使。置武寧軍節度使。治徐州。領徐泗濠三州。是歲。張愔以疾求代。除王紹節度武寧。復領濠泗二州。據表。似武寧之號。在兼領三州之日。而愔傳云。進愔武寧軍節度使。是又不

始於王紹也。舊唐書順宗紀永貞元年。徐州節度賜名武寧軍。

十一年。彰義軍增領唐隨鄧三州。尋以三州別置節度使。時唐隨鄧節度高叢。討吳元濟。兵敗。乃以袁滋爲彰義軍節度使。申光唐蔡隨鄧州觀察使。故云彰義軍兼領三州。然元濟方拒命。滋雖有彰義節度之名。所領者仍不過唐隨耳。及滋罷。而用李愬爲帥。仍稱唐隨鄧。不帶彰義軍銜。故云別置要之名。異而實同也。

十二年。彰義軍節度復爲淮西節度。是歲。裴度以宰相領節度事。度入朝。除馬總爲節度。史皆稱彰義軍。未嘗改名淮西也。

十三年。廢淮西節度。是歲。馬總移鎮忠武。卽以蔡隸之。而以光州隸淮南。申州隸鄂岳。自是蔡州無節鎮者。六十四年。中和初。秦宗權據之。於是又有奉國軍之名。

十四年。淄青平盧節度使領青淄濟登萊五州。時李師道誅。析其地爲三鎮。

會昌四年升大同都團練使爲大同都防禦使。據此似防禦高於團練。然百官志防禦列團練之下。咸通三年罷武寧軍節度置徐州團練防禦使隸兗海。又置宿州等州都團練觀察處置使治宿州。是歲以徐州驕卒逐節度使溫璋令王式代之。式至鎮誅徐卒三千餘人。因降其使額爲防禦也。據舊書本紀四年四月敕徐州罷防禦使爲支郡隸兗州。則徐州之隸兗海在次年罷防禦以後。表書於三年似誤。

十年置徐泗節度使。是年復置都團練防禦使增領濠宿二州。是歲正月除王晏權武寧軍節度使爲討龐助故也。然舊本紀咸通九年龐助陷徐州殺節度使崔彥會。其時先已升團練爲節度矣。其秋助伏誅乃除曹翔徐泗濠團練防禦使。是節度又降爲團練也。

中和二年更大同節度爲雁門節度領左神策軍天寧鎮遏觀察使徙治代州。案舊史僖宗紀中和元年四月以前大同軍防禦使李克用檢校工部尙書兼代州刺史雁門已北行營兵馬節度等使。卽表所云雁門節度徙治代州也。是年克用假道太原爲鄭從讜所阻還屯代州。至次年克用兵至河中乃兼神策天寧軍鎮遏忻代觀察使。卽表所云忻代二州隸雁門節度也。神策本禁軍其時偶隸克用麾下非雁門帥所得領似不當入方鎮表。

四年河東節度復領雲蔚二州。雲蔚本克用所部今移鎮河東仍以二州益之。

乾寧二年，析齊州置武肅軍防禦使。唐末防禦使亦有軍名，如齊州置武肅軍防禦、金州置昭信軍防禦、杭州置武勝軍防禦、眉州置保勝軍防禦是也。是時朱全忠攻朱瑾，瑾兄瓊以齊州降，故升置防禦，以授瓊，瓊爲瑾所殺，全忠以瓊弟玘代之。

四年，賜沂海節度使爲秦寧軍節度使。是歲朱全忠克兗州，以葛從周爲帥。考本紀乾符六年書秦寧軍節度使李係，光啓元年書秦寧軍節度使齊克讓，乾寧二年書秦寧軍節度使朱瑾，似秦寧軍號先已有之。

光化元年，感化軍節度復爲武寧軍節度，未幾復爲感化軍節度。案僖宗紀中和元年，感化軍將時溥逐其節度使支詳，自稱留後。三年，武寧軍節度使時溥爲東面兵馬都統，光啓二年，武寧軍將丁從實陷常州，武寧軍將張雄陷蘇州，昭宗紀景福元年，武寧軍將張璠、張諫以濠泗二州叛附於朱全忠。二年，朱全忠陷徐州，武寧軍節度使時溥死之。時溥傳亦云僖宗以武寧軍節度命之，則感化之復爲武寧，似在時溥爲節度之日。宰相表景福元年二月，劉崇望罷爲武寧軍節度使，其時欲以崇望代溥，而溥不肯代，則溥爲徐帥，其軍號武寧必矣。或朱全忠取徐之後，又改武寧軍爲感化軍乎？乾寧四年，全忠奏以潁州刺史王敬義兼徐州刺史，武寧軍節度使，卽此表所云感化軍復爲武寧也。乾寧四年十一月奏請必以夫年抵任，故表係光化三年，全忠又表朱友恭爲潁州刺史，感化軍節度留後，卽表所云未幾復爲感化

軍也。

天復元年罷感化軍節度。案舊本紀是年二月以朱友裕爲華州刺史感化軍節度使四月以潁州刺史朱友恭兼徐州刺史武寧軍節度使至天祐二年全忠封魏王武寧一道亦在管內蓋是年移感化軍名於華州而徐州軍額仍爲武寧初非罷此軍節度也表殆失之。

廿二史考異卷四十八

唐書八

方鎮表三

開元二年置幽州節度。諸州軍管內經略鎮守大使。唐會要。先天二年二月。甄道一除幽州節度。經略鎮守使。先天二年。卽開元元年也。相差一年。

置營平鎮守。治太平州。幽州管內無太平州。恐有譌文。

七年。升平盧軍使。爲平盧軍節度。經略河北支度管內諸蕃及營田等使。唐會要。開元七年閏七月。張

敬忠除平盧軍節度使。始有節度之號。八年四月。除許欽琰。又帶管內諸軍諸蕃及支度營田等使。

十五年。幽州節度大使。兼河北支度營田事。事當作使。唐會要。開元十五年十二月。除李尙隱。又帶河

北支度營田使。

二十七年。幽州節度使。增領河北海運使。唐會要。是年十二月。除李適之。又加河北海運使。

二十八年。平盧軍節度使。兼押兩蕃渤海黑水四府經略處置使。唐會要。是年二月。除王斛斯。又加押

兩蕃及勃海黑水等四府經略處置使。

天寶元年更幽州節度使爲范陽節度使。唐會要。是年十月除裴寬爲范陽節度使。其年安祿山爲平盧節度。三年代寬鎮范陽。仍領平盧軍。

至德元載置澤潞沁節度使。以程千里爲上黨節度。

二載升河中防禦爲河中節度兼蒲關防禦使。領蒲、晉、絳、隰、慈、虢、同七州。案舊史肅宗紀。乾元元年九

月以趙泚爲蒲州刺史。蒲同虢三州節度使。此河中置節鎮之始。所領不過三州。二年七月以王瓌爲蒲州刺史。蒲同絳三州節度使。易虢以絳。所領仍不過三州。時已置虢華節度使。以來瑱爲之。故不及虢也。至上元元年二月以崔寓爲蒲州刺史。蒲同晉絳等州節度使。或隰慈二州亦在管內乎。至德中蒲州未有河中之名。其置節度在乾元元年。表皆誤。

乾元二年河中節度兼河中尹。案舊本紀。上元元年三月升蒲州爲河中府。其四月以蕭華爲河中尹。充同晉絳等州節度觀察處置使。表書於乾元二年。誤。

廣德元年置相衛節度使。治相州。是年增領貝邢洛。號洛相節度。衛州復隸澤潞。未幾復領。號相衛六州節度使。相衛貝邢洛凡五州。而云六州。疑有譌脫。

大厯元年相衛六州節度。賜號昭義軍。是時薛嵩爲節度使。昭義之號。本在相州。後乃移於潞州也。地理志。永泰元年昭義節度使薛嵩表置磁州。六州之名。蓋合磁言之。然廣德初尙未有磁州。當於永泰

元年。書增領磁州。號相衛六州節度使。方爲得之。

十年。瀛州隸幽州。盧龍節度。滄州隸義武軍節度。德州隸淄青平盧節度。是歲。昭義帥薛勣。爲其下所逐。田承嗣盜有其地。詔遣諸道討之。李正己得德州。李寶臣得滄州。而承嗣將吳希光。亦以瀛州降。其時。朱滔方恭順。故卽以瀛與之也。義武。當爲成德之譌。自是承嗣失瀛。滄德三州。而得相衛。洛貝四州。建中元年。昭義軍節度。兼領澤潞二州。徙治潞州。案。澤潞與昭義。本是兩鎮。李抱玉爲澤潞帥。移鎮鳳翔。兼領澤潞。以從弟抱真爲留後。大厯十一年。昭義帥李承昭病。以抱真權知磁邢兵馬留後。其時昭義所管。祇有兩州耳。至是。抱真正授節度。遂兼澤潞之地。

三年。罷成德軍節度。置恆冀都團練觀察使。治恆州。深趙都團練觀察使。治趙州。是歲。李惟岳爲王武俊所殺。分成德管內爲三鎮。以武俊爲恆冀都團練觀察使。康日知爲深趙都團練觀察使。張孝忠爲易定節度使。名其軍曰義武。

置義武軍。案。表於義武一鎮。闕略不完。以例言之。當云置義武軍節度。領易定滄三州。治定州。又於貞元三年。書以滄州隸橫海軍節度。乃爲得之。

與元元年。置晉慈隰節度使。治晉州。尋罷。復置河中節度使。領河中府。同絳。統陝四州。是歲。李懷光據河中。以叛。四月。以唐朝臣爲河中尹。河中同晉絳節度使。遙領使名。未能有其地也。八月。以渾瑊兼河

中絳州節度使。充河中同華陝虢行營副元帥。以馬燧兼晉慈隰節度使。燧又讓於康日知。自是分爲二鎮。表當先云。復置河中節度使。次云。置晉慈隰節度使。治晉州。乃得其實。此文先後失序。其云晉慈隰節度尋罷。尤誤也。

廢恆冀深趙二觀察。復置成德軍節度使。領恆、冀、深、趙四州。初。恆、趙分鎮。王武俊自以功大賞薄。不受命。與田悅、李納、朱滔合從。阻兵兩載。及德宗幸奉天。武俊首先歸順。因授節度。防以深、趙與之。明年。朱滔死。並以德、棣還之。

貞元三年。置橫海軍節度使。以程懷直爲節度使。

四年。置晉慈隰防禦觀察使。時康日知已卒。除崔漢衡爲觀察使。加都防禦。不稱節度。依表例。當先云。罷晉慈隰節度。而後云置防禦也。

十五年。罷河中節度。置河中防禦觀察使。是歲。渾瑊薨。除杜確河中尹。河中絳州觀察使。不加節鎮。其後鄭元杜、黃裳等。復爲節度矣。

元和三年。罷晉慈隰觀察使。以三州隸河中節度。案。韋丹傳。拜晉慈隰觀察使。閱歲。自陳所治三州。非要害地。不足張職。爲國家費。不如屬之河東。帝從之。正謂此也。舊本紀。元和二年正月。以杜黃裳檢校司空同平章事。兼河中尹。河中晉絳等州節度使。則河中兼領晉慈隰。蓋在元和二年。

四年置保信軍節度使。領德棣二州。成德帥王士真卒。子承宗請獻德棣二州。因置保信軍。別除薛昌朝爲節度。既而承宗拒命。吐突承璀出兵無功。乃罷保信軍。復以二州隸成德軍。

十三年。以德棣二州隸橫海節度。時吳元濟旣平。橫海程權亦請入朝受代。承宗始獻德棣二州。乃除鄭權橫海軍節度。德棣滄景觀察使。尋又以烏重胤代之。

十四年。罷河中節度。置河中都防禦觀察使。是歲除李絳河中觀察使。宰相皇甫鎛惡絳。故不授節制。其明年。以韓弘代絳。仍爲節度。

長慶元年。置深冀節度。治深州。尋罷。是歲八月。以深州刺史牛元翼爲深冀節度使。尋授元翼成德軍節度。並領深冀。

置瀛莫都團練觀察使。治瀛州。尋升爲節度使。是歲三月。幽州帥劉總移鎮。析其地。以盧士玫爲瀛莫都團練觀察使。七月。朱克融作亂。就升士玫節度使。未幾。士玫亦被囚。此鎮遂廢。

置德棣二州觀察處置使。案舊本紀。長慶二年二月。以李光顏爲滄州刺史。橫海軍節度使。以李全略爲德州刺史。德棣等州節度使。卽其事也。表係於元年。又不云節度。當以舊紀爲正。未幾。光顏還鎮許

州。仍以全略爲橫海軍節度。合二鎮爲一。二年。置晉慈都團練觀察使。以李寰爲使。

大和元年升晉慈觀察使爲保義軍節度。是年罷。寰自觀察遷節度。尋移鎮橫海。遂罷保義軍。

三年置相衛澶三州節度使。史憲誠上書求覲。詔移鎮河中。以其子孝章爲相衛澶節度使。旣而魏軍

亂。殺憲誠。立何進滔。遂罷相衛節度。而徙孝章鎮鄆坊。

罷橫海節度。更置齊德節度使。鎮德州。尋廢。復置。更號齊德滄節度使。案是歲五月。誅李同捷。以傅毅

代李祐鎮橫海。而別以李有裕本名古爲齊德節度。蓋析爲二鎮。初未罷橫海節度也。其八月。以殷侗爲

齊德滄節度使。始去橫海之號。

會昌四年。澤州隸河陽節度。澤州以下九字。當在第二格。誤入第一格。

中和二年。節度使孟方立。徙昭義軍於邢州。而兼領潞州。自是五州有二昭義節度。案自會昌平劉稹

以後。昭義正有潞。邢。洛。磁四州。表云五州者。誤也。方立旣稱節度。而李克用復表其弟克脩爲昭義節

度。治潞州。由是有兩昭義軍。此中和三年事。表敘此事。失之太略矣。

光啓元年。賜河中節度。號護國軍節度。時王重榮爲節度使。

乾寧二年。齊州隸武肅軍節度。上卷云。析齊州。置武肅軍防禦使。此云節度。似誤。

天復元年。二昭義軍節度合爲一。復領澤州。案中和三年。分立昭義二鎮。大順元年。李克用取邢。洛。磁

三州。以安金俊爲團練使。二年。以李存孝爲邢州留後。乾寧元年。馬師素爲邢洛節度使。皆克用表授。

故不帶昭義軍號也。光化元年，葛從周取邢洺磁三州，朱全忠表從周爲留後，復稱昭義軍。其冬，潞州節度薛志勤卒，李罕之據潞以叛。全忠因表爲昭義節度。明年，以丁會代之。自是兩昭義軍皆屬於汴。旣而李嗣昭復取澤潞，克用表孟遷爲昭義節度。天復元年，汴軍攻澤潞，孟遷以城降，仍除丁會昭義節度。即表所云二節度合爲一也。據舊本紀，是年全忠奏請於昭義節度官階內，落下邢洺磁三州，卻以澤州爲屬郡。其河陽節度，古以懷州爲屬郡，從之。則是分邢洺磁與昭義爲二鎮，初非合而爲一，表殆誤矣。又考五代史孟方立傳，稱李克脩爲澤潞節度使，而李罕之以澤州刺史得據潞府，似澤州久在昭義管內，但此時始著爲令耳。

方鎮表四

景雲元年，安西都護四鎮經略大使。都護下當有領字，四鎮謂安西、疏勒、于闐、焉耆也。安西治龜茲地，置河西諸軍州節度，支度營田，督察九姓部落，亦水軍兵馬大使。案唐會要，景雲二年四月，賀拔延嗣爲涼州都督，充河西節度使。自此始有節度之號。至開元二年四月，除楊執一，又兼赤水九姓本道支度營田等使，表俱繫之元年，似疏。

先天元年，北庭護，領伊西節度等使。唐會要，先天元年十一月，史獻除伊西節度兼瀚海軍使。

開元五年，置隴右節度，兼隴右道經略大使。唐會要，開元元年十二月，鄯州都督陽旻除隴右節度，自

此始有節度之號。至十五年十二月，除張志亮，又兼經略支度營田等使，已後爲定額。

六年，西安都護領四鎮節度支度經略使。唐會要：開元六年三月，楊嘉惠除四鎮節度經略使。

七年，升劍南支度營田處置兵馬經略使爲節度使，兼昆明軍使。唐會要：開元五年二月，齊景胄除劍

南節度支度營田兼姚巒等州處置兵馬使，因此始有節度之號。表云七年，似誤。又青城山常道觀有

石刻，開元十三年，張敬忠上表，其署銜云：益州大都督府長史、劍南道節度大使、兼本道採訪經略大

使，則其時又有大使之名矣。

天寶十三載，安西四鎮復兼北庭節度。是年三月，以安西四鎮節度封常清兼伊西北庭節度。

至德元載，襄南陽二郡皆置防禦守捉使，尋升南陽防禦爲節度使。時魯炆以南陽太守兼守捉防禦

使，尋遷南陽節度使，襄陽防禦使，則魏仲犀也。

置興平節度使，以李奂爲之。

天水郡太守兼防禦守捉使及大震關使。蓋以郭英又兼之。

二載，廢南陽節度使，升襄陽防禦使爲山南東道節度使，領襄、鄧、隨、唐、安、均、房、金、商九州。均、房、金、商四

州，卽興平節度所領之上洛四郡也。興平節度至上元二年始廢，不應此時卽以四郡隸襄鄧，此事之

可疑者。又考是年正月，以魏仲犀爲襄陽山南道節度使，五月，魯炆自南陽走襄陽，除襄鄧十州節度

使。乾元二年，吳移鎮鄭穎，當以史翻代之。上元元年，翻以軍亂被殺，乃除來瑱襄鄧十州節度使。據魯吳來瑱傳，俱云十州，而表稱九州，亦未甚合。竊意吳爲節度時，均房四州未必在襄鄧管內，迨來瑱建節之時，李旻已移鎮，因以四州隸之耳。

乾元二年，以夔峽忠歸萬五州隸夔州。案乾元元年，已罷夔峽節度矣。此云隸夔州，當有脫譌。上元元年，荆南節度使兼江南尹。是年，升荊州爲江陵府，江南當作江陵。

荆南節度復領澧朗忠峽四州，以呂誼爲節度使。次年，增領潭岳諸州，亦誼所請也。

二年，廢興平節度使。李旻移鎮東川，此鎮遂廢。

置武關內外四州防禦觀察使。卽金商均房四州也。時呂誼等言，來瑱得士心難制，因別置四州觀察。

瑒所領止六州。寶應元年，詔瑒移鎮淮西，而以裴莪爲襄鄧七州防禦使之。置淮四十六州節度表在上元二年。此事雖不果行，亦宜見於表也。

廣德元年，升山南西道防禦守捉使爲節度使。以張獻誠爲使。

尋降爲觀察使。大曆三年，獻誠以疾辭位，除其弟獻恭爲節度觀察使，非降爲觀察也。

大曆元年，置邛南防禦使。治邛州，尋升爲節度使。未幾廢。置劍南西山防禦使。治茂州，未幾廢。永泰元年，劍南節度使郭英父爲兵馬使，崔旰所殺。邛州柏茂林等起兵討旰，蜀中亂。是年，以宰相杜鴻漸充

山南西道劍南東川等道副元帥兼劍南西川節度使鴻漸卽奏授柏茂林邛州刺史邛南防禦使崔旰茂州刺史劍南西山防禦使未幾又奏遷茂林爲邛南節度而以旰爲西川節度行軍司馬明年鴻漸入朝旰遂除劍南節度矣。

建中元年升山南西道觀察使爲節度使。時賈耽爲節度使。

貞元十一年西川節度增領統押近界諸蠻及西山八國雲南安撫使。時韋皋爲節度使。

元和十年置唐隨鄧三州節度使。以高靈寓爲使。

十一年廢唐隨鄧節度使。是年復置。高靈寓與吳元濟戰敗以袁滋代之。改稱彰義軍節度。領唐隨鄧

三州。故云廢也。未幾罷滋以李愬代之。仍稱唐隨鄧節度。

十二年廢唐隨鄧節度使。以唐隨鄧三州還隸山南東道。淮西已平以李愬充山南東道節度。襄鄧隨

唐復郢均房等州觀察使。仍合二鎮爲一。

大和六年廢荆南節度使。置都團練觀察使。是歲段文昌移鎮西川。除崔瑄荆南都團練觀察使。不加

節鎮。

開成三年復置荆南節度使。李石以宰相除荆南節度。

大中三年升秦州防禦守捉使爲秦成兩州經略天雄軍使。是年鳳翔節度使李玘奏收復秦州。

五年置歸義軍節度使。以沙州刺史張義潮爲之。

咸通八年置定邊軍節度。觀察處置統押近界諸蠻。並統領諸道行營兵馬制置等使。以李師望爲使。

十一年廢定邊軍節度使。去年師望戰沒。以竇滂代之。滂亦遁去。此軍遂罷。

光啓元年升金商都防禦使爲節度。兼京畿制置萬勝軍等使。是年罷節度。案舊本紀光啓二年六月。

以楊守亮爲金州刺史。金商節度京畿制置使。表列於元年。誤也。其七月守亮除山南西道節度使。三

年正月又除楊守宗金商節度。五月詔守宗權知許州事。自是金商不除節度。

置武定軍節度使。治洋州。舊本紀光啓二年正月以李茂貞爲洋州刺史。武定軍節度使。表在元年。亦

誤。

二年升興鳳二州防禦使爲威義軍節度使。以楊晟爲使。晟敗走而滿存代之。竝領利州。

文德元年賜山南東道節度號忠義軍節度。秦宗權將趙德諱以山南東道七州降。授節度使。並賜軍

號。德諱卒。子匡凝代。

置永平軍節度使。領邛蜀黎雅四州。以王建爲使。

升彭州防禦使爲威戎軍節度使。領彭、文、成、龍、茂五州。楊晟失興鳳走。據文、龍、成、茂四州。田令孜以已

故將假威戎軍節度使守彭州。

大順二年廢永平軍節度使。王建已得西川，卽廢此軍而兼其地。

景福元年彭州隸龍劍節度。是年王建攻楊晟克之。

乾寧四年更感義軍節度曰昭武軍節度。以蘇文建爲使治利州。

光化元年升昭信軍防禦爲節度使。以馮行襲爲使。

置武貞軍節度使領澧、朗、淑三州。以雷滿爲使。

天祐二年賜昭信軍節度號戎昭軍節度。舊本紀金州馮行襲奏嘗道昭信軍額內一字與元帥全忠

諱字同乃賜號戎昭軍蓋全忠祖諱信故也。

三年忠義軍節度復爲山南東道節度。趙匡凝爲朱全忠所攻奔淮南因去忠義之號。

廢武定軍節度。馮行襲移鎮匡國軍因併均房入襄鄧也是時有兩武定軍此所省者均州之武定若

洋州之武定乃王建所有非全忠所能廢。

升夔忠涪防禦使爲鎮江節度使。此與利闔興文兩節度皆王建所置。

廿二史考異卷四十九

唐書九

方鎮表五

至德元載置淮南節度使。以高適爲之。

領揚、楚、潞、和、壽、廬、舒、光、蘄、安、黃、申、沔十三州。治揚州。尋以光州隸淮西。此當書郡名。乾元以後乃改稱

州耳。東川節度領梓、遂等州。江東領杭州。亦當稱郡名。又案方鎮表第四。是年置淮南西道節度使。領

義陽、弋陽、潁川、滎陽、汝南五郡。義陽卽申州也。當云尋以光、申二州隸淮西。淮南所領止十一州耳。

二載置江東防禦使。是歲八月。以崔渙爲江東採訪防禦使。案韋陟傳。永王兵起。授御史大夫。江東

節度使。其與來瑱。高適同盟載書。稱淮西節度使瑒。江東節度使陟。淮南節度使適。是江東置節度。亦

在至德二載。表何以不書。

乾元元年。置浙江西道節度兼江寧軍使。治昇州。尋徙治蘇州。案舊本紀。是年三月。江寧置節度使。不

言治所。亦不知除授何人。十二月。以昇州刺史韋黃裳爲蘇州刺史。浙西節度使。此浙西節度治蘇州

之證。黃裳旣自昇移蘇。或在昇時已領節度。故表云治昇州。徙治蘇州也。乃次年六月。顏真卿除昇州

刺史充浙江西道節度使。上元元年正月，侯令儀除昇州刺史，充浙江西道節度，兼江寧軍使。則是治蘇州未幾，仍治昇州。表既闕而不書，而表云乾元二年廢浙江西道節度者，亦未足深信也。

置浙江東道節度使，治越州。乾元二年，除呂延之。上元元年，除趙良弼。

置洪吉都防禦團練觀察處置使，兼莫徭軍使。案地理志，洪州有南昌軍。乾元二年置，未見有莫徭軍。三年，沔州隸鄂岳節度。是年置鄂岳都團練使，非節度也。永泰元年，表云，蘄黃二州隸鄂岳節度，其失與此同。

上元二年，浙江西道觀察使徙治宣州，罷領昇州。是年正月，除季廣琛宣州刺史，充浙江西道節度使。時劉展初平，省昇州入宣潤二州，故移節度治宣州。不云改爲觀察也。至大庾初，韋元甫、李栖筠始稱浙西團練觀察使。

廣德二年，廢東川節度，以所管十五州隸西川節度。時嚴武爲劍南節度使，兼領兩川。

洪吉都防禦團練觀察使，更號江南西道。時張鎰爲觀察使。

大庾元年，復置劍南東川節度使。杜鴻漸以副元帥領西川節度，仍分置東川節度，令山南西道張獻

誠兼領之。

浙江西道觀察使，罷領宣歙二州。此後觀察使韋元、李栖筠、李涵、李道昌皆帶蘇州刺史，蓋徙治蘇州。

而表亦失書

復置宣歙池等州都團練守捉觀察處置使。以陳少游爲之。

二年廢劍南東川節度。置都防禦觀察使兼靜戎軍使。治遂州。尋復置節度使。治梓州。是年除遂州刺

史杜濟。劍南東川節度觀察等使。表云。廢節度復置。蓋杜濟先除防禦。而後進節度也。其明年。鮮于叔明代濟爲東川節度使。遂州刺史。則其時尙治遂州。未幾移治梓州。乃兼梓州刺史也。

五年廢浙江東道節度使。置都團練守捉及觀察處置等使。是年浙東觀察使薛兼訓移鎮河東。以陳

少游爲浙江東道團練觀察使。俱不稱節度。

六年廢福建節度使。置都團練觀察處置使。案。舊本紀。大厯四年。已有福建觀察使李承昭。

十四年合浙江東西道。置都團練觀察使。表不著治所。蓋仍治蘇州也。

廢宣歙池觀察使。置團練使。案。舊本紀。是年六月。罷宣歙池鄂岳沔二都團練觀察使。此置字衍文。

置鄂州觀察防禦使。防禦當作團練。

建中元年分浙江東西道都團練觀察使爲二道。浙西觀察。蓋以韓滉爲之。

二年合浙江東西二道觀察。置節度使。治潤州。尋賜號鎮海軍節度。是年五月。加蘇州刺史韓滉檢校禮部尚書。潤州刺史。充鎮海軍節度。浙江東西道觀察處置等使。始自蘇州徙治潤州。

四年升江南西道都防禦團練觀察使爲節度使。以嗣曹王皋爲之。舊本紀在三年十月。與元元年升壽州團練使爲都團練觀察使。領壽濠廬三州。以張建封爲之。濠當作豪。貞元元年廢江南西道節度使。復置都團練觀察使。曹王皋移鎮荆南。以鄂岳觀察使李謙代之。不加節度。

三年分浙江東西爲二道。復置浙江西道都團練觀察使。領潤、江、常、蘇、杭、湖、睦七州。治蘇州。是歲韓滉卒。不除節度。以白志貞爲潤州刺史。浙西觀察使皇甫政爲越州刺史。浙江觀察使表不云罷鎮海軍節度者。史文之漏也。其下一格當云。復置浙江東道都團練觀察使。領某某州。治越州。而今無其文。又是年復置宣歙池觀察使。以劉贊爲之。而表亦無之。皆傳寫脫之也。此後白志貞、王緯、李若初、李錡除浙西觀察。俱帶潤州刺史。則其時尚治潤州。表云治蘇州。亦誤。

四年廢壽州都團練觀察使爲團練使。張建封遷徐泗濠節度使。因去都團練之號。仍爲本州團練也。十五年置安黃節度觀察使。治安州。以伊慎爲使。十九年賜軍號奉義以寵之。十六年置舒、廬、滁、和四州都團練使。案舊本紀元和二年停舒、廬、滁、和四州團練使。表既書置團練於前。而不書罷團練于後。亦疏漏也。

元和元年罷奉義軍節度使。升鄂岳觀察使爲武昌軍節度使。增領安黃二州。是歲伊慎入朝。因除鄂

岳沔觀察使韓皋爲鄂岳蘄安黃等州節度使兼領之而省安黃節鎮也。順宗實錄永貞元年五月以韓皋爲鄂岳觀察武昌軍節度使似武昌軍先已有之。

二年升浙江西道都團練觀察使爲鎮海軍節度使。時李錡由浙西觀察進節度使錡反以李元素代之。

四年廢浙江西道節度使復置觀察使。案元和三年韓皋自武昌移鎮海軍節度浙江觀察使仍帶節度其五年坐事奪一月俸料史但稱浙西觀察蓋已罷節度使額矣。

五年罷武昌軍節度使置鄂岳都團練觀察使。案元和三年韓皋移鎮當以郝士美代之五年士美授河南尹而呂元膺代之紀傳稱士美爲鄂岳觀察使似元和三年以後武昌已無節度之名。

六年浙西觀察罷領鎮海軍使宜欵團練使罷領采石軍使。案是年十月詔諸道都團練使足修武備以靖一方而別置軍額因加吏祿亦既虛設頗爲浮費其潤州鎮海軍宜州采石軍越州義戎軍當生義勝

洪州南昌軍福州靖海軍地理志作寧海軍等使額並宜停表惟載鎮海采石二軍餘皆無之。

大和九年復置鎮海軍節度使數日廢既而復置隄月又廢。案大和八年十一月以李德裕爲鎮海軍節度使浙江西道觀察等使九年四月德裕爲太子賓客分司東都而除賈餗浙西觀察代之此一置而一罷也是月賈餗拜相以路隨爲鎮海軍節度浙西觀察等使七月隨卒以崔郾爲浙西觀察使此

再置而再罷也。數日當爲數月。傳寫之譌。

大中元年。復置武昌軍節度使。是年。宰相盧商。出爲鄂岳觀察使。加節鎮以寵之。然敬宗寶曆初。牛僧

孺亦以宰相出爲武昌軍節度。表卻闕而不書。

二年。罷武昌軍節度使。案。盧商鎮武昌。至十二年。始以疾求代。而張毅夫代之。則武昌節度之罷。似當

在十二年以後。表乃云二年罷節度。四年復置。六年又罷。所未詳也。

咸通三年。置鎮海軍節度使。案。宰相表。咸通四年五月。杜審權檢校吏部尚書。同平章事。鎮海軍節度

使。表書置節度於三年。舊本紀在五年。又不書節度。皆互異。

八年。廢鎮海軍節度使。審權除尚書左僕射。以楊收爲浙西觀察使代之。

六年。升江南西道團練觀察使爲鎮南軍節度使。以嚴譔爲之。

十一年。置鎮海軍節度使。宰相表。是年九月。曹確檢校司徒同平章事。鎮海軍節度使。舊本紀。不書節

度。而書觀察。又乾符元年二月。趙隱檢校兵部尚書。鎮海軍節度使。舊本紀。不書節度。而書都團練觀

察。至五年除高駢。乃稱節度使。

中和三年。升浙江東道觀察使爲義勝軍節度使。以劉漢宏爲之。

光啓三年。改義勝軍節度爲威勝軍節度。時董昌逐劉漢宏。自稱浙東觀察使。因改軍號寵之。

文德元年。置忠國軍節度使。治湖州。以李師悅爲之。

復置武昌軍節度。時杜洪據鄂州。自稱留後。因以武昌軍節授之。

龍紀元年。置杭州防禦使。以錢鏐爲之。

復升江南西道觀察使爲鎮南軍節度使。以鍾傳爲之。

景福元年。置龍劍節度使。領龍、劍、閩四州。以楊守貞爲之。

升宣歙團練使爲寧國軍節度。以楊行密爲使。據行密傳及通鑑。則寧國軍之置。乃在大順元年。與此

不合。行密已得淮南。表田頽爲寧國軍節度。守宣州。

二年。升武勝軍防禦使爲都團練。蘇、杭等州觀察使。尋廢。徙鎮海軍節度使。治杭州。是歲閏五月。以武

勝防禦使錢鏐爲蘇、杭觀察使。九月。以鏐爲鎮海軍節度使。鎮海軍本在潤州。今以杭州刺史兼之。

乾寧三年。改威勝軍節度爲鎮東節度。是歲。錢鏐討董昌。克之。朝廷除宰相王搏爲威勝軍節度使。既

而兩浙吏民上表。請以鏐領浙東。乃改軍名鎮東。令鏐兼領之。

四年。置武信軍節度使。領遂、合、昌、滄、瀘五州。王建旣得東川。析置此鎮。以其養子宗佶爲節度。

升福建都團練觀察處置使爲威武軍節度使。以王審知爲之。據審知神道碑。蓋兼領三司發運等使。

天復三年。廢寧國軍節度使。復爲都團練觀察使。楊行密攻田頽。殺之。以臺濛爲宣州觀察使。

天祐二年置欽、葵、衝、睦四州都團練觀察處置使。此楊行密所置。以陶雅爲之。

方鎮表六

天寶十載置安南管內經略使。領交、陸、峯、愛、驩、長、福祿、芝、武峩、演、武安十一州。自天寶至至德。有郡無州。表當書郡名。不當書州名也。又案地理志。演州。貞觀中廢。廣德二年。析驩州復置。則天寶中。不當有演州。志與表當有一誤。

至德元載。升王府經略討擊使爲嶺南節度使。唐會要。至德二年正月。賀蘭進明。除嶺南五府經略兼節度使。嶺南自此始有節度之號。表列於元載。與會要小異。進明亦未之任也。

廣德二年。改安南節度使爲鎮南大都護。都防禦觀察經略使。案地理志。至德二載。改安南都護府曰鎮南都護府。蓋肅宗惡祿山。凡郡縣名有安字。皆易字。不應至是乃改鎮南也。

大歷元年。更鎮南曰安南。據地理志。在三年。

四年。湖南觀察使。徙治潭州。舊本紀。是年二月。以湖南都團練觀察使衡州刺史韋之晉。爲潭州刺史。因是徙湖南軍于潭州。

置辰、溪、巫、錦、業五州都團練守捉觀察處置使。案舊本紀。大歷十年。罷辰、溪、獎五州經略使。復隸黔中。表卻失書獎州。卽業州也。巫州。後改潁州。

十二年置黔州經略招討觀察使。以李國清爲之。

元和十五年廢邕管經略使。以南蠻傳考之。蓋罷邕管入容管。以嚴公素爲容管經略統之。

長慶二年復置邕管經略使。以崔結爲之。

咸通三年分嶺南節度爲東西道。改嶺南節度爲嶺南東道節度。時韋宙爲嶺南節度使。改稱東道。據通鑑

舊本紀謂是年以邕管經略使鄭愚充嶺南東道節度使。以宋戎爲嶺南西道節度。皆非也。

升邕管經略使爲嶺南西道節度使。增領蒙州。蒙當爲象字之譌。據通鑑及舊本紀。是時嶺南西道增

領龔象、藤、巖四州。表祇載象州。未免漏略矣。嶺南分鎮之議。起於邕管經略使蔡京。朝廷因以嶺南西

道節度授之。其年京爲軍士所逐。以鄭愚代之。明年愚請代。乃除康承訓。五年承訓罷。又除張茵。

七年升安南都護爲靜海軍節度使。以高駢爲之。

中和三年升湖南觀察使爲欽化軍節度。閔頊自觀察加節度使。通鑑作閔助。

光啓元年改欽化軍節度爲武安軍節度使。通鑑在二年。案僖宗紀。光啓二年淮西將黃皓殺欽化軍

節度使閔助。昭宗紀。景福二年鄆處訥陷潭州。欽化軍節度使周岳死之。至乾寧元年始稱武安軍節

度使。鄆處訥則是武安軍之名。當改於乾寧元年矣。

大順元年賜黔州觀察使號武泰軍節度。以王建肇爲之。黔中置節度。始於是年。而通鑑稱至德元載。

升五溪經略使爲黔中節度。似未然也。舊史僖宗紀。光啓元年。有保鑾都將兼黔中節度觀察使曹誠。三年。有保鑾都將黔中節度觀察使李鋌。

乾寧二年。賜嶺南東道節度號。清海軍節度。是歲。以嗣薛王知柔。爲清海軍節度使。知柔薨。徐彥若代之。彥若卒。遂爲劉隱所據。

四年。升容管觀察使爲寧遠軍節度使。是歲。特置此軍。以河東大將蓋寓。遙領節度使。天復元年。以董彥弼爲節度。亦不之鎮。

光化三年。升桂管經略使爲靜江軍節度使。案。昭宗紀。乾寧三年。安州防禦使宣晟。陷桂州。靜江軍節度使周元靜。部將劉士政死之。乾寧紀元。在光化之前。似靜江軍號。先已有之。

天復三年。武泰軍節度。徙治涪州。黔中時。爲王建所併。以養子宗本。爲武泰留後。宗本言黔州地多瘴癘。請徙治涪州。

廿二史考異卷五十

唐書十

宗室世系表上

太祖玄皇帝諱曷。太祖卽世祖。避太宗諱也。諸紀傳仍書世祖。無定例。高祖紀曷作曷。

宗室世系表下

太宗十四子。長曰恆山愍王承乾。太宗諸子傳。作常山愍王。目錄同。李通之李載義傳俱云恆山愍王。案地理志。鎮州常山

郡。本恆州恆山郡。元和十五年。避穆宗名。更傳稱常山愍王者。後人追改之也。宰相世系表。范陽李氏。自云常山愍王之後。

顏杲卿。安祿山。史思明諸傳。稱常山太守。皆從追改之名。惟明皇紀。書恆山郡太守顏杲卿。此當時本

稱也。藩鎮鎮冀傳。自李寶臣至王承宗。皆書恆州。自王廷湊以後。乃書鎮州。甚得史法。惟載李絳鎮州

世相繼一語。亦當作恆字。偶未檢照耳。薛稷傳。伯陽子談。尚恆山公主。公主傳作常山公主。談亦一作譚。亦一

從本稱。一從改名。

定著三十九房。終唐之世。有幸相十一人。郇王房有林甫。回。鄭王房有程。石。福。小鄭王房有勉。夷簡。宗閔。

恆山王房有適之。吳王房有峴。惠宣。太子房有知柔。案。表書宰相之例。必云相某宗。如程字表臣。相

敬宗石字中玉。相信宗之類是也。獨太子太傅同平章事福。不云相信宗。而宰相表亦無福名。考福本傳。初拜劍南西川節度使。同中書門下平章事。後為山南東道節度使。以勞檢校司空。同中書門下平章事。蓋唐自中葉以後。節鎮加宰相銜者極多。謂之使相。亦稱外宰相。非真宰相也。鄭畋傳。陳敬瑄欲畋曰。外宰相安得論品乎。卒不肯處其下。方技桑道茂傳。李鵬為盛唐令。道茂曰。君位止此。而冢息位宰相。次息亦大鎮。子孫百世。鵬卒。後石至宰相。福歷七鎮。諸孫通顯云。此可證福之未嘗入相。而世系表以福列宰相十一人之數。誤矣。又考定州刺史房有麟。相肅宗。此則十一人之一。而計目轉不及焉。或當數而不數。或不當數而數。甚矣其舛也。

宰相世系表一上

裴氏。宰相十七人。南來吳有耀卿。行本。坦。中眷有光庭。遵慶。樞。贊。案。僖宗朝宰相。坦。系出中眷。非出南來吳。此必因南來吳裴亦有名坦者。故致誤爾。南來吳之裴坦。官太平令。未嘗任宰相也。

劉氏。宰相十二人。彭城房有滋。文靜。瞻。尉氏房有仁軌。瑒。臨淮房有樟之。南陽房有洎。廣平房有祥道。景先。從一。丹陽房有鄴。南華房有晏。河南劉氏宰相一人。崇望。案。宰相表有劉幽。求。相睿宗。玄宗。宗。載其世系。

宰相世系表一下

陳氏。齊王建爲秦所滅。三子昇、桓、軫。軫楚相。封潁川侯。因徙潁川。稱陳氏。生嬰。秦東陽令史。嬰生成安君餘。陳祖范曰。案戰國策。軫本秦人。史記。軫與張儀俱事秦。惠王在位日久。歷四王而後。至始皇。始皇二十五年始滅齊。遷王建於其年代。相去若此。安有建生軫之理。邪。嬰之爲衆推戴也。其母云。自吾爲汝家婦。未聞汝先古有貴者。若嬰是楚相子。齊王後。母言不符矣。嬰與餘同時起兵。嬰東陽人。餘大梁人。一屬項。一佐趙。安有一家父子之理。

準字道基。晉太尉廣陵元公。生伯珍。建興中。渡江居曲阿新豐湖。生匡。二子赤松、世達。案陳書南史本紀。俱云準生匡。匡生達。此表以匡爲準孫。與前史異。世達單稱達者。疑避唐諱。

文讚三子。談先、霸先、休先。談先。梁東宮直閣將軍。義興昭烈公。案陳書。高祖之兄名道談。不名談先。道談始贈長城縣公。繼贈義興郡公。改始興郡王。史從其後封。當云始興王。不當云義興公也。

宰相世系表二上

杜氏。秀二子。果、皎。皎生徽。隋懷州長史。豐鄉侯。生吒。吒卽如晦之父也。案舊唐書。杜如晦傳。曾祖皎。當是高祖。

周贈開府儀同三司。遂州刺史。高祖徽。當是曾祖。周河內太守。祖果。周溫州刺史。入隋。工部尚書。義興公。周

書有傳。父吒。隋昌州長史。新書如晦傳。亦云祖果。有名周隋間。是果爲如晦之祖審矣。表乃以果與皎爲昆弟。是不然也。周書杜杲傳云。祖建。魏輔國將軍。贈豫州刺史。父皎。儀同三司。杲果字形相似。又是

雙聲。故陳果仁一作果仁。薛仁果一作仁果。此杜果。即杜果也。其祖名建。與唐表傳亦互異。又考舊書淹傳。祖業。周豫州刺史。父徵。河內太守。似淹與吒。卽咤字。非親昆弟。史文之乖刺如此。

元穎。元絳。下空一格。案。審權卽元絳子。中閒不應空格。又據舊史。審權與蔚均爲元絳之子。表別列蔚於元絳之左。且比元絳超一格。亦恐誤也。

杜氏。宰相十一人。如晦。淹。元穎。審權。讓能。黃裳。佑。悛。正倫。鴻漸。暹。案。宰相表。有杜景佺。相武后。

隴西李氏。宰相十人。武陽房有迴。承。姑。臧。大房有義。琰。蔚。揆。逢。吉。丹。陽。房有靖。昭。德。又有道。廣。元。紘。晟。趙。郡。李氏。宰相十七人。南祖有游。道。藩。固。言。日。知。敬。玄。紳。元。素。東。祖有絳。嶠。珏。西。祖有懷。遠。吉。甫。德。裕。遼。東。有。泌。江。夏。有。郟。礫。漢。中。有。安。期。案。高。宗。朝。宰。相。李。義。府。自。言。系。出。爲。郡。文。宗。朝。宰。相。李。訓。揆。之。族。孫。武。宗。朝。宰。相。李。讓。夷。系。出。隴。西。又。武。后。時。有。宰。相。李。景。謨。表。失。載。宰。相。表。又。有。李。忠。臣。李。懷。光。二。人。皆。叛。臣。故。不。敘。其。系。

宰相世系表二中

太原王氏。霸字儒仲。居太原。晉陽生成。咸十九世孫澤。字季道。雁門太守。案王霸被徵。在後漢之初。而季道兄弟。總角爲郭林宗所知。林宗卒於建寧初。距光武初。僅百三十四年。而自霸至澤。傳世二十。此理之必無者。

昶二子渾、濟、渾。晉錄尙書事京陵元侯。生湛。字處沖。汝南內史。案。晉書。湛爲渾之弟。濟則渾之子。故濟稱湛爲叔。此表差誤。

王氏。宰相十三人。琅邪有方慶、璵、搏、璿。太原有溥、縉、珪、涯、陵、播、鐸。京兆有徽、德真。案宰相表有王本立、王及善。皆相武后。表闕其世系。華陰王氏有孝傑。已見於表。而計目不及。何疏漏至此。

魏氏。萬生芒季。季生武子鑾。鑾生悼子。悼子生昭子絳。案春秋傳。絳諡莊子。其諡昭者。乃曼多也。表據史記。與左氏異。

潛。字蘊華。子敖。沈炳震曰。舊書魏書傳。潛。于敖甥。後琮爲相。潛歷顯官。琮謂于琮敖之子。於潛爲中表。舊書傳誤。以于作子。表遂列敖於潛下。以舅爲子。誤之甚也。

溫氏。大雅。字彥弘。彥博。字大臨。彥將。字大有。案本傳。大有字彥將。歐陽公集古錄疑其事。謂兄弟義當一體。而名大者字彥。名彥者字大。不應如此。洪景伯始考正之。云顏魯公作顏勤禮碑。敘顏溫二家之盛。云思魯、大雅俱仕東宮。惑楚、彥博。同直內史。游秦、彥將。皆典祕閣。是彥博、彥將。皆以彥配名。惟大雅異。復考大雅撰唐創業起居注書。隋煬帝遣使夜至太原。溫彥將宿于城西門樓上。首先見之。報兄彥弘。馳以啓帝。帝方臥。聞而驚起。執彥弘手。據此。則溫氏昆弟。皆以彥爲名。明矣。而此書首題大雅奉敕撰。又顏碑有云大雅。其故何耶。蓋唐之孝敬皇帝諱弘。如徐有功。本名弘敏。緣避諱。遂以字行。大雅

生在孝敬之前，後追改之，故稱其字爲名。如晉書不云劉淵而云劉元海，不云石虎而云石季龍也。

宰相世系表二下

褚氏。宋共公子段，字子石，食采於褚，其德可師，號曰褚師。此俗生傳會之詞，不足信。褚師當是以官

爲氏。鄭公孫黑請以印爲褚師，杜預云：褚師，市官是也。衛有褚師聲子，則褚師一官，宋衛鄭皆有之。

漢梁御史中丞中書侍郎。南史：漢作灑，灑亮傳作湮，未知誰是。

象，太子舍人。舊書：灑亮傳象作蒙，予見灑亮碑石刻正作蒙，則象爲誤文也。

崔氏。仁師，相太宗高宗。案宰相表：貞觀二十二年正月，中書舍人崔仁師爲中書侍郎，參知機務。二

月，除名，流連州。自後未有入相之事。本傳但云永徽初，授簡州刺史而已。此表高宗二字，衍文也。

宰相二十三人。鄭州有元綜，鄆陵有知溫，南祖有昭緯，慎由，允，晉，神基，清河大房有龜從，小房有彥昭，羣

鄆，青州房有圓，安平房有仁師，滎，博陵大房有玄暉，損，鉉，元式，第二房有珙，遠，祐，甫，植，第三房有日用。

案表：博陵大房有洸，字內融，相僖宗，博陵二房有安上，字敦禮，相高宗，造，字玄宰，相德宗，皆失舉其

目。又玄暉孫渙明，皇西狩，拜門下侍郎，同中書門下平章事，表但云門下侍郎，不云相，玄宗亦誤也。崔

氏宰相實二十七人。

宰相世系表三上

韓氏。宰相四人。瓊休混弘。案韓混傳。混爲浙江東西觀察使。鎮海軍節度使。貞元元年。加檢校左僕射。同中書門下平章事。江淮轉運使。宰相表不列混名。而本紀亦不言加混平章事。蓋方鎮加宰相。不得爲眞宰相也。韓氏宰相。但可云三人。不當以混充數。

任氏。宰相一人。雅相。案宰相表。有任知古。相武后。

宰相世系表三下

上官氏。楚王子蘭爲上官大夫。以族爲氏。案史記。上官大夫乃靳尚。非令尹子蘭。

樂氏。樂呂孫喜。喜生司城子罕。據左氏傳。子罕卽樂喜字。表誤以爲二人。

孫氏。宰相二人。清河有茂道。武邑有偃。案宰相表。有孫元亨。相武后。

趙氏。宰相四人。仁本。愷。彥昭。宗儒。案宰相表。有趙隱。相懿宗。

宰相世系表四上

韋氏。月將以直諫死中宗朝。案世系表之例。書官位不書事狀。而韋月將以直諫死中宗朝。崔泰之以職方郎中。預平二張。崔謬之以商州司馬。預平韋后。功第二。盧鼎與起居郎蘇楷。羅袞。請改昭宗諡曰襄。此四事者。特書于表。雖寓褒貶之旨。然一代忠姦。當褒貶者。不獨此四人。且月將事已見武三思。尹思貞。宋璟傳。泰之。謬之。見其父知溫傳。蘇楷請改諡事。亦見昭宗紀。加增盧鼎。羅袞二人名於紀中。

則此文皆可刪也。崔瑒相黃巢。此何足齒及。而表亦書之。若云以此示貶。則唐臣之仕于安史泚巢者不少矣。獨書瑒一人。亦非例也。崔瑒。鄆之子。其相賊事。當附見鄆傳。唐彥謙。號鹿門先生。不書於本傳。而書於表。亦失史法。

宰相十四人。平齊公房有保衡、弘敏、東眷有方質、逍遙公房有貫之、處厚、侍價、鄆公房有巨源、南皮公房有見素、駙馬房有溫、龍門公房有執誼、襄陽當云小道有思謙、嗣立、京兆有貽範、昭度。據表。鄆公房尚有安石、相武后中宗睿宗。小逍遙公房尚有承慶、相武后實十六人。又宰相表有韋琮、相宣宗。此表失載。

郭氏。平王東遷。奪毓叔之地與鄭武公。楚莊王起陸渾之師伐周。責王滅毓。於是平王求毓叔裔孫序。封於陽曲。毓曰郭公。案。楚莊不與平王同時。春秋。莊公二十四年。郭公、公羊以爲失地之君。則其時郭已亡矣。楚莊伐陸渾之戎。又在其後六十九年。

武氏。攸宜。冬官尙書。外戚傳。終右羽林大將軍。與表異。武氏子弟封王者。惟攸歸、攸止、載德。三人先死。不及削封。故表著之。餘皆書所降之封。於例當矣。乃攸宜自建安王降息國公。攸緒自安平王降巢國公。攸寧自建昌王降江國公。表并公爵亦不書。重規已降封郟國公矣。而表仍書高平王。懿宗已降封耿國公矣。而表仍書河閒王。當作河內崇訓已降封鎬國公矣。而表仍書高陽王。延義已降封魏國公。

矣。而表仍書嗣魏王。此又義例之自相違反者也。

攸望。少府監蔡公。案外戚傳。降封葉國公。舊唐書作鄴國。

嗣宗。蒲州刺史管公。外戚傳。終司衛卿。

延祚。光祿少卿鄒公。案舊書外戚傳。延祚本咸安郡王。降封咸安郡公。與此互異。且新舊傳並云。重規

降封鄒國。而表屬之延祚。恐誤。

宰相五人。攸暨。攸寧。元衡。三思。承嗣。宰相表又有武什方。相武后。吳氏糾謬書。譏其脫漏。以予考之。什

方。本章氏。賜姓武。表雖不書。未爲大失。但本表元有兩例。李世勤本徐氏。表從徐氏。不從李氏。此一例

也。元載本章氏。表不別出景氏。而于元氏世系之後云。大歷宰相元載。本章氏。故不著。又一例也。此什

方者。既不入章氏。又不附書武氏之後。於例亦未當也。

宰相世系表四下

豆盧氏。魯元。後魏太保襄城公。案魏書。盧魯元。昌黎徒河人。曾祖副鳩。仕慕容垂。爲尙書令。臨澤公。

祖。父並至大官。不言慕容氏之族。且是盧氏。非豆盧氏。故沈炳震極誣此表之謬。今檢表。稱慕容廆弟

西平王暹。生尙書令臨澤敬侯制。制生右衛將軍北地愍王精。降後魏。北人謂歸義爲豆盧。因以爲氏。

二子醜。勝。勝子魯元。是尙書令臨澤敬侯制。乃魯元之曾祖也。制與副。字形相似。官與封號又同。唯公

侯字小異。明是一人。表但脫去鳩字耳。慕容出於徒河。而魯元亦稱昌黎徒河人。其爲慕容之支庶。亦無可疑。魏初改姓豆盧。猶之改禿髮爲源氏。其單稱盧者。必是孝文遷洛時。改代北複姓。因去豆存盧。故魏收修史仍之也。宇文泰據關中。悉復代北氏族之舊。故豆盧寧仍稱本氏。沈氏謂魯元自姓盧氏。與豆盧絕不相蒙。斯不然矣。晉書後燕載記。稱慕容麟以兵劫北地王精。謀率禁旅弑主。精以義距之。麟怒殺精。是精無降魏之事。北史豆盧寧傳云。燕北地王精之後。高祖勝以皇始初歸魏。賜姓豆盧氏。蓋得其實。又據北史。寧父萇。是勝之曾孫。而表以萇爲醜之孫。疑亦當從傳也。

豆盧氏宰相一人。欽望。案宰相表。有豆盧瑑。相懿宗。

朱氏。宰相一人。敬則。案宰相表。有朱朴。相昭宗。

宰相世系表五上

鄭氏。暉。生中書博士茂。一名小白。七子。白麟。嗣伯。叔夜。洞林。歸藏。連山。幼麟。因號七房。鄭氏大房。白麟。後絕。第三房。叔夜。後無聞。案魏書。鄭義。字幼麟。即幼麟父暉。生六子。義。五兄。長曰麟。次小白。次洞林。次叔夜。次連山。元和姓纂。暉生七子。曰白麟。小白。叔夜。洞林。歸藏。連山。幼麟。號七房。鄭氏魏書不及歸藏。意其後早絕故乎。唐表所載七子。惟嗣伯乃小白之子。其餘六人。乃小白昆弟。而表俱以爲小白子。誤矣。白麟有孫道懷。爲隨郡太守。叔夜子孫亦多顯者。表一以爲絕。一以爲無聞。似未可信。

宰相九人北祖有珣瑜、覃、朗、餘慶、從、謹、延昌、南祖有綱、榮、陽、有、政、滄、州、有、惜。案宰相表有鄭肅相武宗。鄭繁相昭宗。吳氏糾謬數世系表脫漏者。惟舉繁不及肅。亦考之未審也。

宰相世系表五下

渾氏。渾、隋左玉鈐衛大將軍。案回紇傳。太宗以阿貪支爲有領軍衛大將軍。皋蘭州刺史。阿貪支死。子回貴嗣。回與迴同此表云渾者。即阿貪支也。貪渾音相似。阿貪支受官於太宗時。表不書唐官。而書隋官。亦非是。

元慶。鎮國大將軍。檢校禮部尙書。案回紇傳。回貴死。子大壽嗣。表以元慶爲迴貴子。大壽爲元慶子。多元慶一世。考路巖撰渾偏神道碑。敘其先世。正與表同。則回紇傳誤也。

鎬。義武軍節度使。案鎬之子偏。字復貴。咸通初爲義昌軍節度使。路巖撰神道碑。載文苑英華。表何以失書。

獨孤氏。出自劉氏。後漢世祖生沛獻王輔。輔生釐王定。定生節王丐。後漢書作正丐子廩。洛陽令。生穆。穆生度遼將軍進伯。擊匈奴兵敗被執。囚之孤山下。生尸利。單于以爲谷蠡王。號獨孤部。尸利生烏利。二子。去卑。猛。沈炳震曰。河南劉氏世系云。漢高祖以宗女妻冒頓。其族貴者皆從母姓。因爲劉氏。左賢王去卑裔孫庫仁。爲南部大人。此又以去卑爲沛獻王之後。未詳何據。大昕案。魏書匈奴劉聰傳。晉書劉

元海載記俱云以母姓爲氏。且匈奴左右賢王皆以子弟爲之。去卑旣爲右賢王。魏書魏弗劉武必係傳作左賢王。近族。此表云出於沛獻王者。妄也。據魏書劉武傳。稱左賢王去卑之孫。北部帥劉猛之從子。則猛當是去卑子。表以去卑與猛爲昆弟。亦非也。魏書官氏志。載神玄皇帝時。餘部諸姓內入者。有獨孤氏。後改爲劉氏。周書獨孤信傳。其先伏留屯者。爲部落大人。與魏俱起。是獨孤與匈奴非一種。不當牽混爲之。雞田李氏。本河南部落稽阿跌之族。至光進。賜姓李。案此表述世系甚略。良臣之先世。與光進。光顏之子。表皆失載。今考良臣神道碑。稱大父賀之。貞觀初。率部落來歸。授雞田州刺史。父延豐。襲雞田州刺史。以功加開府儀同三司。良臣襲刺史。肅宗立靈武。率所部馳詣行在。戰有功。進開府儀同三司。朔方先鋒左肋兵馬使。贈太保。生三子。長光玘。朔方都將。次光進。次光顏。又光進碑云。嗣子季元。河東衙前兵馬使。檢校太子賓客。次燧元。陳許節度押衙。檢校太子賓客。次毅元。次綬元。太原尉。次宗元。次吉元。光顏碑云。嗣子昌元。鄜坊丹延節度使。檢校戶部尙書。次扶元。左龍武軍大將軍。次繼元。太常主簿。次誠元。湖州司馬。次建元。河東節度右都押衙。檢校國子祭酒。次興元。衛王友。次榮元。右羽林軍統軍。檢校左散騎常侍。次奉元。清源丞。次播元。河東節度押衙。左門槍兵馬使。次安元。右軍先鋒兵馬使。檢校右驍衛將軍。則李氏五世譜牒。犁然可考。故史家不可以不博聞也。

廿二史考異卷五十一

唐書十一

后妃傳

文德皇后長孫氏。父晟。字季。隋書及宰相世系表作季晟。

則天皇后武氏。始士護娶相里氏。生子元慶。元爽。又娶楊氏。生三女。伯嫁賀蘭越石。早寡。封韓國夫人。仲卽后。季嫁郭孝愼。前死。楊以后故寵日盛。徙封榮國。始兄子惟良。懷運。當云士護兄子與元慶等。遇楊及后禮薄。后銜不置。及是。元慶爲宗正少卿。元爽少府少監。惟良司衛少卿。懷運淄州刺史。它日夫人置酒。酣。謂惟良曰。若等記疇日事乎。今謂何。對曰。幸以功臣子位朝廷。晚緣戚屬。進。憂而不榮也。夫人怒。諷后僞爲退讓。請惟良等外遷。無示天下私。由是惟良爲始州刺史。元慶龍州。元爽濠州。俄坐事死。振州。元慶至州。憂死。韓國出入禁中。一女國姝。帝皆寵之。韓國卒。女封魏國夫人。欲以備嬪職。難於后。未決。后內忌甚。會封泰山。惟良懷運。以岳牧來集。從還京師。后毒殺魏國。歸罪惟良等。盡殺之。氏曰螻。以韓國子敏之。奉士護祀。初。魏國卒。敏之入弔。帝爲慟。敏之哭不對。后曰。兒疑我惡之。俄貶死。楊氏徙鄴。衛二國。咸亨元年卒。案外戚傳。始士護娶相里氏。生子元慶。元爽。又娶楊氏。生三女。元女妻賀蘭氏。早

寡季女妻郭氏。不顯。士護卒後。諸子事楊不盡禮。銜之。后立。封楊代國夫人。進爲榮國。后姊韓國夫人。於時元慶已官宗正少卿。元爽少府少監。兄子惟良。衛尉少卿。楊諷后上疏。出元慶等於外。以示退讓。由是元慶斥龍州。元爽濠州。惟良始州。元慶死。元爽流振州。乾封時。惟良及弟淄州刺史懷運。與岳牧集泰山下。於是韓國有女在宮中。帝尤愛幸。后欲并殺之。卽導帝幸其母所。惟良等上食。后實薑焉。賀蘭食之暴死。后歸罪惟良等。誅之。諷有司改姓虻氏。絕屬籍。元爽緣坐死。家屬投嶺外。后取賀蘭敏之。爲士護後。賜氏武。襲封。擢累左侍極。蘭臺太史令。敏之韶秀自喜。烝於榮國。挾所愛佻橫多過失。榮國卒。后出珍幣建佛廬。徵福。敏之乾匿自用云云。后疊數怒。至此暴其惡。流雷州。表復故姓。道中自經死。二傳之文。大略相同。后妃傳。稱楊氏由榮國夫人徙鄴。衛二國。外戚傳。但稱榮國。不云徙封。其不同一也。外戚傳。元爽以惟良事緣坐死。后妃傳。先云元爽坐事死。振州。後及后毒殺魏國事。似元爽別坐他事。誅其不同二也。據外戚傳。賀蘭敏之死。在楊氏卒之後。后妃傳。敏之死。在楊氏卒之前。魏國卒于乾亨改元前四年。此傳云。敏之死。則爲時未久。不得遲至四載。其不同三也。外戚傳。后取賀蘭敏之爲士護後。當云韓國子。而不書者。漏也。惟良懷運。皆士護兄子。讓之子。兩傳但稱兄子。則嫌於后之兄子。亦漏也。后妃傳。一云夫人置酒。酣。再云夫人怒。以上文考之。后母由代國夫人徙封榮國。后姊亦封韓國夫人。當書姓。或書封號。以別之。不當但稱夫人也。

敬業南度江取潤州殺刺史李思文。曲阿令尹元貞戰死。元貞，河間人，贈潤州刺史。諡曰壯。舊史入忠義傳。

前鋒左豹韜果毅成三朗，爲唐之奇所殺。三朗，幽州人，贈左監門將軍。諡曰勇。舊史入忠義傳。三朗，舊史作郎。蓋宋人避諱缺筆。書朗爲朗，因譌爲郎耳。

春官尙書李思文。此又一思文。

尊周文王爲文皇帝。號始祖妣曰文定皇后。武王爲康皇帝。號睿祖妣姜曰康惠皇后。案武后紀，追尊四代祖平王少子武曰睿祖康皇帝。妣姜曰康惠皇后，非武王也。吳氏糾謬，但云二說不同，今斷以傳爲誤。

玄宗貴妃楊氏。於是嶺南節度使張九章。案方鎮表，至德元載，始置嶺南節度使。此時似無節度之名。

章敬皇后吳氏。負嫌嫌陋，更取它宮兒以進。此事舊史所無。新史采柳氏舊聞增入，其實無稽之談也。唐會要，代宗以開元十四年十月十三日生，其時肅宗未爲皇太子。

宗室傳

畢王璋生二子，曰韶，曰孝基。案世系表，以孝基入畢王房，韶入雍王房。又於永安壯王孝基下云，嗣王

道立以雍王繪男詔次子高平公繼。則詔非畢王子明矣。

永安壯王孝基曾孫涵。贈太子太保。唐會要。諡曰玄。

雍王繪子贊。追爵河南王。唐會要。贈禮部尚書。諡曰德。宗室世系表。作長平王。

淮南壯王道玄。宗室世系表及會要。俱云淮陽王。此云淮南。恐誤。傳云壯王。而會要作忠。未詳孰是。

長平肅王叔良。唐會要。叔良諡兩見。一云贈左衛大將軍。曰肅。一云贈太子太保。諡曰靖。蓋傳聞異

詞。

仁杲內史令翟長孫。仁杲傳作長孫。

長樂郡王幼良。六世孫回別傳。案回傳云。新興王德良。六世孫世系表。又別於長平王叔良下。

襄武郡王琛。字仲寶。世系表作惟寶。

河間元王孝恭子崇義晦。世系表。晦上亦有崇字。

淮安靖王神通十一子。得王者七人。道彥、孝管、孝同、孝慈、孝友、孝節、孝義。案本傳。道彥封膠東王。孝管

高密王。舊書作孝察。孝同。淄川王。孝慈。廣平王。孝友。河間王。孝節。清河王。孝義。膠西王。後皆降封公。世系表。

孝友止稱尚書左丞。無封號。其封河間郡公者。乃孝本也。未知孰是。

孝銳不得封。有子齊物顯。世系表。孝銳子恆農太守璟。璟子刑部尚書齊物。則齊物乃孝銳之孫。

孝節曾孫焉。案世系表，焉乃孝節之孫。

世祖四子，長曰澄，次洪，次高祖神堯皇帝。世系表代祖即世祖四子，長高祖，次梁王澄，次蜀王洪，次

漢王洪，與傳互異。

梁王澄蚤薨，無嗣。世系表，梁王澄子，有彭城王士衍，江東郡王世澄，衡山郡王世訓三人。又以蜀王第二子博父繼，豈諸子薨絕，而後以博父嗣之乎？然澄既有三子，不得云蚤薨矣。博父傳亦不言出繼梁王事，蓋表傳之文，多不相應。

高祖諸子傳

衛懷王玄霸，以宗室西平王瓊子保定嗣。世系表作平原王瓊。

鄭惠王元懿十子，長子璿，嗣王爲鄂州刺史。案世系表，元懿止九子，無名璿者，嗣王乃遂州刺史璜也。

武后紀亦稱嗣鄭王璿。

號莊王鳳，中宗以鳳孫邕嗣王。唐會要，邕贈荊州大都督，諡曰景。

嗣魯王道堅，薨，贈禮部尚書。唐會要，諡曰忠。

弟道邃封戴國公，弟上脫道堅二字。

太宗諸子傳

嗣吳王蠟薨。贈太子少保。唐會要諡曰恭。

三宗諸子傳

詔外繼嗣王者皆歸宗。乃以嗣江王禕為信安王。嗣蜀王瑜為廣漢王。嗣密王徹為濮陽王。嗣曹王臻為濟國公。案曹王明傳。神龍初。以傑子胤胤為嗣曹王後。改封傑弟備。備薨。復封胤胤。胤胤子戡。嗣中開不容更有臻嗣王爵。世系表備作備

十一宗諸子傳

越王係。至德二載十二月。進王趙。與彭、兗、鄆、襄、杞、召、興定九王同封。案肅宗紀。與係同時封王者八人。彭、兗、涇皆由郡王進封。襄、杞、召、興定皆始封。無鄆王名。又以衛王佖、鄆王榮兩傳考之。則鄆王始封靈昌郡王。早薨。寶應元年。與佖同追封。非至德中封也。

襄王儁子窠樂安王。案敬宗子執中亦封襄王。其子窠封樂平郡王。兩襄王之子俱名窠。而封號相似。亦可疑也。

敬宗第二子休復。文宗開成二年。封梁王。第三子執中為襄王。第四子言揚為紀王。以諸傳例之。當云梁王休復。襄王執中。紀王言揚。各自跳行。不應附於悼懷之末。

宣宗十一子。元昭太后生懿宗皇帝。傳兼懿宗言之。當云十二子。宗室世系亦作十一子。俱誤。

靖懷太子漢會昌六年始王雍與夔慶二王同封雅王涇大中元年始王案宣宗紀會昌六年四月辛

酉封子溫爲鄆王漢雍王涇雅王滋夔王沂慶王同時封王者五人鄆王卽懿宗故傳不及之漢當爲

漢字之譌也通鑑亦作漢音美雅王涇之封紀以爲會昌六年傳以爲大中元年疑傳誤舊唐書本紀鄆雅

年四月封而無雍王斬卽夔也

通王滋會昌六年王夔與慶王沂同封懿宗立滋徙王昭宗乾寧三年領侍衛諸軍案滋與慶王同封

已見靖懷太子傳而本傳又及之此文之重複猶其失之小者考懿宗紀咸通四年八月夔王滋薨則

滋薨懿宗朝初未改封通王安得於昭宗朝領軍爲韓建所害乎建所殺之通王蓋別是一人而新史

強合之妄之甚矣德宗子有通王謙意建所殺者謙之後嗣王乎舊史昭宗紀不載通王名

濟韶彭韓沂陳延覃丹九王史逸其系胄云案彭王惕憲宗子沂王禪昭宗子皆見本卷吳縝已糾之

矣然昭宗子冲孺未握兵柄何至爲韓建所忌且禪在兄弟中次居第四使建欲害諸皇子又不應舍

長而及幼此理之必不然者舊史昭宗紀有儀王無沂王疑沂乃儀之譌新紀作沂王禪又史家妄益

之也通鑑考異云順宗子經封郟王會昌後避武宗諱改郟作覃則嗣覃王嗣周當是經之後予謂嗣

丹王允當是代宗子丹王逾之後嗣延王戒不當是玄宗子延王玢之後嗣韓王當是高祖子韓王元

嘉之後元嘉之後改封鄆懿宗卽位復其故名玄宗子有濟王環代宗子有韶王暹敬宗子有陳王成美此濟韶陳三

王疑亦嗣王也。

諸公主傳

高祖女高密公主。下嫁段綸。綸為工部尚書杞國公。唐會要紀國公段綸諡曰安。紀杞字形相涉未知孰是。

太宗女臨川公主。下嫁周道務。道務殿中少監。譙郡公範之子。唐會要範贈工部尚書諡曰敬。

高宗女太平公主。神龍時與長寧、安樂、宣城、新都、定安、金城凡七公主。皆開府置官屬。案長寧、安樂、宣城、新都、定安皆中宗女。太平則高宗女也。神龍朝公主別無封金城者。惟高宗女高安公主始封宣城。

神龍初進册長公主。實封千戶。開府置官屬。此金城或宣城之誤。

主三子崇簡、崇敏、崇行皆拜三品。案薛紹子崇簡、武攸暨子崇敏、崇行當加姓以別之。

睿宗女玉真公主始封崇昌縣主。本封隆昌。史家避明皇諱追改。

玄宗二十九女。自永穆至壽安實三十人。吳氏糾其自相違舛。今考唐會要載明皇二十八女。永穆、

降常芬。降張孝昌。降靈昌。降常山。降薛譚。降又唐昌。降薛萬安。降親瑄。降張上仙。降蕭新昌。降蕭高都。降裴

臨晉。降建平。降豆盧達。降貞陽。降源清。降後信成。降孤明。降宜春。降早壽春。降吳澄。降後昌樂。降寶永寧。降

齊平昌。降溫四華。降後降楊歡。降蘇明太華。降楊興信。降本封高陽。降裴瑄。降後降裴壽光。降郭樂成。降薛新平。

降裴玲。降後廣寧。降程昌裔。降咸宜。降楊嗣。降後萬春。降史合寧親與興信為一人。又多懷思、普康、壽安三

降姜虔初。降後降蘇愔。降咸宜。降楊嗣。降後萬春。降史合寧親與興信為一人。又多懷思、普康、壽安三

人予謂公主早薨者多矣。獨普康公主以明皇女而追封于咸通之世，殊不近情。又考懿宗八女，自有封普康者，乃悟咸通九年追封者，必是懿宗之女。史家轉寫，重複錯亂。若於明皇諸女中除去普康一人，則與二十九人之數合矣。

臨晉公主，下嫁郭潛曜。郭當爲鄭字之譌。潛曜，駙馬都尉萬鈞之子。

衛國公主，始封建平，下嫁豆盧建。唐會要作豆盧達，予謂建平主婿，不當名建，恐當以達爲正也。衛國

會要作衛國。

貞陽公主，下嫁源清，又嫁蘇震。案蘇誥子震，官至太常卿，彼傳不云尙公主，未審卽其人否也。

廣寧公主，下嫁程昌胤。后妃傳作昌裔，蓋宋人避太祖諱，改胤爲裔。會要亦作裔。

壽昌公主，下嫁郭液。會要作壽光。

順宗女西河公主，下嫁沈暈。案郭子儀傳，孫銛尙西河公主，又云初西河主降沈氏，銛無子，以沈氏子

嗣。此傳不書改適郭銛，漏也。

宣宗女廣德公主，下嫁于琮。初琮尙永福公主，主與帝食，怒折匕筯，帝曰：此可爲士人妻乎？更許琮尙主。

永福主折筯事，又見于琮傳，宜刪彼此。

昭宗女永明公主，蚤薨。當云薨天祐時。舊本紀在天祐三年七月。



廿二史考異卷五十二

唐書十二

蕭銑傳

若銑力因計殫。以好言自釋於下。係虜在廷。抗辭不屈。僞辯易窮。卒以殊死。高祖聖矣哉。案蕭銑、梁之後裔。爲衆所推。非有失德。及唐兵深入。自揣勢力弗若。不惜生降。以全民命。其答高祖以田橫自比。蓋道其實耳。高祖自慮養虎貽患。故亟除之。如李密、王世充之徒。雖低首屈服。終亦不免。視宋祖之待劉鋹。有媿色矣。以是爲聖。未之前聞。

輔公祏傳

遂僭位。國稱宋。唐初羣雄割據。自立年號。皆書於本傳。惟公祏傳不言年號。蓋史之闕也。楊文公談苑。記江南保大中。浚秦淮。得石志。案其刻。有大宋乾德四年字。令諸儒參驗。乃輔公祏反江東時年號。然新舊書。通鑑皆未及載。萬斯同紀元彙考。謂公祏紀元天明。與楊氏談苑又異。

劉思禮傳

少學相人於張憬藏。憬藏謂思禮。歷刺史。位至太師。案舊唐書。思禮少嘗學相術于張憬藏。相己必歷

刺史位至太師。揆其文義。謂思禮自相當得太師。非憬臧許之也。新史改竄。失其本旨。

李安遠傳

累封至廣德郡公。石刻武德四年。秦王告少林寺教。有德廣郡開國公安遠名。卽李安遠也。傳作廣德郡誤。

段志玄傳

齊州臨淄人。神道碑。作鄒平。

諡曰壯肅。當作忠壯。舊史本傳。唐會要。及神道碑。並作忠壯。獨此云壯肅。字之譌也。

殷開山傳

祖不害。仕陳爲司農卿。案。殷踐猷傳。稱陳給事中不害。

劉崇魯傳

景福中。以水部郎中知制誥。雅與崔昭緯善。帝以韋昭度。李磻輔政。昭緯懼見奪。共謀沮之。及磻墨麻出。崇魯輒掠麻大哭。帝問焉。崇魯曰。今雖乏人。豈宜取愉人爲宰相。磻以楊復恭。西門重。遂得近職。奈何用之前日杜讓。能羞戮未刷。尙忍蹈覆轍乎。磻由是不得用。磻亦勅奏其姦。因自陳爲山南楊守亮。詆毀。不容與復恭交私。又言崇望爲宰相。使親吏日夕謁左軍。與復恭相親厚。絕巾慘帶。不入禁門。崇魯

向殿哭。厭詛天祚。殆人之妖。且其父坐賄飲藥死。崇魯身爲朱玫史官。作勸進表。在太原府使西川。見田令孜沒階趨。廢制度。自崇魯始。其相冒營。但淺稽校。營市人然。此事又見李磻傳。此詳而彼略。彼傳載崇魯言。又有礪弟爲時溥所殺一事。蓋挾方鎮以恐惕朝廷。故引杜讓能爲誠。此傳不言時溥事。則讓能覆轍之語。全無著矣。

許紹傳

子智仁。終涼州都督。唐會要。智仁官懷州刺史。孝昌縣男。諡曰敬。

許圜師傳

進戶部尚書卒。唐會要。圜師封平恩縣公。舊史作平恩縣男。

溫大雅傳

諡曰孝。唐會要。作景。

溫彥博傳

突利可汗弟。結社謀反。案。太宗紀。魏徵突厥兩傳。俱作結社率。此脫率字。

彥博裔孫廷筠。弟廷皓。宰相世系表。失載廷筠。廷皓二人。

李子和傳

進金紫光祿大夫。唐會要贈靈州都督諡曰德。

李勣傳

勣子震嗣終桂州刺史。唐會要有梓州刺史李震諡曰定疑卽勣子也。

薛萬均傳

帝震悼爲舉哀。唐會要萬均贈幽州都督諡曰景。

高士廉傳

高儉字士廉以字顯。宰相世系表作宗儉。

竇抗傳

贈并州都督。唐會要諡曰肅。

竇德玄傳

威從孫德玄。案宰相世系表竇略五子興、拔、岳、善熾。岳之子毅。熾之子威。威與毅爲從兄弟。德玄爲毅

之曾孫。則威之從曾孫矣。

房玄齡傳

玄齡字喬。宰相世系表作喬松。

杜元穎傳

如晦五世孫元穎。案宰相世系表。元穎乃淹之六世孫。舊唐書杜審權傳云。如晦六代孫審權。爲元穎從子。與此傳合。

魏徵傳

帝將以衡山公主降其子叔玉。案公主傳。太宗二十一女。無封衡山者。考于志寧傳云。衡山公主旣公除。將下嫁長孫氏。則是衡山停婚魏氏後。許嫁長孫矣。公主傳。下嫁長孫氏者。有新興、新城兩公主。未審何人。初封衡山也。

薛收傳

永徽中又贈太常卿。收諡曰獻。收子元起。諡曰懿文。見唐會要。

薛稷傳

道衡曾孫。據宰相世系表。乃四世孫。

馬周傳

迫贈尚書左僕射。唐會要。贈尚書左僕射。諡曰忠。

韋挺傳

慶州刺史楊文幹坐大逆誅。辭連東宮。帝專責宮臣。由是挺與杜淹、王珪等皆流越嶺。案杜淹傳亦云。慶州總管楊文幹反。辭連太子。歸咎淹及王珪。韋挺並流越嶺。文既重出。以事考之。亦未核。王珪、韋挺皆建成東宮官。杜淹則秦王府官也。文幹反。辭連東宮。珪、挺固宜獲咎。於淹何預。而同貶斥乎。考隱太子建成傳云。華陰楊文幹素凶詖。建成昵之。使爲慶州總管。遣募兵送京師。欲爲變。文幹遽率兵反。帝以建成首謀。未忍治。即詔捕王珪、魏徵及左衛率韋挺等。欲殺之。以薄建成罪。會文幹陷寧州。帝召秦王問計。對曰。文幹豎子耳。官司當即禽之。帝曰。事連建成。恐應者衆。爾自行還。吾以爾爲太子。使建成王蜀。蜀地狹。不足爲變。若不能事汝。取之易也。秦王率衆趣寧州。文幹爲其下所殺。以首降。秦王之行。元吉及內嬖。更爲建成請。帝意解。復詔建成居守。但責兄弟不相容。而謫王珪、韋挺。天策兵曹參軍杜淹于遠方。是珪、挺、淹三人之謫。乃坐構覺太子秦王。而非以文幹事得罪也。王珪傳稱太子與秦王有隙。帝責珪不能輔導太子。流嶺州。蓋得其實。

韋待價傳

流待價繡州卒。案唐會要待價扶陽郡公。諡曰元。當是身後追復本官。

韋武傳

贈吏部尚書。唐會要諡曰恭。

李大亮傳

大亮族孫迴秀。案宰相世系表當是族子。

陳叔達傳

貞觀初與蕭瑀爭殿中坐。忿詆不恭。免官。宰相表。武德九年十月。叔達瑀坐事免。非貞觀初。

楊師道傳

諡曰懿。唐會要。師道諡兩見。一云懿。一云康。

楊執柔傳

乃以執柔同中書門下三品。未幾卒。唐會要。執柔贈天官尚書。諡曰貞。

封倫傳

祖隆。北齊太子太保。當作隆之。史脫之字。

裴矩傳

裴矩。字弘太。宰相世系表。作世矩。傳避太宗諱。去世字。矩。隋書有傳。入唐無大表見。雖不立傳可也。此

傳首尾一千五百五十餘字。述隋事者什之七八。既與隋史重複。兼亦失於限斷。當云仕隋。至某官事

見前史。乃繼以仕字文化及竇建德事。斯為得之。若封倫。蕭瑀輩。舊史無傳者。固不妨述其梗概也。

閻立本傳

卒諡曰文貞。唐會要無文字。

韋弘機傳

孫岳子。岳子孫皋，別有傳。案韋皋傳，六代祖範，有勳力周隋間，不言為弘機之後。若依此傳，則皋為弘

機之玄孫，皋之六世祖，即弘機祖也。此傳云祖元禮，隋浙州刺史。浙當作漸不名範，兩傳必有一誤。又此傳

岳子乃兩字名，而舊史良吏傳單稱岳，亦未知誰是。

蕭瑀傳

久之，遷左僕射。貞觀初，房玄齡、杜如晦新得君，事任稍分，瑀不能無少望，乘罇切詆，辭旨疏蹠。太宗怒，廢于家，俄拜特進、太子少師，復為左僕射，坐與陳叔達忿爭，御前不恭，免。歲餘，起為晉州都督，入拜太常卿。遷御史大夫，參預朝政。會玄齡等小過失，瑀即痛劾，不報。由是自失，罷為太子少傅，加特進，復為太常卿。九年，復參預政事。晉王為皇太子，拜太子太保，同中書門下三品。瑀中狹，每燕見，輒言玄齡輩朋黨盜權，帝積久亦不平。瑀好浮屠法，閒請捨家為桑門，帝許之矣。復奏自度不能為，又足疾不入謁，詔奪爵，下除商州刺史。今以宰相表考之，瑀五入相而五罷。武德元年，由隋民部尚書為內史令。六年，遷尚書右僕射。九年，轉左僕射。其年十月，與陳叔達俱坐事免。此一罷也。貞觀元年六月，由太子少師

爲尙書左僕射。其年十二月罷。此再罷也。四年二月復以御史大夫參議朝政。其年七月罷爲太子少傅。此三罷也。九年十一月復以特進多預朝政。十年十二月罷爲岐州刺史。此四罷也。十七年四月又以特進太子太保同中書門下三品。二十年十月貶商州刺史。此五罷也。傳於貞觀十年罷相一節。略而不書。其與陳叔達忿爭免官。乃在武德九年。太宗雖已卽位。猶未改元。而誤以爲貞觀初。其誤與陳叔達傳同。且係第一次罷相。而誤以爲第二次。皆自相抵牾也。

蕭嗣業傳

擢累鴻臚卿。兼單于都護府長史。龍朔元年。嗣業爲扶餘道行軍總管。伐高麗。又爲仙巒道行軍大總管。代鐵勒。傳皆失書。

蕭定傳

遷袁潤等六州刺史。大庾中有司差天下刺史治最定。與常州蕭復。豪州張鎰爲第一。案蕭復傳。但云歷歙池二州刺史。治狀應條遷湖南觀察使。改同州刺史。不云爲常州刺史者。闕也。復定二人並附瑀傳末。而前後不相應如此。

褚亮傳

諡曰康。唐會要亮諡兩見。一云康。一云文康。未詳其審。

姚班傳

班著紹訓以發明舊義云。案藝文志有姚班漢書紹訓四十卷。卽此書也。班、珽字形相涉。或未初避諱。珽字缺末筆。後人誤認爲班耳。

令狐德棻傳

父熙。隋鴻臚卿。宰相世系表。隋吏部尙書武康公。考隋書。熙嘗任鴻臚卿。又以本官兼吏部尙書判五曹尙書事。後終於桂州總管。史稱鴻臚卿者。當時以京職爲重。吏部未正授。故亦不書也。

累進爵彭城縣子。彭城。當作彭陽。傳寫之譌也。北史敘傳。稱德棻爲彭陽公。德棻大父整。亦封彭陽公。會修晉家史。房玄齡奏起之。預柬凡十有八人。案藝文志。修晉書者。房玄齡、褚遂良、許敬宗、來濟、陸元仕、劉子翼。令狐德棻、李義府、薛元超、上官儀、崔行功、李淳風、辛邱馭、劉引之、陽仁卿、李延壽、張文恭敬播、李安期、李懷儼、趙弘智等。自房相外。蓋不止十八人也。

顧允傳

中子琮。武后時爲天官侍郎。同鳳閣鸞臺平章事。唐會要。贈越州都督。涇源縣侯。諡曰靖。

于志寧傳

志寧與司空李勣。修定本草并圖。合五十四篇。卽所謂顯慶本草也。藝文志載撰述人。無志寧名。

張易之傳

時無檢輕薄者。又詔言昌宗乃王子晉後身。據外戚傳。乃武三思倡言。

乃詔昌宗即禁中論著。引李嶠、張說、宋之問、富嘉謨、徐彥伯等二十有六人。撰三教珠英。案藝文志三教珠英一千三百卷。張昌宗、李嶠、崔湜、閻朝隱、徐彥伯、張說、沈佺期、宋之問、富嘉謨、喬品員、半千、薛曜等撰。又李適傳。武后修三教珠英書。以李嶠、張昌宗爲使。取文學士綴集。於是適與王無競、尹元凱、富嘉謨、宋之問、沈佺期、閻朝隱、劉允濟在選。又徐堅傳。與徐彥伯、劉知幾、張說、與修三教珠英。時張昌宗、李嶠、總領彌年不下筆。堅與說專意撰綜。條彙相立。諸儒因之乃成書。此四處重出。而人數多寡同異各殊。所當刪併以歸於一也。

長孫无忌傳

太子承乾廢。立晉王。以无忌爲太子太師。同中書門下三品。同三品自此始。案太宗紀。貞觀十七年四月。立晉王治爲皇太子。特進蕭瑀爲太子太保。李勣爲太子詹事。同中書門下三品。宰相表亦止載蕭瑀、李勣二人。其時无忌爲太子太師。房喬爲太子太傅。紀表皆不書者。非宰相之職。例不當載也。百官志。其後李勣以太子詹事。同中書門下三品。謂同侍中。中書令也。而同三品之名。蓋起于此。亦不舉无忌。然則无忌傳云。同中書門下三品者。殆誤矣。吳氏糾謬。謂宰相表有闕文。蓋考之未審。

褚遂良傳

神龍中復官爵。唐會要。諡曰文忠。

韓瑗傳

父仲良。終刑部尚書。秦州都督府長史。潁川縣公。據仲良碑。貞觀十二年薨。贈兵部尚書。諡曰定。會要

以爲證貞者。誤。

神龍初。武后遺詔復官爵。唐會要。諡曰貞。

來濟傳

初。濟與高智周。郝處俊。孫處約。客宣城。石仲覽家。仲覽衍于財。有器識。待四人甚厚。私相與言志。處俊曰。願宰天下。濟及智周亦然。處約曰。宰相或不可冀。願爲通事舍人足矣。後濟領吏部。處約始以瀛州書佐入調。濟遽注曰。如志。遂以處約爲通事舍人。後皆至公輔云。此事又見高志周傳。吳氏糾謬。已言其叢複矣。而容齋四筆又辨之云。此事本出韓琬所撰御史臺記。而所載自不實。處約傳。貞觀中爲齊王祐記室。祐多過失。數上書切諫。王誅。太宗得其書。擢中書舍人。是歲十七年癸卯。來濟次年亦爲中書舍人。永徽三年拜相。六年檢校吏部尚書。是歲丁巳。去癸卯首尾十五歲。若如兩傳所書。大爲不合。仲覽鄉里。一以爲宣城。一以爲江都。豈宣城人而家于廣陵也。

濟異母兄恆。上元中爲黃門侍郎。同中書門下三品。唐會要。贈太子少師來恆。諡曰忠。贈潤州刺史來恆。諡曰懿。蓋一人而傳聞異詞。

崔知溫傳

子秦之。開元時爲工部尙書。謬之。爲將作少匠。與誅二張功。封博陵縣侯。案。宰相世系表。秦之初以職方郎中。預平二張。謬之初以商州司馬。預平韋后功第二。與此傳互異。

趙弘智傳

弘安曾孫矜。矜。舊史無傳。此采柳子厚所撰墓志添入。宋子京好退之。子厚文。故於韓傳載進學解。佛骨表。潮州謝上表。祭鱷魚文。凡四篇。潘鎮傳載平淮西碑。孝友傳載復讎議。陳京傳載禘祫議。許遠傳載張中丞傳後序。李渤傳載愈所與書。張籍傳載愈答書。甄濟傳載愈答元微之書。於柳傳載與蕭翰林俛。許京兆孟容書。貞符懲咎賦。凡四篇。孝友傳載駁復讎議。孝門銘。宗室傳載封建論。貞行傳載與何蕃書。段秀實傳亦多采宗元所撰逸事狀。舊史惟退之傳載文四篇。與新史同。餘皆子京所采也。宜遇西人深目而髻。乃得其實。案。柳子厚撰趙君墓志云。乙巳子野。宜遇西人深目而髻。其得實因皆韻語也。史家刪改遂至失韻。

崔敦禮傳

崔敦禮字安上。宰相世系表安上字敦禮。

楊纂傳

贈幽州都督諡曰恭。唐會要恭作敬。宋人避諱。往往改敬爲恭。如楊纂柳亨輩。疑本諡敬。而後人追改也。

纂從子昉。終工部尙書。唐會要諡曰恪。

劉從一傳

贈太子太傅。唐會要諡曰敬。

傅奕傳

上疏極詆浮圖法。奕言五帝三王。未有佛法。君明臣忠。年祚長久。石符亂華。主庸臣佞。政虐祚短。事佛致然。昌黎諫迎佛骨表。其說實本於此。

呂才傳

魯桓公六年七月。子同生。經書九月。此據夏正。故云七月。

歲在乙亥。月建申。然則值祿空亡。乙祿在卯。丙申月。卯爲截路空亡。

又觸旬統六害。借驛馬。身剋驛馬三刑。亥與申相害。故云六害。亥卯未驛馬在巳。申在巳前爲借。巳刑

申。故云三刑。月建爲身。巳火剋申金。身爲驛馬所剋也。

命火也。生當病鄉。乙亥納音火也。病于申。

唯向命一物法當壽。亥爲本命。生于申月。申在亥後。爲向命。

秦莊襄王四十八年。始皇帝生。莊襄當作昭襄。

是歲壬寅正月。命偕祿。壬祿在亥。生于寅月。在亥前。爲偕也。

又破驛馬三刑。身剋驛馬。寅午戌驛馬在申。寅破申。申刑寅。故云破驛馬三刑也。申金剋寅木。身爲驛

馬所剋也。

命金也。正月爲絕。壬寅納音金。金絕於寅。

又建命生。寅爲本命。月建在寅。是爲建命。

漢武帝以乙酉歲七月七日平旦生。當祿空亡。乙祿在卯。生于丙申月。卯爲截路空亡。

雖向驛馬。乃隔四辰。巳酉丑驛馬在亥。申至亥隔四辰。申在亥後爲向。

後魏高祖孝文皇帝。生皇興元年八月。是歲丁未。爲偕祿命。與驛馬三刑。身剋驛馬。丁祿在午。未爲本

命。亥卯未驛馬在巳。生于酉月。在巳午未三辰之前。故皆爲背也。酉爲自刑。故云三刑。巳火剋酉金。亦

驛馬剋身也。

又生父死中。未土爲本命。生于酉月。火死於酉。火者土之父也。

宋高祖癸亥三月生。祿與命皆空亡。癸祿在子。亥爲本命。生於丙辰月。亥爲截路空亡。子爲旬中空亡。

又生子墓中。水墓于辰。亥本命屬水。納音亦屬水。生於辰月。是爲巳墓。而云子墓。所未詳也。

又生祖祿下。土爲水之祖。土以巳爲祿。生於辰月。故云祖祿下。

廿二史考異卷五十三

唐書十三

裴行儉傳

諡曰獻。唐會要作憲。

裴光廷傳

光廷字連城。神道碑作光庭。

博士孫琬以其用循資格非獎勵之誼諡曰克平。舊史無平字。

特賜諡曰忠憲。詔中書令張九齡文其碑。舊史憲作獻。考唐會要及光庭神道碑。光庭子積墓志。孫倩

神道碑皆作忠獻。則此文誤也。

裴均傳

贈司空。唐會要贈太子少保裴均。諡曰貞。

崔神慶傳

贈神慶幽州都督。唐會要贈幽州都督魏縣男崔神慶。諡曰貞。贈太子少傅魏縣子崔神慶。諡曰質。蓋

卽一人而傳聞異詞。

神慶子琳開元中與高仲舒同爲中書舍人。侍中宋璟親禮之。每所訪逮。嘗曰古事問仲舒。今事問琳。尙何疑。仲舒附忠義高叡傳。亦祇載此一事。

楊再思傳

張昌宗坐事。司刑少卿桓彥範劾免其官。昌宗訴諸朝。武后意申釋之。問宰相昌宗於國有功乎。再思曰。昌宗爲陛下治丹餌而愈。此爲有功。此事又見昌宗傳。

王瓌傳

王瓌者。方慶六世孫。案方慶傳在卷四十一。而瓌傳乃在卷三十四。此前後之失序者。吳縝譏裴守貞。耀卿兩傳。次序失當。而於瓌傳獨未及之。

執失思力傳

諡曰景。唐會要諡曰繆。

契苾何力傳

鐵勒哥論。易勿施莫賀可汗之孫。父葛。隋末爲莫賀咄特勒。案回鶻傳云。契苾酋哥楞。自號易勿莫賀可汗。弟莫賀咄特勒。皆有勇。莫賀咄死。子何力尙幼。率其部來歸。則何力乃哥楞弟子。非其孫也。論

楞聲相近。此傳云易勿施。彼傳云易勿眞。未詳孰是。薛延陀傳亦作易勿眞。

是時吐谷渾王伏允在突淪川。吐谷渾傳伏允走圖倫磧。即突淪川也。譯音無定字。

西突厥阿史那賀魯以處月、處密、姑蘇、歌邏祿、卑失五姓叛。案突厥傳賀魯居多邏斯川。統處月、處密、

姑蘇、歌邏祿、弩失畢五姓之衆。此卑失即弩失畢也。密蜜音同。歌邏祿或作葛邏祿。

諡曰毅。唐會要何力諡曰烈。

尙可孤傳

徙封馮翊郡王。食實戶一百五十。案下文又云封馮翊郡王。食實戶二百。重複不倫。當云增封戶至二

百。或中間以事削封邑而後復之。則史有脫文矣。

王珣傳

贈戶部尙書。諡曰孝。唐會要贈禮部尙書王珣。諡文孝。

薛平傳

贈太傅。唐會要諡成肅。

程務挺傳

后遣左鷹揚將軍裴紹業。即軍中斬之。唐會要務挺贈左衛將軍。諡曰烈。此傳失書。不知何時昭雪也。

韓思彥傳

事博士谷那律。律爲匪人所辱。思彥欲殺之。律不可。谷那律見儒學傳。谷姓。那律其名也。此單稱律。似以谷那爲姓矣。

司農武惟良。擅用并州賦二百萬緡。思彥勅處死。武后爲請而免。李義府與諸武共譖思彥。出爲山陽丞。案武惟良爲司農。后妃外戚兩傳俱未及載。且惟良等旣爲武后所銜。欲置之死地。何以又請免其罪。又其時后寵雖盛。而諸武無當權者。此譖思彥者。果何人乎。

柳澤傳

曾祖亨。贈禮部尚書幽州都督。唐會要。諡曰敬。

中宗時。長寧宜城安定諸公主。安定當作定安。

唐臨傳

兄皎。終益州長史。贈太常卿。唐會要。諡曰敬。

徐有功傳

會昌中。追諡忠正。案諡法無正字。宋時避仁宗嫌名。改貞爲正。唐會要所載諡正者。皆貞也。有功之諡。亦當爲忠貞。蓋修史之時。或改或不改。其例初不畫一耳。

狄仁傑傳

后乃召見仁傑謂曰。臣反何邪。對曰。不臣反死。答掠矣。臣當作承。今阿史那斛瑟羅。皆陰山貴種。案舊史無皆字。斛瑟羅者。西突厥繼往絕可汗步真之子。阿史那其姓也。新史多一皆字。似誤以爲二人。

王方慶傳

六世孫璵。璵傳亦云方慶六世孫據宰相世系表。當云五世孫。沈炳震曰。方慶以萬歲通天元年入相。璵以肅宗乾元元年入相。相去僅六十三年。不應遽有六世孫。位至宰相。且方慶子光輔。開元中官潞州刺史。而璵傳云。開元末爲太常博士。據表。光輔卽璵之高祖。同時而仕。恐未必然。蓋肅宗時相。乃別一王璵。非方慶六世孫也。

武侯將軍田仁會。仁會傳。但云左武侯中郎將。不云將軍。

韋嗣立傳

監察御史宋務光建言。願停徵封一切附租庸輸送不納。務光疏。已詳見本傳。而此傳又及之。何其詞之贅也。

陸象先傳

時窮治忠義等黨與。當云至忠。忠上脫至字。

李日知傳

景龍初。同中書門下平章事。轉御史大夫。仍知政事。拜侍中。先天元年。罷為刑部尚書。案。睿宗紀宰相表。日知以景雲元年六月。由黃門侍郎同中書門下三品。傳以為景龍初者。誤也。傳云平章事。紀表俱作同三品。當以紀表為正。宰相表又云。景雲二年四月。日知守侍中。其年十月。罷為戶部尚書。傳以為先天元年。差校一年。又以戶部為刑部。亦誤也。其轉御史大夫。仍知政事。紀表並不載。

李懷遠傳

贈侍中。諡曰成。唐會要。贈侍中平鄉縣公李懷遠。諡曰成。又有贈侍中趙郡公李懷遠。諡曰惠。疑一人而傳聞異詞也。

魏玄同傳

先是狄仁傑督太原運。失米萬斛。將坐誅。玄同救免。此事仁傑傳不載。

韋見素傳

見歲。至德元載。十月丙申。有星犯昴。見素言于帝曰。昴者。胡也。明年正月甲寅。祿山其殪乎。及祿山死。日月皆驗。案。肅宗紀。至德二載正月乙卯。安慶緒弑其父祿山。與見素所占差一日。又祿山傳。正月朔。祿山

朝羣臣創甚罷。是夜豬兒入帳下。以大刀斫其腹。腸潰於牀。卽死。考至德元載。十月辛巳朔。日食。從此推之。次歲正月。當爲庚戌朔。甲寅乙卯。乃月之五六日。而祿山傳謂死于正月朔。與紀傳皆不合。未審誰得其實。天文志不載。至德元載十月星犯昴事。非志有脫漏。則見素傳所云。傳聞不足信矣。

韋虛心傳

贈揚州大都督諡曰正。案唐會要。虛心與李綱。崔義元。王方慶。李乂輩皆諡正。正卽貞也。新史采自它書。多有未及訂正者。如徐有功之諡忠正。亦舊史所無。

白敏中傳

懿宗立。召拜司徒門下侍郎。遷平章事。遷字衍。

敬暉傳

睿宗時。追復官爵。諡曰肅愍。唐會要。元和三年。追諡張柬之爲文貞。桓彥範爲忠烈。敬暉爲貞烈。崔玄暉爲文忠。袁恕己爲貞烈。史載桓。張。袁三人諡。與會要同。惟敬暉諡肅愍。崔玄暉諡文獻。爲異。豈史所載者。乃睿宗朝所賜之諡乎。

張柬之傳

姚州本龍朔中。武陵主簿石子仁奏置。其後長史李孝讓。辛文協死於羣蠻。詔遣郎將趙武貴討擊。兵無

唯類。又以將軍李義總繼往。而郎將張惠基戰死。其州遂廢。垂拱中。蠻郎將王善寶。昆州刺史龔乾福。復請置州。言課稅自支。不旁取於蜀。及置州。掾李稜為蠻所殺。延載中。司馬成琛更置瀘南七鎮。戍以蜀兵。蜀始擾矣。且姚府總管五十七州間。皆巨猾游客。案地理志。姚州雲南郡。武德四年。以漢雲南縣地置。與東之所稱不同。志又云。武德四年。以古滇王國民多姚姓。因置姚州都督。并置州十二。曰于州。五陵州。補州。和往州。舍利州。范野州。共州。洪州。日南州。眉鄧州。登備州。洛諾州。實十三州也。隸姚州都督府。而東之稱姚府總管五十七州。亦不合。舊書高宗紀。麟德元年。於昆明之弄。合。棟川置姚州都督。與志傳年月又異。

子愿。濬。愿。仕至襄州刺史。濬。著作佐郎。宰相世系表。東之子濬。著作郎。濬子愿。吳郡太守。兼江東採訪使。

姚崇傳

諡曰文獻。案張說撰神道碑云。諡文貞。其諡文獻者。乃崇之父謬也。史誤。

蘇幹傳

父勛。尚南康公主。公主傳。作南昌。

李元紘傳

曾祖粲。左監門大將軍。諡曰明。唐會要。明作胡。

杜暹傳

于闐王尉遲眺約突厥諸國叛暹覺其謀發兵討斬之支黨悉誅更立君長于闐遂安案西域傳于闐國王無名眺者且亦無叛而復安之事

韓泉傳

聞鼓琴至止息歎曰美哉嵇康之爲是曲其當晉魏之際乎王凌母邱儉文欽諸葛誕繼爲揚州都督咸有與復之謀皆爲司馬懿父子所殺康以揚州故廣陵地凌等皆魏大臣故名其曲曰廣陵散言魏散亡自廣陵始案魏之揚州治壽春與廣陵無預泉旣不考而爲此言新舊二史乃采其語入之本傳甚矣史家之無學也王凌刊本皆作王陵亦誤

韓洄傳

終國子祭酒唐會要證曰成

源乾曜傳

開元八年復爲黃門侍郎同中書門下三品本紀宰相表俱云同中書門下平章事

許景先傳

景先常州義興人曾祖緒武德時以佐命功歷左散騎常侍封真定公遂家洛陽列傳第十三卷附許

世緒事。此避太宗諱。去世字。彼傳云并州人。而此云常州。未知孰是。世緒官左散騎常侍。本傳亦不載。以史例言之。當云曾祖緒。自有傳。

齊澣傳

澣嘗稱陳希烈、宋遙、苗晉卿、韋述之才。後皆大顯。案史家之義。獎忠義而抑姦諛。唐史於齊澣傳云。澣嘗稱陳希烈之才於魏知古。傳云。薦伊闕尉陳希烈等。後皆有聞于時。於陸餘慶傳云。薦河南達奚珣等。後皆爲知名士。希烈、珣。唐之大臣。身爲賊相。雖貴顯何足道。而輒津津述之。可謂無識之甚也。

李峴傳

吳王恪孫也。案宗室傳。恪子琨。琨子樟。樟子峴。世系表亦同。則峴乃恪之曾孫。

李回傳

新興王德良六世孫。案宗室傳。稱長樂郡王幼良六世孫。與本傳異。而宗室世系表。以回爲長平郡王叔良六世孫。又與兩傳俱異。考舊史回傳。父名如仙。據世系表。如仙爲長平王五世孫。則回出自叔良之後。審矣。

贈刑部尚書。唐會要。贈司徒。諡文懿。

唐宰相以宗室進者九人。林甫姦諛。幾亡天下。李程、知柔在位。無所發明。其餘以材稱職。號賢宰相。案

宗室世系表宰相十一人。此云九人者，知柔以嗣王權知中書事，非真當國，麟亦屬疏，故不數也。林甫、姦邪、宗閔植黨，皆爲宗室之恥，其餘才局各殊，要爲稱職。程雖蒙惡諷，而在位能直諫，請選名儒侍講，禁中亦得輔導幼主之誼。新史特立宗室宰相一篇，意以諷當時之不用宗室耳。然舍宗閔而厚責程，吾不知其何說也。程上不當有李字。

劉知幾傳

劉子玄，名知幾，以玄宗諱嫌，故以字行。案列傳，名字之下，例書某州縣人，其無可考者，亦於傳首言之。如衛伯玉、宋申錫、高鉞，傳云：「史失其何所人。」鄭薰傳云：「亡鄉里世系是也。」而劉知幾、元結、韓全義、劉栖楚、韋表微、李翱、王璠、裴坦、鄭繁、孫偃、蕭穎士、柳并、皇甫并諸人，傳皆闕之。結傳載自釋一篇，述其族望鄉里甚備，篇首不書可也。知幾傳敘其撰家史稱彭城叢亭里諸劉，出楚孝王囂曾孫居巢侯般，般云云，篇首不書亦可也。知幾兄知柔見文苑傳云徐州彭城人。若全義諸人，鄉里既無可考，當依衛伯玉諸傳之例，方合史法。

蔣乂傳

與許孟容、韋貫之、刪定制敕三十篇，爲開元格後敕。藝文志有元和刪定制敕，卽此書。

某者錡昆弟，其父若幽，死社稷。李錡父名國貞，此云若幽者，考舊書肅宗紀，上元二年，殿中監李若幽，賜名國貞，新史失載，賜名一節，此語遂難曉矣。

張獻恭傳

子煦。贈太子太保。唐會要。贈太子少保。諡曰圉。

張獻甫傳

贈司空。唐會要。諡曰烈。

牛仙客傳

朕且用康誓。誓當作誓。讀爲辨。隋唐以前俗字。所謂巧言爲辨也。

廿二史考異卷五十四

唐書十四

李泌傳

桀曰：我生不有命在天。此紂語，非桀語。

泌建言：學士加大，始中宗時。及張說爲之固辭，乃以學士知院事。至崔圓復爲大學士，亦引泌爲讓而止。

王伯厚曰：崔圓相，肅宗在泌前。會要：貞元四年五月，泌奏張說懇辭大字，衆稱達禮。至德二年，崔圓爲相，加集賢大學士，因循成例，望削去大字。此乃泌引圓爲辭傳誤矣。紀聞予按百官志：修文館，景

龍二年，置大學士四人。修文館即弘文館即泌所謂學士加大，始中宗時也。志又云：集賢院，至德二年，置大學

士，貞元四年，罷大學士。又有崇元學。天寶二載，改曰崇賢館，置大學士二人，以宰相爲之。貞元四年，崇

元館即崇賢館罷大學士。志所云至德二年，正崔圓爲相之日。集賢有大學士自圓始，而宰相之領大學士，

不始於此。蓋自天寶初，立崇賢館，已有之矣。更沂而上之，則景龍初，修文館大學士李嶠、宗楚客、趙彥

昭、韋嗣立四人，亦皆宰相也。但睿宗以後，大學士久已不除。開元時，張說以宰相領集賢院事，不敢居

大學士之名，而六典亦無此職。其後李林甫、陳希烈輩，但兼崇元館大學士，而集賢仍無大名。至崔圓

始爲之。德宗貞元四年，因李泌之請，并集賢崇元，皆去大字。然考之新舊二史，如楊綰、常袞、裴度、牛僧孺、崔鉉、韋昭度、孔緯、杜讓能、徐彥若、崔垂休、獨孤損、裴樞、柳璨，皆加弘文館大學士。李勉、劉從一、裴垪、賈餗、崔郾、李德裕、馬植、鄭朗、崔慎由、蕭鄴、杜讓能、張濬、崔垂休、崔遠、裴贄、楊涉，皆加集賢殿大學士。綰、袞、勉、從一，在泌入相以前，其餘諸人，皆在泌後，則是貞元罷大學士之後，未久而復置也。考權德輿於元和二年，作昭文館大學士壁記云：太宗文皇帝，始于弘文殿側，創弘文館，盛選重名。虞世南、褚亮而下爲之。學士更直，審侍于其中。其後徙于門下省。景龍初，始置大學士，名命益重，多以宰相處之。每二府爰立，則統於黃樞，而或署或否，不爲恆制。孝文後元二十年前，斯職闕焉。前年秋八月，今河中司空公居之。今年夏五月，相國蕭公居之。記所稱司空公者，杜黃裳也。蕭公，謂武元衡也。德宗諡曰孝文，記云闕職二十年者，卽謂貞元以後，學士削去大字也。以是推之，大學士復置，必在元和之初矣。大學士爲宰相加官，其能而復置，宜見於百官志，而史家不能考而著之，疏略甚矣。宋初避諱，改弘文爲昭文，此德輿壁記亦稱昭文，蓋宋時校書者追改。

苗晉卿傳

諷有司改諡文貞。唐會要：太常諡爲懿獻，及敕出，改諡文懿。

裴冕傳

有詔贈太尉。唐會要諡曰獻穆。

裴向傳

贈太子少保。唐會要諡曰穆。

崔光遠傳

代蕭華爲魏州節度使。按方鎮表是時無魏州節度。舊史肅宗紀但云魏州刺史。非節度也。唐會要

贈揚州大都督。諡曰威。

李麟傳

父濬。贈戶部尚書。諡曰誠。誠當作成。唐會要有贈戶部尚書真源縣子李璿。諡曰成。卽此人也。濬璿字

形相似。

楊綰傳

父溫玉。在武后時爲顯官。唐會要溫玉官岐王傅。恆農縣公。諡曰忠。

崔植傳

終華州刺史。唐會要諡曰敬。

李承傳

幼孤。其兄暉養之。宰相世系表。承在暉之前。似承兄而暉弟。當是表誤。

韋倫傳

父光乘。在開元天寶間。為朔方節度使。唐會要。光乘贈太子少傅。諡曰烈。

來瑱傳

明年。上文有乾元二年。則徙瑱山南東道。襄、鄧、均、房、金、商、隨、郢。復十州節度使。按。方鎮表。至德二載。升

襄陽防禦使。為山南東道節度使。領襄、鄧、隋、唐、安、均、房、金、商、九州。治襄州。此傳有郢。復而無唐、安。與表

互異。又傳稱十州節度。今數之。止有九州。則史文當有脫誤。考下文呂誼。王仲昇等言。瑱得士心。不可

以誣。乃改山南東道。襄、鄧、唐、復、隋、郢。六州節度。通鑿亦云。割商、金、均、房。別置觀察使。令瑱止領六州。以

是推之。似唐州元在瑱所管十州之內。傳偶脫唐字耳。

嚴礪傳

贈司空。唐會要。諡曰威。

李栖筠傳

李峴為大夫。以三司按羣臣陷賊者。按。呂誼傳。亦稱御史大夫。李峴刑法志亦同。而峴傳不云為御史

大夫。蓋脫漏也。

李吉甫傳

德宗以來。姑息藩鎮。有終身不易地者。吉甫爲相。歲餘。凡易三十六鎮。殿最分明。按吉甫以元和二年正月拜相。明年九月出鎮。其時魏博則田季安。恆冀則王士真。盧龍則劉濟。淄青則李師道。淮西則吳少誠。滄景則程權。易定則張茂昭。汴宋則韓弘。澤潞則盧從史。陳許則劉昌裔。河東則嚴綬。鳳翔隴右則李鄴。東川則嚴礪。俱未徙節。所更代者。不過河中。邠寧。西川。諸近鎮而已。恐未必有三十六鎮之多。傳文不足深信。

有司諡曰敬憲。度支郎中張仲方非之。帝怒。貶仲方。更賜諡曰忠懿。唐會要。吉甫諡恭懿。張仲方傳。吉甫卒。太常諡恭懿。博士尉遲汾請諡敬憲。俱不云忠懿。

王思禮傳

諡曰武烈。唐會要。思禮諡兩見。一云武。一云武烈。蓋傳聞異詞。

曲環傳

贈司空。唐會要。贈司徒。諡武烈。

張孝忠傳

寶臣晚節稍忌刻。殺大將李獻誠等。舊史同。按藩鎮傳。敘李寶臣殺骨鯁將辛忠義。盧倂。許崇俊。張南容。

張彭老等二十餘人不及獻誠。其下敍惟岳事。又載牙將衛常寧與獻誠語。則獻誠實未死也。此傳誤。

李巽傳

贈尚書右僕射。唐會要。諡曰肅。

常袞傳

拜門下侍郎。同中書門下平章事。弘文崇文館大學士。按百官志。崇文館隸東宮。乾元初。以宰相爲學

士總館事。不云何年置大學士。亦脫漏也。

袞爲相。散官纔朝議而無封爵。郭子儀言於帝。遂加銀青光祿大夫。封河內郡公。百官志。朝議大夫從

五品下。銀青光祿大夫正四品上。

齊映傳

贈禮部尚書。諡曰忠。唐會要。諡恭懿。

姜公輔傳

乃擢公輔諫議大夫。同中書門下平章事。按諫議大夫。是時纔正五品耳。諫議給事。皆門下省官。故得

以本官入相。其後罷爲太子左庶子。左右庶子。卻是正四品官。雖罷相。猶爲序遷也。

顏真卿傳

秘書監師古五世從孫。按真卿爲其父惟貞撰廟碑。敘世系最悉。真卿父惟貞。祖昭甫。曾祖勤禮。勤禮與師古並思魯之子。則真卿乃師古之從曾孫也。

揚朝晟傳

十七年卒於屯。唐會要贈尙書右僕射。諡曰毅。

張建封傳

冊贈司徒。唐會要諡曰襄。

韓弘傳

滑州匡城人。按韓愈撰神道碑。以爲陳之太康人。

盧坦傳

贈禮部尙書。唐會要諡曰貞。

閻濟美傳

諡曰溫。唐會要濟美官太子少傅。諡曰良。

劉伯芻傳

贈工部尙書。唐會要諡曰敬。

潘孟陽傳

父炎。大厓末。官右庶子。進禮部侍郎。唐會要。贈右僕射。諡曰文。

崔龜從傳

遷太常博士。言九宮皆列星。不容爲大祠。詔可其議。九宮遂爲中祠。按。舊書禮儀志。及舒元輿傳。太和二年。元輿爲監察御史。奏言九宮之神。於天地猶子男。陛下爲天子。反臣於天之子男。臣竊以爲過。合稱皇帝遣某官致祭。不宜稱臣與名。詔都省議。皆如元輿言。乃降爲中祠。然則九宮之議。實起于元輿。其時龜從爲太常博士。或在都省預議之列。故舊書本傳亦及之。然不應舍元輿而專歸功于龜從也。

韋夏卿傳

贈尚書左僕射。諡曰獻。唐會要。諡曰簡。

李遜傳

諡曰貞。唐會要。李遜。諡凡兩見。一云貞。一云恭肅。蓋傳聞異詞。遜弟建。贈工部尚書。唐會要。諡曰元。

孔戮傳

戮子遵。孺。遵孺子緯。宰相世系表。作溫孺。

穆贊傳

贈工部尙書。唐會要。諡曰敬。

崔那傳

諡曰文簡。唐會要。諡曰宣簡。

柳玘傳

昭國里崔山南瑄子孫之盛。仕族罕比。山南曾祖母長孫夫人。年高無齒。祖母唐夫人。事姑孝。每旦櫛織。并拜階下。升堂乳姑。長孫不粒食者數年。一日病。言無以報吾婦。冀子孫皆得如婦孝。此事亦見崔珙傳。珙之兄也。

王彥威傳

諡曰靖。唐會要。諡曰憲。

鄭裔綽傳

遷給事中楊漢公爲荊南節度使。坐貪吝貶祕書監。尋拜同州刺史。裔綽與鄭公輿封還制書。帝自卽位。諫臣規正無不納。至是有爲漢公地者。遂終不易。會賜宴禁中。天子擊毬。至門下官謂二人曰。近論漢公事類朋黨者。裔綽曰。同州太宗興王地。陛下爲人子孫。當慎所付。且漢公墨沒敗官。奈何以重地私

之帝變色翼日貶商州刺史。按裔綽官給事中。止正五品。出補商州刺史。乃從三品。唐制上州刺史從三品中下州刺史正四品商爲升品外除。乃謂之貶。漢公官祕書監。本從三品。轉國子祭酒。亦從三品。自祭酒除同州刺史。仍從三品。同品而補外。乃謂之擢。漢公傳。精選國子祭酒。宣宗擢爲同州刺史。蓋同華兩州。京師近輔。刺史葉侍郎兼禮部尚書。同平章事。集賢殿大學士。賜紫金魚袋。鄭朗。朝散大夫。守工部尚書。同平章事。集賢殿大學士。賜紫金魚袋。蕭鄴。朝議大夫。守戶部侍郎。同平章事。判度支。賜紫金魚袋。劉瑑。皆見任宰相。中書侍郎。六部尚書。又皆三品職事官也。又如正義。節度使。檢校禮部尚書。兼潞州大都督府長史。御史大夫。賜紫金魚袋。韋澳。皆見任三品職事官。昭義。節度使。檢校禮部尚書。兼潞州大都督府長史。御史大夫。賜紫金魚袋。鄭涓。邠寧。節度使。檢校禮部尚書。邠州刺史。賜紫金魚袋。畢誠。夏綏。銀。宥。節度使。通議大夫。檢校左散騎常侍。夏州刺史。御史大夫。賜紫金魚袋。鄭助。邠寧。節度使。朝議大夫。檢校工部尚書。邠州刺史。賜紫金魚袋。柳熹。朔方。節度使。朝散大夫。檢校左散騎常侍。靈州大都督府長史。賜紫金魚袋。劉潼。山南西道。節度使。中散大夫。檢校禮部尚書。興元尹。賜紫金魚袋。蔣係。朝議大夫。檢校禮部尚書。兼太原尹。北都留守。賜紫金魚袋。劉瑑。皆見任方鎮檢校官。並至三品。而散官未到。金紫銀青。則非賜不得衣紫也。又如翰林學士。朝議郎。守尚書司勳郎中。知制誥。賜緋魚袋。孔溫裕。朝議郎。守中書舍人。權知禮部貢舉。賜緋魚袋。李藩。皆五品職事官之清要者。而散官未到大夫。則非賜不得衣緋也。

牛叢以司勳員外郎爲睦州刺史。賜金紫。謝曰：「臣今衣刺史所假緋，卽賜紫爲越等，乃賜銀緋。叢與裔綽，皆嘗任五品職事官，而散官未到五品，故須銀緋之賜。」

賈耽傳

滄州南皮人。按地理志：南皮隸景州。景州本滄州所分。耽仕於德順二宗之世。南皮猶隸滄州也。鄭餘慶撰神道碑云：清池人。

杜悰傳

權德輿爲相，其壻翰林學士獨孤郁，以嫌自白。憲宗見郁文雅，歎曰：「德輿有壻乃爾。」此事又見郁傳。當刪此存彼。

始宣宗世，夔王以下五王處大明宮內院，而鄆王居十六宅。帝大漸，樞密使王歸長、馬公儒等以遺詔立夔王，而左軍中尉王宗實等入殿中，以爲歸長等矯詔，乃迎鄆王立之，是爲懿宗。此事已見懿宗紀。毋庸更入此傳。若云初懿宗之立，非宣宗意，及卽位久之，遺樞密使云云，則文省而意益明矣。

久之，遺樞密使楊慶詣中書獨揖悰，它宰相畢誠、杜審權、蔣伸不敢進，乃授悰中人請帝監國奏，因諭悰勅大臣名不在者抵罪，悰遽封授使者復命，謂慶曰：「上踐祚未久，君等秉權，以愛憎殺大臣，公等禍無日矣。慶色沮去，帝怒亦釋。」大臣遂安。按懿宗紀及宰相表，悰以咸通二年二月，由尙書左僕射判度

支、再入相。距懿宗踐祚之始，已兩年矣。使帝銜怒諸大臣，欲置之死地，當不俟此時。傳所云未可深信也。

令狐綯傳

監軍鄒厚本。杜悰傳云：戍將郭厚本。

子瀉、渙、瀕。宰相世系表以瀕爲定之孫，誤。

裴延齡傳

死年六十九。人語以相安。唯帝悼不已，冊贈太子太傅、上柱國。按：舊書延齡傳：延齡死，中外相賀，唯德宗悼惜不已。新史改云：人語以相安，詞意殊難解矣。舊史云：贈太子少保。此云太子太傅，未知孰是。上柱國勳視正二品。然唐時勳級最濫，庶僚軍校授上柱國者甚多。杜佑云：魏置柱國，當時貴寵第一。國家以爲勳級，纔得地三十頃耳。延齡贈上柱國，未爲異數。它傳亦未有載勳官者。此所謂不必書而書也。

韋渠牟傳

贈刑部尚書諡曰忠。唐會要諡曰隱。

李齊運傳

蔣王暉孫。案宰相世系表乃暉之曾孫。

劉禹錫傳

宰相裴度兼集賢殿大學士。按度本傳進弘文館大學士在平蔡之後。此兼集賢殿大學士當在文宗大和初。本傳不載者略之也。

叔文北海人。自言猛之後。按叔文傳云越州山陰人。此云北海者舉其族望也。

柳宗元傳

從曾祖奭爲中書令得罪武后死高宗時。按列傳第三十七卷柳澤傳末已附出奭事。此復承宗元墓志之文書之。吳縝所謂宜削而反存也。



廿二史考異卷五十五

唐書十五

裴珀傳

建言集賢院官登朝。自五品上爲學士。下爲直學士。餘皆校理。史館以登朝者爲修撰。否者直史館。以準六典。遂著于令。今考元和以後。入史館及集賢弘文兩院者。如韓愈。以比部郎中史館修撰。蔣伸。以右補闕史館修撰。蔣偕。以右拾遺史館修撰。鄭澣。以國子博士史館修撰。王溥。以禮部員外郎史館修撰。令狐滈。以右拾遺史館修撰。王龜。以祠部郎中史館修撰。韋澳。以考功員外郎史館修撰。牛蔚。以吏部郎中史館修撰。楊漢公。以戶部郎中史館修撰。李翱。以國子博士史館修撰。楊虞卿。以禮部員外郎史館修撰。高釳。以右補闕史館修撰。盧知猷。以工部侍郎史館修撰。陳夷行。以起居郎史館修撰。裴坦。以左拾遺史館修撰。獨孤郁。以右拾遺兼史館修撰。遷考功員外郎。仍兼史館修撰。路隋。以左補闕史館修撰。薛廷玉。以右拾遺史館修撰。杜顛。以咸陽尉直史館。沈傳師。以鄆尉直史館。轉左拾遺補闕。史館修撰。蔣係。以昭應尉直史館。拜左拾遺史館修撰。此修撰與直館之別也。李益。以祕書少監爲集賢殿學士。馮宿。以左散騎常侍兼集賢殿學士。孔敏行。以司勳郎中爲集賢殿學士。牛僧孺。以考功員外

郎爲集賢學士。王鐸、以右補闕爲集賢殿直學士。王起、以殿中侍御史兼集賢殿直學士。周墀、以監察御史爲集賢殿學士。驛脫孔緯、以禮部員外郎兼集賢直學士。白居易、以整厓尉爲集賢校理。段文昌、以登封尉爲集賢校理。杜讓能、以長安尉爲集賢校理。李福、以藍田尉爲集賢校理。令狐滈、以長安尉爲集賢校理。石洪、以昭應尉爲集賢校理。楊收、以渭南尉爲集賢校理。馮定、以鄆尉爲集賢校理。丁公著、以太子文學兼集賢校理。擢右補闕遷直學士。此學士、直學士、與校理之別也。王彥威、以司封郎中爲弘文館學士。柳公權、以左司郎中爲弘文館學士。楊虞卿、以右司郎中爲弘文館學士。令狐定、以駕部郎中爲弘文館直學士。疑衍鄭裔綽、以渭南尉直弘文館。薛逢、以萬年尉直弘文館。裴樞、以藍田尉直弘文館。柳珪、以藍田尉直弘文館。孔緯、以長安尉直弘文館。此學士與直館之別也。至如于休烈、以起居郎爲集賢殿學士。歸崇敬、以贊善大夫史館修撰兼集賢校理。張薦、以史館修撰兼陽翟尉。乃在未定制以前。故不盡依資品矣。楊嗣復、官右拾遺。當充史館修撰。而傳云直史館。疑修史者不通官制。以意改竄故耳。唐時稱登朝官者。史未有明文。考百官志。文官五品以上。及兩省供奉官。監察御史。員外郎。太常博士。日參號常參官。其餘職事。九品以上官。但朝朔望而已。常參官。卽裴垍所謂登朝官也。宋制。侍從卿監正郎員外郎而下。以正言。卽唐之拾遺太常博士。國子博士。太常丞。祕書丞。殿中丞。太子中允。贊善大夫。中舍洗馬。爲升朝官。著作佐郎。大理光祿衛尉。將作丞。大理評事。太常寺太祝。奉禮郎。祕

書省校書郎。正字。將作監主簿。爲京官。略與唐制。

高固傳

贈陝州大都督。唐會要。諡曰恭。

李光進傳

元和四年。王承宗。范希朝。引師救易定。按是歲王承宗反。以騎二萬。逾木刀溝。河東節度使范希朝。與易定。節度張茂昭。合兵擊敗之。此承宗下嘗有脫文。

石洪傳

石洪者。字濬川。按洪官止縣尉。無卓絕之行。於烏重裔傳。一見其姓名足矣。乃復據韓退之所撰墓志。別爲附傳。首尾百一十四言。諛墓之文。史家豈能悉書乎。

李逢吉傳

父顏。有錮疾。逢吉自料醫劑。遂通方書。按宰相世系表。逢吉父名歸期。顏則逢吉之大父也。

裴度。與元稹。知政。度嘗條稹愼佞。逢吉以爲其隙。易乘。遂并中之。遣人上變。言和王傳于方。結客欲爲稹刺。度帝命尙書左僕射韓皋。給事中鄭覃。與逢吉參鞠。方無狀。稹度坐是皆罷。此事又見元微之。于頔傳。方爲和王傳。當見於頔傳。而翻不書。此史之疏也。頔傳云。事下有司。驗無狀。方坐誅。竊意方刺度。

事卽無狀。何至遽羅重法。且元李兩傳。俱不云方坐誅死。疑方特坐罪。非坐誅也。

牛僧孺傳

敬宗立。僧孺數表去位。帝爲於鄂州置武昌軍。授武昌節度使。同平章事。按宰相表。僧孺罷相。出鎮武昌。在寶曆元年正月。今以方鎮表考之。憲宗元和元年。升鄂岳觀察使爲武昌軍節度使。五年。罷武昌軍節度。置鄂岳都團練觀察使。中更穆宗、敬宗、文宗、武宗四朝。俱無改易。直至宣宗大中元年。始有復置武昌軍之文。蓋方鎮表。失載敬宗初復置一事矣。僧孺鎮武昌凡五年。復入相。而杜元穎、元微之。相繼爲武昌軍節度使。微之卒。而崔郾爲鄂岳安黃觀察使。不稱節度。是武昌節鎮之罷。在太和五年也。諡曰文簡。唐會要諡文貞。

竇羣傳

時翻爲華州刺史。父子同拜。世以爲寵。上文不云父翻。則父子同拜之語無根。宗閱弟宗冉。按宰相世系表。宗冉乃宗閱之兄。

楊嗣復傳

武宗之立。非宰相意中人。多言嗣復珏不利于陛下。帝剛急。卽詔中使分道誅嗣復等。德裕與崔郾崔珙等。詣延英言故事。大臣非惡狀明白。未有誅死者。昔太宗、玄宗、德宗三帝。皆嘗用重刑。後無不悔。願徐

思其宜。使天下知盛德有所容。不欲人以爲冤。此語已見李德裕傳。此但當云德裕等詣延英極諫。不必更舉其詞也。

李宗閔傳

京兆金城人。舊史云扶風平陵人。

張又新傳

又新與拾遺李續、劉栖楚等爲逢吉搏吠所憎。故有入關十六子之目。此事又見李逢吉傳。宜存彼去此。且又新以諂附見譏。其事迹散見於李逢吉、李紳諸篇。其歷官本末。自可附於父薦傳。何必別立傳乎。

楊虞卿傳

子知退。知權、壇、堪、漢公皆擢進士第。漢公最顯。按此似漢公亦虞卿子。而上云虞卿兄弟漢公、汝士爲人所奔向。宰相世系表亦以汝士爲虞卿兄。漢公爲虞卿弟。則此文皆字未安。

錢徽傳

贈尚書右僕射。唐會要證曰貞。

高鍇傳

節以錯爲禮部侍郎。閱三歲。頗得才實。始歲取四十人。才益少。詔減十人。洪邁容齋續筆云。按登科記。開成元年。中書門下奏進士元額二十五人。請加至四十人。奉敕依奏。是年及二年三年。錯在禮部。每舉所放各四十人。至四年。始令每年放三十人爲定。則唐書所云誤矣。大昕按。舊史本傳。本云錯掌貢舉三年。每歲登第者四十人。及三年榜出之後。乃有敕改每年限放三十人。非謂錯所放減十人也。新史刪改文章不明。致來容齋之誚。

盧簡辭傳

兄簡能。見鄭注傳。按鄭注傳末。附載錢可復。盧簡能。蕭傑。盧弘茂。魏弘節。李敬彝諸人。錢徽傳稱。子可復。死。鄭注時。不云見注傳。義例已不一。蕭傑。俛之弟。則俛傳并不一見其名。

高元裕傳

子璩。以左拾遺爲翰林學士。擢諫議大夫。近世學士。超省郎進官者。爲鄭顥以尙主。而璩以寵升云。顯傳不云爲學士。史之略也。拾遺官從八品上。諫議大夫則正四品下。計超七階。

敬晦傳

祖括。拜御史大夫。大厯中卒。唐會要。括贈太子太傅。諡曰獻。

陳夷行傳

帝嘗怪天寶政事不善，問姚元崇、宋璟於時在否。李珣曰：姚亡而宋罷。按宋璟以開元二十五年卒，不逮天寶時。珣所對未審。

前日鄭餘慶著僕射上儀，謂隔品官無允禮。時竇易直任御史中丞，議不可及。易直自爲僕射，乃忘前議。當時鄙厭之。此事又見易直傳。

李讓夷傳

辟鎮國李絳府判官。李絳時爲華州刺史，華州嘗置鎮國軍，故辟讓夷爲判官也。劉瑑傳：鎮國陳夷行表爲判官，夷行亦華州刺史也。

李珣傳

貶江西觀察使。按舊史及通鑑，珣貶桂管觀察使，非江西觀察。

宣宗立，內徙郴、舒二州刺史。按風洞題名，會昌五年五月，珣已稱郴州刺史，則珣之徙郴，在宣宗即位以前。郴亦邊州，未可云內徙。當是宣宗初由郴徙舒耳。

劉瑑傳

遷刑部侍郎，乃哀寬敕令可用者。由武德訖大中，凡二千八百六十五事，類而析之，參訂重輕，號大中刑律總類以聞。按刑法志：宣宗時，左衛率府倉曹參軍張戮以刑律分類爲門，而附以格敕爲大中刑

律統類詔刑部頒行之。不云瑑所撰。又考藝文志。大中刑法總要格後敕六十卷。刑部侍郎劉瑑等纂。與張戣所撰大中刑律總類十二卷。各爲一書。疑瑑傳誤。

盧光啓傳

初。光啓執政。韋貽範。蘇檢。相繼爲宰相。帝還京師。檢長流環州。光啓賜死。按昭宗紀。天復三年正月。至自鳳翔。二月。朱全忠殺蘇檢。吏部侍郎盧光啓。宰相表亦稱檢傳不書檢之死。亦闕漏也。爲全忠所書

馬植傳

因著令三館學士。不避行臺。自植始。三館者。集賢殿。弘文館。史館也。王明清揮麈前錄云。唐文皇聚一時名流于冊府。始有十八學士之號。後來凡居館殿者皆稱之。吳曾能改齋漫錄云。唐集賢院記開元故事。校書官許稱學士。故筆談云。今三館職事。皆稱學士。用開元故事也。楊收以集賢校理而稱學士。蓋以此。

路巖傳

韋保衡弟保乂。自兵部侍郎。貶賓州司戶參軍。按唐承旨學士壁記。咸通十二年二月。韋保乂自戶部員外郎守本官。充翰林學士。五月。加戶部郎中。依前充。十四年十月。貶賓州司戶。是保乂未嘗爲兵部侍郎。且唐季以翰苑爲要地。傳不書學士。亦失之。

盧攜傳

累進戶部侍郎翰林學士承旨。乾符五年，進同中書門下平章事。俄拜中書侍郎、刑部尚書。按宰相表，攜以乾符元年十月拜相。舊唐宗紀十一月，爲中書侍郎。二年六月，兼工部尚書。四年正月，兼刑部尚書。傳系之五年，誤也。舊史本傳，謂乾符初，以諫議大夫，召充翰林學士，拜中書舍人。乾符末，加戶部侍郎。學士承旨，四年，以本官平章事。其書入相差一年。且乾符紀元，終於六年。既書乾符末矣，而其下乃書四年，其踳謬較之新傳尤甚也。

與政爭相，恨詈。由是罷爲太子賓客。按僖宗紀及宰相表，鄭畋與攜之罷，在五年十月。則前稱乾符五年者，殆誤以罷相之年，爲入相之年矣。鄭畋傳，以兩相俱罷，系於乾符六年，又與紀表互異。

王徽傳

昭義高潯，與賊戰石橋，敗績。其將劉廣擅還據潞州，別將孟方立殺廣，因取邢洛磁三州。貳於已。昭義所隸，唯澤一州。按僖宗紀，中和元年八月，昭義軍節度使高潯，及黃巢戰於石橋，敗績。十將成麟殺潯，入於潞州。九月，昭義軍戍將孟方立殺成麟，自稱留後。孟方立傳，昭義節度使高潯，擊黃巢，戰石橋，不勝，保華州，爲裨將成鄰。與麟同所殺，還據潞州。衆怒，方立率兵攻鄰，斬之。自稱留後。獨此傳云，方立殺劉廣，疑誤也。以通鑑證之，昭義大將劉廣，逐節度使高潯，自爲留後。在乾符二年。昭義十將成麟，殺

高潯還據潞州。在中和元年。前後本是兩事。

譜言其先本魏諸公子。秦滅魏。至漢徙關中霸陵。以其故王家爲王氏。十世祖熊。仕周爲同州刺史。此文與宰相世系表略同。當刪此存彼。

周寶傳

祖光濟。事平盧節度希逸。希逸上脫侯字。

餘杭鎮使陳晟。僖宗紀作清平鎮使。

不淹月而駢爲畢師鐸所囚。按僖宗紀。光啓三年九月。秦彥殺高駢。十月。錢鏐殺周寶。是高駢死在周寶之前。此傳謂寶死未淹月。而駢爲畢師鐸所囚。與紀自相矛盾。

劉巨容傳

諸將欲乘勝追斬巢。巨容止曰。朝家多負人。有危難。不愛惜官賞。事平卽忘之。不如留賊爲富貴作地。諸將謂然。故巢復熾。此語又見黃巢傳。

楊守亮傳

守信與平軍節度使。興平節度。卽方鎮表所謂金商節度也。舊本紀云守宗。此云守信。名略異。初。朱玫取興鳳州。號州。刺史滿存。以兵赴行在。復收二州。昭宗紀。光啓二年九月。靜難軍將王行瑜陷

與鳳二州十月神策行營先鋒使滿存克與鳳二州行瑜朱玫部將也紀傳書滿存官銜各異蓋一人兼此兩職。

王重榮傳

與兄重盈俱以毅武冠軍。僖宗紀光啓三年護國將軍常行儒殺其節度使王重榮其兄重盈自稱留後。舊紀同惟五代史王珙傳以重盈爲重榮之弟。

克用遣子存貞請天子還宮存貞嘗作存勛。

李罕之傳

抵鉢襪祇枝去。廣韻祇枝尼法衣也。

王敬武傳

師範遣部將盧宏攻之。五代史劉鄩傳作盧洪蓋宋人避諱改之。

孟方立傳

以遷爲汾州刺史。光化二年克用復表遷爲昭義節度使天復元年朱全忠遣氏叔琮攻河東遷以潞州迎降且爲鄉道師還全忠以丁會代遷入朝爲全忠所殺此皆宜見於本傳者。

楊行密傳

詔朱瑾爲盧平節度使。繇海道取青齊。馮宏鐸爲感化節度使。出漣水攻徐宿。此行密承制遙授。不惟不能有其地。亦並未出師。故瑾、宏鐸傳俱不載。

朱宣傳

宣亡命青州。爲王敬武牙軍。黃巢之亂。敬武遣將曹存實。率兵西入關。而宣爲軍候道鄆州。是時節度使薛崇。拒王仙芝戰死。其將崔君裕攝州事。存實揣知兵寡。襲殺之。據其地。自稱留後。宣以功署濮州刺史。按僖宗紀。中和二年九月。平盧軍將王敬武。逐其節度使安師儒。自稱留後。是歲歲在壬寅。敬武始得青州。而王仙芝之伏誅。在乾符五年戊戌。先壬寅四年則敬武尙爲偏裨。不得有遣將之事。五代史宣傳云。宣事青州節度使王敬武爲軍校。隸其將曹全晟。中和二年。敬武遣全晟入關。與破黃巢。還過鄆州。鄆州節度使薛宗卒。其將崔君預。自稱留後。全晟攻殺君預。遂據鄆州。宣以戰功爲鄆州馬步軍都指揮使。與此傳略同。薛宗即薛崇君預。即君裕音相似。惟此云曹存實。而彼云全晟。姓同名異。據僖宗紀。乾符六年。淄州刺史曹全晟。晟最同音克鄆州。中和三年。天平軍將曹存實克鄆州。則全晟與存實。自是兩人。通鑑。中和元年十月。天平軍節度使南面招討使曹全晟。與賊戰。死軍中。立其兒子存實爲留後。二年五月。以天平留後曹存實爲節度使。則存實爲全晟兒子。此言當可信也。朱宣本平盧軍校。其從征黃巢。適隸曹全晟麾下。因留鄆州。全晟死。復事存實。與王敬武初無預。而史家以全晟爲敬武所遣。蓋失之矣。紀又

稱乾符四年黃巢陷鄆沂二州。天平軍節度使薛崇死之。五年天平軍節度使張揚卒。牙將崔君裕自知州事。六年淄州刺史曹全毘克鄆州。殺崔君裕。是薛崇之後。尚有張揚一人。君裕所代者。乃張揚非薛崇。而殺君裕而代之者。亦全毘非存實。與傳所書益相矛盾。考舊史僖宗紀。乾符二年七月。以京兆尹張揚檢校戶部尚書。充天平軍節度使。四年。寇句賊黃巢攻鄆州。陷之。逐節度使薛崇。張揚傳則云。乾符三年。出爲華州刺史。其冬。檢校吏部尚書鄆州刺史。天平軍節度觀察等使。四年卒於鎮。紀傳書揚出鎮之年。雖互異。要之。揚鎮天平。必在薛崇之前明矣。新紀書張揚於薛崇後。蓋不足信。而君裕實爲全毘所殺。則紀是而傳非也。紀於中和二年十月。書韓簡寇鄆州。天平軍節度使曹全毘死之。部將崔用自稱留後。三年。書天平軍將曹存實克鄆州。四年。書濮州刺史朱宣逐天平軍節度使曹全毘。自稱留後。此三條尤爲疏謬。蓋中和二年。與韓簡戰而死者。存實非全毘也。全毘死於賊。不死於韓簡。全毘死而兄子存實代之。初無崔用其人者。與之爭立也。及存實爲韓簡所殺。而朱宣守鄆州。簡攻之不下。朝廷乃以旌節授之。又安得有逐存實之事乎。如紀所書。自乾符四年至中和四年。此八年中。天平節度。有薛崇、張揚、崔君裕、曹全毘、崔用、曹存實、朱宣。凡七人。據宣傳。則惟崇、君裕、存實、及宣四人。吳氏糾謬。雖譏其失。亦疑而未決。予以新舊史紀傳。五代史。通鑑。參互考之。乃知張揚鎮鄆。在薛崇之前。崔君裕與崔用本一人。而紀誤分爲二。全毘與存實本二人。而傳誤溷爲一。其實自乾符四年以後。鄆帥祇

薛崇、崔君裕、曹全晟、曹存實，併宣爲五人也。唐末諸帝無實錄，史家得於傳聞，言人人殊，無從質其然否。聊述愚管，以俟後賢論定之。

趙鑾傳

中和五年，擢彰義軍節度使。按中和五年，卽光啓元年也。以三月改元，鑾除節度，蓋在三月以前矣。唐時有兩彰義軍，蔡州之彰義，其時已改名奉國軍。涇州之彰義，則其時尚未置也。此傳所云彰義軍，方鎮表無之，推檢其故，蓋因秦宗權據蔡州以叛，故改奉國軍，復爲彰義軍，以鑾遙領節度也。

龍紀初，進同中書門下平章事，忠武軍節度，仍治陳州。是時秦宗權伏誅，蔡州復爲奉國軍，以郭璠知留後事，因移忠武軍額於陳州，除鑾爲節度，方鎮表當於是年書忠武節度，徙治陳州，而今本無之。蓋傳寫漏落也。趙氏兄弟父子，相繼爲節度，幾二十年，至天復元年，乃以韓建代之，建本許州人，由是忠武軍又移於許矣。

劉建鋒傳

又攻容管，執寧遠節度使龐巨驥。按五代史，南漢世家，劉龔與馬殷爭容桂，殷取桂管，虜劉士政，龔取容管，逐龐巨昭，則殷未能得容管，亦無執巨昭事也。巨昭與巨驥，疑卽一人。

杜洪傳

爲里俳兒。俳兒卽伶人也。五代史鍾傳傳云江夏伶人杜洪。

傳宗卽拜本軍節度使。昭宗時累加檢校太師中書令。見舊本紀。此傳失書。

鍾傳傳

使弟存昌據信州。傳宗紀作仔昌。存卽仔之譌昌。音相同也。

王潮傳

建汀二州。皆舉籍聽命。昭宗紀建州刺史徐歸範汀州刺史鍾全慕叛附於王潮。

劉知謙傳

兼賀水鎮使。五代史世家云賀江鎮遏使。

天祐初始詔隱權節度留後乃遣使者入朝重賂朱全忠以自固是歲盧光稠死子延昌自稱刺史爲其

下所殺更推李圖五代史作李彥圖總州事。按五代史南漢世家徐彥若卒軍中推隱爲留後據昭宗紀在天復元年

天祐二年拜隱節度使此傳云天祐初詔權節度留後者誤也昭宗紀天祐元年虔州刺史盧光稠卒

衙將李圖自稱知州事與此傳云天祐初者相合然卻非劉隱權留後之歲亦爲矛盾又考五代史盧

光稠傳其卒在梁開平五年譚全播立其子延昌事之延昌見殺其將黎求自立求死而李彥圖始立

則唐史紀傳所書皆不足據矣二史皆出於歐陽永叔而自相刺謬如此



廿二史考異卷五十六

唐書十六

忠義傳一

有詔差爲二等。增至百八十七人。此功臣百八十七人。史無專傳者。劉正臣、見劉悟傳、任雅相、見宰相表、陸敦信、

見宰相表、趙仁本、見趙懷德明傳、王德真、見宰相表、安興貴、見李執傳、安修仁、同杜君綽、鄭仁恭、見高宗紀、獨孤彥雲、牛進

達、見太周紀、沈叔安、翟無言、見武后紀、趙承恩、同裴思諒、見中宗紀、楊執一、見楊執柔傳、薛思行、見武后紀、薛崇簡、見太平

李延昌、馮道力、崔譔之、見崔溫傳、許輔乾、薛景仙、見宗紀、尙衡、同凡二十五人。

荊州都督懷寧郡公杜君綽。唐會要。諡曰襄。今醴泉縣有君綽碑。

代州都督同安郡公鄭仁恭。高宗紀。唐會要。皆作仁泰。

潭州都督吳興郡公沈叔安。唐會要。贈荊州大都督。諡曰定。

忠義傳三

黃碣。爲漳州刺史。徙婺州。治有績。劉漢宏遣兵攻之。兵寡不可守。棄州去。按僖宗紀。中和四年。婺州

將王鎮執其刺史黃碣叛。附于董昌。此傳云棄去。則碣未嘗被執也。

孝友傳

李知本。開元中。孫璵爲給事揚州刺史。唐會要有贈魯郡都督趙郡公李璵。諡曰孝。豈卽其人乎。

隱逸傳

賀知章。越州永興人。按舊史。知章爲太子洗馬。德仁之族孫。德仁名在文苑傳。似可合爲一篇。

陸龜蒙。光化中。章莊表龜蒙及孟郊等十人。皆贈右補闕。按唐摭言載。章莊奏請追贈不及第人近
代者。孟郊、李賀、皇甫松、李羣玉、陸龜蒙、趙光遠、李甘、溫庭皓、劉德仁、陸逵、傅錫、平曾、賈島、劉稚珪、顧邵
孫、沈珮、顧蒙、羅鄴、方干、凡十九人。

循吏傳

章丹。封咸陽郡公。咸陽。當作武陽。

章宙。宙在嶺南。以從女妻小校劉謙。或諫止之。宙曰。吾子孫或當依之。謙後以功爲封州刺史。生二子。
卽隱、夔。此事又見劉知謙傳。本名知謙。而云謙者。疑後人避漢祖諱去之。

儒學傳一

文宗定五經鑿之石。張參等是正訛文。參。代宗時人。非文宗時。

陸德明。子敦信。終大司成。唐會要。贈原州都督。諡曰康。

谷那律。孫倚相。仕爲祕書省正字。文藝傳。富嘉謨。吳少微。谷倚稱北京三傑。卽此人也。
蕭德言。諡曰博。唐會要。諡曰密。

儒學傳二

路敬淳。唐初姓譜學。唯敬淳名家。其後柳沖、韋述、蕭穎士、孔至各有撰次。此語又見柳沖、孔至傳。
柳沖。李守素亦明姓氏。時謂肉譜者。肉譜語。又見守素傳。談啁之詞。何必數見乎。
應劭有氏族一篇。按應氏風俗通義。本有氏族篇。廣韻亦屢引之。今本無此篇。蓋非完書。

儒學傳三

元行沖。少孤。養於外祖司農卿韋機。疑卽宏機。避諱省上一字。
陸堅。有詔起復。遣中官敦諭不就。有詔之上。當有親喪字。

鄭欽說。初。梁太常任昉。大同四年七月。於鍾山塘中得銘。按梁書。昉卒於天監七年。年四十有九。若大同四年。歲在戊午。在天監戊子後三十年。此小說家無稽之說。而史家采之。可謂不學矣。

陳京。司馬晉以高皇太皇征西四府君爲別廟。按晉初追尊宣帝以上四親。所謂征西、豫章、潁川、京兆四府君也。曷嘗有高皇太皇之稱乎。詳其文義。則司馬晉之上。當有曹魏二字。魏明帝嘗追尊武帝父嵩爲太皇帝。祖騰爲高皇帝也。魏以武帝爲太祖。而高皇太皇在別廟。晉以宣帝爲太祖。而征西四

府君在別廟，正同一例。

若世祖，則春秋所謂陳於太祖者。按春秋無此文，舊禮儀志載此議，本云代祖即世祖，神主則太祖已下。毀廟之主，公羊傳所謂已毀廟之主，陳於太祖者是也。詞意甚明白，新史所不逮也。故有連王廟之制，王廟當作五廟，下文同。

文藝傳一

袁朗，典籤蘇幹。按蘇幹傳云：父勛，武德中爲秦王諮議典籤，文學館學士。又褚亮傳載秦府十八學士，亦有蘇勛而無蘇幹，則幹乃勛字之譌。

王勃，卒年二十九。楊盈川撰勃文集序云：春秋二十有八，卒於上元三年八月。

文藝傳二

李白，年六十餘。按曾鞏撰次白詩集序云：白卒年六十有四。蕭穎士，殷寅者，陳郡人。寅卽踐猷之子，已見儒學傳。

文藝傳三

李賀，卒年二十七。此據杜牧所撰詩集序也。李商隱爲賀小傳，則云生二十四年。吳武陵，信州人。按李紳傳始澄人，吳汝納者，韶州刺史武陵兄子也。汝納旣爲武陵兄子，而一稱信

州人。一稱澧人。疑有一誤。

李商隱。或言英國公世勳之裔孫。馮養吾曰。義山詩云。我系本王孫。又云我家在山西。山西卽隴西也。蓋亦涼武昭王之後。非世勳裔也。

方技傳

張憬藏。裴光廷當作當國。憬藏以紙大署台字投之。光廷曰。吾旣台司矣。尙何事。後三日。貶台州刺史。

按光廷以開元十七年六月入相。二十一年三月薨。初無貶斥之事。後讀劉賓客嘉話錄云。中書令河東公。開元中。居相位。有張憬藏者。能言休咎。一日忽詣公。以一幅紙。大書台字授公。公曰。余見居台司。此意何也。後數日。貶台州長史。李綽尙書故實。亦具載斯事。兩書所稱河東公者。張嘉貞也。新史乃以裴光廷當之。謬之甚矣。考嘉貞由中書令。罷爲幽州刺史。其後雖貶台州。去作相之日久矣。小說家附會之說。不盡足信。

帥夜光。因九仙公主得召見。公主傳。未見有封九仙者。

列女傳

高愍女。父彥昭。贈陝州都督。唐會要。贈工部尙書。諡曰愍。

外戚傳

武士讓之孫攸寧爲建昌王攸歸九江王攸望會稽王士逸孫懿宗河內王嗣宗臨川王仁範河間王仁範子載德潁川王士稜孫攸暨千乘王惟良子攸宜建安王攸緒安平王從子攸止恆安王重規高平王今按宰相世系表攸暨與攸寧皆懷道之子與攸歸攸止攸望同爲士讓之孫而傳獨以攸暨爲士稜孫其可疑一也表以仁範爲士逸子重規與載德均爲仁範之子傳則以仁範爲士逸孫以重規爲惟良從子其可疑二也據表惟良與懷運皆士讓之子則攸宜攸緒等亦士讓孫矣傳不應別而言之若以惟良名已見傳故別敘惟良之子則懷運名亦見傳而攸歸等何以不云懷運之子其可疑三也據表攸歸攸止攸望皆懷運子傳或稱士讓孫或稱惟良從子似非同父昆弟其可疑四也文苑英華載宋之問爲武攸暨請降王位表稱臣亡兄攸寧屬纊之夕再受懇言憂臣愚蒙令臣退讓乃知攸寧攸暨實親昆弟攸寧又爲攸暨之兄傳以攸暨爲士稜孫固誤表列攸暨於攸寧之前亦非也

宦者傳

唐制內侍省官有內侍四內常侍六內謁者監內給事各十謁者十二典引十八寺伯寺人各六又有五局一曰掖廷主宮嬪簿最二曰宮闈扈門闈三曰奚官治宮中疾病死喪四曰內僕主供帳鑪燭五曰內府主中藏給納局有令有丞皆宦者爲之內侍省官已見百官志此重出可刪

李輔國以右武衛大將軍藥子昂代判元帥行軍司馬唐會要子昂贈揚州大都督諡曰忠

酷吏傳

崔器、三日卒。唐會要諡曰貞。

藩鎮魏博傳

田承嗣。加同中書門下平章事，封雁門郡，寵其軍曰天雄。按舊書承嗣傳，無寵其軍曰天雄之文。方鎮表亦不載。至天祐元年，始云賜魏博節度，號天雄軍節度。然則昭宗以後，乃有天雄軍號。謂田承嗣時已有之者，非也。舊書羅紹威傳，稱文德初，充天雄軍節度副使。文德紀元在天祐之前，恐亦追稱之。田悅，建中二年，鎮州李惟岳、淄青李納，求襲節度，不許。悅爲請，不答。遂合謀同叛。按李惟岳傳，寶臣死軍中，推爲留後，求襲父位，帝不許。田悅爲請，不聽。遂與悅、李正己謀拒命。又李正己傳，建中初，聞城汴州，乃約田悅、梁崇義、李惟岳偕叛。是李正己未死之前，已與悅偕叛。非因子納求襲鎮，不許而始叛也。考德宗紀，田悅反在建中二年正月，李正己卒，其子納自稱留後。在是年八月，以是推之，悅未叛以前，但爲惟岳請襲，未嘗爲納請明矣。

藩鎮盧龍傳

李載義。太和四年，爲兵馬使，楊志誠所逐。按文宗紀，在太和五年正月。舊紀傳亦作五年，此誤。

藩鎮澤潞傳

劉悟。卒贈太尉。唐會要。諡襄武。

突厥傳

右賢王阿史那泥孰。蘇尼失子也。始歸國。妻以宗女。賜名忠。上文云阿史那忠爲左賢王。阿史那泥孰爲右賢王。則忠與泥孰非一人矣。此乃云泥孰賜名忠。何其相矛盾也。

吐蕃傳

天寶元年。隴右節度使皇甫惟明。破虜大嶺軍。戰青海。破莽布支。斬首三萬級。明年。破洪濟城。戰石堡不克。副將諸葛誦死之。按玄宗紀。天寶元年十二月。隴右節度使皇甫惟明及吐蕃戰於青海。敗之。二年四月。皇甫惟明克吐蕃洪濟城。四載八月。皇甫惟明及吐蕃戰于石堡城。副將褚誦死之。是石堡之役。在破洪濟之後二年。傳合爲一事。誤矣。紀云褚誦。而傳云諸葛誦。未知孰是。

回鶻傳

東北俱羅勃爲燭龍州。地理志。燭龍州。貞觀二十二年。析瀚海都督之掘羅勿部置。掘與俱。勿與勃。音相近也。

沙陀傳

王仙芝陷荆襄。朝廷朝發諸州兵討捕。國昌遣劉遷統雲中突騎逐賊。數有功。按國昌以咸通十四年

拒命朝廷遣太原幽州諸軍討之。王仙芝陷荆襄。在乾符四年。其時國昌父子尙未歸命。安得有遺突騎逐賊之事乎。考舊唐書。是年賊陷江陵之郛。楊知溫求援於襄陽。時沙陀軍五百騎在襄陽。軍次荆門。騎軍擊賊。敗之。蓋沙陀軍別有從征襄陽者。非國昌所遣也。

光啓元年。幽州李可舉。鎮州王景崇。按景崇以中和三年卒。子鎔繼之。光啓改元之際。鎮州帥乃王鎔。非景崇也。

南蠻傳

元和中。辰淑蠻酋張伯靖聚衆叛。黔中經略使崔能。荆南節度使嚴綬。湖南觀察使柳公綽討之。三歲不能定。按本紀。同時討伯靖者。尙有劍南東川節度使潘孟陽。傳失載。

姦臣傳

李義府。貞觀中。高士廉。韋挺。岑文本。令狐德棻。修氏族志。凡升降天下。允其議。於是州藏副本。以爲長式。時許敬宗以不載武后本望。義府亦恥先世不見敘。更奏刪正。委孔志約。楊仁卿。史元道。呂才等定其書。以仕唐官至五品。皆昇士流。於是兵卒以軍功進者。悉入書限。更號姓氏錄。搢紳共嗤斬之。號曰勳格。義府奏悉收前志。燒絕之。此事已見士廉傳。

贈義府揚州大都督。唐會要。諡曰成。

盧杞。詔拜饒州刺史。給事中袁高當行詔書。不肯草白。宰相曰。杞反易天常。使萬乘播遷。幸赦不誅。又委大州。失天下望。宰相不悅。乃召它舍人作制。高固執不得下。此事已見高傳。雖應兩見。不必又述其語也。

崔昭緯。以戶部侍郎。同中書門下平章事。居位凡八年。按宰相表及本紀。昭緯以大順二年辛亥正月拜相。至乾寧二年乙卯八月罷爲右僕射。居位實不滿五年。

叛臣傳

僕固懷恩。以僕骨歌濫拔延爲右武衛大將軍金微都督。訛爲僕固氏。生乙李啜。乙李啜生懷恩。回鶻傳。以懷恩爲歌濫拔延之子。誤。

逆臣傳

黃巢。仙芝乃遣蔡溫球、楚彥威、尙君長來降。舊書僖宗紀。作蔡溫玉。進寇廣州。詔節度使李迢書。求表爲天平節度。舊書僖宗紀。稱廣南節度使李巖。

修唐書史臣表

<p>慶曆四年 甲申 樞密使賈昌朝建議修唐書。令館職日供唐書所未載者二事附於本傳。</p>	<p>提舉官</p>
<p>五年 乙酉 五月四日詔開局修唐書。</p>	<p>刊修官</p>
<p>賈昌朝 五月以工部侍郎平章事兼樞密使充提舉官。</p>	<p>編修官</p>
<p>王堯臣 五月以翰林學士同刊修。 宋祁 五月以翰林侍讀學士龍圖閣直學士右諫議大夫同刊修。</p>	<p>曾公亮 五月以度支員外郎集賢校理天章閣侍講充以編敕不入局。 趙師民 五月以宗正丞崇文院檢討兼天章閣侍講充未到局。</p>
<p>張方平 五月以翰林學士同刊修。 楊察 五月以知制誥同刊修。</p>	<p>何中立 五月以殿中丞集賢校理充除開封幕亦</p>

	<p>六年 丙戌</p>
	<p>昌朝</p>
<p>趙槩 五月以知制誥同刊修。尋請守蘇州不入局。</p> <p>余靖 五月以知制誥史館修撰同刊修。尋出知吉州。按趙余二人長編不載。據春明退朝錄。</p>	<p>堯臣 正月除承旨兼端明殿學士充羣牧使。</p> <p>方平 正月以右諫議大夫權御史中丞十一月復為</p>
<p>不入局。</p> <p>范鎮 五月以大理寺丞館閣校勘充。</p> <p>邵必 五月以大理寺丞國子監直講充以目疾辭不到局。</p> <p>宋敏求 五月以校書郎充九月復館閣校勘。按東都事畧謂宋邵范鎮在局一十七年敏求十年今據長編敏求與鎮並命中間未除外任似不止十年也。</p>	<p>鎮</p> <p>敏求</p> <p>王疇 以太常博士充。按東都事畧稱疇在局一十</p>

<p>八年 戊子。</p>	<p>七年 丁亥。</p>	
<p>度 四月。罷政事。以觀文殿學士判尙書都省。提舉如故。</p>	<p>昌朝 三月。罷相。判大名府。 丁度 六月。以工部侍郎參知政事。充提舉官。</p>	
<p>方平 八月。出知滁州。</p> <p>禡 六月。復以右諫議大夫。史館修撰。除翰林學士。六月。出知許州。</p>	<p>禡 四月。以右諫議大夫。權御史中丞。</p> <p>方平</p>	<p>翰林學士。 察 正月。自右正言知制誥。遷翰林學士。</p> <p>堯臣 丁母憂。未詳年月。</p>
<p>鎮 敏求 疇</p>	<p>敏求 疇 鎮 加直祿閣。按事略云。慶厯中。未詳年月。</p>	<p>五年。知當於是年入局也。</p>

<p>皇祐元年 已丑。</p>	<p>二年 庚寅。</p>
<p>度</p>	<p>度</p>
<p>祁 六月。復為翰林學士。史館 修撰。自同刊修為刊修官。 遂獨秉筆。</p>	<p>祁 九月。以明堂恩轉給事中。 兼龍圖閣學士。</p>
<p>鎮 敏求 劉義安 以試大理評事趙州 推官充 呂夏卿 以江寧尉充。按。二 人未詳入局年月。</p>	<p>鎮 疇 敏求 義安 除試祕書省校書郎。 夏卿 除試祕書省校書郎充 石州軍事推官。右二 人除官見胡宿外制。</p>

<p>三年 辛卯。</p>	<p>四年 壬辰。</p>
<p>度</p>	<p>度</p>
<p>祁 三月。以集賢殿修撰。出知 亳州。詔就州修唐書。自後 歷內外任。皆以史局自隨。</p>	<p>祁 以禮部侍郎改知成德軍。</p>
<p>鎮 欒 敏 求 義 窠 夏 卿</p>	<p>鎮 加直祕閣。 欒 敏 求 義 窠 夏 卿</p>

<p>五年 癸巳。</p>	<p>至和元年 甲午。 七月，詔修唐書官宋祁、編修官范鎮等速上所修唐書。</p>
<p>度 正月卒。 劉沆 以工部侍郎參知政事充提舉官。</p>	<p>沆 八月以前官同平章事。</p>
<p>祁 正月改知定州。</p>	<p>祁 遷端明殿學士吏部侍郎知益州。未詳年月。 歐陽修 八月自翰林學士吏部郎中為知修官以宰相劉沆薦也。</p>
<p>鎮 除開封府推官。未詳年月。 敏求 義安 夏卿</p>	<p>鎮 以起居舍人直祕閣。徐知諫院。 疇 除開封府推官。按事畧云至和中或即代鎮也。 敏求 轉著作佐郎。未詳年月。 義安 轉祕書丞。未詳年月。 夏卿</p>

二年 乙未

十月，歐陽修言，唐自武宗以下，並無實錄，以傳記別說考證虛實，尙虛闕畧，聞西京內中省寺留司御史臺及鑾和諸庫，有唐朝至五代以來奏牘案簿，尙存，欲差編修官呂夏，屬詣彼檢討從之。

嘉祐元年 丙申

沈 六月，轉兵部侍郎。

沈 十二月罷相，出知應天府。

王堯臣 以戶部侍郎參知政事，充提舉官。

祁

六月，除翰林侍讀學士，出知蔡州，七月復留爲學士。

八月使契丹。

祁

二月，使北還，閏三月，判太常寺，五月，知通進銀臺司，八月，樞發遣三司公事。

鎮 八月，奉使契丹。

遷開封府判官，未詳年月。

敏求

義安

夏卿

梅堯臣 以太常博士充，未詳年月。

鎮 八月，除戶部員外郎，兼侍御史，知雜事，固辭不受，十一月，復爲起居舍人，充集賢殿修撰。

除三司度知判官，未詳年月。

敏求

	二年丁酉。
	堯臣
	<p>修 祁</p> <p>正月。知禮部貢舉。轉右諫議大夫。</p>
<p>堯臣 夏卿 義安</p> <p>除國子監侍講。</p>	<p>鎮 兼修起居注。未詳年月。</p> <p>疇 八月。以度支判官。祠部郎中直祕閣使契丹。</p> <p>敏求 以太常丞集賢校理充同知太常禮儀事以歐陽修薦也。</p> <p>堯臣 夏卿 義安</p>

<p>四年 己亥。</p>	<p>三年 戊戌。</p>
<p>公亮</p>	<p>堯臣 八月卒。 會公亮 十月以禮部侍郎參知政事充提舉官</p>
<p>修 二月解開封府事轉給事中。 駉 三月以端明殿學士兼翰林侍讀學士吏部侍郎集賢殿修撰除三司使尋加龍圖閣學士知鄭州。</p>	<p>駉 六月加龍圖閣學士權知開封府。</p>
<p>義安 敏求 鎮 轉禮部郎中未詳年月。 疇 除刑部郎中知制誥權判吏部見法帖。</p>	<p>堯臣 夏卿 義安 敏求 疇 鎮 三月起居舍人除知制誥</p>

	<p>五年 庚子。 六月書成。七月戊戌奏上。刊 修及編修官皆進秩。或加職。 仍賜器幣有差。</p>		<p>夏卿 堯臣 十二月。進給祭詩。有詔 獎諭。轉都官員外郎。</p>
	<p>公亮 以提舉日淺。辭賞典。唯 賜銀幣。</p>	<p>禛 轉工部尚書。尋自鄭州召 還。除翰林學士。承旨。明年 五月卒。 修 轉禮部侍郎。</p>	<p>堯臣 夏卿 賞也。 義安 加直祕閣。皆以書成推 卒。 敕求 轉工部員外郎。 疇 轉一官。 鎮 轉一官。</p>
			<p>堯臣 四月卒。以書成。恩錄其 子二人。</p>

下

下

十三

十一
大昕按。宋景文公登科入禁林。皆在歐陽公之前。寄祿官亦高於歐陽。而進表列銜。歐陽在宋之前者。歐公見掌內制。宋公帶職出守。內任重於外任故也。書成後。范王二人各轉一官。史不言轉何官。依宋制。敍遷格。范官禮部郎中。當轉戶部郎中。王官刑部郎中。當轉兵部郎中也。皇祐二年。明堂恩。范王宋三人亦應轉官。而史無明文。姑闕之。

廿二史考異卷五十七

舊唐書一

高祖紀。按舊史本紀前後繁簡不均。睿宗以前文簡而有法。明皇肅代以後其文漸繁。懿僖昭哀四朝。尤難滋甚。姑以卷帙論之。自高祖至肅宗八世。百四十五年。爲卷十。合計二百廿七葉。自代宗至哀帝十三世。百四十五年。亦爲卷十。而自十七卷以後。分爲上下。合計五百六十八葉。年代相等。而文且倍又半之。且以高祖創業之君。在位九年。而紀止六千八百十有四言。哀帝政在強臣。在位不盈三載。而紀乃一萬三千有二言。蓋唐初五朝國史。經吳兢、韋述諸人之手。筆削謹嚴。中葉以後。柳芳、令狐峘輩。雖非史才。而敘事尙爲完備。宣懿而後。既無實錄可稽。史官采訪。意在求多。故卷帙滋繁。而事迹之矛盾益甚也。

儀鳳中。追尊宣皇帝。按高宗紀。上元元年八月。追尊宣簡公爲宣皇帝。懿王爲光皇帝。此紀云儀鳳中者。誤也。又開元十年。尊宣皇帝爲獻祖。光皇帝爲懿祖。亦宜見于本紀。而此紀失之。

武德元年。相國府司馬劉文靜爲納言。隋民部尙書蕭瑀。相國府司錄竇威。並爲內史令。此納言即侍在內史令即中之上。八年。加秦王中書令。齊王元吉侍中。則中書令居侍中上矣。自後中書令常居侍

中之上五代及宋猶循之。又按本紀之例，宰相除免，皆當書。高祖紀書拜而不書，罷如劉文靜之除名，紀亦失之也。睿宗以前本紀，惟書宰相除免，明皇以後，卿監方鎮亦書矣。興元貞元以後，兩制中丞六尚書亦書矣。又如元和以後，宰相多兼集賢殿宏文館大學士，紀皆不書。而宣宗昭宗哀帝三紀，則具書之。諸臣除授散官勳封例不書，而宣宗昭宗哀帝紀亦書之。諸臣賜紫賜緋例不書，而憲宗穆宗宣宗，哀帝紀屢書之。禮部知貢舉例不書，而大中咸通間屢書之。此紀文之所以益於前也。八年，中書令溫彥博沒于賊。按本傳，彥博時爲中書舍人，非令也。

太宗紀

貞觀五年，太子少師新昌縣公李綱薨。按高祖紀，內史令竇威以宰相而書卒，此紀李綱非宰相而書薨，中書令岑文本馬周皆見任宰相，卻書卒，蓋唐初侍中中書令正三品，東宮三少則從二品也。宰相職雖顯貴，猶以官未至二品，不與書薨之例。高祖紀侍中高季輔辛茂將姜恪張文瓊，中書令閻立本檢校左相竇德元，武后紀內史狄仁傑，皆書卒，猶此例也。明皇紀黃門監盧懷慎左相牛仙客書卒，而侍中裴光庭獨書薨，太子太保陸象先官從一品，且前宰相也，而書卒。太子少師韓休亦前宰相也，而書卒。而太子太師徐國公蕭嵩以前宰相獨書薨，代宗紀門下侍郎平章事衛國公杜鴻漸，中書侍郎平章事楊綰，皆書卒，而太子太保邠國公章見素以前宰相書薨，德宗紀中書侍郎平章事崔祐甫門

下侍郎平章事崔損。皆書卒。而門下侍郎平章事趙憬。獨書薨。檢校司徒兼太子太師沂國公李勉。以前宰相亦書薨。尚書右僕射姚南仲亦書薨。則書薨書卒。殊無一定之例矣。使相惟李光弼、郭子儀、李晟、馬燧以元勳書薨。此外方鎮帶宰相銜者。皆書卒。而德宗紀。成德軍節度使、檢校太尉中書令王武俊。憲宗紀。劍南西川節度使、檢校太尉中書令韋皋。二人獨書薨。此亦義例之未當也。穆宗以後。宰相三公三師使相皆書卒。無有書薨者。又與前數朝之例互異。歐史本紀。惟宰相終于位者書薨。而餘官皆不書。較之前史。簡而當矣。

高宗紀

貞觀二十三年。英國公勳爲尚書左僕射。同中書門下三品。僕射始帶同中書門下。按唐初以三省長官爲宰相。尚書令與左右僕射皆二品。侍中、中書令皆三品。論班序。當由侍中轉中書令。乃遷僕射。今勳以僕射同中書門下三品。是以上兼下也。然自後僕射不帶同中書門下者。遂不復與聞政事。則宰相惟兩省長官任之。而南省不得與。尚書省謂之南省。僕射雖居人臣之極地。不過備員而已。開元中。嘗改左右僕射爲左右丞相。然雖有相之名。卻無相之實也。

永徽二年。中書令兼檢校吏部尚書蔣縣公高季輔爲侍郎。侍郎蓋侍中之譌。
三年。同州刺史河南郡公褚遂良爲吏部尚書門下三品。尚書下脫同中書三字。

顯慶三年，兼中書令皇太子賓客，兼檢校御史大夫河間郡公李義府。上兼字去聲，此欠一階之兼也。下兼字平聲，此兩職事之兼也。

四年，惟郭待封，張九齡五人居上第。此別一張九齡。

中宗紀

神龍元年，上親祔太祖景皇帝、獻祖光皇帝、世祖元皇帝。按：獻祖爲太祖之祖父，不應在太祖之下。且獻懿二祖廟號，始上于開元十年，不應中宗世已稱之。又光皇帝廟號懿祖，非獻祖也。禮儀志稱崇祚光皇帝，太祖景皇帝，代祖元皇帝，斯爲得之。

睿宗紀

臨淄王諱。按：太宗、高宗、中宗，篇中直書高、中、睿三宗之名，高祖篇中，但書太宗而不名，此紀於明皇名，稱諱於例，初未盡一。蓋五朝之史，成於明皇之世，故特稱諱，後來又承其舊文，而不能是正爾。

明皇紀

第三子平王基。明皇本名隆基，而制詞但稱基一字。

開元八年，皇太子敏薨，追封懷王。太字衍。

天寶元年，改侍中爲左相，中書左右丞相，依舊爲僕射。中書下蓋有脫文，當云中書令爲右相，尙書左

右丞相。依舊爲僕射。

十三載。廢濟陽郡。以所領五縣隸東平郡。按新史地理志。是年郡廢。以長清隸濟州。當作濟南以盧平陰。東阿。陽穀屬東平。是改隸東平。止四縣矣。舊志云。廢濟州。盧長清。平陰。東阿。陽穀等五縣。並入鄆州。

我開元之有天下也。此史成于石晉史臣之手。而論稱我字。尹思貞等傳贊。尙書亞台。京尹方伯。我朝重官。云誰稱職。李勉等傳贊。我宗之英。曰梟與勉。李抱玉傳贊。抱玉抱眞。我朝良將。崔慎由等傳贊。漢代荀陳。我朝崔杜。文苑傳序。爰及我朝。挺生賢俊。北狄傳。我太宗文皇帝。安祿山傳。論我唐之受命也。此皆沿舊史臣之詞。而未及改正者。當如順宗紀。書史臣韓愈名。憲宗紀。書史臣蔣係名。則於文義無嫌矣。又如錢九隴樊輿傳。竝云父配。沒爲皇家隸人。此亦非異代史臣之詞。

肅宗紀

開元十五年正月。封忠王。改名浚。玄宗紀。在十三年三月。

天寶十四載十二月丁未。陷東京。丁未。當作丁酉。

至德元載。詔以子儀爲兵部尙書。依前靈州大都督府長史光弼。爲戶部尙書。兼太原尹。北京留守。同中書門下平章事。案。郭李二人。同時除使相。當增竝字於同中書之上。

二載。十一月壬申朔。十二月丙午。十二月戊午朔。按一歲不應有兩十二月。以上文十月乙巳朔。及次

年正月甲戌朔。前後推校。則十一月當乙亥朔。十二月當甲辰朔。史所紀壬申者。十月之廿八日。非十一月朔也。丙午則十二月三日。戊午則十二月十五日。史文之謬誤如此。

三載正月甲戌朔戊寅。按肅代以後諸帝紀。多有無事而書朔者。蓋本實錄之文。史臣刊削未盡也。乾元二年。右羽林將軍李抱真爲鄭州刺史。此時抱真未爲刺史。蓋李抱玉也。

上元二年。上不康。本當云不豫。避代宗諱。改豫爲康也。禮儀志。上元年聖躬不康。文宗紀。聖體不康。上不康。

是以宣皇帝。按玄宗諡七字。其末三字曰大明孝。肅宗諡九字。其末三字曰大宣孝。大孝之諡。諸帝所同。故稱玄宗爲明皇。肅宗爲宣皇也。

代宗紀

大曆五年。以京西兵馬使李忠臣爲鳳翔尹。代皇甫溫。按忠臣無徙鎮鳳翔之事。當是李抱玉之譌。然爾時抱玉官位已高。不當云京西兵馬使也。

貶禮部尚書裴士淹爲處州刺史。按德宗卽位。改括州爲處州。避御嫌名。此在代宗朝。當云括州。史臣追改之。而於十二年又有括州字。所謂史駁文也。

七年。以張之清豐店。置清豐縣。按新史地理志。清豐縣。大曆七年。析頓邱昌樂置。以孝子張清豐名。其

時無張縣也。紀誤。

十一年十二月。以涇原節度副使試太常卿張掖郡王段秀實。權知河東節度留後。北都留守薛兼訓病故也。按段秀實傳。無權知河東留後事。紀所書誤也。即以本紀證之。十二年正月。書以四鎮北庭涇原節度副使。知節度使事張掖郡王段秀實。爲涇州刺史。兼御史大夫。充本州團練使。不云新除河東節度留後也。其三月。書以太原少尹。河東節度行軍司馬。權知河東留後鮑防。爲太原尹。御史大夫。充北都留守。河東節度使。則此紀云。權知河東留後者。乃鮑防。非秀實矣。蓋秀實由節度副使。除知節度事。鮑防以河東行軍司馬。權知留後。皆十一年十二月事。馬璘薨而以秀實代之。薛兼訓病而以防代之。兩事本不相涉。中有脫文。後人誤連屬之。

十四年。上崩于紫宸之內殿。諸帝之崩。皆書年壽如干。獨代宗紀失之。

德宗紀

貞元三年八月。以給事中王緯爲潤州刺史。江西觀察使。江西當作浙西。
十三年三月。以福建都團練使李若初爲明州刺史。浙東觀察使。浙江東道。本治越州。據此文似當時曾移治明州。而新史方鎮表未及之。

順宗紀

建中元年正月丁卯立爲皇太子。按德宗紀大曆十四年十二月乙卯制宣王某可立爲皇太子。此紀

云正月丁卯者。彼據宣制之日。此據受冊之日也。丁卯下當有朔字。

貞元二十一年。以吏部郎中韋執誼爲尙書右丞相。同中書門下平章事。此時無左右丞相之官。相字

衍。

李師古、劉濟、兼檢校司空。張茂昭司徒。新史三公表無茂昭名。蓋檢校司徒也。

穆宗紀

元和十五年。恆王房子孫改爲泚王房。恆王當是恆山愍王也。泚王卽愍王之譌。唐人避諱民旁字多改从氏。

敬宗紀

寶曆二年。其漢陽、汝川兩縣隸鄂州。汝川當作汝川。

文宗紀

太和四年。敕前行郎中知制誥者。約滿一周年。卽與正授。從諫議大夫知者。亦宜準此。前行謂吏兵二

曹也。唐中葉以後。常以它官知制誥。行中書舍人之職。與學士對掌內外制。當時亦呼爲舍人。然必官

至前行郎中以上。乃得正授舍人。若學士。除中書舍人者。仍典內制。不兼外制也。

開成二年。吏部奏長定選格。請加置南曹郎中一人。別置印一面。以新置南曹之印爲文。從之。新史百

官志失載此事。考裴諱傳。代宗居陝。諱步。懷考功及南曹二印。赴行在。則南曹之有印久矣。

武宗紀

會昌元年。制以魏博兵馬留後何重霸。檢校工部尙書。魏州大都督府長史。充天雄軍節度使。此時魏博軍未有天雄之額。蓋史臣追稱之。觀會昌三年討澤潞制詞。稱成德軍。魏博軍。不云天雄軍。可證。

宣宗紀

會昌六年四月。制皇長男溫。可封鄆王。二男涇。可封雅王。第三男滋。可封斬王。第四男沂。可封慶王。按靖懷太子漢傳云。會同六年。封雍王。大中六年。薨。傳不言漢爲第幾子。而紀又不書雍王之封及薨事。此可疑也。又據此紀。長男溫。次男涇。三男滋。四男沂。以卽位之年封。五男澤。六男潤。以大中元年二月封。七男洽。八男洵。九男汶。以五年正月封。其次第當不紊。而於十一年六月。乃書第三男灌。封衛王。第十一男灃。封廣王。疑衛王灌非第三子。當是第十男之譌也。而宣宗諸子傳。卻又以衛王灌。列于夔王滋之前。此又可疑也。且列傳及新史宗室表。俱云宣宗十一子。自鄆王溫至廣王灃。正合十一人之數。何緣更有靖懷太子漢一人。此尤可疑也。新紀。鄆王溫。雍王漢。雅王涇。夔王滋。慶王沂。以會昌六年五月封。濮王澤。以大中二年三月封。鄂王潤。以五年六月封。懷王洽。昭王洵。康王汶。以八年九月封。衛王灃。以十年九月封。廣王灃。以十一年八月封。與舊紀年月多不合。惟增雍王漢一人。又於大中六年。書

漢之薨。頗與舊傳相應。然新舊傳及新宗室表。皆云宣宗十一子。若并漢數之。乃是十二子。此亦可疑也。新紀作漢。而表傳竝作漢。漢與漢字形相涉。必有一誤矣。新傳失載衛王灌一人。表列灌於雅王涇之後。灌之上既有漢涇兩人。而懿宗又爲長子。則灌行在第四。與舊紀所云第三男者。亦終不合。且灌果年長于滋。沂澤潤諸人。何以受封轉在十年之後。此皆可疑也。兩史表傳。皆作夔王滋。獨此紀作斬王。疑聲之譌。

懿宗紀

咸通四年四月。敕徐州罷防禦使爲文都。隸兗州。文都蓋支郡之譌。徐州本節度使治所。領泗濠諸州。至是以銀刀等軍驕悍伏誅。降使額爲防禦。又罷防禦使。改隸兗海節度爲屬州也。

五年二月。以兵部尙書牛勣。檢校兵部尙書兼成都尹。劍南西川節度副大使。知節度事。徐州處置觀察防禦使。按叢爲西川節度使。西川與徐州絕遠。必無兼領徐州之事。徐州上當有脫文。蓋別有一人。除徐州觀察使。轉寫失之爾。

十三年。制。追諡宣宗爲元聖。至明成武獻文睿智章仁神聰懿道大孝皇帝。按諸帝之諡。皆具載本紀。紀首又冠以最後增加之諡。獨宣宗紀祇載初上之諡。紀首亦但書聖文獻武孝皇帝。於史例未合。但高祖太宗受命之君。諡止七字。肅順憲三宗。亦止九字。宣宗德薄於前朝。而驟加至十八字。九廟有靈。

何以自安史臣略而不書，非無見也。

臣嘗接咸通耆老言，恭惠皇帝故事。按舊唐書，於石晉開運二年奏上，距咸通末年，已七十三歲矣。且以晉臣而述唐史，當於恭惠上加唐字。

僖宗紀

乾符二年十月，以前大同軍及雲朔都防禦營田供軍等使李璿，檢校左散騎常侍澧州刺史，充天德軍澧州西城中城都防禦使。璿，嘗爲豐字之譌。方鎮表，貞元十二年，以振武之東中二受降城，隸天德軍。此云西城，恐是東城之譌也。

光啓三年，延昌請權以少府監大廳爲太廟。按禮儀志及殷盈孫傳，則此議出於太常博士殷盈孫，非鄭延昌所請也。

文德元年二月，魏博軍亂，逐其帥樂彥禎。彥禎子相州刺史從訓，率衆攻魏州，牙軍立其小校羅宗弁爲留後。按樂彥禎傳云，軍府疑武彥禎危憤而卒，衆推都將趙文珣知留後事，從訓自相州領兵至城下。文珣按兵不出，衆復害文珣，推羅宏信爲帥。羅宏信傳云，彥禎子忌牙軍，出居於外，軍衆廢彥禎，推趙文珣權主軍州事，衆復以爲不便，因推宏信爲帥。據此二文，則魏軍先立趙文珣，後立羅宏信，無所謂羅宗弁者。僖昭二紀，俱稱羅宗弁，誤矣。

昭宗紀

景福二年。乃築第於恆州。迎匡威處之。按穆宗以後。恆州改名鎮州。此卷前後俱稱鎮州。獨是年再見

恆州字。

以武威軍防禦使錢鏐。武威當作武勝。

乾寧四年九月。制以鎮海軍節度使錢鏐。爲鎮海軍節度。浙江東西道觀察處置等使。杭州越州刺史。上柱國吳王。是時錢鏐自鎮海軍節度。兼領鎮海鎮東兩鎮。鎮海軍治杭州。領浙江西道。鎮東軍治越州。領浙江東道。紀於下鎮海之下。不書鎮東者。脫文也。鏐以是年八月四日。賜鐵券。其結銜已稱鎮海鎮東等軍節度。浙江東西等道觀察處置營田招討等使。兼兩浙鹽鐵制置發運等使。開府儀同三司。檢校太尉。兼中書令使。持節潤越等州諸軍事。潤越等州刺史。上柱國。彭城郡王。食邑五千戶。食實封壹伯戶。則鏐除兩鎮節度。蓋在八月以前。九月朔所命。乃由彭城郡王。進封吳王也。

哀帝紀

中興之初。方備禮改卜。後唐本出沙陀。自國昌賜姓李氏。附鄭王房。及莊宗滅梁。自謂中興唐祚。故有中興之稱。盧簡求傳。中興嗣業。子文紀。仕至尙書中書侍郎平章事。豆盧瑑傳。瑑子革。中興位亦至宰輔。趙隱傳。中興用爲宰輔。王鎔傳。及唐室中興。去僞尙書令之號。崔龜傳。子居儉。中興終戶部尙書。

廿二史考異卷五十八

舊唐書二

禮儀志二

穎客釋例亦云。客當作容。

司禮博士壁閭仁諱。壁當作辟。諱當作譖。

詔將作大匠康誓素往東都毀之。新史牛仙客傳高力士言仙客本胥史非宰相器帝忿然曰朕且用康誓蓋卽此人此云誓素而彼單名誓疑彼傳誤。

禮儀志四

詔史記古今人表。玄元皇帝昇入上聖。漢書有古今人表。此詔云史記者詞臣之不學也。老子本在第四等今升入第一等。

禮儀志五

修奉使宰相鄭延昌具議。案延昌以昭宗景福元年三月拜相而修奉太廟之役乃在僖宗光啓三年。其時延昌未爲宰相也。僖宗紀殷盈孫傳乃此志皆稱宰相蓋史家追稱之。

遂以三太后祔祫太廟。達禮者譏其大謬。至今未正。案舊史成于石晉之世。唐之太廟久廢矣。至今未正之語。蓋後唐史臣之詞也。又案舊志十二門。惟禮儀志頗及僖昭兩朝。音樂志亦載昭宗朝一事。五行志有大順二年一條。其餘所載。俱止於宣宗朝。咸通以後。則略而不書。

音樂志一

皇帝受朝。奏政和。此祖孝孫所定十二和之名也。新志則云。正和皇后受冊以行。與此異。考開元禮。朝賀儀無奏政和之文。惟皇后受冊儀云。典樂舉麾。奏正和之樂。則此志誤也。冊府元龜載。後漢張昭改十二和爲十二成。議云。皇帝受朝。皇后入宮。奏正和。請改爲展成。然則皇帝受朝下。當有皇后入宮四字。此志脫去。又譌正爲政耳。

穆宗廟樂。請奏和寧之舞。敬宗廟樂。請奏大鈞之舞。文宗廟樂。請奏文成之舞。武宗廟樂。請奏大定之舞。案憲宗以前廟樂。俱載奏請之年。此穆宗四廟樂獨闕之。宣宗以後。并樂舞名。史家亦失之矣。

音樂志二

齊隆昌時。女巫之子曰楊旻。旻隨母入內。及長。爲后所寵。南史作楊珉之。童謠云。楊婆兒。共戲來。而歌語譌。遂成楊伴兒。案南史。何潤爲文惠太子作楊畔歌。辭甚側麗。袁廓之諫曰。夫楊畔者。既非典雅。而聲甚哀思。殿下當降意簫韶。奈何聽亡國之響。楊畔。卽楊伴也。文惠太子

時已有此歌。則其來久矣。謂始于隆昌時者。後人附會之詞也。

謂之坎侯聲。譌為筮葆。坎空聲相近。故坎亦訓空。後人又加竹於空侯字。

音樂志三

懿宗孝敬皇帝室。懿當作義。

明慶中。皇后親蠶。明慶。卽顯慶也。唐人避中宗諱。易顯爲明。舊史俱改從本號。惟此志及職官刑法志。

三見明慶字。柳奭傳。亦有明慶三年之文。

五行志

今朝廷怪異。雖則多矣。然皆仰知陛下天光。此語不可解。當有舛譌。據新史宋務光傳云。今朝廷賢佐

雖多。然莫能仰陛下清光。蓋用鼂錯之語也。

地理志一

又於邊境置節度。經略使。凡節度使十。經略守捉使三。此所述者開元之制。而職官志云。天寶中。緣邊

禦戎之地。置八節度使。似乎互。考安西北庭二鎮。天寶中。嘗合爲一。而嶺南則至德已前。初無節度

之名。或云十節度。或云八節度。志家各據所見言之耳。杜氏通典州郡篇。稱節度使十。職官篇。稱開元

中凡八節度。其云積西者。卽安西。而不別出北庭之名。舊史蓋本於此。唐六典。凡天下節度使有八。一朔方。二河東。三幽州。四河西。五

隴右六劍南七嶺西北嶺南蓋井平盧幽州爲一嶺西北庭爲一也。

要衝大郡皆有節度之類寇盜稍息則易以觀察之號。案乾元已後節度使皆兼管內觀察處置使或不置節度則觀察使亦帶團練防禦之職觀察治民事節度防禦團練皆治軍事惟權任有輕重耳非易節度爲觀察也。

東都畿汝防禦觀察使。自東都畿至安南凡四十四鎮蓋據大和中方鎮言之元和二年李吉甫撰國

計簿云總計天下方鎮凡四十八開成元年王彥威進所撰供軍圖略云至德乾元之後迄于貞元元

和之際天下有觀察者十節度二十有九防禦者四經略者三據此志凡三十二節度七觀察東都畿帶防禦

帶經略三防禦二經略也。

乾符之後天下亂離禮樂征伐不自朝廷禹迹九州瓜分樹剖或併或析不可備書據此文則僖昭以

後州縣更改例不當書於志矣而天祐初改陝州爲興德府乾符元年更魯城縣曰乾符景福元年復

於弓高置景州天祐五年移州治於東光縣景福二年於無極縣置祁州龍紀元年以樓煩監牧地置

憲州仍復書之此義例之未畫一也。

隋京兆郡領大興長安新豐南鄭華陰藍田鄠盩始平武功上宜醴泉涇陽雲陽三原宜君同官華原

富平萬年高陵二十二縣案隋京兆郡無南鄭縣南上當有渭字渭南一縣鄭又一縣合之方盈二

十二之數。又華州篇云。義寧元年。割京兆之鄭縣華陰。置華山郡。即華此亦失書。

改雍州爲鳳翔縣。州字衍。

其年改爲新秦郡。秦當作秦。下文新秦同。

領洛鄭熊穀嵩管伊汝管九州。此兩管字必有一誤。

絳州之恆縣來屬。恆當作垣。下同。

領浚儀新里開封封邱等五縣。此脫一縣。

管豫道真興息舒五州。真字疑衍。

七年改爲都督府。廢興道舒息四州。以下文考之。道舒息三州皆廢於貞觀元年。非武德七年也。

濟州領盧平陰長清東阿陽穀范八縣。八當作六。

天寶元年改爲河陽郡。乾元元年復爲濟州。十三載六月一日。廢濟州盧長清平陰東阿陽穀等五縣。並

入鄆州。河陽當爲濟陽字之譌也。乾元紀元止于三年。此云十三載者。蓋天寶之十三載也。且天寶

中已罷濟陽郡矣。何緣乾元初復爲濟州乎。此差謬之顯然者。

武德四年置海州總管府。領漣環東楚四州。四州者。併海州言之。漣上當有海字。考楚州篇云。武德四

年於山陽縣置東楚州。盱眙縣置西楚州。又置總管於西楚州。管東楚西楚。此又以東楚爲海州總管

府所領似自相矛盾矣。

領胸山、龍沮、新樂、曲陽、沭陽、原邱、懷仁、利城、祝其九縣。原邱當爲厚邱之譌。

六年改新樂爲祝其。案新樂祝其皆在海州所領九縣之數。今改新樂爲祝其則祝其必先廢矣。而志

卻失書。

廢環州及龍沮、祝其、曲陽、廩邱、利城六縣。廩邱亦厚邱之譌。六當作五。

沭陽、漢廩邱縣。廩當作厚。

泗水、漢下縣。下當作卞。

於下縣古城置泗水縣。下當作卞。

符離、漢縣。隋治朝解城。貞觀元年移治行邑城。行邑當作竹邑。

新泰、漢東新泰縣。晉去東字。案漢志無東新泰縣。魏收志新泰魏置。晉屬泰山。則此縣曹魏所置也。

臨濟、漢之管縣。管當作菅。

領益都、臨胸、臨淄、殷陽。殷陽疑是般陽之譌。下同。

益都、漢陽。在今壽光縣南十里。故益都城是也。北齊移入青州城北門外爲治所。案漢志無益都縣。蓋

曹魏所置。今移治青州城。卽東陽城也。

厭次。漢當平縣。當平。蓋富平之譌。

地理志二

襄陵。後魏擒盛縣。本擒昌縣。此改昌爲盛。蓋史臣避後唐廟諱。

平遙。漢平陶縣。後魏廟諱。改陶爲遙。案魏世祖諱肅。與陶同音。故改平陶爲平遙。屢陶爲屢遙。魏收志

不言改名之由。當依此志補之。

太谷。武德三年。置太原州。原字衍。

六年。州廢。以太谷邪屬并州。邪當作卻。

五臺。漢慮虎。虎當作虬。

貞觀十五年。楊鉢爲監牧使。貞觀新志。作貞元。此誤。

臨清。漢清泉縣。後魏改爲臨清。清泉本清淵。唐人避諱。改考魏收志。清淵。臨清二縣。並屬陽平郡。則非

改清淵爲臨清矣。或太之和之。世分清淵置臨清。後來省清淵入臨清耳。

隋於漢南蠻故城。蠻當作繚。

樂城。漢開縣。開當作關。下同。

置陸澤縣於古鄆城。鄆漢縣。鄆當作鄆。

饒安。漢平童縣。平童蓋千童之譌。

定州。漢縣。屬平原郡。漢無定州縣。州治安喜。亦非平原郡地。蓋轉寫之譌。

領易。涑水。永樂。遂城。道五縣。五年。割道縣置北義州。州廢。以道來屬。道蓋迺字之譌。

容城。漢縣。屬涿郡。改爲道縣。道當作迺。下同。

涑水。漢道縣。道當作迺。

東城。漢東州縣。東當作東。

神龍元年。改屬唐興縣。屬當作爲。

檀州。後漢奚縣。當云漢儻奚縣。文誤耳。

漢葭萌縣地。屬爲漢壽縣。屬當作蜀。

管鄆。浙。鄆。苑。溝。新。宏。等七州。浙當作浙。苑當作宛。溝。未詳。

廢苑州。以南陽來屬。苑當作宛。

漢南陽郡。以苑爲理所。苑當作宛。

漢南陽郡所治苑縣也。苑當作宛。下同。

新野漢縣。屬南陽郡。晉於縣置義州。案。晉無義州。必轉寫之譌。

內鄉、漢浙縣地。浙、當作浙。下同。兩漢志本作析。

領北陽、慈邱、平氏、顯岡四縣。北陽、當作比陽。

北陽、漢縣、屬南陽郡。北陽、當作比陽。下同。

北水出縣東。北水、亦比水之譌。

方城、前漢堵陽縣、屬南陽郡。後漢改爲順陽。案、順陽、前漢爲博山侯國、與堵陽非一地。水經注始誤以

順陽爲堵陽、而唐人因之。

棗陽、漢春陵縣、屬南郡。嘗云屬南陽郡。脫陽字。

武德四年、置郢州於長壽縣、置京山、藍水二縣屬焉。案、京山縣、下云武德四年置温州、領京山、富水二

縣、豈有一京山而隸兩州之理、其必有誤審矣。今以荊州篇前後參校、知武德初温州治京山、郢州所

領之京山、當爲章山之譌。且武德四年、初置章山縣、本隸棊州、七年廢棊州、乃以章山屬郢州、此云武

德四年置郢州、卽置章山來屬、亦非也。

又廢郢州、以長壽屬郟州、京山屬荊州。郟、當作都、京、當作章。

宜城、漢郟縣。郟、當作郟。

貞觀元年廢郢州、以京山來屬。京、當作章。

又省京山入長林。京當作章。

自下牢鎮移治陸抗故壘。新志作步闡壘。

地理志三

揚州置大都督。督越、揚、和、滁、楚、舒、廬、壽七州。越字衍。越州治會稽。與江都遠不相及。非揚州所能督也。

江陵貞觀十八年分江都置。江陵當作江陽。

晉置秦州。北齊爲秦州。秦當作秦。

楚州。隋江都郡之南陽縣。南陽當作山陽。

慎。漢後道縣。屬九江郡。後道當作浚遼。

管黃蘄亭南四州。南下脫司字。

於孝昌縣置環州。環當作環。

管環應二州。環當作環。下同。

置環州。領孝昌、環陽二縣。環當作環。下同。

宿松。武德四年置嚴州。案。是年又於桐廬縣置嚴州。同時有兩嚴州也。

信安。案咸通中。更信安縣曰西安。志失書。

盈川如意元年分龍邱置。案元和七年省盈川入信安。志失書。

如意元年分桐廬縣之四鄉置盛武縣。盛武新志作武盛。

黟漢縣屬丹陽郡晉同黟縣。案晉無同黟縣當是音字之譌謂黟音近醫耳。縣字衍。

閩漢治縣。治當作治。下文治縣東治縣皆治字。

建安漢治縣地。治當作治。

涇武德三年置猷州。新志武德三年置南徐州尋更名猷州此失書置南徐州一節。

廣德漢故漳縣。漳當作鄆。

以犯肅宗諱改爲鍾陵。肅宗當爲代宗。

太和武德五年置南州。南下脫平字。

安福。案武德五年於縣置潁州七年州廢。志失書。

至德至德二年九月中丞宋若思奏置。案池州有至德縣。至德二年析置。而江州又有至德縣。蓋一縣

而重出也。考新志至德縣本析鄱陽秋浦置。鄱陽隸江州。則至德亦當隸江州矣。乾元元年改隸饒州。

永泰元年置池州。始以縣來屬。志于池江二州兩見而不著改隸之由。後人遂疑有兩至德矣。又案唐

時以年號名縣者雍州之乾封洛州之登封涼州之天寶池州之至德潤州之上元楚州之寶應道州

之大麻。滄州之乾符。宋時以年號名縣者。光化軍之乾德。贛州之興國。邠州之淳化。開封府之咸平。祥符。彭州之崇寧。處州之慶元。平江府之嘉定。以年號名府者。紹興。慶元。嘉定。咸淳。以年號名州者。太平。與興國也。

常寧。吳分來陽置新寧縣。來陽。當作耒陽。

安鄉。漢潯陵縣地。潯。當作屏。下同。

江華。漢馮溱縣。溱。當作乘。

召州。隋長沙郡之召陽縣。案。召州。召陽。召陵字。它史皆作邵。獨此志無邑旁。

先天元年。改爲盈川。此別一盈川。楊炯爲盈川令。乃衢州之盈川。非此地。

巫州。大曆五年。改名敘州。志失書。

業州。大曆五年。改名獎州。志失書。

後漢分獠道。立南安郡。獠道。當作獠道。

龍支。漢允吾縣。允。當作允。

後漢改爲龍耆縣。案續漢志。未見改允吾爲龍耆之文。

貞觀五年。置米州及米川縣。十年州廢。縣屬廓州。案新志。州廢。縣隸河州。永徽六年。屬廓州。此志蓋有

脫文也。

福祿漢舊縣屬酒泉郡。今縣漢樂綰縣地。案漢時本名祿福。其改爲福祿。當在晉以後。而史無明文。樂

綰當作樂涑。

晉昌漢眞安縣屬燉煌郡。眞水名。案兩漢志。敦煌郡有冥安縣。應劭云。冥水出北入其澤。此眞誤也。

地理志四

唐置黨州。失起置年月。新志永淳元年開古黨洞置。

田州。失廢置年月。疑是開元中置。新志開元中置。貞元二十一年廢。後復置。

山州。失起置年月。天寶元年改爲龍池郡。此州不見於新唐志。愛州之崇平縣。武德五年置。山州領岡

山。眞潤。古安。西安。建功。新志作建初五縣。此別一山州。貞觀元年已省入愛州矣。

職官志

門下侍郎。中書侍郎。舊班正四品上。大厯二年升。此二職已見正三品。而正四品上階又列之。且志所

列官品。乃據永泰元年之品。如侍中。中書令。大厯二年升二品。御史大夫。會昌二年升三品。御史中丞。

會昌二年升四品。諫議大夫。會昌二年升五品。皆在永泰以後。故志但書其初品。獨此二職。乃自案其

例。疑後來校書者竄入也。

節度使一人。副使一人。行軍司馬一人。判官二人。掌書記一人。參謀無員數。隨軍四人。皆天寶後置。檢討未見品秩。案節度采訪、觀察、防禦、團練、經略、招討諸使。皆無品秩。故常帶省臺寺監長官銜。以寄資之崇卑。其僚屬或出朝命。或自辟舉。亦皆差遣無品秩。如使有遷代。則幕僚亦隨而罷。非若刺史縣令之有定員有定品也。此外如元帥、都統、鹽鐵、轉運、延資庫諸使。無不皆然。卽內而翰林學士、弘文集賢史館諸職。亦係差遣無品秩。故常假以它官。有官則有品。官有遷轉。而供職如故也。不特此也。宰相之職。所云平章事者。亦無品秩。自一二品至三四五品官。皆得與聞國政。故有同居政地。而品秩懸殊者。罷政則復其本班。蓋平章事亦職而非官也。志謂節度等檢校。未見品秩。似未達于官制。

經籍志

甲部九曰圖緯。以紀六經讖候。十曰經解。以紀六經讖候。十一曰詁訓。以紀六經讖候。案經解、詁訓與圖緯各自爲類。何得蒙上六經讖候之文。考唐六典。祕書郎掌四部之圖籍。甲部其類有十。乙部其類十三。景部其類十四。丁部其類三。此志全采其文。惟六典甲部祇有易、書、詩、禮、樂、春秋、孝經、論語、圖緯、小學、十門。其五經異義等部。并入論語類。此志增入經解、詁訓二門。當闕其文。而校書者妄益之耳。

長春秋義記一百卷。梁簡文撰。春字衍。
晉陽春秋二十二卷。鄧粲撰。春字衍。

崇安記二卷。周祇撰。又十卷。王詔之撰。崇安本是隆安。晉安帝年號也。母暎撰錄。在開元中。避明皇諱。改隆爲崇。

帝王代記十卷。皇甫謐撰。代本世字。避諱改。郭邠魏晉代語。何集續帝王代記。虞茂代集。鄭代翼集。皆以代爲也。

晉崇寧起居注十卷。崇寧當爲崇安。卽隆安也。隆安紀元。在寧康太元之後。元興義熙之前。此下又有晉崇安元興大享副詔八卷。可證崇寧爲崇安之諱。

四人月令一卷。崔寔撰。此與賈思勰齊人要術。皆避諱改。民爲人也。

江智泉集十卷。本名智淵。避諱改。

邱泉之集六卷。本名淵之。避諱改。

凡七萬餘卷。蓋佛老之書。計於其閒。謂梁元帝江陵所收書。并佛老二家計之。得七萬餘卷也。

食貨志

水部郎中姜行本。請于隴州開五節堰。引水通運。許之。行本傳不載此事。亦不云爲水部郎中。是其闕漏。

王播奏。商人于戶部度支。鹽鐵三司飛錢。謂之便換。三司之名。始見於此。

刑法志

於是大尉趙國公無忌。司空英國公勳。尙書左僕射兼太子少師監修國史燕國公志寧。卻掃編。舊制。宰相官僕射以上。敕尾不書姓。蓋用唐故事也。志寧以僕射不書姓。無忌勳官三公。又在僕射之上。故亦不書姓。尙書唐紹以下。則皆書姓矣。然上文左僕射于志寧。右僕射張行成。下文左僕射劉仁軌。右僕射戴至德。卻又書姓。此史臣增入。非敕文元本也。

廿二史考異卷五十九

舊唐書三

后妃傳

玄宗楊貴妃。國忠二男暄、妃弟鑑、皆尙公主。案楊國忠傳、暄、尙延和郡主、咄、尙萬春公主、不皆尙公主也。新史公主傳、不載楊鑑名、蓋亦郡主非公主矣。

楊氏一門、尙二公主、二郡主。二公主、謂錡、尙太華公主、咄、尙萬春公主也。暄、尙延和郡主、鑑、亦尙郡主、故有二郡主之稱。

虢國男裴徽、尙代宗女延安公主。案公主傳、肅宗女郾國公主、始封延光、下嫁裴徽、此云代宗女者、誤也。延安、延光、未知孰是。

肅宗張皇后、去盈、尙玄宗女常芬公主。新公主傳、作去奢。

憲宗懿安皇后郭氏、昭愍暴殞。案本紀、史臣論、或稱廟號、或稱諡、元和以後、皆稱諡。憲宗曰章武、穆宗曰文惠、敬宗曰昭愍、文宗曰昭獻、武宗曰昭肅、宣宗曰獻文、懿宗曰恭惠、僖宗曰恭帝。當云它傳論亦多稱諡者。若紀傳敘事之文、則皆稱廟號、惟昭愍之諡、則列傳屢見之。如郭后傳、昭愍暴殞、王后傳、

昭愍崇重母族。郭貴妃傳。及昭愍遇盜。宮闈變起。于休烈傳。昭愍初即位。張又新傳。昭愍初即位。熊望傳。昭愍嬉游之隙。學爲歌詩。事未行而昭愍崩。崔郾傳。昭愍即位。韋處厚傳。昭愍狂恣。屢出畋游。杜元穎傳。昭愍即位。龐嚴傳。昭愍即位。趙宗儒傳。昭愍晏駕。刊本誤李逢吉傳。昭愍即位。裴度傳。昭愍皇帝聞之。嗟惋累日。昭愍愕然省悟。昭愍雖少年。昭愍欲行幸洛陽。李德裕傳。昭愍皇帝。童年纘麻。昭愍遇盜是也。亦有一篇之中互見者。如郭后。韋處厚傳。先稱敬宗。後稱昭愍。李逢吉傳。前後稱敬宗。而中稱昭愍。李德裕傳。前後稱昭愍。而中稱敬宗。推原其故。或係晉代史臣避諱稱諡。後來校書者依例更改。而改之又未盡也。至如蕭俛傳。前稱憲宗。而後云穆宗。乘章武恢復之餘。白居易傳。前後稱憲宗。而中云章武皇帝。李德裕傳。前稱武宗。而後云昭肅棄天下。此類偶一見之。蓋史臣雜采它書。稱謂之間。未及整理也。

旣而宣宗繼統。卽后之諸子也。恩禮愈異于前朝。大中崩于興慶宮。懿安暴崩。新史以爲宣宗之志。此云恩禮愈異于前朝。又極稱其福壽隆貴。與新史正相刺謬。新史本於宋敏求實錄。實錄又本於裴廷裕東觀奏記。未必可盡信也。

殷嶠傳

貞觀十七年。又與長孫無忌。唐儉。長孫順德。劉弘基。劉政會。柴紹等十七人。俱圖其形于凌煙閣。案長

孫無忌傳云圖畫二十四人尉遲敬德傳亦同此云十七人誤。

屈突通傳

力屈而至爲本朝之辱以愧相王。案六朝以後丞相封公稱相公封王則稱相王是時高祖以唐王領大丞相故有相王之稱或疑爲代王之譌非也。

長孫無忌傳

令圖畫無忌等二十四人於凌煙閣。據詔書自趙國公無忌至胡國公秦叔寶數之止二十三人新史

秦叔寶傳亦同蓋脫申公高士廉一人。士廉傳貞觀十七年詔圖形凌煙閣

王珪傳

崇基孫旭開元初爲左司郎中兼侍御史。案酷吏篇已有王旭傳而珪傳末又附見旭事一百六十餘言。列傳第五十一卷已有王求禮傳而忠義傳又列之列傳第一百廿一卷已有張仲方傳而張九齡傳末又附出二百六十餘言。文苑篇已有蕭穎士傳而韋述傳又附出七十餘言。

姚思廉傳

并推究陳事刪益博綜顧野王所修舊史。博綜當是傳緯之譌。

令狐德棻傳

與侍中陳叔達等受詔撰藝文類聚。案新藝文志。此書列歐陽詢名。又注云。令狐德棻、袁朗、趙弘智等同修。不及叔達名。

魏史既有魏收、魏彥二家。魏彥當作魏澹。

有詔改撰晉書。房玄齡奏。德棻令預修撰。當時同修一十八人。新志云。房玄齡、褚遂良、許敬宗、來濟、陸元仕、劉子翼、令狐德棻、李義府、薛元超、上官儀、崔行功、李淳風、辛邱馭、劉引之、陽仁卿、李延壽、張文恭、敬播、李安期、李懷儼、趙弘智等。實二十一人。

孔穎達傳

十八年。圖形于凌煙閣。讚曰。道光列第。風傳闕里。精義霞開。揆辭颺起。案。穎達不在凌煙功臣之列。且凌煙功臣亦無讚詞。此傳所載者。當是褚亮所撰十八學士圖讚語。誤以爲凌煙閣耳。十八學士讚。見于舊史者。惟姚思廉與穎達二人。

蘇世長傳

令於獸門館讀書。獸門卽虎門。避唐諱改。

太宗諸子傳

中興初。進封成王。此卷中興字屢見。高祖諸子魯王靈夔、江王元祥篇。亦有中興字。文苑傳劉允濟富

嘉謨篇亦有中興字。皆謂中宗神龍初也。豆盧瑑、趙隱、盧簡求、王鎔傳所云中興。則指後唐莊宗言之。永崇中。坐與庶人賢通謀。降封零陵王。永崇。卽永隆。史臣避明皇諱。追改。舊史惟此傳一見。

韋挺傳

以人部侍郎崔仁師爲副使。唐初民部爲六部之一。高宗卽位。改爲戶部。避太宗名下一字也。此改民部爲人部。亦史臣追書。段平仲傳云。隋人部尙書。段達六代孫。

柳澤傳

敢有常舞于宮。澤上疏。在睿宗時不嘗回避恆字。此云常舞于宮。常于游畋。蓋穆宗以後。史臣追改。

傅仁均傳

以三元之法。一百八十。去其積歲。武德元年戊寅。爲上元之首。案三元甲子之說。始于遁甲九宮。每歲行一宮。九歲而徧。六十歲未復其初。必轉三甲子。而後終九宮之局。仁均旣以武德戊寅爲上元。則隋仁壽四年甲子。爲上元矣。今蘇州虎邱寺有五代顯德五年石幢。後題下元甲子。歲在戊午。依檢仁壽四年甲子。爲上元。則麟德元年甲子。爲中元。開元十二年甲子。爲下元。興元元年甲子。又爲上元。會昌四年甲子。爲中元。天祐元年甲子。爲下元。顯德戊午。尙在下元篇也。

李淳風傳

并演齊人要術。齊人卽齊民避諱改。

劉仁軌傳

史臣韋述曰。劉仁軌。裴光庭傳末。俱引韋述史論。而後別有總論。馬燧傳末。亦引史臣語。而後別有總論。列傳第九十六卷。則有論無讚。詳播

裴行儉傳

斬伏念及溫。傳于都市。行儉歎曰。渾濬前事。古今恥之。但恐殺降之後。無復來者。因稱疾不出。此語又

見裴炎傳。

張文收傳

制景雲河清樂。名曰燕樂。奏之管絃。爲樂之首。今元會第一奏者是也。此卷蓋沿韋述所撰唐書之文。故唐紹。徐有功傳。俱稱明皇爲今上。此傳云。今元會第一奏。亦開元史臣之詞也。下卷澤王上金傳。亦有今上字。

高宗諸子傳

高宗八子。二王早世。爲武后所斃者四人。二王早世。謂原王及孝敬皇帝也。章懷太子燕澤許三王。皆爲武后所戕。考肅宗諸子傳。李泌言孝敬皇帝爲太子監國。而仁明孝悌。天后方圖臨朝。乃燔殺孝敬。

則孝敬亦武后所斃。而本傳不書。未免自相矛盾矣。

裴炎傳

留太子哲守京師。此太子謂中宗也。於史例不當書名。

韋思謙傳

故孔子曰。百姓足。君孰與不足。百姓不足。君孰與足。此有若之言。

王方慶傳

時成均博士吳揚善。禮儀志作揚吾。方慶駁辟閭仁謂告朔之議。已詳禮志。而此傳復敘其事。幾五百言。

敬暉傳

睿宗卽位。追復五王官爵。贈暉秦州都督。謚曰肅愍。案元和三年。追謚張柬之爲文正。桓彥範爲忠烈。敬暉爲正烈。崔玄暉爲文忠。袁恕己爲正烈。舊史五王傳失書。

宋璟傳

時易之兄弟。皆爲列卿。位三品。璟本階六品。在下座。案璟時爲御史中丞。官正四品。而階止六品。故朝位猶在五品之下。易之官麟臺監。昌宗官司僕卿。皆三品職事官。其階亦必三品矣。

以官言之正當爲卿。若以親故當爲張五。據璟所言知唐人詩文稱行第者皆親故之稱。

張說傳

其先范陽人。代居河東。近又徙家河南之洛陽。此沿碑狀之文。以史例言之。當云河南洛陽人也。

才望兼著。理合擢升考中上。說以特詔擢升。僅得中上考。李渤爲考功員外郎。奏御史大夫李絳。左散騎常侍張惟素。右散騎常侍李益三人。請賜上下考。則唐時上上考。蓋不恆有矣。

左司郎中陽伯誠。王陵傳有戶部郎中楊伯誠。禮儀志有戶部郎中楊伯成。蓋卽一人而字各異。今西安府學有大智禪師碑陰記。河南少尹陽伯成撰。當據碑爲正。

魏知古傳

尋改紫微令。姚崇深忌憚之。紫微令崇所居之官也。尋改二字衍。

盧懷慎傳

時南海郡利兼水陸。環寶山積。劉巨鱗。彭杲相替爲太守。五府節度皆坐贓鉅萬而死。案唐會要。至德二年。賀蘭進明除嶺南五府經略兼節度使。自此始有節度之號。已前但稱五府經略。自此遂爲定額。新方鎮表亦云。至德元載。升五府經略討擊使爲嶺南節度使。是天寶已前。初無節度之稱。此傳云開元已來四年。廣府節度清白者有四。謂宋璟。裴奩。先。李朝隱。及奩。蓋史家追稱之。宋璟傳云。轉廣州都

督仍爲五府經略使。李朝隱傳云兼判廣州事。充嶺南採訪處置使。俱不云節度也。

源乾曜傳

恐代官之咸列。代官謂世官也。避諱改。

張嘉貞傳

令公四俊。苗呂員訓。苗呂員三人。皆舉其姓。不應崔訓獨稱名。蓋本是苗呂崔員。史家不知員讀去聲。乃改崔爲訓。顛倒其文。以協韻耳。

張九齡傳

諡曰文憲。當作文獻。

辛替否傳

往者。和帝之憐悖逆也。悖逆。謂安樂公主也。睿宗追貶爲悖逆庶人。

吳兢傳

遷相州長垣縣子。當云遷相州刺史。不云刺史者。蒙上文也。長垣上當有封字。

高仙芝傳

累勞至四鎮十將諸衛將軍。唐末藩鎮部下有十將都虞候。據此傳。則十將之名。唐初已有之。段秀實傳以十

將張羽飛
為招召將

韋堅傳

先是人閒戲唱歌詞云得丁紇都體都董紇那也紇囊得體歌案廣韻體蒲本切集韻部本切未聞有都董之音且都董雙聲不可以成切必轉寫之譌也體從本其音必與本相近故轉寫為寶爾

楊國忠傳

父珣以國忠貴贈兵部尚書兵部當作武部今扶風縣有珣神道碑明皇御製并書題云贈武部尚書可證也

王琚傳

四哥仁孝同氣惟有太平武后生子四人睿宗居第四故明皇稱為四哥又棣王琰傳云臣與新婦情義絕者二年于茲臣有二孺人又皆爭長恐此三人所為也惟三哥辯其罪明皇為睿宗第三子故諸子稱為三哥然則唐時以哥為君父之稱矣

韋見素傳

加朝散大夫諸傳多不書散官惟此傳云加朝散大夫加銀青光祿大夫加金紫光祿大夫歸崇敬傳云加銀青光祿大夫加光祿大夫加特進令狐楚傳云自朝議郎授朝議大夫牛僧孺傳云加銀青光

祿大夫。加金紫階。李珣傳。自朝議郎。進階正議大夫。崔鉉傳。加正議大夫。累遷金紫光祿大夫。此亦例之不一也。

天寶五年。案。天寶初改年曰載。此傳書天寶五年。天寶十三年。誤。

李光弼傳

遽命郝玉曰。爾往擊之。玉曰。玉步卒也。當作郝廷玉。脫廷字。此事又見廷玉傳。

臨陣擒其大將徐瑣玉。李秦授。周摯。據此似摯已被擒。而下文又云。生擒安太清。周摯。楊希文等。前後不相應。

高適傳

自玄宗還京後。於綿。益二州。各置一節度。案至德二載。置東川節度。治梓州。綿。當爲梓字之譌。

韋元甫傳

韋元甫。案。列傳失書里居者。韋元甫。衛伯玉。閻巨源。孟元陽。郝廷玉。高固。劉栖楚。張宿。熊望。韋貫之。鄭綱。唐衢。李翱。宇文籍。韋辭。烏重裔。李祐。董重質。石雄。韓全義。王播。徐晦。趙宗儒。宋申錫。高鉞。王璠。李渤。牛僧儒。朱朴。鄭繁。周利貞。韋表微。許康佐等。以新史證之。則諸人籍貫。非盡無可考也。

嚴武傳

出爲綿州刺史。案房瑄傳武自京兆少尹出爲巴州刺史。

舊相房瑄出爲管內刺史。瑄時爲漢州刺史在成都節度管內。

郭英父傳

先朝隴右節度使左羽林軍將軍知運之季子也先朝二字可省。

崔寧傳

大厯十四年入朝遷司空平章事兼山陵使尋代喬琳爲御史大夫平章事寧以西川節度入朝加平章事而未落節鎮此使相非真相故新史宰輔表不書其遷司空亦是檢校司空非守司空故表亦不書。

楊炎傳

肅宗就加散騎常侍賜號玄靖先生名在逸人傳案舊史有隱逸傳無逸人傳而隱逸傳亦無楊播名蓋亦沿舊文而未刊正也。

楊綰傳

故事舍人年深者謂之閣老公廨雜料歸閣老者五之四案綰以起居舍人知制誥卽行中書舍人事其後累遷司勳員外郎職方郎中仍知制誥至是正授舍人故以久次得稱閣老也給事中久次者亦

稱開老。杜甫集稱嚴武爲嚴八開老。又有留別賈嚴二開老詩。賈至爲中書舍人。嚴武爲給事中。

崔祐甫傳

祖暉。懷州長史。父沔。黃門侍郎。諡曰孝公。沔在孝友傳。彼傳云爲中書侍郎。終太子賓客。不云爲黃門侍郎。又不及其諡。彼傳云沔父體。庫部員外郎。汝州長史。此傳云名暉。官懷州長史。皆互異。考新書世系表。沔父皓。安平公。非暉亦非體也。暉官徐州司馬。非懷州長史。其官汝州長史者。名暄。不名體。與二傳又相抵牾。

崔植傳

祐甫弟。廬江令。嬰甫子。上文云祐甫無子。遺命猶子植爲嗣。則祐甫與嬰甫當是親兄弟矣。據世系表。祐甫乃皓之孫。沔之子。嬰甫則暉之孫。滂之子。是祐甫嬰甫爲小功昆弟。疑表有誤也。

裴胄傳

其先河東聞喜人。今代葬河南。以史例當云河南人。裴謂傳云河南洛陽人。是其例也。

伯父寬。戶部尚書。有名于開元天寶間。此語又見裴謂傳。謂爲寬子。當刪此存彼。彼云禮部尚書。此云戶部。亦當從彼傳也。且列傳第五十卷。已有寬傳。若以謂、胄二人附見篇末。則文省而當矣。寬傳不及謂、胄名。蓋史局人多彼此失于檢照也。



廿二史考異卷六十

舊唐書四

張鑑傳

朔方節度使齊邱之子也。齊邱既未立傳。嘗云父齊邱。開元中朔方節度使。

蕭復傳

普王爲襄漢元帥。以復爲戶部尚書。統軍長史。以復父名衡。特詔避之。元帥府有行軍長史。衡與行同音。故特避之。李賀父名晉肅。論者譏其舉進士。亦其類也。

李揆傳

遷司勳員外郎。考功郎中。並知制誥。扈從劍南。拜中書舍人。郎官知制誥。蓋始於明皇時。

李泌傳

其先遼東襄平人。而魏太保八柱國司徒何^{此字誤}弼之六代孫。今居京兆。以史例。嘗云京兆人。

李抱玉傳

光弼自將于中灘城。李光弼傳。作中潭城。且抱玉守南城事。已見光弼傳。此亦重出也。

盧從史傳

其先自元魏已來冠冕頗盛。此篇首不書里居。但言先代冠冕之盛。亦非史例。

崔元翰傳

李沂公鎮滑臺。辟爲從事。李沂公者。李勉也。此採用誌狀之文。未合史法。

賈耽傳

尋以本官爲東都留守。東都畿汝南防禦使。南字衍。

姜公輔傳

授左拾遺。召入翰林爲學士。歲滿當改官。公輔上書自陳。以母老家貧。以府掾俸給稍優。乃求兼京兆尹。戶曹參軍。唐時翰林學士無品秩。但爲差遣。故常帶它官。支其俸給。公輔本以左拾遺入翰林。歲滿改官。乃兼京兆戶曹參軍。元和初。白居易亦以左拾遺爲翰林學士。及當改官。引公輔例。除京兆戶曹參軍。蓋拾遺雖爲兩省供奉官。秩止從八品。京府參軍。秩正七品。俸給較厚。故恬退者喜居之。居易爲左拾遺。賦詩云。歲愧俸錢三十萬。及兼戶曹。賦詩云。俸錢四五萬。月可奉晨昏。廩祿二百石。歲可盈倉困。此實錄也。

王鎔傳

僞梁加尙書令。及唐室中興。去僞尙書令之號。此傳前云河東節度使李克用。虎視山東。方謀吞噬。後云唐室中興。去僞尙書令之號。詞意自相矛盾。

劉忬傳

今昌平故里。朝廷改爲尉卿司徒里。尉上當有太字。卿當作鄉。

李忠臣傳

寶應元年七月。拜忠臣太常卿。同正兼御史中丞。淮此下當脫四字十一州節度。尋加安州刺史。仍鎮蔡州。是歲。先以來瑱爲淮西南十六州節度使。治安州。而以裴莪代瑱鎮襄陽。旣而瑱竟不行。乃除忠臣爲帥。傳云。加安州刺史。則治所亦當在安州矣。又據新史方鎮表。是時別有蔡汝節度使。乾元元年置。本名豫汝節度。

大曆八年始廢。則忠臣初授淮西時。未得鎮蔡州也。

大曆五年。加蔡州刺史。淮西節度移治蔡州。當在是年。方鎮表在八年。未知其審。

嚴綬傳

綬在鎮九年。以寬惠爲政。士馬蕃息。境內稱治。案裴瑄傳。稱綬在太原。政事一出監軍李輔光。綬但拱手而已。本傳諱而不書。

蕭昕傳

遷中書舍人兼揚府司馬佐軍仍舊。據此則唐時中書舍人亦有帶出外任者而史不多見。

杜佑傳

貞元十三年徐州節度使張建封卒其子愔爲三軍所立詔佑以淮南節制檢校左僕射同平章事兼徐泗節度使。據本紀在貞元十六年。

裴埴傳

李吉甫自翰林承旨拜平章事。李吉甫傳不云爲承旨。

李吉甫傳

父栖筠代宗朝爲御史大夫名重于時國史有傳。案李德裕傳亦云祖父自有傳然本書卻無栖筠傳。權德輿傳

德輿居西掖八年其閒獨掌者數歲。唐人稱門下爲左掖中書爲西掖。據六典中書舍人本六人中葉

以後常以它官知制誥行舍人之職。德輿以貞元十年遷起居舍人卽兼知制誥至十八年拜禮部侍郎故云居西掖八年也。至德以後始置翰林學士專掌內制而中書但掌外制西掖之員漸少乃有一人獨掌制誥如權德輿者。

奚陟傳

時中書令李晟所請紙筆雜給皆不受。但告雜事舍人令且貯之。新史百官志舍人以久次者一人爲
閣老判本省雜事。所謂雜事舍人也。

蔣係傳

李德裕用事。惡李漢。以係與漢僚壻。係與漢皆韓愈之壻。

劉昌裔傳

楊琳之亂。昌裔說其歸順。當作楊子琳。脫子字。

及琳授洛州刺史。洛當作瀘。

高固傳

高祖侃。永徽中爲北庭安撫使。有生擒車鼻可汗之功。官至安東都護。事具前錄。此篇蓋沿憲宗實錄
之文。故有事具前錄一語。侃以右驍衛郎將擒車鼻。見突厥傳。

劉迺傳

高祖武幹。武德初拜侍中。卽中書侍郎林甫兄子也。案宰相表。無侍中劉武幹名。此必誤也。宰相世系
表。武幹會寧五州留守。金鄉公。

孔戮傳

遷吏部侍郎轉左丞。案韓退之撰戮墓誌云。改給事中。權知尙書右丞。明年拜右丞。與此傳不合。韓集有作左丞者。注家定從右。而以新舊史爲誤。恐未然。

上謂裴度曰。嘗有上疏論南海進蚶菜者。詞甚忠正。此人何在。卿第求之。度退訪之。或曰祭酒孔戣。嘗論此事。度徵疏進之。案新書。戣爲華州刺史。明州歲貢淡菜蚶蛤之屬。戣以爲自海抵京師。道路役凡四十三萬人。奏罷之。墓誌亦云。明州歲貢。獨此云南海。蓋史家因其爲嶺南節度使。妄益南海字耳。此新史之勝於舊者。

長慶四年正月卒。時年七十三。誌作七十四。

武元衡傳

曾祖德載。當作載德。武后時封潁川王。

祖平一。終考功員外郎。修文館學士。事在逸人傳。案舊史無逸人傳。平一事。史亦闕之。

八年。元衡自蜀再輔政。時太白犯上。相歷執法。占者言。今之三相皆不利。始輕末重。月餘。李絳以足疾免。明年十月。李吉甫以暴疾卒。至是。元衡爲盜所害。案天文志及本紀。俱不載元和八年。太白星變事。且李絳罷相。在九年二月。吉甫之卒。即在其年十月。傳云明年。亦誤。

鄭從讜傳

國之名臣文忠有焉。此傳詞多溢美，蓋出於門生故吏詩狀之文。

烏重裔傳

烏重裔，潞州牙將也。宰相世系表，張掖人。

盧簡辭傳

三辟諸侯府。此亦沿誌狀之文。當時以方鎮爲諸侯也。李宗閔傳，隨牒諸侯府。楊授傳，釋褐從事諸侯府。李讓夷傳，釋褐諸侯府。楊嚴傳，釋褐諸侯府。路巖傳，累辟諸侯府。

王正雅傳

其先太原尹，東都留守翊之子。尹當作人，不連下讀。

伯父翊，代宗朝御史大夫。案，翊事已附其弟翊傳。彼傳但云爲御史中丞。

柳公權傳

拜右拾遺，充翰林侍書學士。翰林有侍書書詔，學士惟見於公權傳。

殷盈孫傳

昭宗郊祀圓丘，兩中尉楊復恭及兩樞密皆請朝服。盈孫上疏。案昭宗紀，太常博士錢翊、李綽等奏論不及盈孫名。

元稹傳

二十四調判入第四等。此試書判拔萃科也。四等尚爲優選。則上三等尤難得。所謂久虛之等也。

白敏中傳

懿宗即位。徵拜司徒門下侍郎平章事。復輔政。案本紀失載。敏中復相事。

趙宗儒傳

昭肅晏駕。昭肅當作昭愍。敬宗諱也。

錢徽傳

吳郡人。當作吳興人。

文昌面奏。言徽所放進士鄭朗等十四人。皆子弟。藝薄不當在選中。朗乃宰相珣瑜之子。是年重試被

落。後竟爲宰相。

令狐楚傳

入爲吏部尚書。仍檢校右僕射。故事。檢校官高者便從其班。楚以正官三品。不宜從二品之列。請從本班。優詔嘉之。僕射從二品。尚書正三品。唐初檢校官。乃任職而未正授之稱。故新史宰輔表開元以前。檢校左右僕射。侍中中書令者。皆與正官同列。肅代以後。檢校但爲虛銜。故檢校之三公三師。不入于

表令狐楚以檢校僕射，但從正官尙書之班也。

牛僧孺傳

以其所管漢陽汝川兩縣隸鄂州。汝當作汝。

鄭覃傳

復爲閔孺所排。謂宗閔僧孺也。兩字名，不宜舉一字。

鄭朗傳

長慶元年登進士甲科。是歲錢徽知禮部，舉放進士十四人，朗居第一。穆宗命王起、白居易覆試，朗等十人皆落下。此傳書登科而不書黜落，失其實矣。

李紳傳

高祖敬元，則天朝中書令，封趙國文憲公，自有傳。案敬元相高宗，非武后時。本傳又不載其封諡。

李珣傳

武宗卽位之年，九月與楊嗣復俱罷相，出爲桂州刺史，桂管觀察使。三年，長流驩州。案武宗紀，會昌元年三月，貶桂管觀察使李珣、端州司馬杭州刺史裴夷直、驩州司戶。此武宗卽位之次年也。嗣復與珣同時貶州司馬，其貶驩州者，乃裴夷直，非李珣。且爲司戶，非長流。傳殆誤矣。珣，嗣復罷相，紀在八月，而

傳云九月亦不合。

李德裕傳

史臣曰。臣總角時。亟聞耆德言衛公故事。案。史局非一人之手。而論辭稱臣總角時。果何人之語乎。且自開運二年。史成。上溯會昌之末。已百年矣。蓋沿唐人紀載之詞。而未及修正也。

嗣襄王燼傳

嗣襄王燼。案。舊史不敘燼之世系。考肅宗子僂。敬宗子執中。俱封襄王。新史以燼爲僂之裔孫。通鑑亦以爲肅宗玄孫。

李宗閔傳

元和四年。復登制舉賢良方正科。案本紀裴垪傳。俱云元和三年。

李讓夷傳

時起居舍人李讓夷有痼疾。請罷官。李固言欲用崔球。張次宗。鄭覃曰。崔球游宗閔之門。亦握乘筆記。注爲千古法。不可用朋黨。如裴中孺。李讓夷。臣不敢有纖芥異論。此事又見鄭覃傳。覃傳言起居郎闕。據此乃是起居舍人闕。非郎也。

崔慎由傳

清河武城人。案崔融傳云。齊州全節人。而此云清河武城人。蓋舉其姓望也。曾祖翹。位終禮部尚書東都留守。崔融傳云。翹。開元中中書舍人。

趙光逢傳

鼎沒於梁。累官至宰輔。王鎔。王處存傳。稱梁爲僞梁。此傳亦云鼎沒于梁。皆後唐史臣之詞。

張揚傳

乾符三年。出爲華州刺史。其年冬。檢校吏部尚書。鄆州刺史。天平軍節度觀察等使。四年卒于鎮。案僖宗紀。揚爲天平軍節度使。在二年七月。此云三年冬。似誤也。紀稱四年四月。黃巢攻鄆州。陷之。遂節度使薛崇。蓋揚卒而崇代之。新本紀。揚卒于五年。乃若承薛崇之後者。誤之甚矣。

輝王時拜中書侍郎平章事。本紀題哀帝。而此傳及司空圖傳。稱爲輝王。似非史法。

王徽傳

其先出於梁魏。魏爲秦滅。始皇徙關東豪族實關中。此傳敘徽先世。首尾二百餘言。皆碑狀之錄文。於史例無當也。

劉崇望傳

其先代郡人。隨元魏。孝文帝徙洛陽。遂爲河南人。八代祖隋大理卿坦。生政會。政會傳。在列傳第八卷。

崇望先世出於代北。當見政會傳。

徐彥若傳

父商。咸通初。加刑部尙書。充諸道鹽鐵轉運使。遷兵部尙書。四年。以本官同平章事。六年。罷相。檢校右僕射。江陵尹。荆南節度觀察等使。案懿宗紀。咸通六年二月。以御史中丞徐商爲兵部侍郎。同平章事。四月。轉中書侍郎。七年八月。兼工部尙書。八年十月。兼刑部尙書。十年正月。以門下侍郎兼刑部尙書。同平章事。徐商。檢校兵部尙書。江陵尹。荆南節度使。蓋商以咸通六年入相。十年罷相。其拜相之初。官止兵部侍郎。中間三轉官。至罷相出鎮。始得檢校兵部尙書耳。傳所書拜罷之年及官秩。皆誤也。

柳璨傳

藁爲中書舍人。判史館。引爲直學士。案史館無直學士之名。蓋引爲直館也。唐時三館職事人。皆以學士目之。史家不察。僞爲直學士爾。若循兩省遷轉拾遺。超等人起居郎。兩省供奉官拾遺。從八品。補闕。從七品。起居郎。從六品。給事舍人。正五品。諫議大夫。正四品。由拾遺。敍遷。當歷補闕。若遷起居郎。是爲超等。柳璨以拾遺。驟加諫議人相。越過正從九等。

李可舉傳

中和中累官至檢校太尉。僖宗紀廣明元年六月加可舉檢校司徒同平章事。唐自中葉以後方鎮以
使相爲最榮。此傳書檢校太尉而不書平章事。是舍重而舉其輕者矣。

何進滔傳

累官至司徒平章事。新書宰相表無進滔名。蓋檢校司徒非真司徒也。唐會要文宗朝使相五人亦無
進滔名。

何宏敬。大中後宣宗務其姑息。繼加官爵亦至使相。案武宗紀會昌四年八月以魏博節度使檢校
尚書右僕射同平章事何宏敬進封廬江郡開國公。是宏敬除使相乃在武宗朝。非宣宗姑息使然也。
唐會要武宗使相四人宏敬已預其一。

韓簡傳

遂移兵攻鄆。鄆帥曹全鼓出戰。爲簡所敗。死之。鄆將崔君裕收合殘衆。保鄆州。簡進攻其城。半年不下。河
陽復爲諸葛爽所襲。簡因欲先討君裕。次及河陽。乃舉兵至鄆。君裕請降。尋移軍復攻河陽。行及新鄉。
爲爽軍逆擊。敗之。案朱瑄傳鄆帥薛崇爲王仙芝所殺。鄆將崔君裕權知州事。全鼓知其兵寡。襲殺
君裕。據鄆州。自稱留後。光啓初韓簡欲兼并曹鄆。以兵濟河。全鼓出兵逆戰。死之。瑄收合殘卒。保州城。
然則君裕權知鄆州。乃在全鼓之前。全鼓襲君裕而代之。非全鼓死而君裕爲之守也。全鼓既死。保鄆

州者乃朱瑄非君裕此傳殊疏謬矣兩傳卷第相連不知何以抵牾若此

羅宏信傳

子威當云紹威脫紹字

王重榮傳

乾寧初重盈卒據唐會要重盈在僖昭兩朝皆在使相之列重盈子珙亦昭宗朝使相也而傳皆不書朱溫初伏鎮定舊書例稱朱全忠獨王珂王處直兩傳稱朱溫

諸葛爽傳

明年正月簡爲牙軍所殺據此傳韓簡以中和元年十一月爲爽所敗二年正月爲牙軍所殺而韓簡傳云簡爲爽軍擊敗單騎奔迴疽發背而卒時中和元年十一月也則簡但以兵敗病死非爲牙軍所害其年月亦異僖宗紀亦云簡爲部下所殺而書于中和三年二月其互異如此

宦官傳

田令孜爲子報令公建至此無所歸也僖宗紀中和三年七月賜陳敬瑄鐵券已稱守太尉同平章事此傳王建稱敬瑄爲令公蓋昭宗嗣位之始加至中書令也

酷吏傳

王旭。曾祖珪。貞觀初爲侍中。尙永寧公主。案珪封永寧郡公。未嘗尙主。尙南平公主者。珪之子敬直也。

儒學傳

蓋文達。文懿者。貝州宋城人。宋城。當作宗城。

文苑傳

袁朗。朗十三代祖。漢司徒滂。此敍袁氏先世百六十餘言。允雜無當。大意謂琅邪王氏。世有台輔。不若袁氏之世篤忠貞也。

賀知章。知章與越州賀朝萬。齊融。揚州張若虛。邢巨。案下文云。朝萬止山陰尉。齊融崑山令。若虛兗州兵曹。巨監察御史。皆舉其名。今鄞縣有育王寺常住田碑。祕書監正字萬齊融撰。蓋賀朝萬一人。萬齊融又一人也。傳脫一萬字。

李白。山東人。山東非唐時州縣之名。杜甫詩。雖有山東李白之稱。不可以入史也。白旣家任城。卽當云任城人矣。李琪傳云。山東甲姓盧士玫。傳云。山東右族。其失與此同。

李商隱。大中末。仲郢坐專殺左遷。商隱廢罷還鄭州。案柳仲郢節度東川時。商隱在其幕府。以仲郢傳考之。則云大中年。轉劍南東川節度矣。在鎮五年。美績流聞。徵爲吏部侍郎。非坐事左遷也。其坐決

賊吏過當左遷。則在鎮山南西道時。其紀年爲咸通。非大中末。商隱亦不在幕矣。

隱逸傳

王績。兄通。字仲淹。隋大業中名儒。號文中子。自有傳。案通名附其孫勃傳。非自有傳也。

列女傳

宋庭瑜妻魏氏。隋著作郎彥泉之後也。彥泉當是彥淵。避唐諱追改。

突厥傳

西有歌羅祿。北有結骨。歌羅祿亦作葛邏祿。聲之轉也。

黃巢傳

召故相駙馬都尉于琮於其第。琮曰。吾唐室大臣。不可佐黃家草昧。加之老疾。賊怒。令誅之。廣德公主并賊號眺而謂曰。予即天子女。不宜復存。可與相公俱死。是日并遇害。此事已見于琮傳。

楊復恭露布獻捷于行在。陳破賊事狀。復恭露布七百餘言。已載僖宗紀。而巢傳又重出之。當存此而刪彼。

忠武黃頭軍使龐從等三十都。僖宗紀作三十二都。龐從。卽龐師古也。

廿二史考異卷六十一

五代史一

目錄

唐太祖家人傳第二。案唐莊宗子繼灋、繼嵩、繼蟾、繼勳、晉高祖叔父萬友、萬詮等。周太祖子侗、信、姪守愿、奉超、遜、世宗子誼、誠等。皆雜敍成文。初非各自爲傳。而目錄一一列之。殊非史例。竊意歐史元目。祇有家人、梁臣、唐臣、晉臣、漢臣、周臣、死節、死事、一行、唐六臣、義兒、伶官、宦者、雜傳之名。後之讀史者。增注姓名於目錄之下。以便檢尋。非歐史本文也。

梁臣傳第九。李唐賓附朱珍傳。不當列入目錄。

伶官傳第二十五。伶官賤者。不足立傳。歐公類敍其事爲一篇。以爲後世鑒戒。與它傳體例各別。今獨取敬新磨、景進、史彥瓊、郭從謙四人。列於目錄。必非歐公元本。若依此例。則周匝亦宜入目錄矣。

雜傳第三十。朱瑾宜附注朱宣之下。此作大字另起。而又不書姓。非也。張歸霸之弟歸厚。歸弁。高行周之從兄行珪。監本皆作大字而不書姓。唯汲古閣本得之。

雜傳第三十七。皇甫暉、宜附趙在禮傳。

雜傳第四十二。李琪傳。附見其兄珽事。監本目錄。列李珽於琪之前。誤也。汲古閣本。分注於李琪之下。當從之。

雜傳第四十三。目錄有盧損一人。而傳闕之。

雜傳第四十五。馬重績。趙延義二人。方技也。故列於雜傳之末。歐史無列女傳。惟王凝妻見馮道傳論。賈章女見安重榮傳。

梁本紀一

其父誠。以五經教授鄉里。案。朱梁自稱舜司徒虎之四十六代孫。石氏自稱衛大夫碯之後。劉氏自稱東漢淮陽王昞之後。皆當時詞臣。傳會臆造。故歐公削而不書。

王鐸承制拜溫左金吾衛大將軍。河中行營招討副使。案。舊唐書僖宗紀。承制拜華州刺史。潼關防禦鎮國軍等使。

天雄軍亂。因其節度使樂彥貞。案。唐書方鎮表。天祐元年。賜魏博節度號天雄軍。此彥貞被囚。在文德元年。其時未賜天雄軍號。蓋史家追稱之。

准西牙將申叢。執秦宗權。折其足。案。申叢執宗權事。據唐書僖宗紀。在文德元年十一月。此繫於龍紀元年者。蓋因郭璠殺叢事。而追敘之。

曹州將郭紹賓殺其刺史郭饒來降。唐書昭宗紀。曹州將郭銖殺其刺史郭詞。與此紀姓同而名異。戰於洹水。擒克用子落落。唐本紀亦云。亡其子落落。案唐太祖家人傳。克用八子。無落落名。

取其泌。隨鄆三州。泌當作唐書昭宗紀。是年七月。朱全忠陷唐州。隋州。八月。陷鄆州。卽其事也。曾三

異據唐地理志。證泌字之誤。其說良是。但未及引昭宗紀耳。曾氏校正。祇有四條。俱在第一卷。惟元槩本及汲古閣本有之。

遣朱友謙殺胤於京師。曾三異校定曰。案家人傳。殺崔胤者。朱友謀。非友謙。友謀當作友諒。此刊本之譌也。全忠殺崔胤。唐書昭宗紀。在天祐元年正月。與此差一年。

遣蔣玄暉殺德王裕等九王於九曲池。九王。謂德王裕、棣王翬、虔王禔、沂王禕、遂王禕、景王祕、祁王祺。

雅王名祀。廟諱。瓊王祥也。見通鑑。唐書昭宗紀。失書沂雅二王。

梁本紀二

開平元年五月。封子友文、博王。友珪、郢王。友璋、福王。友貞、均王。友徽、建王。姪一本脫友諒、衡王。友能、惠王。

友誨、邵王。案家人傳。同日封者。尙有賀王友雍一人。紀失之。

二年三月。封鴻臚卿李崧、介國公。五代會要。作李崧。

四月。翰林學士承旨禮部侍郎張策。爲刑部侍郎。同中書門下平章事。案唐六臣傳。策由中書舍人翰

林學士遷工部侍郎。奉旨。蓋梁祖之父名誠。誠承同音。故改翰林學士承旨爲奉旨也。開平三年九月。

翰林學士承旨杜曉本傳亦作奉旨。與此正同。後唐以後仍復承旨之名。校書家失於稽考。并梁本紀中奉旨字亦改爲承。誤矣。傳稱工部而紀云禮部。考之薛史本傳則策由工部侍郎轉禮部。及拜相乃轉刑部也。唐宋六部之次。吏戶禮在左。兵刑工在右。吏兵爲前行。戶刑爲中行。禮工爲後行。由工而轉禮。自右轉左也。由禮而轉刑。自後行轉中行也。此當時敘遷之格。考官制者不可不知。

五月潞州行營都虞候康懷英及晉人戰於夾城。夾城梁人謂之夾寨。以誠城同音。避諱改稱也。歐史作夾城。則據晉人之詞。

六月忠武軍節度使劉知俊。案是年三月書匡國軍節度使劉知俊。此又書忠武軍者。考其年五月。改匡國軍爲忠武。與許州節鎮兩易其名。要之仍鎮同州。名異而實不異。故知俊傳不云改忠武節度也。三年七月襄州軍亂。殺其留後王班。劉玘傳稱山南節度使。

梁本紀三

貞明二年十月。中書侍郎鄭珽。同中書門下平章事。案本傳。珽以中書舍人翰林學士奉旨。拜中書侍郎。同中書門下平章事。非由中書侍郎拜相也。通鑑據唐餘錄。書禮部侍郎鄭珽爲中書侍郎。平章事。宜得其實。

六年四月。河中節度使朱友謙襲同州。殺其節度使程全暉。叛附於晉。案朱友謙傳。友謙遣其子令德。

襲同州。逐節度使程全暉。因求兼鎮。則全暉未嘗被殺也。舊五代史末帝紀亦云友謙襲陷同州。節度使程全暉單騎奔京師。可證此紀之誤。

唐本紀一

盡忠與其子執宜。案唐書沙陀傳。盡忠與朱邪執宜謀。不云其子。且自金山至盡忠凡四世。彼傳但稱沙陀。不系以朱邪。則二人之非父子明矣。兩史之互異如此。

咸通十三年。徙國昌雲州刺史大同軍防禦使。國昌稱疾拒命。國昌子克用。尤善騎射。爲雲州守捉使。國昌已拒命。克用乃殺大同軍防禦使。據雲州。自稱留後。唐以太僕卿盧簡方爲振武節度使。會幽并兵討之。簡方行至鳳州。軍潰。由是沙陀侵掠代北。爲邊患矣。明年。僖宗卽位。以李鈞爲靈武節度使。宣慰沙陀六州三部落。使以招輯之。拜克用大同軍防禦使。案唐書沙陀傳。克用以乾符三年。殺文楚。邊校共勾克用爲大同軍防禦留後。不許發諸道兵進捕。諸道不甚力。而黃巢方引度江。朝廷度未能制。乃赦之。以國昌爲大同軍防禦使。國昌不受命。據五代史。則國昌拒命在先。克用據雲州在後。據唐史則克用殺文楚在先。國昌拒命在後。且一云懿宗咸通之末。一云僖宗乾符之年。其互異如此。考舊唐書懿宗紀。咸通十三年十二月。以李國昌爲檢校右僕射。雲州刺史。大同軍防禦等使。國昌稱病辭軍務。是月。李國昌小男克用。殺雲中防禦使段文楚。據雲州。自稱防禦留後。十四年三月。以新除大同軍使

盧簡方爲單于大都護振武節度使。時李國昌據振武。簡方至嵐州而卒。與五代史大略相同。惟五代史以嵐州爲鳳州。則轉寫之譌耳。薛史武皇紀。新書沙陀傳。以爲乾符三年。僖宗紀又以爲五年。蓋均失之。通鑑于咸通十三年書國昌徙大同防禦。稱疾不起。至克用殺文楚事。則書於乾符五年。亦未甚核也。

京用得從者薛鐵山、賀回鶻等。隨電光絕尉氏門出。唐書沙陀傳。克用與薛志勤等。閒關升南護門。絕走營。志勤與鐵山。蓋卽一人。

遣弟克修將兵萬人。沙陀傳作克勤。案唐家人傳。太祖諸弟無名克勤者。

葬克用於雁門。五代會要。太祖葬建極陵。

以朱邪爲姓。拔野古爲始祖。五代會要。懿祖諱執宜。沙陀府都督拔野之六代孫。

爲契苾何力所敗。遂沒不見。今考唐書沙陀傳。高宗朝卽有沙陀金山。從薛仁貴討鐵勒。金山子輔國。輔國子骨咄支。卽盡忠之父也。何云沒不見邪。

唐本紀二

梁謝彥章軍於楊劉。李存進碑作陽留。

同光元年閏月。祖國昌。祖妣秦氏。皆諡曰文景。案五代會要。國昌追尊文皇帝。而太祖之母曰文景皇

后秦氏蓋帝諡文而后諡文景也。紀以爲皆諡文景者失之。李存進碑亦稱獻祖文皇帝

二年二月羣臣上尊號曰昭文睿武光孝皇帝。五代會要是年四月上尊號曰昭文睿武至德光孝皇帝。多至德二字。又以二月爲四月。

四年四月皇帝崩。注年四十三。案五代會要莊宗以唐光啓元年十二月二十二日生於晉陽宮。天祐二十年四月卽位於魏州。年三十九。同光四年崩。年四十二。光啓元年乙巳。同光四年丙戌。此云四十三者。轉寫之謬也。吳縝據此誤文。謂莊宗以甲辰生。乃疑破王行瑜獻捷時不止十一歲。則誤之甚矣。克用破邢州。孟方立飲藥死。在龍紀元年。巳其時莊宗恰五歲。吳氏乃舉文德元年。戊申晉兵破奚忠信事以實之。亦非也。

唐本紀三

父霓爲雁門都尉。一本霓作電。五代會要亦作霓。

天成元年三月壬子。通鑑作壬戌。依長厓。此月丁巳朔無壬子日。壬戌乃月之六日也。當以通鑑爲正。下三條並同

甲寅軍變。通鑑作甲子。乃三月八日也。

丁巳以其兵南。通鑑作丁卯。

壬寅入汴州。通鑑作壬午。

四月丁亥。莊宗崩。丁亥下當有朔字。

壬子魏王繼岌薨。繼岌死於非命。似不當以薨書。

八月平盧軍節度使霍彥威殺其登州刺史王公儼。案符習傳。公儼擒平盧監軍楊希望。殺之。因自求

爲節度使。明宗乃以房知溫鎮平盧。拜公儼登州刺史。公儼不時承命。知溫擒而殺之。此云霍彥威殺

之。未知孰是。薛史本紀亦作霍彥威。

二年七月。隨州刺史西方鄴取夔忠萬州。案鄴傳云。拜夔州刺史。不云爲隨州刺史。

長興四年八月戊申。大赦。是日上尊號曰聖明神武廣道法天文德恭孝皇帝。見通鑑。故有大赦。歐史書

赦而不書上尊號。

其卽位時。春秋已高。明宗生於唐咸通八年丁亥。以同光四年丙戌卽位。恰六十歲矣。

唐本紀四

愍皇帝。五代會要。愍作閔。

明宗第五子從厚也。案家人傳。明宗四子從厚。次居三。五代會要帝號篇。亦稱第三子。而於諸王篇。則

云明宗第二子從璟。第三子從榮。第四子從璨。第五子從益。蓋其時以從珂爲長子。又以姪從璨列於

昆弟之次。則從厚當居第五。而從益爲第六矣。紀傳雖異詞。要之各有所據。

應順元年正月。回鶻可汗王仁美遣使者來。案四夷附錄。稱唐莊宗冊王仁美爲英義可汗。紀在開元二年。

歲。仁美卒。其弟狄銀立。同光四年。狄銀卒。阿咄欲立。天成二年。權知國事王仁裕遣李阿山等來。明帝

遣使者冊仁裕爲順化可汗。紀在三年。晉高祖時。又冊爲奉化可汗。仁裕訖五代。常來朝貢。今本紀於是年

書仁美遣使者來。又清泰二年。書回鶻可汗王仁美使其都督劉福海來。晉本紀。天福三年。書回鶻可

汗王仁美使翟全福來。四年。書封回鶻可汗王仁美爲奉化可汗。此四條仁美字。似皆仁裕之譌。

三月戊辰。如衛州。此下當書皇帝崩。而不書。乃歐公之疏。徐氏注。謂當於廢帝紀書。此亦文過之詞。

論史例。自宜兩見。如不書帝崩。亦當云從珂入京師。廢帝爲鄂王。庶幾首尾完備也。

莊宗呼其小字曰阿三。不徒與我同年。案潞王與莊宗。皆以乙巳歲生。故云同年。

清泰元年。四月。弑鄂王。徐氏注。失書愍帝之年。案五代會要。唐天祐十一年十一月二十八日。生於晉

陽。長興四年即位。年二十一。應順元年。即清泰元年。遇弑。年二十二。此可據以補徐注之闕矣。然會要之文。

亦有抵牾。考天祐十一年。即梁乾化四年。歲在甲戌。應順元年。歲在甲午。首尾僅二十一年。若以年二十二推

之。當生於天祐十年。若果生於天祐十一年。則年止二十有一。二者必有一誤也。薛史年二十一。

三年十一月。皇帝崩。注年五十三。案五代會要。帝以唐光啓元年正月二十三日生。應順元年即位。年

五十。清泰三年崩。年五十二。此云五十三者。亦轉寫之誤也。吳氏據此誤本。謂潞王以甲辰生。不可信。

晉本紀一

天福二年五月。追尊高祖璟。五代會要。璟作景。

曾祖彬。汲古閣本。彬作彬。會要亦作彬。

考紹雍。廟號獻祖。紹雍。即臬揆雞也。後更製名耳。獻祖。五代會要作憲祖。

六月。張從賓寇河陽。殺皇子重义。寇河南。殺皇子重信。案家人傳。重義為東都留守。即河南。重信為河陽

三城節度使。則河陽所殺者。當是重信。河南所殺者。乃是重義也。義又音相同。實即一人。

三年八月。馮道及左僕射劉昫。為契丹册禮使。案遼史。會同元年。晉遣守司空馮道左散騎常侍韋勳

來。上皇太后尊號。左僕射劉昫。右諫議大夫盧重。上皇帝尊號。此紀所書者。兩正使之名耳。

四年正月。旌表深州民李自倫門閭。案一行傳。稱深州司功參軍李自倫。則非編戶之民也。

七年六月。皇帝崩於保昌殿。保昌殿在鄴都。

注年五十二。案五代會要。晉高祖以唐景福元年。壬子歲。二月二十八日生。清泰三年即位。年四十五。天

福七年。壬寅歲。崩。年五十一。此云五十二者。轉寫之誤。

晉本紀二

高祖六子五皆早死。考家人傳及會要。高祖子凡七人。重英、重义、重胤、重信、重進、重杲皆先死。此紀云六子五皆早死者誤也。

天福七年十一月葬聖文章武孝皇帝於顯陵。章武下脫明德二字。開運三年十二月奉國都指揮使王清。本傳作奉國都虞候。

漢本紀

天福十二年四月蕃漢兵馬都孔目官郭威。案周本紀不言爲孔目官。史之闕也。秋閏七月。依史例當書閏月。

天平軍節度使高行周爲鄴都行營都部署。案薛史高祖紀是年七月以鄴都留守天雄軍節度使杜重威爲宋州節度使。以宋州節度使高行周爲鄴都留守。其時天平節度李守貞與河中節度白文珂亦互相更代。初無行周移鎮天平之事。蓋歐史誤也。

周本紀一

隱帝卽位。是歲三月河中李守貞、永興趙思綰、鳳翔王景崇相次反。案漢本紀惟守貞反在三月。思綰則以四月。景崇則以七月。此紀總繫之三月。非也。李守貞傳云守貞乃決計反。而趙思綰先以京兆反。遣人以赭黃衣遺守貞。守貞大喜。又與漢本紀不同。

詔鎮寧軍節度使李弘義。宋史作洪義。蓋宋初避諱改名也。予因悟李業、卽弘義之弟。亦當名弘業。史家避諱省上一字耳。

請立泰寧軍節度使贊爲嗣。泰寧當作武寧。徐州軍號也。

周本紀二

本姓柴氏。邢州龍岡人也。案周太祖家人傳。聖穆皇后柴氏。邢州堯山人也。與太祖同里。遂以歸焉。太祖

亦堯山人。此紀稱龍岡。與傳互異。後山談叢云。歐陽五代史。周家人傳。柴后邢州龍岡人。世宗紀爲堯山人。後山所引。與今本正相反。恐是誤記。

顯德元年七月。樞密院直學士工部侍郎景範爲中書侍郎。同中書門下平章事。案宰相除罷。例皆書

範獨不書。罷免月日。據通鑑。二年八月。範罷判三司。尋以父喪罷政事。歐史偶失書耳。

顯德四年四月。追册彭城郡夫人劉氏爲皇后。案世宗追册劉后。本紀書之。太祖追册柴后。則不書。此

義例之未一者。

六年六月。封子宗訓爲梁王。宗誼燕國公。案宗誼。世宗長子。漢末爲劉銖所殺。顯德四年。追封越王。凡

追封之王。本紀例不書。此必誤也。以家人傳證之。當爲宗讓之謚。宗讓卽熙讓。恭帝之弟。薛史本
作宗讓

廿二史考異卷六十二

五代史二

梁家人傳

文惠皇后王氏。其生三子。長曰廣王全昱。次曰朗王存。次太祖。后少寡。攜其三子。備食蕭縣人劉崇家。黃巢起。太祖與存俱亡。爲盜。從巢攻廣州。存戰死。案太祖紀云。父誠。生三子。曰全昱。存。溫。誠卒。三子貧。不能爲生。與其母備食蕭縣人劉崇家。黃巢起。曹濮。存。溫。亡入賊中。巢攻嶺南。存戰死。與此文已爲重出。而此傳敘朗王存事。又云。初與太祖俱從黃巢攻廣州。存戰死。何其詞之不憚煩也。

太祖即位。立四廟。追尊皇考爲文穆皇帝。案立四廟。上父諡。已見本紀。此亦可省。

元貞皇后張氏。末帝立。追諡曰元貞皇太后。太字衍。

末帝德妃張氏。貞明五年。妃病甚。帝遺冊爲德妃。其夕薨。案康王友孜傳。妃薨於貞明元年。此云五年。誤也。汲古閣本無五字。

次妃郭氏。度爲尼。賜名誓正。誓當作誓。卽辯字。六朝俗體。所謂巧言爲辯也。

太祖二兄。曰全昱。曰存。案太祖二兄之名。一見於本紀。再見於文惠后傳。此則三見矣。歐史本以簡勝。

今卽此篇論之。其重複可省者。正復不少也。

其一養子曰友文。五代會要。以友文爲第二子。

開平元年五月乙酉。封友文爲博王。諸王受封之月日。已具本紀。而傳又書之。是亦可省也。唐太祖家

人傳。同光三年十二月辛亥。封存美等。唐明宗家人傳。天福四年九月癸未。封李從益。周世宗家人傳。

顯德六年六月癸未。封宗訓等。其月日皆可省。

貞明二年。全昱以疾薨。五代會要。贈尙書令。諡德靖。

貞明四年。友能以陳州兵反。紀在龍德元年。

唐太祖家人傳

大將軍李存信等。軍字衍。

同光二年四月己卯。皇帝御文明殿。遣使册劉氏爲皇后。案本紀。是年二月癸未。立劉氏爲皇后。與此

傳月日不同。五代會要云。四月十三日行皇后册禮。今檢通鑑長曆。是月己巳朔。則己卯乃十一日。亦

非十三日也。

後嫁契丹突厥李贊華。突厥當作突欲。李贊華。卽突欲之賜姓名也。史或稱本名。或稱賜名。不當重出。

太祖四弟。曰克讓。克脩。克恭。克寧。皆不知其父母名號。案唐書宰相世系表。國昌子克恭。克儉。克用。克

柔四人克恭乃克用之兄而五代史以爲克用弟克柔之名見於義兒傳而家人傳不及焉皆歐公之疏也。克讓、克脩、克寧三人疑非國昌之子。唐書孟方立傳克脩克用從父弟。存義、目錄、唐本紀、伶官傳俱作存義。

唐明宗家人傳

和武憲皇后曹氏。曹后與廢帝俱焚死。此諺乃晉天福五年正月所上。晉高祖所尙公主。卽其女也。故爲追行冊諡。歐史不載。追諡事亦太疏矣。五代會要

魏氏初適平山民王氏。生子十歲矣。明宗爲騎將掠平山。得其子母以歸。此事又見廢帝紀。此云十歲而紀云十餘歲亦小異。

從榮大宴元帥府。諸將皆有頒給。控鶴、捧聖、嚴衛使人馬一匹。絹十匹。案五代會要。應順元年三月。改左右羽林四十指揮爲嚴衛左右軍。龍武神武四十指揮爲捧聖左右軍。此從榮爲元帥。在明宗朝。似不應有捧聖嚴衛之名。

有姪四人曰從璨、從璋、從溫、從敏。五代會要以從璨爲明宗第四子。從璋。天福二年卒。舊史晉高祖紀贈太師。

從溫。歷安國、忠武、義武、成德、武寧五節度。封兗王。晉高祖立。復爲忠武軍節度使。案舊史唐明宗紀。長

興元年六月以左武衛上將軍李從溫爲許州節度使。二年九月移鎮河東。四年正月爲鄆州節度使。五月封堯王。十一月爲定州節度使。閔帝末帝二紀。失載從溫事。晉高祖紀。天福二年秦寧軍節度使李從溫加食邑。實封三年。加兼侍中。五年爲徐州節度使。少帝紀。天福七年加兼中書令。八年爲許州節度使。歐史失書河東。天平州即鄆秦寧三鎮。其鎮武寧。乃在晉高祖時。其復鎮忠武。則在出帝時。歐史皆失之也。又案唐中葉以後。諸道節度使帶平章事。兼侍中。中書令。竝列銜於敕牒後側。書使字。故有使相之稱。五代因之。在京樞密三司使及侍衛親軍都指揮使等。加相銜者。亦使相也。歐史於諸節度加相銜者。往往略而不書。則使而非相矣。五代會要。每帝宰相若干人。使相若干人。各書其姓名。當時之重使相如此。今據舊史以補歐公之闕。

徙河陽三城。卒於官。案舊史。從溫以開運三年卒。贈太師。

從敏。漢高祖時爲西京留守。案舊史。漢高祖紀。天福十二年。以從敏爲西京留守。加同平章事。少帝紀。乾祐元年三月。加兼侍中。

周廣順元年卒。贈中書令。予論歐史。於使相不應略而不書。或謂當時藩鎮之權已重。不係乎相銜之有無。果爾。則如秦王從榮。雍王重美之加平章事。何以不刪乎。生前之侍中。中書令。平章事。尙可不書。追贈之中書令。又何足書乎。此史例之當歸畫一者。未可置而不論也。

唐廢帝家人傳

應州渾元人也。渾元蓋卽渾源。避唐明宗諱。改爲元字爾。

清泰二年爲樞密使。天雄軍節度使。案本紀。清泰二年五月。宣徽南院使劉延皓爲樞密使。七月。劉延皓罷。蓋由樞密出爲天雄軍節度也。此文樞密使之下。嘗有出爲二字。

廢帝遣人殺重吉於宋州。五代會要。清泰元年七月。追冊爲太尉。立廟於宋州。

晉家人傳

后初號永寧公主。清泰二年。封魏國長公主。案五代會要。永寧公主。天成三年四月封。至長興四年正月。改封魏國公主。清泰二年三月。進封晉國長公主。此傳云。清泰二年封魏國者。誤也。唐家人傳。曹后生晉國公主。卽敬瑭所尙者。而此傳不見晉國之名。亦疏漏。

公主自太原入朝。千春節。五代會要。廢帝正月二十三日生。以其日爲千春節。德光報曰。可無憂。管取一喫飯處。此語又見契丹附錄。

漢家人傳

太祖入京師。以謂漢大臣必相推戴。及見宰相馮道等。道殊無意。太祖不得已。見道猶下拜。道受太祖拜。如平時。此事又見馮道傳。

周世宗家人傳

宣懿皇后符氏。其祖秦王存審。父魏王彥卿。案存審傳。失載封爵。五代會要。周顯德元年。進封衛王符

彥卿爲魏王。史亦失書。

朱珍傳

珍軍已入壘城。而垂門發。垂門。卽懸門也。宋人避聖祖嫌名。改爲垂字。

葛從周傳

拜昭義軍節度使。封陳留郡王。食其俸於家。是時澤潞爲晉所有。但假其名以寵從周。俾食其俸耳。王

景仁爲寧國軍節度使。奉朝請。袁建豐遙領鎮南軍節度使。俾食其俸。此兩鎮亦非梁所有。皆遙領也。宋世節度使在家食俸。蓋亦因於五代。然考諸唐史。昭宗天復初。孫德昭爲靜海軍節度使。孫承誨邕州節度使。董從實容州節度使。竝同平章事。此三使相遙領邊鎮。皆不之任。又朱全昱領嶺南西道節度使。朱友寧領邕州節度使。朱友倫領容州節度使。皆在唐末。卽唐盛時皇子。除節度大使者。亦皆不之鎮也。五代會要。梁末帝使相三十二人。從周居其一。予嘗見從周神道碑云。檢校太師兼侍中。此歐史所失書也。

張存敬傳

譙郡人也。當云亳州人。取其瀛、漠、祁、景四州。漠、當作莫。

符道昭傳

晉兵攻破夾城。道昭戰死。案五代會要。梁太祖朝。使相二十七人。道昭居其一。據薛史。則唐昭宗時授秦州節度使。已加平章事矣。歐史竟不書其所授之官。文雖簡而非史法。

寇彥卿傳

拜彥卿感化軍節度使。梁置感化軍於華州。而移鎮國軍額於陝州。寇彥卿、康懷英之鎮感化皆在華州。張歸厚爲鎮國軍節度。則治陝州也。

康懷英傳

徙鎮永平。卒於鎮。案薛史。懷英爲感化節度使。已加平章事。

劉鄩傳

以長安爲永平軍。拜鄩節度使。薛史末帝紀。乾化四年。以永平軍節度使。檢校太傅。同平章事。劉鄩爲開封尹。遙領鎮南軍節度使。則鄩在永平時。已爲使相矣。

子遂凝。遂雍。事唐。皆爲刺史。遂凝官隰州刺史。見范延光傳。又爲華州節度使。見一行傳。

鄒妾王氏有美色。鄒卒。後入明宗宮中。是爲王淑妃。明宗晚年。淑妃用事。鄒二子皆被恩寵。此事已見唐家人傳。若依劉知幾點煩之例。稍易其文云。明宗晚年。王淑妃用事。鄒故妾也。故鄒子皆被寵。而其它盡芟之。則文省而意更顯矣。

張歸霸傳

開平二年。拜河陽節度使。以疾卒。據會要。歸霸於太祖末帝時。皆爲使相。則其卒當在乾化三年以後。而鎮河陽時。已加平章事也。

楊師厚傳

潁州斤溝人也。唐宋地理志。皆無斤溝縣。胡三省云。九域志。潁州萬壽縣有斤溝鎮。萬壽。唐汝陰縣之百尺鎮也。開寶六年置縣。

王景仁傳

乾化元年正月庚寅。日有食之。案司天考。是年正月丙戌朔。日有食之。五代會要。梁開平五年正月丙戌朔。日食。卽乾化元年也。以通鑑長麻推之。正月朔合是丙戌。此云庚寅而不書朔。皆失之。

是日。景仁及晉人戰。大敗於柏鄉。案宋本紀。正月丁亥。景仁及晉人戰於柏鄉。敗績。則非庚寅。亦非日蝕之日。考五代會要月蝕篇云。正月二日。爲唐莊宗敗於柏鄉。則紀書丁亥日爲是矣。吳氏纂誤。亦舉

此二事而疑而未決，故特考正之。

賀瓌傳

末帝時遷左龍虎統軍、宣義軍節度使。案薛史貞明三年除宣義軍節度使，加檢校太傅、同平章事。

王檀傳

徙鎮天平。通鑑云兼中書令。

安重誨傳

徒陷彥溫於死，而不能去潞王之患。李嚴一出而知祥貳，仁矩未至而董璋叛。楊彥溫、孟知祥、李仁矩不書姓而書名，前史無此例，雖下文有之，然先後殊倒置矣。此篇乃歐公用意之作，然敘事之中，難以斷制，大似論體。蓋學史記而失之。

戶部尚書李鱗，得吳諜者言，徐知誥欲舉吳國以稱藩，願得安公一言以爲信。鱗卽引諜者見重誨，重誨大喜以爲然，乃以玉帶與諜者，使遺知誥爲信。其直千緡，初不以其事聞。其後逾年，知誥之問不至，始奏貶鱗行軍司馬。此事又見李鱗傳。鱗傳稱楊溥，而此云徐知誥，知誥相溥，專其國政故也。

重誨過鳳翔節度使朱弘昭，延之寢室，使其妻子奉事左右甚謹。重誨酒酣，爲弘昭言，昨被讒構，幾不自全，賴人主明聖，得保家族，因感歎泣下。重誨去，弘昭馳騎上言，重誨怨望。此事又見弘昭傳。

但恨不與國家除去潞王。案重誨死於長興二年閏五月，而從珂之封潞王，乃在四年五月，重誨口中安得稱潞王乎？此亦歐史之失檢也。

周德威傳

其小字陽五。葛從周碑作揚五。

符存審傳

拜忠正軍節度使、侍衛馬步軍都指揮使。案後唐天成三年，升壽州爲忠正軍，州屬淮南，不在唐疆域之內，蓋遙領也。藥彥稠以侍衛步軍都虞候領壽州節度使，與此同。

史建瑄傳

晉王東追黃巢於宛胸，還過梁，軍其城北。梁王置酒上源驛，獨敬思與薛鐵山、賀回鶻等十餘人侍。晉王醉，留宿梁驛，梁兵夜圍而攻之。敬思登驛樓，射殺梁兵十餘人。會天大雨，晉王得與從者俱去。絕尉氏門以出。此事已見唐本紀，本傳祇敘敬思死事，自可以一二語了之。

元行欽傳

及莊宗之崩，不能自決，而反逃死以求生。予謂行欽之不負莊宗明矣，其出奔也，安知非志出於復讎。歐陽之論，所謂責人斯無難也。

符習傳

後徙鎮安國。又徙平盧。案薛史同光元年加同平章事。天成元年加兼侍中。

孔謙傳

鄴北都也。宜得重人鎮之。非張憲不可。崇韜以爲然。因以憲留守北都。案唐本紀同光元年以魏州爲

東京。卽鄴也。張憲傳亦云爲東都副留守。此作北都誤。

李嚴傳

知祥發怒曰。天下藩鎮皆無監軍。安得爾獨來此。此乃孺子熒惑朝廷爾。卽擒斬之。明宗不能詰也。此

語亦見後蜀世家。

毛璋傳

璋累歷藩鎮。案薛史天成元年邠州節度使毛璋加同平章事亦使相也。

朱弘昭傳

以弘昭與馮贇代延壽延光。案五代會要明宗使相三十八人。愍帝使相二十三人。弘昭、贇皆與焉。又

會要載長興四年九月敕馮贇有經邦之茂業。宜進位於公台。但緣平章字犯其父名。不欲斥其家諱。

可改同平章事爲同中書門下二品。此文有關於官制者。而歐史略不及焉。何也。弘昭以樞密使加平章事亦使相也。

藥彥稠傳

拜澄州刺史。職方考不載此州。考唐志嶺南道有澄州。蓋遙授。非正任也。

蕭希甫傳

幽州李紹宏薦希甫爲魏州推官。案歐史之例。凡稱某州某人者。皆節度使也。是時幽州節度使周德威戰歿。管王自領節度。以紹宏提舉軍府事。官者傳有宣徽使馬紹宏。嘗賜姓李。卽其人也。希甫希旨。誣奏革縱田客殺人。而說與鄰人爭井。此事亦見豆盧革傳。

桑維翰傳

及維翰爲樞密使。復奏置學士。五代會要。開運六年六月。敕翰林學士與中書舍人。舊分爲兩制。各置六員。偶自近年。暫停內署。況司詔命。必在深嚴。將使從宜。却仍舊貫。宜復置翰林學士院。以本紀考之。正維翰除樞密使之月也。

景延廣傳

出帝立延廣有力。頗伐其功。案通鑑。天福七年七月。加延廣同平章事。開運元年四月。加兼侍中。出爲西京留守。傳皆失書。

李業傳

高祖皇后之弟也。后昆弟七人，業最幼。案宋史李洪信傳，稱后第六人，又稱洪義爲洪信之少弟，與此傳異。薛史亦稱業昆仲凡六人，此七字蓋六之譌。

侍衛馬軍都指揮使閻晉卿等。案周本紀稱客省使閻晉卿，蓋以客省使領侍衛馬軍也。

後贊傳

後贊。通鑑作後匡贊。史避宋諱，省上一字。

王朴傳

顯德三年，拜戶部侍郎樞密副使，遷樞密使。案周本紀，顯德三年九月，端明殿學士左散騎常侍王朴，爲尚書戶部侍郎樞密副使。四年八月，王朴爲樞密使，傳并爲一年事，誤矣。朴遷樞密使，當書於留守京師之下。

鄭仁誨傳

顯德元年，拜樞密使。案通鑑，是年正月，爲樞密使，同平章事。五月，兼侍中，傳皆失書。諡曰忠正。案證法無正字，本當諡忠貞，避宋諱，追改耳。張承業諡正憲，亦當爲貞字。

夏魯奇傳

徙鎮武信。案通鑑，長興元年四月，加魯奇同平章事，傳失書。

王思同傳

興元張虔釗攻城西督戰甚急士卒苦之反兵攻虔釗虔釗走羽林指揮使楊思權呼曰潞王吾主也乃引軍自西門入降從珂此事又見楊思權傳

張敬達傳

徙鎮武信晉昌 胡三省云明宗置武信軍於遂州尋爲孟知祥所陷敬達未嘗往鎮晉得中國始改長安爲晉昌軍歐史考之未詳也通鑑書敬達自建雄節度代敬瑭建雄軍晉州也歐誤以晉昌耳又不
知武信緣何而誤予案舊史末帝紀清泰二年十一月以徐州節度使張敬達爲晉州節度使舊敬達傳亦云自彭門移鎮平陽則武信當是武寧之譌武寧徐州軍額也

翟進宗傳

翟進宗張萬迪者皆不知其何人也 萬迪爲懋光遠脅降以罪誅死不在死事十五人之列傳宜別而出之讀開端二語似阜白不分矣

史彥超傳

彥超爲漢龍捷都指揮使 案五代會要周廣順元年四月改侍衛馬軍曰龍捷左右軍步軍曰虎捷左右軍御撰其名是漢時尙無龍捷之名殆因下文有虎捷字而竝追書之耳

孫晟傳

亟召侍衛軍虞候韓通。案韓通名。惟此傳及契丹附錄兩見之。昔人譏歐陽公不爲通立傳。失春秋之旨。予考前史之例。如王凌、毋邱儉、諸葛誕之死。魏未亡也。故列於魏志。袁粲、劉秉之死。宋未亡也。故列於宋書。若通之死事。乃在宋已受禪之日。於例不當入五代史矣。五代史七十四篇。自世家而外。絕不涉宋一字。符彥卿、李洪信等。功名顯於五代。而沒在宋初。卽不爲立傳。史家限斷之法宜爾。不得以通一人而紊其例也。

鄭遨傳

唐明宗祖廟諱遨。明宗曾祖名敖。與遨同音。

石昂傳

昂旣去而晉室大亂。此語亦可省。

李自倫傳

天福四年。天福上當有晉字。

唐六臣傳

初唐天祐三年。三當作二。考唐書本紀。彗出西北。及裴樞等之見殺。皆天祐二年事。

守太保致仕趙崇。案唐本紀崇官檢校司空兼太子太保。此稱守太保者誤也。

明年三月唐哀帝遜位於梁。白馬之禍在天祐二年。其四年哀帝遜位。梁本紀與唐史所載同。獨此傳

誤以爲三年事。故云明年。其實中隔一年也。

張文蔚。昭宗遷洛拜中書侍郎同中書門下平章事。據唐史本紀及宰相表。文蔚拜相在哀帝時。非

昭宗時。

張策。河西燉煌人也。案漢魏六朝以郡領縣。故稱人里居者必舉其郡。唐宋則以州領縣。故例書州

而不書郡。此史張策李琪稱河西燉煌人。薛貽矩裴迪稱河東聞喜人。皇甫遇稱常山真定人。史圭稱

常山石邑人。李愚稱渤海無棣人。皆舉郡而不舉州。此體例之可議者也。若開封大名。當時嘗升爲府。

則例當書府不書州。如氏叔琮張廷蘊之稱開封。馬全節劉詞之稱大名是也。

李嗣昭傳

天祐三年。案天祐改元。晉王仍稱天復。及梁篡位。晉始稱天祐四年。傳據晉事而言。當云天復六年。不

當稱天祐也。

還營而卒。五代會要。長興二年四月。敕故昭義節度使李嗣昭。故幽州節度使周德威。故汴州節度使

符存審。配享莊宗廟。歐史惟德威傳載配享事。而嗣昭存審篇中則失之。

李存進傳

存進，振武人也。案呂夢奇撰存進神道碑云：字光嗣，樂安人也。

太祖攻破朔州，得之，賜以姓名，養爲子。從太祖入關，破黃巢，以爲義兒軍使。此傳敘歷官本末頗略，以太祖攻破朔州得之，賜以姓名，養爲子，從太祖入關，破黃巢，以爲義兒軍使。存進碑考之：國昌帥振武時，存進已在麾下，及從克用立功，爲節度押衙、左廂衙隊威雄第一都副兵馬使，奏授銀青光祿大夫、檢校太子賓客、兼監察御史。大順元年，遷殿中侍御史。景福二年五月，始賜姓名，補充右廂義兒第一院軍使。其時距入關破巢幾及十年，攻破朔州，又在其前，安得卽有賜姓名爲養子之事乎？

歷慈、沁二州刺史。以存進碑考之，則太祖時已嘗權知汾石二州軍州事。莊宗時，真授石州刺史，再知汾州軍州事，又授慈州刺史。又權知沁州軍州事，蓋未嘗真授沁州刺史也。

以爲天雄軍都部署。通鑑作天雄都巡按使，考異云：莊宗實錄稱軍城使，存進傳作都部署，莊宗列傳及薛史存進傳皆云天雄軍都巡按使，今從之。予考存進碑，本云天雄軍都部署巡檢使，它書作巡按者，卽巡檢之譌，或云都部署，或云都巡檢，各就省文，似異而實同也。

存進亦歿於陣。碑云年六十八。

子漢韶。碑載存進七子：漢韶、漢威、漢殷、漢卯、漢筠、祿兒、歡兒。史惟載漢韶一人。

伶官傳

皇后劉氏素微。其父劉窆。賣藥善卜。號劉山人。此語又見唐家人傳。
四月丁亥朔。朝羣臣於中興殿。莊宗歿於洛陽中興殿。絳霄殿。皆在洛中。傳但云東幸汜水。而不云還
洛。亦疎漏也。

廿二史考異卷六十三

五代史三

王鎔傳

其先回鶻阿布思之遺種曰沒諾干。爲鎮州王武俊騎將。武俊錄以爲子。遂冒姓王氏。沒諾干子曰未坦。活。未坦活子曰昇。昇子曰廷湊。案。舊唐書王武俊傳。武俊初號沒諾干。唐書張孝忠傳。燕趙間共推張阿勞。王沒諾干。二人齊名。沒諾干。王武俊也。王廷湊傳。曾祖五哥之。王武俊養爲子。故冒姓王。宰相世系表。安東王氏五哥之。生未坦。活。未坦活子升朝。升朝子廷湊。舊唐書廷湊傳。敘其世系與表正合。然則沒諾干與王武俊。乃是一人。而廷湊之曾祖。自名五哥之。非沒諾干也。五代史誤矣。坦。但聲相近。升朝。或作昇。未知誰是。

唐中和二年卒。子鎔立。通鑑。景崇卒在中和三年。

羅紹威傳

魏博牙軍亂。遂殺其帥樂彥貞。新舊唐史。皆作彥禎。此作貞者。宋人避仁宗諱改之。立其將趙文建爲酋後。舊唐書樂彥禎。羅宏信傳。皆作文玢。

證曰貞壯。五代會要作貞懿。

劉守光傳

匡威爲弟匡儻所逐。唐書作匡籌。

李茂貞傳

光啓元年朱玫反。僖宗出居興元。唐書僖宗紀在光啓二年。

加拜茂貞尙書令封岐王。此事不著年月。據通鑑則天復元年正月事也。今考舊唐書昭宗紀景福元年以岐王李茂貞爲興元尹。山南西道節度等使。是茂貞之封岐王已久。至景福二年十一月制以鳳翔節度使李茂貞守中書令進封秦王。則已由岐而進王秦矣。不應至是始封岐王也。

但稱岐王。開府置官屬。今鳳翔法門寺有碑。題云大唐秦王重修法門寺塔廟記。天祐十九年二月。禮部郎中薛昌序撰文。蓋茂貞稱制時所立。稱茂貞爲秦王。不云岐王。然則唐亡以後。茂貞自稱秦王可證也。岐者一州之名。秦者大國之號。茂貞在昭宗朝已封秦王。必不舍秦而稱岐。且同時吳晉燕趙諸鎮皆取大國名。茂貞何故輒自貶降。必不然矣。

以妻爲皇后。當云王后。蓋取戰國及漢初諸侯王妻稱后之例。胡三省謂妻之貴踰於其夫者。妄也。莊宗已破梁。茂貞稱岐王。上牋及聞入洛。乃上表稱臣。遣其子從巖來朝。莊宗以其耆老。甚尊禮之。改封

秦王。案通鑑同光三年二月進岐王爵爲秦王。考異云茂貞改封秦王。薛史無的確年月。實錄同光元年十一月已稱秦王。茂貞遣使賀收復。自後皆稱秦王。至二年辛巳制。秦王李茂貞可封秦王。豈有秦王封秦王之理。必是至是時始自岐王封秦王也。予謂茂貞在唐昭宗時已封秦王。實錄所書本不誤。溫公以意改之。卻非其實。何也。茂貞唐之舊藩。與河東均附屬籍。其上牋莊宗。猶以季父行。自處儼然敵國之禮。至是始上表稱臣。乃因其舊封授之。錫以册命。上云秦王者。茂貞自稱。下云秦王者。莊宗所命。於文義何嫌。歐史之誤。與溫公同。

茂貞承制。拜從曦彰義軍節度使。案通鑑同光二年加中書令。廢帝入立。復以從曦爲鳳翔節度使。卒年四十九。案五代會要。從曦在晉高祖朝使相之列。據薛史本紀。從曦以開運三年十月卒。則晉少帝朝猶是使相也。歐史不書其卒年。似卒於唐世矣。曦有子永吉。見蘇逢吉傳。

李仁福傳

當唐僖宗時。有拓拔思敬者。思敬當作思恭。宋人避敬字。多改爲恭。而同時又有拓拔思敬其人者。乃併思恭亦誤轉爲敬矣。

開平二年。思諫卒。案舊史世襲傳。開平元年授檢校太尉兼侍中。

其弟彝興。五代會要通鑑皆作彝殷。後避宋朝諱。改名彝興。

韓遜傳

軍中立其子洙為畱後。梁即以為節度使。案舊史本紀貞明四年加洙同平章事。唐同光二年兼侍中。至莊宗時。莊宗上當有唐字。

天成四年洙卒。即以洙子澄為朔方軍畱後。其將李賓作亂。澄乃上章請帥於朝。案康福傳以澄為洙

之弟。通鑑同此云洙子似誤。彼傳作李從賓。此云李賓。蓋史家避後唐諱。省一字。猶杜重威避晉諱而稱

杜威也。通鑑作李匡賓又案韓洙於莊宗時加兼侍中。至明宗天成四年乃卒。五代會要梁末帝使相三十二

人。唐莊宗使相三十二人。皆有洙名。而明宗使相三十八人。無洙名。亦考之未審也。

高萬興傳

是時周密為彰信軍節度使。彰信當作彰武。延州軍額也。

以允權為畱後。聞漢高祖起太原。遂歸漢。即拜節度使。案五代會要允權在漢隱帝周太祖朝皆在使

相之列。詳史乾祐元年加同平章事周廣順元年加兼侍中

廣順三年卒。廣順上當有周字。

溫韜傳

茂貞又以美原縣爲鼎州，建義勝軍。案，義勝軍治耀州，鼎，特其屬州耳。文義未明白，且鼎州之名，已見職方考，此傳可省。

以韜爲節度使，茂貞承制，加同平章事。其後事梁事唐，皆仍其舊官，故五代會要入之梁末帝。唐莊宗使相之列。

明年，流於德州，賜死。韜有子延沼，見婁繼英傳。

雷滿傳

楊行密攻杜洪於鄂州，荆南成汭出兵救洪，汭戰敗，溺水死於君山。滿襲破荆南，不能守，焚掠殆盡而去。案，趙匡凝傳，成汭死，雷彥恭襲取荆南，匡凝遣其弟匡明逐彥恭，兩傳同在一卷之中，而自相乖舛。考唐書昭宗紀，天復元年，武貞軍節度使雷滿卒，其子彥威自稱，留後。其三年，荆南節度使成汭及楊行密戰於君山，死之。武貞軍節度使雷彥威之弟彥恭，陷江陵，則襲取荆南，乃彥恭非滿也。天祐中，滿卒，子彥恭自立。案，唐史，滿卒於天復元年，子彥威繼之。

趙匡凝傳

子匡凝自立，是時成汭死，雷彥恭襲取荆南。案，匡凝自立，據通鑑，在景福元年壬子，而成汭之戰死，在天復三年癸亥，相距十有二年，何得云是時乎？

是時梁已破兗鄆。遣氏叔琮、懷英等攻匡凝。叔琮取泌隨二州。懷英取鄧州。匡凝懼。請盟乃止。案唐史。梁破兗鄆。在乾寧四年。丁巳。梁取唐州。即泌州。隨鄧三州。在光化元年。戊午。皆在天復紀元之前。敍事殊爲顛倒。若移成汭死以下五十八字於請盟乃止之下。則首尾有倫矣。

朱宣傳

宣乃去事青州節度使王敬武爲軍校。敬武以隸其將曹全晟。案全晟卽全晟也。考通鑑全晟於廣明元年。由淄州刺史爲天平節度使。而王敬武之得青州。乃在中和二年。則全晟不得爲敬武部將。而朱宣爲平盧軍校時。敬武尙未得節度也。

鄆州節度使薛宗卒。其將崔君預自稱留後。案唐書本紀。乾符四年。黃巢陷鄆州。天平軍節度使薛崇死之。五年。天平軍節度使張揚卒。牙將崔君裕自知州事。是薛崇之後。尙有張揚一人。與此傳不合。崇與宗裕與預。形聲相涉而謬。

王師範傳

唐廣明元年。無棣人洪霸郎爲盜。齊棣閒。平盧節度使安師儒遣敬武率兵擊破之。敬武反。兵逐師儒。自稱留後。案唐書。王敬武逐安師儒。在中和二年。

孟方立傳

唐廣明中，潞州節度使高郢攻諸葛爽於河陽，遣方立將兵出天井關爲先鋒，郢爲其將劉廣所逐，廣爲亂兵所殺，方立引兵自天井入據潞州。案唐書方立傳：中和元年，昭義節度使高郢擊黃巢，戰石橋，不勝，保華州，爲裨將成鄰所殺，還據潞州，方立率兵攻鄰，斬之，自稱畱後。中和元年，卽廣明二年也。彼云成鄰殺郢而代之，與此傳不合。舊唐書僖宗紀、新唐書王徽傳，與此傳同。

王珂傳

重榮卒，弟重盈立。唐書以重盈爲重榮之兄。

馮行襲傳

洋州葛佐，辟行襲行軍司馬使，以兵鎮谷口，通秦蜀道。案唐書行襲傳：附劉巨武定節度使楊守忠表

爲行軍司馬使，領兵搃谷口，以通秦蜀。武定者，洋州軍號也，而節度使名姓各別，考舊唐書宦官傳，守

忠乃楊復光假子，葛佐殆其本姓名也。

事梁，官至司空。案五代會要：行襲在梁太祖朝使相之列。薛史本傳官至兼中書令。

氏叔琮傳

太祖遣友寧兵萬人，友寧上當有朱字。

孫德昭傳

季述將朝，德昭伏甲士道旁，邀其輿斬之。據唐書宦者傳，德昭所斬，及所擲之首，乃王仲先，非劉季述也。此傳恐誤。

蔣殷傳

是時哀帝方卜郊，殷與蔣元暉等有隙，因譖之太祖，言元暉等教天子卜郊祈天，且待諸侯助祭者，以謀興復。太祖大怒。此事亦見孔循傳。

丁會傳

光啓四年，東都張全義襲破河陽，逐李罕之。罕之召晉兵圍河陽，全義告急。據梁本紀，此事在文德元年，卽光啓四年也。且此事已詳見罕之、全義兩傳，何必又縷述之。當云李罕之召晉兵圍張全義於河陽，太祖遣會及葛從周將萬人救之，則文簡而當矣。

莊宗立，以會爲都招討使。案五代會要，會在莊宗朝使相之列，似同光初會尙無恙。薛史天祐七年十一月卒。

賀德倫傳

仍爲天雄軍，以德倫爲節度使。案五代會要，德倫在末帝使相之列。

末帝優詔答之，言王鎔死，鎮人請降，遣鄴以兵定鎮州，非有它也。案魏博軍亂，在梁貞明元年，卽天祐十二年也。王鎔死在天祐十八年，與此時初不相涉。若云以給魏軍，則鎮魏二州壤地相接，聲息易通。

非可以此相欺也。

閻寶傳

貞明三年，賀德倫以魏博降晉。當云貞明元年。張源德專亦誤作三年。

康延孝傳

二年，遷保義軍節度使。當云同光二年。

左廂馬步軍都指揮使董璋。據璋傳，爲行營右廂馬步軍都虞候。

朱友謙傳

以其子令德爲遂州節度使。案五代會要，莊宗朝使相有朱令得，卽令德也。據薛史本紀，令德在同州節度使任已加平章事矣。

袁象先傳

末帝畱守東都，以大事謀於趙巖。巖曰：此事如反掌耳，但得招討楊令公一言諭禁軍，則事可成。此語

已見楊師厚傳，宜去此存彼。

末帝卽召龍驤軍在東京者，告之曰：上以重遇，故欲盡召龍驤軍至洛而誅之，乃僞爲友珪詔書示之。龍驤軍恐懼，不知所爲，因告之曰：友珪弑父與君，天下之賊，爾能趨洛陽擒之，以其首祭先帝，則所謂轉禍而爲福也。軍士踴躍曰：王言是也。此事已見末帝紀，詞意略同，亦宜去此存彼。

在宋州十餘年。案象先以貞明四年爲平盧節度使。其徙鎮宣武未詳何年。就使當年移鎮。而自貞明四年戊寅至同光元年癸未相距止六歲。安得有十餘年之久乎。

復獻五萬緡求爲真刺史。宋時防禦團練使刺史皆有遙授正任之分。蓋始於此。但宋時所謂正任者亦僅食其俸。非真履其任也。

拜雄州刺史。州在雲武之西吐蕃界中。案五代之際。雄州有四。一爲周世宗所置。卽今直隸雄縣。一爲南漢所置。卽今廣東之南雄府。皆見於職方考。一爲南唐所置。卽今江南六合縣。周平江北遂廢。故職方考不及焉。此雄州職方考亦無之。考唐書地理志。雄州在靈州西南百八十里。中和元年徙治承天堡者卽此。

趙在禮傳

軍士皇甫暉作亂。推其將楊仁晟爲首。仁晟不從。殺之。又推一小校。小校不從。又殺之。乃攜二首詣在禮。此事又見皇甫暉傳。

歷鎮秦寧、匡國、天平、忠武、武寧、歸德、晉昌。案舊史。唐明宗長興元年七月以前。兗州節度使趙在禮爲左驍衛上將軍。九月爲同州節度使。四年十月爲襄州節度使。末帝清泰元年加同平章事。二年爲宋州節度使。歐史不書山南東道者。漏也。在禮於明宗朝自魏州移鎮滄州。橫海。又移兗州。秦寧。同州。

匡闕襄州、山南東末帝時移宋州、歸德晉高祖時移鄆州、天平許州、忠武少帝時改徐州、武寧再除兗州。改晉昌軍。歐史既脫襄州一鎮。其再鎮泰寧亦闕而不書。前後移鎮亦失其序。不若舊史之核。契丹入汴。在禮自宋馳至洛陽。案契丹入汴時在禮爲晉昌節度。非宋州也。

漢高祖立贈中書令。案在禮於晉天福三年已加兼侍中史不書生侍中而書贈中書令何也。

霍彥威傳

天成三年冬彥威卒於鎮。案舊史天成元年加彥威兼侍中二年加兼中書令。

房知溫傳

末帝患魏軍彊難制與趙巖等謀分相魏爲兩鎮魏軍由此作亂劫德倫叛梁而降晉梁遂失河北此

語亦屢見可省。

王建立傳

若文珂守恩皆位兼將相漢大臣也。案舊史文珂時爲保義節度使同平章事守恩爲西京畱守同平

章事故有位兼將相之語歐史不爲文珂立傳非讀舊史安知文珂之亦使相乎。

康福傳

乃拜福涼州刺史河西軍節度使。案韓遜傳以福爲朔方河西節度使考唐時靈武與河西各爲一鎮。

靈武爲朔方節度使。例兼靈州大都督府長史。河西節度治涼州。故帶涼州刺史。韓氏世鎮靈武。唐莊宗時。乃命遙領河西節度。福旣代韓澄兼領兩鎮。而本傳不書朔方節度。但書河西節度。是舍重而舉其輕也。五代史於節度所領之刺史。例不書。獨此書涼州刺史。於例已不歸一。且又不書靈州長史。而書涼州刺史。蓋歐公於官制未甚了了。故刪節舊文而未得其要也。

李周傳

晉高祖時。復鎮靜難。罷還。案五代會要。周在唐末帝。晉高祖。出帝朝。俱在使相之列。舊史本紀。清泰三年。以西京留守李

周爲汴州節度使。同平章事。晉天福三年。加兼侍中。

劉處讓傳

唐制。樞密使常以宦者爲之。自梁用敬翔。李振。至莊宗始用武臣。而權重將相。此語已見郭崇韜傳論。且敬翔等但爲崇政使。不名樞密使也。

張希崇傳

遷靈武節度使。代康福。

居四歲。上書求還內地。徙鎮邠寧。案晉家人傳。天福二年。詔前靈武節度使張從賓。發河陽兵。蓋希崇徙鎮之後。以從賓代之。天福初。從賓入爲東都巡檢。而希崇復鎮靈武也。

天福三年，月掩畢口大星。案，司天考不載此事，惟四年九月癸未，月掩畢，恐卽此條傳聞之誤。

張廷蘊傳

李繼韜叛於潞州，莊宗遣明宗爲招討使，元行欽爲都部署。案，通鑑同光二年，安義牙將楊立聚衆攻潞州，子城節度副使李繼珂棄城走，立自稱留後，遣將士表求旌節，詔以李嗣源爲招討使，李紹榮元即行爲部署，卽此事也。立乃繼韜之牙將，繼韜先已誅死，而此傳以爲繼韜，誤矣。明宗紀書同光二年五月，破楊立於潞州，卽指此事，但失書招討使一事耳。元行欽傳不云爲潞州行營都部署，則史之疏漏也。

馬全節傳

徙全節鎮昭義，又徙安國。案，舊史，天福七年六月，以昭義節度使馬全節爲邢州節度使，加同平章事。開運元年，除鄴都留守，加兼侍中。

開運二年，徙鎮順國。案，上文已有開運元年，則此開運二字當刪。贈中書令，五代會要，諡忠武。

皇甫遇傳

以功拜義成軍節度使。案，舊史，開運二年，加遇同平章事。通鑑，安審琦稱遇爲皇甫太師，蓋嘗加檢校。

太師也。

安彥威傳

晉高祖入立拜彥威北京留守徙鎮歸德。案彥威留守北京時已加平章事徙歸德加兼侍中出帝時。

加兼中書令。

劉景嚴傳

義兵亂殺漢章。延州軍亂殺其節度使楊漢章嘗書於唐廢帝紀。

又徙武勝。案五代會要景嚴在晉出帝朝使相之列考舊史本紀卻無加使相一節。

廿二史考異卷六十四

五代史四

盧文進傳

莊宗以屬其弟存矩。案唐家人傳無存矩名。

天福元年冬，殺其行軍司馬馮知兆，副使杜重貴送款於李昇。本紀在二年正月。

王周傳

漢高祖入立徙鎮武寧。案舊史漢天福十二年，加周同平章事。

高行周傳

出帝時代景延廣爲侍衛親軍都指揮使。案舊史晉少帝紀天福八年十二月，詔行周赴闕，開運元年

正月，爲北面行營都部署。四月，爲侍衛親軍都指揮使。二年，移鎮鄆州，侍衛如故。三年六月，復爲宋州

節度使。史失書赴闕充都部署及移鎮天平事。

是時李彥韜、馮玉等用事，乃求歸鎮。案通鑑開運三年，契丹南侵，以歸德節度使高行周爲北面都部

署武寧節度使，符彥卿副之，共戍滑州。德光入京師，行周、彥卿皆詣契丹牙帳降。明年，東方羣盜大起。

陷宋亳密三州。契丹主亟遣符彥卿等歸鎮。則行周之歸鎮。當亦在此時。本傳諱而不書。難以言直筆矣。

漢高祖入京師。加行周守中書令。案舊史晉少帝紀。天福七年。西都畱守襄州行營都部署高行周。兼侍中。則行周之爲使相已久矣。

徙鎮天平。封臨清王。案舊史本紀。天福十二年七月。以宋州節度使檢校太師兼中書令高行周爲鄴都畱守。加守太傅。閏月。杜重威據鄴都叛。詔以行周爲行營都部署。率兵進討。十一月。重威出降。加行周守太尉。封臨清王。乾祐元年。進封鄴王。二年。加守太師。三年三月。自鎮來朝。乃移鎮鄴州。歐史於此傳。旣失書徙鎮天雄及討杜重威事。又不載鄴王之封。又書徙天平於封臨清王之前。疏漏亦已甚矣。追封秦王。五代會要。諡武懿。

安叔千傳

拜昭武軍節度使。昭武當作振武。

歷靜難。橫海。安國。建雄四鎮。案上文云。唐明宗時。下文云。晉出帝時。則似所歷四鎮。皆在後唐之世矣。考舊史晉高祖天福四年以前。邠州節度使安叔千。爲滄州節度使。七年。爲邢州節度使。少帝開運元年。以邢州節度使安叔千。爲晉州節度使。加同平章事。然則叔千任靜難。橫海。滄。安國。邢。三鎮。實在

晉高祖朝。其鎮建雄。晉則在出帝朝。至開運二年八月。乃罷鎮爲金吾衛上將軍耳。傳所書殊未核也。舊史叔千傳云。晉祖踐祚。就加同平章事。據本紀。則加平章事。乃在少帝時。五代會要。晉高祖少帝。漢高祖。三朝使相。皆有叔千名。蓋據舊傳。恐當以本紀爲正。

馮暉傳

徙鎮靈武。代張希崇。

皇甫暉傳

以衛將軍居京師。唐以後不置衛將軍官。暉所授蓋金吾屯衛之類。史有闕文耳。

常思傳

徙鎮昭義。案舊史。漢乾祐元年。潞州節度使常思。加同平章事。周廣順元年。加兼侍中。

孫方諫傳

孫方諫。本名方簡。避周廟諱。改諫字。

鄭州清苑人也。鄭當作鄭。

漢高祖嘉之。卽拜方諫義武軍節度使。案舊史。漢乾祐二年十月。加方諫同平章事。周廣順元年正月。

加兼侍中。八月移鎮華州。顯德元年七月。爲同州節度使。加兼中書令。八月卒。

王峻傳

太祖入立拜峻右僕射同中書門下平章事。此真宰相也。例當書於本紀。失書。

折從阮傳

徙鎮武勝。案舊史周廣順元年鄧州折從阮加同平章事武勝鄧州軍額也。

周太祖入立從阮歷徙宣義保義靜難三鎮。宣義當作義成滑州軍額也。梁時避諱改爲宣義。後唐仍復舊名。晉漢周皆因之。從阮周之藩鎮不當用宣義之號。

朱守殷傳

守殷尤不自安。乃殺都指揮使馬彥超閉城反。案下文又云守殷之將反也。召都指揮使馬彥超與計事。彥超不從。守殷殺之。前後重出。

董璋傳

少與高季興孔循俱爲汴州富人。李讓家僮。梁太祖鎮宣武養讓爲子。是爲朱友讓。其僮奴以友讓故。皆得事梁太祖。此事又見南平世家及孔循傳。

使者還。多言璋欲反狀。重誨患之。乃稍擇將吏爲兩川刺史。以精兵爲其牙衛。分布其諸州。又分閬州置保寧軍。以仁矩爲節度使。遣姚洪將兵千人。從仁矩戍閬州。此事又見安重誨及李仁矩傳。

知詳遣人告璋，欲與俱謝過自歸。璋曰：「唐不殺孟公家族，於西川恩厚矣。我子孫何在，何謝之有？」璋由此疑知詳賣己。此事又見後蜀世家。

范延光傳

末帝復召延光爲樞密使。五代史稱潞王爲廢帝，惟此卷稱末帝。於延光及楊光遠傳兩見之。蓋沿舊史之文而未刊正也。五代會要稱梁均王爲少帝，唐潞王爲末帝，晉出帝爲少帝，宋史禮志亦稱梁少帝。後唐末帝而范質、羅彥瓌、符彥卿、侯益、張從恩、王景、楊承信、藥元福、李穀、竇貞固、邊歸範、竇儀傳皆稱晉少帝。李洪信傳又稱唐愍帝爲少帝。李洪信、郭進傳稱漢隱帝爲少帝。皆紀載異詞。

以太子太師致仕。案舊史長興二年九月加樞密使，范延光同平章事。四年九月加兼侍中。清泰二年加兼中書令史，皆失書。

安從進傳

高祖爲之幸鄴，鄭王重貴畱守京師，宰相和凝曰：「陛下且北，從進必反，何以制之？」高祖曰：「卿意奈何？」凝曰：「臣聞兵法先人者奪人，願爲空名宣敕十數通，授鄭王有急則命將以往。」此事又見和凝傳。

授李建崇、郭金海等。晉本紀作郭海金。降襄陽爲防禦。此事職方考失書。

楊光遠傳

封東平王。案薛史天福二年四月加兼侍中三年四月加兼中書令。

杜重威傳

高祖卽帝位封石氏爲公主。通鑑重威尙帝妹樂平長公主進封宋國長公主。

引兵攻秦州破滿城遂城。秦當作秦。字之譌也。五代會要後唐天成三年升奉化軍爲秦州以清苑縣爲理所晉開運二年移就滿城縣。周廣順二年廢州。歐史職方考失載此州而杜重威李守貞張彥澤諸傳竝譌秦爲秦莫能正矣。

李守貞傳

與重威等攻下秦州破滿城。秦當作秦。

張彥澤傳

敗契丹於秦州。秦當作秦。

德光渡河帝欲郊迎彥澤不聽遣白德光德光報曰天無二日豈有兩天子相見於道路邪。此語又見契丹附錄。

王景崇傳

永興趙贊。本名匡贊。延壽之子也。避宋諱。去上一字。

慕容彥超傳

漢高祖同產弟也。異姓而稱同產。當是同母異父弟。漢家人傳。不書漢祖父母事。

而彥超徙鎮秦寧。案通鑑。高行周以彥超在澶州。固辭鄴都。乃徙彥超爲天平節度使。加同平章事。至

乾祐三年三月。乃徙彥超秦寧。而以行周徙天平。詳史所載亦同史脫去徙鎮天平一節。其在鄴州加兼侍中。

周太祖卽位。加中書令。史皆失書。

是歲鎮星犯角亢。此廣順元年也。司天考不載此事。

馮道傳

道相明宗十餘年。案明宗在位纔八年。道以天成二年拜相。相明宗止七年耳。而傳云十餘年。非其實

矣。

其擊旻也。鄙道不以從行。以爲太祖山陵使。案道爲首相。依故事。當爲山陵使。且據本紀。山陵使之命。

在二月丁卯。而世宗親征。乃於三月乙酉啓行。則非因道之進諫。而有是命也。歐公惡道而甚其辭耳。

儒者好以成敗論人。若以當日時勢論之。則新造之邦。人情未固。加以大喪未葬。千里出師。一有敗衄。

國亦隨之。親征固危事也。此與宋澶淵之役。時勢迥殊。道言雖不驗。究爲老成練事之言。不可以人廢。

之。

李琪傳

乃得罷爲太子少保。案梁本紀琪以貞明六年四月拜相。無罷相事。蓋紀之漏也。

樞密使安重誨專權用事。重誨前驕過御史臺門。殿直馬延誤衝之。重誨卽臺門斬延而後奏。此事已

見重誨傳。

乃刻牙板爲金字。曰前鄉貢進士李琪。此稱前鄉貢進士。而不稱前進士。則是舉而未第者也。唐人之

重鄉舉如此。

劉昫傳

長興三年。拜中書侍郎。兼刑部尙書。同中書門下平章事。唐本紀在四年。

先是馮道與昫爲姻家。而同爲相。道罷。李愚代之。愚素惡道爲人。凡事有稽失者。必指以諠昫曰。此公親家翁所爲也。昫性少容恕。而愚特剛介。遂相詆詬。此事已見李愚傳。而此較詳。道與愚。昫三人拜相。皆在明宗朝。廢帝清泰元年五月。道先罷。其十月。愚。昫二人亦罷。道出鎮同州。以劉昫爲相。此傳又云道罷。李愚代之。既已互相矛盾。證之本紀。則兩人爲相已久。非道罷而始入相。此疎舛之甚者。

明宗崩。太常卿崔居儉。以故事當爲禮儀使。居儉辭以祖諱。馮道改居儉祕書監。此事亦見居儉傳。
予謂居儉祇有此事。不足別立傳。

開運中。拜司空。中書門下平章事。案晉本紀。昫拜相在開運元年。嘗云開運初。其罷相在契丹主入
汴之後。契丹主所命。故晉本紀不見其罷也。五代會要。開運二年六月。史館上新修前朝李氏書紀志
列傳。共二百二十卷。并目錄一卷。賜監修宰臣劉昫。修史官張昭遠。直館王申等。繪綵銀器各有差。歐
史於賈緯傳。載其與修唐書。昫以宰相監修。而本傳略不一見何也。

馬胤孫傳

清泰。廢帝年號也。年號人所共知。此語可省。

崔悅傳

八年。高祖詔太常復文武二舞。據本紀及五代會要。乃天福五年事。此云八年者。誤也。吳氏纂誤亦及

以悅傳
爲誤

趙瑩傳

華州華陰縣人也。縣字衍。

李崧傳

初漢高祖在晉掌親軍爲侍衛都指揮使與杜重威同制加平章事漢高祖恥之怒不肯謝晉高祖遣和凝諭之乃謝此事已見漢本紀

賈緯傳

唐自武宗已後無實錄史官之職廢緯采次傳聞爲唐年補錄六十五卷案舊唐書諸帝紀皆詳贍可據至懿宗以後疎舛脫漏由於無實錄也五代會要載長興二年十一月四日史館奏當館昨爲大已來迄於天祐四朝實錄尙未纂修尋具奏聞謹行購募敕命雖頒於數月圖書未貢於一編蓋以北土州城久罹兵火遂成滅絕難可訪求伏念江表列藩湖南與壤至於閩越方屬勳賢戈鋌自擾於中原屏翰悉全於外府固多奇士富有羣書其兩浙福建湖廣伏乞特降詔旨委各於本道採訪宣宗懿宗僖宗昭宗以上四朝野史及逐朝日厯除目銀臺事宜內外制詞百司沿革簿籍不限卷數據有者鈔錄進上若民間收得或隱士撰成卽令各列姓名請議爵賞從之以是知唐末文獻無徵已非一日非關史臣見聞之陋也

與修唐書案五代會要天福六年二月敕戶部侍郎張昭起居郎賈緯祕書少監趙熙吏部郎中鄭受

益左司員外郎李爲先等修撰唐史仍令宰臣趙瑩監修其年四月緯丁憂以呂琦爲戶部侍郎尹拙爲戶部員外郎令與張昭等同修唐史

漢隱帝時，詔與王仲寶、儼等同修晉高祖出帝、漢高祖實錄。五代會要：乾祐二年二月，敕左諫議大夫史館修撰賈緯、左拾遺直史館王仲宜、同修高祖實錄，仍令宰臣蘇逢吉監修。其年十月，修成實錄二十卷，上之。其年十二月，敕宜、令監修國史蘇逢吉、與史館賈緯、并寶儼、王伸等，修晉朝實錄呈進。周廣順元年七月，史館新修晉高祖實錄三十卷，少帝實錄二十卷，上之。然則漢祖實錄成於漢朝，惟晉二主實錄成於廣順初，傳似混而一之。

王仁裕傳

顯德三年卒。顯德上當有周字。

仁裕門生王溥、疑門生范質，皆至宰相。案和疑知貢舉，選范質事，已見本傳，何煩屢見邪。

趙延義傳

太祖召延義，問漢祚短促者，天數邪？延義言：王者撫天下，當以仁恩德澤，而漢法深酷，刑罰枉濫，天下稱冤，此其所以亡也。是時太祖方以兵圍蘇逢吉、劉銖第，欲誅其族，聞延義言，悚然，因貸其族，二家獲全。案宋史方技傳：周祖舉兵入汴，訪求王處訥，得之，問以劉氏祚短事，對曰：人君未得位，營務寬大，既得位，即思復讎。劉氏據中土，承正統，以厓數推之，其大祀猶永，第以高祖得位之後，多報讎殺人，及夷

人之族。結怨天下。所以運祚不長。周祖厥然太息。適發兵圍漢大臣蘇逢吉、劉銖等家。待旦將行擊戮。遽命止之。逢吉已自殺。止誅劉銖。餘悉全活。此卽一事。而傳聞異詞。或以爲延義。或以爲處訥耳。宋史載處訥語。尤中當日情事。通鑑考異亦以爲處訥。

廿二史考異卷六十五

五代史五

司天考一

在乎知天之變者也。天下當有人字。據五代會要增以其日損益率乘之。案日躔月離兩篇當有益縮分損益朏朧諸數。史皆失之。後世卽有劉義叟其人者亦無從布算矣。

義叟爲子求得其本經。然後朴之。麻大備。案義叟所得者步發斂一篇。歐公已載入矣。其日躔月離兩篇所言益縮二麻遲疾二百四十八限。乃推步之原。義叟旣盡見之。而此考仍闕而不言。殆歐公厭其繁重而刪棄之耳。歐公於推步一家。本未究心。其刊修唐史時。與義叟同局。天文麻志皆出義叟一手。此書司天考亦必出於義叟也。但義叟於唐書告成之後。旋卽物故。而五代史成書乃在其後十餘年。不及預參訂之役。遂致有不應刪而刪者。使大備之典終於不備。良可惜已。

司天考二

開平四年十二月庚午。月有食之。案前史不書月食。此書月有食之。與日食同文。似失小雅詩人之義。

同光三年六月丙寅歲犯右執法。當云歲星後倣此。

天成元年三月惡星入天庫。惡星當作客星。見唐家人傳。

天福五年十一月丁丑。日有食之。日當作月。

開運元年三月戊子。日有食之。日當作月。

顯德三年十二月癸酉。日有食之。此事不見於會要。據通鑑長曆。是月己未朔。癸酉乃十五日。亦月食。

非日食也。

職方考

西有岐蜀。案李茂貞不列世家而入雜傳。至職方考。仍以岐與閩蜀諸國竝舉。拓拔李氏。世有夏、綏、銀、宥、靜五州之地。與荆南高氏同。俱非五代所得而有也。旣不列諸世家。而職方考亦未殊而異之。皆義例之未畫一也。

北有燕晉。案梁初幽、涿、檀、薊、順、營、平、滄、景、德、瀛、莫諸州。爲劉守光所據。僭號稱燕。尋爲唐莊宗所併。表於幽滄諸州。但書唐而不書燕。與序文不相應。

而朱氏所有七十八州。案表所列梁有州八十一。此云七十八者。不數金虔詔也。究其實。則鎮、冀、深、趙、屬王鎔、易、定、屬王處直、夏、綏、銀、宥屬李仁福、靈、鹽屬韓遜。皆自擅其地。與吳越荆湖無異。然則朱氏所

有實六十餘州耳

其增置之州一。謂寰州。

又增置之州一。謂威州。

隱帝時增置之州一。謂解州。

又增置之州五。而廢者三。案周增置五州。謂濟、濱、雄、霸、通也。其所廢之州。本考祇有景威二州。據五代

會要。則有景、威、衍、武、泰五州。與此文俱不合。而表於威州下。又失注廢字。亦太不檢照矣。河北道之秦

州。歐考竟未一見。惟雜傳第四十卷內屢及之。

自湖南北十州為楚。案宋史地理志。建隆四年。平湖南得州一十五。謂潭、衡、邵、郴、道、永、全、岳、澧、朗、蔣、辰、

銅、溪、敘也。此以郴屬南漢。與宋志異。蔣、溪等州。以蠻地故略之。

自嶺南北四十七州為南漢。案宋史地理志。開寶四年。平廣南得州六十。以此考校之。所多者十四。湖

也。循也。襲也。恭也。思唐也。澄也。貴也。蠻也。九城志作蠻。唐書地理志亦作蠻。牢也。黨也。繡也。順也。監本宋史。誤作順。馬也。監本

誤作萬。案九城志。馬州領縣四。開寶五年。廢州省。振也。所少者一。郴也。湖。循皆嶺南名郡。不應略不及。巖石扶萊羅辯三縣入容州北流縣。即此州也。

之。明係史家絀漏。其餘十二州。或因開寶五年省併。故略而不言。然職方考所列。嚴、春、羅、潘、勤、瀧諸州。

亦開寶中省併。何以有書有不書也。郴州。唐時屬江南西道。五代為馬氏所有。馬氏滅而郴入於南漢。

宋志建隆四年平湖南得州一十五。郴居十五州之一。似誤。又考唐書地理志嶺南道爲州七十三。都護府一。五季安南都護府及管內十一州不在南漢封域之內。其餘六十二州皆南漢有也。職方考祇列四十有七。而郴州不在嶺南部內。化與辯本是一州。英雄二州又劉勳新置。實止四十三州耳。其四十二州皆唐志所有。惠州卽循州所分。南漢本名禎州。歐公避宋諱。依宋時州名名之也。又潮州之程鄉縣南漢嘗立爲敬州。宋志作恭州。避諱改。宋初改梅州。此亦考所應列而失之者也。唐嶺南道又有義州。宋初加南字。太平興國初改曰南儀。至熙寧四年始省入藤州。此亦南漢所有之州。而職方考及宋志皆失舉其名。又何也。嶺南但有東西兩道。此考稱嶺南北。殊非其實。

合中國所有二百六十八州。案表所列州凡二百八十有五。燕雲十六州入契丹。景州已廢。故云二百六十八。然威衍武三州。周末亦已廢省。實止二百六十五州耳。

而軍不在焉。案五代置軍六。晉置德清軍於頓邱。周置保順軍於無棣。漢陽軍於漢陽。雄勝軍於鳳州。固鎮。又廢景州爲定遠軍。威州爲通遠軍。

竟。周有罷。注云罷者謂罷節度使。降爲防禦州也。廣順二年慕容彥超初平。故廢此鎮。表於此類或云罷軍。或但注罷字。於例似未盡一。

青。晉有。有下當注罷軍二字。開運二年以楊光遠平。降爲防禦州也。漢天福十二年復舊。亦當於第

四格有字下增注復字。

金。梁有蜀。案下文云唐未置戎昭軍已而廢之遂入於蜀則梁代未有金州也此有字衍。

唐。梁有。案天祐三年朱全忠徙州治泌陽改名泌州此表有唐無泌蓋後唐滅梁之後復其舊耳當

於第一格有字下注泌州二字第二格有字下注改曰唐州四字晉初又改為泌州漢復舊名此第三

格有字下亦應注改曰泌州四字第四格有字下應注改曰唐州四字

耀。唐有復曰耀州改順義順義下當有尋罷軍三字。

衍。周有。五代會要顯德五年廢為定平鎮隸邠州此考失書。

威。周有改曰瓌州案顯德四年州廢為通遠軍此失注廢字。

武。周有。五代會要顯德五年廢為潘源縣隸渭州此考失書又案此表所列有兩武州一在關內一在河東兩

新州一在河東一在淮南兩通州一在淮南一在河南兩雄州一在河北一在河南兩劍州一在江南

貝。周有。此下當注罷軍二字五代會要顯德元年降為防禦州

鎮。晉有順德順德當作順國

定。梁有義成義成當作義武

滄。唐橫海案五代會要梁乾化二年三月改為順化軍以張萬進歸順故也此事史亦失書

漢。漢當作莫。

福。閩武。武威當作威武。今福州有唐天祐三年王審知德政碑。正作威武軍節度。

朗。楚平武。武平當作永順。案。楚世家。馬殷請升朗州為永順軍。表張佶節度使。是梁時朗州為永順軍也。周廣順三年。劉言請移治所於武陵。乃升朗州為武平軍。然則武平二字。當注於第五格周行逢之下。

廣。南漢。當注清海二字。

化。南漢。案。唐嶺南道無化州。元豐九域志。化州。唐辯州。皇朝太平興國五年改。是南漢之世未有化州也。此考既有辯又有化。乃重複舛謬之甚者。

惠。南漢。案。南漢析循州置禎州。宋天禧五年。避仁宗諱。改惠州。歐史於廟諱多不回避。如崔垂休。馬慶先。皆世書其名而缺末一筆。蓋取古人臨文不諱之義。而此州名獨追避宋諱。失紀實之體矣。且又有惠而無循。亦為脫漏。

曹州。故屬宣武軍節度。案。唐時曹州在太平軍節度管內。非宣武軍也。

梁破趙匡疑。分鄧州置宣化軍。五代會要。開平三年。升鄧州為宣化軍。割泌隨復郢四州隸之。

耀州。本華原縣。唐末屬李茂貞。建為耀州。案。唐志。京兆華原縣。天祐三年。李茂貞墨制以縣置耀州。

耀州。本華原縣。唐末屬李茂貞。建為耀州。案。唐志。京兆華原縣。天祐三年。李茂貞墨制以縣置耀州。

耀州。本華原縣。唐末屬李茂貞。建為耀州。案。唐志。京兆華原縣。天祐三年。李茂貞墨制以縣置耀州。

耀州。本華原縣。唐末屬李茂貞。建為耀州。案。唐志。京兆華原縣。天祐三年。李茂貞墨制以縣置耀州。

耀州。本華原縣。唐末屬李茂貞。建為耀州。案。唐志。京兆華原縣。天祐三年。李茂貞墨制以縣置耀州。

耀州。本華原縣。唐末屬李茂貞。建為耀州。案。唐志。京兆華原縣。天祐三年。李茂貞墨制以縣置耀州。

後唐復耀州。改曰順義。案五代會要同光二年三月降爲團練州。至周顯德二年降爲刺史州。蓋自華溫琪徙鎮之後。順義軍卽廢。史不書尋廢者。漏也。

魏州。後唐建鄴都。晉漢因之。案本紀同光元年以魏州爲東京。三年改東京爲鄴都。此失書升東京一節。

鎮州。唐復曰成德。案本紀同光元年嘗以鎮州爲北都。此亦失書。

晉又改曰順德。漢復曰成德。案通鑑天福七年正月改鎮州爲恆州。成德軍爲順國軍。五代會要亦云。

順國軍。此稱順德者。誤也。鎮州。晉時嘗更名恆州。漢初復爲鎮州。史皆失書。

并州。後唐建北都。案本紀同光元年四月以太原爲西京。十一月以太原爲北都。此失書升西京一節。

潞州。唐滅梁。改曰安義。晉復曰昭義。案五代會要潞州。唐同光元年爲安義軍。長興元年三月復舊名。

昭義。是昭義之更名。不始於晉也。

福州曰武威。武威當作威武。

乾州。李茂貞置。治奉先縣。奉先當作奉天。唐志京兆奉天縣。乾陵在北五里。乾寧二年以縣置乾州。蓋

州以乾陵得名。非同州之奉先縣也。

磁州。梁改曰惠州。案唐志天祐三年以磁茲聲一更名。其時梁未受禪也。

雄州周顯德六年克瓦橋關置治歸義歸義縣本屬涿州

霸州周顯德六年克益津關置治永清永清縣本屬幽州

筠州南唐李景置割洪州之高安上高萬載清江四縣為屬案唐志洪州但有高安縣餘三縣未詳何時置文獻通考南唐以洪州高安置筠州仍置上高萬載清江三縣隸之是三縣亦置於南唐也徐鉉

重修三清觀記保大庚戌歲詔復高安縣為筠州析其北鄙為清江縣

劍州南唐李景置割建州之延平劍浦富沙三縣為屬案唐志建州無此三縣文獻通考閩以建州永

平鎮置鐔州及龍津縣後州廢南唐改延平鎮俄置為劍州以汀州之沙縣福州之尤溪來屬與此考異

全州楚王馬希範置以潭州之湘川縣為清湘縣又割灌陽縣為屬而治清湘案唐志潭州領縣六有

湘潭湘鄉而無湘川亦未審何時置且潭與全相距頗遠或即永州之湘源乎文獻通考言以永灌陽州湘源縣置全州

本屬永州

雄州南漢劉龔割韶州之保昌置案唐志韶州屬縣有瀆昌無保昌未審何時更名

雍丘晉改曰杞晉高祖父名紹雍故改之

葉襄城故屬許州唐割隸汝州案五代會要後唐同光二年租庸使奏二縣原屬汝州今隸許州伏緣

最近京畿戶口全少。伏乞卻割隸汝州。從之。考唐志。葉襄城二縣。本隸汝州。其云今隸許州者。當是唐末或梁所改也。

美原。故屬同州。案唐志。美原屬京兆府。不屬同州。

平涼。故屬涇州。涇州當作原州。

安陵。故屬景州。周割隸德州。案唐志。德州安陵縣。景福元年隸景州。尋復來屬。是唐末安陵隸德州。不知何時又改隸景州也。

福州。閩清。案福州有福唐縣。梁開平二年。改爲永昌。唐同光二年。復爲福唐。晉改爲福清。此亦當見於考。而史失之。

汶川。故屬沔州。案唐初置沔州。治漢陽縣。以汶川爲屬。寶曆二年。省入鄂州。故唐志無沔州之目。且上文云漢陽。故屬鄂州。可證五代亦未立沔州矣。此沔字必鄂之譌也。

洛南。故屬華州。周割隸商州。案唐志。洛南本屬商州。不知何時改隸華州。

秦州。天水。隴城。唐末廢。案唐志。秦州領縣六。有隴城。無天水。

自唐有方鎮。而史官不錄於地理之書。此所云史官不錄者。謂劉昫舊唐書也。新史撰方鎮表。於諸鎮所領州。獨詳言之。蓋矯劉史之失也。宋時節度不領它州。雖有節鎮之名。實與諸州等耳。



廿二史考異卷六十六

五代史六

吳世家

刺史鄭榮。榮當作繁。

二年取滁和州。上文有龍紀元年。則此當爲龍紀之二年。然龍紀改元之明年正月。卽改元大順。不得有二年也。以唐書昭宗紀及行密傳證之。當云大順二年。史脫兩字耳。

友寧。梁太祖子也。友寧乃梁祖兄子。蓋脫兄字。

天復二年。錢鏐爲其將許再思等叛而圍之。上文已敘天復二年三年事。此因田頵之誅。追述頵覺端。故再舉天復二年。然亦史家失於回避之病也。

瑾已殺知訓。攜其首馳府中示隆演曰。今日爲吳除患矣。隆演曰。此事非吾敢知。遽起入內。瑾忿然以首擊柱。提劍而出。府門已闔。踰垣折其足。遂自刎死。此事已見朱瑾傳。宜去此存彼。

南唐世家

以彥能爲撫州節度使。案南唐節鎮。見於五代史通鑑。馬令陸游書。及徐鉉騎省集者。有潤州節度使。

號鎮揚州節度使武軍。號建廬州節度使勝軍。號德壽州節度使淮清。泗州節度使號靜。濠州節度使遠軍。鄂州

節度使昌武。宣州節度使號寧。洪州節度使南軍。江州節度使號奉。池州節度使號康。饒州節度使號安

化撫州節度使武軍。號昭虔州節度使勝軍。建州節度使義軍。泉州節度使號清。潤鄂宣洪皆沿唐時節鎮

舊額。餘皆楊氏李氏所置。又有舒州節度使。其軍額不可考。偶憶徐鉉撰撫州節度使馬希崇除舒州

節度使制。有永泰全軍。舒庸舊國之語。疑永泰即其軍號也。又林仁肇嘗為寧化軍節度副使。見南昌府龍興

寺洞鐘題款。此軍未審當於何所。

以知詢為右統軍。吳世家作左統軍。

始改名景。以避周廟諱。周太祖之高祖父名璟。故去旁以避之。

濠州刺史郭廷謂。周本紀作濠州團練使。

燕王冀為太子。本名宏冀。避宋諱。省上一字。

太祖皇帝之出師南征也。煜遣其臣徐鉉朝於京師。案五代之臣。卒於宋初者。歐史皆不立傳。諸傳亦

無及。宋初事者。唯南唐後蜀南漢東漢吳越諸世家。皆敘入宋以後事。蓋欲其首尾完備。故不拘限斷

之例。然如宋祖答徐鉉之語。初無關於李氏之興廢。自當於宋史見之。且父子一家。即當同其憂樂。虧

子以益父。於心豈安。此特一時強詞。何足服李煜君臣之心。不若臥榻鼾睡之言簡而當也。

子讀周世宗征淮詔。怪其區區攬撫前事。務較曲直以爲辭。何其小也。案景德建康志。載宋太祖詔諭。敕榜文亦皆攬撫細故。以爲兵端。蓋詞臣代言之體。自當爾爾。歐公豈未見此敕耶。

前蜀世家

行至興元。逐節度使牛勣。田令孜傳作牛頊。頊與勣同音。舊唐書紀作牛蔚。

唐以建爲檢校司徒成都尹。劍南西川節度副大使。知節度事。管內觀察處置雲南八國招撫等使。此

承舊史之文。以本書之例言之。但當云檢校司徒。西川節度使也。

黔南節度使王肇。本名建肇。避蜀主諱。止稱肇。

以剡王爲鳳翔節度使。剡。當作郟。唐史避武宗諱。改郟爲單。所謂覃王嗣周也。

彥暉將顧彥瑤。案唐書顧彥暉傳。瑤爲彥暉養子。且單名瑤。無彥字。

武定節度使拓拔思敬。此與李仁福傳之思敬非一人。

天復四年。唐遷都洛陽。改元天祐。建與唐隔絕而不知。故仍稱天復。案李彥威傳。昭宗改元天祐。遷於

東。都爲梁所迫。而晉人蜀人。以爲天祐之號。非唐所建。不復稱之。但稱天復。與此所云異。蓋世家誤也。

唐襲爲樞密使。通鑑作唐道襲。其官名內樞密使。蓋沿唐之名。但不用宦者耳。歐史去內字。而下文又

有內樞密使毛文錫。

莊見素之後。顧張思曰。五代世家。以韋莊爲見素之孫。唐宰相世系表。韋莊爲待價之後。出道遙公房。見素則出南皮公房。初非同系。二書皆出歐公之手。而矛盾若此。

開崇賢府置官屬。通鑑作崇勳府。

後蜀世家。

邢州龍岡人也。案。知祥爲孟遷之兄子。孟方立傳。稱邢州平鄉人。此云龍岡人。縣名互異。

前此爲中門使者。多以罪誅。知祥懼。求它職。莊宗命知祥薦可代己者。知祥因薦郭崇韜自代。此事已

見崇韜傳。

莊宗建號以太原爲北京。唐本紀。職方考。皆作北都。

是月應聖節。五代會要。明宗九月九日生。以其日爲應聖節。

明日遂舉兵反。據此則知祥以九月十日反。而唐本紀以爲十月反。與此不合。

二年正月。李仁罕克遂州。夏魯奇死之。案明宗紀。及魯奇傳。俱云董璋陷遂州。而璋傳及此世家。俱以

爲知祥所陷。又明宗紀及璋傳。俱云九月陷遂州。此乃云正月。其互相乖角如此。

行成都尹劍南東西兩川節度。管內觀察處置。統押近界諸蠻。兼西山八國雲南安撫制置等使。當云

東西兩川節度使。

三月唐潞王舉兵於鳳翔。唐本紀在二月。

明德三年三月熒惑犯積尸。案司天考天福元年三月壬子熒惑犯積尸。卽蜀明德三年也。

劉光乂曹彬等出歸州。宋史太祖紀作劉光義。此作光乂者。避宋太宗諱也。宋史或作光毅。

是時劉鈞尙在。東漢世家作承鈞。

注蓋自同光二年乙酉。二年當作三年。

惟舊五代史云同光三年丙戌。至乾德三年乙丑。四十年者。謬也。案同光四年歲在丙戌。卽天成年。此云

三年者。誤也。據世家知祥本以同光四年正月至成都。至乾德乙丑。恰合四十年之數。則舊史云四十

年。非謬矣。

南漢世家。

父謙爲廣州牙將。唐書作知謙。

是時交州曲顥。案通鑑唐天祐三年。加靜海節度使。曲承裕。同平章事。梁開平元年。承裕卒。以其子顥

爲節度使。其後顥子承美。五代會要作曲美。復嗣爲節度。曲氏據交州凡三世。據黎尉安南志略。曲氏祇有顥。

承美二世。未知通鑑采自何書。

邕州葉廣略。容州龐巨昭。通鑑唐天祐三年。以權知寧遠留後龐巨昭。嶺南西道葉廣略。竝爲節度使。

寧遠者容州軍號也。五代會要廣略巨昭二人。梁太祖末帝朝。皆在使相之列。

昌岌卒。弟昌濬立。案下文無昌濬事。惟於劉鋹大寶八年。書交州吳昌文卒。通鑑後周顯德元年昌岌

卒。弟昌文立。宋史交趾傳亦云昌岌死。其弟昌文襲位。則昌濬與昌文似是一人。今據黎賻安南志略

云。吳權本楊廷藝牙將。矯公羨殺廷藝而代之。權起愛州兵殺公羨。權卒。子昌岌立。昌岌卒。弟昌濬立。

昌濬卒。弟昌文立。凡四世而爲丁部領所代。則昌文實昌濬之弟。相繼嗣立。授受分明。崩生長安南。距

宋初未遠。所言必得其實。較之正史爲可信也。

顯德三年。世宗平江北。案世家例書其本國之紀年。此獨書顯德。又不繫以周字。皆史之疏也。

大寶五年。鋹以宦者李托養女爲貴妃。專寵。托爲內太師。案韶州乳源縣雲門山匡聖宏明大師碑。大

寶七年建。其文云。列聖宮使。甘泉宮使。翫華宮使。開府儀同三司。行內侍監。上柱國李托。不見有內太

師之名。

七年。案雲門山碑。稱鋹尊號曰睿聖文武隆德高明宏道大光孝皇帝碑。立於大寶七年四月。則鋹上

尊號。當在七年以前矣。歐史諸世家。惟楊溥。王建。王衍。劉晟。劉昉五人。書所上尊號。餘皆無之。

楚世家。

楊行密。袁州刺史。呂師周來奔。據通鑑。師周之奔。在梁開平元年。其時楊渥已嗣位。不當言行密也。

太祖拜殷天册上將軍。案銅柱記作天策策與册同。

拓拔常爲僕射。通鑑作拓拔恆。史作常。避眞宗諱。

溪州刺史彭士然。然。當作愁。字之譌也。李宏皋銅柱記。宋史蠻夷傳。皆作士愁。

遺其子師嵩。銅柱記作師杲。

希範乃立銅柱爲表。命學士李皋銘之。銅柱記作李宏皋。史避宋諱。去上一字。考劉勅攻溪州。在天福

四年九月。士愁乞降立誓。在五年正月。其五月。命宏皋撰銘。七月。鑄銅柱成。八月。鐫文於柱。十二月。立

之。柱高一丈二尺。重五千斤。

希範卒。年四十九。諡曰文昭。五代會要。希範官至守尙書令。贈太師。

希廣立。希廣先爲武安軍節度副使。判內外諸司事。永州團練使。見銅柱記。

景封希萼。楚王。居洪州。案。景定建康志。周廣順二年。即南唐保大十年。唐江西觀察使楚王馬希萼入朝。唐主

留之。後數年卒於金陵。諡曰孝恭。

希崇領舒州節度使。居揚州。以徐鉉集考之。希崇歸唐。先授撫州節度使。後乃改除舒州也。

王進達。武陵人也。通鑑作王達。

與行軍司馬何景眞等。通鑑作敬眞。此作景。疑亦避廟諱。

夫人嚴氏諫曰。通鑑作鄧氏。胡三省云。路振九國志作嚴氏。

吳越世家。

石鑑鎮將董昌。唐書作石鏡。此避宋廟諱改。

鏐具軍禮。郊迎館寶於樟亭。寶病卒。唐書僖宗紀。周寶傳。俱云鏐殺之。與此異。

及其將馬綽。案通鑑注引路振九國志云。馬綽。餘杭人。少與錢鏐俱事董昌。以女弟妻鏐。鏐復爲元瓘

娶綽女。又引薛史。梁貞明四年。秦州節度使檢校太傅。同平章事馬綽。加檢校太尉。考秦州不在吳越

管內。蓋遙授也。

元瓘立。襲封吳越國王。案吳越文穆王神道碑和凝撰。題云。天下兵馬都元帥。守尚書令。歐史失書。

子佐立。本名宏佐。避宋諱。止稱下一字。侖俶皆放此。

閩世家。

唐以福州爲武威軍。當作威武軍。下文云。李景以李仁達爲威武軍節度使。可證也。

閩人以爲審知德政所致。舊唐書哀帝紀。天祐三年閏十二月己酉朔。福建百姓僧道。詣闕請爲節度

使。王審知立德政碑。此其事也。

後興事敗。亦被殺。案通鑑。林興詐覺。流泉州。在昶通文四年六月。其年閏七月。曦立遣使誅興於泉州。

世家以爲昶所殺誤也。

代以季弟繼鏞。通鑑作繼鎔。

延義令其子繼業。案通鑑繼業爲延義之兄子。故稱新君叔父也。世家脫兄字。

改元永隆。案福州有崇妙保聖堅牢塔。永隆中建。其記稱曦尊號曰睿明文廣武聖光德隆道大孝皇

帝。世家失書。

程贇守漳州。通鑑作程文緯。

南平世家。

追封季興楚王。諡曰武信。季興諡武信。上文已見。此重出。

東漢世家。

潞州李筠遣穆令鈞。通鑑作令均。

顯德元年。世案例書本國之紀年。此不書乾祐而書顯德。亦與例不合。

明年十一月卒。案年譜旻卒而承鈞立。卽於顯德元年。而此云明年者。蓋據五代舊史。周世宗實錄。連

麻圖諸書。謂旻卒於二年冬。二文自相矛盾。考遼史。穆宗應麻五年十一月乙未朔。漢主崇殂。卽顯德

二年也。則當以世家爲正。通鑑書旻殂於顯德元年十一月。蓋承歐史年譜之誤。

承鈞立十三年病卒。案宋史承鈞卒於開寶元年戊辰。此云立十三年者。蓋據世家。承鈞以周顯德二年乙卯冬嗣位。其次年丙辰爲卽位之始年。至戊辰恰十三年也。然則年譜云。旻卒於顯德元年者。未足信矣。李暉天龍寺碑。稱承鈞爲睿宗皇帝。史失書。

生子繼元。案天龍寺碑云。今英武皇帝天會中出閣。授檢校司徒歸義府都督罷解公府。特恩加檢校太保。右金吾衛大將軍。充大內都點檢。此繼元在承鈞之世所授官也。又云。□□皇帝踐祚。加檢校太師行太原尹。尋領侍衛親軍事。則在繼恩之世矣。

無爲迎繼元而立之。案天龍寺碑云。值倉卒之變。震駭非常。上獨執雄斷。入平內難。時戊辰秋九月。嗣昇宸極。蓋繼元以天會十二年嗣位。卽宋開寶元年也。

遣嬖者范超圖殺郭氏。案天龍寺碑。稱宣徽北院使。永清軍節度使。檢校太保范超。蓋超自是遂任用矣。

繼元立。改元日廣運。案天龍寺碑後。題廣運二年歲在乙亥。而其文云。上御宇之八年乙亥歲。於正殿

受册英武皇帝。則是繼元卽位之始。猶承天會之號。至七年而改元也。楊夢申撰劉繼顯神道碑云。天會十七年。繼顯卒。未題廣運元也。又考遼史。景宗保寧五年十二月。漢將改元。遣使稟命。其年歲在癸酉。年歲次甲戌。與天龍寺碑正合。又考遼史。景宗保寧五年十二月。漢將改元。遣使稟命。其年歲在癸酉。則廣運改元在甲戌歲。正史有明徵矣。契丹册繼元爲英武皇帝。亦見天龍寺碑。而史失書。

十國世家年譜

獨得其封落星石爲寶石山制書。稱寶正六年辛卯。則知其嘗改元矣。洪邁容齋四筆云。王順伯收碑。有臨安府石屋崇化寺尊勝幢云。時天寶四年。歲次辛未四月某日。元帥府府庫使王某。又明慶寺白傘蓋陀羅尼幢云。吳越國女弟子吳氏十五娘建。天寶五年太歲壬申月日題。順伯考其歲年。知非唐天寶。而辛未乃梁開平五年。其五月改乾化。梁以丁卯篡唐。武肅是歲猶用唐天祐。次年自建元也。錢唐湖廣潤龍王廟碑云。錢鏐貞明二年丙子正月建。新功臣壇院碑。封睦州壩下神廟敕。皆貞明中登聖寺磨崖。梁龍德元年。歲次辛巳。錢鏐建。又有龍德三年上宮詩。是歲梁亡。九里松觀音尊勝幢云。寶大二年。歲次乙酉建。衢州司馬墓誌云。寶大二年八月歿。順伯案。乙酉乃唐莊宗同光三年。其元年當在甲申。蓋自王申以後。用梁紀元。至後唐革命。復自立正朔也。又水月寺幢云。寶正元年丙戌十月。具位錢鏐建。招賢寺幢云。丁亥寶正二年。又小昭慶金牛碼頭等九幢。皆二年至五年所刻。貢院前橋柱。刻寶正六年歲在辛卯造。然則寶大止二年。而改寶正。寶正盡六年。次年壬辰。有天竺日觀菴經幢。復稱長興三年八月用唐正朔。其年三月。武肅薨。子元瓘以遺命去國儀。用藩鎮法。然則吳越有天寶。寶大。寶正三名。歐陽公但知其一耳。予謂容齋據王順伯說。考定吳越三改元。既精審矣。其云丁卯歲。猶用天祐號。則未然。考越州崇福侯廟記。題開平二年。則其時武肅亦用開平之號。而卽於是年自建元也。寶正

之號。嘗盡於七年。至三月以後。文穆嗣立。乃去寶正號而稱長興耳。

四夷附錄一

契丹。以其所居橫帳地名爲姓。曰世里。世里譯者謂之耶律。案耶律亦作移刺。譯音之轉也。世與耶聲不相近。疑當爲也字也。里與耶律正相轉。

名年曰天贊。案遼史太祖初建元神冊。盡六年。乃改天贊。

立其次子元帥太子耀屈之。遼史作堯骨。

德光立三年。改元曰天顯。據遼史太祖改元天顯。其年崩。而德光嗣之。卽承天顯之號。此云立三年改元者。誤也。

於鹽溝置良鄉縣。後唐置良鄉三河兩縣。職方考失書。

吾命大相溫從爾渡河。相溫卽詳穩也。

德光遣中書令韓頰奉册高祖爲英武明義皇帝。據遼史是時册使乃中臺省右相耶律述蘭迭烈哥。

及節度使趙思溫也。與此互異。

德光將高車翰亦詐以瀛州降。遼史作模翰。模牟聲相轉。

謚德光爲嗣聖皇帝。案遼史太宗卽位卽上尊號曰嗣聖皇帝。非謚也。

四夷附錄二

麻荅者。德光之從弟也。德光滅晉。以爲邢州節度使。兀欲立。命守鎮州。宋白曰。麻荅本名解里。阿保機之從子也。其父曰撒刺。歸梁。死於汴。見通鑑注予考遼史無麻荅傳。而有耶律解里傳。然解里世爲小吏。則非德光從弟。且亦無鎮邢州守鎮州事。惟耶律拔里得傳。稱太祖弟刺葛之子。太宗入汴。以功授安國軍節度使。總領河北道事。師遼。州郡往往叛。以應劉知遠。拔里得不能守而歸。世宗卽位。遷中京留守。卒。安國軍卽邢州。中京卽鎮州。則麻荅卽遼史之拔里得。與解里初非一人矣。遼史皇子表。刺葛神册二年南奔。爲人所殺。薛史亦云。麻荅父薩刺阿保機。時自蕃中奔唐莊宗。尋奔梁。莊宗平梁。獲之。磔於市。與宋白說略同。但一云撒刺。一云薩刺。一云刺葛。其名小異耳。撒薩聲相近。

燕王述輒與太寧王嘔里僧等。率兵殺兀欲於大神淀。案遼史。弑世宗者。泰寧王察割也。述輒與察割聲相近。泰寧王卽察割之封號。其時封燕王者爲牒蠟。亦以黨逆伏誅。無名嘔里僧者。考之逆臣傳。其時有六院大王耶律朗。字歐新。以持兩端伏誅。當卽此所云嘔里僧也。嘔里僧通鑑作瀛僧。皆歐新之轉。兩史所述。封爵互異。蓋五代史得於傳聞。不如遼史之可據也。大神通鑑作火神。胡三省引宋白云。火神淀在新州西。遼史世宗紀。次歸化州祥古山。遇弑。歸化州卽唐之武州。去新州不遠也。遼改新州爲奉聖州。

遼之上京。亦有大神淀。與此非一地。

德光子濟王述律。案遼史述律封壽安王。無封濟王之文。

嶠與部曲東之福州。福州翰所治也。遼史地理志。上京道有福州。國舅蕭寧建。南征俘掠漢民。居北安

平縣。故地西北。至上京七百八十里。

東行過一山。名十三山。遼史地理志。東京道顯州有十三山。

過衛州。有居人三千餘家。乃契丹所虜中國人。築城而居之。案遼史地理志。未見衛州之名。上京道有

渭州。中京道有惠州。音皆相近。

四夷附錄三。

奚。常採北山麝香仁參。仁參。卽人參。

達靺。咸通中。從朱邪赤心討龐勛。其後李國昌。克用父子。國昌。卽赤心賜名也。此文似誤。以爲二人。

吐蕃。自梁太祖時。嘗以靈武節度使兼領河西節度。案韓遜傳云。唐莊宗時。以洮兼河西節度。與此

不合。

南詔蠻。遣大鬼主。傅能何華來朝貢。五代會要。作傅能阿花。

又以大渡河南山前印州六姓。印。當作印。

占城。遣使者。莆訶散來貢。五代會要。作莆阿散。

廿二史考異卷六十七

宋史一

太祖紀

建隆元年正月，江寧軍節度使高懷德爲義成軍節度使。江寧，長編作寧江，蓋夔州軍額也。宋時節鎮

無江寧軍當從長編。下文張光裕爲江寧軍節度使，乾德二年，江寧軍節度使劉光義，皆寧江之誤。高懷德

德劉廷讓二傳誤與此同廷讓即光義也

五月，遣昭化軍節度使慕容延釗、彰德軍節度使王全斌會討李筠。案長編，延釗時爲鎮寧軍節度使，

全斌時爲彰德軍留後，紀所書皆誤也。延釗傳亦稱鎮寧軍節度使，鎮寧、澶州軍號也，故傳有詔還澶

州之語。全斌傳稱相州留後，彰德、相州軍號也，與長編俱合。

以樞密使吳廷祚留守上都。宰輔表作東都留守。地理志，化都亦無上都之名。獨本紀上都留守字凡

三見。

乾德五年正月，王全斌責崇義軍節度使崔彥進，昭化軍節度使。案節度使非責授官，據全斌傳，二

人皆責授節度觀察留後，故制詞云：「止停旄鉞，猶委藩宣也。」長編同唐時方鎮各擅其地，未奉朝命者，往

往自稱留後。權勢與使無異。宋初除藩鎮專擅之弊。留後與使品秩攸殊。全斌二人由節度降授留後。紀仍書節度使。誤之甚矣。

開寶元年八月。命昭化軍節度使李繼勳等征北漢。案繼勳傳。作昭義軍節度使。長編亦同昭義者。潞州軍

號。澤潞與北漢接境。故命為前軍都部署。紀作昭化者。誤。

十一月。上尊號曰應天廣運大聖神武明道至德仁孝皇帝。長編無仁孝二字。又以大聖為聖文。未詳孰是。

孰是。

五年正月。前盧縣尉鄆陵許永年七十有五。自言父瓊。年九十九。兩兄皆八十餘。案長編云。長兄年八十。非皆八十餘也。隱逸傳與長編同紀。誤。乞一官以便養。因召瓊厚賜之。授永鄆陵令。此事又見隱逸傳。唯彼云授鄆城

令。與紀異。長編亦作鄆陵。蓋授本縣令。以便養耳。此當以紀為正。

八年正月。御長春殿。謂宰相曰。朕觀為臣者。比多不能有終。豈忠孝薄而無以享厚福邪。宰相居正等頓

首謝。此語又見薛居正傳。而彼較詳。彼乃君臣交儆之詞。此則專責臣下。當刪此存彼。

十月。改潤州鎮江軍節度為鎮海軍節度。案唐時潤州置鎮海軍節度。至是改軍額為鎮江。非本名鎮

江。而改為鎮海也。長編本云。改鎮海軍為鎮江軍。紀誤。

大中祥符元年。加上尊諡曰啓運立極英武睿文神德聖功至明大孝皇帝。案此十六字。乃祥符五年

大中祥符元年。加上尊諡曰啓運立極英武睿文神德聖功至明大孝皇帝。案此十六字。乃祥符五年

再加之諡。若元年所上。則啓運立極英武聖文神德元功大孝十四字也。史誤。

太宗紀。

太宗神功聖德文武皇帝。案宋諸帝諡皆十六字。獨太宗紀首止六字。而篇末亦無增加尊諡之文。此史家脫漏也。考東都事略云。大中祥符元年。加諡至仁應運神功聖德文武大明廣孝皇帝。五年。再加諡曰至仁應運神功聖德文武睿烈大明廣孝皇帝。禮志亦載兩次加諡。惟以再加係於天禧元年。似與王偁說異。然真宗紀於祥符五年亦書加太廟六室尊諡。蓋加諡在祥符。而上冊在天禧耳。紀皆缺而不書。

太平興國三年五月。李飛雄矯制。乘驛至清水縣。縛都巡檢周承璿。及劉文裕。馬知節等七人。將劫守卒。據城爲叛。文裕覺其詐。禽縛飛雄。案之。盡得其狀。詔誅飛雄及其父母妻子同產。案知節傳。不及被縛事。據李氏長編。引知節傳。有知節先辨飛雄之詐。因語文裕云云。則舊史固有之。元人刊修。偶遺漏耳。

七月。右千牛衛上將軍李煜卒。案太祖紀。孟昶書墓。此紀李煜。劉鋹。劉繼元皆書卒。昶官中書令。在使相之列故也。

四年正月。置簽署樞密院事。以石熙載爲之。案太祖紀。樞密使除授皆書。副使則不書。如建隆元年八

月除趙普。三年十月除李處耘。乾德二年正月除王仁贍。五年二月除沈義倫。開寶六年九月除楚昭輔。紀皆無之。至是始立簽署之名。以熙載爲之。未幾眞授副使。自後樞副知院同知簽署除授。本紀皆書之。獨英宗紀不書。它紀間有不書者。史脫文也。

五年七月討交州黎桓。命蘭州團練使孫全興。八作使張濬。左監門衛將軍崔亮。寧州刺史劉澄。軍器庫副使賈湜。閣門祇候王僕。並爲部署。全興濬亮由邕州。澄湜僕由廉州。案長編是時充邕州路都部署。尚有鞍轡庫使陳欽祚一人。張濬交趾傳作張璿。長編作張守璿。

六年三月交州行營破賊于白藤江口。知邕州侯仁貴討之。仁貴當作仁寶。詔斬劉澄。賈湜於軍中。案交趾傳上遣使就勅澄。湜僕澄尋病死。戮湜等邕州市。與紀不同。考長編稱王僕病死。澄與湜竝戮於邕州市。則傳誤也。

九月辛亥。以趙普爲司徒。此普再入相。除司徒兼侍中。侍中爲眞宰相。故得入政府視事。司徒三公之官。非宰相也。紀書司徒。不書侍中。蓋未通於官制矣。宋初宰相官至侍中。則不復稱平章事。端拱元年。趙普三入相。以太保兼侍中。加同中書門下平章事。自後雖侍中而不加平章事。祇爲使相。非眞相矣。雍熙三年三月。武寧軍節度使。同平章事岐國公陳洪進卒。案石守信以使相書薨。陳洪進。潘美亦使相。而書卒。眞宗紀。張玄德書薨。石保吉。魏咸信書卒。均爲使相。而書法各異。此義例之可議也。

淳化元年三月丙子朔。此無事而書朔。蓋衍文。

乙未。幸西京留守趙普第視疾。是歲正月戊子。普罷相。以太保兼中書令。充西京留守。紀屢書視疾。而

於罷相一節。則反失之。

✓真宗紀。

至道三年五月。以鎮安軍節度使李繼隆。同平章事。此使相非真宰相。當云加某官某人同平章事。方

與真相有別。

六月。以工部侍郎同知樞密院事錢若水。爲集賢院學士。此罷樞密而除學士。當有罷免字。本紀中此

類甚多。略舉一條。以見拜罷書法之不分也。集賢院宰輔表。作祕書院。

大中祥符七年三月。制加宰相王旦。向敏中。楚王元佐。相王元偃。舒王元僊。榮王元儼。樞密使。同平章事。

案。旦與敏中。除平章事已久。又未嘗兼樞密使。諸王例無授樞密使者。此文必有譌舛。長編亦無此事。

八年七月。王嗣宗爲大將軍節度使。宰輔表及宰輔編年錄。竝作天平軍。長編亦作大同。

九年九月丙午。陳彭年。王曾。張知白。竝參知政事。案宰輔表。祇有曾知白。不及彭年。表之漏也。

八月丙戌。以陳堯叟爲右僕射。編年錄。作甲申。

天禧元年四月。陳堯叟卒。案太宗紀。石熙載以前樞密使官僕射。書堯叟亦前樞使。且加平章事。官

亦至僕射而書卒於例未安。

八月壬申王旦對於便殿。是歲七月丁巳旦罷政紀當書而失書。

九月癸卯以參知政事王曾爲禮部侍郎。案會傳罷爲禮部侍郎判都省事卽其事也。

己酉王旦薨。宰輔表作癸卯。

乾興元年二月庚子大赦天下。癸卯上尊號曰應天尊道欽明仁孝皇帝。案東都事略二月庚子朔大

赦天下詔自今中外所上表咸去稱號羣臣請上尊號曰應天尊道欽明仁孝皇帝從之。蓋真宗以咸

平二年受崇文廣武聖明仁孝皇帝之號大中祥符元年增至十六字五年增至十八字天禧三年增

至二十二字至是詔去尊號又因羣臣之請祇稱應天尊道欽明仁孝八字爾。宋史刪去詔中外上表

去稱號一語而前後尊號字數多寡之故遂難通矣。

仁宗紀

乾興元年十一月錢惟演罷。此紀宰執去位皆書罷而不書所授之官以宰輔表已有之也。它卷或詳

或略或不書罷免字蓋史局多人彼此不相檢照自昔然矣。

天聖元年閏月馮拯卒。前宰相以禮始終者例書薨。此紀馮拯王欽若王隨三人獨書卒。狄青王德用

皆前執政官使相例當書薨而亦書卒。

康定元年八月戊申夏守賀罷。宰輔表失書。

慶曆四年七月封宗室十人為郡王國公。案燕王德昭傳亦云慶曆四年詔封十王之後然十人之名。

紀傳俱未詳列文獻通考引國朝會要云慶曆四年制封宗室乃以皇叔德文為東平郡王秦王廷

兄允讓為汝南郡王陳王元份子皇弟允良為華原郡王周王元儼子皇姪從諤為潁國公魏王德昭孫從煦為安國

公岐王德芳孫宗說為祁國公楚王元佐孫昭成太子孫宗保為建安郡王昭成太子名元僖華王孫宗達為恩平郡王

華王即楚王元僖邢王孫宗望為清源郡公邢王即越王元傑則止有九人又魏王廷美傳稱慶曆中宗室王者四人

據會要卻有五人皆不相合惟王伯厚玉海云制封德文東平郡王濮王汝南即允允弼北海允良華

原郡王從諤潁國公八月壬辰改命守巽從煦安國公宗說祁國公宗保建安郡公宗達恩平郡公宗望清源郡

公其敘四王六公之名最為分曉會要蓋脫允弼一人又宗保宗達本郡公而誤為郡王耳允弼蓋鎮

王元僖之子十人者太祖子二房太宗子七房秦王廷美子一房也長編與玉海正同

神宗紀

治平四年三月壬申歐陽脩知亳州癸酉吳奎參知政事罷罷字衍當移於歐陽脩之下

熙寧二年四月唐介薨案執政例書卒而介獨書薨歐陽脩以前執政亦書薨熙寧五年陳升之以前宰相

而反書卒元豐二年歐陽脩張昇皆前兩府致仕脩官太子少師昇官太子太師脩書薨而昇書卒皆義例

之未當者也。呂誨以右諫議大夫書卒。熙寧四年誨非兩府非使相。其卒不當書于本紀。高宗紀尹焞、楊時書卒。寧宗紀朱熹書卒。或以尊崇道學特變其例。然周敦頤二程又未嘗書卒也。

八年八月韓絳罷。神宗紀中宰執罷政外除。皆書知某州。或云判某州。獨是年絳知許州。元豐七年王安禮知江寧府。則略而不書。

元豐三年九月丙戌薛向罷知潁州。宰輔表失書。

四年正月龍圖閣直學士韓縝同知樞密院事。案宰輔表及編年錄同日除知樞密院。尚有呂公著一人。

哲宗紀

元祐六年十一月壬辰。尚書右丞蘇轍罷知絳州。案宰輔表是年二月蘇轍自龍圖閣學士御史中丞除尚書右丞。明年六月自守尚書右丞。除門下侍郎。中閒無罷政一節。

紹聖元年五月乙丑。鄧潤甫卒。哲宗朝執政趙瞻、孫固、傅堯、俞紀皆書薨。獨潤甫書卒。徽宗紀溫益、朱諤、張康國、鄧洵武皆執政而書卒。趙挺之、劉正夫、何執中皆前宰相。而亦書卒。南渡以後執政本紀多書薨。閒有書卒者。不過十之一耳。惟宰輔表於執政皆書卒。

元符二年八月戊寅。皇太子薨。案皇太子當作皇子茂。茂生三月而夭。未有封號。既歿。乃追封越王。下

文書十月己未。越王茂堯。即其人也。徽宗紀。崇寧元年十二月。贈哲宗子鄧王茂爲皇太子。則哲宗紀中。安得預書皇太子乎。此紀稱越王。而徽宗紀作鄧王。當有一誤。

十月甲寅。日有食之。既。案。日食必在朔。紀先書十月壬子。而後及甲寅。其非朔日審矣。天文志亦不載此食。必史臣之誤也。考遼史朔考。是歲十月。實己亥朔。甲寅爲月之十六日。而天文志月食篇中。卻有十月甲寅月食。既一事。乃知史臣誤以月食爲日食耳。本紀之例。書日食不書月食。

徽宗紀

元符三年十月。升端州爲興慶軍。端州本軍事州。徽宗自端王入繼大統。乃升爲節鎮。以興慶爲軍額。非改州爲軍也。當云升端州爲興慶軍節度。

政和三年十一月。升端州爲興慶府。案。重和元年十月。又書改興慶軍爲肇慶府。似政和三年。已有府名。後乃改稱肇慶也。及考地理志。元符三年。升興慶軍節度。重和元年。賜肇慶府名。初無政和三年升府之事。予嘗游七星巖洞中。得石刻云。政和丁酉暮春。程江古革。初自新昌移守興慶。是年仲夏。真陽馮齊荀起於祥除。來貳府政。相與咨詢。有請於朝。次年春。乃被旨陞作大藩。其云陞作大藩者。謂升州爲府也。據石刻。始知改府之議。乃由端州守臣所請。在政和七年丁酉之夏。至次年春。乃得愈旨。即重和元年也。其賜名肇慶。當在次年冬。故紀繫於十月。然則政和七年以前。端州尙未稱府明矣。

七年三月升鼎州爲常德軍。四月升温州爲應德軍。五月升慶州爲慶陽軍。涇州謂平涼軍。此四州皆以潛藩升爲節度州。賜軍額。當增節度二字。地理志。温州爲應道軍。此云應德。似誤。

宣和元年十二月升瀘州爲瀘川。睦州爲建德。岳州爲岳陽。寧州爲興寧。宜州爲慶遠。光州爲光山。均州爲武當軍。此七軍皆節度軍額也。當增節度二字。

欽宗紀。

靖康元年正月己巳。尙書左丞宇文粹中。案粹中以宣和六年除右丞。初未轉左。其時左丞則趙野也。

此左字當作右。

二月辛亥。宇文粹中罷知江寧府。宰輔表失書。

高宗紀。

建炎三年三月戊子。盧益爲尙書左丞。壬寅。盧益罷。案是月辛巳。以盧益爲尙書右丞。未拜。復罷。爲資政殿學士。距戊子纔八日。一月之中。再除而再罷。似非情理。宰輔表祇書辛巳之除。而無戊子再除一節。紀殆重出也。考編年錄。戊子。召王孝迪爲中書侍郎。與資政殿學士。尙書左丞盧益。竝奉使金國。益辭行。遂以本職提舉崇福宮。益執政凡八日。然則益乃以戊子日罷。辛巳至戊子。恰八日也。孝迪與益。俱被命使金。而益之除左丞。乃在其前。紀所書俱未足信。

七月己丑。以資政殿大學士王綯。參知政事。兵部尚書周望。同簽書樞密院事。宰輔表作壬寅。
四年二月乙亥。詔復以盧益爲資政殿學士。李回。端明殿學士。並權知三省樞密院事。八月癸未。盧益罷。
宰輔表。失書。益拜罷事。

十月丁亥。以李回同知樞密院事。丁亥。表作己丑。

紹興元年五月丙辰朔。當是丙申朔。

十月乙丑。李回罷。表作九月癸丑。

十一月庚戌。富直柔罷。表作戊戌。

三年五月丁卯。以韓肖胄等充金國軍前通問使。是月除肖胄同簽書樞密院事。本紀失書。

四年正月己卯。韓肖胄罷。己卯。表作癸酉。

五月甲子。以孟庚兼權樞密院事。表失書。

八月庚辰。以趙鼎知樞密院事。表失書。

十一月戊午。以胡松年兼權參知政事。表失書。

五年閏月乙卯。以孟庚。沈與求。竝兼權樞密院事。表失書。

五月己丑。以孟庚知樞密院事。表作四月乙丑。

七月己卯。以沈與求兼權樞密院事。表失書。

六年二月。以兵部尙書都督府參謀折彥質簽書樞密院事。表在三月。又是月沈與求罷。以彥質權參

知政事。表亦失書。

五月戊戌朔。當是戊辰朔。

九年四月丙寅。以孫近兼權同知樞密院事。表失書。

十二月甲子。李光罷。甲子。表作辛酉。

十年四月壬申。韓肖胄罷。表及編年錄。竝在二月。

十一年四月辛巳。以王次翁兼權同知樞密院事。表失書。

十四年六月。內侍白鄂坐誹謗。及其客張伯綸。俱黥配吉陽軍。案秦檜傳。右武大夫白鏐。有變。理乖謬。

語。刺配萬安軍。太學生張伯麟。嘗題壁曰。夫差。爾忘越王殺爾父乎。杖脊刺配吉陽軍。鄂與鏐。綸與麟。

音之譌也。紀云。俱黥配吉陽軍。據傳則鏐配萬安軍。與吉陽軍非一地。

二十年正月甲午。金就遣完顏思恭等來賀天申節。金史交聘表。是年遣完顏思恭。翟永固爲報諭宋

國使。完顏元宜。高懷貞爲賀宋生日使。非卽遣思恭也。

二十一年二月癸亥。以余堯弼兼簽書樞密院事。表失書。

十二月金遣兀朮魯定方等來賀明年正旦。金史交聘表作李朮魯阿海。李之爲兀朮魯之譌也。定方卽阿海。一人而二名猶宗弼宗翰之類。餘放此。

二十二年十二月金遣張利用等來賀明年正旦。案金史是年以張用直爲賀宋正旦使。用直卒。改遣

左瀛。與紀所載姓名異。

二十六年八月辛卯程克俊罷。表失書。

二十九年六月丙申陳誠之罷。表作丁酉。

己亥以陳康伯兼樞樞密院事。表失書。

三十年四月丙辰賀允中兼權同知樞密院事。表失書。

孝宗紀

紹興三十二年甲戌御筆賜字元永乙亥丙辰降御札皇太子可卽皇帝位。案甲戌六月九日乙亥六月

十日也。史失書六月。高宗紀六月丙寅朔禮志六月十日降御札。

七月壬寅以黃祖舜兼權參知政事。表失書。

十月以岳陽軍節度使居廣開府儀同三司。案居廣爲益王頴之曾孫。乾道四年封永陽郡王。九年加

少保。淳熙八年薨。近封永王。當附見於頴傳。又孝宗時有保康軍節度使天水郡公居中。嘗權主奉益

王祭祀見口益公集亦當附韻傳史皆失之。

史浩兼權知樞密院事十一月史浩免權知樞密院事表皆失書。

隆興元年六月戊辰詔虞允文此下似有脫文或云詔當作召。

二年十月丁卯賀允中罷爲資政殿大學士致仕表失書。

己巳以周葵兼權知樞密院事王之望兼同知樞密院事表失書。

乾道元年六月癸未王剛中薨表失書。

九月甲戌以洪适兼同知樞密院事表失書。

五年二月壬寅以給事中梁克家簽書樞密院事甲辰以王炎參知政事兼同知樞密院事宰輔表俱

在甲寅編年錄俱在甲辰。

七年七月庚子以王炎爲樞密使四川宣撫使表失書此事然於九年書王炎罷樞密使則是本有而

刊本脫之也。

淳熙元年十月丙寅鄭聞薨表失書。

二年六月庚戌朔以沈夏同知樞密院事表在五月而闕其日。

九月丁未沈夏罷編年錄及表並作閏九月案是年閏九月己酉朔無丁未日當從紀。

四年六月己卯，以王淮參知政事。表作五月，而闕其日。

五年三月己未，以王淮知樞密院事。趙雄參知政事。三月，表作六月。

七年十二月，以新除成都府路提點刑獄祿此字疑東之權四川制置司應。監本此下脫一葉，誤以第三

十三卷之第十一葉攙入。

九年七月壬辰，以資政殿學士李彥穎參知政事。彥穎以十年正月甲申罷。宰輔表俱失書。編年錄則

云：是月壬辰，彥穎罷參知政事，依舊資政殿學士，提舉洞霄宮。十年正月，右諫議大夫張大經論彥穎不能治家體國，詔特降爲中大夫，與此紀異，而又闕其復拜參政之歲月，未審孰是。

九月庚午，以王淮爲左丞相，梁克家爲右丞相。表失書。

十年正月丁丑，以給事中施師點簽書樞密院事。表在去年十二月，以麻推之，丁丑乃正月十一日，表誤。

十五年二月，金遣使蔡克忠等來弔祭。金史交聘表，作蒲察克思，蒲察女直氏也，當從表。

光宗紀。

紹熙二年二月，遣宋之瑞等使金弔祭。金史交聘表，作宋之端。

金遣完顏亶等來告哀。案，金熙宗名亶，不應使者與同名。金史交聘表，作亶字。

四年六月戊申，胡晉臣薨。表失書。

寧宗紀

嘉泰二年，是年七月己巳，程松以父憂去位，則表有而紀失之。

嘉定元年六月甲申，林大中薨。八月辛未，邱審卒。審與大中皆見任執政，而一書薨，一書卒，又同在一
年之內，何不檢照乃爾。

十二月，升嘉興府爲嘉興軍。當云嘉興軍節度，脫節度二字。

淮西揀刺二萬六千餘人，以爲御前定武軍。定武，當作武定。

七年三月丁卯，以安丙同知樞密院事，成都府路安撫使。表失書。八月戊申，改觀文殿學士知潭州，表亦失之。

理宗紀

太祖十世孫。案孝宗、理宗，竝以宗子入繼大統。孝宗紀：歷敘世系所出，而理宗止及其父，於史例殊未

畫一。當云太祖子燕王德昭，生翼王惟吉，惟吉生廬江侯守度，守度生嘉國公世括，世括生房國公令

稼，令稼生子昉，子昉生伯吁，伯吁生師意，師意生希璫。

紹定四年七月庚戌，葛洪資政殿學士，知紹興府。表失書。

端平元年六月，詔故端明殿學士、開府儀同三司史彌遠，贈資政殿大學士，諡忠宣。此別是一人，非彌遠也。當是刊本之譌。

二年五月庚戌，以喬行簡兼參知政事。表失書。

十一月乙丑，鄭性之兼權參知政事。表失書。

十二月甲辰，曾從龍薨，余曠同簽書樞密院事。表皆失書。

嘉熙元年正月辛酉，以李臺同知樞密院事，四川宣撫使。紀於四月壬午朔，又書以李臺同知樞密院

事，四川宣撫使，知成都府，蓋一事而重出，然表皆不書。

二月癸未朔，李鳴復罷，以資政殿學士知紹興府。表與本傳皆不書。

六月癸巳，以鄒應龍爲資政殿學士，知慶元府，沿海制置使。表失書。

二年四月癸未，以李臺同簽書樞密院事，督視江淮京湖軍馬。表不書。

五月丙戌，詔崔與之提舉洞霄宮，任便居住。案宰輔表，三年六月庚子，崔與之力辭相位，特授觀文殿

大學士，致仕，與之傳亦云。嘉熙三年，以觀文殿大學士提舉洞霄宮，此紀書於二年五月，恐誤。

李鳴復復參知政事。表失書。

淳祐四年正月壬寅朔，以李鳴復參知政事，杜範同知樞密院事。據宰輔表，是月丁巳，鳴復罷，知福州。

範罷知婺州紀書除而不書罷亦脫漏也。

八年六月戊戌以徐鹿卿爲樞密使兼參知政事兼侍講。案鹿卿傳無除執政之事。宰輔表亦不載。此

必傳寫之譌。

寶祐二年十月追削余玠資政殿學士奪其子晦刑部侍郎告身。案寶祐元年余玠卒以余晦權刑部

侍郎四川安撫制置使知重慶府代之晦乃天錫之從子非玠子也且玠籍蘄州晦籍明州本非一族

史殆誤矣。

三年六月王埜以御史胡大昌言罷給事中依舊端明殿學士提舉洞霄宮。案宰輔表是月王埜自禮

部尙書除端明殿學士簽書樞密院事尋罷王埜傳亦云拜簽書樞密院事與宰相不合言者攻之以

前職主管洞霄宮紀云罷給事中又不書除簽樞蓋失之矣。

四年正月詔史嵩之觀文殿大學士依前金紫光祿大夫永國公致仕。已見淳祐六年此重出。

十二月乙丑以張礪兼參知政事。表失書。

五年六月丁酉馬天驥以臺臣言罷詔依舊端明殿學士提舉臨安府洞霄宮。表失書。

景定二年十月皇太子擇配帝詔其母族全昭孫之女擇日入見寶祐中昭孫沒于王事全氏見上上曰

爾父死可念對曰臣妾父固可念。淮湖百姓尤可念。上曰卽此語可母天下。迨開慶丁大全用事以京

尹願嵩女爲議，大全敗，故有是命。此事已見后妃傳，以史例言之，當載本傳，不應入紀也。三年五月辛未，馬光祖以病請詞，詔知福州兼福建安撫使。表失書。

四年九月甲午，楊棟同知樞密院事，棟權參知政事，葉夢鼎簽書樞密院事。表作三月庚子。

五年四月乙丑，何夢然、馬天驥以臺臣劾罷。夢然見任執政，其罷當載於表，而表失書。

七月丙申，臺臣言太子賓客楊棟指慧爲蜚尤旗，欺天罔君，詔棟罷職，予祠。棟亦見任執政，其罷表亦

失書。

度宗紀。

咸淳二年，是歲四月壬午，姚希得罷。五月甲寅，王燦除參知政事，留夢炎同知樞密院事，包恢簽書樞密院事。三年正月壬辰，王燦知樞密院事，兼參知政事，留夢炎、葉夢鼎竝參知政事，常挺簽書樞密院事。三月壬辰，程元鳳除少傅、右丞相，兼樞密使。丁未，程元鳳罷。六月己卯，王燦罷。八月辛未，葉夢鼎除右丞相，兼樞密使，留夢炎除樞密使，常挺同知樞密院事，兼權參知政事。十一月庚戌，常挺除參知政事，馬廷鸞同知樞密院事。四年正月乙巳，留夢炎罷。四月庚寅，馬廷鸞兼權參知政事。十二月丙戌，包恢罷。六年正月丙寅，陳宗禮除簽書樞密院事，趙順孫同簽書樞密院事，紀皆失書。蓋本紀自寧宗以後，繁簡無法，而度宗、瀛國公兩紀尤爲冗雜。若咸淳四年，右正言黃鏞言，今守邊急務，非兵農合一不

可。一曰屯田。二曰民兵。川蜀屯田爲先。民兵次之。淮襄民兵爲先。屯田次之。此足食足兵良策也。不報。此嘗入兵志。德祐元年六月。王應麟言。開慶之禍。始於丁大全。請凡大全之黨。在謫籍者。皆勿宥。從之。又應麟繳還章鑑。曾淵子錄黃言。韓震爲逆。二人實芘之。且淵子芘翁應龍。致有逸罰。又嘗竊府庫金以遁。命削鑑一官。放歸田里。淵子再削一官。徙吉州。誅翁應龍。籍其家。應麟復繳還曾淵子貶吉州錄黃。遂貶韶州。八月。趙淇除大理少卿。王應麟封還錄黃言。昔內外以寶玉獻似道。淇兄弟爲甚。十月。應麟與當楸請立濟王後。此數事。嘗入應麟傳。七月。王煇子曠京學生劉九臯等。伏闕上書。言陳宜中擅權黨似道。芘趙潛潛說友。使門客子弟。交通關節。其誤國將甚於似道。此事已入陳宜中傳。唯不載九臯名耳。

三年六月壬戌。加授呂文德少傅。馬光祖參知政事。李廷芝兵部尙書。竝職任仍舊。案景德建康志。六月六日。三省同奉御筆。馬光祖除參知政事。尋具辭免。再奉御筆。馬光祖可依前觀文殿學士仍舊任。是光祖參政之命雖下。而旋即辭免。如紀所書。似光祖以參知銜仍舊任。宰相表。但書除參知政事。不言仍舊任。又似光祖去建康而入參大政。皆失其實。建康志。乃光祖幕僚所撰。必不誤也。

瀛國公紀。

德祐元年六月己未。以李庭芝知樞密院事。兼參知政事。表失書。

八月壬寅，加夏貴樞密副使。表失書。

十月癸亥，陳合坐匿廖瑩中家，資奪執政恩數。

合見任執政，其罷免當見於表，而表失之。



廿二史考異卷六十八

宋史二

天文志三

晉志以織女漸臺輦道皆屬太微垣。以河鼓左旗右旗天桴屬天市垣。案晉書天文志天文經星分爲三段。一爲中官。一爲二十八舍。一爲星官。在二十八宿之外者。古人謂之外官其中官之星以北極紫宮爲首。而北斗次之。文昌諸星直斗魁前者也。太微諸星與斗衡相直者也。自攝提大角以至貫索天紀織女漸臺輦道皆在斗杓下者也。故次於北斗。自平道以至少微長垣俱在二十八宿之上。故亦屬之中官。其序則自東而北。而西而南焉。隋志星名較多於晉志。其分目次第則一與晉志同。蓋古無以太微天市配紫宮爲三垣者。史記天官書祇有中官。而太微屬南官。天市屬東官。晉隋兩志則分中外官。與二十八舍爲三列。而太微天市亦雜敍於中官之內。晉隋志皆出李淳風之手。無云三垣者。則三垣之名在淳風以後矣。上元太微。下元天市。始見於步天歌。歌不著撰人名氏。相傳以爲唐王希明自號丹元子者所撰。鄭漁仲獨非之。以爲丹元子。隋之隱者。然唐初尙無三垣之說。則非隋人所撰審矣。後世以中官之星分屬三垣。又以二十八宿內外諸星。案其經度分屬各宿。皆始于步天歌。晉隋以前所未有。

也。修宋史者不加詳考。輒云晉志某星屬太微垣。某星屬天市垣。誣甚矣。卽如扶筐織女。漸臺輦道。北方之星也。豈得越紫宮而南屬於太微乎。大陵積尸。天船積水。天大將軍。軒轅酒旗。西方南方之星也。豈得越紫宮而東屬於天市乎。

天文志五

七曜。七曜一篇。皆襲用前史之文。於宋事無涉。

今紹興麻法。歲星每年行一百四十五分。是五年當作每年行一次之外。有餘一分。積一百四十四年。剩一次矣。案。歲星百四十四年而超一次。此漢三統術也。志以爲紹興術誤。

日食。案日食。本紀失書者。開寶元年十二月己酉朔。乾興元年七月甲子朔。寶元元年正月戊戌朔。慶曆二年六月癸酉朔。嘉定十一年七月庚午朔。其它以陰雲不見而不書者。不勝紀也。

乾興元年七月甲子朔。日食幾盡。據遼史朔考。是年七月實戊辰朔。此云甲子。疑誤。建炎三年二月壬午。月食于軫。案是歲二月庚戌朔。其月無壬午日。

五行志四

乘雞登寶位。乘、一作抱。登、一作昇。子建司南位。司、一作居位。一作極。

東隣家道闕。隨虎遇明興。一作東隣嬌小女。騎虎踏河冰。凡云一作者皆景定越廣志引江少虞類苑之文。
煜丁酉年襲位。當作辛酉。

律厯志一

惟奉元會天二法不存。案奉元術。淮南人衛朴所造。知制誥沈括提舉。熙寧八年閏四月奏上。詔進括一官。賜朴錢百千。朴言崇天氣後天。明天朔先天。更以己學爲之。視明天朔減二刻。玉海載紹興九年。詔陳得一。裴伯壽補修奉元厯。以史官修神宗正史。厯志奉元厯缺故也。則南渡初奉元術已亡。紹興雖詔補修。訖未成書。故洪邁等修四朝史。仍不著其法也。奉元術雖失傳。其改造本末。亦應見于志。而史家略不及之。此掛漏之大者。又案此志惟總序一篇。乃元史臣之筆。自一卷至三卷。本之三朝史。四卷至九卷。本之兩朝史。十卷至十三卷。本之四朝史。十四卷以後。本之中興史。四史體裁。本未畫一。史臣彙爲一志。初未鎔范。故首尾絕不相應。加律厯二端。宜各以類從。若以宋初和峴論律呂。仁宗時著樂隨新經。及阮逸。胡瑗。房庶。范鎮諸人之論律。南渡後胡銓之審律論。蔡元定之律呂新書。李如麀之樂書。程迥之三器圖議。併爲一篇。豈不首尾完善。而乃沿襲舊文。錯雜於厯議之中。大可笑也。又如渾儀之式。俱載天文志。獨皇祐製儀。乃在律厯篇中。亦爲不倫。

乾元元率九百四十。元率卽日法也。以歲周軌率參校。當是二千九百九十。史有脫文。

應天歲盈二十六萬九千三百六十五。李銳曰：此條甚誤。以意求之，當作歲總七十三萬六百三十五。其歲盈則一萬四百九十一也。置氣策小餘二千一百八十五秒一十五。刊本作二以二十四乘內秒，得五萬二千四百五十五。大昕案：此即一歲氣盈分數。以元法收之，得五日四分日之一弱也。術家以欲書算，故以五約之。其求天正冬至，大小餘皆半而進位，仍以五乘之也。五除之，即歲盈之數，以三百六十乘元法而五除之，加入歲盈，即歲總之數也。

氣策十五，小餘二千一百八十五秒二十四。案應天術，以二十四爲秒法，滿二十四則小餘當進一，而無秒數矣。此二十四必後人妄改，今從李生校改作一十五。

候策五，小餘七百二十八秒二。此秒數亦誤。置歲餘五萬二千四百五十五，以七十二候除之，得七百二十八，不盡三十九，以秒法通之，得九百三十六，以七十二除之，當爲秒十三也。

求六十四卦，此即六日七分之法，以坎離震兌分主四時，其直日用事者，惟公辟諸侯卿大夫，凡六十卦耳。此云六十四卦，蓋後人妄增四字。

律麻志三

屯田員外郎呂奉天上言：案經史周秦以前多無甲子，太史公司馬遷雖言歲次，詳求朔閏，則與經傳多不符合。乃言周武王元年歲在乙酉。案史記年表本無甲子，裴駟采徐廣注附入，後人誤認爲正文耳。其云周武王元年歲在乙酉，則史記無此文。

王起撰五位圖言周桓王十年歲在甲子。案漢人據諸緯書謂獲麟之歲歲在庚申。依此上推魯莊公恆星不見之歲不直甲子。

又言孔子生於周靈王庚戌之歲卒於周悼王四十一年壬戌之歲皆非是也。悼王當作敬王古法太歲百四十四年而超一辰與漢以後人所說異若依後人追命之則孔子生於庚戌卒於壬戌初無誤也。

乃知唐堯即位之年歲在丙子迄太平興國元年亦在丙子凡三千三百一年矣。案汲冢紀年稱唐堯元年歲在丙子隋袁充亦云唐堯丙辰生丙子年受命呂氏之說蓋本於此今人以甲辰爲堯元載出於邵氏皇極經世書邵又本於皇甫謐帝王世紀劉恕通鑑外紀又以戊辰爲堯元年要之皆無的據學者存而不論可也。

自堯即位年距春秋魯隱公元年凡一千六百七年。案自堯丙子依此歲數推之則隱公元年在癸亥矣。漢以後儒皆言隱公元年歲在己未呂說未可信。呂奉天說較今人所推少三十二年。

律麻志七

以等數約之得三萬九千爲元法九千五百爲斗分二萬六百九十三爲朔餘六百二十四萬爲日度母二十二億七千七百二十萬四百四十七爲周天分八萬四百四十七爲歲差。此注與前後文重複。

可刪。

新厯斗分九千五百。以萬平之。得二千四百二十五半盈。得中平之數也。置斗分九千五百。以萬通之。

如日法三萬九千而一得二千四百三十五又百分之八十九強。故云半盈也。二十五當作三十五。

天正冬至。大餘五十七。小餘一萬七千。推得治平元年天正冬至辛酉日。實嘉祐八年十一月二十四日。

六十四卦。當作六十卦。

竟六日三千四百八十六秒。蓋三萬九千分之三千四百八又十八分秒之六也。十字衍。

律厯志八

唐徐昇作宣明厯。悟日食有氣刻差數。徐昇蓋徐昂之譌。然昂所撰術名觀象。非宣明也。唐志宣明術。不著撰人姓名。

自元嘉厯後。所立日法。以四十九分之二十六爲強率。以十七分之九爲弱率。併強弱之數爲日法朔餘。此語已見前卷。

思恭又嘗推劉羲之爲知厯焉。羲之當作羲叟。

律厯志十

元祐觀天麻。案元祐之觀天崇寧之紀元志皆不敘改造原委考玉海元祐二年九月以奉元麻疏命保章正黃居卿等六人考定初衛朴麻冬至後天一日元祐五年十一月癸未冬至驗景長之日迺在壬午遂造新麻六年十一月八日賜名觀天工侍王欽臣爲序紹聖元年頒行徽宗時有司以觀天推崇寧二年十一月朔爲丙子頒麻之後始悟其朔當進而失進遂造占天麻改十一月朔爲丁丑而再頒麻焉既而麻官言占天成於私家不經考驗不可施用乃命姚舜輔等復造新麻視崇天減六十七刻半始與天道相合崇寧五年五月十六日麻成賜名紀元御製序則觀天紀元二術改造本末非無可考也。

律麻志十二

崇寧紀元麻演紀上元上章執徐之歲玉海云紀元麻取徽宗受命年登極日元用庚辰日起己卯失古麻之法。

律麻志十四

宋麻在東都凡八改曰應天乾元儀天崇天明天奉元觀天紀元星翁離散紀元麻亡此卷全是中興國史之文追敘東都改術以爲緣起今既合爲一篇當云南渡星翁離散紀元術亡何必更數八改之名乎。

律厯志十五

無非推求上元開闢爲演紀之首。氣朔同元。而七政會於初度。從此推步。以爲厯本。未嘗敢輒爲截法。而立加減數於其間也。案推步家先據近測。乃求厯元。以爲布算之始。然每易一術。必更一元。演紀之數。積至億萬。大率荒逸無稽。楊忠輔翺立截法。近取紹熙甲寅歲。以爲上加下減之端。又追溯三千八百三十年前。以爲上元。則載籍所紀。盡於此矣。郭守敬授時術。不立積年。實祖述其意。而當時鮑澹之。反用是爲讐議。此如祖沖之立歲差。破章法。爲後世所宗。而見非於戴法興。大音不入里耳。自昔然矣。賜名會天。寶祐元年行之。史闕其法。案尤焯撰會天術序云。積年一千一百餘萬日。法五百五十八。浙西安撫司準備差遣。臧元震言。厯法以章法爲重。章法以章歲爲重。案十九年七閏。爲一章。乃秦漢以前蠶率。蓋古術皆用四分。章節紀元。皆四分之一積也。劉洪始改四分減歲實。以合天行。而章閏猶沿舊法。祖沖之始改革法。三百九十一年。有百四十四閏。與舊法相課。則七千四百二十九歲之中。舊法當有二千七百卅七閏。新法只有二千七百卅六閏。此戴法興所詆。以爲七千四百二十九年。輒失一閏者也。中朔與閏相爲表裏。歲實旣減于四分。則七閏一章。自不可爲定率。法興未達天行。故有此難。嗣後張賓、張胃、元、劉焯之徒。所立章歲章閏。雖各不同。要皆本沖之之法。而稍增減之。李淳風造麟德術。始并氣朔閏餘。通爲一術。但以歲實與十二朔實相校。所多之數。卽爲一歲之閏積。而不更求章歲。

之率。此後推步家無有言章歲者。蓋十九年七閏。止是約率。積之又久。必有不得七閏者。但使晷景不差。卽爲密合天行。雖六閏何妨乎。元震所陳。僅摭拾經生膚淺之談。皆祖沖之、李淳風輩唾棄弗道者。而疇人子弟。已不能置對。元震又稱。一大一小爲平朔。兩大兩小爲經朔。三大三小爲定朔。不知經朔卽平朔也。平朔一大一小。閒有兩大而無兩小者。三大兩小。皆爲定朔。旣用定朔。則十九年七閏之恆率。自不能拘。而有司亦不知也。當時局官淺陋如此。欲其改憲以合天。難矣。會天術今已失傳。姑以開禧言之。歲閏一十八萬三千八百四。積十九年。得三百四十九萬二千二百七十六。以朔率四十九萬九千六十七除之。止有六個月。又四十九萬七千八百七十四分。不盈一朔策之數。又以成天言之。歲閏八萬六百九十七。積十九年。得一百五十三萬三千二百四十三。以朔實二十一萬九千一百一十七除之。亦止六個月。又二十一萬八千五百四十二分。仍不盈一朔策之數。然則當時雖因元震之言而改術。終不能復七閏一章之舊率。而元震亦不能詰迂儒強作解事。大率若此。

律曆志十六

以旬周去之不盡。總法約之爲大餘。案統元術。以元法爲日法。總法卽元法也。

律曆志十七

歲分四百三十八萬二千九百一十餘六萬二千九百一十。以萬萬通歲餘滿策法。二千而一得五日。

二十四分二十五秒與授時所定歲實正同。乃知郭守敬暗寫統天法。但諱而不言耳。

氣策十五。餘二千六百二十一少二十一分秒八十四。置氣餘分進二位滿策法。而一得二十一。分不

盡。復進二位滿策法。而一得八十四秒有奇也。當云約分二十一秒八十四。則與周天約分同例矣。

朔策二十九。餘六千三百六十八五十三分秒六。置朔餘分進二位滿策法。而一得五十三。又百分之

六有奇。當云約分五十三秒六也。案周琮言。古人以一百萬平朔餘之分。得五十三萬六百以下。五百

七十以上。是爲中平之率。今考李淳風一行以後。朔餘未有過百萬分之五十三萬六百者。獨統天朔

餘得五十三萬六百六十六奇。較之授時亦多七十三數。雖有百五乘距差退位減積之法。以消息之。

然歲實弱而朔實太強。行之未久。而日食不驗。置閏漸差。職是故也。

氣差二十三萬七千八百一十一。案氣差者。上元冬至後。距甲子之日數也。統天之術。起上元甲子。至

紹熙甲寅中。距三千八百三十年。以歲分乘之。得一百六十七億八千六百五十四萬五千三百爲歲

積分。減氣差。得氣汎積一百六十七億八千六百三十萬七千四百八十九。共年無躔差。卽以汎積爲

定積滿策法。而一得積日一百三十九萬八千八百五十八。大餘十八。小餘一萬一千四百八十九。以

七千四百八十九。卽氣積差。是爲紹熙甲寅天正冬至。大小餘實壬午日亥正四刻也。乃置上元以

來。歲積分減氣積。差得一百六十七億八千六百三十一萬七千八百一十一。又以斗分差乘距算萬

分約之得四十八爲躔差。再以躔差乘距算。得一十八萬三千八百四十。加入歲積分。得一百六十七億八千六百五十萬一千六百五十一。滿策法。而一得積日一百三十九萬八千八百七十四。大餘三十五。小餘一千六百五十一。轉減紀法。得大餘二十四。小餘一萬三百四十九。然則上元天正冬至。乃是戊子日。戊正三刻弱也。凡步氣朔。當以甲子日爲起算之端。今上元冬至。不值甲子。依授時術。當加氣應二十四日有奇。乃得從甲子起算。今減去氣差。是以上元冬至後甲子日起算也。冬至日距甲子廿四日一〇三四九。并氣差十九日九八一。僅得四十四日八一六〇。以較六十甲子。尙欠十五日三八四〇。即躔差乘距算所得之數。何以使得甲子日。統天雖置上元。實近取紹熙甲寅爲元。上考下求。俱以甲寅距算爲斷。若於是年。又加躔差。布算既餘。益滋昧者之惑。故但減十九日有奇。而六十之數。已周其所欠之數。卽此三千八百三十年中。應加歲餘之數。自相除補。而隱而不言。梅氏春秋以來。冬至考亦不言減氣差之由。予積疑有年。頃乃求而得之。故詳述其說。冀同志者審定焉。

以積算與距算相減餘爲距差。以斗分差乘之。萬約爲躔差。復以距差乘之。以減氣汎積餘爲氣定積。如其年無躔差。及以距差乘躔差。不滿秒半以上者。以汎爲定。梅文鼎曰。此卽授時厓加減歲餘法也。積算減距算爲距差者。距紹熙甲寅爲算也。斗分差乘距差爲躔差者。百年加減一分也。授時每百年加減一分。統天則一分零六秒弱。復以距差乘躔差者。百年加減一分奇。而又以其距年乘之也。減汎

積爲定者。授時不立元。以當時所測截算爲主。故有上考下求之別。而加減亦明。統天雖以當時所測截算爲主。而又立元。故只用減。所求在距算以後減之。則冬至差而早。早則其歲實減矣。所求在距算以前減之。則冬至益早。早則其歲實加矣。減之而歲實減。人知之。減之而歲實加。人不知之。此算家轉換之法也。若距差乘躔差不滿秒半以上者。是所求正在紹熙前後百年內。其歲實平。故無加減。而以汎爲定。

如求徑。徑以躔差加減歲餘。距差乘之。紀實去之。餘以加減氣積差。二十萬當作二十萬七千四百八十九。如策法而一。餘同上法。其加減躔差積算。少如距算者加之。多如距算者減之。其加減氣積差。即反用之。案氣積差者。紹熙甲寅。天正冬至前。距甲子之日分。即授時之氣應也。積算少於距算者。以躔差加歲餘。距差乘之。紀實去之。餘減氣積差。又轉減紀實所得如策法。而一。以命大小餘。即授時上考之法。減氣應爲通積分也。積算多如距算者。以躔差減歲餘。距差乘之。紀實去之。餘以加氣積差如策法。而一。以命大小餘。即授時下求之法。加氣應爲通積分也。有此捷法。可省以歲分乘積算之餘。而仍設本法者。爲求天正經朔地也。授時不立積年。設諸應數以爲上考下求之根。其法全出於此。


周天度三百六十五。餘一千九百一十秒六十一。案統天術。周天分四百三十八萬三千九百。滿策法去之。餘數三千九十無秒數。約之爲二十五分七十五秒。此云餘一千九百一十秒六十一者。乃成天

術之度餘。非統天之度餘也。此十有一字當刪。

赤道過宮。此條脫已宮一行。李銳曰。周天分十二宮。每宮應三十度四十三分八十一秒弱。以算補之。

當云。□□□□□張十五度九分□秒八。

八楚分鶉尾之次
在巳用甲丙庚壬。



廿二史考異卷六十九

宋史二

地理志

乾德三年平蜀得州府四十八。以注考之實四十六州。五代史職方考亦云四十六。武英殿本
至道三年分天下爲十五路。長編云國初罷節鎮統支郡以轉運使領諸路事其分合未有定制京西

或爲兩路河北既分南路又分東西路陝西分爲陝西北河南兩路又爲陝府西北路淮南分爲兩路江南分爲東西路荆湖兩路或通置一使兩浙或爲東北路其西南路實兼福建劍南初曰西川後

分峽路西川又分東西路尋并之是歲始定爲十五路一京東二京西三河北四河東五陝西六淮南
七江南八荆湖南九荆湖北十兩浙十一福建十二西川十三峽路十四廣南東十五廣南西也

天聖析爲十八案十八路之名史無明文以志傳參考蓋分江南爲東西兩路川峽兩路爲益即成都梓
利夔四路也夔路即峽路是時移轉運司於夔州而以峽州屬荆湖北路自後遂無峽路之名矣川峽
四路之分在真宗咸平四年見通鑑長編

青州鎮海軍節度建隆三年以北海縣爲軍淳化五年改軍名案青州自唐以來爲平盧軍節度治所

淳化五年改平盧軍曰鎮海。志不云本平盧軍者略也。建隆置北海軍。已見濰州。毋庸重出。且宋時稱軍者有二等。一爲節度軍號。以寵大州。一爲小郡之稱。大約由縣升軍。由軍升州。如北海軍後升濰州是也。軍名雖同。而品秩大小迥殊。如志所云。似北海軍改名鎮海。失之遠矣。

濟南府與德軍節度本齊州。案齊州防禦使李漢超。張耆皆嘗爲之。英宗以齊州防禦使繼大統。治平

二年升齊州爲興德軍。蓋由防禦州升節度州也。當云本齊州防禦。治平二年升節度。乃爲得之。

襲慶府本兗州。予見石刻知兗州孔道輔結銜云。提舉兗鄆濮齊州清平軍兵馬衣甲巡檢公事。蓋宋時諸州守臣例兼兵職。考孫逢吉職官分紀云。國朝知兗州。提舉鄆濮等五州軍兵甲巡檢公事。知青州。提舉青濰等八州軍兵馬衣甲巡檢公事。知徐州。兼提舉徐宿等七州軍兵甲巡檢公事。京東諸州軍。都提舉。都巡檢使。鄆博等六州。都大巡河。兼提舉捉賊。知單州。提舉曹單徐兗州。應天府淮陽廣濟軍。利國棗蕪監巡檢捉賊。知定州。同管句真定府州等路駐泊。知博州。濱棣德博等州。綠河兩岸水陸巡檢使。兼提舉鄆齊濰濮濟等七州。巡檢捉賊公事。知永興府。兼提舉乾耀商華坊丹等州軍。巡檢兵甲事。知鳳翔府。兼管句鳳翔隴州一路路巡檢。駐泊軍馬公事。知陝府。提轄陝府河中府。統解絳州巡檢兵甲公事。知秦州。兼秦隴鳳階成路。駐泊馬步軍。副都總管。提舉本州管界。兼諸寨巡檢公事。陝府兵馬鈐轄。兼提舉陝府河中府。統解絳州。巡檢兵甲盜賊。華州陝府。西京路陝府。河中府。同華統解丹等

州、提舉巡檢捉賊。其麻字在華州。西京陝府駐泊捉賊兼提舉。緣黃河兩岸。至絳州界六寨公事。知并州。兼同管勾并代州軍馬提舉巡檢事。知潞州。提舉澤潞晉絳慈隰州威勝軍一路。屯駐駐泊。就糧本城兵馬巡檢公事。知揚州。提舉揚楚泗通泰海眞州高郵漣水軍。兵馬衣甲巡檢公事。知廬州。兼提舉廬壽蘄黃光舒濠州無爲軍。兵甲器械事。知杭州。提舉杭蘇一路。兵甲巡檢公事。知越州。兼提舉温台明越衢婺處等州一路。兵甲巡檢事。知洪州。兼提舉江西南西路一十州軍。巡檢兵甲事。知荆南荆湖北路。兵馬都鈐轄。管勾夔施州一路。巡檢兵馬公事。知潭州。管勾潭州并全邵等州一路。巡檢公事。知辰州。提舉辰州新興等四寨兵甲。知福州。兼提舉福建劍汀州邵武軍一路。兵甲巡檢公事。知泉州。兼提舉泉漳州興化軍。都同巡檢公事。知益州。充本城兵馬鈐轄。提舉益州路諸州軍。兵馬巡檢公事。知利州。提舉兵甲巡檢公事。知文州。同提舉利州路巡檢公事。知夔州。兼梓夔州路兵馬都監。提舉兩路州軍。巡檢兵甲公事。知容州。提舉容瓊路諸州兵馬。都同巡檢公事。邕州提舉邕貴欽廉兩路巡檢。充管界緣邊溪洞都巡檢使。兼駐泊事。諸州軍及緣邊。又有管勾一州。或一路二路兵甲巡檢者。志惟兼兵馬鈐轄者多書之。其兼巡檢公事者。僅於潞州石州河中府陝州江陵府梓州興元府偶一載之。殊不備也。

濟州防禦。案王禹偁傳。臣本魯人。占籍濟上。未及第時。一州止有刺史一人。司戶一人。自後有圍練推

官一人是濟州嘗爲團練州也。

隨州隨縣。熙寧元年廢光化縣爲鎮。入焉。案隨州之光化縣。本安化縣。後周改名。此熙寧元年所廢之

光化也。乾德二年以襄州之陰城鎮置光化軍。并置乾德縣隸焉。熙寧五年廢軍爲光化縣。隸襄州。此

別一光化。雖同在京西路。初不相涉。或疑此條爲誤。非也。今襄陽府有光化縣。卽宋所置。

均州武當軍節度本防禦。乾道六年移入上州防禦。案宋湜傳淳化二年坐累降均州團練副使。

郢州防禦。案真宗朝王曙貶郢州團練副使。

鄭州奉寧軍節度。案太祖朝司超爲鄭州防禦使。真宗時又有鄭州團練使高漢美、魏能。

滑州太平興國初改武成軍節度。本義成軍節度。避太宗名改。志不云義成軍。亦脫漏。

蔡州淮康軍節度。案建隆中司超爲蔡州防禦使。

汝州本防禦州。案宋制州有四等。曰節度州。曰防禦州。曰團練州。曰刺史州。志稱軍事者卽刺史也。刺史

州之舊職例稱軍事。推官軍事判官。故志稱軍事。春明退朝錄云。節度州爲三品。刺史州爲五品。以此推之。防禦團練州。必皆

四品矣。种諤嘗責授汝州團練使。蘇軾嘗責授汝州團練副使。則汝當爲團練。而志云防禦。殆先爲團

練而升防禦乎。軾又嘗授黃州團練副使。志於黃常二州皆云軍事。亦此類。蓋諸州之

升降。史家不能悉書也。

地理志二

雄州。案真宗紀。咸平三年。置河北緣邊安撫使於雄州。志失書。

中山府。太平興國初。改定武軍節度。本義武軍節度。避太宗名。改。志不書義武軍。亦脫文。

瀋州。天聖元年。改通利爲安利。蓋避劉太后父諱。

洺州。建隆元年。升爲防禦。案真宗朝。有洺州團練使翟明。

太原府。河東節度。太平興國四年。平劉繼元。降爲緊州軍事。當云降爲并州。嘉祐五年。復爲太原府。

舊領河東路。經略安撫使。案太原守臣。例兼并代澤潞麟府嵐石路兵馬都總管。又兼監牧使。

地理志三

陝西路。慶厯元年。分陝西沿邊爲秦鳳涇原環慶鄜延四路。案上言陝西路者。轉運司所轄之界下。言

秦鳳涇原環慶諸路。則安撫司所分理也。言地理者。以轉運使所轄爲斷。宋初陝西祇置一轉運司。元

豐以後。分爲永興軍。秦鳳兩轉運司。若鄜延環慶涇原熙河。皆不在二十三路之數。

陝州。大都督府。太平興國初。改保平軍。本保養軍節度。避太宗名。改。志不云本保養軍節度者。脫文也。

同州。定國軍節度。本匡國軍。宋初避太祖名。改。

渭州。安化縣。案慶陽府。潭州。俱有安化縣。洪氏容齋五筆。舉宋時縣名相同者。若河南靜江府。鞏州。皆

有永寧縣。饒卬衡州。皆有安仁縣。蔡英之真陽。盧汝之梁光。台之仙居。臨安。建昌之新城。越筓之新昌。婺蜀之永康。處吉之龍泉。嚴池之建德。渭秀之華亭。信吉之永豐。郴興國之永興。衢嘉之龍游。施。臨江之清江。洪萬之武寧。福循之長樂。郴連之桂陽。福桂之永福。而未及安化及金綿之石泉。江泉之德化。平定化之樂平。臨安南寧之昌化。

德順軍。慶厯三年。卽渭州隴干城建爲軍。歐陽修撰王堯臣墓志。作籠竿城。

地理志四

鎮江府鎮江軍節度。開寶八年改。案。唐時潤州置鎮海軍。後以錢鏐之請。移治杭州。至是江南始平。潤州復入版圖。吳越尙未納土。故改節鎮額也。

常州毗陵郡軍事。案。咸淳毗陵志云。唐制。郡刺史帶團練守捉使。所置幕職曰團練判官。團練推官。國初諸郡。或不置刺史。置權知州事。則曰軍事判官。軍事推官。毗陵自開寶入版圖。守臣曰權知州。初置判官。天聖六年。增置推官。然結銜猶帶團練字。蓋銓司因舊也。以是推之。蘇子瞻除常州團練副使。亦銓司沿唐故事。不考之失耳。

安慶府。端平三年。移治羅剎洲。又移楊槎洲。景定元年。改築宜城。宜城。卽今安慶府城也。景定建康志。宜城者。雁汊對岸一要害處。吳魏相拒時。嘗設疑城於此。方言譌疑爲宜。景定初。馬光祖等言。自舊安

慶府荒榛之後，寓治楊柴洲。即楊槎洲也。柴槎聲相近。鴻雁飛鳴，無城郭可恃。舊城既未可修復，此地去寓治不遠，有險可恃，徙民爲便。詔光祖城之。

江寧府開寶八年，平江南，復爲昇州節度。天禧元年，升爲建康軍節度。案南唐建都金陵，以昇州爲江

寧府。宋平江南，復爲昇州，置江寧軍節度。天禧元年，升江寧府，改江寧軍額曰建康。此志殊未分曉。

舊領江南東路兵馬鈐轄。案江寧守臣兼鈐轄銜，自紹聖二年何正臣始。南渡後置安撫使。卽志所謂帥府也。

則兼馬步軍都總管矣。

句容天禧四年改名常寧。案景德建康志初無改句容爲常寧之事，但云天禧元年置常寧鎮於句容

縣，又云以鎮置寨耳。此志誤。

信州軍事。案王琪責授信州團練副使，在仁宗朝。

常德府常德軍節度，乾德二年降爲團練，政和七年升爲軍。蓋由團練升節鎮也。當云升節度。

岳州岳陽軍節度，本軍事州。宣和元年賜軍額。案英宗以岳州團練使升儲位，故州升爲節鎮。此云軍事州，當爲團練州也。

永州軍事。案真宗朝有永州團練使鄭懷德，徽宗朝錢卽責授永州團練副使。

寶慶府本邵州邵陽郡軍事。大觀九年升爲望郡。案理宗以邵州防禦使升儲位，是邵州本防禦州，而

志失書。

地理志五

福州。永福。本唐永泰縣。崇寧元年改名。志失書。

羅源。舊永貞縣。案三山志。天禧五年。改爲永昌縣。避皇太子名。乾興元年。改爲羅源。

成都府。本益州劍南西川節度。太平興國六年。降爲州。端拱元年。復爲劍南西川成都府。當云復爲成

都府劍南西川節度。

淳化五年。降爲節度。案太宗紀。是年降成都府爲益州。以王小波、李順相繼叛亂故也。下云復節度。則

是降府爲州之時。并罷節度矣。志云降爲節度。大誤。或云當作降爲州罷節度。志脫兩字耳。

潼川府。宋末。川蜀諸州。多依險爲治。如遂寧府。權治蓬溪。碧順慶府。徙治青居山。敘州。徙治登高山。合

州。徙治釣魚山。渠州。徙治禮義山。廣安軍。徙治大良平。富順監。徙治虎頭山。閬州。徙治大獲山。政州。徙

治雍村。涪州。移治三台山。皆載於志。而潼川府之治長寧山。隆慶府之治苦竹隘。蓬州之治蓮山。志獨

遺之。

隆慶府。端平三年兵亂。此下當有徙治苦竹隘之文。或刊本脫漏。

金州安康郡。案金州已見京西南路。成州即同慶府階州鳳州岷州即西和州已見秦鳳路。而於利州路又出之。

當刪併爲一方合史法。

達州本通州。乾德三年改。案嘉泰會稽志云：天聖初，以章獻明肅太后家諱，避通字，如改通進司爲承進司，通州爲達州。諸州通判爲同判，通事舍人爲宣事舍人之類是也。仁宗親政，皆復故。惟通州遂爲達州。至今不復。據此，則達州改名在天聖初矣。今考李氏長編亦載於乾德三年，殆因淮南有通州，避重名而改。會稽志得於傳聞，不足據。

地理志六

肇慶府肇慶軍節度本端州軍事。案真宗時有端州防禦使靳忠。

德慶府本康州軍事。案真宗時有康州團練使魏能。

惠州本禎州。天禧四年避仁宗御名改。志失書。

韶州軍事。案真宗時有韶州團練使白文肇。

慶遠府本宜州慶遠軍節度舊軍事州。案太宗時宋沆貶宜州團練使。

河池縣不詳何年併省。案本卷載大觀元年以宜州河池縣置庭州。倚郭縣曰懷德。是河池初未併省，而其升州之年固可考也。但彼文云：大觀四年廢庭州，而不言仍隸宜州。此云南渡後增縣，一曰河池，而不言庭州併省。本末一卷之中，不相檢照如此。

鎮州。大觀元年置鎮州。賜靜海軍額。政和元年廢鎮州。以靜海軍額爲瓊州。靜海當作靖海。音之譌也。

據本志及徽宗紀靜海乃交州軍額。

河渠志一

我世祖皇帝命學士蒲察篤實西窮河源。元史作都實。都篤聲相近。

廿二史考異卷七十

宋史四

禮志五

又加上五嶽帝后號。東曰淑明。南曰景明。西曰肅明。北曰正明。正明本是貞明。史家避仁宗嫌名追改。二月七日。宴羣臣于大明殿。史家紀日。例書干支。從無以一二數者。惟宋史禮志則否。可遣官往建康府元符萬歲宮。萬歲當作萬寧。景定建康志。元符萬寧宮。在茅山。徽宗皇帝御題榜。

禮志八

伯魚母拜官氏。鄆國夫人。拜當作并。鄆當作鄆。今曲阜孔廟石刻追封敕。文字完好可證。漢禮器碑。并官聖妃。在安樂里。元至順元年。加封文宣王妻并官氏爲大成至聖文宣王夫人。詔今句容縣有石刻。亦作并。與宋碑正同。世俗稱孔子妻拜官氏。本于家語。家語近代刊本多譌字。考漢宋元石刻。俱是并字。殆明以來轉寫之誤爾。

二年五月乙卯。詔追封十哲爲公。七十二弟子爲侯。案文獻通考。是年贈侯者六十二人。并十哲爲七十二人。志云七十二侯。誤也。又考大觀二年。追封公夏首等十人。改封曾參等八人。政和五年。追封樂

正子克等十七人。又大觀三年。追封算學。祀風后等六十六人。禮志皆備書。而祥符追封七十二人。爵號。獨不備載。亦例之疏也。

後魏商紹長樂子。商紹卽殷紹。避宋廟諱。改。藝文志五行類。有商紹太史堪輿麻一卷。唐書作殷紹。

咸淳三年。詔封曾參。邲國公。孔伋。沂國公。配享先聖。案。自唐至于治平。先師配位。惟有顏子。熙寧始增。

孟子。政和又進王安石。未幾降入從祀。仍止顏孟二配。至是始進曾子。子思。升居孟子之上。其位皆東面。非若十哲之分列東西也。

費公闕損。薛公冉雍。黎公端木賜。衛公仲由。魏公卜商。居殿上東面。西向北上。鄆公冉耕。齊公宰予。徐公冉求。吳公言偃。陳公顓孫師。居殿上西面。東向北上。案。大中祥符初。追封闕損。琅邪公。冉耕。東平公。冉雍。下邳公。宰予。臨淄公。端木賜。黎陽公。冉求。彭城公。仲由。河內公。言偃。丹陽公。卜商。河東公。其進封一字公。未詳何時。志亦失書。

秦將王翳鎮山伯。當是恆山避諱。易恆爲鎮。

禮志十

時宰臣趙汝愚。旣以安石之論爲非。異議者懼其軋已。藉以求勝。事旣不行。熹時已得罪。遺汝愚書。子謂儔祖之當祧久矣。熙寧集議。則韓維是而安石非。紹熙集議。則汝愚是而元晦非。元晦尊程氏學。而

伊川亦取安石之說。故持其議甚堅。至詆汝愚以爲拆祖宗之廟。以快其私。此負氣之強詞。非至公之正論也。宗廟之禮。有以功德而尊之者。是百世不祧者也。有以四親而尊之者。是親盡則祧者也。宋之帝業。起于太祖。自宣祖而上四廟。以天子之高曾祖禰而祀之。非以其有功德而祀之也。五服之制。父至親而祖次之。曾高又次之。宣祖尙可祧。何獨僖祖不可祧乎。僖祖既非得姓之始。又非封爵之始。方諸殷周。則報乙組紺之流也。而欲擬稷契以爲始祖。謬矣。如謂已立之廟。不當更毀。則禮何以有廟祧壇墀之別。如謂太祖在天之靈。必有所不忍。則順翼宣三祖。何又忍而去之。安石之顛僻。固不足道。元晦南渡。儒宗。乃守一先生之言。不復權其當否。斯爲通人之蔽矣。

禮志十二

元豐五年。始就宮作十一殿。悉迎在京寺觀神御入內。盡合帝后。奉以時王之禮。案長編紀事本末云。詔有司度宮之東西。建六殿爲原廟。奉祖宗之靈。設以昭穆之次。列于左右。又爲別殿五于其北。以奉母后。宣祖殿名曰天元。藝祖曰皇武。太宗曰大定。眞宗曰熙文。仁宗曰美成。英宗曰治隆。長編不載。母后五殿名。以此志參考之。當卽太始。儷極。輝德。衍慶。而尙缺其一。後讀咸淳臨安志。載景靈宮諸殿名。宣祖天元后太始。太祖皇武后儷極。太宗大定后輝德。眞宗熙文后衍慶。仁宗美成后繼仁。英宗治隆后徽音。乃知所缺者繼仁一殿也。元豐開英宗后尙無恙。故帝六而后止五。

其殿名徽宗曰承元。欽宗曰端慶。高宗曰皇德。孝宗曰系隆。光宗曰美明。寧宗曰垂光。案臨安志徽宗后曰順承。欽宗后曰續德。高宗后曰章順。孝宗后曰嗣徽。光宗后曰光順。寧宗后曰體德。此志亦失書。

禮志十四

紹興十三年閏四月十七日冊貴妃吳氏爲皇后。案高宗紀閏月己丑立貴妃吳氏爲皇后。以前後月日檢之己丑非十七日當有一誤。

禮志十六

元祐二年九月經筵講論語徹章賜宰臣執政經筵官宴于東宮帝親書唐人詩賜之。此事一卷兩見。一在大宴一在曲宴。

景德二年十二月五日宴尙書省五品云云。案景德紀元止于四年而此下有六年七月二十九日詔輔臣觀粟于後苑云云當是大中祥符之六年也。其下又云四年七月十一日詔近臣及寇準馮拯觀內苑穀云云十月二十九日詔皇太子宗室近臣諸帥赴玉宸殿觀稻云云則天禧之四年也。真宗以天禧二年冊皇太子此有皇太子必在天禧以後矣。真宗紀天禧四年十月丙午召皇子宗室近臣玉宸殿觀稻賜宴卽其事也。

禮志二十一

又詔應節鎮郡守。往令陸辭歸許登對。不特審觀人材。亦所以重外任也。節鎮郡守。謂節度州之知州也。春明退朝錄云。凡節度州爲三品。刺史州爲五品。

禮志二十二

至和初。太常博士祖無擇言。案前史。孔子後襲封者。在漢魏。曰襲成。襲尊宗聖。在晉宋曰奉聖。後魏曰崇聖。北齊曰恭聖。後周隋竝封鄒國。唐初曰襲聖。開元中。始追諡孔子爲文宣王。又以其後爲文宣公。不可以祖諡而加後嗣。遂詔有司。定封宗愿衍聖公。無擇疏已見本傳。太常博士。蓋其寄祿官。而傳失書。襲尊當作襲亭。

熙寧中以四十八代孫若蒙。爲沂州新泰縣主簿襲封。考闕里志。若蒙。若虛。皆宗愿之子。當云四十七代。志稱若虛卒。以若蒙子端友襲。端友卒。弟端操子玠襲。玠卒。子楷襲。楷卒。子文遠襲。文遠卒。子萬春襲。萬春卒。子洙襲。史但書其名而不著世系。亦疏漏也。

禮志二十六

太祖建隆二年六月二日。皇太后杜氏崩于滋德殿。諸后妃崩薨諡號祔廟先後之序。已見后妃傳。其月日則本紀復詳書之。而禮志園陵篇。又一一載入。此重複之甚也。

選舉志一

直史館蘇軾曰。得入之道。在于知人。知人之法。在于責實。使君相有知人之明。朝廷有責實之政。則胥史
卑隸。未嘗無人。雖用今之法。臣以爲有餘。使無知人之明。責實之政。則公卿侍從。常患無人。況學校貢
舉乎。雖復古之制。臣以爲不足矣。時有可否。物有興廢。使三代聖人。復生于今。其選舉亦必有道。何必
由學乎。且慶厯開嘗立學矣。天下以爲太平可待。至于今。惟空名僅存。今陛下必欲求德行道藝之士。
責九年大成之業。則將變今之禮。易今之俗。又當發民力以治宮室。斂民財以養游士。置學立師。而又
時簡不帥教者。屏之遠方。徒爲紛紛。其於慶厯之際。何異。至于貢舉。或曰鄉舉德行而略文章。或曰專
取策論而罷詩賦。或欲舉唐故事。采譽望而罷封彌。或欲變經生帖墨。而考大義。此數者皆非也。云云。
帝讀軾疏曰。吾固疑此。得軾議釋然矣。案軾傳亦載此疏五百餘言。大略相同。
願以解額之歸升貢者一二分不絕科舉。此語難解。考毛注傳本云願留貢籍三分暫存科舉。以待學
外之士。較之此文稍明白。

選舉志二

先召試蔡延慶等十人。案十人之名。見于麟臺故事。蓋度支員外郎蔡延慶。屯田員外郎葉均。太常博
士劉攽。夏倚。太子中允張公裕。大理寺丞李常。光祿寺丞胡宗愈。威武軍節度推官章惇。前密州觀察
推官王存。而尙缺其一也。及召試學士院。以劉攽。王存爲館閣校勘。張公裕。李常爲祕閣校理。胡宗愈

爲集賢校理。夏倚、章惇雖入等。以御史有言。倚得江西轉運判官。惇改著作佐郎而已。宋史、蔡延慶傳不云爲度支員外郎。李常傳不云爲大理丞。章惇傳不云爲雄武軍節度推官。蓋程俱所記皆寄祿之官。而史所載者差遣之官。似異而實非異也。

選舉志四

凡改官。留守兩府兩使。謂節度觀察判官。進士授太常丞。餘人太子中允。支使掌書記防禦團練判官。進士授太子中允。餘人著作佐郎。兩使推官。軍事判官。令錄事參軍。進士授著作佐郎。餘人大理寺丞。初等職官。知縣知錄事。參軍防禦團練軍事推官。軍監判官。進士授大理寺丞。餘人衛尉寺丞。惟判司主簿縣尉七考。進士授大理寺丞。餘人衛尉寺丞。此選人改官之制。亦見職官志。所云有出身。進士也。無出身者。奏蔭也。選舉志謂之餘人。

凡制舉。進士九經出身者。校書郎。正字。寺監主簿。助教。竝轉大理評事。職官志無評事。轉本寺丞。任太祝奉禮郎者。轉諸寺監丞。諸寺監丞轉著作佐郎。或特遷太子中允。祕書郎。由大理寺丞轉殿中丞。由著作佐郎轉祕書監丞。資淺者或著作郎。優遷者爲太常丞。職官志第一人及第者評事轉祕書郎。轉太常丞。職官志祕書郎與太常宗三丞著作。皆遷太常博士。轉屯田員外郎。優者爲禮部工部祠部主客。由屯田轉都官。優者爲戶部刑部度支金部。由都官轉職方。優者爲吏部兵部司封司勳。

其轉郎中亦如之。六部二十四司分爲前行中行後行凡三等左右司員外郎。太平興國中有之。後罕除者。左右司郎中。惟

待制以上。皆爲少卿者。卽爲之。由前行郎中轉太常少卿。祕書少監。職官志脫祕書少監一官由此二官轉右諫議

大夫。或祕書監光祿卿。諫議轉給事中。資淺者或右轉左給事中。轉工部禮部侍郎。至兵部吏部轉左

右丞。由左右丞轉尙書。自侍郎以上。或歷曹。或超曹。皆繫特旨。侍郎敘遷則由工而刑而兵而轉右丞。則六部各諸科及無出身者。校書郎正字寺監主簿助教。並轉太祝奉禮郎。太祝奉禮郎轉大理評事。

評事轉諸寺監丞。諸寺監丞轉大理寺丞。大理寺丞轉中舍。優者爲左右贊善。資淺者爲洗馬。由幕職

爲著作佐郎者。轉太子中允。由中允贊善。中舍洗馬。皆轉殿中丞。職官志太子中允轉太常丞殿中丞轉國子博士。

由國子博士轉虞部員外郎。優者爲膳部。由虞部轉比部。優者爲倉部。由比部轉駕部。優者爲考功。或

由水部轉司門。司門轉庫部爲郎中亦如之。至前行郎中轉少卿監。或一轉。或二三轉。卽爲諸司大卿

監。自大卿監特恩獎擢。或入給諫焉。職官志前行郎中轉司農少卿再轉光祿少卿三轉司農卿四轉

轉至工部侍郎其爲臺省官。則正言監察。比太常博士殿中司諫。比後行員外郎。起居郎舍侍御史。比中行員

外郎。起居轉兵部吏部員外郎。職官志失侍御史轉職方員外郎。優者爲兵部司封。職官志侍御史祇

有脫知制誥。由正言以上至郎中。皆敘遷兩資。中行郎中爲左右司郎中。若非次酬勞。有遷三資。或止

一資者。左右司郎中爲知制誥。若翰林學士者。知制誥與翰林學士謂之兩制遷中書舍人。由中書舍人轉禮部。以上。

侍郎入丞郎，卽越一資以上，內職學士待制亦如之。此文官敘遷之制，亦見職官志。

其內職自借職以上，皆循資兩遷。兩疑是而字至東頭供奉官者，轉閣門祇候，閣門祇候轉內殿崇班，崇班轉

承制，承制轉諸司副使。此亦見職官志。但彼志東頭供奉官，卽轉內殿崇班，少閣門祇候一資。

至皇城使者，轉昭宣使，昭宣使轉宣慶使，宣慶使轉景福殿使。此亦見職官志。

凡入官，則進士。職官志，又有明經。又入望州判司，次幾簿尉，九經入緊州判司，望縣簿尉，五經三禮通禮三傳三史

明法，入上州判司，緊縣簿尉，學究有出身人。職官志云，武舉得班行人。入中州判司，上縣簿尉，太廟齋郎，入下州

志云中下州。判司，中縣簿尉，郊社齋郎，試銜無出身人，入下州判司，中下縣簿尉。此亦見職官志。

除授職事官，並以寄祿官品高下爲法。凡高一品以上者爲行，下一品者爲守，二品以下者爲試，品同者

不用行守試。此亦見職官志。

中書舍人程大昌言，舊制選人改秩後，復任關升通判，通判兩任，關升知州，知州兩任，卽理提刑資序。除

授之際，則又有別，以知縣資序，隔兩等而作州者，謂之權發遣，以通判資序，隔一等而作州者，謂之權

知，上而提刑轉運亦然，隔等而授，是擇材能也。結銜有差，是參用資格也。今得材能資格，俱應選者爲

上，其次則擇第二任知縣，以上有課績者，許作郡，初任通判以上，許作監司，第二任通判以上，許作職

司，庶幾人法並用。案此奏見周必大集，蓋與大昌連名具奏者。

選舉志六

淳熙二年因臣僚言沿邊七路每路以文臣一人充安撫使以治民武臣一人充都總管以治兵此亦見職官志七路謂揚州、廬州、荊南、襄陽、金州、興元、興州也。

廿二史考異卷七十一

宋史五

職官志一

又以文彥博落兼侍中。除守太尉。彥博先以守司徒兼侍中領節鎮。元豐改官制。以侍中爲職事官。非退閑者所宜帶。故落侍中之名。仍遷一官以寵之。太尉在司徒之上也。

太保十一人。蔡攸、肅王樞、至儀王樗。文獻通考同。今以徽宗紀考之。宣和中皇子除太保者。肅王樞、景王杞、

濟王栩、康王構、祁王模、徐王棣、沂王樗。祇有七人。鄭居中除太保而卽薨。定王桓由太保正儲位。嘉王楷由太保進太傅。俱不當在計數之內。疑志誤也。儀王當爲沂王。音之譌。

自建隆至熙寧。眞拜侍中纔五人。洪邁容齋隨筆云。國朝見任宰相帶侍中者才五人。范魯公質、趙韓王普、丁晉公謂、馮魏公拯、韓魏王琦。

左司諫左正言。案司諫正言卽唐之補闕拾遺也。宋初亦沿其名。端拱元年二月。改補闕爲司諫。拾遺爲正言。志失書。

登聞檢院。隸諫議大夫。登聞鼓院。隸司諫正言。唐時有甌院。太宗雍熙元年。改甌院爲登聞鼓院。東延

恩甄為崇仁檢院。南招諫甄為思諫檢院。西申冤甄為申明檢院。北通元甄為招賢檢院。

重和元年。給事中張叔夜言。文獻通考作宣和元年。

中書令。國朝未嘗真拜。以它官兼領者。不預政事。然止曹佾一人。容齋隨筆云。國朝勳業之初。吳越國

王錢俶。天雄節度符彥卿。雄武王景。武寧郭從義。保大武行德。成德郭崇。昭義李筠。淮南李重進。永興

李洪義。鳳翔王彥超。定難李彝興。荆南高保融。武平周行逢。武寧王晏。武勝侯章。歸義曹元忠十五人。

同時兼中書令。太宗朝惟除石守信。而趙普以故相拜。真宗但以處親王。嘉祐末。除宗室東平王允弼。

襄陽王允良。元豐中除曹佾。與允弼。允良相去十七八年。爵秩固存。沈括筆談。謂有司以佾新命。言自

來不曾有活中書令請俸則例。蓋妄也。

舍人四人。舊六人。掌行命令。為制詞。案中書舍人六員。分押尚書六曹。本唐代故事。宋初以舍人為寄

祿官。別置知制誥。行舍人之職。春明退朝錄。載端拱中西掖六舍人。既而田錫罷職。知陳州。宋湜貶均

州團練副使。王之商州團練副使。是知制誥亦以六人為額也。又考容齋三筆。載至和元年。鄧州繳

進王公春秋通義一書。二年。有旨送兩制看詳。于是具奏列名知制誥五人。起居舍人王珪。右司諫賈

舍人吳奎。右春明錄。又載熙寧二年。閣老錢君倚守江寧。明年予自請出院。李才元。蘇子容皆落職。惟

吳冲卿權三司使。不供職閣下。無人草制。則其時知制誥亦止五人矣。志云舍人四人。則元豐新定之

制也。

國初爲所遷官實不任職。復置知制誥及直舍人院。主行詞命。與學士對掌內外制。唐中葉以後。翰林學士掌內制。中書舍人掌外制。謂之兩制。然亦恆以它官知制誥行舍人事。唐末趙光逢以中書舍人爲翰林學士。其弟光裔亦由膳部郎中知制誥。對掌內外命書。士歆羨之。後晉時陶穀以虞部員外郎知制誥。會晉祖廢翰林學士。遂兼掌內外制。周廣順中。竇儼以主客員外郎知制誥。其兄儀自閣下入翰林。兄弟同日拜命。分居兩制。時人榮之。又扈蒙以右拾遺知制誥。從弟載時爲翰林學士。兄弟竝掌內外制。時號二扈。蓋知制誥與學士對掌兩制。自唐五代皆然。不始于宋初矣。直舍人院。太平興國初置。以張洎、王克正爲之。自後不復除。熙寧三年。宋敏求、蘇頌、李大臨皆以知制誥繳還李定詞頭。罷免。王安石乃請以蔡延慶、王益柔直舍人院。欲令草李定制。乃除知制誥也。自元豐官制行。舍人始復舉其職。以資淺而除直院者益多矣。

凡有除拜。中書吏赴院納詞頭。文獻通考富弼爲知制誥。封還劉從愿妻遂國夫人詞頭。唐時唯給事中得封還詔書。中書舍人繳詞自弼始。

南渡後。置左右丞相。省僕射不置。南渡初。亦仍左右僕射之名。至乾道八年。乃改爲丞相耳。志所云未核。

職官志二

簽書院事同簽書院事。案太平興國四年置簽署樞密院事以密樞直學士石熙載爲之八年以張齊賢王沔同簽署院事景德三年馬知節韓崇訓亦爲簽署史家避英宗諱改署爲書爾治平中郭達以檢校太尉同簽書樞密院事簽書之名始于此。

三司使五代會要後唐長興元年八月敕張延朗可充三司使班位在宣徽使之下唐朝以戶部度支掌泉貨鹽鐵則別置使名戶部度支則尙書省本司侍郎郎中判其事天寶中楊慎矜王鉷楊國忠雖承恩顧皆守本官別帶使額下及劉晏第五琦亦如舊制自後又以宰臣各判一司不帶使額僞梁置租庸使總天下徵賦莊宗亦踵其事暨今上登位削去使名命重臣一人專判曰判三司至是延朗自許州入掌國計白于樞密使請置三司使宣下中書門下宰臣以非故事擬授延朗充諸道鹽鐵使兼判戶部度支上不從三司置使名自延朗始也。

翰林學士洪容齋云翰林本以六員爲額劉沆作相典領溫成皇后喪事以王洙同其禮建明于是員外用之至和二年鄧州繳進王汾春秋通義有旨送兩制看詳其時學士七人曰學士承旨禮部侍郎楊察學士中書舍人趙槩楊偉刑部郎中胡宿吏部郎中歐陽修起居舍人呂溱禮部郎中王洙郎其時也予案新唐志雖云學士無定員然白居易詩有同時六學士五相一漁翁之句則唐時學士亦

六員矣。五代會要載開運元年，敕翰林學士與中書舍人，舊分爲兩制，各置六員，是五代亦六員也。南渡後，學士不輕授，常以它官直院，然亦不過二員，閒有三員者，則周必大所記。紹興八年，承旨孫近直院會開，勾龍如淵三十一年，學士何溥直院，虞允文、劉珙、隆興初，承旨洪遵，學士史浩直院，劉珙是也。

見淳熙玉堂雜記

知制誥。邵埭編云：翰林學士，祖宗時多有別領它官，如開封府三司使之類者，不復歸院供視草之職，故銜內必帶知制誥，則掌詔命者也。官制後雖不領它職，然猶帶知制誥如故，遇闕則以侍郎給舍兼直學士院。近歲有以尙書兼權翰林學士者，而不帶知制誥，議者謂不若止稱直學士院也。予案元豐以前，兩制皆稱知制誥學士，而知制誥者，掌內制也，但稱知制誥者，掌外制也。學士而不掌制，則銜內不云知制誥。

直學士院。直院始于宋初。春明退朝錄：開寶二年，李文正以中書舍人，盧相以知制誥，竝命直學士院。六年，知制誥張公濟直學士院。太平興國元年，湯率更悅、徐騎省鉉直學士院是也。自後久無除者，熙寧初乃復置。

凡他官入院，未除學士，謂之直院學士，俱闕他官，暫行院中文書，謂之權直。周必大玉堂雜記：國初久爲學士官，至八座已罷職，或再來直院，神宗改官制後，中丞并權六曹尙書，若兼內制，亦止云直學士。

院。舒亶等是也。中興初詹父已爲龍圖閣學士。猶曰權直院。其它如正侍郎以下。多帶兼權。汪藻等是也。厥後程克俊、林待聘、楊愿等。初以給舍兼權。稍久乃落權字。以爲恩數。至正尙書。則帶兼權學士。胡交修等是也。乾道三年。洪景廬奏請自庶官遷侍從。便落權字。正兼直院。故先以起居郎權直院。既遷中書舍人。卽落權字。庚寅秋。予以小蓬監書少兼權直院。明年正除權禮部侍郎。吏引近制。申明合正爲直院。予故抑之。兼權如故。輸長王日。嚴囑亦不復問。其後王季海。淮以太常少卿兼權直院。既除三字。中書舍人也。卽徑落權。遂爲定例。

翰林侍讀學士。侍讀侍講。崇政殿說書。皆經筵官也。程俱麟臺故事云。翰林侍讀學士。翰林侍講學士。班秩次翰林學士。祿賜如之。設直廬于祕閣。侍讀更直侍講。長上日給尙食珍膳。夜則迭宿。令中使日具當宿官名于內東門。進入召對詢訪。或至中夕焉。

中興後。王賓爲御史中丞。建請復開經筵。遂命兼講。自後十五年間。繼之者惟王唐、徐俯二人。案朝野雜記云。爲王唐公、徐師川二人。蓋皆舉其字。唐公未詳其名。志稱王唐。恐誤。

正言兼說書。自端明巫伋始。副端兼說書。自端明余堯弼始。端明殿學士。蓋二人所終之官。非說書時已任端明也。當刪去端明二字。乃合史法。

察官兼說書。自少卿陳夔始。少卿二字亦當刪。

修注兼說書。自朱震始。案震以祕書少監轉起居郎兼侍講非說書也。

龍圖閣直學士景德四年置以杜鎬爲之。班在樞密直學士下。案樞密直學士五代置。宋初尤爲要職。

石熙載張齊賢皆由樞密直學士簽署樞密院事亦有帶出外任者如劉筠自翰林爲臺丞以樞密直學士知穎州李諮以翰林權使三司以樞密直學士知洪州是也。元豐改制不置此官志遂闕而不書。國初有集賢殿修撰直龍圖閣直祕閣三等。此三等謂貼職也。

直館直院則謂之館職。自太宗建崇文院及祕閣而後士大夫以館職爲榮皆試而後除。曰直昭文館直集賢院直史館直祕閣其次爲集賢校理祕閣校理又其次爲館閣校勘皆館職也。其餘授則由校勘遷校理又自校理遷直館直院亦有召試徑除直館直院者。

凡狀元制科一任還卽試詩賦各一而入否則用大臣薦而試謂之入館。選舉志英宗時歐陽修言。往時入館有三路。進士高科一路也。大臣薦舉一路也。因差遣例除一路也。此志祇言高科及薦舉蓋因差遣而除者皆年勞久次之人不試而授所謂貼職非真館職也。以史考之王曾以進士第一人通判濟州代還召試政事堂除著作郎直史館李諮以進士第三人通判舒州召試中書爲太子中允直集賢院此進士甲科入館之例也。富弼舉茂材異等科授簽書河陽判官又通判絳州遷直集賢院錢易進士第二人又舉賢良方正科策入等除祕書丞通判信州東封獻殊祥錄改太常博士直集賢院錢

漢進士第。又中賢良方正科。爲祕閣校理。此制科入館之例也。彭乘以進士及第授鳳州團練推官。用寇準薦爲館閣校勘。聶冠卿以進士授連州軍事推官。用大臣薦召試校勘館閣書籍。尹洙以進士又舉書判拔萃科。知伊陽縣。用大臣薦召試爲館閣校勘。此大臣薦舉入館之例也。又有自薦而試者。咸平初。祕書丞孫冕。上書言事。召賜緋魚令。知制誥王禹偁試文。除直史館是也。有大臣子弟乞恩召試者。至和初。宰相劉沆監護溫成園寢畢。辭恩賚而爲其子瑾請召試館職。遂得祕閣校勘是也。至如包拯爲京東轉運使。除直集賢院。徙陝西韓億。自河北轉運使進直史館。知青州。文彥博自殿中侍御史。除直史館。河東轉運副使孫冲由轉運使入判登聞鼓院。以目疾改直史館。知河中府。此因差遣例除者也。

職官志三

初。淳化三年。置磨勘京朝官院。四年改。太平興國中。置差遣院。至是併入審官院。案文獻通考。淳化三年。置磨勘京朝官院。又以興國中所置差遣院併入。號磨勘差遣院。亦名考課院。淳化四年。以考課京朝官院爲審官院。此志所云。殊未明曉。又熙寧中。置審官西院。以主武選。改審官院爲審官東院。此志所當載而失之者也。元豐定官制。以審官東院爲尙書左選。審官西院爲尙書右選。流內銓爲侍郎左選。三班院爲侍郎右選。志亦失書。三班院亦淳化三年置。

凡文官自京朝官武官自大使臣以上。元豐官制。文官通直郎以上爲升朝官。承務郎以上爲京官。下此則爲幕職令錄以屬。

職官志四

臺諫例不兼講讀。神宗命呂正獻亦止命時赴講筵。中興兼者三人。方俟高羅汝楫皆以秦檜意。慶元後。司諫以上無不預經筵者矣。詳見第二卷侍講學士下。此重出也。中興兼者三人。謂王賓王唐公。名未詳徐俯。

凡六察之事。六察者。吏察戶察禮察兵察刑察工察也。

孫覺薦秀州軍事推官李定對稱旨爲太子中允。監察御史裏行。軍事推官。乃遷人階官之卑者。乃越京官五階而驟遷朝官。故當時譏其資淺。

宋初置三館。長慶門北。謂之西館。文獻通考。先是朱梁都汴。正明中始以今右長慶門東北廬舍十數間。列爲三館。則宋初三館。尙沿五代之舊也。

東廊爲集賢書庫。西廊分四部。爲史館書庫。東廊下有脫文。當云東廊爲昭文書庫。南廊爲集賢書庫。大中祥符八年。剏外院于右掖門外。案是年榮王宮火。焚及崇文院。故有外院之設。天聖九年。徙三館于左昇龍門外。因直集賢院謝絳之請也。志當書而闕之。

天禧初令以三館爲類。置檢討校勘等員。案長編。端拱元年。以史館檢討杜鎬爲祕閣校理。又麟臺故事云。大中祥符元年。崇文院檢討杜鎬等。校定南華真經。則檢討之名。不始于天禧矣。

元祐五年。置集賢院學士。案唐制。弘文館集賢院。分隸門下中書省。以見任宰相領大學士。其下則有學士。直學士。弘文則有直館。集賢則有校理。宋初尙沿其制。惟改弘文爲昭文。而集賢亦置直院焉。昭文館學士。罕見除授。集賢院學士。則自宋初至于熙寧。史不絕書。或判院事。如咸平之錢若水。或帶外任。如天禧之馬亮。慶厯之李宥。或判留臺。如天禧之晁迥。皇祐之吳育。而志于學士篇中。初不之及。蓋闕漏也。志云元祐五年置者。蓋元豐改官制後廢之。至是乃復置爾。

監修國史。案宋初。史館與昭文集賢。列爲三館。以宰相一人監修國史。其下有修撰。有直館。元豐更官制。廢三館爲祕書省。分四案。國史案其一也。此亦志所當書而失書。

職官志六

乾道中。臣僚言三衙軍制名稱不正。此洪邁在翰林日所上劄子也。殿前司。侍衛馬軍司。侍衛步軍司。當時謂之三衙。各置都指揮使。副都指揮使。都虞候。皆帥也。故有三帥殿前步軍二司題名。今不可考矣。馬軍司題名。則景德建康志有之。考其所載。自建炎以後。皆稱主管侍衛馬軍司公事。至乾道九年。始除趙樽都指揮使。淳熙二年。除李川王明皆都虞候。三年。除吳拱都指揮使。六年。除馬定遠。七年。除

雷世賢。皆都虞候。十二年。世賢遷副都指揮使。紹熙元年。除張師顏都虞候。是容齋之議。固已見諸施行。開禧以後。復有主管馬軍司公事之稱。閒有除副都指揮使及都虞候者。不過十之一二耳。

侍衛親軍馬軍。案。孝宗乾道七年。移侍衛馬軍司屯建康。故志有出屯建康之語。

次府通判一人。大藩或置兩員。凡通判置兩員者。則稱東廳西廳以別之。南渡後。建康府于兩員外添差一員。謂之南廳。

中興諸大將。若韓、張、呂、岳、楊、劉之流。率至兩鎮節度使。謂韓世忠、張俊、呂文德、岳飛、楊存中、劉光世也。

呂當在楊劉之下。或云呂當作吳。吳玠亦嘗兼兩鎮也。

劉錡護國寧武保靜。劉錡當作劉光世。

自建炎至嘉泰。宰相特拜者六人。案。寶慶以後。宰相除節度者。喬行簡、鄭清之、趙葵三人。志于理宗以後事多闕漏。

團練使。宋時有節度副使。團練副使。皆爲責授官。不得簽書公事。呂惠卿。責授建寧軍節度副使。范純仁。章惇。皆責授武安軍節度副使。呂大防。責授舒州團練副使。劉摯。責授鼎州團練副使。是也。責授官亦宜見于志。

職官志七

開禧間江准四川竝置大使。休兵後獨成都守臣帶四川安撫制置使。案景定建康志開禧三年置江准制置使治建康。嘉定十年省。紹定三年復置。六年改沿江制置使。是建康不設制司中間祇十年耳。志云休兵後獨成都守臣帶制置使者非也。開禧置使本無大字。嘉定元年邱審始加大使。何澹代審亦爲大使。皆前執政也。紹定四年趙善湘亦爲大使。自改沿江以後寶祐六年除趙與憲開慶元年除馬光祖皆爲大使。

又有沿海制置使以明州守臣領之。案宋末沿江沿海皆有制司。又有京湖制置使或治江陵或治鄂州。兩淮制置使治揚州。又管置淮東制置司于楚州。廣南制置司于靜江。志皆失于討論也。

留守。紹興五年卽建康府治建行宮。自後建康守臣皆兼行宮留守。此志亦失書。

經略安撫司。經略安撫使一人。案眞宗咸平二年以王欽若爲西川安撫使。安撫之名始此。四年以張

齊賢爲涇原等路安撫經略使。以梁顥爲副。陝西有經略安撫使自此始。然皆不常置也。六年錢若水除并代經略使知并州。此太原置使之始。景德元年以張齊賢兼青淄濰安撫使知青州。後稱京東東路丁謂

兼鄆齊濮安撫使知鄆州。後稱京東西路此京東置使之始。是年向敏中爲鄆延路緣邊安撫使。三年置河北

緣邊安撫使于雄州。大中祥符元年置河東緣邊安撫司。三年詔昇洪揚廬州長吏兼安撫使。八年曹瑋知秦州兼涇原儀渭鎮戎沿邊安撫使。天禧三年瑋爲鄆延路副都部署。環慶秦等州緣邊安撫使。

然皆或置或省，非有定員。仁宗寶元元年，知永興軍夏竦兼涇原秦鳳路安撫使，知延州范雍兼鄜延環慶路安撫使。康定元年，以夏守贇爲宣徽南院使，陝西馬步軍都總管，經略安撫使。慶曆四年，罷陝西四路馬步軍都總管，經略安撫招討使，復置隨路都總管，經略安撫招討使。四路者，秦鳳、涇原、治涇州環慶、治慶州鄜延也。其後罷招討之名，又置永興軍、治京州熙河、治熙州兩路，而陝西六路安撫，有定員矣。慶曆三年，置京東西路安撫使。八年，置河北四路安撫使。大名府、真定府、定州、瀛州皆無經略之名。皇祐四年，詔廣桂二州帶經略安撫使。自是以後，諸州府帶安撫使者益多矣。

熙寧初，詔河東河北陝西三路漕臣許乘傳赴闕。案宋人稱轉運爲漕司，安撫爲帥司，提點刑獄爲憲司，提舉常平爲倉司，故有漕臣、帥臣、憲臣之目。

提點刑獄公事 呂祖謙曰：太宗淳化二年，詔應諸路轉運使各命常參官一人，專知糾察州軍刑獄公事。此置外路刑獄官之始。事猶隸轉運司。行之二年，勞擾無補，降詔省罷。真宗景德四年，遂復置之。不隸轉運，別爲一司。仁廟天聖六年，詔令諸路提點刑獄司朝臣文臣也使臣武臣也交劄本職公事，與轉運使副。既罷兩年，天聖八年九月復置，仍令所至毋得送迎，其吏人約舊數裁減之。降詔十月九日，是月壬申，卻權罷。又三年，至明道二年冬復置。自後提刑一司，雖專以刑獄爲事，封樁錢穀盜賊保甲軍器河渠事務浸繁，權勢益重，而轉運司所總，惟財賦綱運之責而已。

其後文武官參爲知州軍事。予見石刻孔道輔祭祖廟文題銜。知兗州軍府事。又游師雄墓誌題銜。知陝州軍府事。蓋大都督府亦稱軍府。不稱軍州也。

二品以上。及帶中書樞密院宣徽使職事稱判。案宋敏求春明退朝錄云。國初曹翰以觀察使判潁州。是以四品臨五品州也。品同爲知。隔品爲判。自後唯輔臣宣徽使。太子太保僕射爲判。餘竝爲知州。又徐度卻掃編云。祖宗時凡官僕射及使相以上。領州府則稱判。元符末。章僕射罷相。以特進守越州。止稱知。蓋謫也。宣和中。余太宰深。以少傅節度使守福。復稱知。建炎中。呂僕射頤浩。以使相守池。守潭。守臨安。皆稱知。趙丞相鼎。官本特進。再罷相。初以節度使守紹興。後改本官守泉。皆稱知。近歲孟郡王忠厚。以使相守鎮江。亦稱知。後改婺州。改稱判。

若河南。應天。大名府。則兼留守公事。南渡後。建康府亦兼行宮留守。

太原府。延安府。慶州。渭州。熙州。秦州。則兼經略安撫使。馬步軍都總管。案嘉泰會稽志云。國初節度使。領馬步軍都部署。英宗卽位。避御名。改稱都總管。其後守臣兼一路安撫使者。皆帶馬步軍都總管。以

此推之。河東。陝西。諸路。經略安撫使。皆置于仁宗朝。當爲都部署。志稱都總管者。據後來改名也。

瀘州。潭州。廣州。桂州。雄州。則兼安撫使。兵馬鈐轄。南渡後。潭。廣。桂三州。皆帶馬步軍都總管。

廿二史考異卷七十二

宋史六

職官志八

建隆三年三月有司上合班儀。太師、太傅、太保、太尉、司徒、司空、東宮三太、嗣王、郡王、僕射三少。謂東宮三少

京牧、大都督、大都護、御史大夫、六尚書、常侍、門下、中書侍郎、太子賓客、太常、宗正卿、御史中丞、左右諫議大夫、給事中、中書舍人、左右丞。監本脫丞字諸行侍郎、祕書監、光祿、衛尉、太僕、大理、鴻臚、司農、大府卿、國子祭酒、殿中、少府、將作監、前任見任節度使、開封、河南、太原尹、詹事、諸王傅、司天監、五府尹、國公、郡公、中都督、上都護、下都督、庶子、五大都督、府長史、中都護、副都護、太常、宗正、少卿、祕書少監、光祿等七少卿、司業、三少監、三少尹、少詹事、諭德、家令、率更令、僕、諸王府長史、司馬、司天少監、起居郎、舍人、侍御史、殿中侍御史、補闕、拾遺、監察御史、郎中、員外郎、太常博士、五府少尹、五大都督、府司馬、通事舍人、國子、五經博士、都水使者、四赤縣令、太常、宗正、祕書丞、著作郎、殿中丞、六尚、奉御、大理正、中允、贊善、中舍、洗馬、諸王友、諮議參軍、司天、五官正、凡雜坐之次、以此為準。所謂雜壓也詔曰：尚書中臺萬事之本，而班列率次兩省官。監本大作比誤，今依禮志改。節度使出總方面，其檢校官多至師傅三公者，而位居九寺卿監之下。

甚無謂也。其給事中諫議大夫宜降于六曹侍郎之下。補闕次郎中。拾遺監察。次員外郎。節度使。升于中書侍郎之下。此亦見禮志。

開寶六年。詔晉王位望俱崇。親賢莫二。宜位在宰相之上。此亦見禮志。

翰林資政保和殿大學士。翰林無大學士之稱。此翰林二字衍文。

職官志九

太師、太傅、太保。謂之三師。太尉、司徒、司空。謂之三公。凡除授則自司徒遷太保。自太傅遷太尉。檢校亦如之。此文已見本志三師三公篇。又見合班篇。一志之中。前後三見。

治平二年。翰林學士賈黯奏。近者皇子封拜。竝除檢校太傅。臣謹案。三師訓導之官。蓋天子之所師法。今皇太子以師傅名官。于義弗安。莫甚于此。蓋前世因循。失于釐正。臣愚以爲自今皇子及宗室卑者。除官。竝不可帶師傅之名。隨其敍遷。改授三公之官。詔俟將來。因加改正。自此皇子及宗室卑行。遂不除三師官。此事又見賈黯傳。政和中。罷三公官。以太師太傅太保爲三公。而皇子之除保傅者益多矣。元豐官制定。有請并易內侍官名者。神宗曰。祖宗爲此名有深意。豈可輕議。政和二年。始遂改焉。此語已見本志入內侍篇。其所改則通侍。正侍。中侍。中亮。中衛。拱衛大夫。及供奉官。左侍禁。右侍禁。左班殿直。右班殿直。凡十一階。并黃門爲十二。此卷則以通侍大夫以下六官。列于武階之內。中亮大夫。本

易宣慶使。而此云客省使、中衛大夫。本易宣政使。而此云引進使、拱衛大夫。本易昭宣使。而此失書舊官名。其乖舛如此。但中亮、中衛、左武、右武四階。本以換橫班之名。而宣慶宣政二使。亦同換斯名。此又史文之可疑者也。

勳一十二。上柱國、柱國、上護軍、護軍、上輕車都尉、輕車都尉、上騎都尉、騎都尉、驍騎尉、飛騎尉、雲騎尉、武騎尉。此已見本志司勳篇。

紹興以後階官。案南渡文武寄祿官階。一遵元豐政和之舊。而志復重列之。連篇累牘。皆可省也。

職官志十

幕職。初授則試校書郎。再任如至兩使推官。則試大理評事、掌書記、支使、防禦團練判官。已上。試大理司直評事。又加則兼監察御史。亦有至檢校員外郎以上者。其解褐評事、校書郎、正字、寺監、主簿、助教者。謂之試銜。有選集。同出身例。此已見本志試秩篇。

在京宮觀舊制。以宰相執政充使。或丞郎學士以上充副使。兩省或五品以上。爲判官內侍官。或諸司使。副爲都監。又有提舉提點主管。案宮觀之設。昉于真宗祥符七年。建玉清昭應宮。以宰相王旦充使。參知政事丁謂爲副使。戶部侍郎林特同副使。左正言直集賢院夏竦爲判官。是年置景靈宮使。以中書侍郎平章事向敏中爲之。尙書右丞趙安仁爲副使。知制誥劉筠爲判官。九年。置會靈觀使。以參知

政事丁謂爲之。翰林學士李迪爲副使。知制誥樂黃目爲判官。天禧中建祥源觀。以樞密副使錢惟演爲都大管句祥源觀公事。天聖初。樞密副使張士遜爲祥源觀使。此宰執領宮觀使之例也。見李氏長編其後天聖七年。玉清昭應宮災。遂罷輔臣爲宮觀。而景靈、會靈、祥源三宮觀。以學士舍人管句。康定元年。李康靖公若谷罷參知政事。爲資政殿大學士。提舉會靈觀。自後學士皆爲提舉。至和初。晏元獻公殊以舊相爲觀文殿大學士。提舉萬壽觀。而武臣李少師端愿爲觀察使。止得管句祥源觀。自陳乃加以都管句。見春明退朝錄蓋提舉之名。不輕授如此。熙寧以後。乃有以朝官充提舉者。非故事也。玉清昭應之災。獨長生崇壽殿存。詔改爲萬壽觀。皇祐五年。會靈觀火。獨三聖御容得存。詔權奉安于景靈宮。更名集禧觀。治平中。又建醴泉觀。徽宗朝。又有祐神觀。先是雍熙元年。修東太一宮。天聖七年。修西太一宮。熙寧元年。又建中太一宮于集禧觀之東。此在京宮觀之目也。玉清、會靈先後焚燬。祥源觀亦于至和元年災。自後不置使職。徽宗重和元年。詔宰臣兼神霄玉清宮使。蔡京鄭居中。余深童貫。執政官充副使。鄧洵武薛昂。白時中。王黼開封尹充判官。少尹充管句。又詔天下天寧萬壽觀。改爲神霄玉清宮。小州監無道觀者。以僧寺充。知州軍帶管句字。通判帶同管句字。此亦宜見于志。今志但有靖康元年。罷內外官見帶提舉主管神霄玉清宮之文。而于置使副管句則不書。蓋失之矣。宮觀本置管句官。南渡後避思陵嫌名。改爲主管。志述東都事。而云主管或云管幹。則史臣追改也。

其戚里近屬及前宰執留京師者，多除宮觀，以示優禮。案明道中，錢文僖爲景靈宮使，其後王貽永、王德用、賈昌朝，皆以前執政爲景靈宮使。治平中，武康節度使李端愿，以外戚爲醴泉觀使。又仁宗時，李端懿，以鎮國軍節度留後提舉集禧觀，亦外戚也。

又詔杭州洞霄宮、亳州明道宮、華州雲臺觀、建州武夷觀、台州崇道觀、成都玉局觀、建昌軍仙都觀、江州太平觀、洪州玉隆觀、五嶽廟，自今竝依嵩山崇福宮、舒州靈仙觀、置管幹，或提舉提點官。徐度、邵埏編云：在外州府宮觀，舊惟西京崇福宮、南京鴻慶宮、舒州靈仙觀、鳳翔府上清太平宮、兗州仙源縣景靈宮、太極觀，有提舉管旬官。熙寧初，始詔杭州洞霄宮、永康軍丈人觀、亳州明道宮、華州雲臺觀、建州武夷觀、台州崇道觀、成都府玉局觀、建昌軍仙都觀、江州太平觀、洪州玉隆觀、五嶽廟、太原府興安王廟，皆置此志不及丈人觀。興安王廟，又文獻通考崇寧三年，添宮觀十，政和三年，添宮觀三十，志亦失書。靈仙觀，後改眞源。萬壽宮太平觀，後改太平興國宮。玉隆觀，後改玉隆萬壽宮。武夷觀，亦稱沖祐觀。列傳所載，又有亳州太清宮、建康府崇禧觀、兗州岱嶽觀、慶元府至道宮、紹興府千秋鴻禧觀，蓋政和以後增置。又有元封觀、太沖觀，未詳所在。

元豐中，王安石以右僕射觀文殿大學士爲集禧觀使。邵埏編：天聖初，輔臣罷領宮觀使，其後惟以使相節度宜徽使爲之，無所職掌。奉朝請而已。熙寧間，又有以使居外者。王荊公以使相領集禧觀使，居

金陵張文定公以宣徽南院使，領西太一宮使，居睢陽，蓋優禮也。

呂公著、韓維以資政殿學士兼侍讀，仍提舉中太一宮，兼集禧觀公事。此已見本志宮觀兼侍讀篇，惟

彼文稱公著爲大學士，以公著傳考之，其時實由學士進大學士也。范鎮落致仕，以端明殿學士提舉中太一宮，兼集禧觀公事，亦兼侍讀，然鎮固辭未拜也。

元祐閒，馮京以觀文殿學士，梁燾以資政殿學士，爲中太一宮禮泉觀使。謂京爲中太一宮使，燾爲禮

泉觀使也。案邵埽編，梁左丞燾罷政事，除資政殿學士，特置同禮泉觀使之名，以命之。梁公言，故事無以學士領宮觀使者，且同使之名，前所未有，力辭不受，然自是前二府往往以學士直爲宮觀使矣。燾除禮泉使，有同字，志所書未核。

高遵固年八十一，乞再任宮觀，高遵禮年七十六，乞再任亳州太清宮。案高瓊及外戚傳，不見二人名。三省言，張方平元係宣徽南院使，檢校太傅太子少師致仕，元豐官制，行廢宣徽使，元祐三年復置，儀品恩數如舊制，方平依舊帶宣徽南院使致仕。此已見本志宣徽篇。

食貨志上二

郡官員外郎馮康國言，四川地狹民貧，祖宗時，正稅重者，折科稍輕，正稅輕者，折科稍重，二者平準，所以無偏重偏輕之患，百有餘年，民甚安之。近年漕總二司，輒更舊法，反覆紐折，取數務少，致民棄業逃移。

望竝罷之一遵舊制。詔如所請。令憲臣察其不如法者。此又見康國傳。

食貨志上三

大中祥符三年。河北轉運使李士衡又言。本路歲給諸軍帛七十萬。民間罕有緡錢。常預假于豪民。出倍稱之息。至期則輸賦之外。先償逋欠。以是工機之利愈薄。請預給帛錢。俾及時輸送。則民獲利而官亦足用。詔優予其直。自是諸路亦如之。此又見士衡傳。彼文士作仕誤。

食貨志上四

蘇轍自大名推官上書召對。亦除條例司檢詳文字。安石出青苗法示之。轍曰。以錢貸民。使出息二分。本非爲利。然出納之際。吏緣爲奸。雖有法不能禁。錢入民手。雖良民不免非理費用。及其納錢。雖富民不免違限。如此則鞭笞必用。州縣多事矣。唐劉晏掌國計。未嘗有所假貸。有尤之者。晏曰。使民僥倖得錢。非國之福。使吏倚法督責。非民之便。吾雖未嘗假貸。而四方豐凶貴賤。知之未嘗逾時。有賤必糴。有貴必糶。以此四方無甚貴甚賤之病。安用貸爲。晏之言。漢常平法耳。公誠能行之。晏之功可立矣也。安石自此逾月不言青苗。此又見蘇轍傳。

司馬光曰。青苗出息。平民爲之。尙能以蠶食下戶。至饑寒流離。況縣官法度之威乎。呂惠卿曰。青苗法願則取之不願不強也。光曰。愚民知取債之利。不知還債之害。非獨縣官不強。富民亦不強也。及拜官樞

密副使光上章力辭至六七。曰：帝誠能罷制置條例司，追還提舉官，不行青苗助役等法，雖不用臣，臣受賜多矣。不然，終不敢受命。竟出知永興軍。此又見司馬光傳。

食貨志下六

天聖三年八月，詔翰林侍講學士孫奭等，同究利害。案長編紀事本末，是月辛卯，命翰林侍讀學士孫奭，知制誥夏竦，同工部郎中盧士倫，殿中侍御史王碩，如京使盧守勳，再加詳定。

兵志一

太平興國二年，詔改簇御馬直曰簇御龍直，鐵騎曰日騎，龍捷曰龍衛，控鶴曰天武，虎捷曰神衛，骨朵子直曰御龍，骨朵子直寬衣控鶴曰寬衣，天武雄威曰雄勇，龍騎曰驍猛。案諸軍改名，既總敘于前，而下文又逐條列之，當刪存其一，惟控鶴之爲天武，則後條失書。

建康五萬，池州一萬二千，鎮江四萬七千，楚州武鋒軍一萬一千，鄂州四萬九千，荆南二萬，興元一萬七千，金州一萬一千。文獻通考，今鎮江大軍，則韓世忠之舊部，建康大軍，則張俊之舊部，鄂州大軍，則岳飛之舊部也。紹興末，荆南江州池州，又皆新創兵籍，荆南所屯，則劉錡所招効用，益以鄂州之卒，江池之軍，則三衙疲弱之卒屯戍者。江州一軍，大抵皆茶寇也，而興元府、興州、金州三都統兵，則本曲端、吳玠、關師古之徒，關西之舊部也。又云四川之兵，曲端死，吳玠并將其兵，王庶劉子羽，在興元又招其

流散立成部伍。子羽罷玠，又併將其兵。故玠之兵十萬，玠死，胡世將爲宣撫，命吳璘以二萬守興州，楊政以二萬守興元，郭浩以八千守金州。而玠之中部三萬人，分屯仙人關內外，璘併將之。是以四川之兵，獨偏重于興州。

其禁軍將校，則有殿前司、都指揮使、副都指揮使、都虞候各一人，諸班直、都虞候、指揮使、都知、副都知、班、御龍諸直，有四直，都虞候本直，各有都虞候、指揮使、副指揮使、都頭、副都頭、十將將、虞候、馬步軍有捧日、天武、左右四廂，都指揮使、捧日、天武、左右各有都指揮使，每軍有都指揮使、虞候，每指揮副指揮使、副指揮使，每都有軍使、步軍謂之都頭、副兵馬使、步軍謂之副都頭、十將將、虞候、承局、押官，此又見職官志，當去此存彼，待衛司倣此。

兵志二

熙寧以後之制，案熙寧以後，三衙軍額，與前不甚相遠。史家第據三朝四朝兩志之文，分而列之。若考其沿革，并爲一篇，則文省而例亦不紊矣。

侍衛司、侍衛親軍、馬步軍，都指揮使、副都指揮使、都虞候各一人，馬軍都指揮使、副都指揮使、都虞候各一人，步軍亦如之。自馬步軍都虞候以上，其員全闕。即馬軍步軍都指揮使等，各兼領其務。馬步軍有龍衛、神衛，左右四廂，都指揮使、龍衛、神衛，左右廂，各有都指揮使，每軍有都指揮使、都虞候，每指揮有

指揮使。副指揮使。餘如殿前司之制。其所領騎步軍之額如左。此文與前卷全同。

武鋒、精銳、敢勇、鎮淮、疆勇、雄勝、武定。案武鋒以下諸軍不言屯駐之所。蓋有脫文。據本志稱。楚州武鋒

軍一萬一千。則武鋒等軍當在楚州屯駐矣。又案建康、鎮江、江州、池州、鄂州。俱有駐劄都統司兵。建康

又有馬軍行司。而沿江制司所領。又有防江軍。効用軍。破敵軍。精銳軍。御前策勝軍。淳祐五年置三萬人。分六軍。前軍左

軍屯鎮江。右軍中軍屯建康。先鋒後軍屯池州。制効軍。游擊軍。義士軍。皆宜見于此篇。蓋此卷脫漏甚多。惜無善本補之。

明州水軍。紹興置。乾道元年。二千。分兩右兩將。案寶慶四明志。制置司水軍。紹興二年置。十一年。兵

隨司罷。三十一年。金人寇邊。明州復屯殿司水軍二千。隆興元年。海寇朱百五等倡亂。戶部侍郎趙

子瀟。復帶沿海制置使。知明州。就領殿司軍二千。收捕二年。寇平。屯兵以次起發。子瀟言。明州密邇

行都。水陸控扼。事體非輕。乞存留未起發人。并招置水軍一千人。陸水軍統領鄭廣爲統制。聽明州使

喚。自是明州駐兵。爲額三千。乾道七年。差林文充統制。仍將本官自福州帶來水手一千撥付。兵額始

有四千人。與史所載額數不合。竊意志文二千當爲三千之譌。下文又有一條云。沿海水軍。乾道六年

置。一千人。當卽指林文所帶水手而言。若將二條并爲一。改此文二千爲三千。則與四明志相應矣。

兵志三

建炎後禁廂兵。廂字衍。案南渡禁廂軍。志但言所隸州軍。其指揮多少之數。則未之及。蓋典籍殘闕。不

及東都九朝之完具矣。今就可考者書之。臨安府禁軍廿九指揮。曰威捷第一。曰威果第四。曰威果弟
 五。曰威果弟六。曰雄節弟八。曰雄節弟十六。曰全捷第二。曰全捷弟三。右東南第三將曰武騎弟六。曰武騎弟
 七。曰廣勇左一四。曰廣勇左一五。曰廣勇左一六。曰廣捷弟四。曰廣捷弟五。曰廣捷弟六。曰忠節弟二。
 曰驍猛弟一。曰神威弟七。曰雄勇弟二。曰雄威弟六。曰効忠弟二十四。曰効忠弟七十五。曰効忠弟七
 十七。右京畿第二將曰雄節弟十七。曰威果弟六十一。曰全捷弟十七。曰龍騎。曰歸遠。右兵馬銓轄司廂軍廿六指揮。
 曰崇節弟一。曰崇節弟二。曰崇節弟三。曰節崇弟四。曰崇節弟五。曰崇節弟六。曰捍江弟一。曰捍江弟
 二。曰捍江弟三。曰捍江弟四。曰捍江弟五。曰修江。曰都作院。曰小作院。曰清湖開。曰開河司。曰北城堰。
 曰西河廣濟。曰樓店務。曰長安堰開。曰秤斗務。曰壯城。曰鼓角匠。曰橫江水軍。曰船務。曰牢城。建康府
 禁軍十一指揮。曰威果十三。曰威果十四。曰威果十五。曰威果四十四。曰忠節十一。曰全捷弟一。曰全
 捷弟六。曰武雄弟一。曰馬軍。曰忠義。曰橫江。水軍廂軍四指揮。曰効一。曰効二。曰牢一。曰牢二。効者効勇也牢
者牢城也。平江府禁軍五指揮。曰威果二十八。曰威果四十一。曰威果六十五。曰雄節弟九。曰全捷二十一。
 廂軍十指揮。曰崇節弟九。曰崇節弟十。曰節崇弟十一。曰崇節弟十二。曰壯城。曰中軍鼓角。曰橫江。曰
 寧節弟三。曰城下開江。曰作院。紹興府禁軍九指揮。曰雄節弟一。曰威捷弟二。曰威果二十二。曰威果
 二十三。曰全捷弟四。曰全捷弟五。以上為係將曰威果五十四。曰全捷十三。以上不係將曰防守步軍司。主守誠

廂軍七指揮。曰崇節弟七。曰崇節弟八。曰壯城。曰牢城。寧節弟二。曰屯駐營。曰作院。曰剌員。慶元府禁軍五指揮。曰威果三十。曰威果五十五。曰雄節。曰威勝。曰全捷。廂軍九指揮。曰崇節二十八。曰崇節二十九。曰崇節三十。曰壯城。曰都作院。曰船場。曰剌員。曰寧節。曰清務。徽州禁軍三指揮。曰威果。曰忠節。曰武雄。俱未詳其弟廂軍三指揮。曰効勇。曰牢城。曰壯城。福州禁軍三指揮。曰威果二十四。曰威果二十五。曰全捷弟九。本第三十六。觀元年改。又有有馬雄略指揮。荻蘆寨水軍。延祥寨水軍。亦稱禁軍。廂軍九指揮。曰保節弟一。曰保節弟二。曰保節弟三。曰保節弟四。曰壯城。曰牢城。曰剌員。曰都作院。曰養老。寧節。今志于禁兵威果忠節武雄下。失注建康徽字。全捷下。失注建康字。忠節下。失注杭字。廂兵効勇下。失注建康字。保節下。失注福字。寧節下。失注平江慶元字。都作院下。失注慶元福字。平江亦作院清務下。失注慶元字。若臨安之武騎。廣勇。廣捷。驍猛。神威。雄勇。雄威。効忠。龍騎。歸遠。皆稱禁軍。而志皆不見其名。

刑法志一

先是太祝刁衍上疏言。古者投姦人于四裔。今乃遠方囚人。盡歸象闕配務役。神京天子所居。豈可使流囚于此聚役。禮曰。刑人于市。與衆棄之。則知黃屋紫宸之中。非行法用刑之所。望自今外處罪人。勿許解送上京。亦不留下諸務充役。御前不行決罰之刑。殿前引見。司鉗黥法具。敕杖。皆以付御史。廷尉京府。或出中使。或命法官。具禮監科。以重明刑謹法之意。帝覽疏甚悅。降詔褒答。然不能從也。此又見

循傳。

刑法志二

太府寺主簿蔡涇奏。臣叔父碩。嘗于邢恕處。見文及甫元祐中所寄恕書。具述姦臣大逆不道之謀。及甫彥博子也。必知姦狀。詔翰林學士蔡京。吏部侍郎安惇。同究問。初。及甫與恕書。自謂畢禋當求外。入朝之計。未可必聞。已逆爲機。穿以榛塞其途。又謂司馬昭之心。路人所知。又云。濟之以粉昆。朋類錯立。欲以眇躬爲甘心快意之地。及甫嘗語蔡碩。謂司馬昭指劉摯。粉昆指韓忠彥。眇躬及甫自謂。蓋俗稱駙馬都尉爲粉侯。人以王師約故。呼其父堯臣爲粉父。忠彥乃嘉彥之兄也。及甫除都司。爲自摯論列。又摯嘗論彥博不可除三省長官。故止爲平章重事。乃彥博致仕。及甫自權侍郎。以修撰守郡。母喪除。與恕書請補外。因爲躁忿。誣毀之辭。及置對。則以昭比摯如舊。眇躬乃以指上。而粉昆乃謂指王巖叟。面如傅粉。故曰粉。梁燾字況之。以況爲兄。故曰昆。斥摯將謀廢立。不利于上躬。京。惇言事涉不順。及甫止聞其父言。無他證佐。望別差官審問。乃詔中書舍人蹇序辰審問。仍差內侍一員同往。此又見劉摯傳。堯臣當是克臣之謫。

115

7

廿二史考異卷七十三

宋史七

藝文志一

宋舊史自太祖至寧宗爲書凡四志。藝文者前後部帙有亡增損互有異同。今刪其重複合爲一志。案此志合三朝兩朝四朝中興國史彙而爲一。當時史臣無學不能博涉羣書考其同異故部分乖刺前後顛倒較之前史踳駁尤甚。有一書而兩三見者如陸德明經典釋文三十卷見經解類又見小學類。李涪刊誤二卷見經解類又見傳記類。傳記一卷程大昌易老通言十卷見易類又見道家類汲冢周書十卷見書類又見別史類戰國策三十三卷見縱橫家又見兵書類僧辨機唐西域記十二卷見道家類又見地理類楊九齡桂堂編事二十卷見傳記類又見別集類李筌闡外春秋十卷見別史類又見兵書類杜延業晉春秋略二十卷見編年類又見史鈔類蕭方三十國春秋三十卷見編年類又見霸史類。本名方等誤去等字常璩華陽國志十卷見別史類又見霸史類。作十卷王通元經薛氏傳十五卷見編年類又見傳記類劉恕十國紀年四十二卷見別史類又見霸史類。作四卷司馬彪九州春秋十卷見別史類又見霸史類。作九卷趙曄吳越春秋十卷見別史類又見霸史類。余知古渚宮舊事十卷見傳記類又見

地理類作事故林鉞漢雋十卷見史鈔類又見類事類蔣之奇廣州十賢贊一卷見傳記類又見文史類
江少虞皇朝事實類苑二十六卷見故事類又見類事類曾致堯清邊前要五十卷見故事類又見兵
書類作十卷歐陽修集古錄五卷見目錄類又集古錄跋尾六卷見小學類趙明誠金石錄三十卷見目
錄類又見小學類宋敏求寶刻叢章三十卷見小學類又見總集類晁公武讀書志四卷見目錄類又
見傳記類作十卷皇甫松醉鄉日月三卷見小說類又見雜藝術類僧贊寧事物類相感志五卷見小說類
又見雜家類作十卷荆浩筆法記一卷見雜藝術類又見小學類王暉唐餘錄六十卷見別史類又見傳
記類作十卷毛友左傳類對賦六卷見類事類又見文史類于政立類林十卷見傳記類又見類事類新
志作千卷鄭至道論俗編一卷見刑法類又見雜家類邱光庭海潮論一卷見小說家類又見別集類范
鎮東齋記事十二卷見故事類又見傳記類張宗誨花木錄七卷見雜家類又見小說家類邵亢體論
十卷見儒家類又見雜家類雜家誤元為元韓熙載格言五卷見儒家類又見雜家類邱光庭兼明書四卷見
禮類又見經解類作三卷又見雜家類作十卷祝充韓文音義五十卷見小學類又見別集類王晉使範一
見儀注類又見刑法類李綽張尚書故實一卷見傳記類而小說家又有尚書故實一卷范成大卷桂
海虞衡志三卷見地理類而傳記類又有范成大虞衡志一卷辛怡顯雲南錄三卷見故事類又有辛
怡顯至道雲南錄三卷汪浹榮觀集五卷見故事類而總集類又有汪浹元祐榮觀集五卷武密帝王

與衰年代錄二卷。見編年類。而別史錄又有武密帝王年代錄三十卷。姚寬西溪叢話二卷。見小說家類。而雜家類又有姚寬叢語上下二卷。吳曾能改齋漫錄十三卷。見小說家類。而雜家類又有吳曾漫錄十二卷。徐度卻掃編三卷。見傳記類。而雜家類又有徐度崇道卻掃編十三卷。十字錢景行南嶽勝槩一卷。見地理類。而道家類又有錢景行南嶽勝槩編一卷。李璋太原事蹟雜記十三卷。見傳記類。而地理類又有李璋太原事迹十四卷。胡嶠陷遼記三卷。見傳記類。而地理類又有胡嶠陷虜記一卷。龔穎運麻圖三卷。見編年類。而別史類又有龔穎年麻圖八卷。李司空論事七卷。見故事類。而別集類又有李司空論事十七卷。令狐綯制表疏一卷。見故事類。而別集類又有令狐綯表疏一卷。崔昇魯史分門屬類賦一卷。見別集類。而春秋類又有崔昇春秋分門屬類賦三卷。注云。楊均注。又類事類。有魯史分門屬類賦。注云。不知作者。郭憲洞冥記四卷。見傳記類。而小說家類又有漢武帝洞冥記四卷。注云。東漢郭憲編。宋綬本朝大詔令二百四十卷。見總集類。而故事類又有宋朝大詔令二百四十卷。注云。紹興中出于宋綬家。洪興祖韓子年譜一卷。見傳記類。又見別集類。而譜牒類又有洪興祖韓愈年譜一部。注云。卷亡。薛齊誼六一居士年譜一卷。見傳記類。而別集類又有薛齊誼六一居士事證一卷。疑卽一書也。顏師古刊謬正俗八卷。已見經解類。而儒家類又有顏師古糾謬正俗八卷。此書本名匡謬正俗。宋人避諱。或改爲刊。或改爲糾。其實一書也。殷璠丹陽集一卷。見總集類。而別集類又有商璠丹

陽集一卷。宋人避諱。改殷爲商。其實一書也。章懷太子脩身要覽十卷。已見儒家類。而雜家類又有李賢脩書要覽十卷。疑亦一書。譌身爲書也。仁宗觀文覽古圖記十卷。已見別史類。而故事類又有仁宗觀文鑿古圖十卷。李淑三朝訓鑿圖十卷。已見故事類。而別史類又有李淑三朝訓覽圖十卷。鑿與覽字形相似。疑皆重出也。呂夷簡三朝寶訓三十卷。林希兩朝寶訓二十一卷。竝見別史類。而故事類又有呂夷簡林希進五朝寶訓六十卷。蓋卽合此兩書而爲一。其實亦重出也。經解類有蘇鄂演義十卷。雜家類又有蘇鄂演義十卷。沈顏聲書十卷。已見雜家類。而別集類又有沈顏聲書十卷。誤聲爲聲。實一書也。小說家類有狐剛子靈圖感應歌一卷。雜家類有狐剛子感應類從譜一卷。疑亦一書。而重出也。胡旦演聖通論六十卷。已載于經解類。而又分見于易類書類詩類。張九成中庸大學孝經說各一卷。已載于經解類。而又分見于禮類孝經類。鄭樵通志二百卷。已載于別史類。而六書略又入小學類。圖譜有無記。卽圖譜略也。又入目錄類。證法三卷。卽證略也。又入經解類。敘論二卷。又入文史類。非重出乎。陸德明經典釋文。已入經解小學類兩見之矣。而又分見于易類書類詩類春秋類禮類論語類。至小學類已載釋文全部。又別出爾疋音義二卷。非重複之甚乎。有一類之中。前後重出者。如沈某春秋比事二十卷。春秋類兩見。張九成語錄十四卷。儒家類兩見。趙君錫遺事一卷。傳記類兩見。王晉使範一卷。刑法類兩見。李新集四十卷。別集類兩見。陸修靜老子道德經雜說一卷。道家類兩見。秦再思

洛中記異十卷。小說家類兩見。李嗣真畫後品一卷。郭若虛圖畫見聞志六卷。皆于雜藝術類兩見。王璠射經。亦雜藝術類兩見。而前云一卷。後云二卷。小說家類前有樂史續廣卓異記三卷。後有樂史廣卓異記三卷。別集類前有李煜集十卷。後有南唐李後主集十卷。釋氏類前有般刺密帝彌伽釋迦譯首楞嚴經十卷。後有般刺密諦譯楞嚴經十卷。麻算類前有謝察微算經三卷。後有謝察微發蒙算經三卷。傳記類前有王巖叟韓忠獻公別錄一卷。後有韓琦別錄三卷。王巖叟撰故事類。前有三朝訓鑒圖十卷。仁宗製序。後有李淑三朝訓鑒圖十卷。兵書類前有郭代公安邊策三卷。後有定遠安邊策三卷。實一書也。見晁氏讀書志兵書類前有余壹兵籌類要十五卷。後有余臺兵籌類要十五卷。臺與壹字形相涉。疑卽一書也。麻算類前有王孝通緝古算經一卷。後有王孝適緝古算經一卷。適卽通字之譌。亦一書也。農家類前有李綽奏中歲時記一卷。後有李綽輦下歲時記一卷。綽唐時人。唐都關內輦下。卽秦中也。前有劉時靖時鏡新書五卷。後有劉靖時鑑雜書一卷。注云。雜一作新。宋人避諱改鏡爲鑑。其實一書也。總集類前有蔡省風瑤池集二卷。後有葉省風瑤池集一卷。葉與蔡字形相涉。疑亦一書也。新志蔡省風瑤池新詠二卷。集婦人詩。釋氏類前有華嚴法界觀門一卷。宋密注。後有華嚴法界觀門一卷。僧杜順集。刊本作僧宗密注。宋卽宗字之譌。亦一書也。傳記類前有晉朝陷蕃記二卷。後有開運陷虜事迹一卷。俱云不知作者。疑亦一書也。晁公武云。石晉陷蕃記一卷。范質撰。蓋卽此書。春秋類前有公羊疏三十卷。後有徐彥公羊疏三十卷。

總集類前有宋白文苑英華一千卷。後有李昉扈蒙文苑英華一千卷。前有唐百家詩選二十卷。後有王安石唐百家詩選二十卷。皆一書而重出也。別集類前有廖光圖詩集二卷。後有廖正圖詩一卷。本名匡圖。宋人避諱。或改爲光。或改爲正。其實一書也。小說家類前有鍾輅前定錄一卷。後有鍾輅感定錄一卷。疑亦一書也。若夫編次之失當者。如南唐烈祖實錄。後蜀高祖實錄。後蜀主實錄。當入霸史。而入之編年。高宗過江事實。廣王事迹。當入故事。而入之霸史。趙志忠大遼事迹。當入霸史。而入之雜家。呂本中童蒙訓。朱熹小學之書。呂祖謙少儀外傳。皆儒家也。而入之小學。邵雍皇極經世書。觀物內篇。觀物外篇。亦儒家也。而入之易類。楊王休諸史闕疑。趙粹中史評。王應麟小學紺珠類事也。而入之小學。又通鑑地理考。通鑑地理通釋。漢藝文志考證。漢制考。皆史鈔也。而入之職官。陳師道後山詩話。陸游山陰詩話。胡仔漁隱叢話。僧惠洪冷齋夜話。無名氏垂虹詩話。皆文史也。而入之小說。范成大吳門志。當作吳郡地理也。而入之傳記。晁公武昭德堂叢別集也。而入之傳記。同一音義也。楊齊宣晉書音義。入正史類。劉伯莊史記音義。蕭該漢書音義。董衡唐書釋音。竇萃唐書音訓。入小學類。同一年譜也。薛齊韻六一居士年譜。入傳記類。王宗稷。蘇文忠年譜。入別集類。洪興祖。韓子年譜。則傳記別集譜牒三類皆有之。同一蒙求也。李翰蒙求。葉才老。和李翰蒙求。入類事類。洪邁次。李翰蒙求。入小學類。同一花木譜也。蔡襄荔枝譜。邱濬洛陽貴尚錄。紀牡丹入小說類。歐陽修牡丹譜。孔武仲。劉放。王觀芍藥譜。入農家

類。同一錢譜也。封演錢譜。張台錢錄。入農家類。顧協錢譜。董迥錢譜。入小說類。洪遵泉志。入傳記類。皆義例之未一也。又如類事類。有徐天麟西漢會要。而東漢會要。則失之。總集類有洪邁唐一千家詩。而唐人萬首絕句。則失之。故事類有陳駸中興館閣錄。而續錄。則失之。傳記類有洪适五代登科記。而唐登科記。則失之。

蓋以崇寧以後。史之所未錄者。蓋當作益。崇寧當作寧宗。皆刊本之譌。

易類。史文徵易口訣義六卷。案崇文總目云。河南史證撰。晁氏云。唐史證撰。抄注疏。以便講習。田氏以爲魏鄭公撰。誤也。陳振孫亦云。避諱作證字。則此志徵字當作徵之譌。

晁補之太極傳五卷。因說一卷。文獻通考。以爲晁以道撰。以道名說之。非補之也。楊簡已易一卷。文獻通考。在儒家類。

書類。王晦叔周書音訓十二卷。本名曙。避英宗諱。稱其字。而傳記類有王曙戴斗奉使錄。故事類有王曙羣牧故事。所謂史駁文也。

朱熹書說七卷。黃士毅集。黃士毅集四字。應改分注。

禮類。禮粹二十卷。注。不知作者。崇文總目。唐寧州參軍張頰纂。石塾中庸集解二卷。塾。當作塾字。子重與敦義爲近。故知當从敦也。

樂類。趙邦利彈琴手勢譜一卷。邦當作邪。字之譌也。此志譌字頗多。如方勺泊宅編。譌勺爲勻。徐度
卻埽編。譌度爲慶。杜佑賓佐記。譌賓爲實。陳叢桐譜。譌桐爲相。呂渭廣陵止息譜。譌渭爲謂。呂祖謙左
氏博議。譌博爲傳。葉模石林過庭錄。譌林爲杯。胡仔孔子編年。譌仔爲仔。王仁裕開元天寶遺事。譌裕
爲豁。宋庠尊號錄。譌庠爲祥。錢惟演金坡遺事。譌坡爲陵。趙抃成都古今集記。譌抃爲扑。楊倞注荀子。
譌倞爲保。辛崇僧伽行狀。譌辛爲卒。僧杜順集華嚴法界觀門。譌杜爲法。僧神會荷澤顯宗記。譌神會
爲會神。劉邵人物志。譌劉邵爲卽郡。沈括忘懷錄。譌忘爲志。黃希聲隅書。譌聲爲聲。陳翰異聞集。譌翰
爲輸。溫奮續定命錄。譌奮爲奢。王闢之渾水燕談。譌闢爲關。王績補妒記。譌妒爲姑。黃休復茅亭客話。
譌休爲林。上官融文會談叢。譌文爲友。張邱建算經。譌邱爲立。賈耽備急單方。譌耽爲沈。沈顏聲書。譌
聲爲聲。史正志清暉閣詩。譌志爲心。鄭準渚宮集。譌渚爲者。談鑰吳興志。譌興爲與。離堆志。譌堆譌準。
又別集類束皙譌爲哲。沈炯譌爲炯。王績譌爲績。胡曾譌爲會。孟賓于譌爲子。張耒譌爲來。魚元機譌
爲魯。此類皆刊本之譌。非盡史臣之失也。

鼎崇義景祐大樂圖二十卷。崇義當作冠卿。崇義仕于宋初。不當景祐時。

春秋類。朱瑗春秋口義五卷。朱瑗當是胡瑗之譌。

崔昇春秋分門屬類賦三卷。注楊均注。此書又見別集類。題云魯史分門屬類賦。而類事類又有魯史

分門屬類賦注云。不知作者。疑卽一書也。晁氏讀書志。魯史分門屬類賦三卷。皇朝楊筠撰。以左氏事類分十門。各爲律賦一篇。乾德四年上之。此志云崔昇撰。而楊均注之。與晁志異。

程大昌演繇露六卷。案。程大昌演繇露十四卷。續演繇露六卷。已見類事類文獻通考。入之雜家類。此

又入春秋類。蓋以其取董生繇露之名。疑爲說春秋而作。而不知其非一類也。

經解類。劉餗六說五卷。兼講書五卷。授經圖三卷。案。唐志。六說五卷。乃劉迅所撰。迅乃餗之弟也。唐

書迅傳云。續詩書春秋禮樂五說。崇文總目亦云。迅作六書。以繼六經。故標槩作書之誼。而著其目。惟

易闕而不敘。然則此書名爲六說。實止五說矣。兼講書及授經圖。則唐志無之。疑非餗迅兄弟所作。

胡旦演聖通論六十卷。陳氏云。易十七。書七。詩十。禮記十六。春秋十。其第一卷爲目錄。此志于易詩書

三類。別出演聖通論之目。而春秋禮類。仍復闕之。據陳氏解題。詩止十卷。此志云二十卷。亦恐誤。

小學類。謝利貞玉篇解疑三十卷。崇文總目。作趙利正。

象文玉篇二十卷。崇文總目云。釋慧力撰。志列玉篇解疑之下。似亦利貞所撰。

羅點清勤堂法帖六卷。宋自太宗淳化法帖而後。模刻法帖。亡慮數十家。志皆不載。而獨取羅點一家。

恐難免挂漏之誚矣。

藝文志二

正史類。楊齊宣晉書音義三卷。此書何超所撰。楊齊宣爲序志。誤以爲齊宣。

編年類。蕭方三十國春秋二十卷。本名方等。脫等字。

孫盛晉陽春秋三十卷。春字衍。

程正柔大唐補紀三卷。本名匡柔。避諱改。

五代唐懿宗紀年錄一卷。五代唐獻祖紀年錄一卷。懿宗。當作懿祖。謂朱邪執宜也。獻祖者。克用之父。

國昌也。五代會要。天成四年十一月。史館上新修懿祖獻祖太祖紀年錄。共二十卷。據此志。懿獻二祖。

各一卷。則太祖紀年錄。當是十八卷。志獨失書。

宋太祖實錄五十卷。注李沆。沈倫修。案太祖實錄。本有兩本。各五十卷。太宗太平興國中初修。史臣李。

昉。扈蒙。李穆。郭贄。宋白等。宰相沈倫爲監修。表進。真宗咸平中重修。史官則錢若水。李宗諤。梁顥。趙安。

仁。而宰相李沆監修表進之。志誤并兩本爲一。又以李沆列沈倫之前。益爲不倫矣。

別史類。常璩華陽國志十卷。江南志二十卷。江南志非璩所作。

史鈔類。劉希古歷代紀要五十卷。希古。當作熙古。本傳作十五卷。小學類有劉希古切韻十五卷。

本傳作切韻。拾玉二篇。亦當爲熙字。

故事類。王琳魏鄭公諫錄五卷。琳。當作琳。卽方慶也。唐志故事類。有王方慶文貞公事錄一卷。卽此。

書。

劉公鉉鄴城舊事六卷。地理類有劉公鉉鄴城新記三卷。疑卽一書。新唐志作公銳有
新記而無舊事

龔頤正續稽古錄一卷。本名惇頤。避諱更名。和州人。給事中原之曾孫也。又撰元祐黨籍列傳譜述一

百卷。淳熙修四朝國史。多取其書。以洪邁奏補和州文學。後賜出身。志失載。

洪邁刊本論苑羣書三卷。又會稽和買事宜錄七卷。案和買事宜錄。邁所撰。翰苑羣書。則邁兄遵所

撰也。志皆以爲邁撰。誤。

職官類。蔡元道祖宗官制舊典三卷。本名惇。避諱稱其字。

傳記類。劉諫一作諫國朝傳記三卷。諫當作餽。案唐志。小說家有劉餽傳記三卷。注云。一作國史異纂。

則異纂與傳記本是一書。此志小說家既有劉餽傳記三卷。而傳記類又有劉餽國史異纂三卷。已爲
重出。又不知諫練皆餽字之譌。而更出之。益可笑矣。

李巨川許國公勤趾錄三卷。故事類有李巨川勤王錄二卷。蓋卽此書。溫公通鑑考異。亦引許國公勤
王錄。知勤趾必勤王之譌。

乾寧會稽錄一卷。三楚新錄一卷。英雄佐命錄一卷。世宗征淮錄一卷。濠州干戈錄一卷。此五書非李
巨川所作。當注云。竝不知作者。三楚新錄。疑卽周羽冲所撰。已見霸史類。

柳程柳氏家學一卷。小說家類。有柳瑤家學要錄二卷。又有柳涅常侍言旨一卷。蓋卽一人也。晁氏云。家學要錄一卷。柳程采其曾祖彥昭。祖父冕。家集所記累朝典章。因革著此錄。又常侍言旨一卷。柳程記其世父芳所著。凡十六章。然則程涅皆字之譌。程旣爲芳之孫。不當又稱芳爲世父。考唐史。芳未嘗爲常侍。惟芳子登官至右散騎常侍。實程之世父。則所云常侍者。蓋謂登也。

劉昶嶺外錄異三卷。地理類。有劉恂嶺表錄異三卷。昶與恂。字形相涉。疑卽一書。唐志有劉恂無劉昶。趙普飛龍記一卷。亦名龍飛日曆。

韓文公厓官記一卷。注程俱撰。陳振孫云。新安張敦頤撰。

王襄南陽先生傳二十卷。先生當作先民。

李綱近世厚德錄一卷。此李元綱所撰。非李忠定也。史脫元字。

藝文志三

儀注類。歐陽修太常因革禮一百卷。卽蘇洵姚闢所修。

鄭樵鄉飲禮三卷。又鄉飲禮圖三卷。禮類有鄭樵鄉飲禮七卷。疑亦重出。

目錄類。商仲茂十三代史目一卷。本姓殷。避諱追改。別集類有商瑤丹陽集。商文圭從軍墓。藝術類

有張仲商射訓五行類。有商紹太史堪輿厓。皆本殷字也。

地理類。曹瑋國照十卷。案下文又有曹瑋須知國鏡二卷。宋人避諱。往往改鏡爲照。此兩書疑亦重出也。

達奚洪一作通海外三十六國記一卷。案上文有達奚弘通西南海蕃行記一卷。疑卽一書。此作洪者。避諱改也。唐志作達奚通海南諸蕃行記。無弘字。

陸游會稽志二十卷。此與沈作賓趙不迹會稽志二十卷。本是一書。沈趙皆紹興守臣。而陸游爲之序。游子子虞嘗預纂修志。以爲游所撰。又分陸志與沈趙志爲二。皆失之不考爾。

李獻父相臺志十二卷。晁氏志作李琮。

劉灝清源志七卷。陳振孫云。清源志七卷。通判州事永嘉戴溪撰。時慶元己未。太守信安劉穎。蓋卽此書。穎灝字形相涉。未知孰是。

霸史類。南唐書十五卷。不知作者。案南唐書傳于今者。有馬令陸游二家。馬書三十卷。陸書十五卷。此云十五卷。疑是陸氏書也。

蔣文樞閩中實錄十卷。陳氏書錄解題。作蔣文樞。蔣文志四。

儒家類。馬融忠經一卷。隋唐志俱無此書。蓋宋人僞託。

外書十二卷。注程頤程頤講學。當在程氏遺書語錄之下。

伊洛淵源十三卷。注不知作者。或云朱熹撰。

曾大公公侯正術十卷。唐志在雜家類。題云魯人初初者其名。而姓則未詳。此志作曾大公。刊本之譌也。

名墨縱橫家。無所增益。案宋三朝兩朝四朝國史。各志載文。前志已著錄者。則後史不復登載。故有無

所增益之語。元人修史。既彙而爲一。而秉筆之臣。空疏淺陋。不能刪其繇復。正其次第。以至一類之中。前後失次。甲乙乖方。徒憑鈔胥。照本增入。此語亦遂存而不刪。昔人譏作奏雖工。宜去葛龔。豈意蘭臺東觀之儒。亦復謬濫至此。

道家類。劉向關尹子九卷。諸子多出劉向校定。獨此書繁之劉向。似關尹九卷。乃中壘所作也。

釋氏類。法林辨正論八卷。陳子良作。案法林辨正論八卷。又見于破邪論之下。此譌琳爲林。實一書也。晁氏云。頴水陳良序。唐志云。陳子良注。此以爲子良作。亦誤。

李遵天聖廣燈錄三十卷。本李遵勳撰。避諱去下一字。

楊士達禪關八問一卷。注宗美。唐志云。楊士達問。唐宗美對。此脫對字。

僧肇寶藏論一卷。又般若無知論一卷。涅槃無名論一卷。上文已有僧肇寶藏論三卷。蓋合三論爲一。

部。

魏靜永嘉一宿覺禪師集一卷。上文有魏靜永嘉一宿覺禪宗集一卷。此重出。

道院集要三卷。注。不知作者。陳振孫云。王古撰。以晁迥法藏碎金彙智餘書。刪重集碎。別爲此書。

李通元華嚴合論一卷。案。李長者華嚴合論本一百二十卷。此云一卷者。乃實際禪師所撰。華嚴法相撮要也。

崇正辨三卷。胡演撰。演。當作寅。寅著此辨。專以排斥釋氏。當列于儒家。不當在釋氏類。

神仙類。陳處士同洪讓書老子道經一卷。同。當作周。卽周弘讓也。宋人避諱。改爲洪字。

王用德晉州羊角山慶厓觀記一卷。慶厓。當作慶唐。

農家類。李綽。下歲時記一卷。此與秦中歲時記。當是一書。

劉靖時鑑雜一作新書四卷。上文有劉安靖時鏡新書五卷。疑卽此書。改鏡爲鑑者。避諱也。

周絳補山經一卷。山。當作茶。

雜家類。皇甫選注何亮本書三卷。案下文又有何亮本書三卷。亦重出。

潘祖志筌書三卷。陳氏書錄解題。有潘植忘筌書二卷。此志譌植爲祖。譌忘爲志也。

藝文志五

小說家類。李義山雜藁一卷。此與李商隱雜纂當是一書。

洪邁夷堅志六十卷。甲乙丙志夷堅志八十卷。丁戊己庚志陳氏書錄解題。夷堅志甲至癸二百卷。支甲至支癸

一百卷。三甲至三癸一百卷。四甲四乙二十卷。凡四百二十卷。

王煥北山紀事十二卷。陳氏云。戶部侍郎王遵少愚撰。

陳師道談叢究理一卷。案儒家類有陳師道後山理究一卷。傳記類有陳師道後山居士叢談一卷。此

又別出談叢究理一卷。不惟重出。且復舛謬。今後山書具存。

黃朝英青箱雜記十卷。案朝英所撰。本名細素雜記。其青箱雜記十卷。則吳處厚所撰也。

天文類。符天經一卷。曹士爲符天經疏一卷。符天通真立成法二卷。士爲。當是士爲之譌。麻算類已

有曹士爲七曜符天麻二十七曜符天人元麻三卷。此必重出也。

五行類。珞錄子賦一卷。不知姓名。宋李企注。晁志。珞錄子疏五卷。皇朝李全東方明撰。全與企字形

相似也。下文又有珞錄子三命消息賦一卷。當是重出。

郭璞山海經十八卷。案。山海經古書。郭氏爲之注。非郭所撰。且下文卽有山海圖經十卷。郭璞序。不著

姓名。謂非自相矛盾乎。漢志雖以山海經列于形法家。要是地理家之權輿。志旣以山海經讚。二卷入

地理類。而此復入之五行類。似未嘗寓目此書者。大可怪矣。

著龜類。周易三備三卷。題孔子師徒所述。蓋依託也。史記正義引中備。孔子爲商瞿母筮。得大畜。與子貢顏回問答之語。中備蓋卽三備之一篇。又五行類。有周易三備雜機要一卷。亦此類也。唐志著龜卽在五行之內。此志既別立著龜一家。而許季山易訣。周易六帖。周易髓要雜訣。周易天門子訣。周易三略經。易林。諸家易林。易新林。易旁通手鑑。易元圖。周易荝冥訣。易頌卦。太清易經訣。周易通占。周易子夏占。周易口訣。開題。周易飛燕轉關林。周易括世應頌。周易鬼靈經。周易三空訣。周易三十六占。周易交詠。周易鬼鎮林。周易金鑑歌。周易聯珠論。周易卦轆轤關。易轆轤圖頌。易大象歌。周易卜卦。郭璞周易元義經。周易察微經。周易鬼銜算。周易逆刺。易鑑黃子元易頌。王守一周易探元。易訣雜頌。易杜祕林。易大象林。李鼎祚易髓。成元英易流演。虞翻注京房周易律麻。陶隱居易髓。王鄴周易通神歌。張肯周易線繞詞。靈隱子周易河圖術。焦氏周易玉鑑頌。周易三備雜機要。周易經類法易。一作易訣周易筮書。周易靈真述。周易靈真訣。易卦林。周易飛伏例。周易火竅。周易備要。周易六神頌。天門子易髓。六十四卦歌。凡六十家。仍列于五行類。此亦義例之未當者。

藝文志六

兵書類。陶弘景真人水照十三卷。唐志作水鏡。宋人避諱追改。

雜藝術類。宋景真唐賢名畫錄一卷。宋當作朱。字之譌也。本名景玄。宋人避諱。易爲真字。如玄武爲

真武也。

類事類。章得象國朝會要一百五十卷。宋初至慶厯四年。案下文有宋六朝會要三百卷。章得象編。

刊本或作蒙讀。王珪續。則得象此書。即在三百卷內。慶厯五年以後。至神宗朝。則王珪所續也。志中前後重

複。似此者非一。略舉以見例。

大孝一作倬御覽要略十二卷。大孝倬三字不可解。當考。

冊府元龜音義一卷。案王欽若冊府元龜一千卷。尙在下文。而音義轉列于前。此亦義例之可議者。

李知實一作寶檢志三卷。唐志作李知保。保與寶同音。又譌爲實爾。

文選雙字類要四十卷。注。不知作者。陳振孫云。蘇易簡撰。

醫書類。林億黃帝三部鍼灸經十二卷。卽皇甫謐所撰甲乙經也。嘉祐中。詔光祿卿直祕閣林億。國

子博士高保衡等。校正醫書。如素問。靈樞。難經。甲乙經。脈經。皆億等所校。而史家無學。偶見此書卷首

有億名。遂以爲億所撰。此亦劉向關尹子之類也。

楊介存四時傷寒總病論六卷。案晁氏志。有楊介存真圖一卷。其人名介。非名介存也。竊意介存下當

有脫文。四時傷寒總病論。則別是一人所撰。

唐慎微大觀經史證類備急本草三十二卷。案元初刊本。首載康州防禦使入內醫官曹孝忠序云。蜀

人唐慎微因本草舊經衍以證類。臣親奉玉音謂此書實可垂濟。乃詔節使臣楊戩總工刊寫。又命臣校正而潤色之。謹奉明詔。刪餘緝紊。務底厥理。凡六十餘萬言。請目以政和新修經史證類備用。本草云。蓋慎微書初刻于大觀二年。有杭州仁和縣尉管句學事艾風序故系以大觀及政和奉詔校正。即易以政和之號。非有二書也。

成無已傷寒論一卷。案無已撰傷寒明理論四卷。又注仲景傷寒論十卷。志稱傷寒論一卷。誤也。志不載成氏傷寒明理論。而別有嚴器之傷寒明理論四卷。未審卽一書否。

藝文志七

別集類。司空文明集一卷。本名曙。宋人避諱。故舉其字。包幼正本名佶。避徽宗諱。亦稱字。李泰伯本

名觀。避高宗諱。亦稱字。

祝光韓文音義五十卷。卽祝充韓文音義也。一類之中。前後重出。又譌充爲光爾。

趙抃成都古今集三十卷。地理類有趙朴成都古今集記三十卷。蓋卽此書。譌抃爲朴爾。此地理總集之流。不當入別集。

恭翔集十卷。又表奏集十卷。卽敬翔也。總集類有許恭宗文館辭林詩。卽許敬宗也。史臣避宋避諱追改之。

王禹偁小畜集三卷。當作三十卷。

石柔橘林集十六卷。陳氏作石忞。

劉一止茗溪集五十五卷。案下文別出劉一止集。注云茗溪集多五卷。此亦一書重出。當刪并爲一。

張嗣良敵帚集十四卷。又南澗甲乙藁七十卷。韓元吉愚齋錄十卷。案南澗甲乙藁乃韓元吉撰。元吉

字無咎。門下侍郎維之玄孫。居廣信溪南。故自號南澗志誤。

連寶學奏議二卷。不知名。蓋寶文閣學士連南夫也。

李燾文集一百二十卷。燾傳云文集五十卷。奏議三十卷。

王惟之雪溪集八卷。當作性之。

得全居士詞一卷。不知作者。陳振孫云得全詞一卷。趙鼎元鎮撰。此卷前有趙鼎得全居士集。而于此

詞獨失其名。何也。

藝文志八

總集類。朱梁宣底八卷。故事類有梁宣底三卷。此亦重出。

吳越石壁集二卷。別集類有錢鏐吳越石壁記一卷。疑卽一書。

楊俊南州集十卷。陳振孫云太平州教授林檎子長集。案楊俊于淳熙中嘗知太平州。疑卽與檎同時。

梅任纂修而倭爲郡守均得列名卷端也。

曾肇滌陽慶厓前集十卷。陳氏云。滌陽慶厓集十卷。朝散郎。滌人徐徽仲元集。斷自慶厓以來。曾肇子開。紹聖中謫守爲之序。此志前有徐徽滌陽慶厓集十卷。而復出此。其實非有二本也。

廿二史考異卷七十四

宋史八

宰輔表一

建隆元年二月吳廷祚自樞密使加同中書門下平章事。本紀作同中書門下二品。廷祚父名璋故改

平章事爲二品。後晉天福四年升中書門下平章事爲正二品故也。表書平章事誤。三年依前同中書門下平章事亦當

作同中書門下二品

八月戊子。宰輔編年錄作甲申。

太平興國四年正月石熙載自樞密直學士遷簽書樞密院事。簽書當作簽署。張齊賢王沔楊守一張

遜馮拯陳堯叟韓崇訓馬知節曹瑋王德用諸人皆除簽署或同簽署。史家避諱追改爲書字。又考是

時熙載寄祿官兵部員外郎四月除副樞進官給事中十月遷刑部侍郎表失書。

八年正月戊寅樞密使曹彬以天平軍節度使。此事太宗紀失書。

雍熙二年十二月柴禹錫自樞密副使以右驍衛大將軍免。此事太宗紀失書。

四年四月張宏自樞密副使以御史中丞免。此事太宗紀失書。

端拱元年二月，楊守一自內客省使，遷宣徽北院使，簽書樞密院事。九月，楊守一卒。此事太宗紀失書。
淳化二年三月，辛仲甫自給事中參知政事，以工部尚書知陳州。此事太宗紀失書。

四月，張宏自樞密副使，以吏部侍郎免。此事太宗紀失書。

九月，王顯自樞密使，責授隨州刺史，崇信軍節度觀察處置等使。案，節度使例兼觀察處置等使，及本

州刺史。此文但當云責授崇信軍節度使，餘皆可省。

五年九月，寇準自守同知樞密院事，除參知政事。案，準于淳化二年罷樞府，安得更云守同知樞密院

事。此必誤也。據宰輔編年錄，是年準自左諫議大夫知青州召，當云守左諫議大夫也。

至道元年正月，趙昌言自參知政事，以戶部侍郎知鳳翔府。此事太宗紀失書。

三年六月，錢若水自同知樞密院事，以祕書院學士免。案，祕書省無學士之稱，亦無院名。據本傳，乃集

賢院學士也。若水時官工部侍郎，史亦失書。

咸平三年二月，王顯自樞密使，以山南東道節度使，同中書門下平章事免。此事真宗紀失書。

景德四年七月，馮拯自參知政事，以刑部尚書知河南府，兼西京留守。此事真宗紀失書。

五年九月戊子，馬知節自檢校太保宣徽北院使，簽書樞密院事，進樞密副使。同日參知政事，趙安仁以

兵部侍郎，仍領玉清昭應宮使免。此二事真宗紀失書。

七年六月，馬知節自檢校太傅宣徽北院使，以潁州防禦使免。此事真宗紀失書。

九年正月，張旻自侍衛馬軍副都指揮使，威塞軍節度使，檢校太保，加宣徽南院使，兼樞密副使。此事

真宗紀失書。

九月丙辰，丁謂自參知政事，以平江軍節度使免。當作甲辰。

王曾自翰林學士兵部侍郎知制誥，加左諫議大夫，張知白自諫議大夫權御史中丞，加給事中，竝除參

知政事。此九月丙午事也。表失書日。又據本紀及宰輔編年錄，同日除參政者，尙有陳彭年一人。彭

年班在曾與知白之前，當是表有脫文爾。當云九月丙午，陳彭年自翰林學士工部侍郎知制誥兼龍圖閣學士，加刑部侍郎，除參知政事，依前會靈觀使，另爲一

行，列于王曾諸人之前。

任中正自樞密直學士給事中，權知開封府，加工部侍郎，遷樞密副使。此事真宗紀失書。

天禧元年七月，王旦自太尉兼侍中，同中書門下平章事，以玉清昭應宮使免。此事真宗紀失書。

八月，張旻自樞密副使，以河陽三城節度使免。此事真宗紀失書。

二年六月，曹利用自檢校太尉宣徽北院使，同知樞密院事，進知樞密院事。此事真宗紀失書。

十二月，張知白自參知政事，以刑部侍郎翰林侍讀學士，知天雄軍。此事真宗紀失書。

四年八月，錢惟演自翰林學士，刑部侍郎知制誥，遷樞密副使。此事真宗紀失書。

九月周起自禮部侍郎樞密副使，以戶部侍郎知青州。曹瑋自簽書樞密院事，以宣徽南院使出爲環慶路馬步軍都部署。此二事真宗紀失書。

十一月戊辰，檢校太尉同平章事丁謂、太子少傅同平章事李迪，忿爭于上前，謂以戶部尙書知河南府，迪以戶部侍郎知鄆州。案是日，謂、迪同罷。次日，詔謂赴中書視事如故，又明日，進謂左僕射，太子少師，表但書罷而不書復留及加官，此脫漏之甚矣。

宰輔表二

景祐四年初，呂夷簡、王曾不協，曾言夷簡招權，交論于上前，參知政事宋綬、善夷簡，樞密副使蔡齊頗附會。此敘諸臣罷免之由，當書于本傳表，惟記拜罷官位月日，不應贅出。

寶元元年，先是右司諫韓琦屢言宰執非才，此語亦可省。

二年十月丁酉，仁宗紀作十一月，此誤。編年錄亦云十一月。

十月壬寅，仁宗紀作十一月，此誤。

慶曆四年，陳執中除參知政事，蔡襄、孫甫等言其剛愎不可任，上不聽。蔡襄以下皆可省。

五年，先是樞密副使韓琦上疏論富弼不當輕罷，不報。董士廉又訟水洛城事，此語皆可省。表無敘事之例，卷內似此者甚多，略舉數條，以見其繇而無當也。

皇祐元年，是歲，賈昌朝自山南東道節度使，同平章事安國公，判鄭州，依前尚書右僕射，觀文殿大學士，判尚書都省。案，昌朝于前二年罷相，此判尚書都省，非執政之職，不當溷入。

嘉祐四年五月，田況自樞密使，以尚書右丞觀文殿學士，兼翰林侍讀學士，提舉景靈宮事。此事仁宗紀失書。

六年閏八月，歐陽修自禮部侍郎樞密副使，除參知政事。此事仁宗紀失書。

治平元年十二月，王疇自翰林學士禮部侍郎，除樞密副使。此事英宗紀失書。

樞密副使吳奎丁父憂，奎以父憂去位，明年詔起復，固辭，而英宗紀不書罷，亦脫漏也。

二年二月，樞密副使王疇卒。此事英宗紀失書。

五月，陳旭自資政殿學士禮部侍郎，除樞密副使。此事英宗紀失書。

七月，呂公弼自工部侍郎權三司使，樞密直學士，除樞密副使。此事英宗紀失書。

三年四月，胡宿自樞密副使，以觀文殿學士，吏部侍郎，知杭州，郭達自殿前都虞候，容州觀察使，加檢校

太保，除同簽書樞密院事。十月，郭達自同簽書樞密院事，除陝西四路沿邊宣撫使，兼判渭州。此三

事英宗紀失書。

四年九月，韓絳自三司使，吏部侍郎，邵亢自樞密直學士，兵部員外郎，知開封府，竝除樞密副使。神宗

紀止載邵亢一人紀之漏也。

郭逵自同簽書樞密院事以宣徽南院使判鄆州。此事神宗紀失書。

熙寧元年十二月邵亢自樞密副使以資政殿學士給事中知越州。此事神宗紀失書。

七年十二月王詔自觀文殿學士兼端明殿學士龍圖閣學士禮部侍郎知熙州除樞密副使。此事神

宗紀失書其十年二月書以王詔知洪州亦無罷字。

元豐元年閏正月簽書樞密院事曾孝寬丁父憂。孝寬公亮之子也神宗紀書公亮薨而不書孝寬之去位亦闕漏。

宰輔表三

元祐元年閏二月安燾自同知樞密院事進知樞密院事。此事哲宗紀不書考宰輔編年錄稱燾自同知遷知院命既下而給事中王巖叟封還之侍御史劉摯右諫議大夫孫覺左司諫蘇轍亦言之俱不聽命再下而給舍又封還三月詔安燾堅辭知樞密院事特依所乞依舊同知樞密院事仍令班左丞李清臣上是燾之除命既下而中止故次年六月又有知院之除也表失書仍舊任一節。

三年四月壬午是日劉摯自中大夫尙書左丞除中書侍郎與孫固竝命表失書。

四年六月丙午是日許將自翰林學士除中大夫尙書右丞表失載。

元符二年閏九月黃履自通議大夫尙書右丞以守本官知亳州。此事哲宗紀失書。

建中靖國元年十一月庚申。編年錄作丙子。

崇寧元年六月丙申。據徽宗紀及編年錄。陸佃之罷。在五月己卯。許將四人之除官。在五月庚辰。與表異。

三年十二月同知樞密院事安惇卒。此事徽宗紀失書。

五年二月趙挺之自尙書右僕射兼中書侍郎加特進光祿大夫尙書右僕射兼中書侍郎。案挺之于去年六月罷相爲觀文殿大學士中太乙宮使。此當云自觀文殿大學士中太乙宮使不嘗仍舉前官也。

政和六年八月乙巳。編年錄作己巳薛昂自銀青光祿大夫尙書右丞除尙書左丞侯蒙自中大夫尙書左丞除

中書侍郎。徽宗紀以爲十一月戊申事。

十一月童貫自節度使開府儀同三司陝西河東河北宣撫使除簽書樞密院事。徽宗紀不載此事。編年錄載于是年二月。

靖康元年正月甲戌耿南仲自簽書樞密院事進同知樞密院事。欽宗紀編年錄俱不載此事。

宰輔表四

建炎三年二月己巳。葉夢得自試戶部尙書。遷中大夫。除尙書左丞。案宰相編年錄。夢得執政纔十四日。自己巳至辛巳。祇十三日。至三月辛巳罷。授資政殿學士。提舉中太乙宮。兼侍讀。表祇書除而不書罷。亦疏漏也。三月庚辰。朱勝非自守中書侍郎。除通奉大夫。守右僕射。兼中書侍郎。兼御營使。故事。命相進官三等。勝非特進五官。案。勝非任中書侍郎日。官已至太中大夫矣。由太中而上。則有通議。通奉。正議。正奉。宣奉五等。此云進五官。當是宣奉大夫。非通奉也。

辛巳。盧益自中大夫。同知樞密院事。除尙書左丞。案高宗紀。益未拜復罷。爲資政殿學士。編年錄亦云。戊子。召王孝迪。盧益竝奉使金國。益辭行。遂以本職提舉崇福宮執政。凡八日。表亦祇書除而不書罷。蓋史之疏漏多矣。

四年二月乙未。杜充罷右相。以觀文殿大學士。提舉江州太平觀。充于去年十一月降金。至是乃有罷相奉祠之命。所謂文而不實也。

六月丙戌。前宰相呂頤浩。朱勝非罷。爲江東西兩浙安撫大使。前宰相除官。表例不書。且其時頤浩爲江東安撫。勝非爲江西安撫。若兩浙路安撫。則劉安世爲之。安世非前宰相也。兩浙二字當刪。又不當有罷字。紹興元年。汪伯彥除江東安撫大使。二年。李綱除湖廣宣撫使。九年。張浚復資政殿學士。知福州。三十一年。張浚復觀文殿大學士。判建康府。與此同。

紹興三年十月癸丑。朱勝非以右僕射起復。勝非起復。本紀在七月乙亥。編年錄在七月癸酉。

秦檜。案。檜以二年八月罷相。至八年三月。復自樞密使入相。表于三年四年五年六年七年第一格。俱

有秦檜字誤也。

湯思退于紹興三十年十二月罷相而表于三十一年。猶書湯思退誤。與此同。柯氏宋史新編皆刪去。

六年十二月。張守自資政殿學士提舉洞霄宮。除參知政事。案。自是年至紹興三十二年。執政除罷。皆

失書寄祿之官。至孝宗卽位。史浩。張燾。輩乃復書寄祿官。隆興末。錢端禮。虞允文。王剛中。初除簽樞。亦

失書官。自後或書或否。至淳熙七年。周必大以後。執政書官者。十不得一矣。

八年十二月甲戌。此條當移于己未之後。

十一年十月癸巳。韓世忠罷樞密使云云。當在第四格。誤列于第三格。

十五年十月。秦熿自翰林學士承旨。除知樞密院事。案。高宗紀不載此節。但書以翰林學士承旨秦熿。

爲資政殿學士。提舉萬壽觀。兼侍讀。恩數視執政班。簽書樞密之下而已。考之編年錄。熿除知院。力請

依李淑故事。避親而罷。乃有資政學士之命。表書除而不書罷。蓋失之矣。至十八年三月壬午。再以熿

知樞密院事。四月。熿乞避父子共政。以爲觀文殿學士。提舉萬壽觀。兼侍讀。提舉祕書省。恩禮視宰臣

班次。亞右僕射。表卻失書。

十八年正月乙未。段拂罷參知政事。紀在二月。案。是歲正月庚申朔。無乙未日。

七月丙申。紀在八月。第三格丁酉同。

二十六年八月。是月辛卯。程克俊罷參政。以資政殿學士。提舉洞霄宮。表失書。

二十九年正月丁亥。當作七月。柯氏新編作七月。

九月甲午。陳康伯右僕射。當云陳康伯自參知政事。兼權樞密院事。除右僕射。同中書門下平章事。

三十一年六月庚申。周麟之罷。同知樞密院事。高宗紀失書。

十月。張浚復觀文殿大學士。判建康府。據高宗紀。是月甲子。復張浚觀文殿大學士。判潭州。十一月壬

申。以浚判建康府。表誤并爲一事。

隆興元年五月癸亥。孝宗紀作六月。

乾道元年二月戊申。陳康伯罷左僕射。授少師。觀文殿大學士。魯國公。致仕。案孝宗紀。二月丁未。陳康

伯薨。在罷相前一日。編年錄。康伯既薨。鎖院降麻。以少師觀文殿大學士致仕。洪氏容齋隨筆言。宣和

以前。未有既死而方乞致仕者。南渡之後。故實散亡。于是朝奉武翼郎以上。不以內外高卑。率爲此舉。

其最甚而無理者。雖宰相輔臣。考終于位。其家發哀。卽服降旨。聲鍾給賻。既已閱日。方且爲之告廷出

命。綸書之中。不免有親醫藥介壽康之語。如秦太師。万俟丞相。陳魯公。沈必先。王時亨。鄭仲益。是已。

四月丙戌。洪适自翰林學士。左中奉大夫。知制誥。誥除端明殿學士。簽書樞密院事。孝宗紀作六月丙

戊許及之撰适行狀亦云六月此表誤也。編年錄亦作四月表蓋承其誤

三年十一月劉珙自翰林學士知制誥除同知樞密院事據朱熹撰墓記珙自朝散郎除中大夫

七年三月己丑張說自明州觀察使知閤門事兼樞密副都承旨除簽書樞密院事己丑當作己卯據

孝宗紀是月戊子說罷爲安慶軍節度使提舉萬壽觀至次年二月癸亥復除簽書樞密院事表于罷而復除兩事皆略而不書失其實矣

淳熙九年是年九月庚午王淮自右丞相兼樞密使福國公加特進左丞相封冀國公梁克家自觀文殿學士禮泉觀使兼侍讀遷金紫光祿大夫右丞相封儀國公表旣失書又自是年至十三年第一格俱當有梁克家字亦竝失之而于十三年第二格內卻有梁克家罷右丞相一節則是表本有而刊本脫去之耳蓋此表第四卷多闕文如高宗建炎三年七月鄭穀卒八月劉珙權同知三省樞密院事十一月周望同知樞密院事四年正月滕康劉珙罷紹興三年二月權邦彥卒六年二月沈與求罷七年六月沈與求卒孝宗乾道七年七月王炎除樞密使淳熙十五年正月施師點罷黃洽知樞密院事蕭燧參知政事光宗紹熙元年十二月王藺罷五年九月羅點卒寧宗慶元四年七月葉翥罷六年六月許及之以母憂去位嘉泰二年十一月陳自強知樞密院事許及之參知政事嘉定元年六月林大中卒八月邱審卒六年正月宇文紹節卒三月樓鑰罷七年正月章良能卒八年二月雷孝友罷十二年

四月。曾從罷。十四年十二月。鄭昭先罷。皆本紀所書而表無之。然柯氏新編表中。一一具書。知柯所見本。尚未脫落。監本屢經修補。淺失其舊。非盡史臣之失也。

紹熙五年八月。留正罷左相。當云以觀文殿大學士。判建康府。方合前後之例。

嘉定三年正月。傅伯壽自翰林學士。除端明殿學士。簽書樞密院事。寧宗紀云。伯壽辭不拜。

宰輔表五

寶慶元年四月。薛極端明殿學士。正議大夫。簽書樞密院事。案。極于嘉定十五年。已除簽書。中間不聞罷免。蓋因轉官。正議大夫而書也。此卷于宰執轉官皆書。較之前卷加詳。

紹定五年十月丙辰。以火延太廟。故薛極、鄭清之、喬行簡。詔各降一官。案。薛極等復官在五月。則降官必在五月以前。此云十月者。刊本之譌。

端平二年六月。葛洪除資政殿大學士。通議大夫。提舉臨安府洞霄宮。案。理宗紀。紹定四年六月。洪已除資政殿學士。知紹興府矣。此後未見復除執政之事。

十二年。魏了翁自同簽書樞密院事。督視京湖軍馬。除簽書樞密院事。力辭。改資政殿學士。湖南安撫使。案。理宗紀。了翁知潭州。在次年四月。知潭州。例帶荆湖南路安撫使。其實一也。

三年九月乙亥。鄭性之兼同樞密院事。李鳴復兼參知政事。理宗紀失書。

癸亥。宣繒自資政殿大學士、光祿大夫、提舉臨安府洞霄宮、除觀文殿大學士致仕。案。宣繒傳。嘉定十四年。同知樞密院事。兼參知政事。明年。拜參知政事。以資政殿學士奉祠。端平三年。召赴闕。升大學士。提舉洞霄宮。以觀文殿大學士致仕。繒之罷政奉祠。當在寶慶三年以後。紀表俱失書。此年被召進官致仕。則又例所不應書也。

嘉熙二年正月戊申。余天錫自少中大夫、試吏部尙書、除端明殿學士、同簽書樞密院事。理宗紀失書。七月庚辰。趙以夫自右文殿修撰、樞密都承旨、除沿海制置副使、兼知慶元府、同知樞密院事。理宗紀不書。淳祐元年三月以夫罷。紀亦不書。

三年二月壬寅。余天錫兼同知樞密院事。理宗紀失書。

十月庚申。許應龍罷簽書樞密院事。林略罷同簽書樞密院事。理宗紀失書。

四年九月癸亥。喬行簡自少傅平章軍國重事。特授少師、保寧軍節度使、醴泉觀使奉祠。理宗紀失書。行簡罷政事。

淳祐元年十二月。資政殿大學士、通議大夫、知慶元府余天錫。乞守本官致仕。案天錫傳。罷政。授資政

殿學士。知紹興府。浙東安撫使。此云知慶元府。豈初除紹興。而改除慶元乎。表失書其罷政之日。

二年二月。游侶出帥浙東。尋奉祠。當云自知樞密院事。兼參知政事。除知紹興府浙東安撫使。尋改提

舉洞霄宮。

十二月丙寅。別之傑自同知樞密院事兼權參知政事。除資政殿學士。湖南安撫大使。知潭州。理宗紀失書。

四年三月己未。金淵除端明殿學士。簽書樞密院事。理宗紀失書。

九月丙午。史嵩之依前官起復。加永國公。案理宗紀。是歲十二月。詔許右丞相史嵩之終喪。則起復之。詔雖下。仍不果行也。表既失書。詔終喪一節。而于五年六年第一格。俱有史嵩之字。則誤以爲嵩之真起復矣。柯氏新編于五年六年無嵩之名。

五年正月乙卯。劉伯正罷參知政事。十二月癸未。李性傳除職于郡。理宗紀失書。

六年十二月乙未。右丞相史嵩之守本官致仕。是月。嵩之服除。詔依前守金紫光祿大夫。觀文殿大學士。永國公。當云前右丞相。乃與見任有別。

七年三月戊辰。李韶依舊端明殿學士。提舉萬壽宮兼侍讀。詔非執政。不當列于表。

九年閏二月。吳淵以端明殿學士。沿江制置使。江東安撫使。兼知建康府。兼行宮留守。淵非執政。以次

年詔與執政恩數。故預書之。非例也。

十年三月。賈似道除端明殿學士。兩淮制置大使。淮東安撫使。知揚州。是時似道未爲執政。例不當書。

寶祐二年五月李曾伯除參知政事帥蜀郡。案曾伯傳但云進資政殿學士制置四川邊面與執政恩

例不云除參政也。理宗紀亦不書除參政疑表誤。

開慶元年正月乙丑林存以資政殿學士知建寧府。已見上年十一月此重出。

景定元年九月厲文翁依舊端明殿學士提舉臨安府洞霄宮。文翁非執政不當列于表。

三年九月辛未資政殿學士沈炎薨。表于執政例書卒此書薨誤也。

四年六月丁巳馬光祖依舊觀文殿學士提舉臨安府洞霄宮。據理宗紀乃上年十一月癸巳事疑表

誤。

五年八月乙丑姚希得除參知政事十一月乙未葉夢鼎自同知樞密院事除參知政事姚希得自簽書

進同知樞密院事兼參知政事。本紀俱失書。

咸淳元年二月丁未姚希得自同知樞密院事除參知政事江萬里自簽書樞密院事進同知樞密院事。

度宗紀俱失書。考江萬里傳萬里自同簽書去官後知建寧府改知福州度宗即位召同知樞密院

事此云自簽書進同知院事亦誤也。

壬申王燾依舊端明殿學士除簽書樞密院事。度宗紀失書。

十一月辛丑留夢炎自權禮部尚書除端明殿學士簽書樞密院事。度宗紀失書。

八年三月丙子趙順孫自同知樞密院事兼參知政事授中大夫。案順孫于六年正月除同簽書樞密院事其遷同知院未詳何時。

德祐元年三月乙亥王煥自觀文殿學士除左丞相兼樞密使。案煥于上年十一月已除左丞相矣考瀛國公紀是歲二月似道上書請遷都下公卿雜議煥言已不能與大計遂去己已召煥爲浙西江東宣撫招撫大使使居京師以備咨訪蓋罷相于二月而再相于三月也表失去中罷一節。

二月丁未姚希得除參知政事。案希得傳咸淳五年卒安得德祐初尙存此必誤也瀛國公紀亦無此事。

二年正月庚午黃鏞自同簽書除參知政事。案瀛國公紀是日同簽書樞密院事黃鏞參知政事陳文龍遁謂鏞與文龍同遁也表殆誤。

己卯全允堅加太尉除參知政事。案瀛國公紀是日加全永堅太尉。即允堅也允永堅相近參知政事常楙遁本各是一事參知政事四字屬下旬永堅以后族加太尉不爲參政也表又誤。

廿二史考異卷七十五

宋史九

后妃傳

真宗章懷潘皇后。忠武軍節度使美第八女。案潘美傳。美子惟熙。娶秦王女。平州刺史惟熙女。卽章懷皇后也。二傳或以爲美女。或以爲孫女。必有一誤。

章獻明肅劉皇后。蜀人龔美者。以鍛銀爲業。攜之入京師。后爲美人。以其無宗族。乃更以美爲兄弟。改姓劉。案長篇。劉氏始嫁蜀人。龔美攜以入京。旣而家貧。欲更嫁之。張旻時給事襄王宮。言于王。得召入。遂有寵。美因改姓劉。爲美人兄云。此傳不言嫁美者。史家諱之。外戚劉美傳。直以美爲劉通之子。略不及改姓事。更失其實矣。

仁宗郭皇后。初。帝寵張美人。欲以爲后。章獻太后難之。案長篇云。驍衛上將軍張美曾孫女。與郭后同入宮。上屬意之。將選爲后。卽此傳之張美人也。旣立郭后。以張爲才人。天聖六年。進美人。尋卒。明道二年。追册張爲皇后。蓋仁宗朝。內職追册后者二人。皆張姓。史但爲溫成立傳。而不及明道追册之后。亦疏漏矣。

尙氏與楊美人俱幸。數與后忿爭。一日尙氏于上前。有侵后語。后不勝忿。批其頰。上自起救之。誤批上頰。上大怒入內。都知閤文應。因與上謀廢后。且勸上以爪痕示執政。上以示呂夷簡。且告之。故夷簡亦以前罷相怨后。乃曰古亦有之。后遂廢。此事又見宦者傳。

慈聖光獻曹皇后。樞密使周武惠王彬之孫也。案曹彬傳。追封濟陽郡王。累贈韓王。不云周王。蓋傳逸其文。

張貴妃。父堯封。堯封妻錢氏。案長篇。堯封。天聖初客南都。依大姓曹氏。曹以女妻之。後擢進士第。補石州軍事推官。未行。卒京師。從兄堯佐。將赴官于蜀。曹氏請以諸孤從行。堯佐以道遠弗許。堯封母錢氏女也。張氏時八歲。與姊妹三人。由錢氏入宮寢。是錢氏乃堯封母。非堯封妻。傳誤以爲一人。

皇祐初。進貴妃。後五年薨。案仁宗紀。慶厯八年_{戊子}十二月丁卯。册美人張氏爲貴妃。其明年。改元皇祐。此云皇祐初。進貴妃者。誤也。紀載至和元年_{甲午}正月癸酉。貴妃張氏薨。自戊子至甲午。凡七年。不得云後五年。

哲宗昭慈聖獻孟皇后。太后生辰。置酒宮中。從容謂帝曰。宣仁太后之賢。古今母后。未有其比。昔奸臣恣爲誣謗。雖嘗下詔明辨。而國史尙未刪定。豈足傳信。吾意在天之靈。不無望于帝也。帝聞之悚然。後乃更修神宗哲宗實錄。此事又見范冲傳。而彼文較詳。又句濤傳稱。重修哲宗實錄。帝諭之曰。昭慈

聖獻皇后病革，朕流涕問所欲言，后愴然謂朕曰：吾逮事宣仁聖烈皇后，見其任賢使能，約已便民，憂勤宗社，疏遠外家，古今母后，無與爲比。不幸姦邪罔上，史官蔡卞等，同惡相濟，造謗史以損聖德，誰不切齒在天之靈，亦或介介，其以筆屬正臣，亟從刪削，以信來世，朕痛念遺訓，未嘗一日輒忘，今以命卿，詞意亦與此同，惟以爲臨沒之訓，小有異爾，以史例言之，此事當入后妃傳，詳此而刪彼，庶幾簡而有要。

徽宗顯恭王皇后。大觀二年崩，諡曰靜和，紹興中，始祔徽宗廟室，改上今諡云。案徽宗紀，大觀四年十二月，改諡靖和皇后爲惠恭，禮志亦有之，獨本傳失書，又譌靖爲靜。

寧宗恭聖仁烈楊皇后。楊次山官至少保，封永陽郡王，次山二子，谷，封新安郡王，石，永寧郡王，自有傳。案外戚傳，次山由永陽郡王，進會稽郡王，官自少保進少傅，加太師，非終於少保永陽郡王也，谷，官太傅，永寧郡王，石，由少保永寧郡王，進封魏郡王，較之此傳爲詳備，此但當云次山自有傳，餘文皆可省也。

度宗全皇后，理宗母慈憲夫人姪孫女也。案劉克莊集，有全安民贈太保唐國公，全份贈太傅豫國公，全大節贈太師徐國公，制大節者，慈憲夫人之父，余天錫傳所稱全保長也，全祖望據其家乘云，份五子，長思聰，次大中，次大節，次大聲，次大用，大中無嗣，以再從子昭孫爲後，卽全后之父，然則后爲慈憲

之姪女。非姪孫女矣。度宗時追贈大中太師申王。昭孫太師和王。宋史外戚傳。不立昭孫傳。蓋宋末事迹缺佚。史臣失于采訪也。

弟清夫。庭輝等一十五人。各轉一官。案。劉克莊撰全清夫制詞云。屬以儲闈。正人倫之始。選諸戚畹。得邦媛之賢。如卿行尊。蓋主婚禮。是清夫于后爲尊行。史云后弟。誤。

魏王廷美傳

廷美母陳國夫人耿氏。朕乳母也。後出嫁趙氏。案杜太后傳。生邕。王光濟。太祖。太宗。秦王廷美。夔王光贊。則廷美與太宗同母。此云乳母耿氏所生者。蓋廷美得罪之後。造爲此言。

燕王德昭傳

惟吉生甫彌月。太祖命輦至內廷。擇二女媪養視之。案長編。惟吉初名德雍。太祖愛之。視如己子。故與諸叔聯名。及出閣始改名。此傳所失書也。秦王廷美第四子。亦名德雍。似不應與惟吉先名同。或長編傳寫有譌字。

紹興元年。詔曰。太祖皇帝勦業垂統。德被萬世。神祖詔封子孫一人爲安定郡王。世世勿絕。今其封不舉。朕甚憫之。有司其上。今封人名。遵故事施行。此詔又見高宗紀。

元祐六年。簽書潁州公事。是時蘇軾知潁州。趙令時爲簽判。其銜當云。簽書潁州節度判官廳公事。史

刪去節度判官四字。竟似簽書州事矣。史家不通官制。涉筆便誤。一至于此。

初。懿王生昌州團練使惟固。惟固生楚安信王從信。從信生益公世逢。世逢生令應。今案。從信。乃惟忠之子。惟忠嘗爲昌州團練使。非惟固也。從信贈楚國公。此稱楚王。一篇之中。自相抵牾。宗室世系表。亦稱楚國公。又

以世系表考之。令應乃北海侯世爽之子。從信子無名世逢者。未知孰是。今應。表作令憲。乃刊本之譌。建炎二年。分西外宗子于秦州。朱子語類。徽宗以定室衆多。京師不能容。故令秦王位下子孫。出居西京。謂之西外。太祖位下子孫。出居南京。謂之南外。

秀王子偁傳

時孝宗爲普安郡王。疑所服。詔侍從臺諫議秦燿等。請解官。如南班故事。案。徽宗分宗室出居西京。南京。惟太宗以下子孫留京師。其中又分兩等。惟漢園之後。恩禮尤優。所謂南班宗室也。

漢王元佐傳

謫議趙齊。王遙。翊善。戴元頓首請罪。王遙。姚坦傳作王適。

神宗封王後。以允言子宗說。恭憲王長孫嗣。封祁國公。神宗當作仁宗。

昭成太子元億傳

宗保累官代州防禦使。襲封燕國公。慶曆四年。封建安郡公。傳失書。

越王元傑傳

嘗作假山既成置酒召僚屬觀之。翊善姚坦獨頰首不視。元傑強之坦曰。坦見血山安得假山。言州縣鞭撻徵民以取租稅。假山實租稅所爲耳。語見姚坦傳中。坦傳與此略同。當去此存彼。

宗望終右武衛大將軍舒州防禦使。慶厯四年封清源郡公。傳失書。

楚王元偁傳

允則無子。以平陽懿恭王之子宗達爲後。慶厯四年封宗達恩平郡公。傳失書。

徽宗諸子傳

次陳國公機。案世系表。機贈太師兼右弼陳王。諡悼惠。傳失書。

公主傳

仁宗十三女。徐國、鄧國、鎮國、楚國、商國、魯國、唐國、陳國、豫國。九公主皆早亡。案長篇。仁宗第三女安壽公主。生三歲而封薨。追封唐國公主。第四女寶和公主。二歲而封薨。追封越國公主。皆張修媛所生也。傳有唐國無越國。敍次亦不合。

王溥傳

諡文獻。案王洙傳。夏竦卒。賜諡文獻。洙當草制。封還其目。曰。臣下不當與僖祖同諡。因言前有司諡王

溥爲文獻，章得象爲文憲，皆當改。于是溥得象皆易諡。又張揆傳，仁宗詔改王溥諡，有欲議爲文忠者，揆曰：溥周之宰相，國亡不能死，安得爲忠？乃諡爲文康。此傳失書改諡事。

石守信傳

追封威武郡王，諡武烈。守信追封衛王，累封秦王，見楊億撰石保興碑。

保興本名保正。案保興碑云：公初名貞，太祖改錫今諱。此云保正者，史家避仁宗嫌名改之。

與戴興、楊守一竝爲澶州前軍駐泊。李繼遷入鈔，徙銀夏綏府都巡檢使。據碑，保興由銀夏綏麟府州

都巡檢，丁內艱，起復澶州駐泊都監。傳書除澶州駐泊于巡檢，夏綏之前，又失書母喪起復事。

淳化五年，眞拜蘄州防禦使，爲永興軍鈐轄。改夏綏麟府州鈐轄。至道二年，徙延州都巡檢使。據碑，保

興自京兆府與永興軍兵馬鈐轄，徙延州路鈐轄，無再任夏綏事。

未幾卒。年二十八。保興封西安郡公，追贈貝州觀察使。傳皆失書。

高懷德傳

行周歷延路二鎮，及留守洛都，節制宋亳，皆署以牙職。晉開運初，遼人侵邊，以行周爲北面前軍都部署，懷德始冠。白行周願從北征，以功領羅州刺史。及行周移鎮鄆州，仍領牙校。從行周再鎮宋州，晉末契丹南侵，以行周爲邢趙路都部署，禦之。留懷德守睢陽。會杜重威降契丹，京東諸州羣盜大起，懷德堅

壁清野。敵不能入。行周率兵歸鎮。敵遂解去。漢初。行周移鎮魏博。及再領天平。以懷德爲忠州刺史。領職如故。案五代史。高行周傳。唐明宗時。遷振武軍節度使。麻鎮章武。州。即延昭義。即潞晉高祖時。爲西京留守。徙鎮天雄。安從進叛。以行周爲襄州行營都部署。討平之。徙鎮歸德。州。即宋出帝時。代景延廣爲侍衛親軍都指揮使。是時李彥韜。馮玉等用事。乃求歸鎮。漢高祖入京師。加守中書令。徙鎮天平。其絃行周歷官。與此傳互異。今以通鑑及兩史參考之。則各有疏漏。歐史晉本紀。開運元年正月。契丹陷貝州。歸德軍節度使高行周。爲北面行營都部署。此卽懷德傳所載。遼人侵邊。行周爲都部署事。而行周傳不書。殆以其無功略之歟。懷德以宋太平興國七年壬午歲卒。年五十七。上溯開運元年甲辰。蓋年十九。故云始冠也。舊五代史本紀。開運元年四月。高行周爲侍衛親軍都指揮使。二年四月。移鎮鄆州。侍衛如故。三年六月。行周爲宋州節度使。加兼中書令。充北面行營副都統。蓋行周本以歸德帥領侍衛親軍。及移鎮鄆州。亦不之任。至三年六月。再鎮宋州。乃不典軍職。歐史謂李彥韜等用事。求歸鎮者。當在其時。惟歐史失書移鎮鄆州一節。不如懷德傳之詳備耳。宋史符彥卿傳。杜重威以大軍降。急詔彥卿與高行周領禁兵屯澶淵。會張彥澤引遼兵入汴。彥卿與行周遂歸遼。此卽懷德傳所云。行周爲邢趙路都部署事也。行周傳既失書領禁兵北征事。其降于契丹。則兩傳皆諱而不言。彥卿傳又云。會徐宋寇盜。遼主卽遣彥卿歸鎮。是時彥卿爲徐帥。得遣歸鎮。則行周之歸宋州。亦契丹所遣也。漢

本紀天福十二年杜重威反天平節度使高行周爲鄴都行營都部署以討之考薛史本紀是年八月以杜重威爲宋州節度使以高行周爲鄴都留守本是互相更換及重威拒命行周討平之因留鎮天雄至乾祐三年三月乃自天雄再徙天平耳歐史本紀旣誤而傳尤脫漏不如此傳之核

慕容延釗傳

加殿前都點檢同中書門下三品三品當作二品

郭從義傳

父紹古事後唐武皇案東都事略從義父古無紹字

卒年六十三東都事略作六十四

楊承信傳

楊承信通鑑作楊信蓋避漢隱帝諱去上一字也同時又有瀛州楊信自有傳而楊業之父亦名信

馮繼業傳

加靈州大都督府長史遷朔方節度靈環觀察處置度支温池權稅等使當云遷朔方節度使餘文皆

可省

三年改鎮定國軍案同州龍興寺有開寶八年碑文稱府主連帥太師又云門下平章之命禁殿宣麻

則繼業鎮同州日。嘗加檢校太師。同中書門下平章事。而傳失書。

張從思傳

父存信。振武軍節度。後唐明宗微時。嘗隸存信麾下。五代史義兒傳。李存信本姓張氏。當是從恩之父也。歐史不云爲振武節度。

趙贊傳

晉祖起并門。并門。當云太原。

晉祖命贊奉母歸薊門。薊門。當云幽州。傳蓋采碑志之文。未及刊改。

張永德傳

年七十三。東都事略。作七十二。

吳廷祚傳

加同中書門下三品。三品。當作二品。

李崇矩傳

遵勳初尚主。詔升爲崇矩子。授昭德軍留後駙馬都尉。遵勳官不止留後。當云見外戚傳。

李處耘傳

贈宣德軍節度使。案五代會要周顯德二年升湖州爲宣德軍節度使。

子繼隆、繼和自有傳。凡父子祖孫各傳分在它卷者例書自有傳。此繼隆繼和二人即增處耘之後。非別有傳。當時史臣豈未考前史之例邪。

昭慶改名昭亮。至東上閣門使高州刺史。昭亮更名避章獻太后祖諱也。昭亮官至節度使。不止刺史。當云見外戚傳。

郭守文傳

并州太原人。守文字國華。見東都事略。

崇仁爲解州團練使。崇仁官亦不止團練。當云見外戚傳。

劉廷讓傳

劉廷讓字光義。案太祖紀乾德二年十一月江寧軍當作寧江軍節度使劉光義爲西川行營前軍兵馬都

部署。當作副都部署脫副字將步騎二萬出歸州道以伐蜀。光義即廷讓也。長編亦作光義光義必廷讓之名。後來避太

宗諱改以字行耳。其書義字或爲義或爲毅。曹彬曹翰劉福傳並作光毅皆避諱所改。

領江寧軍節度。江寧當作寧江。其時江南稱臣未入版圖。不當遙授節鎮也。

李懷忠傳

累遷殿前都指揮使、都虞候。案：殿前都指揮使，乃武臣之最貴者，懷忠名位尙微，不得除授。蓋都指揮使麾下別置都虞候，并非殿前都虞候也。

陳承昭傳

江表人。江表非郡縣之名，史家失考其本貫，亦當云江南人。方合史例。李之才，青社人。高文虎、四明人。李曾伯、覃懷人。青社、四明、覃懷，皆非縣名。

李濤傳

晉祖幸大梁，張從賞以孟津叛。從賞當作從賓。

劉載傳

建隆四年，貝州節度使張光翰來朝。案：光翰傳不載鎮貝州事。

張昭傳

詔正國節度盧質，本匡國軍，避太祖諱，追改。

及梁郢王均帝，均帝當作均王，或稱末帝。

竇懿傳

乾德二年，范質等三相竝罷。越三日，始命趙普平章事，制書既下，太祖同翰林學士曰：質等皆罷，普敕何

官當署承旨。陶穀時任尙書，乃建議相位不可以久虛。今尙書乃南省六官之長，可以署敕。儀曰：穀所陳非承平之制。皇弟開封尹同平章事，卽宰相之任。太祖曰：儀言是也。卽命太宗署敕賜之。此事又見職官志及趙普傳。穀引唐大和、中甘露事，數日無宰相，左僕射令狐楚等奉行制書，故儀以爲非承平之制。今刪去穀引甘露事，則儀語爲無著矣。

廿二史考異卷七十六

宋史十

李昉傳

預宴大明殿上。見昉坐虛多遜下。因問宰相對曰。多遜學士。昉直殿爾。當作直院即令真拜學士。令居多遜上。案。學士無品秩。而以官寄祿。昉時官中書舍人。而多遜爲兵部郎中。班居舍人之下。及預宴列坐。乃在昉上。蓋詞臣班序。直院列居學士之下。初不論寄祿官之高卑也。

昉坐左遷太常少卿。俄判國子監。案。太常少卿正四品。自舍人而除。乃稱左遷者。學士職居清要。號稱內相。罷內直而任卿監官。品雖升。猶爲左遷也。

李宗諤傳

恥以父任得官。獨由鄉舉第進士。案。洪容齋引國史許仲宣傳云。仲宣子好問。雍熙二年舉進士。與李宗諤。呂蒙亨。王扶竝預廷試。宗諤。即宰相昉之子。蒙亨。參知政事蒙正之弟。扶。鹽鐵使明之子。上曰。斯竝勢家與孤寒競進。縱以竢升人。亦謂朕有私也。皆下第。見容齋四舉宋史呂蒙正傳亦云。蒙亨舉進士高第。既廷試。以蒙正居中書。故報罷。而宗諤傳云。第進士王明傳云。子挺。扶。竝進士及第。許仲宣傳云。子

待問、再舉及第，然則終于不第者，惟蒙亨一人耳。

先是，後苑陪宴，校理官不與。京官乘馬，不得入禁門。至是，皆因宗諤之請，復之。案：淳化初，宴近臣後苑。三館學士皆預閣門吏，第令直館赴會。宗諤以校理不得預宴，獻詩，有無聊獨出金門去，恰似當年下第歸之句，乃詔自今游宴，宜召直館。其集賢祕閣校理，竝令預會，即其事也。其請京官乘馬入禁門，亦指京官任館職者，非凡爲京官者，皆得援此例也。宗諤時官祕書郎，正是京官，故有是請。又案麟臺故事，至道元年十月，三館學士各獻歌頌，以李宗諤、趙安仁、楊億詞理精當，有老成之風，召至中書獎諭。明日，以祕書丞李宗諤爲太常博士，依前直昭文館。此事本傳失書。

呂蒙正傳

自是宰相子止授九品京官，遂爲定制。案：聞見錄云：大理評事爲狀元及第，宰相任子之初官評事，正

九品京官也。

咸平四年，以本官同平章事，昭文館大學士。宋初循舊制，昭文館集賢院大學士及監修國史，皆以宰相領之。若三相則首相領昭文，其次領國史，其次領集賢。宋人集中稱昭文相公、集賢相公、史館相公者是也。列傳或書或不書，于例初不盡一。

張齊賢傳

擢右諫議大夫。簽書樞密院事。齊賢以太平興國二年登科。六年爲轉運使。八年召還。遂由密學除執政。宋初用人之速。未有如齊賢者。

張子憲傳

遷右諫議大夫。知桂州。不赴。御史劾之。降祕書監。復爲光祿卿。加直祕閣。知廬州。遷祕書監。案麟臺故事。嘉祐三年。以光祿卿張子憲。趙良規。掌禹錫。齊廓。張子思。竝直祕閣。先是張子憲等。皆爲太常少卿。直祕閣。嘗遷諫議大夫。而中書以爲諫議大夫不可多除。故竝遷正卿。而故事。大卿監無帶館職者。故特爲請而還之。今據本傳。則子憲已遷諫議。因御史劾而左遷。且亦未嘗先直祕閣。與程俱所記殊不合。且旣云降祕書監矣。而又云遷祕書監。亦必有譌脫也。

賈黃中傳

與宋白。呂蒙正等同知貢舉。蒙正傳失書知舉事。

錢若水傳

贈戶部尚書。案列傳失載諸臣之諡。如錢若水諡宣靖。呂餘慶諡文穆。辛仲甫諡康節。李穆諡文恭。崔翰諡武毅。楚昭輔諡景襄。楊億諡文楊。徽之諡文莊。孫沔諡威敏。高永年諡忠愍。王溥改諡文康。田況諡宣簡。李東之諡懿靖。任福諡壯愍。姚麟諡忠愍。王中正諡恭僖。張茂則諡僖儉。李繼勳諡莊武。郭達

諡忠穆。蒲宗孟諡恭敏。王存諡莊定。鄭俠諡介。呂惠卿諡文敏。韓忠彥諡文定。韓粹彥諡文惠。胡宗愈諡修簡。溫益諡定簡。龔夫諡節肅。李邦彥諡文和。管師仁諡文懿。耿傅諡忠憲。王雲諡忠介。姚麟諡忠愍。張闡諡忠簡。鄭毅諡忠穆。胡世將諡忠獻。韓彥直諡莊敏。張俊諡忠烈。王德諡威定。王忠植諡義節。辛次膺諡簡穆。吳芾諡康肅。范成大諡文穆。呂祖儉諡忠忠。徐榮叟諡文靖。趙汝談諡文懿。至若李綱、劉安世、諡忠定。吳璘、諡武順。張栻、諡宣。洪咨夔、諡忠文。吳淵、諡莊敏。游似、諡清獻。趙與竊、諡忠憲。趙與騰、諡忠清。岳飛、改諡忠武。秦檜、改諡繆很。則帝紀具載。而本傳轉不書。

溫仲舒傳

三年判昭文館大學士。命下。卒。案昭文館集賢院大學士。惟見任宰相兼之。仲舒雖前執政。未應遽有大稱。當是除學士判館事耳。東都事略長編俱不載此事。

柴禹錫傳

景德初。子宗慶選尚。召禹錫歸闕。令公主就第謁見。行舅姑禮。固辭不許。案外戚傳。宗慶祖禹錫。鎮寧軍節度。父宗亮。太子中舍。宗慶尚太宗女魯國長公主。升其行爲禹錫子。公主傳亦云。宗慶禹錫之孫。帝命主以婦禮謁禹錫第。則宗慶實宗亮之子。此傳所書。失其實矣。宋制尚公主者。皆升與父同行。如王貽永。本貽正之子。升爲溥子。李遵勳。本繼昌之子。升爲崇矩子。本傳皆著其實。獨此篇乃自亂其例。

也。

宗慶永清軍節度。宗慶終于成德軍節度。且加平章事。嘗云見外戚傳。

王著傳

有傳見五代史。案著卒于宋初。不當入五代史。歐陽史亦無著傳。恐誤。

王祐傳

繼以用兵嶽表。徙知襄州湖湘平。移知潭州。案太祖平湖湘。在乾德元年。此傳上文言太祖親征太原。則在開寶二年。符彥卿離大名。亦在開寶二年。是時湖湘之平已久矣。祐知襄州。必在用兵嶺南之時。而史誤以爲湖南耳。

馬令琮傳

父全節。歷橫海、定遠、昭義、彰德、定武、天雄六節度。定遠當作安遠。字之譌也。定武本是義武。史家避太

宗諱追改。

何繼筠傳

父福進。歷事後唐。至周。累官忠武成德天平三節度。春明退朝錄。何中令福進。諡莊烈。在宋朝使相之列。據此傳。福進實卒于周代。蓋宋初追諡也。安審琦亦卒于五代。而宋初追諡恭惠。

李漢超傳

守恩子。祐之順之。用之。潤之。慶之。成之。藏之。案。祐之昆弟。官位事蹟。皆不著。而一一具列其名。似誌狀之文。非史法矣。王繼忠子。懷節。懷敏。懷德。懷政。蘇轍三子。遲。适。遠。蘇遠七子。籥。籍。節。笈。篋。箭。汪藻子。六人。恬。恪。恂。懷。禧。洪。适。子。九人。槻。秘。摺。樞。檟。楛。栝。劉光祖子。端。之。靖。之。翊。之。竑。之。張俊子。五人。子琦。子厚。子顏。子正。子仁。衛膚敏子。仲英。仲傑。仲循。句龍如淵子。佃。僕。似此類皆可省。

郭進傳

少貧賤。爲鉅鹿富家傭保。嗜酒蒲博。其家少年患之。欲圖殺進。婦竺氏。陰知其謀。以告進。遂走晉陽。案東都事略。進少依鉅鹿富人家傭作。人有欲殺之者。富人婦竺氏。陰告之。乃至晉陽。太平興國初。判邢州。訪竺氏。婦已死。家甚貧。得其女。撫養如己子。厚其資裝以嫁之。史但云婦竺氏。而不云富人婦。似竺氏爲進之婦矣。

太平興國初。又賜宅一區。上文已云。太平興國初。賜京城道德坊第一區。此重出也。

安守忠傳

贈太尉。案。宋時武臣。有兩安守忠。長編載元豐七年九月。戶部尙書王存言。準詔具析安守忠預繪像。因依勘會所采臣僚勳績。竝于國史實錄。考求事迹。據本傳所載。贈太尉安守忠有戰功。故迹當預繪。

像。其捧日左廂都指揮使。欽州團練使安守忠。史冊無載。即無預繪像人數。詔景靈宮改繪。贈太尉安守忠像。併推恩其家。先是景靈宮繪像。管勾官誤以欽州團練使安守忠充數。而贈太尉安守忠之孫自言。故命存考定。而降是詔。

王昭遠傳

諡惠和。春明退朝錄。作和惠。

張鑑傳

建議割瑞州清江。瑞州當作筠州。南渡後避理宗嫌名。改筠爲瑞。此時無瑞州之名也。

馬全義傳

幽州薊人。案王安石撰知節神道碑云。馬氏故扶風人。至公高祖。徙處雲中。雲中爲契丹所得。故馬氏又徙處浚儀。今開封府祥符也。傳云幽州人。與碑不合。

馬知節傳

諡正惠。案。諡法無正字。宋初。馬知節。呂端。諡正惠。高保融。諡正懿。李昉。王旦。諡文正。本皆貞字。史臣避仁宗嫌名。追改之。其後范仲淹。司馬光。蔡卞之文正。吳育之正肅。呂公著之正獻。呂大防之正愨。亦以正代貞。非有二義。元明以後。正貞始兼用。或謂正美于貞。蓋未考其緣起耳。

王繼忠傳

遂陷于契丹。繼忠後事具見遼史。其力戰被陷事已見王超傳。不當更爲立傳。

王延範傳

詣休復告延範將謀不軌及諸不法事。延範誕妄取禍不足立傳。當增見徐休復傳。

呂端傳

幽州安次人。父琦。晉兵部侍郎。端與餘慶爲昆弟。籍貫家世已見餘慶傳。當云參知政事餘慶之弟。乃合史例。王旦父祐自有傳。而且傳又載先世三代官爵及父祐行事。司馬光父池自有傳。而本傳又書陝州夏縣人。父池。天章閣待制。李壁父燾自有傳。而本傳又書眉之丹稜人。父燾。典國史。皆當準此例刊正。

李沆傳

吾老不及見。此參政它日之憂也。案沆爲相時。年止五十餘。未可云老。且少于沆僅十歲。與沆同年登科。其參知政事。距沆入相之始。不過一年有餘。安得遽以新進目之。沆雖先旦而卒。然人命修短不齊。豈能預卜。考呂氏家塾記。李文靖居相位。王公參預朝政。一日。便殿論邊事退。公歎曰。何日邊候徹警。使吾輩得爲太平宰相。文靖不答。至中書。獨召公語云。至非聖人。外寧必有內憂。嘗人有病。常在目前。

則知憂而治之。沆死，子必爲相，違與契丹和親，一朝疆場無事，不有盤游之樂，必興土木之工矣。又元城語錄云：李丞相每朝謁奏事畢，必以四方水旱盜賊不孝惡逆之事奏聞，上爲之變色，慘然不悅，同列以爲非。丞相曰：人主一日豈可不知憂懼？若不知憂懼，則無所不至矣。史臣據此二事，稍改竄增飾之，遂有此失。呂氏記沆死，子必爲相之語，本無病也。

李維傳

除柳州觀察使。柳當作相，柳州非節鎮，不得有觀察也。

向敏中傳

翰林學士李宗諤當對，帝曰：朕自卽位，未嘗除僕射，今命敏中，此殊命也。此事洪邁容齋隨筆嘗辨之。傳範娶南陽郡王惟吉女安福縣主，爲密州觀察使，諡惠節。傅亮子經定國軍留後，諡康懿。經女卽欽聖憲肅皇后也。當云見外戚傳。

王欽若傳

王曾對曰：欽若與丁謂、林特、陳彭年、劉承珪，時謂之五鬼。林特埒見欽若傳，以五鬼之目牽連及之也。及敘特事又云：當時與陳彭年等號五鬼，語見王欽若傳一篇之中，重複如此。

丁謂傳

眞宗崩議草遺制軍國事兼取皇太后處分謂乃增以權字案王曾傳曾入殿廡草遺詔以明肅皇后權聽斷軍國大事丁謂入去權字曾曰皇帝冲年太后臨朝斯已國家否運稱權猶足示後且增減制書有法表則之地先欲亂之邪遂不敢去長篇亦云丁謂欲去權字以王曾言乃止與此傳正相反似當以曾傳爲是然遺制出自中書而謂爲首相終能聽用讜論亦自足多故太后惡之

陳堯咨傳

子述古太子賓客致仕案歐陽修撰堯佐神道碑以述古爲堯佐子予見述古題名石刻稱孟父中令大人太尉相公季父太尉康肅公中令者堯叟也太尉相公者堯佐也太尉康肅公者堯咨也述古爲堯佐子史繫于堯咨傳誤矣中令太尉皆贈官史于堯叟書贈侍中不云中書令于堯佐書贈司空不云太尉蓋後來加贈史家不能悉書也

宋祁傳

預修廣業記業當作樂

景祐中詔求直言案景祐紀年在慶厯之前上文書庠復知政事罷祁翰林學士改史館修撰修唐書皆慶厯中事不應更敍景祐恐是皇祐之譌下文封張貴妃云云正皇祐元年事也

宋湜傳

諡曰忠定。春明退朝錄。諡恭質。

王嗣宗傳

嗣宗嘗自言知武事。可授廉車。廉車。謂觀察使也。

卽拜耀州觀察使。知永興軍府。宋時以觀察使爲武臣寄祿官。嗣宗進士第一人出身。官至侍郎。秩四品。換觀察使。武資。秩三品也。石林燕語云。國朝侍從官。間有換武職者。依唐袁滋故事例。皆換觀察使。如李尙書維。自承旨。李左丞仕衡。自三司使。皆然。天聖間。陳康肅。堯咨以翰林學士知開封府。亦換宿州觀察使。加檢校司徒。知天雄軍。陳力辭。明肅后諭之曰。天雄朔方會府。非文武兼才不可。陳不得已受命。自是加留後。遂建節。石林博于典故。然不知嗣宗換武資。更在李陳諸人之前也。堯咨亦進士第一人。正用嗣宗故事。

子堯臣。內殿承制。與參政王堯臣同姓名。且又同時。

夏侯嶠傳

咸平元年。以戶部郎中罷。郎中。當作侍郎。

張觀傳

字思正。宋史列傳。有兩張觀。兩王著。兩黃震。

11

F

1

廿二史考異卷七十七

宋史十一

田錫傳

出知陳州。坐稽留殺人獄。責授海州團練副使。案容齋四筆云。陳州民張矩。殺里中王裕家兩人。知州田錫未嘗慮問。又詣闕訟冤。遣二朝士鞠之。皆云非矩所殺。裕家冤甚。其子福應募爲軍。因得見曰。臣非欲隸軍。蓋家冤求訴耳。太宗怒。付御史府治之。實矩于法。二朝士皆坐貶。錫與通判郭渭。謫爲海郢州團練副使。史于錫傳既不詳書。而刑法志亦不之及。何也。

王禹偁傳

憲宗嘗命裴洎銓品庶官。洎當作塢。

尹洙傳

年四十七。歐陽修撰墓志。作四十六。

謝絳傳

年四十六。歐陽修撰墓志。作四十五。

梁顯傳

年九十二。案陳正敏遜齋間覽稱梁顯八十二歲。狀元及第。卒年九十餘。士大夫多以爲口實。洪文敏引國史。顯卒年四十二。史臣云。梁之秀穎。中道而摧。以正遜齋之誤。東都事略亦云。年四十二。與國史同。李心傳朝野雜記載狀元年三十以下者云。梁內翰顯。年二十三。顯登第在雍熙二年乙酉。至景德元年甲辰卒。恰是四十二歲也。傳作九十二。未知何據。卽如其言追溯及第之時。止合七十三歲。與遜齋說亦不合。

適相仁宗。別有傳。案適爲顯之子。顯傳在第五十五卷。而適傳在四十四卷。先後亦爲乖次。

楊徽之傳

周顯德中舉進士。劉溫叟知貢部中甲科。據五代會要在顯德二年。

時劉昌言拔自下位。不踰時參掌機務。懼無以厭人望。常求自安之計。童儼爲右計使。欲傾昌言代之。嘗謂徽之曰。上遇張洎。錢若水甚厚。旦夕將大用。有直史館錢熙者。與昌言厚善。詣徽之。徽之語次及之。熙遽以告昌言。昌言以告洎。洎方固寵。謂徽之遺熙構飛語中傷。已遂白上。上怒。召昌言質其語。出徽之爲山南東道行軍司馬。熙落職。通判朗州。此事又見張洎錢熙傳。童儼當作董儼。

查道傳

享年六十四。新安志年六十二。

許元傳

累遷國子博士監。在京權貨務三門發運判官。案歐陽修爲元誌墓。但云三司使言公材以主權貨。不

云爲三門發運判官也。

進金部特賜進士出身。案元由任子入官。以會計特賜進士。非常格也。

既而元欲專六路財賦。六路者江南東路、江南西路、淮南路、兩浙路、荆湖北路、荆湖南路也。

鍾離瑾傳

後徙淮南轉運副使。歷京西河東河北轉運使。改江淮制置發運使。案文潞公奏狀言轉運使有路。分

輕重遠近之差。河北、陝西、河東三路爲重路。歲滿多任三司使副。或發運使。發運任滿亦充三司副使。

成都路次三路。京東西、淮南又其次。江東西、荆湖、兩浙又次之。二廣、福建、梓利夔路爲遠小。瑾自淮南

京西移河東河北。改發運。乃任三司戶部副使。與潞公所云正合。

杜杞傳

父鎬。蔭補將作監主簿。案東都事略杞爲鎬孫。當云以大父鎬蔭補。

楊政傳

保靜軍節度使重勛之曾孫。案史無重勛傳。惟列傳第三十二卷有楊美。并州文水人。官至保靜軍節度使。疑即此傳所云重勛也。畋稱楊業為曾伯祖。則美與業蓋昆弟行。

楊日嚴傳

河南人。進士及第。案楊克讓之孫日嚴亦登進士第。官職方員外郎。彼傳云同州馮翊人。此云河南人。兩人同時。又同姓名。其兄同名日華。疑本是一人。祖貫馮翊。後徙洛陽爾。

賈黯傳

以人齒噉之。齒讀如矢。說文齒齧也。

吳及傳

建請擇館職。分校館閣書。竝求遺書于天下。語在藝文志。案藝文志不載吳及奏議。

楊億傳

卒年五十七。東都事略作年四十七。億嘗代寇準草奏。請皇太子親政。斥丁謂姦邪。準既逐。億亦以憂

卒。景祐元年樞密使王曙上其事。詔贈禮部尚書。諡曰文。有司言故事非嘗任二府及事東宮四品。無贈官。仁宗曰。億為國竭忠。可拘常典乎。此事傳所當載。而史失之。億官工部侍郎。秩四品。

樂黃目傳

又撰學海搜奇錄四十卷。藝文志作六十卷。黃目父子撰述志所載者不及其半。蓋志傳之文多不相應。

楊覃傳。

唐有京兆尹憑。居履道坊。僕射於陵。居新昌坊。刑部尙書汝士。居靖恭坊。時稱三楊。皆爲盛門。而靖恭尤著。案覃與大雅。皆虞卿之後。所述世系。兩傳略同。而此篇尤宥。史家失于刪併。由不出一人之手也。三楊之目。乃唐代故事。而宋史載之。失限斷之例矣。

昭宗朝。以兵部員外郎使吳越。楊大雅傳及唐書宰相世系表。竝作刑部員外郎。

楊允恭傳。

請建大庾縣爲軍。官輦鹽市之。詔建爲南安軍。案地理志。淳化元年。以虔州大庾縣建爲軍。據此傳。似

在太平興國間。

巢。廬江二縣。舊隸廬州。道遠多寇。民輸勞費。允恭請以二縣建軍。詔許之。以無爲爲額。案地理志。太平興國三年。以廬州巢縣無爲鎮建爲軍。以巢廬江二縣來屬。據此傳。似在淳化以後。

王會傳。

舊用郎中官判大理寺。帝欲重之。特命會。且謂會曰。獄重典。今以屈卿。案。是時會以右正言知制誥。兼

史館修撰、正言官從七品。尚在郎中之下。其後再遷。纔得主客郎中。而此時轉以判寺爲屈。何邪。蓋宋時宰執之下。卽以兩制爲華選。知制誥與學士對掌內外制。地望清華。不與它官校品秩。以待從充郎官差遣。故云屈也。案閣門儀制。大宴。知制誥與尙書丞郎同行。見宋朝事實。朝會班。知制誥在祕書監。光祿衛尉。太僕大理諸卿之上。史所載寧登瀛不爲卿。寧抱槩不爲監之諺。正謂此爾。

皇祐中。仁宗爲篆其碑曰旌賢之碑。大臣賜碑篆。自會始。春明退朝錄。皇祐中。王侍郎子融守河中還。

以唐明皇所題裴耀卿碑額上之。仁宗遂御篆賜沂公碑曰旌賢。其後踵之者。懷忠。呂許顯忠。李忠旌

忠。寇萊全德元老。王太教忠積慶。文淵公親賢。李侍中襄親。齊國獻穆公主旌功。曹襄舊學。晏元崇儒。丁文

德。張鄧顯先積慶。趙中令旌忠懷德。張侍儒賢。高文襄賢。范文思賢。劉丞清忠。王武旌忠元勳。狄武襄

忠。陳恭純孝。張文英宗御篆。忠規德範。宋元上御篆。淳德守正。呂文大儒元老。賈魏今考宋史。呂夷簡

寇準。王旦。李用和。曹利用。晏殊。張士遜。范仲淹。劉沆。陳執中。宋庠。賈昌朝。傳皆載賜額。與宋敏求所記

合。而它傳則遺之。又案杜大圭名臣琬琰集所載。仁宗御篆陳琳碑額曰旌勞。神宗篆高瓊碑額曰決

策定難。顯忠基慶。哲宗篆趙抃碑額曰愛直。韓絳曰。忠弼孝忠。賜韓世忠曰中興佐命。定國元勳。吳璘

曰安民保蜀。定功同德。傳皆失書。丁文簡者。度也。高文莊者。若訥也。王武恭者。德用也。狄武襄者。青也。張文孝者。觀也。

張知白傳

罷爲刑部侍郎。翰林侍讀學士。知大名府。春明退朝錄。祖宗時宰相罷免。唯趙令得使相。餘多本官歸班。參樞亦然。天禧中。張文節始以侍讀學士知南京。天聖中。王文康曙以資政殿學士知陝州。自慶厯後。解罷率皆得職焉。案。次道舉張知白。王曙兩人爲執政。罷免加職出外之例。若除職而留京師者。則如至道二年。錢若水自同樞除集賢院學士判院事。咸平元年。夏侯嶠自樞副除翰林侍讀學士。皆實履其職。景德二年。王欽若自參政除知政殿學士。亦居京師。奉朝請。非外任也。宰相表。王曙罷參政出知鄆州。在明道元年七月。而宋云天聖者。本天聖十年。其十一月。方改明道也。

晏殊傳

宰相寇準曰。殊江外人。帝顧曰。張九齡非江外人邪。宋初。南人罕登貴仕。治平以前拜相。惟丁謂。晏殊。章得象。曾公亮四人。自王介甫後。南人入相者浸多矣。寇丁之隙。亦起于南北分黨。萊公固賢相。未免有意排抑南人。

呂夷簡傳

帝始與夷簡謀。以張耆。夏竦皆太后所任用者也。悉罷之。退告郭皇后。后曰。夷簡獨不附太后邪。但多機巧善應變耳。由是夷簡亦罷。及宣制。夷簡方押班。聞唱名大駭。不知其故。而夷簡素厚內侍。副都知閻文應。因使爲中訶久之。乃知事由皇后也。此事又見宦者傳。

韓琦傳

慶厯二年與三帥皆換觀察使范仲淹龐籍王涇不肯拜琦獨受不辭案是時范仲淹帥環慶除邠州觀察使龐籍帥鄜延除延州觀察使王涇帥涇原除涇州觀察使琦所受者必秦州觀察使也仲淹籍傳俱云辭觀察不拜獨涇傳不書辭不肯拜亦疏漏

常平使者散青苗錢琦亟言之帝出其疏以示宰臣曰琦真忠臣雖在外不忘王室朕始謂可以利民今乃害民如此且坊郭安得青苗而亦強與之乎安石勃然進曰苟從其欲雖坊郭何害明日稱疾不出此事又見食貨志

王琪傳

徙知江寧案景德建康志嘉祐二年二月尙書工部郎中龍圖閣待制王琪知府事三年八月琪除知制誥就移知蘇州五年二月工部郎中知制誥王琪再知府事四月移知陳州傳祇載知江寧一任餘竝失書戈宙襄云王珪兄弟名琪王德子亦名琪一文臣一武臣也

文彥博傳

自澶州商湖河穿六深渠河渠志湖作塔塔潔同音吳中復蔡挺傳亦作六深遂加查博兩鎮節度使兩鎮者河東及永興軍也

韓維傳

字持國。司馬光傳家集稱其字曰秉國。溫公父名池。與持同音。故易之。

熙寧二年遷翰林學士。案石林燕語。韓門下維以賜出身。熙寧末。特除翰林學士。崇寧中。林彥振賜出身。韓例亦除翰林學士。國朝以來。學士不由科第除者。惟此二人。彥振謂據也。今據傳書賜進士第。而維傳不書賜出身。亦史文之闕。

包拯傳

知天長縣。有盜割人牛舌者。主來訴。拯曰。第歸殺而鬻之。尋復有來告私殺牛者。拯曰。何爲割牛舌而又告之。盜驚服。案穆衍傳。調華池令。民牛爲仇家斷舌。而不知何人。訟于縣。衍命殺之。明日仇以私殺告。衍曰。斷牛舌者乃汝邪。訊之具服。此二事正相類。

歐陽修傳

左遷知制誥。知滁州。此據四朝國史本傳之文。然知制誥非左遷之官。以歐陽年譜及文集考之。是時修方以龍圖閣直學士充河北轉運使。坐孤甥事。落直學士。罷轉運使。仍帶右正言知制誥。出知滁州耳。

時在外十二年矣。案修以慶厯四年甲申。自諫院出爲河北轉運使。至至和元年甲午。服除赴闕。實十

有一年史云十二年者誤。

劉敞傳

奉使契丹素習知山川道徑契丹導之行自古北口至柳河回屈殆千里欲夸示險遠敞質譯人曰自松亭趨柳河甚徑且易不數日可抵中京何為故道此譯相顧駭愧曰實然但通好以來置譯如是不敢變也案閻詢傳使契丹時契丹在靴淀迓者王惠導詢由松亭往詢曰此松亭路也胡不徑葱嶺而迂枉若是豈非夸大國地廣以相欺邪惠慚不能對此二事亦相類。

曾鞏傳

建昌南豐人案曾致堯傳云撫州南豐人考宋初南豐已隸建昌軍矣當從鞏傳鞏為致堯之孫致堯傳失書孫鞏自有傳鞏傳又不言其祖于史例為疏漏矣

王鞏傳

從蘇軾游軾知滁州滁當作徐登黓山吹笛飲酒黓山本桓山史家避諱改。

廿二史考異卷七十八

宋史十二

陳襄傳

嘗訪人材之可用者。襄以司馬光、韓維、呂公著、蘇頌、范純仁、蘇軾。至於鄭俠三十三人對。今蘇州府學。有石刻熙寧經筵薦士章稿。題云。樞密直學士尙書右司郎中兼侍讀臣陳襄上進三十三人者。端明殿學士、右諫議大夫、集賢院修撰、提舉西京嵩山崇福宮、司馬光、端明殿學士、翰林侍讀學士、尙書吏部郎中、知許州、韓維、翰林侍讀學士、寶文閣學士、尙書戶部侍郎、提舉西京嵩山崇福宮、呂公著、祕書監、集賢院學士、知杭州、蘇頌、右司諫、直集賢院、孫覺、尙書祠部員外郎、祕閣校理、知齊州、李常、尙書兵部員外郎、直集賢院、知和州、范純仁、尙書祠部員外郎、直史館、權知河中府、蘇軾、尙書祠部員外郎、集賢校理、權知洪州、曾鞏、尙書祠部員外郎、集賢校理、同修起居注、孫洙、祕書丞、集賢校理、史館檢討、王存、太子中允、館閣校勘、判武學、顧臨、祕書省著作佐郎、集賢校理、知太常禮院、林希、太子中允、館閣校勘、簽書、應天府判官廳公事、劉摯、太常博士、崇文院校書、句當宗正丞公事、虞太熙、太子中允、監西京洛河抽稅竹木務、程顥、太子中允、權發遣淮南西路轉運判官公事、劉載、殿中丞、新差、充秦鳳熙河路

措置邊事司句當公事兼催督軍需薛昌朝祕書省著作佐郎前崇文院校書張載權輿國軍節度掌書記見磨勘蘇轍前台州司戶參軍召試館閣孔文仲新差歙州軍事推官吳賁前潤州延陵縣令吳恕尙書屯田郎中知開封府太康縣事林英尙書都官員外郎監泗州河南轉般倉孫奕祕書省著作佐郎監揚州糧料院林旦太常博士新差監衡州在城鹽倉鄒何尙書右司郎中分司南京李師中尙書兵部員外郎傅堯俞太常博士新差河東路提點刑獄公事胡宗愈前祕書省著作佐郎王安國太子中允降授大理評事唐垌前光州司法參軍監安上門英州安置勒停鄭俠也紹興元年十一月詔以襄薦章寫示百僚竝鑲版行下諸路此事史亦失書

孫洙傳

尋幹當三班院幹當本是句當史家避高廟嫌名追改王師約傳同管當三班院楊佐傳幹當河渠司曾孝縉傳管幹發運司糶糴事王韶傳管幹秦鳳經略司機宜文字韶子厚幹當熙河公事蕭注傳管幹麟府軍馬傅堯俞傳趙繼寵越次管當天章閣林旦傳幹當奏院宋球傳幹當禮賓院張整傳管幹馬軍司宇文昌齡傳辟幹當公事汪藻傳遷江西提舉學事司幹當公事外戚傳李評幹當三班院向傳範管幹客省閣門皇城司宦者傳劉惟簡幹當延福宮李舜舉歷幹當內東門御藥院講筵閣實錄院又爲廣西幹當公事高居簡幹當御藥院蘇利涉幹當御藥院又幹當皇城司姦臣傳蔡確管幹右

廂公事。選舉志。管幹御藥院使臣。又戶部幹官。麴院權稅務。將作監管幹公事。職官志。樞密院。神宗以存等皆館職。不欲令承旨提舉。詔改爲管幹。戶部篇。增置幹當公事二員。紹聖元年。罷戶部幹當公事。置提舉管幹官。建中靖國元年。復幹當公事官二員。司農寺篇。熙寧四年。詔諸路提舉常平管幹官。令提舉司保明計功賞之。六年。置幹當公事官。九年。以幹當公事官所至輒用喜怒罷之。皇城司篇。幹當官七人。元豐六年。詔幹當皇城司。元祐元年。詔幹當官閱三年無過者。遷秩一等。開封府篇。左右廂公事。幹當官四人。經略安撫司篇。其屬有幹當公事。崇寧五年。詔河東同管幹沿邊安撫司公事。合班篇。管幹殿中省。尙舍尙藥尙醞尙輦尙衣尙食局。幹當左右廂公事。宮觀篇。自今竝依嵩山崇福宮。舒州鑿仙觀。置管幹或提舉。詔卿監職司以上提舉。餘官管幹。又有以京官爲幹當者。職田篇。發運司。幹當公事。轉運司。管幹文字。提舉常平倉。司幹當公事。蔡河許汝石塘河都大催綱。管幹機宜文字。府界提點。司幹當公事。食貨志。農田篇。政和六年。立管幹圩岸團岸官。常平義倉篇。詔諸路各置提舉官二員。以朝官爲之。管當一員。京官爲之。河北轉運司。幹當公事。王廣康。會子交子篇。崇寧三年。置京西北路專切管幹通行交子所。鹽中篇。提舉江西常平張根。管幹運淮鹽於江西。茶下篇。熙寧七年。始遣三司幹當公事李杞入蜀。又令茶場都大提舉。視轉運使。同管幹視轉運判官。阮治篇。以許天啓同管幹。陝西阮治事。天啓爲同管幹。欲專其事。諸路阮治。自川陝京西之外。竝令常平司同管幹。入內皇城使

裴絢爲涇原幹當。市易篇。因命詔爲路帥司幹當。兼領市易事。詔在京市易幹當公事孫迪。又詔三司幹當公事李杞等。兵志鄉兵篇。每五十頃。爲一營。差諸農事官一員幹當。詔將隴山一帶弓箭手人馬。別置一將管幹。每路各置幹當公事使臣二員。嘗充巡檢或管幹本族公事。保甲篇。增同判一。主簿二。幹當公事十。提舉司之。幹當公事者。訓練篇。部隊將幹當公事。凡三十九人。軍甲篇。始置軍器監屬。有丞。有主簿。有管當公事。馬政篇。詔熙河路應縣鎮城峒堡官。竝兼管幹給地牧事。皆以幹代句。或以管代句也。神宗以後。四朝國史。成於淳熙之世。故多追改字。史家承其舊文。未及改正爾。

孟元傳

贈遂州觀察使。元有女孫。爲哲宗皇后。贈太尉。曾孫忠厚。在外戚傳。此傳皆失書。

侍其曙傳

侍其曙。字景升。史失其里居。

祥符二年。黎州夷人爲亂。詔曙乘驛往招撫。其酋首納款。殺牲爲誓。曙按行鹽井。夷人復叛。曙率部兵百餘。生擒酋領三人。斬首數十級。因上言蠻阻險拒命。請必加討。詔知慶州孫正辭。環慶駐泊都監張繼勳。領陝西兵同曙俱進。所至皆降。案蠻夷傳。大中祥符元年。瀘州言。江安縣夷人爲亂。詔遣閣門祇候侍其旭。乘傳招撫。旭至。蠻人首罪。殺牲爲誓。未幾復叛。旭因追斬數十級。擒其酋領三人。二年。旭言

夷人恃巖險未即歸服。詔文思副使孫正辭等爲都巡檢使。乃分三路入其境。脅以兵威。皆震懼伏罪。兩傳一云黎州。一云瀘州。地名互異。正辭官名。一稱其寄祿官。一稱其差遣。非有異同。其易曙爲旭。則避英宗諱也。曙乘傳招撫。撫而復叛。據蠻夷傳在祥符元年。孫正辭等進討。則在二年。本傳俱以爲二年事。似誤。

王安石傳

自禮部侍郎超九轉。爲吏部尙書。案職官志。文臣敘遷之例。禮部侍郎當轉戶部。吏部左丞而後。遞轉六曹尙書。故云超九轉。

神宗欲命相。問韓琦曰。安石何如。對曰。安石爲翰林學士。則有餘。處輔弼之地。則不可。此語已見琦傳。

蔡挺傳

元豐二年薨。列傳書薨卒。當有一定之例。趙普、文彥博、王安石、蘇頌皆宰相。而書卒。呂公弼、蔡挺、鄧洵武以執政書薨。此可議也。

王韶傳

蕃部俞龍珂。長編或作龍渴。渴珂聲相近。

沈遘傳

年四十。王安石撰墓志云。年四十三。

李大臨傳

定以初等職官超朝籍。躡憲臺。宋初選人寄祿官凡四等。留守節察判官節察掌書記支使。防團判官。留守節察推官。軍事判官。謂之兩使職官。防團軍事推官。軍監判官。謂之初等職官。錄事參軍。縣令。謂之令錄。軍巡判官。司理司法司戶。縣主簿。縣尉。謂之判司簿。據職官志。李定時爲秀州軍事推官。故云初等職官。而蘇頌及定傳俱云秀州判官。則是兩使職官。不當云初等矣。頌。大臨爭李定事。詳見頌傳。此文重出。

自爭李定後名益重。世并未敏求。蘇頌稱爲熙寧三舍人云。此語亦見蘇頌傳。

呂夏卿傳

夏卿學長於史。貫穿唐事。夏卿有唐書直筆新例一卷。又通譜學。創爲世系諸表。歐陽公新唐書。宗室宰相世系二表。出於呂夏卿。律麻。天文。五行志。出於劉義叟。方鎮表。出於梅堯臣。能集衆人之長。故較舊史爲善。

程師孟傳

程師孟字公關。吳人。師孟一見列傳第九十卷。一見循吏傳。兩篇無一字異者。循吏傳多兩字前後不檢照如

此又列傳第一百廿二卷李光傳末附見其子孟傳事凡百十五字而第一百六十卷復爲孟傳立傳
司馬光傳

陝州夏縣人也父池天章閣待制案呂公著父夷簡陳執中父恕富直柔祖弼張鑑父藏英皆有傳故本傳不書某縣人若戚綸父同文已有傳矣而同文傳復書應天楚邱人應天府韓琦父國華已有傳矣而琦傳復書相州安陽人琦曾孫肖胄傳又書相州安陽人司馬光父池已有傳矣而光傳復書陝州夏縣人曾布祖致堯兄鞏皆有傳矣而布傳復書南豐人孫瑜父爽已有傳矣而瑜傳復書博平人張燾父根已有傳矣而燾傳復書饒之德興人劉光世父延慶已有傳矣而光世傳復書保安軍人劉子羽父翰已有傳矣而子羽傳復書建之崇安人楊存中父震已有傳矣而存中傳復書代州崞縣人胡世將會祖宿已有傳矣而世將傳復書常州晉陵人徐俯父禧已有傳矣而俯傳復書洪州分寧人常同父安民已有傳矣而同傳復書邛州臨邛人沈晦祖遵已有傳矣而晦傳復書錢塘人蔣芾曾祖之奇已有傳矣而芾傳復書常州宜興人留正六世祖從效自有世家矣而正傳復書泉州永春人李壁父燾已有傳矣而壁傳復書眉之丹稜人孟琪父宗政已有傳矣而琪傳復書隨州棗陽人高文虎從父閱已有傳矣而文虎傳復書四明人王阮曾祖詔已有傳矣而阮傳復書江州人鄭望之父僅已有傳矣而望之傳復書彭城人吳潛父柔勝已有傳矣而潛傳復書宜州寧國人梅堯臣從父詢已有

傳矣。而堯臣傳復書宣州宣城人。傳察從祖堯俞已有傳矣。而察傳復書孟州濟源人。郭忠孝父遼已有傳矣。而忠孝傳復書河南人。其子雍傳又云其先洛陽人。邵伯溫父雍已有傳矣。而伯溫傳復書洛陽人。賈似道父涉已有傳矣。而似道傳復書台州人。苗傅祖授已有傳矣。而傅傳復書上黨人。上黨即潞州此類皆可從省。

王廣淵除直集賢院。光論其姦邪不可近。昔漢景帝重衛綰。周世宗薄張美。廣淵當仁宗之世。私自結於陛下。豈忠臣哉。宜黜之以厲天下。此語已見廣淵傳。

請判西京御史臺歸洛。光以端明殿學士翰林侍讀學士判留臺。元豐初提舉嵩山崇福宮。傳皆失書。田夫野老皆號為司馬相公。光嘗除樞密副使。雖辭不拜。而當時猶以相公稱之。蓋非兩府不得稱相公也。

范鎮傳

超授直祕閣。故事館閣校勘須遷校理。乃得直閣。邵亢自國子直講館閣校勘進集賢校理。加直史館。司馬光亦自國子直講為館閣校勘。加集賢校理。改直祕閣是也。鎮以校勘徑遷直閣。故云超授。

范百祿傳

對入三等。范祖禹撰百祿墓志云。國朝制策三等。惟吳育、蘇軾及公三人。

改吏部侍郎。墓志云。右選官冗累歲。乃得調。既赴官。而宗室許占射成資。即罷去。爲筦庫者患之。公奏請宗室員外置。不獨恩厚公族。且使在官無非次替移之怨。此事本傳不書。

范祖禹傳

字淳甫。一作純夫。

蘇軾傳

歐陽修以才識兼茂薦之。案。宋制科之目。賢良方正。能直言極諫爲一科。才識兼茂。明於體用爲一科。二蘇當日。同舉直言極諫科。穎濱志其兄墓亦云。文忠以直言薦之。傳云。才識兼茂者。誤也。凡應制科者。先就祕館試論六首。中格。然後天子親策之。所謂祕閣試六論也。

及試二論。復入三等。得直史館。案選舉志。太宗以來。凡特旨召試者。於中書學士舍人院。或特遣官專試。所試詩賦論頌策制誥。或三篇。或一篇。中格。則授以館職。據此傳。則治平召試館職。惟試論二篇也。哲宗立。復朝奉郎。軾知湖州日。寄祿官爲祠部員外郎。及官制行。改後行員外郎爲朝奉郎。軾始敘復元官。朝奉郎。正當昔之祠部員外郎也。

遂以本官知英州。尋降一官。軾在定州。爲御史所論。落端明殿學士。翰林侍讀學士兩職。但以朝奉郎知英州。降一官者。由朝奉降承議郎也。杭揚潁定皆節度州。英則刺史州。以差遣言之。亦降兩三等。

軾自元祐以來未嘗以歲課乞遷故官止於此。軾於元祐中任禮部尙書從二品翰林學士正三品而

寄祿官止於朝奉郎纔正七品蓋京朝官雖有四年一轉之法亦必申請吏部乃得之容齋三筆載神

宗卽位以刑部郎中劉述今朝散大夫久不磨勘特命爲吏部郎中今朝奉大夫兵部員外郎張問今朝十年不

磨勘特遷禮部郎中今朝奉大夫東坡之久不遷官亦此類也。

蘇轍傳

六年拜尙書右丞宰輔表稱蘇轍自龍圖閣學士御史中丞除中大夫尙書右丞本傳失書加龍圖閣

學士一節

已而復大中大夫轍除右丞時轉官中大夫在門下侍郎任內轉大中大夫傳皆不書蓋四朝國史於

寄祿官多略之史家因其舊文不復增益如此傳前無轉官大中之文而後云降朝議大夫復大中大

夫首尾殊不相應矣。

蘇頌傳

泉州南安人案蘇紳傳稱泉州晉江人此稱泉州南安人曾肇撰頌墓志則云泉州同安人俱不合

大臨還侍從頌纔授祕書監大臨時爲天章閣待制故稱侍從其時未改官制卿監在侍從之下也

及修兩朝國史及當作召據墓志召修國史提舉中太一宮史局兼宮觀蓋始於此南渡後陸游以提

舉祐神觀兼同修國史亦用此例而職官志亦不之及。

趙瞻傳

服除易朝請大夫知滄州。案元豐寄祿格以朝請大夫換前行郎中瞻於神宗初已官司封員外郎矣。史蓋失書轉郎中一節也。元豐改官制後史家於寄祿官多略之而不書。惟王存孫固趙瞻楊簡諸傳猶見一斑爾。

鄭雍傳

初邢恕以書抵宰相劉摯摯答曰有自愛以俟休復之語排岸司茹東濟錄書示雍與殿中侍御史楊畏雍畏釋其語曰俟休復者俟他日太后復辟也遂竝以此事論摯威福自恣乞罷之。此事已見摯傳。

陸佃傳

遂罷爲中大夫知亳州。案佃除執政時寄祿官已至中大夫矣此乃以本官出知亳州耳。宰輔表云依前大中大夫與傳互異。

陳師錫傳

調昭慶軍掌書記郡守蘇軾器之。是是軾知湖州昭慶湖州節鎮額也。

顏復傳

顏子四十八世孫也。父太初，以名儒爲國子監直講，出爲臨晉簿。當云父太初自有傳。

陶節夫傳

晉大司馬侃之裔也。案史傳之例，與碑誌不同，文人諛墓，追溯得姓之始，臚舉前代名賢，以表世閥，至于史家，宜存限斷。高曾以上，事隔先代，雖譜牒分明，亦當芟汰。宋史諸傳，如劉溫叟云：唐武德功臣政會之後，劉熙古云：唐左僕射仁軌十一世孫，劉載云：唐盧龍節度濟之六世孫，王著云：自言唐相石泉公方慶之後，張藏器云：自言唐相嘉貞之後，石揚休云：唐兵部郎中仲覽之後，楊偕傳，唐左僕射於陵六世孫，李譔云：唐趙國公暉之後，范仲淹云：唐宰相履冰之後，薛映云：唐中書令元超八世孫，鮮于侁云：唐劍南節度使叔明裔孫，齊恢云：唐宰相映之後，郭申錫云：自言唐代公元振之後，石普云：自言唐河中節度使雄之後，張浚云：唐宰相九齡弟九皋之後，李巖云：唐宗室曹王之後，朱倬云：唐宰相敬則之後，魏珩云：唐丞相知古後，杜莘老云：唐工部甫十三世孫，張運云：唐宰相文瓘之後，楊大異云：唐天平節度使漢公之後，陸九齡云：八世祖希聲，相唐昭宗，韓淳云：唐相休之裔孫，羅處約云：唐酷吏希夷之裔孫，李邈云：唐宗室宰相適之之後，顏翻云：唐太師真卿之後，皆承用誌狀之文，未及刊削。若依此例，則蘇之出味道，歐陽之出詢，何以又不書也。此篇敘陶氏而及東晉遙遙華胄，尤無謂矣。

平獻王孚後，楊暉傳，漢太尉賈之後，與此同。

司馬池傳，自言晉安

郭成傳

子浩、紹興中爲西邊大將、至節度使。當云子浩、自有傳。

趙挺之傳

贈司徒諡曰清憲。挺之子明誠、建炎初、以祕閣修撰、知江寧府、移湖州。史失書。

廿二史考異卷七十九

宋史十三

李綱傳上

尙書右丞許翰言綱忠義捨之無以佐中興會上召見陳東東言潛善伯彥不可任綱不可去東坐誅翰曰吾與東皆爭李綱者東戮都市吾在廟堂可乎遂求去此事又見許翰傳當去此存彼

後有旨綱落職居鄂州案綱罷相在建炎元年七月其落職在是年十月落職者劄觀文殿大學士之職也鄂州居住

在是年十一月皆出殿中侍御史張浚之論劾史於浚傳既諱而不言此傳但於罷相時一言浚劾餘亦略不及之蓋史家爲張護短非直筆也綱於洪芻陳沖輩皆爲救解而獨致宋齊愈於死固難免上下其手之嫌乃浚於綱罷相之後抨擊不已甚至指爲國賊又謂綱於蔡氏門人雖誤事亂政力加薦引非竄殛不足以靖天下而於汪黃之姦邪則緘口不言斯誠變亂黑白之甚者矣浚疏具載李心傳繫年要錄予故表而出之讀史者勿以其晚節之善而置之不論也

李綱傳下

贈少師官其親族十人案宋史紀傳於東都九朝餘簡尙爲有法南渡以後蕪雜殊甚李綱固賢相其

傳乃至兩卷。毋乃太繁乎。其諡忠定。則傳仍漏而不書。何也。列傳第七十八。宣縉。李鳴復。鄒應龍。別之傑。金淵。第一百七十九。張璠。馬天驥。朱熠。饒虎臣。戴慶炯。沈炎。第一百八十二。趙與燾諸人。但敘官階。全無事實。又何太簡乎。蓋史於南渡七朝。敘事不如九朝之密。而寧宗以後。又不如高孝光三朝之詳贍也。

張浚傳

始粘罕病篤。語諸將曰。自吾入中國。未嘗有敢撓吾鋒者。獨張樞密與我抗。我在。猶不能取蜀。我死。爾曹宜絕意。但務自保而已。兀朮怒曰。是謂我不能邪。粘罕死。竟入攻。果敗。案。此語本之朱文公所撰行狀。然粘罕以天會十四年卒。即紹興七年也。而吳玠破敵。乃在紹興元年。其時粘罕尚無恙。富平之戰。粘罕亦未入陝。皆不可信。李心傳云。案諸書。此時粘罕在雲中。實棗宿死。行狀誤也。

連日南軍小不利。忽牒報敵兵大至。顯忠夜引歸。浚上疏待罪。案。袁桷跋外高祖史。魏王尺牘云。朱文公作張忠獻行狀。一出南軒之筆。不過題官位名姓而已。後考三敗事迹。始悔昔年不加審覈。歸咎南軒。然亦無及矣。符離之敗。陵陽李伯微甫載其事甚詳。云符離之役。軍資器械。失亡殆盡。張魏公初聞之。疑金人踵至。甚懼。即軍中解所佩魚。遣歸。朝官太平州通判劉蘊古。假朝議大夫。使北求和。僚吏有止之者。乃奏乞致仕。又乞朝廷遣使。孝宗不從。旣而金人不復南。魏公乃謀再舉。上亦不從。及和議將

成。魏公持之甚確。左相湯慶公因白蘊古之事。由是魏公遂緝。李與張俱蜀士。史筆不敢有所隱避也。
伯微心 薄有恢復之志。而無恢復之才。平居好大言。以忠義自許。輕用大衆。爲僥倖之舉。故蘇雲卿料
傳字 其無成。史家以其子爲道學宗。因於凌多溢美之詞。符離之敗。但云南軍小不利而已。豈信史乎。

呂頤浩傳

以知紹興府朱勝非同都督諸軍事。勝非傳失書知紹興府事。繫年錄勝非除知紹興府在五月戊子除同都督在七月辛巳復知紹興在八月

月壬辰。攻除經筵。在是月戊戌。史家以其未赴任故略之耳。

給事中胡安國論勝非必誤大計。勝非復知紹興府。尋以體泉觀使兼侍讀。安國持錄黃不下。頤浩特命
檢正諸房文字。黃龜年書行安國。以失職求去。罷之。檜上章乞留安國不報。此事又見安國傳。當去
此存彼。

韓世忠傳

始補進義副尉。神道碑作守闕進義副尉。守闕者。未正授之名也。此二字不可省。

轉進勇副尉。神道碑作進武副尉。

宣撫副使李彌大斬之。碑作宣撫使李綱。

以功遷左武大夫。果州團練使。詔入朝。除正任單州團練使。正任者。落階官也。職官志。凡未落階官者。

爲遙郡。除落落階官者爲正任。靖康元年。臣僚言。遙郡正任。恩數遼絕。自遙郡遷正任者。合次第轉行。今自遙郡與落落階官而授正任。直超本等正官。是皆姦巧希進躡取。乞應遙郡承宣使有功勞。除正任者。止除正任。刺使從之。世忠以遙任團練使。嘗歷遙郡防禦觀察承宣使及正任刺史。而後轉正團練使。今就遷正任。非常格也。

時張遇自金山來降。抵城下。不解甲。人心危懼。世忠獨入其壘。曉以逆順。案呂頤浩傳。頤浩單騎與世忠造其壘說之。

授檢校少保。武寧昭慶軍節度使。武寧碑作武勝。

孝宗朝。追封斬王諡忠武。詔禮部尙書趙雄撰神道碑。御書額曰。中興佐命定國元勳之碑。傳失書。

劉琦傳

德順軍人。劉仲武傳云。秦州成紀人。父子別傳。而籍貫互異。

吳璘傳

追封信王。傳失書璘諡。又乾道八年。以子挺請立碑。詔翰林學士王曠撰文。賜額曰。安民保蜀定功同德之碑。傳亦不及之。

楊存中傳

父震、知麟州建寧砦。金人來攻，亦死于難。當云父震，見忠義傳。

存中既顯，請于朝，宗閔諡忠介，震諡忠毅。案忠義傳，震諡恭毅。王明清揮塵錄亦同。此云忠毅，疑誤也。

宗閔諡不見於忠義傳，當移此就彼。

郭浩傳

順德軍隴千人。順德，當作德順。郭成傳云：德順中安堡人，與此傳地名小異。

王德傳

再贈少傅。二子琪、順，亦以驍勇聞。德諡威定，贈至太師。琪，官武康軍承宣使，主管殿前司公事，皆見景德建康志。德第三子珙，名見忠義傳。史譌珙爲拱，又不云德子，皆疏漏也。

張憲傳

飛愛將也。飛上脫岳字，憲與楊再興、牛皋、胡閔休俱當附岳飛傳。刊修者改其次第，未及訂正爾。憲再與兩傳俱不著里居。

曲端傳

婁宿攻陝西。婁宿，卽婁室也。室宿聲相近。

趙密傳

太原清河人。清河當是清源之譌。

胡世將傳

賜三品服。宋初承唐制。三品以上服紫。五品以上服緋。元豐官制。大中大夫從四品。即服紫。朝奉大夫從六品。即服緋。與唐制異矣。史家以賜紫為三品服。賜緋為五品服。蓋失其實。

馮澥傳

靖康元年。澥為左諫議大夫。是時欽宗懲王安石、蔡京之誤國。政事悉以仁宗為法。澥上言。仁宗陛下之高祖也。神宗陛下之祖也。子孫之心。寧有厚薄。王安石、司馬光。皆天下之大賢。其優劣等差。自有公論。願無作好惡。尤執厥中。則是非自明矣。詔榜諸朝堂。侍御史李光駁之。不聽。復為右正言。崔鶻所擊。宰相不復問。而遷澥吏部侍郎。其在崇寧中。首上書。廢元祐皇后。自選人除寺監丞。見容齋隨筆傳皆諱而不書。失懲惡之旨矣。請廢后事。雖附書於錢通傳。而本傳絕不提及。且云登進士第。歷官入朝。以言事再調。似入官以來。言行無玷者。豈非變亂黑白之甚者乎。

王倫傳

帝使倫謂左副元帥昌曰。此傳前稱左副元帥昌。後稱撻懶。撻懶即昌也。宋汝為傳。前稱元顏宗弼。後稱兀朮。兀朮即宗弼也。

金欲以倫為平灤三路都轉運使。倫曰。奉命而來。非降也。案金史本傳。以倫為平州轉運使。倫已受命。

復辭遜上曰此反覆之人遂殺之與宋史異倫既恥事二姓甘以身殉豈有先已受命之理嘗從宋史爲正。

宇文虛中傳

淳熙間贈開府儀同三司諡肅愍案虛中與王倫俱奉使爲金人所殺宋金二史各爲立傳但虛中仕金已久雖以不忘故國獲禍究宜入於金史倫則宋之純臣卽列之忠義亦無媿詞斷不應附於金史也。

尹穡傳

字少稷建炎中興自北歸南傳失書其里居。

洪皓傳

紹興十二年七月見於內殿案皓於建炎己酉出使留金十五年其歸書以紹興十三年癸亥傳云十

二年者誤戈宙藝云案繫年錄紹興十三年六月金人道皓還行在七月戊戌引見內殿

洪遵傳

知隆興二年貢舉拜同知樞密院事案宋自治平以後三歲一科舉隆興二年非貢舉之歲蓋元年之誤樓鑰傳隆興元年試南宮策偶犯舊諱知貢舉洪遵奏得旨以冠末等是其證也遵入樞府在元年

五月亦非二年事。

洪邁傳

六年除知贛州。案中興學士院題名。乾道四年。邁自直院除集英殿修撰宮觀。蓋自禁林罷職。予祠。復起知州。史失載奉祠一節。

十一年知婺州。遷敷文閣待制。明年召對。以提舉佑神觀兼侍講。同修國史。進敷文閣直學士。直學士院。十三年九月。拜翰林學士。案傳。先書乾道二年。三年。六年。以次及十一年。十三年。然乾道紀元止於九年。下得有十一年。十三年也。考中興學士院題名。淳熙十三年四月。洪邁以敷文閣直學士兼直院。九月。除翰林學士。又容齋隨筆云。淳熙十二年。邁自婺召還。又云。淳熙十四年當作十三年九月。予以雜學士拜翰林學士。則史所云十一年。十三年者。實淳熙之十一年。十三年矣。

淳熙改元。進煥章閣學士。知紹興府。淳熙嘗爲紹熙之譌。容齋隨筆云。紹興元年。予自當塗徙會稽。過闕者是也。考學士院題名。邁以淳熙十五年四月。由翰林學士差知鎮江府。又太平州瑞麻贊。作于己。西八月。云。假守十閱月。則是十五年之冬。由鎮江移知太平州。至紹熙改元。移紹興府。除授次第。班班可考。本傳皆缺而不書。又誤紹熙爲淳熙。失之甚矣。

明年再上章告老。進龍圖閣學士。尋以端明殿學士致仕。是歲卒。年八十。據傳文。似淳熙二年告老。即

以其年卒。今考之不特淳熙字誤。卽謂卒於紹熙二年亦誤也。容齋三筆成於慶元二年六月。其序云。予從會稽解組還里。于今六年。年齡之運。踰七望八。則是慶元二年丙辰。邁年尙未盈八十也。據續筆云。乾道己丑。年四十七。邁既壽至八十。其卒當在嘉泰二年壬戌矣。

富直柔傳

故事。簽書有以員外郎爲之。而無三丞爲之者。中書言非舊典。時直柔爲奉議郎。乃特遷朝奉郎。自是寄祿官三丞除二府者。遷員外郎。自直柔始。遂爲例。予案元豐寄祿格。以朝奉郎換後行員外郎。以奉議郎換太常祕書殿中丞。所謂三丞也。直柔時爲奉議郎。當昔之三丞。故中書以爲非。例因特遷兩官。自後以奉議除兩府者。皆遷朝奉郎。由直柔始也。元豐以後。員外郎三丞。皆爲職事官。不以寄祿。中書所引故事。乃元豐以前名目。非南渡後名目。傳乃云。自是寄祿官三丞除二府者。遷員外郎。似南渡尙以三丞員外郎寄祿。誤甚矣。石熙載以太平興國四年正月。自右補闕爲兵部員外郎。樞密直學士。才七日。簽書院事。見容齋四筆。此員外郎簽書樞密故事也。

上虞縣丞婁寅亮上書言宗社大計。欲選太祖諸孫伯字行下有賢德者。視秩親王。使牧九州。以待皇嗣之生。退處藩服。疏入。上大歎悟。直柔從而薦之。召赴行在。除監察御史。寅亮已自有傳。此文重出。

潘良貴傳

會戶部侍郎向子諲入見。語言煩褻。良貴故善子諲。是日攝起居。立殿上。徑至榻前。厲聲曰。子諲以無益之談。久煩聖聽。子諲欲退。高宗顧良貴曰。是朕問之。又諭子諲。且款語。子諲復語久不止。良貴叱之退者再。高宗色變。閉門併彈之。此事又見子諲傳。

向子諲傳

臨江人。敏中玄孫。敏中開封人。南渡後。子孫遷居臨江。蔡襄仙游人。而後徙居雷川。蔡洸傳任伯雨眉州人。而其後居邵武。任希夷傳劉摯東光人。而其後居龍游。劉甲傳

李朴傳

楊愿傳

翰林承旨范純禮。案純禮傳。嘗為樞密都承旨。非翰林承旨也。

楊愿傳

愿字原仲。史失書其里居。李心傳繫年錄云。山陽人。

句龍如淵傳

句姓本出古句芒。高宗即位。避御名。更句龍氏。案容齋續筆。政和中。禁中外不許以龍天君玉帝上聖皇等為名字。於是毛友龍但名友葉。天將但名將樂。天作但名作。句龍如淵但名句如淵。衛上達賜名仲達。葛君仲改為師仲。方天任為大任。方天若為元若。余聖求為應求。周綱字君舉。改曰元舉。程振字

伯玉。改曰伯禹。然則如淵本是句龍氏。政和中回避去龍字。南渡避高宗嫌名。復其舊耳。廣韻。句當字。與句姓。竝與構同音。句龍之句。則平聲。故無嫌也。句芒字。經典亦讀古候切。唯華陽國志云。王平。句扶。張翼。廖化。竝爲大將軍。時人曰。前有王句。後有張廖。此句字。乃是去聲。傳云。出句芒者。疑非其實。句濤。亦蜀人。仕高宗朝。獨不改姓。史未詳其故。

卽擢如淵中司。中司者。御史中丞也。此流俗之稱。不當用之正史。

陳俊卿傳

殿前指揮使王琪。琪。德之子。

子五人。宓有志於學。終承奉郎。朱熹爲銘其墓。宓自有傳。當云。子宓。自有傳。

錢端禮傳

拜端明殿學士。簽書樞密院事。史失書。賜進士出身。宋制。非進上而入兩府者。必先賜出身。

孫象祖。嘉定元年爲左丞相。自有傳。今宋史無象祖傳。蓋史臣初擬立傳。而後缺之。王安節傳云。節度使堅之子。呂文信傳云。文德之弟似堅。文德亦有傳。而史無之。南渡七朝。事多疏漏。不及前九朝之完善。由於程限迫促。草草成書。不暇檢閱也。

劉琪傳

殿前指揮使王琪被旨案視兩淮城壁還密薦和州教授劉甄夫上諭執政召之琪請曰此人名位微何自知之上以琪告此事又見陳俊卿傳俊卿與琪同時執政而琪在西府琪之罷斥琪當有力焉史家推美俊卿亦載此節宜去彼存此

范成大傳

除吏部郎官言者論其超躐案周必大撰神道碑云除吏部員外郎言者以不先攝為超遷蓋當時除郎官率先權而後兼然後正授故以不先攝為超躐也

紹熙二年加大學士四年薨碑稱紹熙三年加資政殿大學士知太平州下車踰月請祠祿復得洞霄而歸傳失載知太平一節紀年亦互異

李燾傳

除兵部員外郎兼禮部郎中案周必大撰燾神道碑云除兵部郎中以父諱下行員外郎又兼禮部云兼禮部者兼員外郎也碑又云十二月正除禮部員外郎此傳兩書郎中皆誤律麻志稱禮部員外郎李燾時乾道新麻成燾言麻不差不改不驗不用未差無以知其失未驗無以知其是此語又見律麻志

進祕閣修撰權同修國史權實錄院同修撰案中興館閣錄李燾以淳熙三年正月除祕書監兼權同修國史兼權實錄院同修撰此不書祕書監而書祕閣修撰誤也祕書監正官也祕閣修撰外任帶職

也。兼既爲祕書監，不當更帶此職。

尤袤傳

遷江西漕。案宋人稱轉運爲漕司，或使或副使或判官，視其資歷淺深授之。依史例，當稱江西轉運某官。此云江西漕，乃案牘之文，不合史法。李椿傳，移湖北漕。劉光祖傳，將漕利路。徐邦憲傳，除江西憲。改江東漕。楊大異傳，兼漕庾二司。其失竝同。憲庾亦流俗之稱。憲者，提刑也。庾者，提舉常平也。

廿二史考異卷八十

宋史十四

周必大傳

婺州四年易守者五平江四年易守者四案必大此奏在乾道七年以吳郡志牧守題名考之乾道三年直祕閣姚憲知府事五年憲改兩浙運判而敷文閣待制徐嘉代之六年嘉除宮觀而端明殿學士汪應辰代之是年應辰除宮觀而觀文殿學士魏杞代之所謂四年而更四守也

留正傳

六代祖從效事太祖爲清遠軍節度使封鄂國公清遠當作清源從效事見世家此但當云清源軍節度使從效之六世孫

紹興十三年第進士案正卒於開禧二年丙寅年七十八則是生於建炎三年己酉至紹興十三年纔十有五歲耳恐登第不當如是之少今據曾宏父鳳墅帖跋稱梁文靖紹興庚辰魁多士先君少師乃是年擢第與留忠宣俱爲同年友知留正實紹興三十年進士傳寫顛倒以三十爲十三耳

子恭丙端皆爲尚書郎案恭在嘉定初提舉浙西常平改浙西提刑知紹興府

黃裳傳

遷國子博士以母喪去。案樓鑰撰墓誌其時除國子錄非博士也。

林大中傳

知撫州金谿縣郡督輸賦急大中請寬其期不聽納告敕投劾而歸。案樓鑰撰神道碑云郡督財計太急公請寬以歲月不敢有負又貽書再三不聽公取告敕納之州請劾而去守媿謝許之邑民感公恐其受責競輸於郡視歲額反加焉然則未嘗投劾歸也。

詹體仁傳

光宗即位提舉浙西常平除戶部員外郎湖廣總領。案吳郡志朝奉郎張體仁淳熙十六年六月時光宗已位到浙西常平任紹熙元年十月除戶部郎官湖廣總領即其人也今蘇州府學有石刻同年醜唱詩亦題浦城張體仁元善而史作詹其更姓之故史家失書考葉適撰墓誌云初後其舅張氏既復為詹氏。

梁汝嘉傳

紹興二十三年卒。汝嘉仕高宗朝不與韓侂胄同時乃與胡紘何澹諸人同卷且殿之卷末殊失其次論內亦絕不及汝嘉此編次之誤也權邦彥紹興初執政乃列於趙雄程松之間亦失其次列傳第百

五十八卷。鄭毅、仇愈、高登、婁寅亮、宋汝爲五人，皆高宗朝士，而卷次乃在光寧朝臣之後，編第尤爲乖刺。

徐應龍傳

字允叔，史失書里居。據徐清叟題名石刻，乃建安人。

知瑞州高安縣。瑞州當作筠州，避理宗諱，追改。

子榮叟，官至參知政事。諡文靖。深叟，官終將作監丞。清叟，知樞密院事，兼參知政事，各有傳。案榮叟傳，在百七十八卷，清叟在百七十九卷，清叟初未有傳也。榮叟傳，但云簽書樞密院事，不云參知政事，又不載文靖之諡。

王阮傳

曾祖韶，神宗時開熙河擒木征。祖厚，繼開湟部。當云曾祖韶、祖厚，自有傳。

陸游傳

蔭補登仕郎。祖孫父子各有傳，而不同卷者，例嘗互見，以徵世系。陸游爲尙書左丞佃之孫，以蔭入官，而兩傳絕無一言及之，何也。

紹熙元年，遷禮部郎中，兼實錄院檢討官。案陸游渭南集、跋松陵集云：淳熙十六年四月二十六日，予

以禮部郎兼膳部。又考劍南詩集。有南省宿直詩。在己酉元日之後。行在春晚之前。則其除禮部郎。必在淳熙十六年之春。正光宗卽位之初也。集中又有跋金匱集一篇。題云。淳熙己酉立秋。觀于國史院直廡。則其兼史局檢討。亦在是年立秋以前也。其冬。卽被劾還里。故齋中雜感詩。有去國己酉冬之句。明年改元紹熙。游已奉祠去官矣。游以提舉冲祐觀。慶元五年致仕。明年。加直華文閣。嘉泰二年。有詔以元官提舉佑神觀。兼實錄院同修撰。兼同修國史。蓋自禮部罷官奉祠者十年。致仕又三年。而後應修史之召。本傳所書。太疏漏矣。

遂升寶章閣待制。寶章當作寶謨。

嘉定二年卒。年八十五。案陳氏書錄解題云。嘉定庚午。年八十六而終。今考劍南集。有絕句詩云。嘉定三年正月後。不知幾度醉春風。則嘉定三年正月。游尙無恙。傳云年八十五者。非也。

邱壽傳

其西路則同轉運使張頴揀刺爲御前武定軍。以三萬人爲額。分爲六軍。案兵志。淮西廬州有武定游奕軍。濠州有武定選鋒軍。武定後軍。定遠有武定軍。當是左軍。脫左字。安豐有武定前軍。武定右軍。所謂六軍也。

宇文紹節傳

父子皆以使北死。無子。孝宗愍之。命其族子紹節爲之後。案。樓鑰撰字文師說墓誌。紹節實師說之少子。師說父時中。則虛中弟也。

汪大猷傳

沒贈二官。據周必大撰神道碑。大猷本宣奉大夫。遺奏贈特進。中隔金紫銀青光祿兩階。乃是贈三官也。

李孟傳

嘗誡其子孫曰。安身莫若無競。修己莫若自保。守道則禱。求祿則辱。來。四語本王弼注易。

商彙卿傳

金陵故有帥漕治所。合戎騎二帥留鑰內侍。號六司。帥司。謂江東安撫使司。漕司。謂江東轉運使司。戎司。謂御前諸軍都統制司。騎司。謂侍衛馬軍司。留鑰內侍。謂行宮匙鑰司。以內侍一員掌之。凡五司。併江東淮西總領所。是爲六司。

洪咨夔傳

嘉定二年進士。案。嘉定二年。非貢舉之歲。嘗從咸淳臨安志作嘉泰。史嵩之入相。召赴闕下。進刑部尙書。案。理宗紀。咨夔卒於端平三年六月。其時嵩之尙未入相。且咨夔

方在朝任用。何以又有召赴闕之語。傳殆誤也。及檢臨安志人物傳云。時有自詭和戎除刑書者。咨夔繳駁之。乃出。方悟此傳致誤之由。夫所謂自詭和戎者。卽史嵩之也。嵩之除刑部。意在大用。因咨夔繳駁。改除外任。史乃謂嵩之入相。召赴闕下。似咨夔爲嵩之所引者。豈非顛倒黑白之甚者乎。本是嵩之除刑部尙書。今以爲咨夔之官。益荒唐可笑矣。

加端明殿學士卒。案。咨夔有子勳。勳皆通顯。勳字伯魯。登淳祐四年進士。少爲崔與之。魏了翁所知。仕至兵部尙書。諡文靖。傳何以略而不書。

吳昌裔傳

蚤孤。與兄泳。痛自植立。案泳傳。在第一百八十二。泳字叔永。昌裔字季永。泳傳云。潼川人。而昌裔傳云。中江人。中江卽潼川屬縣也。於史例當合傳。今旣分而二之。又不云兄泳自有傳。失史法矣。

陳宓傳

丞相俊卿之子。史家之病。在乎立傳太多。祖孫父子。事迹可比附者。當連而及之。如王素當附其父旦傳。劉瑾當附其父沆傳。魯有開當附其從父宗道傳。張瓊。張瑛當附其祖泊傳。孫瑜當附其父奭傳。馬仲甫當附其父亮傳。吳遵路當附其父淑傳。而以子瑛次之。張燾當附其父奎傳。王堯臣當與叔父洙合傳。楊寬當附其兄察傳。尹源當附其兄洙傳。顏復當附其父太初傳。王栴當附其祖倫傳。宇文紹節

當附其祖虛中傳。李孟傳當附其父光傳。張忠恕當附其祖浚傳。陳宓當附其父俊卿傳。袁甫當附其父燮傳。蔡抗當附其祖元定傳。孟珙當附其父宗政傳。趙葵兄弟當附其父方傳。陸持之當附其父九淵傳。洪芹當附其曾祖适傳。

少嘗及登朱熹之門。案宋史最推崇道學而尤以朱元晦爲宗。朱氏門人黃榦、李燾、張洽、陳淳、李方子、黃灝、既入道學傳。而儒林傳又列蔡元定、及子沈廖、德明、葉味道四人。至如詹體仁傳。則云少從朱熹學。任希夷傳。則云從朱熹學。陳宓傳。則云少及登朱熹之門。劉燾傳。則云與弟韜仲受學於熹。王介傳。則云從熹游。曹彥約傳。則云嘗從熹講學。傅伯成傳。則云少從熹學。徐僑傳。則云登熹之門。黃營傳。則云嘗從熹學。薛叔似傳。則云雅慕朱熹。窮道德性命之旨。趙蕃傳。則云年五十。猶問學於熹。趙汝談則云嘗從熹訂疑義十數條。熹嗟異之。陳韓傳。則云父孔碩。爲熹門人。包恢則云父揚。世父約。叔父遜。從熹學。杜範傳。則云從祖受學熹。牟子才傳。則云學於魏了翁。又從李方子。朱熹門人也。吳昌裔傳。則云聞漢陽守黃榦。得熹之學。往從之。董槐傳。則云聞輔廣者。朱熹之門人。復往從廣。趙葵傳。則云遣從南康李燾。爲有用之學。黃師雍傳。則云從黃榦學。徐元杰傳。則云聞陳文蔚講書鉛山。實熹門人。往師之。李道傳。則云雖不及登熹之門。而訪求所嘗從學者與講習。趙景緯傳。則云恨不及登熹之門。熹門人葉味道謂之曰。度正吾黨中第一人。也是往來味道正之間。史彌鞏傳。則云子蒙卿。著書立言。一以

朱熹爲法蓋自嘉定以後。朱學盛行。理度二宗皆以尊尙道學爲先務。故一時士大夫莫不援附朱氏淵源以自重耳。

徐經孫傳

字子立。史失書其里居。

车子才傳

作言與孔光張禹切責清之。與當作以。

又寫力士脫鞵之狀爲之贊而刻諸石。案子才所刻太白脫鞵山谷返樵二圖在太平州學今尙存。

趙汝談傳

字履常。案汝談汝謙希館希訥四人傳失書其世系與它篇異。且宗室子洎等廿五人傳既列於諸王之次而汝談等七人別編於南渡諸臣之列均爲宗室何以區分如此此亦體例之可議者竊謂宋之宗室唯汝愚當自爲傳而以子崇憲孫必應曾孫良淳附焉其餘皆可類敘爲一卷汝騰與懋不試令巖師櫬與擇士陵伯振時賞希洎孟彙等亦當入宗室傳毋庸散入別傳。柯氏宋史新編并汝愚父子亦入宗室餘俱與子說同。

趙與權傳

時嵩之猶子瑯卿誦言其過忽斃而杜範劉漢弼徐元杰三賢暴死人皆疑嵩之致毒。案徐劉二人暴

卒。當時疑嵩之所爲。三學諸生上章論列。置獄鞠治。然亦無驗。考其時嵩之失權歸里。已半年矣。鄞與臨安相隔又遠。謂能肆毒於朝貴。此理之難信者。人云亦云。姑存爲莫須有之案可也。若杜範暮年入相。力疾赴召。本傳於範之薨。初無疑詞。以是咎嵩之未免疾之已甚矣。程公許奏元杰事云。漢弼之死。固可疑。範之死。人言籍籍。然漢弼類風淫未疾。範亦尪弱多病。諉曰天命猶可也。則公許於範之死。亦未嘗實言也。

史彌遠傳

彌遠力陳危迫之勢。皇子詢聞之。亟具奏。乃罷侂胄。并陳自強右丞相。旣而臺諫給舍交章論駁。侂胄乃就誅。案。彌遠稱奉密旨。在十一月甲戌翌日。侂胄入朝。已爲夏震所誅。其時詔旨尙未宣布外廷。何待臺諫給舍交章論駁。而始就誅乎。史家欲寬彌遠擅殺之罪。故爲此語。

寧宗崩。擁立理宗。案。彌遠之姦。倍於侂胄。而獨不預姦臣之列。傳于謀廢濟王事。并諱而不書。尙得云直筆乎。推原其故。則以侂胄禁僞學。而彌遠弛其禁也。彌遠得政。祇欲反侂胄之局。雖秦檜之姦。隱衆著。尙且爲之昭雪。豈能崇尚道學者。使朱元晦尙存。未必不排而去之。史臣徒以門戶之見。上下其手。可謂無識矣。

鄭清之傳

是時金雖亡而入洛之師大潰。案端平入洛之師最爲無名。趙范全子才輩寡謀召覺固不足責。而主張其事者清之也。理宗德其立己之功。委任如故。而傳亦諱之。竟若置身局外者。難以言直筆矣。○

史嵩之傳

慶元府鄞人。嘗云彌遠從子。不必更舉里居。其父彌忠。官亦顯而傳失書。

傅伯成傳

兩爲部使者。案劉克莊撰伯成行狀云。知撫州。未至。除湖北提舉常平。改成都路提點刑獄。卽傳所云兩爲部使者也。

遷工部侍郎。行狀無待字。下文方云進右司郎官。則此時嘗除工部郎官。非侍郎也。

御史中丞鄧友龍。遂劾伯成罷之。據行狀。罷劾之後。復除浙東提刑。遷直龍圖閣。知慶元府。皆有政績。而傳失書。

拜左諫議大夫。據行狀。論倪忠李壁二事。在拜諫議之後。傳所書蓋失其次。行狀又云。高似孫嘗獻侂

冑九詩。皆有錫字。公論其有無君之心。丁常任以管諫用兵。牽復。公言常任始結曾覲。後結蘇師旦。前日之議。非真知兵之不可用。受教於師旦耳。此二事亦傳所嘗書也。

以集英殿修撰。知建康府。建康當作建寧。

嘉定八年召赴闕。上文有嘉定元年。此不當更有嘉定字。據行狀。嘉定四年請祠。進煥章閣待制。提舉太平興國宮。傳又失書。

除寶謨閣直學士。通奉大夫致仕。案行狀。是年除寶謨閣直學士。提舉玉隆萬壽宮。十年。若老不獲。提舉鴻慶宮。十二年。復請老。進顯謨閣直學士。通奉大夫致仕。蓋是年。自待制遷直學士。猶食祠祿。及再任祠祿滿。始易閣銜致仕也。傳誤合爲一事。

理宗即位。升直學士。直當作眞。伯成久爲直學士矣。此由直學士升學士。故云眞。

葛洪傳

進端明殿學士。同簽書樞密院事。宰輔表。嘉定十七年十一月。洪除同簽書樞密院事。寶慶元年十一月。進簽書樞密院事。紹定元年十二月。除參知政事。傳失書簽書一節。

曾三復傳

乾道六年進士。案三復之子宏。父刻鳳墅法帖。其跋云。梁文靖紹興庚辰冠多士。乾道壬辰入相。南渡百年。以大魁秉鈞。方見文靖。先君少師。乃是年擢第。與留忠宣俱爲同年。詳其文義。謂三復亦紹興庚辰進士。與梁留二相爲同年耳。林大中亦紹興三十年進士。故與三復帖自稱年末也。史於留正傳云。紹興十三年第進士。蓋三十字誤顛倒耳。此傳作乾道六年。尤誤。豈誤讀鳳墅帖。謂三復以乾道壬辰

擢第壬辰本乾道八年。又譌八爲六邪。宋時進士三年一舉。常以辰戌丑未年。乾道六年庚寅。非科舉之歲也。

轉太常少卿。案金史交聘表。明昌六年正月。宋試禮部尙書。曾三復賀正旦。卽宋慶元元年也。本傳失書。

趙葵傳

淳祐四年。授同知樞密院事。十二月。拜知樞密院事。兼參知政事。又特授樞密使。兼參知政事。督視江淮。京西北軍馬。封長沙郡公。尋知建康府行宮。留守江東安撫使。案理宗紀。葵以淳祐四年十二月。同知樞密院事。五年十二月。知樞密院事。兼參知政事。七年四月。授樞密使。兼參知政事。督視江淮。京西北軍馬。尋兼知建康府行宮。留守江東安撫使。宰輔表所書年月。亦與紀同。惟以知建康府行宮。留守江東安撫使。封長沙郡公。繫于八年五月。考景定建康志。葵知府事。在七年六月九日。蓋表誤也。傳所書年月殊疏漏。

吳潛傳

字毅夫。宣州寧國人。案中興館閣續錄。潛字毅父。建康府溧水人。四明續志。潛自署金陵吳潛毅父。與館閣錄合。

授承事郎。簽鎮東軍節度判官。案南宋諸臣列傳於寄祿官皆略而不書。此傳云授承事郎。轉朝散郎。

轉中大夫。與它傳異。蓋史臣不諳官制。芟削有未盡也。戈宙裏云。楊簡傳中。載寄祿官亦甚詳。

端平元年。詔求直言。潛所陳九事。案景德建康志。潛自淮西總領。端平元年四月二十七日。準省劄除

祕閣修撰。樞密都承旨。五月六日離任。此應詔言事。必在入朝以後。傳失書除樞密承旨一節。

以久任。祠且累章乞歸田里。進封慶國公。案四明續志。寶祐四年九月。大使丞相吳公出鎮。開慶元

年八月十七日。再疏乞歸田里。奉御筆。吳潛三年海闔。備竭勤勞。屢疏乞歸。高節可尚。可依舊觀文殿

大學士判寧國府。特進封崇國公。史作慶國。則與下文進封慶國重出。當依四明續志改正。

屬將立度宗爲太子。潛密奏云。臣無彌遠之材。忠王無陛下之福。帝怒。案劉應龍傳亦云。理宗久無子。

以弟福王與芮之子爲皇子。宰相吳潛有異論。今以時事考之。殊不近情。蓋潛於端平初奏事。已有植

國本之語。其後又有請養宗子以係國本之奏。其後又有遴選近族。以係人望之奏。豈容皇子既立之

後。更有異議。且立度宗爲皇子。在寶祐元年。其時潛固未在朝。若復相之後。皇子名分久定。豈有彌遠

更立之嫌。尤爲擬不於倫矣。推原其故。特以鄂國未解。潛有遷幸之議。爲帝積銜。故似道之譖易入。乃

贊成建立東宮。授意臺諫。謂其不樂建儲耳。

文天祥傳

南官王績翁。元史作積翁。附見其子都中傳。卻不載薦天祥事。

宣繪傳

慶元府人。案繪官至執政。而傳無一事可紀。考袁燮繫齋集。有何夫人宣氏墓志。卽繪之妹也。志稱其母史氏。故太師越忠定王之從妹。則繪實以史氏甥爲彌遠援引。而傳隱而不言。

陳宗禮傳

字立之。史失書其里居。

史彌鞏傳

子能之。有之。胄之。俱進士。能之。咸淳初。由太府寺丞知常州。撰毘陵志三十卷。

楊大異傳

除祕閣修撰。太中大夫。提舉崇禧觀。醴陵縣開國男。食邑三百戶。賜紫金魚袋。案五等之封。唯國公郡公。書之。自侯以下。例不書。食邑。食實封。賜緋紫。例皆不書。太中大夫。寄祿官也。亦可不書。以史例言之。但當云除祕閣修撰。提舉崇禧觀耳。

廿二史考異卷八十一

宋史十五

循吏傳

趙尙寬。河南人。參知政事安仁子也。案安仁傳。有子溫瑜。良規承裕。無尙寬名。高賦。乞於禁中建閣。繪功臣像。如漢雲臺。唐凌烟之制。案元豐中。繪功臣像於景靈宮。其議自賦啓之。

道學傳一

邵雍高朋英悟。程氏實推重之。舊史列之隱逸。未當。舊史者。四朝國史也。東都事略亦入隱逸傳。張栻之學。亦出程氏。既見朱熹。相與博約。又大進焉。其它程朱門人。考其源委。各以類從。作道學傳。案宋史。初立道學傳。別于儒林。意其推崇程朱之學。如劉勉之。劉子翬。胡憲。元晦之師也。呂祖謙。元晦之友也。皆不入道學。而獨取張栻一人。栻與祖謙。均爲元晦密友。乃退呂而進張。豈以呂之博不如張之約乎。然元晦亦未始不博也。呂大臨。在程門四先生之列。而不入道學傳。以附見大防傳也。栻不附其父。而大臨獨附其兄。非有心抑呂乎。蔡元定父子。朱氏門人之尤著者。乃入儒林而不入道學。此又何

說乎。張翥附見載傳。而邵伯溫又別入儒林。此皆義例之可議者也。

程顥。世居中山。後從開封徙河南。高祖羽。太宗朝三司使。案列傳第二十一卷。有程羽。深州陸澤人。太宗朝。官文明殿學士。兵部侍郎。不云爲三司使。疑非一人。及考程琳所撰世錄。羽生希振。希振次子。遙。官黃陂令。遙三男。珣。則遙之長子。世系分明。亦不言羽爲三司使。韓維撰顯墓志。但云高祖贈太子少師羽。則羽未嘗爲三司使。可信也。嘗云高祖羽。自有傳。

張載。沐浴更衣而寢。旦而卒。案載弟戩。年四十七。具書於傳。而載之年壽。史乃失書。此闕漏也。予案列傳失書諸臣年壽。今尙可考見者。寇準年六十三。呂夷簡年六十六。曹利用年五十九。曹瑋年五十八。丁謂年七十二。劉筠年六十一。孫奭年七十二。馬亮年七十三。薛映年七十四。陳從易年六十六。楊大雅年六十九。胥偃年五十七。陳執中。年七十。王隨年六十七。章得象年七十一。晏殊年六十五。宋庠年七十。宋祁年六十四。魯宗道年六十四。韓億年七十三。宋綬年五十。程琳年六十九。薛奎年六十八。司馬池年五十三。孔宗翰年六十。孔道輔年五十四。周起年五十九。丁度年六十四。段少連年四十六。彭乘年六十五。蔣堂年七十五。燕肅年八十。趙師民年六十九。晁宗慤年五十八。狄棐年六十七。梅詢年七十八。孫甫年六十。兪獻卿年七十六。魏瓘年七十一。許元年六十九。張錫年六十八。狄青年五十五。石元孫年七十三。歐陽修年六十六。王堯臣年五十六。余靖年六十五。王洙年六十一。王質年四十五。

胡瓌年六十七。尹源年六十。石延年年四十八。孫復年六十六。石介年四十一。梅堯臣年五十九。蘇舜欽年四十一。江休復年五十六。蘇洵年五十八。張載年五十八。劉絢年四十二。游酢年七十一。尹焞年七十二。汪藻年七十六。汪伯彥年七十三。趙鼎年六十三。胡銓年七十九。韓世忠年六十三。梁汝嘉年五十九。汪大猷年八十一。范成大年六十八。婁機年七十九。陳居仁年六十九。劉清之年五十七。陸九淵年五十四。陳亮年五十五。蔡沈年六十四。真德秀年五十八。

邵雍年七十六。程顥撰旌墓志云。熙寧丁巳孟秋。堯夫先生疾終於家。先生生於祥符辛亥。至是蓋六十七矣。傳云七十六誤。

道學傳二

尹焞。世爲洛人。曾祖仲宣七子。而二子有名。長子源。字子漸。是謂河內先生。次子洙。字師魯。是謂河南先生。源生林。官至虞部員外郎。案源與洙各有傳。此傳但當云知懷州源之孫。

道學傳三

朱熹。本部侍郎林栗。嘗與熹論易西銘不合。劾熹本無學術。徒竊張載。程頤緒餘。謂之道學。所至輒搆門生數十人。妄希孔孟歷聘之風。邀索高價。不肯供職。其僞不可掩。上曰。林栗言太過。太常博士葉適上疏與栗辨。謂其言無一實者。謂之道學一語。無實尤甚。往日王淮表裏臺諫。陰廢正人。蓋用此術。

林栗、葉適兩疏，詳見二人本傳。此重出。

父松病亟，嘗屬熹曰：籍溪、胡原仲、白水、劉致中、屏山、劉彥沖，三人學有淵源，吾所敬畏。吾即死，汝往事之，而惟其言之聽。三人謂胡憲、劉勉之、劉子翬也。此事已載熹傳，而又爲三人立傳，敷衍其說，錄複如此，何怪乎汗青無日也。

張栻，明年召爲吏部侍郎。案下文方除左司員外郎，此時豈得卽爲侍郎？史誤也。案朱熹撰神道碑，召爲吏部員外郎，兼權左右司侍立官。

儒林傳一

孫奭，贈左僕射。賈昌朝撰奭神道碑云：贈太尉，封樂安郡公。奭官至工部侍郎致仕。當云：奭自有傳。

孔宜，孔子生鯉，字伯魚。案列孔子後于儒林，始於東都事略，而宋史因之。篇中備載歷代褒崇之典，及紹襲次序，然自伯魚至于延年，世次見於漢書，初無受封之事，毋庸載也。宋興，以孔宜襲文宣公，子孫相承，後改爲衍聖公。南渡後，猶勿替。史家當考其世系行事，列之本傳，而自宜以下，所載惟延世、聖祐兩代，餘皆闕如。禮志載文宣公襲封，則自四十六世孫宗愿始，而宜、延世、聖祐，又不及焉。皆所謂自亂其例也。若併爲一條，則首尾相應矣。文苑顏太初傳：文宣公孔聖祐卒，無子，除襲封，且十年，蔡齊爲

言于上，遂以聖祐弟襲封。據闕里文獻考，宗愿爲延世弟，延澤之子，實聖祐之從弟。

加諡孔子爲元聖文宣王，追封孔子父叔梁紇齊國公，母顏氏魯國太夫人。此事已見禮志。

時勛爲殿中丞，通判廣州。王欽若言其有聲于鄉曲，召赴闕，改太常博士，賜緋，令知曲阜縣。此事又見

孔道輔傳，但彼傳不載欽若名。

後改名道輔，爲左司諫龍圖閣待制，自有傳。道輔官不止司諫，職亦不止待制，此傳誤。

田敏，又爾雅，椴木槿。注曰：日及，改爲白及。案抱朴子論僊篇云：蜚螭校巨鼈，白芨料大椿，白芨亦日

及之譌，古書爲後人妄改，如此者不少矣。

崔偃佺，臣聞刀用爲角，音權兩點爲角，音鹿一撇一點，俱不成字。予謂角古音祿，詩麟之角，與族叶，誰謂

雀無角，與屋獄叶，廣韻餘東方音，卽角徵之角也。後世轉讀如覺，唯漢書角里字，猶存古音，而俗人妄

造加撇加點，或加兩點，皆可笑之甚。偃佺俗生，一時妄對，史家不加辯證，而載之本傳，陋矣。自古未有

不識字而能通經者，卽此一事，不當濫入儒林。

李之才，友人尹洙以書薦于中書舍人葉道卿。道卿者，清臣也，史嘗書名而稱字，蓋沿志狀之文，清

臣嘗爲知制誥，故以舍人稱之。

儒林傳二

胡旦。有備書人翟穎者。旦嘗與之善。因爲改姓名馬周。以爲唐馬周復出。上書詆時政。且自薦可爲大臣。又舉材任公輔者十人。其辭頗壯。當時皆謂旦所爲。此事又見趙昌言傳。
王向。戲作公默先生傳。列傳所載文。如王向之公默先生傳。夏侯嘉正之洞庭賦。朱昂之廣閑情賦。路振之祭戰馬文。羅處約之黃老先六經論。詞旣不工。亦無關於勸戒。皆可刪也。陳彭年爲五鬼之一。則大實箴不足錄。种放無管寧之操。則景德詔書不足錄。

儒林傳三

林之奇。紫微舍人呂本中。當云中書舍人。蓋沿時俗之稱。

儒林傳四

葉適。俄得御批。有歷事歲久。念欲退閑之語。正懼而去。人心愈搖。此語寧宗。紀吳皇后。留正。趙汝愚諸傳。已屢見矣。且紹熙內禪。汝愚實主之。適以郎官與聞斯議。而傳敘其事。首尾三百餘言。蓋文人作誌狀者攘美之詞。史家因而書之。斯無識矣。

儒林傳五

范冲。字元長。嘗云祖禹之子。

胡宏。高閑爲國子司業。請幸太學。宏見其表。作書責之。宏書已見本傳。而閑傳又略載其語。當刪存。

其一

儒林傳六

李道傳。隆州井研人。父舜臣。嘗爲宗正寺主簿。案舜臣。心傳。道傳。性傳。父子四人。各自爲傳。道傳。心傳。又同在儒林。而分入兩卷。不相比附。此亦體例之可議者也。心傳。性傳。傳首俱云宗正寺主簿舜臣之子。而不書籍貫。於史例尙合。此傳書籍貫。書父某官。而不云有傳。蓋秉筆者非一人。不知舜臣已有傳故也。

儒林傳七

劉清之。州有民妻張。以節死嘉祐中。詔封旌德縣君。表其墓曰烈女。中更兵火。至是無知其墓者。清之與郡守羅願。訪而祠之。張氏已見列女傳。此事可附見彼傳。

文苑傳一

和峴。開封浚儀人。案和峴。疑之子。五代史疑傳云。鄆州須昌人。而宋史稱開封浚儀人。馮吉。道之子。五代史道傳云。瀛州景城人。而宋史稱河南洛陽安德裕。重榮之子。五代史重榮傳云。朔州人。而宋史稱河南高懷德。行周之子。五代史行周傳云。媯州人。而宋史稱真定常山王旻。朴之子。五代史朴傳云。東平人。而宋史稱開封浚儀張鑄。文蔚之子。五代史文蔚傳云。河間人。而宋史稱河南洛陽安忠。叔千

之孫五代史叔千傳云沙陀三部落人而宋史稱河南洛陽

文苑傳二

宋華 族子郊、祁、竝天聖二年進士甲科別有傳。竝天聖以下九字可省。郊傳云安州安陸人後徙開封之雍邱。

文苑傳三

洪湛 昇之上元人。案新安志以爲休寧人。

路振 又嘗采五代末九國君臣行事作世家列傳書未成而卒。藝文志路振九國志五十一卷卽此書也。

文苑傳四

蘇舜欽 舜欽娶宰相杜衍女。衍時與仲淹富弼在政府多引用一時聞人欲更張庶事御史中丞王拱辰等不便其所爲會進奏院祠神舜欽與右班殿直劉巽輒用鬻故紙公錢召妓樂聞多會賓客拱辰廉得之諷其屬魚周詢等勦奏因欲搖動衍。此事又見王拱辰傳當去彼存此。

其友人韓維責以世居京師而去離都下隔絕親交。案易簡傳稱梓州銅山人此云世居京師蓋宋世朝士多寓居汴洛罕有返故鄉者。

顏太初。徐州彭城人。太初子復，別有傳。彼稱魯人，此稱徐州，地名互異。據此傳云，所居在龜繆兩山之間，則當爲魯人矣。

是時有醫許希，以鍼愈仁宗疾，拜賜已，西向拜扁鵲，曰：不敢忘師也。帝爲封扁鵲神應侯，立祠西城。此事又見方技傳。長編：嘉祐八年三月，封神應侯扁鵲爲神應公。

文苑傳五

蘇洵，乃以爲霸州文安縣主簿，與陳州項城令姚闢同修禮書。此文安主簿，與項城令，皆選人階官，非佐其任也。程顥爲上元主簿，晉城令，歐陽修爲夷陵令，則皆履其任矣。

黃伯思，其遠祖自光州固始徙閩，爲邵武人，祖履，資政殿大學士，當云祖履，自有傳。

文苑傳六

晁補之，濟州鉅野人，太子少傅迥五世孫，宗慤之曾孫也。案迥傳云：澶州清豐人，自其父佺始徙家

彭門，蓋迥之後又徙鉅野也。

郭祥正，知瑞州，瑞當爲端，今肇慶府七星巖有石刻云：元祐戊辰二月廿有八日，當塗郭祥正子功來治州事，明年上書乞骸骨，此其證也。南渡後避理宗嫌名，改筠州爲瑞州，元祐之際，尙無瑞州也。

米芾，吳人也。案蔡肇撰芾墓志云：世居太原，後徙襄陽，嘗過澗州，愛其江山，遂定居焉。卒葬丹徒長

山下傳云吳人者蓋據寶章待訪錄有子居蘇與葛藻近居之語然芾書畫每自題襄陽米芾其居蘇不過偶然游歷詎可竟目爲吳人乎。

以母侍宣仁后藩邸舊恩呂居仁軒渠錄元章母入內祇應老娘元章以母故命官厥後爲禮部員外郎言者詆其出身穴濁不宜冒玷清選遂罷知淮陽軍蓋以此也。

卒年四十九案米芾跋晉謝安真蹟帖云余生年辛卯是芾生於皇祐三年矣寶晉英光集有紹聖二年八月十八日浙江亭觀濤詩注云時年四十五正與辛卯生年相合崇寧四年除禮部員外郎是年歲次乙酉芾年五十有五蔡肇撰墓志云年五十七卒於淮陽郡齋可證宋史之誤。


文苑傳七

陳與義其先居京兆自曾祖希亮始遷洛故爲洛人案希亮傳其先京兆人唐廣明中遼難遷眉州青神之東山不云遷洛希亮子慥又隱居光黃間而蘇子瞻爲作傳稱洛陽園宅壯麗與公侯等此希亮遷洛之證也。

葉夢得紹興初起爲江東安撫大使兼知建康府兼壽春等六州宣撫使六州謂壽春府滁濠廬和四州及無爲軍也景定建康志紹興元年十一月夢得以資政殿學士左中大夫知府事二年閏四月提舉臨安府洞霄宮八年六月再以資政殿學士左中大夫知府事兼制置大使兼留守史失書中閒

奉祠一節。

程俱。徐俯爲諫議大夫。俱繳還。以爲俯雖才俊氣豪。所歷尙淺。以前任省郎。遽除諫議。自元豐更制以來。未之有也。昔唐元稹爲荆南判司。忽命從中出。召爲省郎。便知制誥。遂喧朝聽。時謂監軍崔潭峻之所引也。近聞外傳。俯與中官唱和。有魚須之句。號爲警策。臣恐外人以此爲疑。仰累聖德。陛下誠知俯。姑以所應得者命之。不報。此疏又見俯傳。



廿二史考異卷八十二

宋史十六

忠義傳三

李彥仙。乾道八年。易諡忠威。案揮塵後錄。彥仙諡忠節。

忠義傳四

崔縱。吳安國、林冲之、滕茂實、魏行可、郭元邁、閻進、朱助諸人。皆奉使不屈者。當與朱弁、張邵等合傳。

忠義傳五

李芾。贈端明殿大學士。大字疑衍。

忠義傳七

李大成。文定公李迪之從子也。此文定未詳其人。若天禧宰相。則年代遠不相涉。

忠義傳八

王拱。拱當作珙。贈太師德之第三子。史失其世系。

詔贈正任觀察使。景定建康志贈閩州觀察使。

孫逢、孫逢、喻汝礪、李熙靖、趙俊、姚邦基、劉化源、米璞、劉長孺、李嘉，皆不臣僭偽，宜改入卓行傳。

忠義傳九

鄒瀛，自瀛以下一十九人，皆從文天祥勤王死事者，當附見天祥傳。

忠義傳十

楊宏中，孝宗崩，光宗以疾不能執喪，時趙汝愚知樞密院，奏請太皇太后，迎立寧宗于嘉邸，以成喪禮。朝野晏然，遂命汝愚爲右丞相，登進耆德，及一時知名之士，有意慶厯元祐之治，韓侂胄竊弄國柄，引將作監李沐爲右正言，首論罷汝愚，中丞何澹、御史胡紘章繼上，竄汝愚、永州，國子祭酒李祥、博士楊簡、連疏拔爭，俱被斥。本因宏中上書留祭酒等，而及汝愚之竄逐，又追敘汝愚定策之功，首尾百廿餘言，史之冗複如此，雖萬卷不能了也。何不云祭酒李祥、博士楊簡，以疏救趙汝愚，被斥。

孝義傳

陳競，陳宜都王叔明之後，叔明五世孫，兼唐右補闕，兼生京祕書少監，集賢院學士，無子，以從子襄爲嗣，襄至鹽官令，襄生灌，高安丞，灌生伯宣，伯宣，卽競之高祖也。敘陳氏義門，當自伯宣始，今自灌以上一一臚列，似家乘非國史矣。

姚宗明。縣令蘇轍。此唐人與子由同姓名。

隱逸傳

戚同文。字同文。案戚綸傳。同文。字文約。

王礪。事母甚謹。太平興國五年進士。至屯田郎中。子渙、瀆、淵、沖、泳、泳。渙子稷臣。瀆子堯臣。竝進士及第。渙子夢臣。進士出身。礪。即洙之父也。其事當見於洙與堯臣傳。泳。當是洙字之譌。

隱逸傳中

孫侔。字少述。史失其里居。

吳瑛。蘄州蘄春人。以父龍圖閣直學士遵路。任補太廟齋郎。遵路。淑之子。淑傳云。潤州丹陽人。蓋瑛始

居蘄州也。瑛當附遵路傳。不必別入隱逸。

至虞部員外郎。遵路傳作比部。

松江漁翁。此子虛亡是之流。非實有其人。而史家以充隱逸之數。可乎。

方技傳下

魏漢津。或言漢津本范鎮之役。稍窺見其制作。而京託之於李良云。此語亦見樂志。

外戚傳上

賀令圖。是役也。武州防禦使高陽關部署楊重進死之。重進當入忠義傳。不應附外戚篇。
劉從德。御史曹修古、楊偕、郭勸、推直官段少連、上疏論之。皆坐貶。案修古四人本傳。皆載此事。而修古傳兼載諸人名。與此傳更爲重複。

郭宗仁。守文之子。案郭宗仁、符惟忠、柴宗慶、王貽永、李昭亮、李遵勳、曹偁、高遵裕、向傳範、孟忠厚、錢忱、皆勳舊之裔。當從魏成信王承衍諸人之列。附見家傳。

外戚傳下

孟忠厚。起復鎮海軍節度使。今紹興府城隍廟石刻尙書省牒。後題鎮潼軍節度使。判紹興軍府事。

孟忠厚名。史作鎮海誤。鎮潼華州軍號也。

吳益。初旣建節。以檜故。授文資直祕閣。檜進徽宗御製辭免加恩。帝乃特命賜益三品服。宋時臣僚以帶職爲榮。益雖緣外戚建節。祇是武資。以秦相門墻。乃得換文資。而除直閣。章璞以少卿除煥章閣。論者以爲非祖宗舊制。遂換授明州觀察使。亦其證也。

鄭興裔。曾祖紳。封樂平郡王。祖翼之。陸海軍節度使。紳。進封南陽郡王。謚僖靖。翼之。贈魯國公。謚榮

恭。見周必大所撰興裔神道碑。史失書。
叔父藻。以子字之。藻封榮國公。謚端靖。亦見周必大集。

宦者傳一

閻承翰。子文應。西京左藏庫使。文應當即鳩殺郭后者。彼傳云開封人。而此云真定人。籍貫雖異。要非兩人也。

張繼能。大中祥符二年入內都知。李神福等坐事悉罷。神福當作神祐。

宦者傳二

李舜舉。開封人。世為內侍。曾祖神福。事太宗。以信謹終始。神福事見前卷。當云神福之子。或合為一篇。

諡曰忠敏。王明清揮塵後錄作忠愍。

宦者傳三

童貫。更武信。武寧護國。河東山南東道。劍南東川等九鎮。山南東道為一鎮。劍南東川為一鎮。實止

六鎮爾。

宦者傳四

康履。統制苗傅等切齒曰。此輩使天子至此。猶敢爾邪。此篇之文。與苗傅傳略同者。幾三百言。關禮。孝宗崩。光宗疾不能執喪。樞密趙汝愚等請建儲以安人心。光宗御批。又有念欲退閑語。丞相留

正懼納祿去。人心愈搖。汝愚遣戚里韓侂胄。因內侍張宗尹。以禪位之事奏。太皇太后曰。此豈可易言。明日。汝愚再遣侂胄附宗尹以奏。未獲命。而侂胄退。與禮遇。禮知其意。問之侂胄。不以告。禮指天自誓。不言。侂胄遂白其事。禮卽入宮泣告太后。以時事可憂之狀。且曰。留丞相已去。所恃者趙知院耳。今欲定大計。而無太皇太后之命。亦將去矣。太后驚曰。知院同姓也。事體與它人異。禮曰。知院未去。恃有太后耳。今有請不許。計無所出。亦惟有去而已。天下將若何。太后悟。遂命禮傳旨侂胄。以諭汝愚。約明日太后垂簾上其事。此事已見趙汝愚傳。

姦臣傳一

章惇。哲宗崩。皇太后議所立。惇厲聲曰。以禮律言之。母弟簡王當立。皇太后曰。老身無子。諸王皆是神宗庶子。惇復曰。以長則申王當立。皇太后曰。申王病不可立。惇尙欲言。知樞密院事曾布叱之曰。章惇聽太后處分。此事已見徽宗紀。

姦臣傳二

趙良嗣。案良嗣。覺藥師三人。自北投南。倘處置得宜。均可收其力用。宋史列之姦臣。殊非其倫。藥師反覆。當在叛臣之列。良嗣與覺。宋旣納之。而又不能芘之。其死皆非其罪。天之厭宋久矣。宋之亡。宋自亡耳。豈三人之咎哉。

張覺。金史作張毅。

姦臣傳三

秦檜。監察御史劉一止。檜黨也。言宣王內修。修其所謂外攘之政而已。今簿書獄訟。官吏差除。土木營

繕。俱非所當急者。此語已見一止傳。但彼傳諱言檜黨及自叛其說之事。

浚求去。帝問誰可代。檜。浚不對。帝曰。秦檜何如。浚曰。與之共事。始知其闢。帝曰。然則用趙鼎。此語亦見

浚傳。

初帝無子。建炎末。范宗尹造膝有請。遂命宗室合應擇。載祖後。得伯琮。伯玖入宮。案。高宗建立宗子。其

議始於婁寅亮。而富直柔薦之。其時宗尹方為宰相。或亦預聞。然宗尹直柔傳內。絕不及之。

二十二年。又與王庶二子之奇。之荀。葉三省。楊煒。索敏求四大獄。皆坐謗訕。案。王葉楊三獄。皆見本紀。

惟敏求事紀失書。繫年錄是年十二月免解進士。哀敏求杖背。浚海外州軍編管。坐撰語言故也。索蓋袁字之譌。

姦臣傳四

丁大全。太學生陳宗。劉黻。黃唯。陳宜中。林則祖等六人。伏闕上書。案。自宗而下。止有五人。以宜中傳

證之。有黃鏞。曾唯。而無黃唯。蓋此傳脫兩字也。則祖。彼傳作測祖。恐誤。

叛臣傳上

劉豫。字彥游。景州阜城人也。今蘇門山有豫題詩石刻。自稱濟南劉豫。其詩云。我居東秦濟水南。蓋豫雖生阜城。實居濟南也。豫字彥由。當取易由豫大有得之義。傳作游。蓋音之譌。當從石刻。

叛臣傳中

李全。晞稷乃潛授世雄勝軍統制。雄字下當更有雄字。

世家序

王侁東都事略。用東漢隗囂公孫述例。置孟昶、劉鋹等於列傳。舊史因之。此所云舊史者。宋三朝國史也。三朝史。乃仁宗朝史臣所修。王侁撰東都事略。則在南渡以後。即使體例相同。亦是僞襲舊史。非舊史襲僞也。如宋史所云。是呂尙盜陳恆之齋矣。

今倣歐陽修五代史記。列之世家。案梁武帝通史。敘三國事。別立吳蜀世家。歐史蓋用其例。以十國非五代所得而臣。其傳授世次。較於五代亦稍長久。列於世家。頗爲允當。藝祖削平僭僞。南唐西蜀南漢諸國。既無世可傳。而猶沿歐史之目。甚無謂矣。李煜、孟昶、劉鋹、劉繼元。當依陳勝、項籍、世充、建德之例。列於開國功臣之前。錢俶、陳洪、進納土入臣。其初本未僭號。可援竇融之例。與功臣並列。惜乎柯維騏輩。見不及此也。

南唐世家

請傳位於世子冀。本名上一字犯宋諱。故史臣去之。

南漢世家

太祖幸講武池。從官未集。鋹先至。賜鋹卮酒。鋹疑爲酖。泣曰。臣承祖父基業。遠拒朝廷。勞王師致討。罪固當死。陛下不殺臣。今見太平。爲大梁布衣足矣。願延旦夕之命。以全陛下生成之恩。臣未敢飲此酒。太祖笑曰。朕推心於人腹。安有此事。命取鋹酒自飲之。別酌以賜。此事已見太祖紀。而彼文較簡。當可悟史家刊削之法。

夏國傳

授夏州刺史。充定難軍節度使。夏綏銀宥靜等州觀察。處置押蕃落等使。唐制。除節度使。例兼觀察。處置等使。及本州刺史。宋時。內地節鎮。雖不之任。結銜猶依此例。元豐以後始省去。史家省文。但稱某軍節度使。或書所位之州府。云某州節度使而已。此傳繼捧繼遷。德明元昊。除節度。俱書全銜。又交趾傳。制授黎桓使。持節交州諸軍事。安南都護。充靜海軍節度。交州管内觀察。處置等使。黎龍廷。李公蘊。李龍翰。陳威冕。授靜海軍節度觀察。處置等使。安南都護。閩婆傳。建炎三年。授國王懷遠軍節度。琳州管内觀察。處置等使。使持節琳州諸軍事。琳州刺史。兼御史大夫。沙州傳。張義潮爲節度使。領河沙甘肅伊西等州觀察。營田處置使。皆冗贅可省。

祥符五年德明追上繼遷尊號曰應運法天神智仁聖至道廣德光孝皇帝元昊追諡曰神武廟號太祖案下文又云五年德明追尊繼遷爲太祖應運法天神智仁聖至道光當作德光孝皇帝廟號武宗於文旣爲重出且太祖已是廟號而又云廟號武宗又何說乎德明篇中敘事自大中祥符元年三年四年五年以至七年八年九年而其下復有五年七年首尾亦無倫次

夏國傳下

紹興七年十月僞齊知同州李世輔謀執金帥撒里曷歸宋不克遂奔夏世輔父母親族在延安者金人殺之無遺類九年乾順以世輔爲靜難軍承宣使鄜延岐雍等路經略安撫使世輔請兵將報延安之役夏主俾先討別種酋豪號青面夜叉者世輔擒之以報乾順乃爲出兵遣文臣王樞武臣嚳訛等隨之世輔軍至延安撒里曷走耀州世輔購得害其父母者殺之東城聞金人降赦歸宋河南地乃說王樞等歸宋嚳訛不從世輔抽刀斫之不中遂縛樞命王晞韓護送行在五月丙午世輔以其衆三千人歸宋授世輔護國承宣使樞密行府前軍都統制賜名顯忠案顯忠事已詳本傳且無關於夏之興亡此二百餘言豈非允贅乎據顯忠傳知同州乃兀朮所授其時劉豫已廢此傳稱僞齊亦非也

吐蕃傳

咸平元年河西軍左廂副使歸德將軍折逋游龍鉢來朝游龍鉢疑卽喻龍波喻與游波與鉢聲音相近

唵嘶囉傳

本名歎南陵溫錢通。錢通猶贊普也。羌語譌爲錢通。長編作錢通。錢與贊聲尤相近。吐蕃種族多稱折通。亦贊普之譌也。元時河西貴族有稱甘卜者。或譯爲鈴部。要亦贊普之譌。遼之貴臣有稱詳穩。相溫。詳衰者。譯字雖異。要亦效漢語相公之譌。

嘉祐中。河州刺史王韶經略熙河。熙河之役。在熙寧中。此云嘉祐中。誤。或中閒有脫文。

蠻夷傳四

高州蠻。宋初。其酋田仙。以地內附。賜名珍州。拜爲刺史。仙以郡多火災。請易今名。此事已見本傳第一卷。彼云田景遷。或作千。此作仙。蓋以遷僊字形相涉而譌。

廿二史考異卷八十三

遼史

太祖紀

元年四月丁未朔。唐梁王朱全忠廢其主，尋弑之。案五代史，梁主卽位在四月甲子，其明年正月，弑濟陰王，此繫之四月朔，非也。

六年四月，梁郢王友珪弑父自立。五代史在六月。

神冊元年四月乙酉朔，晉幽州節度使盧國用來降，以爲幽州兵馬留後。案五代史，盧文進，字大用，疑卽紀所云盧國用也。而次年二月，復書晉新州裨將盧文進，殺節度使李存矩來降，疑是一事而重出也。且是時周德威爲幽州節度使，無緣更有盧國用其人者。蓋因契丹置盧龍軍于平州，以文進爲節度使，遂誤以契丹所授之官爲唐官耳。

十一月，攻蔚、新武、媯、儒五州。自代北至河曲，踰陰山，盡有其地，遂改武州爲歸化州，媯州爲可汗州。案地理志，歸化州本漢下洛縣，元魏改文德縣，唐升武州，晉高祖割獻于遼，改今名。太宗紀亦云，會同元年，改武州爲歸化州，正在石晉賂地之後。此紀所書，恐非其實。又地志可汗州下云，五代時奚王去諸

以數千帳欲欲字嬖州自別爲西奚號可汗州太祖因之此與太祖紀似合然太祖攻蔚新武嬖儒五州得而旋失其改名可汗亦當在石晉賂地之後也

三年十二月以于越曷魯弟汗里軫爲迭烈部夷董案耶律覲烈傳覲烈字兀里軫此作汗里軫音之譌也紀于是年及五年書汗里軫于天贊二年書迭刺部夷董覲烈一稱其字一稱其名

天顯元年四月郭存謙弒其主存勳存謙當作從謙

十月盧龍軍節度使盧國用叛奔于唐案五代史明宗卽位文進自平州率衆數萬歸唐卽其事也以是證之則神冊元年之盧國用與二年之盧文進其爲一人無疑

太宗紀

天顯三年四月鐵刺敗唐將王晏球于定州鐵刺五代史作禿餒譯音之轉

十二年三月晉天雄軍節度使范延廣卽范延光也避遼諱改之

會同元年七月遣中臺省右相耶律述蘭迭烈哥使晉案逆臣傳牒蠟字述蘭天顯中爲中臺省右相會同二年與趙思溫持節冊晉帝卽其事也迭烈哥卽牒蠟之轉聲紀在會同元年而傳云二年此傳之譌

大同元年二月丁巳朔建國號大遼大赦改元大同案五代史改晉國爲大遼國開運四年爲會同十

年不載大同之號。

四月降重貴為崇祿大夫。崇祿即光祿也。避遼諱改名。

穆宗紀

諱璟。小字述律。案李燾長編開寶二年契丹主明為帳下所弑。即穆宗也。當是後周避廟諱更改。宋史臣因之耳。

應祿十八年七月辛丑。漢主承鈞殂。子繼元立。案承鈞殂而繼恩嗣立。立六十日而繼元代之。則九月事也。此紀誤。

景宗紀

小字明辰。長編作明記。

聖宗紀

統和元年。案遼自太宗建國號大遼。至聖宗統和元年去遼號。仍稱大契丹。道宗咸雍二年復稱大遼。遼史皆沒而不書。長編契丹主明記卒隆緒繼立改大遼為大契丹。

四年九月辛巳。納皇后蕭氏。案統和十九年三月皇后蕭氏以罪降為貴妃。其五月冊蕭氏為齊天皇后。紀不言復立。而仁德皇后傳亦無中廢之文。其非一人可知。后妃傳不載。蓋史闕文也。至開泰六年

六月德妃蕭氏賜死。其卽廢后與否。史無明文。無以知之矣。

五年四月丁酉。上率百僚。册上皇太后尊號。曰睿德神略應運啟化承天皇太后。禮畢。羣臣上皇帝尊號。曰至德廣孝昭聖天輔皇帝。案本紀。二十四年十月。上皇太后皇帝尊號。與此無一字異者。若非重出。則彼文有遺脫也。后妃傳。止有二十四年加上尊號。別無五年加尊之文。

十八年十一月。授西平王李繼遷子德昭。宋史作德明。

二十二年十一月。次澶淵。蕭撻凜中伏弩死。宋史作撻覽。覽凜聲相近也。統和四年。有彰德軍節度使蕭闢覽。六年有太師闢覽。與此本一人。而前後譯字互異。

道宗紀

清寧六年五月。監修國史耶律白。請編次御製詩賦。仍命白爲序。咸雍六年六月。以惕隱耶律白爲中京留守。八月。耶律白薨。追封遼西郡王。案此三事。俱見耶律良傳。紀與傳當有一誤。或一人而二名也。大安九年十月。宋遣使告其母后曹氏哀。案是歲。宋元祐八年。太皇太后高氏崩。非曹氏也。

壽隆元年。按洪遵泉志。載壽昌元寶錢。引李季興東北諸蕃樞要云。契丹主天祐年號。壽昌又引北遼通書云。天祐卽位。壽昌七年。改元乾統。予家藏易州興國寺碑。安德州靈巖寺碑。興中府玉石觀音像唱和詩碑。皆壽昌中刻。東都事略。文獻通考。皆宋人書也。亦稱壽昌。無有云壽隆者。可證壽隆乃壽昌。

之譎也。遼人謹於避諱。如光祿改爲崇祿。避太宗諱也。女真改爲女直。避興宗諱也。天祚名延禧。乃追改重熙年號爲重和。於嫌名猶必回避如此。道宗乃聖宗之孫。而以壽隆紀年。此理所必無者。

天祚帝紀

保大三年四月。金兵至居庸關。擒耶律大石。九月。耶律大石自金來歸。四年七月。天祚旣得林牙耶律大石兵歸。又得陰山室韋謨葛失兵。自謂得天助。再謀出兵。復收燕雲。大石林牙力諫不從。大石遂殺乙薛及坡里括。置北南面官屬。自立爲王。率所部西去。案紀末敍大石事云。金兵至。蕭德妃歸天祚。天祚誅德妃。責大石曰。我在汝何敢立。淳對曰云云。上無以答。賜酒食赦其罪。大石不自安。遂殺蕭乙薛。坡里括。自立爲王。率鐵騎二百宵遁。西至可敦城。駐北庭都護府。得精兵萬餘。明年二月甲午。以青牛白馬祭天地祖宗。整旅而西。先遣書回鶻王畢勒哥假道。畢勒哥得書。卽迎至邸。大宴三日。臨行。獻馬駝羊。送至境外。所過敵者勝之。降者安之。兵行萬里。歸者數國。軍勢日盛。至尋思干。西域諸國舉兵十萬。號忽兒珊來拒戰。三軍俱進。忽兒珊大敗。駐軍尋思干。凡九十日。回回國王來降。又西至起兒漫。文武百官册立爲帝。以甲辰歲二月五日卽位。考天祚誅德妃。在保大三年。歲在癸卯。其明年。卽是甲辰歲。大石以二月整旅而西。兵行萬里。時日已久。駐軍尋思干。又九十日。然後西行。至起兒漫。當已踰年矣。乃云以甲辰歲二月五日卽位。何其謬耶。若據此紀之文。則大石以甲辰歲七月。始率所部西去。較

紀末所書又差一年傳聞之互異如此。

兵衛志

永昌宮正丁一萬四千。案營衛志載各宮正戶轉戶之數。兵衛志載正丁轉丁之數。丁數常倍于戶數。是一戶出二丁也。獨永昌宮彼志云正戶八千。此云正丁一萬四千。當有一誤。

地理志

太宗立晉有幽、涿、檀、薊、順、營、平、蔚、朔、雲、應、新、媯、儒、武、寰十六州。案太宗紀會同元年十一月晉遣趙瑩奉表來賀以幽、薊、瀛、莫、涿、檀、順、媯、儒、新、武、雲、應、朔、寰、蔚十六州并圖籍來獻。有瀛莫無營平。此志平州下云太祖天贊二年取之營州下云太祖以居定州俘戶是營平非石晉所賂明矣。瀛莫二州得而旋失。後周顯德六年取瀛州而營平元係唐故地後人因以當十六州之數。志謂營平亦太宗立晉所得。其州即遼應曆九年。蓋相沿之誤。遼分薊之蓮化縣為景州而易州則聖宗統和七年侵宋所得。遼史南京析津府統州六謂順、檀、涿、易、薊、景也。宋徽宗宣和五年四月金人來歸燕京六州亦即此。

龍化州太祖於此建東樓。天顯元年崩于東樓。案太祖紀太祖所崩行宮在扶餘城西南兩河之間。後建昇天殿于此而以扶餘為黃龍府。此志於龍州黃龍府亦云太祖平渤海還至此崩。此乃云崩于東樓。誤矣。

北安州興化軍領縣一利民縣。案金史地理志興州本遼北安州興化軍興化縣。承安五年陞為興州。

領興化、宜興二縣，興化爲倚郭，遼舊縣。又有利民縣，承安五年，以利民寨升，泰和四年廢。蓋遼之北安州有興化縣，無利民縣，惟金承安中嘗升利民寨爲縣，未久旋廢。作遼史者，乃以金所置之利民爲遼時舊縣，而不及興化，誤矣。

建州，漢乾祐元年。案，乾祐元年，遼世宗天祿二年也。史當書遼年號。

隰州平海軍，統縣一，海陽縣。案，金史地理志，北京路瑞州有海陽縣，遼潤州海陽軍故縣也。有海濱縣，遼隰州平海軍故縣也。遼志則云，隰州平海軍，統海陽縣，潤州海陽軍，統海濱縣，與彼志互異。考海陽軍名，與縣名相符，當以金志爲正。

三河縣，本漢臨胸縣地。胸當作洵，字之譌也。兩漢志俱無臨洵縣。唐武德二年，析潞縣置臨洵，貞觀元年省。開元四年，復析潞縣，置三河縣，蓋卽臨洵故地。臨洵唐縣，非漢縣明矣。明一統志，又承遼志之誤，歸化州，元魏文德縣，唐升武州，僖宗改毅州，後唐太祖復武州，明宗又爲毅州，潞王仍爲武州，晉高祖割獻於遼，改今名。案，本卷武州下云，魏置神武縣，唐末置武州，唐改毅州，重熙九年復武州，此兩武州，當有一誤。

麻象志

司天監馬績，奏上乙未元麻。五代史作馬重績，蓋避晉出帝諱，去上一字。

大明麻。本宋祖沖之法。具見沈約宋書。祖沖之麻。已見前史。而此志全錄之。蓋作史者徒求卷帙之富。於史例無當也。

百官志

遙輦侍中。一作世燭。世燭與侍中聲相近。蓋取漢人侍中之名。譯音轉譌爾。此如常袞。一作敵穩。又作

詳隱。其實乃襲用漢人相公之稱。因音譌而異其文也。

聖宗統和十二年。命室昉爲中京留守。治大定府。案。遼有兩中京。一爲鎮州。一爲大定府。鎮州自太宗

北還。其地仍入中國。遼史所稱中京。皆大定府也。惟趙延壽耶律拔里得傳之中京。乃是鎮州。地理志。統和二十四年。五帳

院進故奚王牙帳地。聖宗紀奚王府五帳六節度獻七金山。土河川在統和二十年。與志不同。二十五年。城之實以漢戶。號曰中京。府曰大

定。是則中京之名。始于統和二十五年。不應防先得爲留守。考防本傳。稱保寧間。改南京副留守。遷工

部尙書。改樞密副使。參知政事。統和八年。請致政。詔入朝。免拜。賜几杖。太后遣閣門使李從訓。持詔勞

問。令常居南京。封鄭國公。病劇。遣翰林學士張幹。就第授中京留守。加尙父。竊疑中京本南京之譌。志

云。治大定者。史家不知而附益之耳。

禮志

二月八日。爲悉達太子生辰。案。二月當爲四月。葉隆禮契丹國志。本作四月八日。志載此條于二月一日之後。三月三

日之前。則史文固然。非轉寫之誤。金史海陵紀。正隆元年。禁二月八日迎佛。亦一證。

皇子表

功罪。案。義宗。章肅皇帝。順宗。逆臣。重元。諸傳。與此表所述功罪略同。此史文之重複也。

皇族表

于越注。于越。休哥。案列傳。注與休哥。皆南院夷离堇綰思之子。表於上一格。失書綰思名。似與痕只皆

滑哥之子矣。釋魯庶子。又有海思。表亦失載。皇子表釋魯子亦止載滑哥一人。

義宗傳

小字圖欲。五代史作突欲。突圖聲相近。

晉王敖廬幹傳

保大元年。南軍都統耶律余覲。與其母文妃密謀立之事。覺。余覲降金。文妃伏誅。敖廬幹實不與謀。免。皇

表與傳同。案天祚紀。蕭奉先耶律余覲傳。俱稱奉先諷人誣余覲。結駙馬蕭昱等。謀立晉王。此傳與皇子

表。則云余覲與文妃密謀。蓋據誣告之詞。而不知其自相矛盾也。

耶律覲烈傳

六院部蒲古只夷离堇之後。父偶思。亦爲夷离堇。案覲烈爲于越曷魯之弟。乃皇族表有曷魯無覲烈。

又曷魯傳云祖匣馬葛簡憲皇帝兄。皇族表作簡獻皇帝父偶思遙。蓋時爲本部夷酋董。旣偶思之名同。則匣馬葛與蒲古只當卽一人矣。乃史於耶律鐸臻耶律渥里思耶律吼耶律勃古哲耶律慶履耶律合里只耶律那也耶律牒蠟傳並云六院夷酋董蒲古只之後。而皇族表皆不列其名。何也。皇子表稱懿祖第二子帖刺九任迭刺部夷酋董。故六院司呼爲夷酋董房。而簡獻皇帝爲懿祖第三子。則帖刺正簡獻之兄。與匣馬葛非兩人矣。而皇族表又岐而二之。何也。遼史雜采它書。往往自相矛盾。予以紀表志傳參而考之。則帖刺也。蒲古只也。匣馬葛也。蓋一人而三名也。

耶律拔里得傳

耶律拔里得。字孩鄰。五代史所稱麻荅卽其人也。

耶律安搏傳

祖楚不魯父迭里。案皇族表以安搏爲楚不魯之子。誤也。傳稱安搏姪撒給左皮室詳穩。表以撒給與安搏爲兄弟行。亦誤。

蕭陽阿傳

父卒。案陽阿爲蕭樂音奴之子。樂音奴在列傳第二十六卷。而陽阿在列傳第十二卷。是子先於父也。且此卷內耶律隆運耶律勃古哲武白蕭常哥耶律虎古五人。皆顯于統和間。獨陽阿以天祚時人廁

其閒亦失倫也。

耶律僕里篤傳

太平中累遷彰聖軍節度使。十六年知興中府。案太平紀元終於十一年。此後惟重熙紀元。乃有二十四年。且興中府初爲霸州。至重熙十年始升爲府。安得於太平中有知興中府者。此爲重熙之十六年無疑矣。史脫重熙二字。

蕭韓家奴傳

重熙十三年春上疏言。累聖相承。自夷离堇湖烈以下。大號未加。天皇帝之考夷离堇的魯。猶以名呼。臣以爲宜依唐典。追崇四祖爲皇帝。案太祖紀。雅里生毗牒。毗牒生頰領。頰領生耨里思。是爲肅祖。肅祖生薩刺德。是爲懿祖。懿祖生勻德實。是爲元祖。元祖生撒刺的。是爲德祖。卽太祖之父也。與傳所稱不同。意紀所稱者其名。而傳所舉者其號乎。地理志。遼國五代祖勃突。生於勃突山。因以名。太祖紀亦不見勃突名。

宋奉使諸臣年表

開寶八年遂保寧七年七月西上閣門使郝崇信、太常丞呂端、使契丹。是年三月契丹始遣使來聘。十一月校書郎直史

館宋準、殿直邢文度。宋史作文慶充契丹賀正旦使。

九年遂保寧八年五月東上閣門副使田守奇、右贊善大夫房彥均、充賀契丹生辰使。十一月著作郎馮正、

著作佐郎張玘、使契丹告哀。

太平興國二年遂保寧九年五月起居舍人辛仲甫、右贊善大夫穆、被使契丹賀生辰。十一月監察御史李

瀆、閣門祇候鄭偉、賀契丹正旦。

三年遂保寧十年五月左補闕李吉、通事舍人薛文寶、賀契丹生辰。十一月供奉官閣門祇候吳元載、太常

寺太祝母賓古、賀契丹正旦。其明年太宗親征幽州不克。南北不通使者二十五年。

景德元年遂統和二年十月閣門祇候假崇儀、副使曹利用、使契丹。十一月利用再使契丹。又遣西京左藏

庫使獎州刺史李繼昌、持誓書報聘。

二年遂統和三年二月開封府推官太子中允直集賢院孫僅、右侍禁閣門祇候康宗元、賀國母生辰。十月

度支判官太常博士周漸、侍禁閣門祇候郭盛、賀國主生辰。職方郎中直史館韓國華、衣庫副使通事

舍人焦守節、賀國母正旦。鹽鐵判官祕書丞張若谷、內殿崇班閣門祇候郭允恭、賀國主正旦。

三年遂統和四年三月兵部員外郎直史館任中正西上閣門使獎州刺史李繼昌賀國母生辰十月太常

博士王曙內殿崇班閣門祇候高維忠賀國主生辰戶部員外郎直集賢院李維崇儀使雅州刺史張

利涉賀國母正旦太常博士段暉如京副使孫正辭賀國主正旦

四年遂統和五年三月戶部副使水部員外郎崔端侍禁閣門祇候張利用賀國母生辰九月戶部副使祠

部郎中宋傳供奉官閣門祇候馮若拙賀國母正旦著作郎直史館陳知微供奉官閣門祇候王承僕

賀國主正旦戶部判官殿中丞滕涉侍禁閣門祇候劉煦賀國主生辰

大中祥符元年遂統和六年三月都官員外郎喬希顏供奉官閣門祇候景元賀國母生辰九月御史馬亮

西京作坊使魏昭易賀國母正旦都官員外郎孫爽侍禁閣門祇候薛貽廓賀國主正旦是歲賀國主生辰使副長

編失

二年遂統和七年二月太常博士直史館王隨供奉官閣門祇候王承瑾賀國母生辰九月工部侍郎馮起

南作坊使李繼源賀國母正旦殿中侍御史趙禎六宅使嘉州團練使杜守元賀國主正旦太常博士

直史館樂黃日東染院使潯州刺史潘惟吉賀國主生辰十二月以契丹國母殂遣太常博士直史

館王隨內殿承制閣門祇候郭允恭爲祭奠使太常博士判三司催欠憑由司王曙供奉官閣門祇候

王承瑾爲弔慰使

三年遼統和八年十月右司諫直史館李迪六宅使合州團練使白守素賀國主生辰監察御史乞伏矩供奉

官閣門祇候翟繼思賀正旦既而守素不行以內園副使崔可道代之

四年遼統和九年九月工部郎中龍圖閣待制張知白崇儀副使薛惟正賀國主生辰兵部員外郎兼侍御史

知雜事趙湘供奉官閣門祇候符承翰賀正旦

五年遼開泰元年十月主客郎中知制誥王曾宮苑使榮州刺史高繼勳賀國主生辰屯田郎中兼侍御史知

雜事李士龍內殿崇班閣門祇候李餘懿賀正旦

六年遼開泰二年九月翰林學士晁迥崇儀副使王希範賀國主生辰龍圖閣待制查道供奉官閣門祇候蔚

信賀正旦

七年遼開泰三年九月殿中侍御史周實西京作坊副使段守倫賀國主生辰屯田員外郎趙世長內殿崇班

閣門祇候張舜臣賀正旦

八年遼開泰四年九月左司諫知制誥劉筠供奉官閣門祇候宋德文賀國主生辰戶部副使吏部員外郎李

及侍禁閣門祇候李居中賀正旦

九年遼開泰五年九月樞密直學士工部侍郎薛映東染院使劉承宗賀國主生辰壽春郡王友戶部郎中直

昭文館張士遜供備庫使王承德賀正旦

天禧元年遂開泰六年九月兵部員外郎龍圖閣待制李行簡左驥驥使宜州刺史張佖賀國主生辰太子中

允直龍圖閣馮元內殿閣門祇候張綸賀正旦

二年遂開泰七年九月起居舍人呂夷簡供奉官閣門祇候曹琮賀國主生辰工部郎中直史館陳堯佐侍禁

閣門祇候張君平賀正旦

三年遂開泰八年九月吏部郎中直史館兼太子左諭德崔遵度西京左藏庫使王應昌賀國主生辰三司鹽

鐵判官監察御史劉平供奉官閣門祇候張元普賀正旦

四年遂開泰九年九月知制誥宋綬閣門祇候譚倫遂史作論繼倫賀國主生辰太子左諭德魯宗道閣門祇候成吉

賀正旦

五年遂太平元年九月翰林學士李懿遂史作懿內殿崇班王仲寶遂史作寶賀國主生辰太常博士蘇耆侍禁閣

門祇候周鼎賀正旦著以母喪不行改命兵部員外郎蘇維甫

乾興元年遂太平二年二月真宗崩遣內殿承制閣門祇候薛貽廓為契丹告哀使禮部郎中薛田遂史作田供備

庫副使李餘懿為遺留禮信使四月兵部員外郎判鹽鐵句院任中行崇儀副使曹珣為告即位使

七月戶部郎中直史館劉錯客省副使曹儀為皇太后回謝使工部郎中趙賀內殿承制閣門祇候

楊承吉為皇帝回謝使八月禮部郎中知制誥張師德西京左藏庫副使趙忠輔賀契丹后生辰契丹

后生辰遣吏部員外郎劉擘西京作坊副使郭志言賀國主生辰屯田員外郎王驥西頭供奉官閣門使始此

祇候劉懷德賀正旦

天聖元年遼太平三年六月龍圖閣待制知開封府薛奎西上閣門使郭盛賀國后生辰九月度支副使戶

部員外郎王臻內殿承制閣門祇候慕容惟素賀國主生辰權戶部判官太常博士直集賢院同修起

居注程琳右侍禁閣門祇候丁保衡賀正旦

二年遼太平四年七月刑部郎中直史館章得象供奉官閣門祇候馮克忠賀國后生辰初命刑部郎中李若谷閣門祇候范守慶

以拜辭日不俟垂簾請對忤太后因令二人代之九月度支副使禮部員外郎蔡齊供奉官閣門祇候李用和賀國主生辰

鹽鐵判官兵部員外郎張傳供奉官閣門祇候張士禹賀正旦

三年遼太平五年七月翰林學士承旨李維莊宅副使張倫賀國后生辰九月工部郎中龍圖閣待制馬宗

元遼史作馮元宗諱初命戶部郎中知制誥夏竦諫辭以宗元代內殿承制閣門祇候史方賀國主生辰度支副使兵部郎中姜遵內

殿承制閣門祇候許懷信賀國主正旦右正言直史館張觀東頭供奉官閣門祇候趙應賀國后正旦

賀后正旦始此

四年遼太平六年七月工部郎中龍圖閣待制韓億以名犯北朝諱權改名意遼史作異恐誤崇儀副使田承說賀國后生辰九

月右諫議大夫權三司使范雍東染院使帶御器械侯繼隆賀國主生辰起居郎知制誥徐奭供奉官

開門祇候裴繼已。賀國主正旦。淮南江浙荆湖制置費運使刑部郎中張若谷。右侍禁閣門祇候崔準。賀國后正旦。

五年遼太平七年八月。戶部副使兵部員外郎王博文。六宅使王準。遼史準作雙賀國后生辰。九月。吏部郎中知

制誥石中立。崇儀使石貽孫。賀國主生辰。戶部判官職方員外郎張寶雍。遼史作保雍崇儀副使孫繼鄴。遼史

樂作賀國主正旦。左正言直史館孔道輔。左侍禁閣門祇候馬崇。遼史崇多至字賀國后正旦。

六年遼太平八年七月。度支副使工部郎中唐肅。內殿承制閣門祇候葛懷敏。賀國后生辰。八月。樞密直學

士給事中寇斌。內殿從班閣門祇候康德興。遼史脫興字賀國主生辰。殿中侍御史判三司開拆司朱諫。供

奉官閣門祇候曹榮。改名英賀國主正旦。開封府判官殿中侍御史張逸。左侍禁閣門祇候劉永釗。賀國

后正旦。

七年遼太平九年七月。刑部郎中狄業。作坊使陳宗憲。賀國后生辰。八月。禮部員外郎兼侍御史知雜事鞠

詠。供奉官閣門祇候王永錫。賀國主生辰。職方員外郎判三司理欠司張羣。如京副使石元孫。賀國主

正旦。戶部判官度支員外郎蘇着。內殿承制閣門祇候王德。賀國后生辰。

八年遼太平十年七月。鹽鐵判官兵部員外郎直史館張宗象。香藥庫使李渭。賀國后生辰。八月。工部郎中

龍圖閣待制梅詢。供備庫副使王令傑。賀國主生辰。度支員外郎祕閣校理戶部句院王夷簡。西染院

使竇處約賀國主正旦開封府判官侍御史張儼遼史儼作曷蓋遼諱改名禮賓副使張士宣遼史宣作宜賀國后正

旦

九年遼太平十一年六月遼聖宗殂遣御史中丞王隨西上閣門使曹儀為祭奠使龍圖閣待制孔道輔崇儀副

使孫繼鄴遼史作業為賀登位使龍圖閣待制梅詢昭州刺史張綸為國母弔慰使鹽鐵副使司封員外郎

王讓內殿承制閣門祇候許懷信為國主弔慰使七月改命樞密直學士寇城為賀登位使孔道輔

及西染院使魏昭文為國母册禮使册禮使始此城病不能行改命天章閣待制范諷十月度支員外郎

知制誥鄭向供備庫使郭遵範賀國主生辰淮南江浙荆湖制置發運使祠部郎中任布左藏庫副使

王遵範賀國母正旦度支判官殿中侍御史陳琰西染院副使王克忠遼史忠作善賀國主正旦

明道元年遼重熙元年八月鹽鐵副使刑部員外郎劉隨內殿承制閣門祇候王德基遼史基作本賀國母生辰開

封府判官職方員外郎楊日嚴客省副使王克基遼史基作纂賀國主生辰太常博士直集賢院同修起居

注胥偃閣門宣事舍人王從益賀國母正旦監察御史崔暨內殿崇班閣門祇候張懷志初命東染院副使趙振尋

以懷志代之賀國主正旦

二年遼重熙二年三月皇太后崩四月遣東上閣門使曹琮為告哀使翰林學士章得象崇儀使安繼昌為遣

留國信使八月度支判官刑部郎中劉賽遼史賽作寶西染院副使符惟忠遼史脫惟字為謝國母弔慰使度

支判官司封員外郎李昭述。東染院副使張茂實。爲謝國主弔慰使。兵部員外郎知制誥丁度。右驍

使王繼凝。賀國母生辰。度支副使兵部員外郎李紘。禮賓副使李繼一。賀國主生辰。度支判官刑部郎

中章頰。禮賓副使李遵懿。遼史無賀國母正旦。開封府推官金部員外郎王仲睦。遼史仲供奉官閣門

祇候郭崇。賀國主正旦。崇留不行。以供備庫副使張璋。遼史璋代之。

景祐元年。遼重熙三年八月。度支員外郎直集賢院謝絳。內殿承制閣門祇候李守忠。賀國主生辰。度支判官

刑部員外郎直集賢院段少連。供奉官閣門祇候杜贊。遼史杜贊賀國主正旦。是歲罷國母生十月。謝

絳以父疾辭。以戶部員外郎兼侍御史知雜事楊偕代之。

二年。遼重熙四年八月。鹽鐵判官度支郎楊日華。禮賓副使張士禹。賀國主生辰。太常博士直史館修起居注

鄭戩。供奉官閣門祇候柴貽範。賀正旦。

三年。遼重熙五年八月。左正言知制誥史館修撰宋祁。遼史祁禮賓副使王世文。賀國主生辰。工部郎中判戶

部句院李宗詠。供奉官閣門祇候岸準。賀正旦。

四年。遼重熙六年八月。兵部員外郎知制誥謝絳。供奉備庫使連州刺史帶御器械張茂實。賀國主生辰。起居舍

人直史館知諫院高若訥。西京左藏庫使兼閣門通事舍人夏元正。賀正旦。

寶元元年。遼重熙七年八月。工部郎中知制誥王舉正。禮賓副使張士禹。賀國主生辰。右司諫直集賢院韓琦。

左藏庫使高繼嵩賀正旦。既而繼嵩不行。改命西染院副使兼閣門通事舍人王從益。

二年遼重熙八年八月。刑部員外郎天章閣待制龐籍。內殿崇班閣門祇候杜贊。賀國主生辰。右正言直集賢

院判都磨勘司王拱辰。西京左藏庫副使彭再問。遼史問賀正旦。十一月。以兵部郎中知制誥聶冠

卿。爲生辰使。代龐籍。

康定元年遼重熙九年七月。遣刑部員外郎集賢校理同修起居注郭積。遼史供備庫副使夏防。使契丹。告用

兵西夏也。八月。刑部員外郎知制誥蘇紳。遼史紳西京左藏庫副使向傳範。賀國母生辰。右正言知

制誥吳育。東頭供奉官閣門祇候馮載。遼史載賀國主生辰。右正言梁適。西染院副使張從一。賀國母

正旦。太常丞史館修撰富弼。供備庫副使趙日宣。賀國主正旦。是年國母生辰元旦復遣使

慶曆元年遼重熙十年八月。右正言知制誥劉沆。崇儀副使王整。賀國母生辰。禮部員外郎兼侍御史知雜事

施昌言。左侍禁閣門祇候何九齡。賀國主生辰。權鹽鐵判官工部郎中張沔。內殿崇班侯宗亮。賀國母

正旦。權度支判官兵部員外郎王球。內殿崇班閣門祇候侍其濬。賀國主正旦。

二年遼重熙十一年四月。遣右正言知制誥富弼。西上閣門使符惟忠。報聘。五月。惟忠病卒。以供備庫使恩州團

練使張茂實代之。七月。弼茂實使旋。復遣往議誓書。八月。兵部員外郎兼侍御史知雜事程戡。西

上閣門副使張得一。賀國母生辰。太常丞直集賢院張方平。東曠供奉官閣門祇候劉舜臣。賀國主生

辰兵部員外郎集賢校理判三司開拆司楊偉禮賓副使王仁旭賀國母正旦鹽鐵判官兵部員外郎

方偕禮賓副使王易賀國主正旦十月遣右正言知制誥梁適報聘長編不見副使未詳

三年遼重熙十二年八月起居舍人知制誥孫抃洛苑副使馮行己賀國母生辰鹽鐵副使工部郎中張盥之西

頭供奉官閣門祇候丁億賀國主生辰戶部員外郎兼侍御史知雜事魚周詢閣門通事舍人李惟賢

賀國母正旦工部郎中李鉞東頭供奉官閣門祇候趙牧賀國主正旦仍詔惟賢權更名寶億為意以

避北諱十月盥之除轉運以右正言集賢校理余靖為國主正旦使

四年遼重熙十三年八月以契丹來告伐夏遣右正言集賢校理同修起居注余靖為報聘使亦不見右正言祕

閣校理孫甫如京使夏防賀國母生辰太常少卿直史館劉夔崇儀使楊宗讓賀國主生辰鹽鐵判官

祠部員外郎祕閣校理張瓌內園副使焦從約賀國母正旦開封府推官監察御史劉湜東頭供奉官

閣門祇候李士勳賀國主正旦五年遼重熙十四年正月復遣右正言知制誥史館修撰余靖引進使恩州刺史王克基為報聘使八月右正

言知制誥楊察東上閣門使新州刺史王克忠賀國母生辰戶部判官祠部郎中張堯佐西上閣門副

使張希一賀國主生辰度支判官祠部員外郎集賢校理李昭遷供備庫副使閣門通事舍人李璋賀

國母正旦監察御史包拯閣門通事舍人郭琮賀國主正旦

六年遼重熙十五年八月。刑部員外郎知制誥王琪。六宅使嘉州刺史錢晦。賀國母生辰。右司諫知制誥錢明逸。

內園副使閣門通事舍人楊宗說。賀國主生辰。戶部判官侍御史王平。左班殿直閣門祇候王道恭。賀國母正旦。金部郎中判三司句院許宗壽。內殿承制夏元吉。賀國主正旦。

七年遼重熙十六年八月。刑部員外郎知諫院吳鼎臣。崇儀副使柴貽慶。賀國母生辰。太常博士集賢校理同修

起居注判度支句院韓綜。供備庫副使柳涉。賀國主生辰。戶部判官刑部郎中崔嶧。內殿崇班閣門祇候侍其演。賀國母正旦。鹽鐵判官司勳員外郎劉立之。內殿崇班李中佑。賀國主正旦。尋以內殿承制

閣門祇候夏佺。代柴貽慶。

八年遼重熙十七年八月。太常丞直集賢院同修起居注李絢。如京使兼閣門通事舍人李珣。賀國母生辰。度支

判官太常博士集賢校理何中立。內殿承制閣門祇候鄭餘懿。賀國主生辰。工部郎中判度支句院李仲偃。左侍禁閣門祇候孫世京。賀國母正旦。司勳郎中判理欠憑由司李永德。左侍禁閣門祇候康遵

度。賀國主正旦。既而絢辭不行。改命祠部員外郎集賢校理同修起居注胡宿。

皇祐元年遼重熙十八年三月。契丹使來告西征。遣翰林學士錢明逸。西上閣門使榮州刺史向傳範。爲報聘使。

八月。右正言知制誥李絢。供備副使曹偕。賀國母生辰。度支副使戶部員外郎梅摯。內殿承制閣門祇候李永寶。賀國主生辰。禮部員外郎兼侍御史知雜事何郊。內殿崇班閣門祇候柴貽範。賀國母正

旦。著作佐郎直集賢院同修起居注呂濬。閣門通事舍人侯宗亮。初命右班殿直閣門祇候魏公佐以御史言改命宗亮。賀國主正旦。

二年遼重熙十九年三月。契丹使來告捷。遣翰林學士刑部郎中知制誥趙槩。西上閣門使貴州團練使錢晦。爲

報聘使。八月。工部郎中天章閣待制李東之。西京左藏庫使李綬。賀國母生辰。戶部員外郎兼御史

知雜事李兌。供備庫副使李廣。賀國主生辰。鹽鐵判官司封員外郎崇文院檢討孫瑜。閣門通事舍人

王道恭。賀國母正旦。司勳員外郎判三司開拆司寇平內殿崇班閣門祇候鄭餘慶。賀國主正旦。

三年遼重熙二十年八月。翰林學士刑部郎中知制誥兼侍講史館修撰曾公亮。西京左藏庫使郭廷珍。賀國母

生辰。工部郎中知制誥史館修撰兼侍講王洙。閣門通事舍人李惟賢。賀國主生辰。戶部判官屯田郎

中燕度內殿崇班閣門祇候張克己。賀國母正旦。太常博士直集賢院同修起居注王珪。東頭供奉官

閣門祇候曹偓。賀國主正旦。

四年遼重熙二十一年八月。戶部副使兵部郎中傅永文思。副使潘承嗣。賀國母生辰。禮部員外郎兼侍御史知

雜事張擇行。西染院副使兼閣門通事舍人夏偁。賀國主生辰。權鹽鐵判官都官員外郎蔣賁。內殿承

制閣門祇候李中謹。賀國母正旦。太常博士直集賢院同修起居注判鹽鐵句院韓絳。東頭供奉官閣

門祇候王易。賀國主正旦。

五年遼重熙二十二年八月度支副使工部郎中周沆左藏庫副使錢昉賀國母生辰起居舍人知諫院韓贊供

備庫副使彭再昇賀國主生辰戶部判官刑部員外郎張去惑內殿崇班夏億賀國母正旦右正言直

集賢院賈黯左侍禁閣門祇候王咸宣賀國主正旦

至和元年遼重熙二十三年八月起居舍人直集賢院同修起居注吳奎禮賓副使郭達賀國母生辰鹽鐵判官

主客郎中宋選供備庫副使王士全賀國主生辰開封府判官殿中侍御史俞希孟閣門通事舍人夏

仲賀國母正旦司封員外郎直龍圖閣兼天章閣侍講盧士宗西頭供奉官閣門祇候李惟賓賀國主

生辰九月契丹使告與夏平遣三司使吏部侍郎王拱辰德州刺史李珣為報聘使

二年遼清寧元年八月遼興宗殂遣翰林學士吏部郎中知制誥史館修撰歐陽修四方館使果州團練使向

傳範為賀登位使初命賀國母生辰至是改龍圖閣直學士兵部郎中呂公弼西上閣門使英州刺史郭諮為祭奠

使鹽鐵副使工部郎中李參內苑使兼閣門通事舍人夏侖為弔慰使右正言知制誥劉敞文思副使

竇舜卿賀國母生辰初命賀國主生辰後改戶部副使工部郎中張揆西染院副使兼閣門通事舍人王道恭賀

國主生辰起居舍人直祕閣知諫院范鎮內殿承制閣門祇候王光祖賀國母正旦權度支判官刑部

員外郎李復圭染院副使兼閣門通事舍人柴貽範初差內殿崇班閣門祇候李克忠以御史言改差賀國主正旦

嘉祐元年遼清寧二年八月刑部員外郎知制誥石揚休文思使康州刺史沈惟恭賀國母生辰刑部員外郎

直史館同修起居注唐詢東頭供奉官閣門祇候王鏊賀國主生辰祠部員外郎判度支句院集賢校理刁約初命侍御史范師道師道疾改差供備庫副使劉孝孫賀國母正旦右司諫馬遵內殿崇班閣門祇候陳永圖賀國主正旦

二年遂清寧三年三月契丹遣使求御容以右諫議大夫權御史中丞張昇單州防禦使劉永年爲回謝使

八月鹽鐵副使刑部員外郎郭申錫西京左藏庫副使王世延賀國母生辰右司諫呂景初西京左藏庫副使張利一賀國主生辰度支判官祠部郎中直祕閣王疇西染院使李斌賀國母正旦殿中侍御史吳中復東頭供奉官閣門祇候宋孟孫賀國主正旦九月契丹再遣使求御容十月以翰林學士兼侍讀學士工部郎中知制誥史館修撰胡宿禮賓使李綬爲回謝使且許送御容

三年遂清寧四年正月以契丹國母殂遣侍御史朱處約宮苑使潘若沖爲祭奠使度支判官兵部員外郎集賢校理李仲師六宅副使雍規爲弔慰使

八月度支副使右諫議大夫周湛閣門通事舍人王咸有賀國母生辰開封府判官度支郎中李及之內殿崇班閣門祇候王希甫賀國主生辰度支判官刑部郎中朱壽隆禮賓使王知和賀國母正旦太常博士直集賢院判戶部句院祖無擇內殿承制閣門祇候王懷玉賀國主正旦滿辭不行改命吏部員外郎楊畋畋又辭乃命權鹽鐵副使工部郎中王鼎四年遂清寧五年八月戶部員外郎天章閣待制唐介六宅使梅州刺史桑宗望賀國母生辰侍御史丁詡左

藏庫副使劉建勳賀國主生辰開封府判官工部郎中張中庸左藏庫副使馮文顯賀國母正旦太常博士集賢校理判理欠憑由司沈邁供備副使高繼芳賀國主正旦

五年遂清寧六年八月刑部郎中天章閣待制兼侍讀錢象先西染院副使閣門通事舍人夏偉賀國母生辰

侍御史陳經東頭供奉官閣門祇候郭鸞賀國主生辰鹽鐵判官刑部郎中閻詢西京左藏庫副使劉禧賀國母正旦度支判官祠部員外郎直集賢院王安石西頭供奉官閣門祇候趙元中賀國主正旦安石辭改命戶部判官兵部郎中祕閣校理王繹代之

六年遂清寧七年閏八月戶部郎中知制誥張瓌如京使朱克明賀國母生辰度支判官刑部員外郎集賢校

理宋敏求西染院副使閣門通事舍人張山甫賀國主生辰司封郎中楊佐供備庫副使李宗賀國母正旦鹽鐵判官度支員外郎集賢校理王益柔內殿崇班閣門祇候王淵賀國主正旦

七年遂清寧八年長編失載賀生辰正旦遣使事宋史亦無之

八年遂清寧九年三月仁宗崩四月遣引進副使王道恭為告哀使是年當有告即位致遺詔物謝甲慰及賀生辰正旦諸使長編皆失書宋紀止見韓贊一遣韓贊等為告即位使起居舍人弭鼎臣充賀正旦辭不行當在此兩年間

治平元年遂清寧十年八月遣兵部員外郎呂誨等四人賀國母生辰正旦刑部郎中章岷等四人賀國主生

辰正旦長編失載據宋史英宗紀補下二年同

二年遂成雅元年八月以工部郎中蔡抗等賀契丹生辰侍御史趙鼎等賀契丹正旦是年尚有起居舍人同知諫院傅堯齋侍御史

趙鼎見長編又賀正使王巖見遼史

三年遂成雅二年八月以傅卞等賀遼生辰張師顏等賀遼正旦

四年遂成雅三年正月英宗崩遣馮行己告哀孫坦等告即位遼史宋以即位遣陳襄來報與宋紀異九月遣孫思恭等報謝且

賀生辰正旦長編自治平四年四月至熙寧三年三月皆闕今據宋史神宗紀得其大略耳又案宋史蘇宋傳使契丹還道聞英宗晏駕契丹置宴仍用樂撤之楊佐傳英宗升遐奉遺物再

亦治平四年事也

熙寧元年遂成雅四年八月遣張宗益等賀生辰正旦

二年遂成雅五年九月遣孫固等賀生辰正旦

三年遂成雅六年八月司勳郎中權戶部副使張景憲供備庫副使劉昌祚賀國主生辰主客郎中戶部判官李立之內殿承制劉鎮賀國主正旦天章閣待制孫永供備庫使楊宗禮賀國母生辰度支員外郎直

舍人院呂大防供備庫副使張述賀國母正旦大防辭不行改命祠部郎中開封府判官趙瞻

四年遂成雅七年八月度支副使兵部郎中楚建中西京左藏庫副使夏球賀國主生辰開封府判官太常博士祕閣校理韓忠彥西染院副使閣門通事舍人李惟賓賀國主正旦兵部員外郎知制誥陳繹皇城

使忠州團練使馬侖賀國母生辰度支判官司勳郎中王誨文思使郭宗古賀國母正旦侖辭改命文

思副使梁交。

五年遼咸雍八年。司勳員外郎崔台符供備庫副使任懷政。初命皇城副使田譚尋改差。賀國主生辰。比部員外郎沈

希顏西作坊副使閣門通事舍人王文郁。賀國主正旦。龍圖閣待制權御史中丞鄧綰。皇城使曹偃。賀

國母生辰。權發遣鹽鐵副使度支郎中王克臣。皇城副使劉舜卿。賀國母正旦。綰。克臣辭不行。改命工

部郎中集賢殿修撰沈起。起居舍人直集賢院章衡。

六年遼咸雍九年。八月。權戶部副使太常少卿賈昌衡。左藏庫使許咸吉。賀國主生辰。太子中允權監察御史

裏行蔡確。供備庫使李諒。賀國主正旦。龍圖閣直學士張議。西上閣門使種古。賀國母生辰。金部員外

郎判將作監范子奇。文思使夏元象。賀國母正旦。

七年遼咸雍十年。三月。遼遣使言代北疆界。以兵部郎中天章閣待制韓縝。假龍圖閣直學士給事中。爲報聘

使。八月。兵部郎中集賢殿修撰張芻。皇城使忠州刺史石鑑。賀國主生辰。屯田郎中權管句三司開

拆使韓鐸。內殿崇班王謹。賀國主正旦。知制誥章惇。引進使忠州團練使苗授。賀國母生辰。衛尉少卿

宋昌言。西京左藏副使郭若虛。賀國母正旦。授辭疾。改命東上閣門使李評。既以惇察訪河北。改命知

制誥許將。

八年遼太康元年。三月。遼再遣使來。以右正言知制誥沈括。假翰林侍讀學士。西上閣門使榮州刺史李評。假

四方館使爲報聘使。八月工部郎中直龍圖閣判將作監謝景溫文思使高遵路賀國主生辰太常丞集賢校理直舍人院李定皇城使兼閣門通事舍人李惟賓賀國主正旦太常丞集賢殿修撰侍御史知雜事張琥皇城使姚麟賀國母生辰刑部員外郎集賢校理同修起居注竇卞皇城使曹誦賀國母正旦旣而定不行改命祠部員外郎集賢校理孫洙麟遭母喪改命東作坊使向緯。

九年遼太康二年四月以契丹國母殂遣戶部副使度支郎中王克臣西上閣門副使張山甫爲祭奠使太常丞集賢校理蒲宗孟西上閣門副使王淵爲弔慰使八月給事中程師孟皇城使嘉州團練使劉永壽賀國主生辰度支員外郎祕閣校理安燾文思使高遵治賀正旦。

十年遼太康三年八月祕書監集賢院學士蘇頌西上閣門使英州刺史姚麟賀國主生辰太常博士集賢校理劉奉世內藏庫副使張世矩賀正旦。

元豐元年遼太康四年八月知制誥兼侍講黃履皇城使雅州刺史姚兪賀國主生辰太常博士周有孺西京左藏庫副使楊從先賀正旦兪不行改命東上閣門使榮州刺史狄諤。

二年遼太康五年八月知制誥李清臣西上閣門使曹誦賀國主生辰主客郎中范子淵皇城使雅州刺史姚兪賀正旦子淵辭免改命太常丞檢正中書戶房公事畢仲衍。

三年遼太康六年八月知制誥王存皇城使濟州防禦使劉永保賀國主生辰太子中允集賢校理兼同修起

居注舒賈西京左藏庫副使王景仁賀正旦賈辭不行改命司門員外郎錢總

四年遼太康七年長編失載遣使事少史亦無之

五年遼太康八年承議郎竇文閣待制韓忠彥引進使榮州團練使曹評賀國主生辰朝奉郎守禮部郎

中劉摯內殿承制張赴賀正旦

六年遼太康九年八月奉議郎試起居郎蔡京西上閣門使狄詠賀國主生辰承議郎駕部郎中吳安持供備

庫使趙思明賀正旦

七年遼太康十年八月鴻臚卿陳陞西上閣門使曹誘賀國主生辰奉議郎試右司員外郎范純粹文思副使

侍其瑾賀正旦

八年遼大安元年三月神宗崩遣閣門通事舍人宋求宋史作球為告哀使權改名淵四月遣承議郎試中書舍人

王震內殿承制竊育為遺留國信使遼史王震作王真竊育作甄祐承議郎左司郎中滿中行左班殿直閣門祇候焦

顏叔為告即位使八月刑部侍郎楊汲皇城使高州刺史王澤朝請大夫戶部郎中韓宗道崇儀使

嘉州刺史帶御器械劉承緒賀國主生辰光祿卿呂嘉問左藏庫使劉永淵朝請郎衛尉少卿陳侗西

京左藏庫使高遵治賀正旦自是年始賀生辰正旦使皆四人前二人為九月承議郎龍圖閣直學

士蔡下客省使沂州防禦使曹評為太皇太后回謝使中書舍人范百祿左藏庫副使兼閣門通事舍

人高士毅爲皇帝回謝使。士毅辭。改命左藏庫副使知冀州劉惟濟。

元祐元年。遼大年二年八月。給事中胡宗愈。客省副使李琮。中書舍人蘇軾。西京左藏庫副使兼閣門通事舍

人高士敦。賀國主生辰。朝奉郎直龍圖閣太僕少卿高遵惠。左藏庫使李嗣徽。朝散大夫司勳郎中晁端彥。供備庫使楊安立。賀正旦。軾辭不行。不知更遣何人

二年。遼大年三年八月。戶部侍郎張頴。皇城使楊永節。中書舍人曾肇。皇城使向綽。賀國主生辰。太僕少卿王

欽臣。西作坊使劉用賓。工部郎中盛陶。西頭供奉官閣門祇候趙希魯。賀正旦。

三年。遼大年四年八月。龍圖閣直學士工部侍郎蔡延慶。皇城使海州防禦使劉永壽。給事中顧臨。文思副使

段綽。賀國主生辰。司農少卿向宗旦。西京左藏庫使高遵禮。戶部郎中王同老。內殿崇班閣門祇候賈

祐。賀正旦。

四年。遼大年五年八月。刑部侍郎趙君錫。閣門通事舍人高遵固。翰林學士蘇轍。閣門通事舍人朱伯材。賀國

主生辰。少府監韓正彥。閣門祇候賈裕。光祿卿范純禮。閣門祇候曹喚。賀正旦。純禮辭疾。改命太府少

卿陳紘。

五年。遼大年六年八月。龍圖閣待制樞密都承旨王巖叟。引進副使王舜封。兵部侍郎范純禮。莊宅使張佑。賀

國主生辰。吏部郎中蘇注。供備庫使郭宗顏。戶部郎中劉昱。西京左藏庫副使畢可濟。賀正旦。巖叟以

親老純禮以疾辭。改命中書舍人鄭雍。權工部侍郎馬默。又以病辭。改命天章閣待制吏部侍郎劉奉世。奉世又辭。改命太僕卿林旦。最後郭宗顏亦病。改命西頭供奉官閣門陸孝立。

六年遼大安七年八月。中書舍人韓川。皇城使康州刺史訾虎。刑部侍郎彭汝礪。左藏庫使曹諳。賀國主生辰。吏部郎中趙僞。西京左藏庫使王鑒。司農少卿程博文。左藏庫副使康曷。賀正旦。虎辭。改命西上閣門

副使宋球川。辭。改命樞密都承旨劉安世。安世又辭。改命中書舍人孫升。升又辭。以韓宗道代之。汝礪

辭。以鴻臚卿高遵惠代之。宗道又辭。乃復以命汝礪。

七年遼大安八年八月。權刑部侍郎王觀。皇城使忠州刺史張藻。權兵部郎中杜純。六宅使郝惟幾。賀國主生

辰。惟幾改名惟微。避其國諱也。太常少卿宇文昌齡。供備庫使曹讀。殿中侍御史吳立禮。內殿承制閣

門祇候向緯。賀正旦。純以目疾辭。改命戶部侍郎范子奇。子奇辭足疾。改命刑部侍郎豐稷。

八年遼大安九年八月。遣使賀遼生辰及正旦。九月。太皇太后崩。遣使告哀。又遣使致遺留物。長編自元祐

紹聖四年三月皆闕。故不得奉使姓名。

案呂陶傳。以中書舍人奉使契丹。在哲宗親政之前。當是此年事。又蘇東坡有送王敏仲北使詩。施

元之注。敏仲名古。以太常少卿奉使契丹。亦當在此年。

紹聖元年遼大安十年正月。遣祕書少監張舜民。鄭介。不知何官。為回謝弔祭使。八月。遣使賀遼生辰正旦。

二年遼壽昌元年八月遣使賀遼生辰正旦。

三年遼壽昌二年八月遣使賀遼生辰正旦。

案中書舍人朱服右司員外郎時彥奉使本傳不載其年當在紹聖中也毗陵志余中於紹聖中使遼不知何年又長編載元符二年蹇序辰奏取勘客省帳茶酒有王曉例是曉亦從前奉使者也

四年遼壽昌三年八月禮部侍郎范鏜左藏庫使兼閣門通事舍人向緯賀遼生辰太常少卿林邵供備庫使

兼閣門通事舍人張宗萬賀遼正旦。

元符元年遼壽昌四年八月朝請郎權禮部尚書權侍讀蹇序辰皇城使秦州團練使李嗣徽賀遼生辰序辰

權改名授之朝散郎度支郎中王詔西京左藏庫副使曹曠賀遼正旦。

二年遼壽昌五年四月以遼遣使為夏國請和遣朝散郎中書舍人郭知章東上閣門使文州刺史曹誘報聘

誘不行改命東作坊使兼閣門通事舍人宋深八月遣使賀遼生辰正旦長編失載使副姓名惟賀

以李希道身亡遣代特見耳

三年遼壽昌六年正月齊宗崩遣閣門通事舍人宋淵為告哀使二月遣吳安憲朱孝孫為遺留國信使韓治

曹譜為告即位使七月遣陸佃李嗣徽為回謝使八月遣董敦逸等賀遼生辰呂仲甫等賀遼正旦元自

符三年二月以後長編俱闕據宋史本紀載其姓名生辰正旦二使本紀不詳其副

建中靖國元年遼乾統元年正月遼道宗殂三月遣給事中謝文瑾中書舍人上官均等為弔祭使黃質為賀

即位使此據宋紀遼史云宋遣王潛等來告祭未知孰是又自是年以後宋遼二紀皆不載賀正且生辰傳

崇寧元年遼乾統二年

二年遼乾統三年

三年遼乾統四年

四年遼乾統五年五月以遼遣使為夏求和遣翰林學士林摠報聘八月遣禮部侍郎劉正夫使遼此二條據宋史

本紀遼紀是年四月宋遣曾孝廣王戩報聘十二月宋遣林洙來議與夏約和與此不同林洙當即林摠之譌

五年遼乾統六年以與夏通好遣劉正符曹稷報聘遼史載於是年十月宋史無之

大觀元年遼乾統七年

二年遼乾統八年

三年遼乾統九年

四年遼乾統十年

政和元年遼天慶元年九月遣端明殿學士鄭允中武康節度使童貫為賀遼生辰使中興小曆作二年蓋以九月奉命次年至遼也

二年遼天慶二年

三年遼天慶

四年遼天慶

五年遼天慶

六年遼天慶

七年遼天慶

重和元年遼天慶

宣和元年遼天慶

二年遼天慶

三年遼天慶

四年遼天慶

春司封員外郎陶悅知霸州李遼賀遼正旦見北盟會編繫年要錄蓋六年所遣也

遣畫學正陳堯臣使遼

遣國子司業權邦彥使遼其冬以右司員外郎假太常少卿周武仲賀遼正旦見楊龜山集

正月遼主棄中京出奔自是使命遂絕

案徽宗朝使遼者有工部侍郎王漢之右司員外郎張叔夜右司員外郎陳過庭據會稽志過庭使遼在政和中衛

尉少卿假給事中韓胄賀生太府少卿盧法原監察御史假太常少卿李彌大皆見宋史本傳又

施元之注蘇詩云范坦徽宗時再使遼時邊議萌芽故非時遣使以觀釁坦言不宜始禍力辭行帝

怒責團練副使

又案書錄解題有李罕使遼見聞錄二卷。罕官膳部郎中。其奉使年代未詳。

廿二史考異卷八十四

金史一

世紀

南人稱楊割太師。又曰楊割。追諡孝平皇帝。號穆宗。又曰楊割。號仁祖。金代無號仁祖者。穆宗諱益歌。諡孝平。益近楊。歌近割。南北音譌。遼人呼節度使爲太師。自景祖至太祖。皆有是稱。凡叢言、松漠記、張棣、金志等書。皆無足取。今叢言、金志二書不傳。惟洪皓松漠紀聞。所載九代世系。頗與史合。而譯字多異。又世所傳宇文懋昭大金國志云。太祖楊割太師之長子。則與金史大相抵牾。史所譏爲無足取者。也。張棣書。徐氏北盟會編略引之。

太祖紀

太祖應乾興運昭德定功仁明莊孝大聖武元皇帝。案天會三年。上太祖諡曰武元皇帝。皇統五年。增諡應乾興運昭德定功睿神莊孝仁明大聖武元皇帝。凡十八字。紀首所書。疑誤。天會三年三月。上尊諡曰武元皇帝。禮志作大聖武元皇帝。

太宗紀

天會二年二月命徙移懶路都孛堇完顏忠於蘇瀕水。案地理志恤品路本率賓故地。太宗天會二年以耶懶路都孛堇所居地瘠遂遷於此。海陵例罷萬戶置節度使。因名速頻路節度使。又云耶懶文書作押懶。完顏忠傳云以耶懶地薄斥鹵遷其部於蘇濱水。然則移懶耶懶押懶一地也。率賓恤品速頻蘇瀕蘇濱一地也。譯音本無定字。史家亦不能畫一。

八年詔曰。婁室往者所向輒克。今使專征陝西。淹延未定。豈倦於兵而自愛邪。關陝重地。卿等其戮力焉。

此語又見睿宗紀。

海陵紀

他日海陵與辯語及廢立事。曰。若舉大事。誰可立者。辯曰。胙王常勝乎。問其次。曰。鄧王子阿懶。亮曰。當稱海陵

此云亮者。阿懶屬疏安得立。辯曰。公豈有意乎。海陵曰。果不得已。捨我其誰。於是旦夕相與密謀。護衛

將軍特思疑之。以告悼后。曰。辯等公餘。每竊竊聚語。竊疑之。后以告熙宗。熙宗怒。召辯謂曰。爾與亮謀

何事。將如我何。杖之。此事又見胙王元及唐括辯傳。彼傳阿懶作阿楞。楞。聲相近也。鄧王之父宗

傑。景宣同母弟。故辯以爲可立。又案金史紀傳。多宥蔓無法。而本紀重複尤甚。姑卽海陵以下諸紀言

之。熙宗使小底大興國。賜亮生日。悼后亦附賜禮物。熙宗杖興國。追其賜物。已見后妃及興國傳。海陵

與唐括辯語及廢立事。辯言胙王及鄧王子可立。已見胙王及唐括辯傳。河南兵士孫進。自稱皇弟。按

察大王。已見肸王及張通古傳。貞元三年。迎皇太后。命左右持杖請痛答事。已見后妃傳。世宗居貞懿皇后喪方寢。有紅光照室及黃龍見。已見五行志。大定二年。速頻軍士誣完顏謀衍子斜奇。寄書其子謀反。訊之果誣事。已見謀衍傳。七年。謂敬嗣暉曰。如卿不可謂無才。所欠者純實耳。已見嗣暉傳。八年。改旺國崖曰靜寧山。曷里濟東川曰金蓮川。已見地理志。又謂宰臣曰。海陵起居注所書多不實。孟浩言古帝王不自觀史。已見浩傳。大磐私取良弓。爲護衛所告。已見磐傳。十一年。謂丞相韓企。先當與功臣圖像。已見企先傳。十二年。召皇太子及趙王上殿。言京嘗圖逆。此條別有辯證又以德州防禦使文贊產賜其兄子。皆已見宗望傳。十年。夏。臣任得敬。脅其主李仁孝上表。請中分其國。上不許。并卻其貢物。已見西夏傳。十三年。御睿思殿。命歌女直詞。并誡皇太子諸王。已見樂志。二十五年。宴上京宗室。上自歌本曲。道祖宗創業艱難。亦見樂志。二十七年。謂宰臣曰。卿等老矣。殊無可以自代者乎云云。已見張汝霖傳。章宗明昌二年。吳王永成。隋王永升。開國喪奔赴失期。罰俸。漢王永中以疾失期。諭使回。已見永中傳。敕漢遼唐宋等名。不得封臣下。令有司議改。已見百官志。四年。遣完顏匡使宋。權更名弼。以避宋諱。已見匡傳。衛紹王大安三年。徙單鎡。請徙桓昌撫百姓入內地。又請置行省於東京。已見鎡傳。宣宗貞祐四年。內族承立進所獲馬駝事。已見承立傳。興定元年。宋使朝辭上言。宋人何故犯我。高琪請伐之。不聽。許古請遣使與宋議和。宰臣以爲徒示微弱無足取。已見高琪傳。五年。完顏賽不遣使獻捷。監察

御史劾其縱將士鹵掠。詔勿問。已見養不傳。元光二年。與宰臣論人有才而心不正者。不足貴。已見高汝礪傳。哀宗正大元年。有男子服麻衣望承天門。且哭且笑。羣臣請置重典。詔杖而遣之。已見五行志。天興元年。議以曹王出質。密國公璘請代行。不聽。已見璘傳。而本紀又一一書之。至如宋高麗夏之通使。已立交聘表詳言之矣。而本紀每年書某國使朝賀。遣某某使某國賀正。且生辰。不亦贅乎。粘割韓奴魏全死節。已立忠議傳表章之矣。而紀復詳述之。亦複而無法。又如大定二十一年。移刺余里也之十子。以母死更代廬墓。當載於孝友傳。泰和四年。祭前代帝王十七君。當載於禮志。今皆入本紀中。雖非重複。於體例亦未當也。

世宗紀

大定二年四月。立楚王允迪爲皇太子。允迪後改名允恭。卽顯宗也。大金國志謂大定三年。立長子越王允升爲皇太子。次子允猷封晉王。十九年。晉王允猷宴於南涼觀。三鼓方散。及晨。晉王已殞。胸口皆傷。詔大興府捕賊下獄鞫問。實太子使之。允升出奔至和龍。上遣明威將軍完顏宇追之。至東謨與允升戰。允升衆散爲人所殺。諡允猷爲元悼太子。二十年。立昇王允恭爲皇太子。又云。世宗有子七人。長曰太子允升。次曰昇王允恭。次曰晉王允猷。第四第五失其名。次曰鄭王允蹈。次曰衛王允濟。今以史考之。世宗子十人。顯宗母弟有趙王。越王。早卒。未賜名。此外無名允猷者。若夔王允升。大定十一年始

封王。歷事四朝。年齒最高。至宣宗初尙存。初無立爲太子。謀叛見殺之事。彼志所書。皆不足信。

十二年十月壬子。召皇太子及趙王永中上殿。上顧謂宰臣曰。京嘗圖逆。今不除之。恐爲後患。又曰。天下大器。歸於有德。海陵失道。朕乃得之。但務修德。餘何足慮。遂釋之。丙辰。以德州防禦使文質產。賜其兄之子咬住。且諭其母。文之罪汝等皆當連坐。念宋王有大功於國。故置不問。仍以家產賜汝子。此二事俱見宗望傳。彼傳以不除恐爲後患。爲宰臣所言。故世宗有但務修德。餘何足慮之語。紀皆以爲世宗之言。誤也。咬住乃文兄齊之子。此是諭齊妻之詞。

十三年五月。禁女直人。毋得譯爲漢姓。案章宗紀。明昌二年十一月。制諸女直人。不得以姓氏譯爲漢字。相去纔十有八年。而復降此制。蓋習俗之難返甚矣。國語解所載完顏曰王女。奚烈曰郎之類。皆大定明昌閒所譯也。

章宗紀

明昌四年八月辛亥。國史院進世宗實錄。上服袍帶御仁政殿。降座立受之。案泰和三年十月庚申。又書尙書左丞完顏匡等。進世宗實錄。上降座立受之。疑一事重出也。

五年十月。參知政事馬琪自行省回。具奏河防利害。語載琪傳中。案琪傳不載此語。當云見河渠志。承安二年八月。左宣徽使壽尙書右丞。案壽字不見於字書。必是傳寫之譌。予見曲阜孔廟石刻。承安

四年三月，泰定軍節度使兼兗州觀察使完顏喜祭文，復有孔元措跋云：相國完顏公自尙書右丞出鎮沈郡，與此紀三年十二月尙書右丞喜罷，年月相合，然則喜卽喜之譌，說文喜用也。从喜，从自，讀若庸，石刻作喜，隸體小變耳。

泰和二年三月，蔡王從彝母充等太師卒，詔有司定葬禮葬儀，事載從彝傳。充等太師，當是充華太妃之譌。從彝傳亦未載此事，唯張暉傳云：霍王從彝母早死，溫妃石抹氏養之。明昌六年，溫妃薨，上問從彝喪服，暉奏請未葬以前服白布衣絹巾，旣葬用素服終制，朝會從吉，上從其奏，或卽指此事。然暉所議者，慈母服制，非葬禮，且明昌與泰和相隔六七年，未可合爲一事也。從彝本充華田氏所生，暉傳旣云早卒，何以其卒轉在溫妃之後，尤爲矛盾。從彝傳亦云母早卒。

衛紹王妃

戶部尙書武都拾遺田庭芳等三十人請降爲王侯。案執中傳云：衆相視莫敢言，獨文學田廷芳奮然曰：先朝素無失德，尊號在禮不當削，於是從之者禮部張敬甫、諫議張信甫、戶部武文伯、龐才卿、石抹晉卿等二十四人，文伯卽武都字也。彼云不當削，此云降爲王侯，則與張行簡諸議無以異矣。

宣宗紀

興定元年十月壬午，從宜移刺買奴言。案自壬午以後，當是十一月事，史失書月。

四年益都賊張林來攻。是時有兩張林。皆在益都。見蒙古綱目此攻滄州者。本益都府卒。以功授治中。興定三年。逐轉運使田琢而據其地。史所稱益都張林也。是年八月。李全犯東平府。監軍王庭玉敗之。禽其僞安化軍節度使張林。此則益都桃林寨總領。號張大刀者也。

哀宗紀

正大五年完顏訥申改侍講學士充國信使。訥申。即奴申也。

末帝退保子城。聞帝崩。率諸臣入哭。謚曰哀宗。案。紀傳皆稱哀宗。獨食貨百官二志稱義宗。大金國志亦稱義宗。又云宿州有僭位者。謚曰昭。故官僑於宋者。謚曰閔。或謂哀不足以盡謚。天下士夫咸以義宗謚取左氏國君死社稷之義也。完顏婁室傳。蔡兇問至。發喪設祭。謚哀宗曰昭宗。此息州行省所謚。大金志以爲宿州者。誤也。歸潛志稱哀宗爲末帝。與史又異。

麻志

元祐時。尚書右丞蘇頌。與昭文館校理沈括。奉敕詳定渾儀法要。案。沈括上渾儀議。在熙寧七年。不與頌同時。

地理志上

建五京。置十四總管府。是爲十九路。案。大金國志云二十路。以此志校之。多臨潢一路。彼志所言。皆據

大定以前之制也。大定後罷臨潢路入北京路。故云十九。

其間散府九。節鎮三十六。防禦郡二十二。刺史郡七十三。軍十有六。縣六百三十二。後復盡升軍爲州。

案。金初沿宋舊制。每路有州有軍。至大定二十二年。始盡升軍爲州。然則志所舉節鎮防禦之數。實多舛誤。今據大

定以前之州郡。故與每路總計之數。不能盡合。然志所計節鎮防禦郡刺史郡之數。實多舛誤。今據大

定以前之州郡。故與每路總計之數。不能盡合。然志所計節鎮防禦郡刺史郡之數。實多舛誤。今據大

定以前之州郡。故與每路總計之數。不能盡合。然志所計節鎮防禦郡刺史郡之數。實多舛誤。今據大

定以前之州郡。故與每路總計之數。不能盡合。然志所計節鎮防禦郡刺史郡之數。實多舛誤。今據大

定以前之州郡。故與每路總計之數。不能盡合。然志所計節鎮防禦郡刺史郡之數。實多舛誤。今據大

定以前之州郡。故與每路總計之數。不能盡合。然志所計節鎮防禦郡刺史郡之數。實多舛誤。今據大

定以前之州郡。故與每路總計之數。不能盡合。然志所計節鎮防禦郡刺史郡之數。實多舛誤。今據大

定以前之州郡。故與每路總計之數。不能盡合。然志所計節鎮防禦郡刺史郡之數。實多舛誤。今據大

定以前之州郡。故與每路總計之數。不能盡合。然志所計節鎮防禦郡刺史郡之數。實多舛誤。今據大

定以前之州郡。故與每路總計之數。不能盡合。然志所計節鎮防禦郡刺史郡之數。實多舛誤。今據大

定以前之州郡。故與每路總計之數。不能盡合。然志所計節鎮防禦郡刺史郡之數。實多舛誤。今據大

定以前之州郡。故與每路總計之數。不能盡合。然志所計節鎮防禦郡刺史郡之數。實多舛誤。今據大

定以前之州郡。故與每路總計之數。不能盡合。然志所計節鎮防禦郡刺史郡之數。實多舛誤。今據大

定以前之州郡。故與每路總計之數。不能盡合。然志所計節鎮防禦郡刺史郡之數。實多舛誤。今據大

言之。京府州當爲百八十有四也。大安以後，疆宇日蹙，所升置州郡，史家不入計數之內，故亦存而不論。

是以金之京府州凡百七十九縣，加於舊五十一城，寨堡關百二十二，鎮四百八十八。此與大金國志之文正同，但彼所述者，大定之制，此兼及章宗一朝，故以諸路所計郡縣數并之，總不相合。

上京路領節鎮四，防禦一。案，上京路所領三州，隆州、節鎮也，肇州、防禦也。承安三年升節鎮。信州、刺郡也。又有蒲興路、恤品路、胡里改路，皆設節度使，而不立州縣，故不在節鎮之數。今與隆州竝列爲四，於例旣未畫一，又失書刺郡一，尤疏漏矣。

東京路刺郡四，四當作五。

婆速府路，正史作婆娑府。

北京路領節鎮七，刺郡三。當云節鎮八，刺郡二。

西京路刺郡八，八當作七。

中都路刺郡九，九當作十。

薊州縣五，舊又有永濟縣。大定二十七年，以永濟務置，未詳何年廢。案，元至元七年，孫慶瑜撰豐閏縣記云，金大定開改永濟務爲縣，大安初，避東海郡侯諱，更名曰豐閏。史不知豐閏卽永濟之改名，而分

而爲二。乃以豐閭爲泰和閒置。又謂永濟已廢而未得其年。皆誤之甚也。
豐潤、泰和閒置。案衛紹王以泰和八年十一月卽位。豐閭更名。當卽在其年。史云泰和閒者。亦未大失。但改名而非創置耳。朱彝尊據清類天文分野書云。洪武元年改閭爲潤。今金元史雕本。閭旁均著水。非也。

地理志中

南京路領節鎮三。防禦八。刺史郡八。案本路節鎮。唯鄆許二州。泰和中升蔡州爲節鎮。史旣云節鎮三。則防禦止於七矣。刺郡本七。泰和中增置裕息二州。則當云刺史郡九也。

歸德府散中宣武軍。軍下當有節度二字。

濟南府。濟陽。案于欽齊乘云。金初劉豫割章邱之標竿鎮。及臨邑封圻之半。置濟陽縣。大定六年。當

泰和八年。或大安初。避金主允濟諱。改曰清陽。允濟遇弑。復舊名。衛紹王事迹。史失其傳。以濟陽永濟之例推之。則濟南府名亦當改易也。

禮志四

以粘哥宗翰幹里不宗望。志書配享諸臣。如斜也呆。阿思魁忠之類。皆本名與改名兼舉。粘哥卽宗翰。幹里不卽宗望也。粘沒喝。又稱粘罕。此又稱粘哥。幹里不亦作幹魯補。此篇又作訛魯補。

兀朮亦作幹出。或作幹。斃譯字之無定如此。

十八年黜辭不失。案金初有兩辭不失。一爲宗人辭不失。一爲金源郡王習失亦作辭不失。皆預配享。今據明昌所定。兩人皆在東廊之位。則此云黜者疑誤也。

皇伯太師遼忠烈王宗幹幹魯。幹魯當作幹本。

開府儀同三司金源郡毅武王習失。即昭祖之孫。習不失也。本傳諡忠毅。

開府儀同三司金源郡明毅王完顏忠阿思魁。本傳失書諡。亦不云贈開府儀同三司。

特進宗人幹里古莊翼。傳作魯古。

特進完顏辭不失。即完顏石土門之子。習失也。本傳諡威敏。

開府儀同三司金源郡剛烈王幹魯。即韓國公劾者之子。本傳失書其諡。又不云贈開府儀同三司。又

傳云。皇統五年。追封鄭國王。而此稱金源郡王者。蓋正隆中宗室屬疏者。例降爲公。大定三年。又例加

金源郡王。諸傳或書或不書爾。

皇叔祖元帥左都監魯莊明王閣母。本傳諡壯襄。

開府儀同三司遼國英敏公劉彥宗。本傳失書配享廟廷事。

右丞相金源郡武定王紇石烈志寧。案百官志。紇石烈姓例封廣平郡。志寧傳亦云封廣平郡王。此稱

金源郡疑誤。

禮部尙書張行簡言。近奉詔從世宗十六拜之禮。臣與太常參定儀注。竊有疑焉。案此事見張行信傳。行簡乃行信之兄。志誤。

禮志六

班首降階復位。此下南北監本竝脫一葉。太宗諸子傳亦脫一葉。予嘗見元槧本鈔補之。

禮志七

嶽鎮海瀆。其封爵竝仍唐宋之舊。明昌閒。從沂山道士楊道全請。封沂山爲東安王。吳山爲成德王。霍山爲應靈王。會稽山爲永興王。醫巫閭山爲廣寧王。淮爲長源王。江爲會源王。河爲顯聖靈源王。濟爲清源王。今以宋史禮志考之。江、河、淮、濟四瀆之名。則宋康定元年封號也。吳山。則宋元豐八年封號也。沂山。醫巫閭山。霍山。則宋政和三年封號也。會稽山。宋時封永興公。政和進封永濟王。今仍永興之名。而加王號。亦非特創也。惟江瀆。宋爲廣源王。此作會源。或亦轉寫之譌。要皆仍宋舊制。何待楊道士之請邪。然章宗紀。明昌六年十二月。明有加上五鎮四瀆王爵之文。豈別有加上之字。而史失之歟。子家藏金時石刻。有濟瀆靈應記文。稱顯祐清源王碑。立於正大五年。此四字王爵。或卽明昌所上。或後來所加。惜乎史家語焉而未詳也。又案大金集禮。載大定四年。奏四瀆王號與此同。唯東鎮安東公。南鎮

後之制。其云舊者。則大定格也。考大金集禮云。天眷元年。定到國封等第。大國二十。遼、燕、梁、宋、秦、晉、漢、齊、魏、趙、越、許、楚、魯、冀、豫。御名世宗名雍也。兗、陳、曹。次國三十。蜀、隋、鄜、衛、吳、韓、潞、潘、岐、代、虞、徐、滕、薛、紀、原、邢、冀、豐、畢、鄆、鄆、霍、瀛、沂、榮、英、溫。小國三十。濮、濟、道、定、景、申、崇、宿、息、莒、鄆、舒、淄、邲、宗、鄆、譚、應、向、郇、密、胙、任、戴、鞏、葛、蕭、莘、芮。皇統五年十月二十九日。奏定大國從上。添唐、殷、商、周。爲二十四。餘仍舊。是大定以前。已有封爵三等國名。大定格於大國。去燕、殷、商、周。魏而增吳、蜀。又改雍爲唐。次國改岐爲鄂。杞爲紀。又增荆、壽。小國改應爲杞。與舊稍有異同。志止舉大定格。而不及天眷皇統之制。未免漏落矣。明昌二年。以漢遼唐宋之類。皆昔有天下之號。不宜封臣下。故皆改之。則虞之改澤。亦當與同時。志於澤下。不云舊爲虞。亦漏也。世宗初封葛王。章宗初封原王。故臣下不敢居其名。宗爲睿宗名。景爲章宗嫌名。濟爲衛紹王名。郇爲宣宗嫌名。故亦改之。

廿二史考異卷八十五

金史二

宗室表

大定以前稱宗室。明昌以後稱內族。其實一而已。書名不書氏。其制如此。宣宗詔宗室皆稱完顏。不復識別焉。按熙宗、海陵、世宗、章宗、紀中宗室皆不書氏。其稱完顏者。若婁室、若希尹、若謀衍、若守道、守能、守貞、皆異姓也。銀朮可、史稱宗室子。而與其子穀英、皆稱氏。若思敬、若布輝、若匡皆始祖之系。而亦稱氏。則以屬疏。稍示區別也。宣宗以後。內族亦稱完顏。且有以漢人而賜國姓者。由是同異姓遂溷而莫辨矣。

貞祐以後。譜牒散失。大概僅存。不可憚悉。今掇其可次第者著於篇。案表所載世系。尚有脫漏。如秉德

有弟特里兀里。見秉德傳。后妃傳。麻頗之後有埽合。埽合子撒合輦。撒合輦子惟鎔。惟鎔子從傑。見撒合輦傳。烏帶

之子兀蒼補孫塘。見本傳。撒八之子賽里。見斡魯傳。宗強孫思列。爽子。見太祖諸子傳。胙王元之子育。見元宗本子。沙魯

刺宗固子胡里刺。見后妃傳。南陽郡王襄之子思列。見烈傳。表皆失書。

宗亨、案宗亨、宗賢、宗憲、宗尹、宗雋、宗傑、宗強、宗敏、宗磐、宗固、宗雅、宗本、宗美之徒。皆有本名。穆宗子撻

懶。又名昌。康宗子謀良虎。又名宗雄。表有書有不書。於例殊未盡一。

交聘表

天輔元年十二月。宋遣登州防禦使馬政來聘。按宋史。重和元年二月。遣武義大夫馬政。由海道使女

真。約夾攻遼。當金天輔二年。

三年六月。宋遣馬政及其子宏來聘。按馬政報聘。宋史徽宗紀。在後一年九月。又據宋史。是年宣和元年正

月。金人遣李善慶來聘。明年九月。金人遣勃堇等來。又明年五月。金人再遣曷魯等來。又明年九月。金

人遣徒孤且烏歇等來議師期。十一月。金人遣李靖等來許山前六州。表皆失書。

天眷三年。宋禮部尙書莫將等來迎護梓宮。案。莫將官工部侍郎。表所書者。假攝之官也。凡使臣官銜。

兩史不同。竝準此例推之。其副使則宣州觀察使韓恕也。

皇統二年五月。遣使賜宋誓詔。案。是年使副爲中書侍郎劉筈。禮部尙書完顏宗表。見繫年要錄。

十二月。宋使上表謝歸三喪及母韋氏。正使參知政事王次翁。副使德慶軍節度使錢愐。表於宋使姓

史本紀。但有正使名。而不書官職。惟繫年錄所載。甚備。今取以補表之闕。又案。是年。宋參知政事万俟卨。爲報謝使。榮州防禦使那孝揚。副

之。表失載。

三年正月己丑朔。宋使賀正旦。正使中書舍人楊愿。副使宣州觀察使何彥良。

乙巳。宋使賀萬壽節。正使戶部侍郎假禮部尙書沈昭遠。宋史沈昭遠作書副使福州觀察使王公亮。李心傳云。金主亶以七夕日生。以其國忌。故錫宴諸路。用次日。朝廷每遣使金人。循契丹舊例。不欲兩使人。因就以正月受禮。自此歲以爲常。此事金史失書。又是年冬。金始遣右宣徽使完顏華。祕書少監馬謬。賀宋正旦。表失書。

四年正月癸卯朔。宋使賀正旦。正使權兵部侍郎鄭朴。副使保順軍承宣使何彥良。

己巳。宋使賀萬壽節。正使權工部侍郎王師心。副使解州防禦使康益。又是年正月。宋遣吏部尙書羅

汝楫。鎮東軍承宣使鄭藻。爲報謝使。謝金史賀正旦其夏。金始遣安國軍節度使烏延和。大理少卿孟浩。賀宋

生辰。宋又遣吏部侍郎假吏部尙書陳康伯。嘉州防禦使假保信軍承宣使錢愷。報謝。其冬。金遣殿前

又副都點檢李散溫。東上閣門使高慶先。賀宋正旦。表皆失書。

五年正月丁未朔。宋使賀正旦。正使權吏部侍郎林保。副使知閣門事康益。

癸亥。宋使賀萬壽節。正使權禮部侍郎宋之才。副使閣門宣贊舍人趙瓌。其夏。金遣殿前左副都點檢

完顏宗尹。翰林待制程案。賀宋生辰。其冬。金遣殿前右副都點檢蒲察說。刑部侍郎吳磐福。賀宋正旦。

六年正月辛未朔。宋使賀正旦。正使權刑部侍郎錢周材。副使閣門祇候俞似。

丁亥。宋使賀萬壽節。正使權工部侍郎嚴抑。閣門祇候曹授。其夏。金遣彰德軍節度使烏古論海。同知

宣徽院事趙興祥。賀宋生辰。其冬。金遣會寧尹盧彥論。四方館使張仙壽。賀宋正旦。又是歲九月。宋又遣端明殿學士何鑄。賓德軍節度使邢孝揚。爲祈請使。

七年正月乙丑朔。宋使賀正旦。正使權戶部侍郎邊知白。副使閣門宣贊舍人孟思恭。

辛巳。宋使賀萬壽節。正使權禮部尚書周執羔。知閣門使宋錢孫。其夏。金遣殿前右副都點檢完顏卞。

東上閣門使大蛙。賀宋生辰。其冬。金遣殿前左副都點檢完顏宗藩。東上閣門使吳前範。賀宋正旦。

八年正月庚申朔。宋使賀正旦。正使禮部侍郎沈該。副使閣門宣贊舍人蘇華。

丙子。宋使賀萬壽節。正使工部尚書詹大方。副使閣門宣贊舍人容肅。其夏。金遣會寧尹蕭秉溫。東上

閣門使申奉顏。賀宋生辰。其冬。金遣殿前右副都點檢召守忠。同知宣徽院事劉君詔。賀宋正旦。

九年正月甲申朔。宋使賀正旦。正使起居舍人王墨卿。副使惠州刺史蘇華。

庚子。宋使賀萬壽節。正使權禮部侍郎陳誠之。副使吉州刺史孟思恭。其夏。金遣殿前左副都點檢唐

括德溫。四方館使高居安。賀宋生辰。其冬。金遣殿前右副都點檢完顏亮。西上閣門使劉箴。賀宋正旦。

天德元年十二月。宋賀正旦。使至廣寧。遣人諭以廢立之故。於中路遣還。案。是歲卽皇統九年。宋紹興

二十年也。宋所遣賀正旦使。副則太常少卿張杞。和州團練使趙述。賀生辰使。副則司農卿湯鵬舉。吉

州刺史石靖也。賀生辰使。當同時遣還。史文不具耳。

二年二月甲子。以兵部尙書完顏元宜修。起居注高懷貞。爲賀生辰使。表書賀宋生辰。始於此。繫年錄。紹興二十一年五月甲午。金國賀生辰使。副侍衛馬步軍都指揮使完顏思恭。翰林直學士翟永固。見於紫宸殿。思恭等來報。亮代立旣出境。就遣來賀。與表互異。恐當以表爲正。

三月丙戌。宋參知政事余唐弼。宋史及繫年錄。俱作余堯弼。此作唐。蓋金史臣避世宗父諱。追改之。是冬。金遣祕書監左諫議大夫蕭頤。翰林待制王兢。賀宋正旦。

三年正月癸酉朔。宋使賀正旦。正使權禮部侍郎陳誠之。副使均州觀察使錢愷。尙有賀生辰。正使起居舍人兼權直學士院王曠。副使和州團練使趙述。表於是年失書。宋使賀生辰一節。

三月少府監耶律五哥。繫年錄。作耶律夔。官名亦異。大率金人多兩名。表所載者本名。奉使則別有漢名耳。

六月。宋使奉表祈請山林地。不許。正使簽書樞密院事巫伋。副使保信軍節度使鄭藻。

十月。以右副點檢不朮魯阿海。宋史。繫年錄。俱作兀朮魯定方。

四年正月丁酉朔。宋使賀正旦。正使中書門下省檢正諸房公事陳夔。副使惠州刺史蘇華。

壬子。宋使賀生辰。正使樞密院檢詳文字陳相。副使吉州刺史孟思恭。

十月。以太子詹事張用直。左司郎中溫都幹帶。爲賀宋正旦使。十二月。以張用直卒。改遣南京路都轉運

使左瀛為賀宋正旦使。按繫年錄是年十二月金主使太子詹事張利用尚書兵部郎中兼四方館副使攝器溫都子敬來賀明年正旦利用與用直當即一人而不言改遣左瀛殆以國書不及改易故因而書之耳。宋史亦書張利用

貞元元年正月以皇弟堯薨不視朝命有司受宋貢獻是年宋賀正旦正使權國子司業孫仲釐副使

閣門宣贊舍人陳靖賀生辰正使吏部員外郎李琳副使忠州防禦使石靖。宋史紹興二十二年失書遣孫仲釐李琳事

四月以右宣徽使紇石烈撒合釐宋史及繫年錄作紇石烈大雅

十一月右司郎中婁室繫年錄作紇石烈師顏

二年正月甲寅朔以疾不視朝宋使就館燕正使中書門下省檢正諸房公事施鉅副使帶御器械翼

彥明。宋史云吳翼賀正旦施鉅賀生辰與繫年錄互異

己巳宋使賀生辰正使左司郎中吳翼副使閣門宣贊舍人張彥攸

十月以刑部侍郎白彥恭為賀宋正旦使副使翰林待制胡勵

十二月丁未宋使貢方物宋史及繫年錄俱無遣使事殆即賀正旦生辰禮物

三年正月己酉朔宋使賀正旦正使國子司業沈盧中副使敦武郎張掄

甲子宋使賀生辰正使左司郎中張士襄副使閣門宣贊舍人張說

十月翰林學士承旨耶律歸一爲賀宋正旦使。副使大理少卿馬楓。

正隆元年正月癸卯朔。宋使賀正旦。正使禮部侍郎王珉。副使閣門宣贊舍人王漢臣。

戊午。宋使賀生辰。正使宗正丞鄭杓。副使閣門宣贊舍人李大授。是歲四月。宋遣翰林學士陳誠之。假

崇信軍節度領閣門事蘇華爲賀尊號使。表失書。

十一月。以右司郎中梁銖。左將軍耶律湛。繫年錄。銖作球。湛作湛。金無左將軍之官。錄作定遠大將軍。當從之。

二年正月戊辰朔。宋使賀正旦。正使宗正少卿李琳。副使侍衛馬軍司幹辦公事宋均。

癸未。宋使賀生辰。正使左司郎中葛立方。閣門宣贊舍人梁份。

十一月。侍衛親軍馬步軍副都指揮使高助不古。戶部侍郎阿勒根窠產。繫年錄。作高思廉。宋史同。阿勒根彥忠。

三年正月壬戌朔。宋使孫道夫賀正旦。道夫時官太常少卿。副使則閣門宣贊舍人鄭朋也。

丁丑。宋使賀生辰。正使起居郎劉章。副使閣門宣贊舍人□邦傑。

十一月。吏部侍郎阿典和實憲。繫年錄。作阿典謙。

四年正月丙辰朔。宋使賀正旦。正使祕書少監沈介。副使閣門祗候宋直溫。

辛未。宋使賀生辰。正使國子司業黃中。副使副門祗候李景夏。

十月。宋使上表謝賜戒諭。繫年錄。紹興二十九年。即正隆四年。九月乙酉。奉使大金稱謝使同知樞密院事

王綸。副使昭信軍節度使曹勛等。還朝入見。當卽此事。然綸等於九月還臨安。其在金上表。必更在其前。不當係於十月。

十一月。宿州防禦使耶律闌里刺。繫年錄。作耶律翼。

十二月。宋使來告其母章氏哀。正使翰林學士周麟之。副使吉州團練使知閣門事蘇華。

五年正月庚辰朔。宋使賀正旦。正使起居舍人楊邦弼。副使榮州刺史張說。

乙未。宋使賀生辰。正使太府卿李潤。副使閣門宣贊舍人張安世。

二月。宋參知政事賀允中等。爲章后遺獻使。副使保信軍節度使鄭藻。

四月。宋使葉義問等來謝弔祭。義問時爲同知樞密院事。副使則和州防禦使劉允升也。是歲。金遣殿

前右副都點檢蕭榮。太子右諭德張忠輔。賀宋生辰。表亦失之。

十一月。以濟南尹僕散烏者。宋史及繫年錄。作僕散權。

六年正月甲戌朔。宋使賀正旦。正使起居舍人虞允文。副使知閣門事孟思恭。

己丑。宋使賀生辰。正使樞密院檢詳文字徐度。副使帶御器械王謙。是歲七月。宋遣樞密都承旨假資

政殿大學士徐嘉、文州刺史知閣門事張掄、賀遷都至盱眙、金遣翰林侍講學士韓汝嘉、宣諭止之、自是使命遂絕。

四月、以簽書樞密院事高景山、爲賀宋生日使、副使刑部侍郎王全。

大走二年六月、宋翰林學士洪邁、鎮東軍節度使張掄、賀上、是時邁官起居舍人、掄知閣門事、表所載皆假官也。

五年十一月、以殿前右副都點檢烏古論粘沒曷、宋史作烏古論忠弼。

七年、是歲遣徒單忠衛等、爲賀宋正旦使、表失書。

八年十一月、以同僉大宗正事宗室關合土、宋史作完顏仲仁。

十年十一月、以太子詹事蒲察速越、宋史作蒲察愿。

十五年、據宋史、前年淳熙元年十二月、遣吳琚等賀金主生辰、此表不書宋使賀萬春節、何也。

九月、以歸德尹完顏王祥、宋史作完顏禧。

十一月、以右宣徽使宗室靖、宋史作完顏迨。

十七年九月、以殿前右副都點檢完顏習尼烈、宋史作完顏忠。

十一月、以延安尹完顏蒲刺覲、宋史作完顏炳。

十八年十一月以靜難軍節度使烏延查剌。宋史作烏延察。

二十一年八月以殿前右副點檢宗室胡什賚。宋史作完顏寔。又是歲遣魏貞吉等賀宋明年正旦。表及本紀俱失之。

二十二年三月辛未朔。宋使賀萬春節。案宋史前年十月遣施師點等使金賀正旦。十一月遣燕世良賀金主生辰。此表不書賀正旦事。而賀萬春節使副姓名亦失之。考本紀亦闕前年九月至本年二月事。

九月以殿前左衛將軍宗室禪赤。宋史作完顏宗回。

十一月以昭毅大將軍李朮魯罕。世宗紀作李朮魯阿魯罕。表脫阿魯二字。宋史作李朮魯正。

二十五年十一月以臨潢尹僕散守中。宋史中作忠。

十二月宋遣試禮部尙書王信。明州觀察使吳瓌。賀萬春節。此賀正旦使。非賀生辰也。使副姓名。當書於次年正月庚辰朔之下。

二十六年八月以益都尹崇浩。宋史作完顏老。

二十七年三月。宋遣試兵部尙書張淑春。淑春當作叔椿。

九月以河中尹田彥皋。近侍局使宗室鶻殺虎。爲賀宋生日使。周必大思陵錄云。副使完顏玳。彥皋。見

任河中尹借吏部尙書

十一月以殿前左副都點檢崇安翰林侍講學士兼御史中丞李寔爲賀宋正旦使。思陵錄稱使鎮國

上將軍兵部尙書元顏宗下副使中議大夫祕書少監李寔元顏卽完顏避欽宗嫌名改完爲元也。

十二月宋敷文閣學士章璞鄂州觀察使特立特立上脫姜字。

二十八年正月丁酉朔宜州觀察使趙不遠。思陵錄作趙不遠。

九月以武安軍節度使王克溫近侍局使鶻殺虎爲賀宋生日使。思陵錄云中奉大夫禮部尙書王克

溫廣威將軍客省使元顏號。

十一月以河中尹田彥皋吏部侍郎移刺仲方爲賀宋正旦使。思陵錄云中奉大夫吏部尙書田彥皋。

廣威將軍戶部郎中耶律仲方。

二十九年四月宋葛廷瑞趙不慢等來弔祭。宋史作諸葛廷瑞。

五月遣東北路招討使溫迪罕速可等使宋賀卽位。宋史作溫迪罕肅。又據宋史是歲金遣張萬公等

來致遺留物遣徒單鎰等來告卽位表皆失書。

明昌六年十一月遣刑部尙書紇石烈貞等。宋史貞作正避仁宗諱也。

承安二年正月宋試禮部尙書趙介利州觀察使朱龜年以母喪告哀。案宋寧宗母李氏以慶元六年

崩卽金承安五年也。表殆因次年告曾祖母喪事而致誤耳。趙介、朱龜年二人與次年告哀使正同。其誤顯然。又案宋史是年金遣奧屯忠孝來賀明年正旦。此表失書。

三年八月。宋試刑部尙書湯碩。福州觀察使李汝翼等報謝。案宋史是歲金遣烏林答天益來弔祭。此表但有宋報謝使而無弔祭使。蓋脫文。

九月。宋顯謨閣學士王休。宋史作楊王休。此脫楊字。

泰和元年十一月。遣殿前右衛將軍紇石烈七斤等。宋史作紇石烈眞。

二年十一月。遣武安軍節度使公弼等。宋史作徒單公弼。

三年九月。遣刑部尙書承暉等。宋史作完顏奕。

七年。宋開禧三年也。據宋史是歲六月。以林拱辰爲金國通謝使。遣富瑄使金告哀。時太皇太后謝氏崩。劉彌正賀金主

生辰表皆不書。蓋其時以和議未定不得達也。

八年。是歲。宋遣曾從龍使金。賀明年正旦。聞金章宗之喪。改命從龍充弔祭使。又遣宇文紹彭使金。賀

卽位。金遣裴滿正來告哀。又遣蒲察知剛致遺留物。又遣使告卽位。表皆失書。蓋衛紹王無實錄。史臣

失於采訪也。

大安元年八月。宋使賀萬秋節。正使俞應符。案大安元年二年。崇慶元年。金遣使賀宋生日及明年正

旦俱載宋史而失書使臣姓名惟大安三年有賀正使而無生辰使。

二年八月宋使賀萬秋節。正使黃中。

三年正月乙酉朔宋使賀正旦。正使錢仲彪是歲宋遣余麟來賀生辰表亦失書。

崇慶元年正月宋使賀正旦。正使程卓是歲宋遣傅誠賀金生辰。

至寧元年。是歲宋使賀正旦表失書。正使乃應武也。其秋宋遣董居義賀金生辰以國亂不至而還。

貞祐元年元至寧元年十一月宋賀正旦使人境。正使李璽案此年及二年均有賀宋正旦使見於宋史而

表闕之。

后妃傳

海陵諸嬖。元好問中州集載賈左丞益謙言。世宗大定三十年。禁近能暴海陵。蟄惡者。得美仕。史官修實錄。誣其淫毒很驚。遺臭無窮。自今觀之。百可一信邪。及觀世宗紀。大定八年。上謂宰臣曰。海陵時修起居注。不任直臣。故所書多不實。可訪求得實。詳而錄之。孟浩傳亦載此事。然則海陵事迹多出於訪問。中書之言不如是之甚也。大抵蒙業而安者。務飾先世之美。廢昏而立者。好談前人之惡。然公論自在古今。難以一人手掩天下目也。海陵之惡極矣。世宗取之。固無慚德。乃必假細人之言以增成其醜。斯亦心勞而拙矣。益謙洵古之遺直哉。

章宗元妃李氏。詔曰。朕之內人。見有娠者兩位。如其中有男。當立爲儲貳。如皆是男子。擇可立者立之。
案。金史列傳之重出者。如章宗內人范氏胎損。奉御賈氏詐稱有娠事。一見於后妃傳。再見於衛王紀。三見於僕散端傳。宣宗王皇后夢勺者數萬踵其後。遂敕京城設粥施冰藥。一見於五行志。再見於后妃傳。寶符李氏北行自縊。一見於后妃傳。再見於列女傳。張汝弼妻高氏。卽高畫鎬王永中母。像祈福被誅。一見於永中傳。再見於汝弼傳。明德皇后之葬。元后張氏柩先行。永中令執黃繖者前導。及后柩至。呼執繖者不應。張僅言欲奏其事。顯宗止之。一見於顯宗紀。再見於永中傳。孟鑄劾紇石烈執中。貪殘縱恣。且言明天子在上。豈容有跋扈之臣。一見於鑄傳。再見於執中傳。張行信奏朝廷括糧失民心。又言與屯忠孝飾詐不忠。一見於忠孝傳。再見於行信傳。路鐸言董師中。張萬公優劣。及肯持國不宜再相。一見於鐸傳。再見於持國傳。完顏素蘭請屏左右言事。一見於素蘭傳。再見於高琪傳。兩傳重復。幾五百烏林荅贊謀被誣事。一見於溫敦思忠傳。再見於秉德傳。正隆五年地震。馬貴中言命令嚴急所致。一見於五行志。再見於貴中傳。大定策試進士於憫忠寺。夜半聞音樂聲。一見於五行志。再見於選舉志。

習不失傳

習不失。本作辭不失。後定爲習不失。案。譯音本無定字。辭習聲相近。紀載異詞。各就語音近似譯之耳。

世紀、禮志、宗室表諸篇、皆書辭不失、何嘗定作習字。

石土門傳

石土門、漢字一作神徒門。案石土門亦漢字也。石土、神徒、譯音有重輕耳。思敬傳又作神土邁。子習失。亦作習室。又作辭不失。

思敬傳

本名撒改。押懶河人。金源郡王神土邁之子。辭不失弟也。此辭不失即石土門傳之習失。與昭祖之孫辭不失本傳稱習不失者各是一人。石土門傳已書耶懶路完顏部人。此又書押懶河人。亦重出也。

晏傳

本名幹論。景祖之孫。阿离合邁次子也。此傳即在阿离合邁之後。何須更著其世系。

宗寧傳

系出景祖。太尉阿里合邁之孫。阿里合邁傳不云贈太尉。

宗道傳

太尉訛論之子少。表作幹論。即晏也。訛幹聲相近。幹离不禮。志作訛魯補。承安二年。爲賀宋正旦使。交聘表。作完顏宗道。蓋避顯宗諱。改宗爲崇。

阿鄰傳

上卽位於遼陽。當云世宗。此稱上者。因實錄之文。未及更正。

案蒼海傳

以猛安讓兄子喚端。宗雄傳作桓端。

宗翰傳

宗翰。金國志繫年錄。皆作宗維。

本名粘沒喝。漢語訛爲粘罕。案國語解粘罕。心也。譯音有輕重。史臣遂以爲譌。

蒲家奴宗翰魯宗翰宗磐副之。宗翰字重複。上翰字當爲幹之譌。魯字疑衍。

遂會睿宗於濮。紀傳多稱宗輔。惟宗翰阿离補亦蓋暉傳稱廟號。

宗翰朝京師。謂宗幹曰。儲嗣虛位頗久。合刺先帝嫡孫當立。不早定之。恐授非其人。宗翰日夜未嘗忘此。

遂與宗幹希定議。入言於太宗。請之再三。乃從之。此事又見熙宗紀。

熙宗卽位。拜太保尙書令領三省事。封晉國王。乞致仕。詔不許。天會十四年薨。案金國志。天會十三年。

封左副元帥粘罕晉國王。領三省事。除元帥府左監軍兀室。兀室一作悟室。即完顏希尹也。尙書左丞相。二帥乃金主

所忌。故以相位易兵柄。是時劉豫有浸江之請。窩里嗚行。窩里嗚。即宗輔。世宗之父也。金史作訛。則二

帥兵柄已去矣。除知燕京樞密院事韓企先。尙書右丞相西京留守高慶裔。尙書左丞蕭慶。尙書右丞二人皆粘罕腹心。故不欲用之於外。十五年春。左丞高慶裔以賊下大理寺。慶裔乃粘罕腹心。宗磐之徒。欲控粘罕。故先折其羽翼也。夏。粘罕乞免官爲庶人。贖慶裔之罪。國主不許。斬慶裔於會寧市。臨刑粘罕哭別之。慶裔曰。我公早聽某言。豈至于今日。我今死耳。我公其善保之。以此知慶裔嘗教粘罕反也。時山西路轉運使劉思肅。肅州防禦使李興麟。河東北路轉運使趙溫。訊坐慶裔下獄。思伏誅。興麟杖脊爲民。溫訊值改元赦得免。其餘連坐其衆。皆粘罕之爪牙。粘罕自是失勢矣。安得不憤悶而死。繫年錄亦載宗維卒於十五年。獨金史熙宗紀及此傳。以爲十四年薨。未詳孰是。宗翰以失兵柄憤恚而死。傳雖諱而不言。然入相以後。卽有致仕之請。其不樂居內可知。徐夢莘紀粘罕獄中上書。及金人誅粘罕。詔出於傳聞。或未可信。要其晚年失勢。則誠非無稽之言也。

宗望傳

宗望 繫年錄作宗傑

張邦昌傳

張邦昌。宋史有傳。案張邦昌。劉豫。王倫。宇文虛中。皆宋史有傳。邦昌雖爲金人所立。旋即返正。終爲宋所殺。略見其事於宗翰傳可矣。不必更爲立傳。且邦昌事與宗弼無涉。乃與劉豫竝附於宗弼之後。殊

非其次。王倫以宋臣奉使，始終不受金職，與虛中之仕金通顯者有別。虛中宜入金史，倫宜入宋史，必兩見也。

劉彥宗傳

遼太宗入汴，載路車法服石經以歸。案漢魏之石經在洛陽，唐之石經在京兆，汴都無石經也。汴都石經，宋嘉祐所刻，在遼入汴以後，彥宗所云殊未足信，或云石經當是石鼓之譌。

施宜生傳

其副使耶律闌離刺，交聘表，作闌里刺。

王倫傳

皇統元年，宋人請和，三年二月，宋端明殿學士何鑄，容州觀察使曹勛，進誓表。案交聘表，何鑄等進誓表，在皇統二年。

三月，遣左副點檢養里，山東西路都轉運使劉楮，送天水郡王喪柩，及宋帝母章氏。表不見二使臣名。

熙宗二子傳

熙宗諸子，案太祖、太宗、世宗諸子傳，皆各爲卷，宗望、宗弼以功大別立傳，不附於太祖諸子之次，允合史例。熙宗、海陵、顯宗、衛紹王、宣宗諸子，則以事迹太少，不能成卷，或列於諸臣之前，或殿於諸臣之末。

雖論贊各殊，而總在一卷之中，編次終覺非法。若以熙宗、海陵諸子續于太宗諸子之末，顯宗、衛紹王、宣宗諸子續于世宗諸子之末，豈不有條有理乎。

阿禹補傳

宗室子系出景祖，宗室表不見阿禹補名。

禱盤溫敦思忠傳

禱盤溫敦思忠，案百官志，溫敦與禱盤各是一姓。據此傳，則是四字姓矣。熙宗紀稱溫都思忠，敦與都聲相近也。海陵紀前稱溫敦思忠，或稱溫都思忠，後稱禱盤溫敦思忠，逆臣秉德傳亦稱溫敦思忠。是時贊謨爲行臺參知政事，思忠黷貨無狀，贊謨鄙之，兩人由是交惡。海陵殺左丞相秉德于行臺，贊謨妻秉德乳母也，思忠因構謨，當作贊謨，脫贊字殺之。此即上文所云烏林蒼贊謀也。謀謨聲雖相近，但一篇之中不應互異，此事亦見秉德傳，當去彼存此。

天德三年致仕，海陵紀恩忠以貞元元年十一月致仕。

鎬王永忠傳

貞祐三年，太康縣人劉全嘗爲盜，亡入衛真界，詭稱愛王，所謂愛王指石古乃，石古乃實未嘗有王封，小人妄以此目之。案愛王事見於金國志甚詳，云明昌五年正月，大通節度使愛王大辨，據五國城以

叛。大辨，鄭王允蹈之子也。允蹈二子，大辨居長。年十六，明斷果決，封遂寧郡王。明昌初，遷愛王。會蒙人累寇邊，大臣議遣親王統兵鎮撫。大辨請行，世宗以其年幼不許。完顏赤曰：「愛王雖年少，然志氣明決，度必可任。」遂遣之。至鎮，大得諸夷之心。及允蹈誅，其奴樵夫者，急遣人往報愛王，使爲備。愛王爲父發哀，調發上國兵七萬人爲城守計。三路提點万俟兀馳驛奏愛王叛，國主遣皇弟東安王瑜、武定王瑤，將兵五萬往攻之。至桑乾川，遇愛王將骨孛與戰，河北兵大敗。瑜僅以身免。三月，大起兵，命東安王瑜、完顏進等分路攻討，約會於五國城。掌書記何大雅說愛王曰：「主上以君討臣，今茲之來，勢頭甚重，萬一戰而不捷，後將誰繼？不如求援於大朝，爲討之。」愛王許諾。遣大雅往聘，約以其子雄爲質。破國之後，軍儲金帛爲其所取。許之。五月，完顏進等兵至東壇，骨孛與戰，退保五樓城。進追至城下，愛王見勢急，留其子雄守城，自往北路。至平天漠，而大朝將兵已至。愛王大喜，以手指天下，馬與大朝首將稽首相見，奉獻金寶十車。首將喜曰：「大王無慮，侍郎與戰，北人言我爲郎也。」兵至五樓，進等與戰，北人禿體大撾以入，以一當百。進兵大敗，乘勝襲遂至和龍東津。承安四年，時國兵屢敗，愛王處和龍以北，凡國家始興之地皆失之。五年，北軍深入，至斯波川，和龍帥完顏太康集兵禦之。大兵長驅而前，愛王兵與之合。十二月丁酉朔，陷大都城，圍和龍。大康之兵皆潰。二十九日，和龍陷，遂取東灤平三州。泰和四年，愛王死，其子雄三大王立。大將共戍其國，且約以進兵。雄以父喪辭，大將怒，遣其掌文官顏飛責讓。

之初。愛王定約。以國家初起之地。及故遼封疆。自溝內以北。歸之於北。溝南則爲己有。累歲結謀用兵。愛王無分毫得也。至是使來責之。雄長懼而從。十二月。葬父愛王於冷山。遂進兵。愛王父子稱兵事。不載於史。且據金志。愛王爲鄭王永蹈之子。而史以爲鑄王永中子。亦不相合。又明昌五年。歲在甲寅。其時元太祖尙未建元。所謂大朝者。又何所指乎。然金自明昌以後。北邊實有用兵之事。據章宗紀。明昌五年九月。命上京等九路選軍三萬。俟來春調發。仍命諸路并北阻饜。以六年夏會兵臨潢。六年五月。命左丞相夾谷清臣。行省事於臨潢府。六月。左丞相清臣。遣使來獻捷。七月。行省都事猶吉永中來報捷。十月。命尙書左丞夾谷衡行省于撫州。十一月。左丞相夾谷清臣罷。右丞相襄代領行省事。承安元年正月。大驥灤羣牧使移刺覩等。爲廣吉刺部所敗。死之。十月。詔選親軍八百人戍撫州。命左丞相襄行省於北京。簽書樞密院事完顏匡行院事於撫州。十一月。特補羣牧契丹陔鎖德壽反。泰州軍擊敗之。十二月。遣李仁惠勞賜北邊將士。二年三月。以參知政事裔。代左丞相襄行省於北京。五月。北京行省參知政事裔。移駐臨潢府。八月。以邊事未寧。詔集六品以上官於尙書省。問攻守之計。九月。遣官分詣上京東京北京咸平臨潢西京等路。招募漢軍。九月。以樞密使兼平章政事襄行省于北京。三年十一月。樞密使兼平章政事襄。至自軍中。此五年中。叛者何人。史皆不書其姓名。及行省還朝。又不言斬獲克復之事。且其用兵。正在永蹈被誅之後一年。則愛王事。或果有之。但其時助之者。非蒙古耳。又據

夾谷清臣傳。但云密受命出師內族。襄傳但云邊事急。俱不言首難之人。其諸部從亂者。則有阻鞬。有胡正胤。有特滿。大約契丹舊部。金志指爲大朝。則非其實矣。金史雖諱其事。然以此傳所載推之。必實有愛王倡亂北邊。久之病死。故內地姦人亦假其名。如陳勝詐稱公子扶蘇之事。且曰愛王終嘗奮發。則其事誠不可掩也。

紇石烈志寧傳

是時宋得窩斡黨人括里札八用其謀。攻靈壁。虹縣都統奚撻不也叛入於宋。撻不也。宋史稱爲蕭琦。蓋宋朝賜名。

紇石烈良弼傳

追封金源郡王。案百官志。紇石烈。徒單姓。皆封廣平郡。今考諸傳。如紇石烈良弼。追封金源郡王。徒單克寧。封延安東平郡王。與志皆不合。

劉瑋傳

唐盧龍節度使仁敬之裔。仁敬。卽仁恭。史臣避金諱。追改。

完顏匡傳

章宗崩。匡受遺詔立衛紹王。章宗遺詔。當載於衛紹王紀。不宜入匡傳。

賈益謙傳

字彥亨。中州集作亨甫。

完顏奴申傳

奉使大元。至龍駒河。龍駒河。卽元史之龍居河也。長春西游記謂之陸局河。

上以東面元帥李辛跋扈。歸潛志作李新。

餘見崔立傳。按崔立賣國逞兇。賈益自斃。置之叛臣。夫復何辭。史臣旣以忌諱不敢斥言。則附其事於

奴申傳足矣。不當爲專傳以獎亂也。

祁字京叔。渾源人。案文苑劉從益傳末已附載祁事。此引祁語而復言其字與籍貫何也。李獻能亦載

文苑傳。而徒單兀典傳又言獻能字欽叔。貞祐三年進士。其複沓多此類。

崔立傳

是日。御史大夫裴滿阿忽帶。諫議大夫左右司郎中烏古孫奴申。左副點檢完顏阿散。奉御忙哥。講議蒲

察琦。戶部尙書完顏珠顆。皆死。案歸潛志。立變三日。御史大夫裴滿阿虎帶。提點近侍局兼左右司

郎中。吾古孫訥申。縊於臺中。戶部尙書完顏仲平亦自殺。仲平卽珠顆一人而兩名也。虎與忽烏與哥。奴與訥北音皆

似。忠義傳言諸人死在崔立變之明日。歸潛志則以爲後三日。非卽在此日明矣。忠義固人所樂道。然

此諸人者既詳見於忠義傳。又見於哀宗紀。而此傳又一一舉之。無怪乎汗青無日也。

開安國納一都尉夫人。歸潛志云。取故監軍王守玉妻。

徒單兀典傳

不知其所始。案宣宗紀。貞祐三年。遙授武寧軍節度副使徒單吾典。告抹撚盡忠逆謀。亦見盡忠傳當即其

人也。北音。吾與兀相似。

石蓋女魯歡傳

正大九年二月。案哀宗以是年正月十八日。據歸潛志改元開興。四月又改天興。則二月以後。不得稱正大

矣。傳既不書改元天興。則下文二年字。亦不可通。

二月戊辰朔。案哀宗紀。是年二月丙子朔。非戊辰朔。其三月戊辰。官奴攻殺馬用。戊辰。亦非朔日也。傳

誤。

時青傳

初於叔父全。俱為紅襖賊。案青本紅襖賊。招降未久。即逃入宋。不足立傳。

忠義傳

完顏陳和尚。六年。有衛州之勝。八年。有倒回谷之勝。案衛州解圍事。在正大七年十月。此云六年者。

誤。倒回谷之事。本紀不載。唯完顏合達傳云。八年正月。北帥攻破小關。殘盧氏。朱陽。潼關。總帥求救於二省。省以陳和尚忠孝軍千人往應。北軍退。追至谷口而還。所云谷。卽倒回谷也。

酷吏傳

金史多闕逸。據其舊錄。得二人焉。案。金史酷吏宦者。皆止二人。不能成卷。乃以酷吏與佞幸同卷。宦者與方技同卷。編次亦覺未當。愚謂高閭山死於國事。可掩其酷刑之罪。則酷吏傳可省也。金之近侍局。皆世家子弟爲之。宦寺無預政者。則宦者傳可省也。宦者二人。梁琬當附佞幸傳。宋珪與奉御絳山等同死。當附見忠義傳。

佞幸傳

張仲軻。宋余康弼。賀登寶位。康當作唐。

貞元二年正月。宋正旦使施臣朝辭。臣當作鉅。考宋史。是歲賀正旦使吳奩。鉅乃生辰使也。

列女傳

李英妻張氏。案。列女二十一人。李寶符已載於后妃傳。不當重出。若李英妻張氏。撒合鞏妻獨吉氏。胡士門妻烏古論氏。完顏素蘭妻。完顏仲德妻。自可附其夫傳。馮妙真。聶舜英。自可附其父傳。史家必分而列之。識迂而詞亦費矣。

逆臣傳

言本名烏帶。監本以言本名三字，屬於唐括辯傳之末，而以烏帶提行，可笑之甚。

叛臣傳

張覺。子僅言。案，僅言仕世宗朝，無大過咎，不當附叛臣篇。

西夏傳

德旺死，嗣立者史失其名。據宋史，嗣立者清平郡王之子南平王峴也。兩史總裁出一手，而不同若此。

金國語解

姓氏。案百官志，所載白號黑號之姓甚多，今譯爲漢姓者僅三十有一。移刺石抹，則契丹人也，不當入女直姓氏之內。

廿二史考異卷八十六

元史一

太祖紀

姓奇渥溫氏。案元祕史作孛兒只吉歹氏。明楊子器元宮詞注亦云世祖姓孛兒只斤。只斤。即只吉歹。譯音有輕重爾。今譯爲博爾濟吉特。

遂有娠產一子。即孛端叉兒也。案陳經通鑑續編天后阿蘭寡居一乳三子。長曰孛完合蒼吉。即史所謂博合裡直

葛蒼黑也。祕史作不忽合蒼吉。次曰孛合撒赤也。祕書作不合禿撒勒吉。季曰孛敦察兒。即孛端叉兒。祕史亦云阿蘭豁阿。即阿蘭。嫁朵奔篋兒干。即脫奔生二子。既寡居。又生三子。曰不忽合蒼吉。曰不合禿撒勒吉。曰

孛端察兒。史獨以孛端叉兒爲夫亡後所生。而以博寒葛蒼黑二人當脫奔咩哩健之二子。非其實也。帝王之興。必有殊異。一乳三子之說。宜若可信。

自統急里忽魯之野。祕史作統格黎克豁羅罕。豁羅罕者。小河也。

子葛不律寒嗣。祕史作合不勒合罕。合罕。猶言可汗也。元之先世。部衆未盛。至葛不律。始自稱合罕。葛不律卒。遺言以叔父之子俺巴孩合罕。代領其衆。是爲泰赤烏氏。

汪罕子亦刺合。祕史作儻勒合，亦稱桑昆者。蓋沿遼金時詳衰之稱是號非名也。朮徹台傳作鮮昆，忠義傳作先髡，譯音有輕重，其實一爾。

哈蒼斤部，散只兀部，朮魯班部，塔塔兒部，宏吉刺部，聞乃蠻泰赤烏敗，皆畏威不自安，會於阿雷泉，斬白馬爲誓，欲襲帝及汪罕。案下文又云：宏吉刺歸札木合部，與朮魯班亦乞列思、哈蒼斤、火魯刺思、塔塔兒、散只兀諸部會於斡河，共立札木合爲局兒罕，盟于禿律別兒河岸。所列諸部之名，惟多亦乞列思、火魯刺思二種，餘多相同。考祕史此時從札木合者，實有十一部，立札木合者，以拒王罕與太祖也。史誤分爲兩事，而諸部之名亦多脫漏，且乃蠻泰赤烏之敗，乃在札木合等散去之後，紀所書皆非其實。

宏吉刺部長迭夷，迭夷疑即特薛禪也，迭特聲相近。

與帝麾下抄吾兒連姻。列傳第十卷有召烈台一作臺抄兀兒，卽其人也。兀吾聲相近，召烈台蓋其族姓。

歲癸丑，汪罕父子謀欲害帝，癸丑當作癸亥。

圍人乞力失，當作乞失力。哈刺哈孫傳作啓昔禮，聲相近也。祕史作乞失力黑。

虜宏吉刺別部溺兒斤以行，祕史作帖兒格。

至班朱尼河，祕史作巴勒渚納，渚兒納，渚兒者，海子也。亦作腦兒元史或作班朮居河，又作辨屯河，又稱黑

河言其水渾也。

謀於白達達部主阿刺忽思。即阿刺忽思剔吉忽里也。白達達部本傳作汪古部。

元年^{丙寅}初金殺帝宗親咸補海罕。咸補海。即俺巴孩也。祕史俺巴孩以女嫁塔塔兒部。親送至兀兒失

温河。爲塔塔兒所執。送之金。金人殺之。諸部復立合不勒子忽圖刺爲合罕。

三年^{戊辰}冬。再征脫脫及屈出律罕。據祕史。征脫脫及屈出律事在乙丑歲。

時幹亦刺部等。遇我前鋒。不戰而降。因用爲向導。案祕史。太祖二年。皇子朮赤將右手軍出征。幹亦刺

部人忽都哈別乞。不戰而降。卽以爲鄉導。征幹亦刺朮赤思諸部。皆下之。此與征蔑里乞事無涉。史繫

于征脫脫之後。非也。

六年^{辛未}西域哈刺魯部主阿昔蘭罕來降。畏吾兒國主亦都護來覲。此二事。祕史載在元年。

耶律阿海降。入見帝于行在。案本傳。阿海及弟禿花。俱與太祖同飲辨屯河水。金人訝其使久不還。拘

阿海家屬。皆在太祖未卽位之前。其後從左帥闊別略地漢南。破烏沙堡。阿海咸在行間。紀于是年十

月書阿海降。非也。

劉伯林。夾谷長哥等來降。案劉伯林傳。來降在壬申歲。與此差一年。

八年^{癸酉}金西京留守忽沙虎。金史作胡沙虎。卽紇石烈執中也。

拙赤解薄剝爲左軍。拙赤解即朮赤台。

史天倪、蕭勃迭、率衆來降。木華黎承制，竝以爲萬戶。案：天倪傳亦云：以萬戶統諸降卒，而石抹孛迭兒

傳即蕭勃迭但云擢爲千戶，兩傳互異。考元初，萬戶爲軍官最要之職。太祖時，惟木華黎、博爾朮爲左右萬

戶，納牙爲中軍萬戶，此外雖蒙古世臣，亦不輕授。天倪輩漢人初附，豈得便居此職，則石抹傳云擢千

戶者，似爲近之。然此條沿譌，亦非無因。考張匡衍撰木華黎行錄云：史天倪、蕭勃迭、率衆來降。王奏各

統萬戶，其云各統萬戶者，謂令其領萬人從征耳，非授以萬戶之職也。史臣昧於官制，遂以爲真授萬

戶矣。元制，除萬戶未有不賜金虎符者。今據天倪傳，是年已爲萬戶，至甲戌始賜金符，乙亥授副都元

帥，乃改賜金虎符，則其初降必未授萬戶也。史氏之授萬戶，始於天澤，蓋在太宗即位之初，予嘗見崔

鉉撰史氏慶源碑，稱天倪曰河北西路都元帥，稱天澤曰眞定五路萬戶，則天倪之非萬戶審矣。

九年甲戌木華黎征遼東。蘇天爵名臣事略作遼西，此誤。戈宙襄曰：木華黎傳亦誤作遼東。

十年乙亥四月，詔張鯨總北京十提控兵從南征。鯨謀叛，伏誅。鯨弟致遂據錦州，僭號漢興皇帝。案：史進

道神道碑，丙子，錦州渠帥張致叛。丁丑，從王提大軍攻拔之。張致伏誅。此紀書張致叛於乙亥，討平於

丙子，皆差一年。蓋沿元明善所撰木華黎世家之誤，當以碑爲據。史樞傳：父天安，丁丑，從討叛人張致，

平之，正與碑合。何實、王珣傳，俱以致叛繫之丙子歲，惟珣傳稱誅致即在是年，稍有不合耳。吾也而傳云十一年。

亦卽丙子也。

八月木華黎遣史進道等攻廣寧府降之。監本史或作賜者誤也。據進道碑丁丑張致伏誅王又令公招收廣寧府兵及城下開門迎降此亦丁丑年事。廣寧與錦州接壤故因平張致而并降之也。紀所書年月多未可信。進道字道遠天倪父秉直之弟。癸酉十一月與秉直同降從木華黎下山東甲戌三月還師圍中都八月進兵圍守北京乙亥三月城降八月進兵攻興州趙守玉望風送款以勳授義州節度使命管領北京句當丁丑從大軍攻錦州拔之及廣寧府降就命留守廣寧未幾復命留守北京在北京十有餘年甲午薦其壻北京管民長官張之翼自代又十年卒史不爲進道立傳今據段紹先所撰碑敘次之以備考。

十三年戊寅是年伐西夏圍其王城夏主李遵頊出走西涼。案陳桎通鑑續編薛應旂通鑑皆在十二年今考金史宣宗紀興定二年正月陝西行省獲歸國人言大元兵圍夏王城李遵頊命其子居守而出守西涼興定二年卽戊寅歲也金人于正月傳聞得之則通鑑云在前年者爲是。

命哈真禮刺率師平之禮當作札。

十六年辛巳帝攻卜哈兒薛迷思干等城。薛迷思干卽尋思干也一作邪迷思干考上年五月已嘗克尋思干城矣何以此春又嘗攻下之豈克而又叛乎抑史文重出乎。

金東平行省事忙古。金史作蒙古綱。

宋漣水忠義統轄石珪。率衆來降。宋史在嘉定十三年十二月。元太祖之十五年也。石珪傳亦在庚辰

年。惟木華黎傳與本紀合。

宋京東安撫使張琳。宋史作張林。林之叛宋。據宋史寧宗紀。在嘉定十四年十一月。即太祖辛巳歲與紀正合。

而李全傳繫之十五年。恐全傳誤。

十八年癸未十月。金主珣殂。子守緒立。金史在十二月。

二十年乙酉二月。董俊判官李全。亦以中山叛。此別一李全。非據青州之李全也。據董俊傳。全之叛在庚

辰歲。相距五六年。紀移於此。殆因次年有李全執張琳。郡王帶孫圍全益都事。而牽連及之。是誤初兩

李全爲一人也。

二十一年。此下當有丙戌二字。傳寫脫之。

九月李全執張琳。據宋史李全傳。全逐張林入青州。在嘉定十五年壬午。至是年丙戌。全之據益都。已

四年矣。而李魯傳稱丙戌。李全陷益都。執元帥張琳送楚州。誤也。紀但稱執琳。不云陷益都。或壬午歲

琳棄州走。至此時始見執乎。

十二月李全降。據李魯傳。全之降在丁亥三月。李全傳亦在寶慶三年四月。即丁亥歲紀誤書於前一年。

二十二年，丁亥德順節度使愛申進士馬肩龍死焉。此二人金之忠臣，金史已列諸忠義傳矣。於元家何與，而更書之邪？且金臣死於元者，又不止此二人也。史家昧於限斷之例，故有此失。

太宗紀

諱窩闊台。祕史作幹歌歹。陳桎續編作幹可歹。石刻，或作月古台。

二年庚寅十二月，始置十路徵收課稅使。陳桎續編在二月。

三年辛卯二月，克鳳翔，攻洛陽河中諸城，皆下之。據金史，鳳翔之陷在四月，非二月也。下文云：十月帝圍

河中，十二月拔之，則此時不應有攻下河中事。

五年癸巳正月，庚申，金主守緒奔歸德。金史作己未，先一日。

四月，崔立以金太后王氏后徒單氏及荆王從恪、梁王守純等至軍中，速不台遣送行在。任大椿云：案

金史哀宗紀及劉祁歸潛志，荆王梁王皆遇害于青城，其北遷者止兩宮耳。此紀所載似二王亦與兩

宮同送行在矣。又金史作梁王從恪，荆王守純，此稱荆王從恪，梁王守純，或傳寫之誤。

六年甲午，議自將伐宋。案是春伐金之役，與宋合攻，金亡之後，與宋約和，以陳蔡東南爲宋，西北爲蒙古。

各引兵還矣。乃宋相鄭清之，忽主收復二京之議，遣全子才等率淮西兵萬餘人，以六月出師。七月二日抵汴，行省李伯淵以書來降。五日殺崔立，率父老出迎，子才遂入汴，而趙文仲以淮東師五萬繼至。

乃遣徐敏子爲監軍西上。二十八日入洛陽。元成兵先期空城而去矣。宋兵糧盡不能守。引還。八月二日。元兵追擊之。大敗。敏子中流矢。徒步聞行。由浮光遁。子才在汴。聞洛東喪師。亦於二十五日棄城遁。此元太宗所以有自將伐宋之議也。紀於分地約和。及宋背約北侵事。俱不之及。則議伐宋爲無名矣。國王查老温。卽木華黎之孫塔思也。

八年^{丙申}二月。命應州郭勝。鈞州李朮。魯九住。鄧州趙祥。從曲出充先鋒伐宋。案郭勝等三人。史皆無傳。

唯姚燧撰鄧州長官趙公神道碑。於祥事頗詳。祥字天麟。蔡之平與人。金天興癸巳。天兵圍蔡。城中糧絕。公率部曲發富室藏粟。突圍上餽。授提控。明年甲午。金亡。將麾下歸宋。授信效左軍統制。遣戍鄧州。

乙未十月。天兵略地漢上。開門納降。居兩月。太子南征。^{卽曲出也}還過教。以是城甚近襄陽。虞力孤不能自

完。且歲荒。與均唐三州民。徙洛陽之西三縣。鄧治長水。均治永寧。唐治福昌。許公權宜行省事。乃先勞分苦。佐乏藥疾。府寺田廬於蔡一始。丙申。襄樊亦徙洛陽。其年入覲。特賜金符錦衣。許出戰督軍。入守字民。別降銀符八十金符八。以酬從公將佐同力者。蓋祥降元以後。卽徙治內地。別無從曲出伐宋之事。元初不立史官。後來修實錄者。大約道聽塗說。十不存一。故太祖四朝紀。大率疏舛。無可徵信。

七月。詔以真定民戶奉太后湯沐。案食貨志。睿宗子阿里不哥。大王位。丙申年。分撥真定路八萬戶。蓋太后湯沐之邑。後爲睿宗所有。

中原諸州民戶分賜諸王貴戚。幹魯朶拔都平陽府。食貨志。朶赤大王位。分撥平陽四萬一千三百二十戶。拔都者。朶赤之子。

茶合帶。太原府。食貨志。茶合朶大王位。分撥太原四萬七千七百三十戶。茶合朶者。太祖第二子察合台也。世祖紀。太原乃阿只吉分地。阿只吉。卽察合台之孫。

古與。大名府。食貨志。太宗子定宗位。分撥大名六萬八千五百九十三戶。定宗名貴由。此作古與。聲相近。

李魯帶。邢州。食貨志。八蒼子。丙申年。分撥順德路一萬四千八十七戶。順德路。卽邢州。則李魯帶。疑卽八蒼子矣。世祖紀。邢州有兩蒼刺罕。其一爲啓昔禮。卽哈刺哈孫之大父。其一則太祖紀所謂把帶。卽八蒼子也。或云。啓昔禮之子。名博理察。與李魯帶聲亦相近。

果魯干。河間府。食貨志。闕列堅太子子河間王位。分撥河間路四萬五千九百三十戶。果魯干。卽闕列堅也。

李魯古帶。廣寧府。食貨志。李羅古朶子廣寧王位。丙申年。分撥恩州一萬一千六百三十戶。此云廣寧府。疑志誤。李魯古帶。卽別里古台。

野苦益都濟南二府戶內撥賜。食貨志。糊只哈撒兒大王子淄川王位。分撥般陽路二萬四千四百九

十三戶。淄川王名也。苦即野苦。

按赤帶濱棗州。食貨志。哈赤温大王子濟南王位。分撥濟南路五萬五千二百戶。濟南王名按只吉歹。即按赤帶也。

幹陳那顏平灤州。食貨志。幹真那顏位。分撥益都等處六萬二千一百五十六戶。案幹陳即幹赤斤。其後爲遼王。則紀云平灤者爲得其實。

皇子闕端。食貨志。闕端太子位。分撥東京路四萬七千七百四十一戶。東京蓋東平之譌。元典章有東昌路達魯花赤探馬赤。前去永昌府將軍糧交付了當云云。則東昌乃闕端太子分地。元初其地隸東平行省也。

駙馬赤苦。公主表。鄆國公主位。禿滿倫公主。適赤窟駙馬。即此赤苦也。食貨志。鄆國公主位。丙申年。分撥濮州三萬戶。

公主阿刺海。公主表。趙國大長公主阿刺海別吉。適趙武毅王孛要合。食貨志。趙國公主位。分撥高唐州二萬戶。

公主果真。公主表。昌忠武王孛禿繼室。以太祖女昌國大長公主火臣別吉。火臣即果真也。食貨志。昌國公主位。分一萬二千六百五十二戶。失書地名。

國王查刺温。食貨志。木華黎國王。分撥東平三萬九千一百九十九戶。查刺温。即木華黎之孫。

茶合帶鍛真。案。朮赤台有孫端真拔都兒。襲爵郡王。即鍛真也。高麟傳父守忠從段真郡王取中原有功食貨志。朮赤台郡

王。丙申年。分撥德州二萬戶。茶合帶。未詳何人。恐是衍文。

蒙古寒札。案。畏蒼兒之子忙哥。封郡王。疑即蒙古也。食貨志。愷里蒼兒辭禪。丙申年。分撥泰安州二萬

戶。愷里蒼兒。即畏蒼兒。寒札未詳。

按赤那顏。按赤那顏。即國舅按陳那顏也。食貨志。魯國公主位。丙申。分撥濟寧路三萬戶。

圻那顏。火斜木思。並於東平府戶內撥賜。圻。當是折字之譌。哲別以驍勇事太祖。與虎必來者。勒篋。速

不台。稱四先鋒。紀傳或書遮別。或書者別。郭寶玉傳作柘柏吾也。而傳稱折不那演。巴而朮阿而忒的

斤。傳稱者必那演。實一人也。食貨志。和斜漫兩投下。一千二百戶。丙申年。分撥曹州一萬戶。和斜漫。即

火斜木思也。而圻那顏則志遺之。又案。志所載丙申年分撥者。尙有太祖叔蒼里真官人。火雷公主。李

羅先鋒。行丑兒。乞里歹拔都。笑乃帶先鋒。帶孫郡王。李魯古妻修氏。李羅台萬戶。忒朮台駙馬。幹闊烈

闊里必合丹大息千戶也。速不花等四千戶也。速兀兒等三千戶。帖柳兀秃千戶。滅古赤。塔思火兒赤。

折米思拔都兒。迭哥官人。黃兀兒塔海。添都虎兒。紀俱不載。

九年。丁蒙哥征欽察部。擒其酋八赤蠻。案。元史載征欽察事。紀志傳互異。此紀及憲宗紀。俱以八赤蠻

爲欽察之酋長。地理志：太宗甲午年，命諸王拔都征西域。欽即欽察阿速幹羅思等國。歲乙未，亦命憲宗往焉。歲丁酉，師至寬田吉思海。榜欽即欽察酋長八赤蠻，逃避海島中，適值大風吹海水去而乾，生擒八赤蠻，亦與本紀略同。而速不台傳則云：歲己卯太祖十四年，大軍至蟾河，與滅里吉遇，盡降其衆。其部主霍都奔欽察，速不台追之，與欽察戰于玉峪，敗之。癸未太祖十八年，速不台請討欽察，許之，遂引兵繞寬定吉思海，展轉至太和嶺，鑿石開道，出其不意。至則遇其酋長玉里吉及塔塔哈兒，方聚于不租河，縱兵奮擊，其衆潰走。矢及玉里吉子，逃於林間，其奴來告而執之。餘衆悉降，遂收其境。乙未，太宗命諸王拔都西征八赤蠻，命速不台爲先鋒，與八赤蠻戰，繼又令統大軍，遂虜八赤蠻妻子于寬田吉思海。八赤蠻逃入海中，然則欽察與八赤蠻本是兩部，速不台以太祖癸未平欽察，太宗乙未走八赤蠻，相距十有三年，而憲宗擒八赤蠻在丁酉歲，距欽察之平蓋已久矣。土土哈傳：太祖征蔑里乞即滅里吉，其主火都即霍都奔欽察，欽察國主亦納思納之。太祖命將往討，亦納思已老，國中大亂，亦納思之子忽魯速蠻遣使自歸于太祖，而憲宗受命帥師已扣其境，忽魯速蠻之子班都察舉族迎降，其殺被兵之由，與速不台傳合，而酋長之名彼此互異，且速不台平欽察之時，憲宗僅十六歲，初無受命帥師之事，而土土哈傳并而爲一，益不然矣。

壬寅年，六皇后乃馬真氏始稱制。刊本六作太，誤。案本紀不書六皇后之名，后妃表云：脫列哥那六皇后乃馬

眞氏太宗崩后攝國。陳徑通鑑續編云：太宗崩，六皇后禿里吉納治國事，則脫列哥那、禿里吉納、本一人。譯音有輕重爾，而后妃表別有禿納吉納六皇后，疑是重出。

乙巳年，宋制置趙葵，當作趙葵。

定宗紀

太宗長子也。案陳徑續編以爲第二子。

定宗崩後議所立未決，當是時已三歲無君。案后妃傳云：定宗后名幹兀立海迷失抱子失列門，垂簾聽政者

六月，陳徑續編則云：皇太后禿里吉納復治國事，未審誰是。

憲宗紀

元年辛亥，西方諸大將班里赤，疑卽巴而朮阿兒忒也。

二年壬子，合丹於別石八里地，蔑里於干葉兒的，石河海都於海押立地，別兒哥於曲兒只地，脫脫於葉密

立地，蒙哥都及太宗皇后乞里吉，忽帖尼於擴端所居地之西。案合丹蔑里表作滅里皆太宗之子，海都

者，合失之子，脫脫者，哈刺察兒之子，蒙哥都者，闊端之子，皆太宗孫也，惟別兒哥不見於表，擴端卽闊

端，乞里吉，忽帖尼，所謂三皇后也。據陳徑續編，則所遷者乃六皇后禿里吉納。

四年甲寅，會諸王於顯顯腦兒之西，乃祭天於日月山。王禱日月山祀天頌，日月山國語云阿刺溫山，在

和林之北。金史地理志。西京路昌州寶山縣北五百餘里。有日月山。大定二十年。更曰抹白山。此別是一山。名同而地異也。

廿二史考異卷八十七

元史二

世祖紀一

中統元年親王合丹、阿只吉、率西道諸王、塔察兒也先哥、忽刺察兒、瓜都、率東道諸王、合丹、太宗之子、阿只吉者、察合台之孫、塔察兒者、幹赤斤之孫也、先哥、即移相哥、哈撒兒之子、忽刺兒、即忽列虎兒、哈赤溫之孫、瓜都者、別里古台之子。

李魯海牙、劉肅、竝爲眞定路宣撫使。李魯海牙、即布魯海牙。

賜親王穆哥銀二千五百兩。睿宗子、末哥大王也。

賜先朝皇后帖古倫銀二千五百兩。皇后幹者思銀二千五百兩。兀魯忽乃妃子銀五千兩。案后妃表、

世祖四幹耳朵、無幹者思、兀魯忽乃二人、而帖古倫大皇后、守世祖大幹耳朵、非先朝后也、二者當有一誤。

二年十二月、詔封皇子眞金爲燕王、領中書省事。案元史本紀、敘事多重複、如中統二年十二月、書封皇子眞金爲燕王、領中書省事、而三年十二月、又書封皇子眞金爲燕王、守中書令、至元十二年、書割

江東南康路隸江西省而二十二年又書分江浙行省所治南康隸江西行省二十三年又書以南康路隸江西行省至元十五年書復立河中府萬全縣全當作泉下同而十六年又書復立萬全縣隸河中府至元十五年書改京兆府爲安西路而十六年又書改京兆爲安西路至元二十一年五月書賜北安王竊紐金印而七月又書賜皇子北安王印至元二十五年書改西南番總管府爲永寧路而二十七年又書改西南番總管府爲永寧路至元二十九年書罷徽州路錄事司而三十年又書罷徽州錄事司元貞元年書陞全州爲全寧路而二年又書改泉州爲泉寧府泉卽全之譌至大二年書封知樞密院事德元年書陞全州爲全寧路而二年又書改泉州爲泉寧府泉卽全之譌至大二年書封知樞密院事容國公牀兀兒爲句容郡王而延祐三年又書封牀兀兒爲句容郡王延祐四年書以大寧路隸遼陽省而五年又書以大寧路隸遼陽省延祐四年書陞靖州爲路而至治二年又書陞靖州爲路延祐五年書以者連怯耶兒萬戶府爲右衛率府而六年又書以者連怯耶兒萬戶府軍萬人隸東宮置右衛率府至治元年書龍虎山張嗣成來朝授太元輔化體仁應道大真人而泰定二年又書加嗣漢三十九代天師張嗣成太元輔化體仁應道大真人至治三年十月辛丑書諸王怯別遣使來朝而甲寅又書諸王怯別遣使來朝泰定元年正月書敕封解州鹽池神爲靈富公而致和元年四月又書改封鹽池神曰靈富公泰定元年三月書遣湘寧王八刺失里出鎮察罕腦兒而四年三月又書命親王八刺

失里出鎮察罕腦兒。元統二年，書四川大盤洞蠻謀谷什用，遣男謀者什用來貢方物，卽其地立盤順府。而至正十二年，又書四川未附生蠻向亞甲洞主墨得什用出降，立盤順府，皆一事而兩三見者也。

世祖紀二

三年二月丙申，以興松雲三州隸上都。案：陞開平爲上都，在四年五月戊子，升望雲縣爲雲州，松山縣爲松州，在四年五月庚子，不應此時先有上都及松雲二州之名。據下文四月庚戌，以望雲、松山、興州課程隸開平府可證。其時不稱上都也。又是年十二月戊寅，書割北京興州隸開平府，與此文亦重複。四月，賜諸王也相哥金印，卽移相哥也。

至元元年，給諸王也速不花印。案：宗室世系表，別里古台之子，闊端之孫，皆有名也。速不花者，考中統三年，賜廣寧王瓜都印，乃是別里古台之孫，卽也速不花之子。不應子之賜印乃先於父，則此給印者，必闊端之孫矣。

與諸王玉龍蒼失、阿速帶、昔里給等。玉龍蒼失三人，皆憲宗子，阿速帶表作阿速歹，昔里給表作昔里吉。

世祖紀三

二年，分四親王南京、屬州、鄭州隸合丹，鈞州隸明里，睢州隸李羅赤，蔡州隸海都，它屬縣復還朝廷。案

食貨志。太宗丁巳年。分撥合丹、滅里、合失、闕出、汴梁在城戶。至是改以屬州戶賜之也。明里卽滅里。李羅赤者。闕出之孫。卽失列門之子。海都則合失之子。

五年封諸王習怯吉爲河平王。卽憲宗子昔里吉。怯字疑譌。

世祖紀四

九年。賜南平王禿魯銀印。禿魯。定宗之孫。表作禿里。

詔諸路府州司縣。達魯花赤管民長官。兼管諸軍與魯。經世大典序錄云。凡軍出征戍家。在鄉里曰與魯。州縣長官。結銜兼與魯官以位之。

世祖紀五

十年。命諸王阿不合市藥師子國。阿不合。疑卽旭烈兀大王子。阿八哈也。

十二年。駙馬長吉。長吉。表作昌吉。

詔中書右丞廉希憲。行中書省于江陵府。案十三年。又書以北京行中書省廉希憲爲中書右丞。行中書省事于荆南府。荆南卽江陵府。亦一事而重見也。

世祖紀六

十三年二月。夏貴以淮西諸郡來降。惟鐵巢軍復叛。貴遣使招之。守將洪福殺其使。貴親至城下。福始降。

阿朮斬之軍中。案宋史忠義傳。貴既臣服招福不聽。使其從子往。福斬之。大兵攻城久不拔。遣貴至城下。好語語福。請單騎入城。福信之。門啓而伏兵起。執福父子。屠城中。貴位殺其二子。次及福。福大罵。數貴不忠。請身南向死。以明不背國也。福之節義。皎皎如此。元史謂貴之城下而福降者。誣也。福事附見姜才傳。

十四年二月甲戌。西川行院不花率衆數萬至重慶。營浮屠關。造梯衝將攻之。其夜。都統趙安以城降。張珪。麟船江中。與其妻妾順流至涪州。元帥張德潤以舟師邀之。珪遂降。案宋史忠義傳。張德潤復破涪州。執守將程聰。在十四年六月。宋史於德祐二年之後書明年。元史本紀。則書于是年七月。其時重慶尙未被兵。何緣珪有出降之事。又據本紀。是年八月。始詔不花行院四川。則是春不花尙未至四川。史所載殊疏舛矣。宋史珪傳。至元十五年二月。珪率兵出薰風門。與大將也速魯兒戰。扶桑埧。珪兵大潰。城中糧盡。趙安以書說珪降。不聽。安乃與帳下韓忠顯。夜開鎮西門降。珪率兵巷戰不支。歸索燂飲。左右匿燂。乃以小舟載妻子東走涪。明日。萬戶鐵本兒追及于涪。執之。送京師。珪之被執年月。當以宋史爲正。汪良臣傳云。十五年春。張珪悉衆鏖戰。良臣奮擊大破之。珪所部開門納降。珪潛遁。與宋史年月相合。紀誤書於前一年。其云出降。亦誣也。紐璘傳。制置使張珪遁。追至涪州擒之。亦不云出降。十二月。賜諸王也不干。燕帖木兒等。案宗室世系表。宗王名也不干者三人。一爲塔察兒之子。一爲忽

魯歹之子。一爲合丹之子。未審所賜何人。燕帖木兒。則表未見其名。

世祖紀七

十五年八月。制封泉州神女。號護國明著靈惠協正善慶顯濟天妃。案本紀。至元二十五年六月。詔加封南海明著天妃爲廣祐明著天妃。大德三年二月。加封泉州海神曰護國庇民明著天妃。天厯二年十月。加封天妃爲護國庇民廣濟福惠明著天妃。至正十四年十月。加號海神爲輔國護聖庇民廣濟福惠明著天妃。此天妃封號。由二字加至十二字之次第也。祭祀志云。神號積至十字。指天厯封號而言。祝文同。此所載封號十二字。蓋非元制也。以二十五年加封四字推之。則至元初封止有明著二字。紀殆誤矣。汪楫使琉球雜錄云。天妃。光宗朝封靈惠妃。寧宗朝加封助順。又加顯衛護國助順嘉應英烈妃。理宗朝加封協正。又封靈惠助順嘉應慈濟妃。尋加善慶。又進顯濟妃。

十一月行中書省。自揚州移治杭州。案。至元二十一年。始徙江淮行省於杭州。不應此時卽有移治之事。邵晉涵曰。考地理志。揚州杭州兩路。俱不載。至元十五年移行省事。惟集慶路云。至元十四年初立。御史臺於揚州。旣而徙杭州。又徙江州。又還杭州。二十三年。自杭州徙治建康。然則本紀所云十五年。自揚州徙治杭州者。乃行御史臺。非行中書省。蓋傳寫誤爾。

世祖紀八

十七年二月，命梅國賓襲其父應春瀘州安撫使職。瀘州嘗叛，應春爲前重慶制置使張珪所殺，國賓詣闕訴冤，詔以珪畀國賓，使復其父讎。珪時在京兆，聞之自經死。案宋史忠義傳，珪至安西即京兆趙老庵，其友謂之曰：公盡忠一世，以報所事，今至此，縱得不死，亦何以哉？珪乃解弓弦自經廁中，與此紀互異，未詳孰是。

六月，安西王薨。

列本作西安誤

罷其王相府。

案趙炳傳，至元十五年十一月王薨，名臣事略亦云十五年冬王

薨，十七年王相府罷，然則王相府之罷，在王薨後二年，紀誤以爲同時事。諸王表，秦王忙哥刺，即安西王益封

王，至元十七年薨，此又因本紀而誤。

十月，賜雲南王忽哥赤印。

案忽哥赤於至元四年封雲南王，賜印八年，爲寶合丁等毒死，此紀所書，蓋

以其子也。先帖木兒襲封雲南王，仍以父印賜之耳。諸王表，雲南王也先帖木兒，至元十七年襲封，可證此文之誤。

十二月，以高麗國王王暉爲中書右丞相。案王暉爲丞相，不見於宰相表，蓋授爲征東行中書省右丞相耳。

世祖紀九

十九年正月，諸王昔里吉、與脫脫木兒、鑾木忽兒、撒里蠻等，案宗室表，旭烈兀大王、歲都哥大王之孫。

俱有脫脫木兒未知孰是。夔木忽兒者，阿里不哥之子，藥木忽兒也。撒里蠻者，玉龍蒼失之子。

六月己丑朔，日有食之。天文志作乙丑，刊本之譌也。案是年六月朔日食，而七月戊午朔，又書日食。天志亦同。邢雲路曰：推是年六月朔，交二十四日，有奇，不入食限，不應食。七月戊午朔，交九刻，入食限。是日巳時日食，合何元史重載六月朔食耶。從古無比食之理。郭守敬論之詳矣。豈以守敬十八年方定授時而不辨此，此必修史者誤書之也。

二十年六月，命諸王忽牙都設斷事官。疑卽鎮遠王牙忽都也。

世祖紀十

二十一年閏五月，封法里刺王爲郡王，佩虎符。案諸王表：怯里歹郡王。至元十一年，賜印，此法字，疑怯之譌也。表云十一年，而紀書于二十一年，蓋表脫二字。

世祖紀十一

二十四年二月，敕諸王闊里鐵木兒，卽廣寧王徹里帖木兒。

世祖紀十二

二十五年正月，賜諸王火你赤銀五百兩。案太宗子合丹大王之子有火你。賜諸王亦憐真部曲鈔三萬錠。闊端太子之孫。

十二月，賜案荅兒禿等。案，荅兒禿者，帖木兒駙馬之賜號也。見特薛禪傳。

二十六年四月，立諸王愛牙赤投下人匠提舉司于益都。案，世祖第六子名愛牙赤，此云諸王，則非皇子也。宗室世系表，幹赤斤位下有愛牙哈赤王，滅里位下亦有愛牙赤大王。

世祖紀十三

二十七年十一月，降南雄州爲保昌縣，韶州爲曲江縣。案，至元十五年，立南雄、韶州二路總管府，其時蓋以路領州，以州領縣，設官猥多，至是始省州存縣，故云降也。

二十八年正月，給諸王愛牙赤印。案，二十二年，已賜皇子愛牙赤銀印，則此給印者，別是一人也。以札散禿禿合總兵于益古之地。禿禿合，卽土土哈。

成宗紀一

至元三十年乙巳，受皇太子寶。當云，六月乙巳，有日無月，史脫文。

三十一年，封駙馬闊里吉思爲唐王。當云，高唐王，脫高字。

元貞元年十二月，賜諸王押忽禿。卽牙忽都也。

成宗紀二

二年三月，郡王慶童有疾，以其子也里不花代之。此當是兀魯兀台部之襲封郡王者，非宗王也。考此

赤台傳有慶童而無也。里不花亦不云慶童有子。紀傳互異。今無從考其是非矣。傳有匣刺不花與也。里不花音似相近。然傳以匣刺不花爲脫歡之孫。則系慶童之姪孫。非其子也。

九月令廣海左右兩江戍軍。以二年三年更戍海都兀魯思不花部。兀魯思不花者。河平王昔里吉之子。

大德二年十二月。江浙行省平章政事蒼刺罕。陞左丞相。蒼刺罕者。哈刺哈孫也。本傳大德二年。由湖廣平章政事入朝。拜江浙行省左丞相。未嘗平章江浙也。紀疑誤。

成宗紀三

五年十月丙辰朔。當是丙寅朔。

癸未。太陰犯東井。壬午。車駕還大都。壬午。當在癸未之前。

成宗紀四

七年三月。小蘭禱岳鉉等。進大一統志。小當作卜。

九月復木八刺沙平章政事。案是年二月。以平章政事行上都。畱守木八刺沙。爲中書平章政事。中間初未有罷黜之事。非此條重出。則史文有脫漏也。

九年七月。以金千兩。銀七萬五千兩。鈔十三萬錠。賜與聖太后及宿衛臣。出居懷州。與聖太后。卽武宗

仁宗母也。此時不當有太后之稱。史臣因實錄舊文，未及釐正。

十月丁丑朔。當作甲戌朔。此誤。

武宗紀一

大德五年八月，與海都戰于迭怯里古之地。牀兀兒傳作鐵堅古山。

十一年六月，進封高麗王王暉爲瀋陽王，加太子太傅駙馬都尉。案高麗傳，王暉成宗初年，尙寶塔實

憐公主。十一年，進封瀋陽王。紀嘗云封高麗王王暉之子，暉爲瀋陽王，不得云封暉也。又案朝鮮史。

忠烈王暉三十四年，王薨于神孝寺，遺教機務委付瀋陽王，則瀋陽爲暉之封明矣。

七月庚辰。案上書七月癸亥朔，庚辰爲月之十八日，不當重書七月。

御史大夫月兒魯言舊制中書省樞密院御史臺宣政院，許得自選其人，它司悉從中書銓擇。近臣不得輒奏。如此則紀綱不紊，帝嘉納之。案玉昔帖不兒世祖時爲御史大夫，賜號月呂魯那演，亦作月兒

魯，又作玉呂魯。以元貞元年卒。此又有御史大夫月兒魯不知何人，恐誤。

至大元年三月，賜定王藥木忽兒金千五百兩。案是年六月，封藥木忽兒爲定王，而三月已書定王藥

木忽兒。二年三月，封駙馬注安即尤安爲趙王。蓋由高唐王進封也。而其年九月，猶書高唐王注安。皇慶

二年正月，封乞台普濟爲安吉王。而至大三年，已書安吉王乞台普濟。至順元年三月，封王子阿刺忒

納蒼刺爲燕王。而二月已書燕王阿剌忒納蒼刺。至正二十年閏月。以甘肅行省左丞相阿吉刺爲太尉。而十三年五月十八年五月兩書太尉阿吉刺。皆史臣失於檢勘也。

武宗紀二

二年三月遼陽行省右丞洪重喜訴高麗國王王章。案王章卽王顯改名。予見趙孟頫書圓通寺碑。篆額者爲藩王王璋。卽高麗王也。元史作章。不从玉旁。誤。

六月宣政院奏免僧道也里可溫蒼失蠻租稅。案元典章有一條云。蒼失蠻迭里威失戶。若在回回寺內住坐。並無事產。合行開除外。據有營運事產戶數。依回回戶體例收差。然則蒼失蠻乃回回之修行者也。至元辨僞錄云。釋道兩路。各不相妨。今先生言道門最高。元人稱道士爲先生秀才人言儒門第一。迭屑人奉彌失訶言得生天。達失蠻叫空謝天賜與細思根本。皆難與佛齊。達失蠻卽蒼失蠻。

十二年上太祖聖武皇帝尊諡廟號。又上睿宗景襄皇帝尊諡廟號。案太祖睿宗廟號。至元三年所上。此年惟加上尊諡耳。不當云廟號也。

仁宗紀一

皇慶元年二月。賜世祖諸皇子也先鐵木兒福州路福安縣。案也先鐵木兒乃世祖子忽哥赤之子。以下文例之。當有脫文。

三年乙亥。當作己亥。

四月趙王汝安郡告饑。汝當作注。郡當作部。

二年二月壬戌。是年失書三月十一月。自二月丙申以後。皆三月事。自十月壬寅以後。皆十一月事也。

仁宗紀二

延祐二年三月。廷試進士。賜護都沓兒張起巖等五十六人及第出身。有差。案是年初行科舉。自後每科廷試。賜進士及第。皆書於本紀。惟順帝元統元年。賜同侗李齊等百人。至正十七年。賜倪徵王宗嗣等五十一人。紀皆失書。元統癸酉之春。庚申君尙未卽位。闕而不書。宜也。若至正丁酉之脫漏。史官難辭其咎矣。

泰定帝紀一

至治三年癸巳。卽皇帝位于龍居河。當云九月癸巳。有日無月者。史脫文。

泰定元年三月。冊八八罕氏爲皇后。后妃表后妃傳特辭禪傳竝作八不罕八不罕者。其名也。當書宏

吉刺氏。不當云八八罕氏。

十月乙卯。是年失書十一月。自己丑以後。皆十一月事。

二年十月戊寅朔。是年失書十一月。自戊申以後。皆十一月事。

秦定帝紀二

三年十一月庚子。前一月辛未朔。則庚子乃今月朔日也。史不書朔。脫文。又案。是年失書十二月。自丁丑以後。當屬十二月。

明宗紀

諱和世球。元典章作火失刺。

悉發關中兵。分道自潼關河中府入。案。是時仁宗在位。而周王邊興關中兵拒命。是謀反也。仁宗紀不書其事。蓋深諱之。既而西行至金山。則附於西北諸叛王矣。

秦定皇帝崩于上都。倒刺沙專權自用。踰月不立君。朝野疑懼。案。秦定以七月庚午崩。至八月甲午。燕帖木兒舉事。爲時尚未及三旬。元諸帝即位。皆俟諸王大臣畢會議之。距前君之崩。或兩月或三月初無定期。蓋其家法如是。況秦定踐阼之日。儲位早定。朝野本無異議也。燕帖木兒逆謀。早萌于秦定未崩之先。豈因踰月不立君。人心疑懼。始謀舉事乎。此皆實錄之誣詞。史臣不能刊正也。

文宗紀一

致和元年八月。河南行省殺其參政脫字臺。即脫別台也。見伯顏傳時伯顏爲河南行省平章政事。天厯元年九月乙丑。立太禧院。乙丑當作乙亥。

十一月己未。史不書朔。脫文。

文宗紀三

至順元年二月辛卯朔。案上文已書二月壬午朔。以上下月日勘校。當爲壬午朔。辛卯則月之十日也。

二月二字。當屬上文給糧賑之爲句。朔字衍文。壬午刊本
作壬申誤。

文宗紀五

放燕帖古思于高麗。豎本於燕字下。錯入順帝紀中語。凡四百言。

寧宗紀

八月甲寅。上文已書八月己酉。此又書八月。

順帝紀一

至元元年八月。詔以岐陽王完者帖木兒。岐陽當作淇陽。月亦察兒之孫。承其祖父封號。

順帝紀二

二年十二月。以甘肅行省白城子屯田之地。賜宗王喃忽里。案明史哈密傳。元末以威武王納忽里鎮之。尋改爲肅王。卒。弟安克帖木兒嗣。永樂二年。封爲忠順王。納忽里。卽喃忽里也。

順帝紀三

至正元年十二月立四川安岳縣。案安岳縣不見於地理志疑潼川府屬縣也。

二年七月庚午。以八月庚子朔推之。庚午爲是月朔日。而史失書朔。歐陽原功天馬頌云。至正二年七月十八日丁亥。二十一日庚寅。二十三日壬辰。逆計之。亦得庚午朔。

順帝紀五

十二年三月河南左丞相太不花克復南陽等處。案太不花傳是年拜河南行省平章政事。未爲左丞相也。據本紀十四年十二月以河南行省平章政事秦不花即太不花爲本省左丞相。可證十四年以前但爲平章。此稱左丞相者誤。

順帝紀六

十三年六月平章政事蒼失八都魯總四川軍。案本紀是年正月以蒼失八都魯克復襄陽樊城有功。陞四川行省右丞。明年三月始陞本省平章政事。此時不應先稱平章也。下文十二月蒼失八都魯復均房等州紀仍書右丞。不稱平章。

十四年二月立鎮江水軍萬戶府。命江浙行省右丞佛家閩領之。案是年六月紀書江浙行省參知政事佛家閩。此必由參政遷右丞者。領萬戶時未爲右丞也。紀前事而稱後官。文家往往有之。施干紀傳則儼矣。

廿二史考異卷八十八

元史三

麻志一

庚辰歲太宗西征。梅文鼎曰：元太祖以己卯歲親征西域諸國。次年庚辰夏五月駐蹕也石的石河。西域人與耶律楚材爭月蝕。而西說竝訛。故耶律作麻。託於是年。志譌爲太宗。則太宗無庚辰也。

中書令耶律楚材。案太祖時楚材未爲中書令。史因繫庚辰於太宗。故官名亦從之。

且以中元庚午歲國兵南伐。案耶律西征新術演紀上元庚午。至太祖庚辰積年二千二十七萬五千二百七十。滿一百八十去之。上元中元下元各六十并之爲百八十也。餘數七十。則庚辰爲中元之第十一年。故太祖五年爲中元庚午也。

推上元庚子歲天正十一月壬戌朔。子正冬至。日月合璧。五星聯珠。同會虛宿六度。以應太祖受命之符。

梅文鼎曰：耶律作麻。以太祖五年始絕金。次年伐之。不五年天下略定。故推演上元庚午冬至朔旦。七曜齊元。爲受命之符。謂之西征庚午元麻。西征者。謂太祖庚辰也。庚午元者。上元起算之端也。志譌

上元爲庚子。則於積年不合。

獻公十五年戊寅歲正月甲寅朔旦冬至。案魯獻公冬至見於漢書律曆志梅勿庵謂未知所據蓋偶失記耳。

曆志二

梁中大通五年癸丑四月己未朔食在丙。案梁書南史五代志俱不載此食。

三統曆積年一十四萬四千五百一十一。案三統術上元距漢太初元年一十四萬三千一百二十七

歲自太初元年丁丑至至元辛巳中積一千三百八十四并之為十四萬四千五百一十一也四分以

下積年皆準此例推衍到至元辛巳便於布算或者譏其與本志不合殆未審郭氏之旨矣。

宣明曆長慶二年壬寅徐昂造。案唐志宣明術不著撰人姓名若徐昂觀象術世已無傳且造于元和

初非長慶也其誤始于周琮而守敬因之。

奉元曆熙寧七年甲寅衛朴造積年八千三百一十八萬五千二百七十七日法二萬三千七百。案宋

志失載奉元術。

占天曆崇寧元年癸未姚舜輔造積年二千五百五十萬一千九百三十七日法二萬八千八十。案宋

志失載占天術。

成天曆咸淳七年辛未陳鼎造。案宋志成天術不載撰人姓名。

麻志五

演紀上元庚午距太宗庚辰歲。太宗當作太祖。

地理志一

霸州宋升永清郡。金置信安軍。案宋承後周之舊亦爲霸州。政和三年賜郡名曰永清。蓋宋時諸州皆有郡名以爲封爵之號。其郡名皆依唐舊。若五代及遼增置之州向無郡名。故政和中依例賜之。初非升州爲郡。且郡名之有無無關於沿革。本不必書。若有書有不書。又難免罅漏之譏矣。又考宋時以霸州淤口砦建爲信安軍。金大定中降軍爲縣。隸霸州。然則信安軍非金所置。此志之誤也。

薊州宋爲廣川郡。金爲中都。當云金屬中都路。轉寫脫譌耳。廣川郡名不必書。

豐閏下至元二年省入玉田。四年以路當衝要復置。案孫慶瑜豐閏縣記。太祖庚辰歲升豐閏爲閏州。至元初并入玉田。未及周歲縣治仍舊。志不言升州事。史之漏也。又考世祖紀。稱至元十三年薊州復置豐閏縣。今據慶瑜記。成于至元七年。其時慶瑜正爲縣令。則紀書十三年復置者誤矣。

順州宋爲順興軍。案宋志順州宣和四年賜郡名曰順興。則順興乃郡名。志作軍者誤。

檀州遼爲武威軍。宋爲鎮遠軍。案遼之武威軍爲刺史軍額。宋之鎮遠軍爲節度軍額。雖各有軍額。而州名如故也。

固安州唐爲固安縣。隸幽州。宋隸涿水郡。金隸涿州。案宋制以州領縣。遼時固安隸涿州。宣和收復之後。固安仍隸涿州。金特因宋之舊耳。但宋時諸州又有郡名。故宋志于涿州下又有賜郡名曰涿水之文。非改州名爲郡也。明初修史諸臣昧于地理。妄疑升州爲郡。故有此失。

上都路中統元年爲開平府。五年以闕庭所在。加號上都。至元二年置留守司。五年升上都路總管府。

案世祖紀升府爲上都。及升總管府。皆在中統四年五月。與志互異。

順寧府金爲宣德州。元初爲宣寧府。太宗七年。改山東路總管府。案太宗二年立十路徵收課稅使。宣

德其一路也。山東路之名。不見于紀傳。疑未可信。

仍至元三年。以地震改順寧府。案地理志闕順帝一朝之事。惟有宣德府改順寧。奉聖州改保安二條。

蔚州。武宗紀至大元年升蔚州爲蔚昌府。志失書。

興州領二縣。興安。宜興。案文宗紀致和元年八月升宜興縣爲州。卽此宜興。非常州路之宜興也。縣旣

升爲州。當改隸上都路。土俗相傳。以此爲小興州。而以興州爲大興州。故明實錄有大小興州之目。今

爲承德府地。俗名喀喇河屯者。卽興州故城也。順帝紀至元五年革興州興安縣。志亦未及。

松州。金爲松山縣。元中統三年升爲松州。案世祖紀松雲二州。竝置于中統四年五月。志于雲州亦云

四年升。則松州之升。必在四年矣。

興和路中統三年。升隆興路總管府。考本紀。至元四年。析上都隆興府。自爲一路。行總管府事。至大元年。隆興與爲源州。四年。復隆興路總管府。皇慶元年。改隆興路爲興和路。志皆闕而不書。但據志。中統三年。已升州爲路。而紀於至元四年。復有析隆興自爲一路之文。似不相照。豈此中統乃至元之誤耶。抑中間更有改隸之事。而紀失之乎。

德寧路。領縣一。德寧。案。德寧。淨州。秦寧。集寧。應昌。全寧。寧昌。七路。及砂井總管府。志皆闕其沿革。予考特薛禪傳。至元七年。幹羅陳萬戶及其妃囊加眞公主。請于朝曰。本藩所受農土。在上都東北三百里。蒼兒海子。實本藩駐夏之地。可建城邑以居。從之。遂名其城爲應昌府。二十二年。改爲應昌路。元貞元年。公主復請于帝。以應昌路東七百里駐冬之地。創建城邑。大德元年。名其城爲全寧路。則應昌全寧二路。蓋魯王分地也。仁宗紀。延祐五年。改靜安路爲德寧路。靜安縣爲德寧縣。姚燧河內李氏先德礪云。鄒王世居靜安黑水之陽。鄒王。卽趙王也。文宗紀。至順二年。趙王不魯納食邑沙淨德寧等處。蒙古部民萬六千餘戶。饑。元典章。砂井。集寧。靜州。按打堡子。四處。壬子年。元籍愛不花駙馬位下人戶。揭照元籍相同。依舊開除。然則德寧。淨州。集寧。三路及砂井府。皆趙王分地也。李禿傳。成宗封阿失爲昌王。仁宗朝。復賜以寧昌縣稅入。公主表。李花弟唆都哥。唆都哥子不憐吉歹。竝封寧昌郡王。則寧昌路。蓋昌王分地也。惟泰寧路未詳何人分地。

淨州路領縣一。天山。案。金志。淨州。大定十八年。置領天山一縣。屬西京路。元時州縣。皆仍金舊名。延祐四年。升州爲路。其沿革歷歷可考。不審志何以闕之。

秦寧路領縣一。秦寧。案。仁宗紀。延祐二年。改遼陽省秦州爲秦寧府。四年。升府爲路。仍置秦寧縣。考金志。北京路有秦州。治長春縣。其地南至懿州八百里。東至肇州三百五十里。當卽元之秦寧路也。

集寧路領縣一。集寧。案。金志。西京之撫州有集寧縣。疑卽其地。

應昌路領縣一。應昌。案。應昌府建于至元七年。廿二年升府爲路。至正初。與全寧路俱廢。撥屬魯王馬某沙王傅府。十四年復立。

全寧路領縣一。全寧。案。成宗紀。大德元年。陞全州爲全寧府。又覆載于二年蓋初立全州。尋升爲府。七年。又升府爲路也。至正初廢。十四年復立。

砂井總管府領縣一。砂井。陳旅贈砂井除判官詩序。天山之北。泉陸演迤。聯互乎大漠。趙王之封國在焉。

寧昌路領縣一。寧昌。案。仁宗紀。延祐五年。置寧昌府。英宗紀。至治二年。升寧昌府爲路。增置一縣。保定路本清苑縣。唐隸鄭州。鄭當作鄭宋升保州。金改順天軍。案。宋制。州有節度。防禦。團練。刺史。卽軍事四等。

金無團練。惟節度。防禦。刺史三等。保州在宋爲軍事。金升爲節度州。以順天爲軍額。而州名如故。非改

保州爲軍也。修史者不通官制，故涉筆便誤。

太宗十一年，升順天路置總管府。據張柔傳，升州爲府。在辛丑歲，則爲太宗十三年。博野下，至元三十一年立。案，王暉烏臺筆補，有論復立博野縣事狀，稱祁州博野縣，并入蒲陰縣。蓋元

初縣屬祁州，後并蒲陰，至元末復立也。

雄州，宋爲易陽郡，金爲永定軍。案，宋金皆爲雄州，但宋爲防禦州，金升爲節鎮，以永定爲軍額耳。宋時諸州皆有郡名，大率沿唐之舊。雄霸諸州，後周所置，向無郡名，故政和中特賜之名，非改州爲郡也。

中山府，宋爲中山郡，金爲中山府。案，宋志，政和三年，升定州爲中山府，改賜郡名曰中山。當云宋爲中山府，金因之。宋時諸州別有郡名，但爲封爵之用，無關於沿革，不足書也。

趙州，宋爲慶元軍。案，宣和元年，升趙州爲慶源府。其初雖有慶源軍節度之名，乃升刺史州爲節度州，非改州爲軍也。當云宋爲慶源府。

冀州，宋升安武軍。案，此亦升團練州爲節度州，以安武爲軍額，而冀州之名如舊，非改州爲軍也。宋時亦有以軍領縣，如太平軍、信陽軍、漣水軍、南康軍之類。此固志沿革者所必書，然其地望在州之下，故常以縣升軍，以軍升州，未有轉以州升軍者。宋志所載，由州升軍，皆謂由防團刺史升爲節度，初非廢州稱軍，而明初史臣茫然不察，殊可怪也。

蠡州唐始置宋改永寧軍金仍爲蠡州案唐無蠡州宋雍熙四年始以定州博野縣建寧邊軍景德元年改爲永寧軍金天會七年升寧州天德三年更爲蠡州前史所載甚明不知何以踳謬乃爾

磁州唐磁州宋爲滏陽郡宋亦爲磁州若郡名諸州皆有之不必書

彰德路唐相州石晉升刊本作尹誤彰德軍案升彰德軍者謂置彰德軍節度治相州也

大名路五代南漢改大名府案稱後漢爲南漢惟見於此

滑州唐改靈昌郡宋改武成軍元仍爲滑州案唐宋皆爲滑州唐改州爲郡惟天寶至德十餘載事嗣

後仍爲滑州又置義成軍節度治此宋避太宗諱改義成軍爲武成而滑州之名無改也志誤

瀋州石晉置瀋州宋爲通利軍又改平川軍金復爲瀋州案五代職方考不載石晉置瀋州事此必志

之誤也宋初升黎陽縣爲通利軍後升爲瀋州仍置平川軍節度以史例言之當云本黎陽縣宋升通

利軍又升瀋州

懷慶路元初復爲懷州太宗四年行懷孟州事憲宗六年世祖在潛邸以懷孟二州爲湯沐邑七年改懷

孟路總管府至元元年以懷孟路隸彰德路二年復以懷孟自爲一路案中統五年重立孟州三城

記稱河南甫定孟猶邊鄙版籍仍希爲懷所并蓋太宗初定中原以孟州地并於懷故有行懷孟州事

之稱曷思麥里傳云歲壬辰授懷孟州達魯花赤乙卯卒子密里吉復爲懷孟達魯花赤是其證也予

家藏中統元年祭濟瀆記碑。後列宣授懷孟州達魯花赤蜜里及里吉即密宣授懷孟州總管單澄。提領懷孟州課稅所官石伯濟名碑。立于世祖初。尙稱州而不稱路。然則憲宗之世。但置總管。未嘗改爲懷孟路也。中堂事紀中統二年。奉聖旨道與真定路宣撫司。據懷孟達魯花赤蜜里吉。總管單澄奏告。管下地分。多有屯住蒙古頭目。遇有關涉詞訟公事。不肯前來對證。往往不服句追。以致遲滯公事。准奏仰徧諭諸路宣撫司。今後各州城管民官。遇有關涉蒙古軍人公事理問時。分管軍官一員。一同聽斷施行。毋得偏向。准此。是中統以前。懷孟隸真定路宣撫司。非別立一路審矣。

孟州。宋隸河北道。案。十道之名。立於唐世。宋分天下爲十五路。後又析爲十八路。又析爲二十三路。無諸道之名也。嘗云隸京西北路。

故城謂之下孟州。新城謂之上孟州。元初。治下孟州。憲宗八年。復立上孟州。案。元初并孟州于懷。曷思麥里父子三人。相繼爲懷孟州達魯花赤。蓋中統紀元以前。孟未嘗別爲州也。考元重立孟州三城記碑。稱中統二年。欽奉聖旨。宣授孟州長官。并降到立城民戶。至中統四年二月。宣差孟州達魯花赤阿里。理任新附之民。而并治之。是孟州之設。實在中統間。志不載。并省及復置本末。可謂疏而舛矣。然史稱憲宗八年。復立上孟州者。其誤亦有因。據碑稱丁巳年。欽奉恩命。復立新孟。丁巳。卽是憲宗七年。與志復立上孟州之文頗合。而碑又云。荒殘廢邑。復見饑刑。又有儻一旦功成。改除它邑云云。言邑不言

郡。則縣而非州也。其所謂復立者。移縣治于新孟州城。非卽立爲州也。而史遂以爲州所治。不亦謬乎。衛輝路唐衛州。又爲汲郡。金改河平軍。案。宋金皆爲衛州。河平乃節度軍額。非改州爲軍也。

滄州。金升臨海軍。案。滄州自唐時爲橫海軍節度治所。宋金皆因其名。此作臨海。誤。且州有軍額。舊矣。亦非金所升也。又世祖紀。至元二十五年。以滄州之軍營城爲滄溟縣。志亦不書。

東平路。宋改東平府。隸河南道。案。宋無十道之名。當云隸京東西路。

濟寧路。按。至正八年。黃河決。遷濟寧路于濟州。自後任城。遂爲濟寧治所。

兗州。唐初爲兗州。復升泰寧軍。宋改襲慶府。金改泰定軍。案。唐時兗州爲泰寧軍節度治所。五代及宋。

竝爲兗州。而節鎮軍額。尙仍唐舊。徽宗朝。升州爲襲慶府。金仍爲兗州。惟改軍額爲泰定耳。志誤。

益都路。唐青州。又升盧龍軍。宋改鎮海軍。案。盧龍。當爲平盧之譌。宋改鎮海軍者。改其軍額。青州之名。

尙如故也。

滕州領二縣。滕縣。鄒縣。案。蘇天爵新升徐州路記。至正戊子夏六月。詔升徐州爲路。割滕。嶧。邳。宿。四州。

隸焉。遷滕之滕縣于薛城。裂滕之西南四鄉治之。東南六鄉。滕自治之。蓋滕縣本州之附郭。至正間。移。

縣治薛城。而縣與州不同治。故分縣之十鄉。半隸縣。半隸州也。

般陽府路。唐淄州。宋屬河南道。當云宋屬京東東路。宋無河南道之名也。

初太宗在瀋置新城縣。案新城縣下亦云本長山縣驛臺太宗在瀋以人民完聚創置縣曰新城以田
案二鎮屬焉而世祖紀云至元十九年并淄萊路田案二鎮仍于驛臺立新城縣治殆中廢而復置也
登州宋屬河南道。當云宋屬京東東路。

蓬萊下。案登州之蓬萊縣寧海州之牟平縣濱州之渤海縣德州之安德縣許州之長社縣陳州之宛
邱縣鈞州之陽翟縣皆倚郭也而志失書。

朔州後唐升鎮武軍。案唐置振武軍節度治朔州非始于後唐職方考亦無改名鎮武之事志誤。

忻州金隸太原府元因之。案王馨撰郝和尚碑云忻州乞忒郡王之屬城也戊子歲升爲九原府志不
載升府事史之漏也又考世祖紀至元三年以醇代堅臺四州隸忻州意其時忻州尚爲九原府故得
有屬州也。

保德州舊有倚郭縣元憲宗七年廢縣。案倚郭縣史失其名以金志考之蓋保德縣也又成宗紀大德
元年以隴州巡檢司爲河曲縣隸保德州志亦失書。

河中府宋爲護國軍金復爲河中府。案宋仍唐舊亦爲河中府護國軍乃節度軍額然不始於宋也金
爲河中府亦未廢護國軍節度之額史家失于稽考故語多牴牾。

潞州宋改隆德軍。當云隆德府。

澤州。宋屬河東道。當云河東路。

解州。宋屬京兆府。金升寶昌軍。府下當有路字。京兆府路。卽永興軍路也。寶昌軍。亦節鎮之額。

地理志二

遼陽路。梁貞明中。阿保機以遼陽故城爲東平郡。後唐升爲南京。石晉改爲東京。案。遼史。天顯三年。升南京。十三年。改東京。以時考之。在後唐石晉之世。然是契丹升之改之。非晉唐升之改之也。卽欲繫以五代。亦當云後唐時契丹升爲南京。石晉時契丹改爲東京。不得如史所云。

以廣寧府。婆娑府。懿州。蓋州作四路。婆娑府。金之婆速府路也。

懿州。初爲懿州路。至元六年。爲東京支郡。案。順帝紀。至正二年。升懿州爲路。以大寧路所轄興中義州

屬懿州。

廣寧府路。元封孛魯古歹爲廣寧王。卽別里古台。

肇州。案。金志。上京路有肇州。舊出河店也。天會八年。以太祖兵勝遼。肇基王績。于此遂建爲州。領始興

一縣。有鴨子河。黑龍江。元時立肇州屯田。蓋因金之故名。

瀋陽路。契丹爲興遼軍。金爲昭德軍。又更顯德軍。案。遼志。瀋州。太宗置興遼軍。後更名昭德。金史亦爲

瀋州昭德軍。無更名顯德軍之事。

咸平府。遼號咸州安東軍。領縣曰咸平。金升咸平府。領平郭、安東、新興、慶雲、清安、歸仁六縣。案。金志。咸平府領縣八。有銅山、榮安、玉山。而無安東。

合蘭府。水達達等路。合蘭府。即金之合懶路。

汴梁路。唐置汴州總管府。石晉為開封府。案。唐無總管府之名。朱梁受唐禪。升汴州為開封府。建為東

都。非始于石晉也。志皆誤。

鄭州。宋為奉寧軍。奉寧軍亦節鎮之名。非改州為軍也。

許州。金改武昌軍。案。許州自唐為忠武軍節度治所。宋金皆為節度州。金惟改軍額為昌武。而許州之

名仍舊。非改府為軍也。武昌。當為昌武。

鈞州。偽齊置穎順軍。金改順州。又改鈞州。案。金志。鈞州舊陽翟縣。偽齊升為穎順軍。大定二十二年。升

為州。仍名穎順。二十四年。更今名。然則金升軍為州之初。本名穎順州。非順州也。

陝州。宋為保義軍。案。陝州。唐末置保義軍節度治。此宋避太宗名。改軍名曰保平。而陝州之名仍舊。志

云。宋為保義軍者。誤也。

嵩州。唐為陸渾。伊闕二縣。宋升順州。金改嵩州。領伊陽、福昌二縣。案。宋志無順州之名。金志但云。舊名

順州。不言何代所置。此以為宋升順州。未審何據。又考金志。嵩州領伊陽、永寧、福昌、長水四縣。此云領

伊陽、福昌二縣亦誤。

光州宋升光山軍。謂升光州爲節度州。以光山爲軍額也。

歸德府後唐爲歸德軍。宋升爲南京。案後唐置歸德軍節度。治宋州。宋時升州爲應天府。建爲南京。志不云升應天府者。史之漏也。

徐州。至元二年。例降爲下州。案至正八年。升徐州爲路。附郭置彭城縣。以邳、宿、滕、嶧四州隸之。十三年。降爲武安州。以所隸縣屬歸德府。其滕、嶧二州。仍屬益都路。

宿州。唐置。宋升保靜軍。案宿州升保靜軍。亳州升集慶軍。均州爲武當軍。房州置保康軍。皆節度軍額。其州名初未改也。

均州領二縣。武當、鄖縣。案世祖紀。至元十四年。均州復立南漳縣。此志南漳屬襄陽路。無改隸均州事。房州。宋置保寧軍。保寧當作保康。

蘄州路。案世祖紀。至元二十五年。以蘄黃二州隸湖廣省。志于蘄州黃州兩州。俱不書隸湖廣事。亦脫漏也。


和州。宋隸淮南西道。當云淮南西路。

通州。宋改靜海郡。案宋時諸州皆有郡名。大率沿唐之舊。志皆不載。惟通州五代所置。向無郡名。政和

末始賜名靜海。史家遂誤切改州爲郡矣。

德安府。案世祖紀。至元三十年。改德安府。隸黃州路。志失書。

隨州。宋爲崇信軍。又爲棗陽軍。後因兵亂。遷徙無常。案宋初。升隨州爲節鎮。崇信。其軍額也。棗陽軍之置。不見于宋志。當是南宋末季。權升棗陽縣爲軍。寄治于此。與崇信軍名同而實異也。



廿二史考異卷八十九

元史四

地理志三

奉元路。唐初爲雍州。後改關內道。案。唐太宗分天下爲十道。非改州爲道也。當云屬關內道。

華州。唐改鎮國軍。宋改鎮潼軍。金改金安軍。案。華州本唐所置。而宋金元因之。鎮國、鎮潼、金安、皆節度軍額。非改州爲軍也。若依它州之例。當云唐初爲華州。又改華陰郡。又復爲華州。乃爲得之。又案。同州。宋爲定國軍。耀州。宋爲威義軍。又改威德軍。皆節度之額也。京兆府。在宋亦有永興軍節度之名。延安府。在宋亦有彰武軍節度之名。何以獨不書乎。總之軍監之軍名當書。而節度之軍額不必書。史家于前代掌故。全未究心。而妄操筆削。毋怪乎紕繆百出也。

延安路。宋爲延安府。金爲鄜延路。案。宋時延州置鄜延路安撫使。以守臣領之。後升州爲府。而安撫司猶仍其舊。金因宋制。亦爲延安府。仍立鄜延路于此。初非改府爲路也。志誤。

葭州。唐銀州。宋爲晉寧軍。案。宋志。晉寧軍本西界葭蘆。元符二年。爲軍。知軍領嵐石路沿邊安撫使。其地屬河東路。又別有銀州。隸鄜延路。此志以晉寧軍卽唐銀州。未詳其審。

洋州唐改洋川郡

刊本川作州誤

又復爲洋州後更革不常宋復爲洋州

案唐五代及宋洋州之名未改惟唐

未嘗置武定軍節度於此宋更軍額曰武康爾志云更革不常誤矣

平涼府唐爲馬監隸原州宋爲涇原路升平涼軍案宋爲渭州本刺史州後升爲節度州以平涼爲軍

額置涇原路安撫使以守臣兼領志不言渭州而言升平涼軍竟似升路爲軍謬之甚矣且路非一州之名舍州府而言路於義旣乖又宋時陝西有六路安撫司志但舉涇原環慶而于熙河鄜延秦鳳諸路仍又遺之尤爲進退失據也

慶陽府唐慶州宋環慶路改慶陽軍又升府金爲慶源路案宋亦爲慶州其云慶陽軍者節度使額也

宣和始升慶陽府未幾入于金仍爲慶陽府置陝西路治焉後又改陝西路爲慶源路而府名如

故志云金爲慶源路其誤與鄜延同原誤爲源則刊本之失也

秦州唐初爲秦州宋爲天水郡案宋亦爲秦州郡名諸州皆有之不必書

隴州領縣二汧源汧陽案仁宗紀延祐四年并汧源縣入隴州志失書

定西州案順帝紀至正十二年以地震改定西爲安定州

會州案至正十二年以地震改會州爲會寧州即今會寧縣

禮店文州蒙古漢兒軍民元帥府案大德十一年以禮店蒙古萬戶屬土蕃宣慰司非使命仍舊隸脫

思麻宣慰司防守陝州。

崇慶州。宋爲崇慶軍。案。宋初亦爲蜀州。紹興十年。升節鎮。以崇慶爲軍額。淳熙四年。升爲崇慶府。當云宋爲崇慶府。不當云軍也。

保寧府。後唐爲保寧軍。案。保寧亦節度軍額。宋初改軍額曰安德。而閩州之名。初未改也。

劍州。宋升普安軍。普安。亦節度軍額。當云宋升隆慶府。

巴州。宋領化城。難江。恩陽。宋志。恩作恩。曾口。上通江。下通江。六縣。案。宋志。巴州領五縣。通江初無上下之名。

疑元初所分也。

沔州。唐爲興州。宋改沔州。元至元十四年。隸廣元路。二十年廢。襄州止設鐸水縣。遷沔州而治焉。案。元

大一統志。鐸水縣。本西縣舊鎮也。戊午年。始以其地升爲襄州。改鎮爲縣。至元二十年。廢襄州。移沔州

來治。志失書。元初置襄州及鐸水縣事。

順慶路。唐爲南充郡。又改梁州。又改充州。梁。當爲果字之譌。唐初置果州。天寶初。改南充郡。乾元初。復

爲果州。大厯六年。更名充州。十年。復故名。唐時充州改名。僅四五年。志沿革者。本可略而不書。今既書

改名。而不書復舊。似唐五代及宋初。常爲充州矣。豈其然乎。

渠州領二縣。流江。大竹。案。世祖紀。至元二十六年。省流江縣入渠州。志失書。

潼川府。宋改靜戎軍。又改安靜軍。安靜。宋志作靜安。此所改者。皆節度軍額。然梓州舊爲劍南東川節度治所。何以不書劍南東川之名乎。

永寧路。案。世祖紀。至元二十五年。改西南番總管府爲永寧路。又重見于二十七年。

重慶路領縣三。巴縣。江津。南川。案。順帝至元四年。立重慶路。墊江縣。

瀘州。宋爲瀘川軍。瀘川。亦節度軍額。

定遠。下。本宋地名。女善平。元至元四年。便宜都總帥部兵。創爲武勝軍。後爲定遠州。二十四年降爲縣。

案。世祖紀。至元四年。汪良臣請立寨母章德山。以當釣魚之衝。五年。改母章德山爲定遠城。武羣山爲

武勝軍。即此事。而地名小異。

懷德府領州四。案。文宗紀。至順二年。四川行省招諭懷德府。驢谷。什用等四洞。及生蠻十二洞。皆內

附。詔升懷德府爲宣撫司。以鎮之。

夔路。當云夔州路。脫州字。

萬州。宋爲浦州。元至元二十年。以南浦爲萬州。案。宋志。萬州領南浦。武寧二縣。初無浦州之名。此誤。

新容米洞。案。順帝紀。至正十年。立四川容美洞軍民總管府。疑卽容米洞也。

永昌路。宋初爲西涼府。景德中。陷入西夏。案。宋史吐蕃傳。乾德四年。有知西涼府折逋葛支。至道二年。

有西涼府押蕃落副使折通喻龍波。蓋羈糜之府。以蠻夷酋長領之。

至元十五年。以永昌王宮殿所在。立永昌路。案。世祖紀。至元九年十一月。諸王只必帖木兒築新城成。賜名永昌府。永昌王。即只必帖木兒也。諸王表無永昌王之名。蓋當時以地名稱之。未有賜印。

沙州路。元太祖二十二年破其城。以隸八都大王。案。八都。即拔都。太祖長子朮赤之子也。

山丹州。元初爲阿只吉大王分地。察合台太子之子。

西寧州。元初爲章吉駙馬分地。案。公主表。韃國大長公主忙哥吉。適愛不哥子寧濮郡王昌吉。即章吉也。

地理志四

雲遠路軍民總管府。元貞二年置。案。成宗紀。元貞二年。雲南省臣也先不花。征乞藍拔瓦農開陽二寨。其黨蒼刺率諸蠻來降。乞藍悉平。以其地爲雲遠路軍民總管府。

北勝府。在麗江之東。至元十五年。立爲施州。十七年。改爲北勝州。二十年。升爲府。案。世祖紀。至元二十五年。雲南省言。金沙。江西。通安等五城。宜依舊隸察罕章宜撫司。金沙。江東。永寧等處五城。宜廢。以

北勝施州爲北勝府。從之。

滇蕩州。至元九年內附。十六年。改羅其睽爲滇蕩州。案。世祖紀。至元十六年。改雲南寶山。葭蕩二縣爲

州。據志寶山縣立于至元十四年。則蕘蕘縣亦當同時立也。

霑益州領三縣。案順帝紀。至元元年。以霑益州所轄羅山、石梁、交水三縣。併歸巡檢司。

石梁。下。至元十三年爲縣。案世祖紀。至元二十四年。復雲南石梁縣。蓋十三年置縣之後。尋卽併省也。

羅羅蒙慶等處宣慰司都元帥府。案順帝紀。至正二年。罷雲南蒙慶宣慰司。

烏撒烏蒙宣慰司。案順帝紀。至元元年。詔以烏撒烏蒙之地。隸四川行省。

地理志五

嘉興路。石晉置秀州。宋爲嘉禾郡。案秀州。吳越王錢元瓘置。宋亦爲秀州。兼立嘉禾郡名。非改州爲郡也。

昆山州。元元貞元年升州。案皇慶二年十月。徙州治太倉。卽今太倉州也。至正十七年。復故治。志皆失書。

建德路。唐睦州。又爲嚴州。又改新定郡。宋爲建德軍。又爲遂安軍。案唐時爲睦州。天寶初爲新定郡。乾

元初仍爲睦州。宋初亦爲睦州。宣和中。平方臘之亂。始改睦爲嚴。志云。唐爲嚴州。誤之甚矣。建德、遂安。皆節鎮軍額。

江陰州。至元十四年。升爲江陰路總管府。今降爲江陰州。案世祖紀。至元二十八年。降江陰路爲州。隸

常州路志不繫之常州路，而與松江府竝列在直隸行省之數，未審何時改隸也。

婺州路，宋爲保寧軍，保寧亦節鎮軍額。

台州路，唐改爲台州，又改臨海郡，又爲德化軍，宋因之。案，宋因唐制，仍爲台州，何嘗有德化軍之名乎。

唐宋時台州皆不建節度，志云唐爲德化軍，真無稽之談矣。考宋史吳越世家，錢惟治爲德化軍使，遷

檢校太保台州團練使，或吳越有國時，台州有德化軍之稱，因誤以爲唐制乎。

徽州路錄事司，案，世祖紀，至元二十九年，罷徽州路錄事司。

饒州路，案，世祖紀，至元十九年，以袁州、饒州與國軍，復隸隆興省，志惟袁州一路隸江西行省，而饒州

隸江浙省，與國軍隸湖廣省，與國之改隸，志有明文。在至元三十年而饒州則無之，蓋史家于前後沿革，多未

該備也。

集慶路，宋仁宗以昇王建國，升建康軍，案，仁宗卽位，升昇州爲江寧府，建康軍者，節鎮軍額也，當云升

江寧府。

溧陽州，至元十六年，升爲溧陽路，二十七年，復降爲縣，後復升爲州，案，金陵新志，至元十四年，改溧州，

十五年，升溧陽府，十六年，改溧陽路，領溧陽縣，并在城錄事司，廿八年，革去路名，止存溧陽縣，元貞元

年，改升中州，志所載殊未備。

福州路。唐改福州。又爲長樂郡。又爲威武軍。宋爲福建路。案。宋亦爲福州。以威武軍爲節鎮之額。與唐制同。又設福建路轉運司。駐節于此。每路領數州或十數州。與元之路名同而實殊。

福寧州。唐長溪縣。元升爲福寧州。案。世祖紀。升州在至元二十三年。建寧路。宋升建寧軍。當云升建寧府。

泉州路。宋爲平海軍。平海。節度軍額也。與興化。邵武軍名各別。

延平路。至元十五年。升南劍路。後改延平路。案。仁宗紀。延祐元年。改南劍路曰延平。劍浦縣曰南平。志失書其年。而南平之卽劍浦。亦失考。

寧州。元至元二十三年。于武寧縣置寧州。分寧爲倚郭縣。案。大德八年。分寧始爲倚郭縣。至元置州之始。武寧爲倚郭。非分寧也。

江州路。宋爲定海軍。定海。當作定江。亦節鎮軍額。非改江州爲軍也。

韶州路。曲江。中。案。仁宗紀。延祐五年。併翁源縣入曲江縣。志以翁源爲英德所領之縣。與紀異。翁源。本唐宋舊縣。而志云大德五年置。殆廢于至元之世乎。

惠州。唐循州。宋改惠州。又改博羅郡。又復爲惠州。案。宋無改州爲郡之事。蓋因宋志有賜郡名曰博羅之文。而妄爲之說也。宋時諸州皆有郡名。大率沿唐之舊。惟惠州南漢所置。本析循州之地。循有郡名。

而惠無郡名。故宣和中特賜之。初非改州爲郡。史家不學。故涉筆多誤。

英德州。案仁宗紀。延祐元年。廢眞陽。含光二縣入英德州。志失書。

梅州。至元十六年。置總管府。二十三年。改爲散州。案仁宗紀。延祐四年。改潮州路。所統梅州。隸廣東道。

宣慰司。蓋初改散州。本隸潮州路。後乃直隸宣慰司也。

桂陽州。爲蒙古斛忽都虎郡王分地。案食貨志。愷里荅兒薛禪。至元十八年。分撥桂陽州二萬一千戶。

愷里荅兒。卽畏荅兒。本忙兀氏。志所謂蒙古斛也。忽都虎。蓋畏荅兒之後。襲封郡王者。世祖初定江南。

凡后妃宗王駙馬勳臣。各有分戶。具載食貨志歲賜篇。所謂江南戶鈔也。志皆不載。獨載忽都虎一人。

此又義例之失當也。

連州。元至元十七年。升爲連州路總管府。十九年。降爲散州。案成宗紀。元貞元年。降連州路爲連州。與

志異。

循州。唐改爲海豐郡。仍改循州。宋爲博羅郡。案宋時循州。郡名海豐。蓋因唐之舊。博羅。則惠州郡名也。

惠雖循之故地。然疆界旣分。豈可混而爲一。

地理志六

武昌路。唐初爲鄂州。又改江夏郡。又升武昌軍。宋爲荆湖北路。案唐時鄂州爲武昌軍節度治所。宋立

荆湖北路轉運司治鄂州。州名與節鎮軍額初無改也。宋時十八路二十三路之名皆據轉運司所轄言之。非專指一州。志沿革者本可不書。且如江南東路之治建康。江南西路之治隆興。兩浙西路之治平江。兩浙東路之治紹興。此類志皆不書。則湖北路福建路何以特書乎。

岳州。宋爲岳陽軍。岳陽亦節度軍額。

天臨路。唐爲潭州。長沙郡。宋爲湖南安撫司。案。宋時潭州守臣例帶湖南路安撫使。猶鄂州守臣例帶

湖北路安撫使。非改州爲司也。安撫司例不書。

衡州路領縣三。衡陽、安仁、酃縣。案。順帝至元二年分衡州路衡陽縣立新城縣。

郴陽倚郭。舊爲敦化縣。至元十三年改今名。案。宋時郴州倚郭爲郴縣。敦字犯宋廟諱。敦化之名必非

宋所立。至元十三年湖南始入版圖。何以又有舊名。殊可疑也。

桂陽路。唐郴州。當云唐郴州地。

耒陽州。唐宋皆爲郡。隸湘東郡。當云隸衡州。衡州郡名。衡陽非湘東也。

靜江路。宋仍爲靜江軍。當云宋升靜江府。

慶遠南丹溪洞等處軍民安撫司。唐爲龍水郡。又改粵州。粵州當作宜州。唐雖有粵州之名。乃在改郡

名以前。自唐至宋常爲宜州。宋末乃升府耳。

平樂府。元改爲平樂府。案。成宗紀。大德五年。升昭州爲平樂府。是元始得江南。尙稱昭州也。
容州。宋爲寧遠軍。寧遠亦節度軍額。

至元十六年。改容州路總管府。案。成宗紀。大德五年。降容象橫賓路爲州。志于此四州。皆失書降州事。
融州。宋爲清遠軍。清遠亦節度軍額。

乾寧軍民安撫司。案。順帝元統二年。改乾寧軍民安撫司曰乾寧安撫司。
會同。下定安。下。案。宋志。無此二縣。世祖紀。至元二十九年。敕以海南新附四州洞寨五百一十九。民二

萬餘戶。置會同。定安二縣。隸瓊州。又文宗紀。天厯二年。升定安縣爲南康州。隸海北元帥府。志亦失書。
播州軍民安撫司。案。世祖紀。至元十五年。從播州安撫楊邦憲請。以鼎山仍隸播州。十六年。改播州鼎

山縣爲播州縣。二十六年。改播州爲播南路。此皆當見于志。而志失之。

西北地附錄。案。元時西北塞外。皆爲諸王分地。不立州縣。有牙帳而無城郭。志所錄諸地名。分爲三列。
一曰篤來帖木兒。一曰月祖伯。一曰不賽因。皆不著其說。考秦定紀內。有云西域諸王不賽因部。又云
北邊諸王月即別。文宗紀。至順元年。遣諸王桑哥班等。分使西北諸王燕只吉台。不賽因。月即別等所。
其云月即別者。即志之月祖伯也。月祖伯分地在北方。不賽因分地在西域。惟篤來帖木兒一人。不見
於史。考文宗紀。至順二年。西域諸王秃列帖木兒。遣使獻西馬及蒲萄酒。當即其人。其分地亦在西域。

也。

廿二史考異

卷八十九

一四六六

廿二史考異卷九十

元史五

河渠志一

兗州插已見前。案兗州插之名，雖見于會通河條，初不載興工年月及修廣丈尺，不得云已見前也。此條據馬之貞申文，亦但有合用材物，已行措置完備，乞移文江淮漕司修治語，究未詳何時興建。

河渠志二

至元十七年七月，耿參政阿里尙書奏。耿參政者，耿仁也。敘事之文，例當書名，此志耿參政、劉都水、王承德、郭嘉議、李承事、張奉政、董中奉、任奉政、毛中議、王徵事、高朝列、丁將仕、史參政等，或書階，或書官，皆當時案牘之文，而史家承之，祭祀志有田司徒、郝參政、食貨志有何主簿、裴縣尹、耿左丞，亦其類也。中書丞相魯火孫，卽和禮霍孫。

姚總管等言，姚總管卽姚演也。

范殿帥朱張輩，必知其故。朱、張當謂朱清、張瑄二人也。下文直云朱張言，似誤以爲一人。

禮樂志三

東平萬戶嚴光範。當作忠範。

太常集禮曰。樂章。據孔思逮錄之國朝樂章。皆用成字。凡用寧字者。金曲也。案宋樂章用安字。金用寧字。元用成字。志載至大二年。親饗太廟。文舞退。武舞進。仍用舊曲。改名肅寧。注云。舊名和成。亞終獻酌獻。仍用舊曲。改名肅寧。注云。舊名順成。徹豆曰豐寧之曲。注云。舊名豐成。然則至元四年。已改和成順成。豐成之名。而至大中。反改從金。舊名。揆之情理。當不其然。此必承孔思逮本之誤也。考弟三卷。載至大樂章云。文舞退。武舞進。奏肅成之曲。亞終獻行禮。宮縣奏肅成之曲。注云。孔本作肅寧。知思逮誤以肅成爲肅寧。又考祭祀志所載。親祀時享儀。卽至大二年所定。其文云。諸太祝進徹籩豆。登歌。豐成之樂作。知徹豆之奏。豐寧。亦應作成字矣。大約思逮所錄。乃國初之舊曲。史家誤以爲至大所定樂章耳。弟四卷載。泰定十室樂舞云。亞獻終獻。武舞肅寧之曲。祭祀志親謝儀。太尉詣盥洗位。宮縣樂作肅寧之曲。此類皆沿孔本之謬。

禮樂志三

至元四年至十七年。入室樂章。迎神奏來成之曲。案志弟一卷總序篇云。至元三年。初用宮縣。登歌樂。文武二舞于太廟。烈祖至憲宗入室。皆有樂章。弟二卷制樂始末篇云。至元三年冬十有一月。有事於太廟。宮縣。登歌樂。文武二舞成備。其迎送神曲。曰來成之曲云云。弟四卷宗廟樂舞篇亦云。至元三年。

入室時享文舞降神來成之曲云云。是入室樂章。定於至元三年也。而此卷云至元四年。又親祀禘祫樂章內。皇帝詣盥洗。奏順成之曲。迎神。奏思成之曲。司徒捧俎。奏嘉成之曲。文舞退。武舞進。奏肅成之曲。亞終獻。奏肅成之曲。俱注云。至元四年詞律同。又至大以後。親祀攝樂章內。皇帝盥洗。奏順成之曲。迎神。奏思成之曲。初獻升殿。奏肅寧之曲。司徒捧俎。奏嘉成之曲。太祖室。奏開成之曲。睿宗室。奏武成之曲。文舞退。武舞進。奏肅成之曲。亞終獻。行禮。奏肅成之曲。徹籩豆。奏豐寧之曲。送神。奏保成之曲。注俱有至元四年字。似樂章定於至元四年。蓋一志之中。前後舛錯如此。

親祀禘祫樂章。未詳年月。太常集禮云。別本所錄。以時考之。疑至元三年以前擬用。案。至元以前。未行親祀太廟之禮。禘祫。則終元之代。初未舉行。此樂章不審何人所製。擬而未用。於例不當書。

皇帝出入小次。奏昌寧之曲。太常集禮云。此金曲。思逮取之。案。金史禮志。載此曲詞句多同。惟肅肅來止。作有來肅肅。威儀孔彰。作禮儀。卒度神之休之。作孔時孔惠。元代樂曲。例用成字。此采金曲。故仍用寧字也。元初祭太廟。皆有司攝事。至大始行親享之禮。臨時不及更造新曲。權用金舊。亦有司之失也。宣聖樂章。案。志載祀先聖樂章。前十六章。則釋奠所用也。後十一章。則擬撰而未及用者也。前十六章。其十四章。全用宋時大晟樂府擬撰之詞。惟邨國公。沂國公酌獻二章。宋大晟本無之。後十一章。九章存而二章亡。所亡者卽邨沂二公酌獻之詞。何以增於前而缺於後也。蓋顏曾思孟竝配。始於宋度宗。

咸淳三年當大晟擬撰時。邨沂二公尙未入配位。故無其樂章。元旣襲而用之。則少此二配樂章。不得不增入以充其數。因于擬撰十一章之內。取而用之。夫是以前之所增。卽後之所缺也。又考元初宣聖配享。止有顏孟二人。本沿金制。而金又本宋政和儀。故卽用宋樂章十四曲。至延祐三年。始增子思孟子二位。則此十六章。亦延祐所定也。

祭祀志一

世祖中統二年。親征北方。案。中統紀元。止于四年。志于此條下。書十二年十三年三十一年。皆改元至元以後事也。當于十二年之上。增至元兩字。

尙書太尉右丞相。太保左丞相。田司徒。耿參政等。右丞相者。乞台普濟。左丞相者。脫虎脫。田司徒者。忠良也。郝參政者。彬也。

祭祀志三

世祖元年秋七月丁丑。世祖下脫中統二字。

皇帝還大次。宮縣昌寧之樂作。案禮儀志。皇帝出廟廷。奏昌寧之曲。卽此所云還大次也。上文云課訖。禮儀使奏請還小次。皇帝行。宮縣樂作。入小次。樂止。又禮儀使奏請詣盥洗位。出次。宮縣樂作。至盥洗位。樂止。又飲福訖。禮儀使奏請還小次。宮縣樂作。入小次。樂止。又徹豆訖。禮儀使奏請詣版位。出次。宮

縣樂作。至位樂止。此四次宮縣樂。卽禮儀志所云。皇帝出入大次。奏昌寧之曲也。志或書曲名。或不書。於例殊未盡一。

祭祀志五

至大元年秋七月。詔加號先聖曰大成至聖文宣王。案成宗紀。在大德十一年七月。志誤。

皇慶二年六月。以許衡從祀。案皇慶紀元在延祐之前。此志先敘延祐三年。以顏曾四子配享事。繼以皇慶二年云。前後倒置。

詣兗國公神位前。至位。曰東向立。點視畢。曰詣鄒國公神位前。案元初祀宣聖用金制。惟兗公鄒公配享。延祐三年始依南宋儀。增入邲沂二公配享。此志所述釋奠儀。止有兗鄒二公。蓋延祐以前所定。

祭祀志六

至正親祀南郊。案順帝再舉親郊之禮。志止載至正三年十月。而不及十五年十一月。未免闕漏。

樞密知院阿魯忒。卽阿魯圖。

至正親祀太廟。案順帝紀。至正十六年正月戊子。親享太廟。志亦失書。

三皇廟樂章前卷。祀社稷樂章。俱在禮樂類中。今附于此。案元史纂修。始于洪武二年二月丙寅開局。至八月癸酉告成。計一百八十八日。本紀三十七。志五十三。表六。傳六十三。目錄二。爲卷百六十一。而

順帝一朝之事缺焉。次年二月乙丑，再開局。七月丁亥書成，計百四十三日，續成本紀十志五表二傳三十六。而前書所未備者，頗補完之。既又合前後二書釐分而附麗之，共成二百一十卷，卽國子監刊行本也。志之續者，惟五行、河渠、祭祀、百官、食貨、表之續者，惟三公宰相，餘俱闕之。前後史官既非一手，體例又不畫一，附樂章于祭祀，附選舉于百官，皆因經進之舊，不知釐正。地理志惟增入二條，禮樂兵刑諸篇，全無增益。列傳如魯昌、趙高、昌諸王，及釋老、外國諸篇，皆闕順帝一朝之事，因陋就簡，不詳不備。宋景濂、王子充二公，可謂素餐而失職矣。

夫人戴氏，竟國夫人，諡貞素。案石刻詔書作宋戴氏，此脫宋字。

宋五賢從祀。案此條文義，杭州路提控案牘胡瑜之牒，本謂楊時、李侗、胡安國、蔡沈、真德秀五人，俱應追錫名爵，從祀先聖廟廷。及中書省奏准，送禮部定議。五先生封號，各給詞頭，宣命遣官齋往福建，訪問各人子孫，給付如無子孫者，于其所居鄉里郡縣學，或書院祠堂之內安置，而從祀孔廟之請，當時固未之行也。明正統二年，始進胡安國、蔡沈、真德秀、弘治八年，進楊時。萬曆四十一年，進李侗、五先生從祀。蓋定于明代。元時初未預從祀之列，志乃以五賢從祀爲標目，疏矣。

輿服志一

天子之質孫，質孫亦作只孫。

命中書省。定立服色等第于后。案服色等第一條。一見于輿服志。再見于刑法志。重複二十餘行。入粟補官一條。一見于選舉志。再見于食貨志。重複三四十行。國子監黜罰科條一條。一見于選舉志。再見于刑法志。重複七八行。

選舉志一

得東平楊英等。英當作奐。

蒙古色目人。第一場經問五條。大學論語孟子中庸內設問。用朱氏章句集注。案四書取士。昉於元代。設科之始。本以四書文少。便於記誦。故令蒙古色目人習之。漢人南人。則四書之外。仍各占一經。經疑二問。於四書出題。限三百字以上。經義一道。限五百字以上。蓋經義難通。四書易解。右榜第一場四書。先於五經者。先易而後難。初非重四書而輕五經也。劉基登元統元年進士。檢其文集。有春秋經義若干篇。而經疑不及焉。則元人之重五經可知矣。明初襲用元制。鄉會試題。四書在五經之前。由是士子應試。專以揣摩四書文爲事。經義徒有其名爾。

賜護都荅兒張起巖等。仁宗紀。作護都荅兒。

廷試進士護都達兒霍希賢等。仁宗紀。作忽都達兒。

廷試進士達普化宋本等。英宗紀。作泰普化。卽泰不華也。石刻或作泰普華。

廷試進士捌刺張益等八十有六人。秦定紀作八刺六紀作四。

廷試進士阿察赤李黼等八十有六人。秦定紀八十五人。

元統癸酉科廷試進士同李齊等復增名額以及百人之數。案是春順帝尙未卽位故本紀不載廷

試賜第事。

凡師儒之命於朝廷者曰教授。路府上中州置之。命於禮部及行省及宣慰司者曰學正。山長。學錄。教諭。

路州縣及書院置之。路設教授。學正。學錄。各一員。散府上中州設教授一員。下州設學正一員。縣設教

諭一員。書院設山長一員。中原州縣學正。山長。學錄。教諭。竝受禮部付身。各省所屬州縣學正。山長。學

錄。教諭。竝受行省及宣慰司劄付。此段一百三十一字。依史通點煩之例。可去者五十七字。上文有

命于禮部及行省云云。則自中原州縣以下四十二字可省矣。下文有路設教授云云。則路府上中州

置之兩句可省矣。又考儒學設官之制。已載百官志。則此段百三十餘言。以史例言之。皆可省也。

百官志一

三汭沽場。改監本蘆臺場。越支場。刊本作石碑場。濟民場。惠民場。元典章。惠民等六場。隸大都運司。大

德七年三月。併入河間運司。

山東東路轉運鹽使司鹽場一十九所。案元典章。山東鹽運司濱鹽司七處。永利。寧海。永阜。豐國。富國。

豐民、利國、樂鹽司五處。官臺、高家港、新鎮、王家岡、箇堤、志作固堤膠萊鹽司八處。西由海滄、登寧、行村、信陽、卽墨、石河、濤洛、凡鹽場二十所。此志無卽墨場。

至元八年立玉宸院。二十年改置儀鳳司。案世祖紀中統元年立仙音院。復改爲玉宸院。括樂工立儀鳳司。是儀鳳與玉宸非一司。與志互異。

百官志四

管領諸路打捕鷹房民匠等戶總管府。大德三年始置。元貞元年撥隸中宮位下。案大德紀年在元貞之後。前後倒置。

管領諸路打捕鷹房民匠等戶總管府。此總管府及所領四提舉司十一提領所。俱與前一條無別。雖繁簡不同。其實重出也。

百官志六

中統四年設羣牧所。案世祖紀在元年。

百官志七

至元二十二年以福建行省併入江西。二十三年又以福建省併入江浙。案成宗紀大德元年二月。以福建省爲福建平海等處行中書省。徙治泉州。是成宗時福建省尙未裁併。與志互異。

至元二十三年，四川立行樞密院。據下文，當云行中書省。

宣慰司掌軍民之務。案世祖紀，中統三年，立諸路宣慰司，以真定路達魯花赤趙瑄等爲之。

宣慰使司凡六道：山東、東西道，河東、山西道，淮東道，浙東道，荆湖北道，湖南道。案地理志，浙東道宣慰

司都元帥府，治慶元路，則浙東道宣慰司，亦兼都元帥府矣。

元帥府：李店、文州、帖城、河里、洋脫、朶甘思、當陽、岷州、積石州、洮州路、脫思馬路、十八族。案宣政院所屬，

惟洮州十八族、積石州、禮店、文州。即李店稱元帥府。朶甘思稱都元帥府。脫思麻路。即脫思馬路則稱軍民萬戶

府，而屬于吐蕃都元帥常陽。即當陽帖城、阿不籠等處，合爲一萬戶府，而屬于吐蕃招討司。岷州但有捕

盜官，俱無元帥府之名。

安撫司秩正三品。案宣政院所屬，又有松潘、客壘、威、茂州等處軍民安撫使司，碉門、魚通、黎、雅、長、河、西、

寧遠等處軍民安撫使司。

百官志八

中書省奏，闕端阿哈所分地方，接連西番，自脫脫木兒既沒之後，無人承嗣。阿哈，蒙古言兄也。永昌，本

闕端太子分地。據宗室世系表，闕端太子位下無脫脫木兒名。諸王表有荊王脫脫木兒，則睿宗子歲

都哥之後也，未審卽其人否。

食貨志三

太宗子定宗位。案至元十八年分賜宗王江南戶鈔。惟定宗位及滅里大王合失大王闊出太子憲宗子阿速台大王睿宗子旭烈大王歲哥都大王位下不得與考其時海都阻兵即合失之子其餘諸王必與海都同謀故歲賜不及之。

右手萬戶三投下孛羅台萬戶。孛羅台博兒朮之子也。孛羅台與忒木台駙馬幹闊烈闐里必三人所謂三投下。

左手九千戶合丹大息千戶。案合丹大息千戶也。速不花等四千戶也。速兀兒等三千戶。帖柳兀秃千戶。所謂九千戶也。

帖柳兀秃千戶江南戶鈔。至元十八年分撥藤州一千二百四十四戶。案伯顏傳曾祖述律哥圖事太祖爲八鄰部左千戶。至元十八年頒羣臣食邑詔益以藤州等處四千九百七十七戶。此志云帖柳兀秃疑即述律哥圖也。元初開國功臣。至元中賜江南戶鈔者皆以子孫立功。世祖朝故有加賜如木華黎國王以安童孛羅渾即博忽官人以月赤察兒速不台官人以阿朮八蒼子以哈刺哈孫然則帖柳兀秃之加賜必以伯顏之功也。惟志傳所載戶數多寡不同未知其審。

曳刺中書兀圖撒罕里。即耶律楚材也。傳作吾圖撒合里。蒙古語吾圖者長也。撒合里者黑也。故以爲

長髯之稱。

昔寶赤。謂掌鷹者。自昔寶赤而下。若八刺哈赤。阿塔赤。必闐赤。貴赤。厥列赤。八兒赤。不魯古赤。皆舉其

官言之。

阿速拔都。卽杭忽思。

廿二史考異卷九十一

元史六

后妃表

太祖忽蘭皇后。案祕史太祖征蔑兒乞時，豁阿思蔑兒乞部人蒼亦兒兀孫，以女忽蘭來獻，然則忽蘭

即忽蘭，乃蔑兒乞氏。即蔑里吉。

也。速皇后，祕史作也遂，即也速干之姊。

也。速干皇后，案祕史太祖滅塔塔兒部，納也客扯連之女也速干為夫人，有寵也。速干因言其姊也遂

之美，太祖命訪之，謂也速干曰：汝姊至，汝能居其下否？蒼曰：願之。及也遂至，也速干讓夫人位與之。

哈蒼皇后，案祕史太祖為泰赤兀所執，鎖兒罕失刺匿之，以女合蒼安侍，疑即哈蒼也。

太宗脫列哥那六皇后，案祕史太祖平蔑兒乞，以其主脫黑脫阿即脫子忽都之妻朶列格捏，賜斡歌

歹，即太朶列格捏，即脫列哥那也。

世祖察必皇后，案后妃表：但當列氏族名號冊證年月而已。此於察必皇后云：后性明敏，達於事機，至

元之政，左右彌縫，當時以為蓋有力焉。於南必皇后云：世祖春秋高，后頗預政，相臣常不得見帝，輒因

后奏事焉。於成宗卜魯罕皇后云。成宗晚年多疾。后居中用事。而能信任相臣哈刺哈孫。以成大德之治。識者猶有取焉。於順宗答已妃子云。后性聰慧。然不事檢飭。及正位東朝。淫恣益甚。內則黑驢母亦列失八用事。外則幸臣失列門紐隣等。及時宰迭木帖兒怙寵作非。濁亂朝政。及英宗立。權倖誅而後勢餒頓息焉。此數條俱已見本傳。而復出於此。去此存彼可也。

泰定八不罕皇后宏吉刺氏。堯王買住罕女也。必罕皇后。八不罕妹也。速哥蒼里皇后。必罕妹也。案表所稱。似八不罕。必罕。速哥蒼里三人。皆買住罕之女。而后妃傳云。八不罕皇后。案陳孫幹留察兒之女。妃二人曰必罕。曰速哥蒼里。皆堯王買住罕之女。特薛禪傳亦云。泰定皇后。諱八不罕。案陳孫幹留察兒之女。其諱必罕。諱速哥蒼里者。皆脫憐孫買住罕之女。竝與表不合。考泰定紀。泰定二年。封后父火里兀察兒爲威靖王。諸王表亦云。火里兀察兒。泰定皇后父也。火里兀察兒。卽幹留察兒。則八不罕皇后。非買住罕之女信矣。且堯王買住罕者。據宗室世系表。爲察合台太子之曾孫。於泰定爲諸父行。必無納其女爲后之理。若宏吉刺氏。亦有名買住罕者。公主表云。大長公主拜蒼沙。適案陳裔孫買住罕。又特薛禪傳云。脫憐者。案陳之裔孫。世祖授本藩千戶。卒。子迸不刺嗣。迸不刺卒。子買住罕嗣。尙拜蒼沙公主。此則必罕。速哥蒼里二后之父。初未有封堯王之父也。后妃傳及表。並以堯王買住罕爲泰定后父。蓋誤以宗室之買住罕。與宏吉刺之買住罕。合爲一人。而不覺其謬也。

睿宗浚魯和帖尼妃子怯烈氏。案祕史太祖納王罕弟札合敢不長女名亦巴合以次女莎兒合黑塔泥賜拖雷卽浚魯和帖尼也。

宗室世系表

脫奔咿哩健妻阿蘭果火。案祕史蒙古之始祖曰巴塔赤罕生子曰塔馬察塔馬察子曰豁里差兒蔑

兒干豁里差兒蔑兒干子曰阿兀站索羅溫阿兀站孛羅溫子曰撒里合察兀撒里合察兀子曰也客

你敦也客你敦子曰擗鎖赤擗鎖赤子曰合兒出合兒出子曰孛兒只吉歹蔑兒干孛兒只吉歹今譯爲博爾濟吉特蒙

古人自稱博爾濟吉特氏蓋由於此孛兒只吉歹蔑兒干子曰脫羅豁勒眞伯顏脫羅豁勒眞子曰朶奔蔑兒干卽脫奔

咿哩健也自巴塔赤罕至朶奔蔑兒干凡十一世阿蘭果火祕史作阿蘭豁阿姓豁里刺兒氏

八林昔黑刺禿哈必畜。祕史作把林失亦刺禿合必赤。

咿麻篤敦七子。本紀麻作撚祕史作蔑年土敦年撚音相同表作麻者誤也七子之名表闕其五考祕

史蔑年土敦生子七人曰哈赤曲魯克表作旣擊曰哈臣曰哈赤兀曰哈出刺曰哈赤溫曰哈闌歹曰

納臣把阿禿兒表作納眞哈臣子曰那牙吉歹後爲那牙勤氏哈赤兀子曰巴魯刺台後爲巴魯刺思氏哈

出刺有四子後各以名爲氏爲大巴魯刺小巴魯刺額兒點圖巴魯刺脫朶延巴魯刺氏哈赤溫子曰

阿蒼兒歹後爲阿蒼兒斤氏哈闌歹子後爲不蒼安惕氏納臣把阿禿兒子曰兀魯兀歹曰忙忽台後

各以名爲氏皆表所未及。

納眞今兀察兀秃其子孫也。案兀魯兀台忙兀台皆納眞之後此云兀察兀秃疑有譌。

拜住忽兒一子。紀作拜姓忽兒。祕史作伯升豁兒多黑申升與姓音相近此作住者誤。

察刺哈寧溫收兄拜住忽兒妻生一子眞孛斯今大丑兀秃其子孫也。案祕史察刺孩領忽子曰想昆

必勒格想昆必勒格子曰俺巴孩是爲秦赤烏氏又收嫂爲妻生一子名別速台後爲別速氏與表皆不合。

獠忽眞兀秃迭葛今昔只兀刺其子孫也。案祕史海都第三子名抄眞斡兒帖該有子六人曰斡羅納

兒曰晃豁壇曰阿魯刺惕曰雪你惕曰合卜秃兒合思曰格泥格思後皆以名爲氏。

敦必乃六子。祕史作屯必乃薛禪薛禪其號也。祕史屯必乃二子一曰合不勒合罕律葛不一曰掃薛

赤列此云六子而不見掃薛赤列之名恐誤。

葛不律寒寒當作罕並作汗蒙古至是始有君長之號也。

□斤八刺哈哈。刊本斤上脫一字輟耕錄作笛不斤。祕史作斡勤巴兒哈黑生一子名忽秃黑秃主兒

乞忽秃黑秃主兒乞有二子曰薛扯別乞紀作薛曰台出紀作是爲主兒乞氏。太祖紀云薛徹大丑二

人實我伯祖八刺哈之裔是也。

八里丹 祕史作把兒壇把阿禿兒。把阿禿兒即拔都兒以勇爲號。

□□魯咩聶兒 祕史作忽禿黑禿蒙古兒。

忽魯刺罕。刊本罕作空譎。 祕史作忽圖刺合罕。自葛不律始建號合罕。繼之者從弟俺巴孩。太祖紀作威補海。 俺巴孩

爲金人所殺而忽圖刺繼之。有子三人曰拙赤曰吉兒馬兀曰阿勒壇。太祖紀云以按彈爲我祖忽都

刺之子。即阿勒壇也。

合丹八都兒 祕史作合蒼安。

掇端幹赤斤 祕史作脫朶延幹惕赤斤。

忽蘭八都兒 祕史忽蘭子名也客扯連。

蒙哥睹黑顏。刊本哥作奇誤。 祕史作忙格禿乞顏。

聶昆大司 祕史作捏坤太子。

蒼里眞 祕史作蒼里台幹赤斤。

擲只哈兒王 即哈撒兒食貨志作擲只哈撒兒。

移相哥大王 案虞伯生撰樂實碑云尙峻台公主太祖弟哈撒兒王之曾孫女移相哥王之孫女。墊仙帖木兒之女。此表移相哥之子。惟勢都兒一人無名。墊仙帖木兒者。

次五兀魯赤。陳經通鑑續編作木兒徹歹。

次六闊列堅太子。陳經續編作郭列干。輟畊錄作果里干。

脫脫蒙哥王。列傳蒙作忙。

月即列大王。列傳列作別。

越王秃刺。案本傳秃刺子西安王阿刺忒納失里。天厯初以推戴功進封豫王文宗紀諸王乞八言臣

兄豫王阿刺忒納失里弟亦失班順帝紀阿刺忒納失里弟蒼兒麻征南陽賊有功以西安王印與之

命鎮龍吉里之地表皆不見其名而西平王奧魯赤位下有豫王阿刺忒納失里次行有乞字疑即乞

八也則列傳以豫王為秃刺子似失之矣。

太宗皇帝七子長定宗皇帝次二闊端太子次三闊出太子次四哈刺察兒王次五合失大王次六合丹

大王次七滅里大王。案陳經通鑑續編云太宗七子長曰合西歹即合失二皇后孛灰所生蚤卒有子

曰海都次諱貴由是為定宗曰闊端曰屈出即闊出亦曰合刺察兒即哈刺察兒六皇后所生也曰合丹曰

滅立即滅里亦七皇后所生也其次第與表互異。

昔列門太子亦作失列門。

定宗皇帝三子長忽察大王次二腦忽太子次三禾忽大王。陳經續編云定宗三子曰和者曰腦忽歹。

曰忽也不干。輟耕錄亦作忽歹太子。

旭烈兀大王。食貨志作旭烈。至元辨僞錄作煦烈。

玉龍蒼失大王。亦作玉龍歹失。又作玉龍塔思。

北安王那木罕。世祖紀作南木合。又作那沒罕。

營王也。先帖木兒。輟耕錄營王也。先帖木兒之子。有脫歡不花太子。脫魯太子。

鎮南王帖木兒不花。威順平王寬徹普化。宣讓王帖木兒不花。案此三人表繫於鎮南王老章下。似皆

老章之子。今據列傳。則寬徹普化。帖木兒不花。皆脫歡之子。與老章為昆弟。傳又云。脫歡薨。子老章襲。

老章薨。弟脫不花襲。表所稱鎮南王帖木兒不花。即此。脫不花薨。子孛羅不花幼。帖木兒不花。乃嗣為鎮南王。是此三

人為老章之弟。承襲先後次序井然。輟耕錄失載老章。然亦以帖木兒不花三人為脫歡之子。可證此

表之誤。宣讓王帖木兒不花。後進封淮王。而寬徹普化之子。有別帖木兒。蒼帖木兒。報恩奴。接待奴。佛

家奴。及義王和尚。表皆不載。大約表所據者。經世大典帝系篇。陶氏輟耕錄。亦得之經世大典。故缺順

帝一朝之事也。

嘗得一懷妊婦人。曰插只來。納之。其所生遺腹兒。因其母名曰插只來。自後別為一種。案祕史孛端察

兒。納懷孕婦人。生子名札只刺歹。後為札蒼刺氏。札只刺歹子曰土古兀歹。土古兀歹子曰不里不勒

赤魯不里不勒赤魯子曰哈刺哈蒼安哈刺哈蒼安子曰札木合即與太祖結為按蒼者

諸王表

魯王阿不歹駙馬大德十一年薨當即瑀阿不刺

定王要木忽爾即藥木忽爾

周王木失刺木當作火火失刺即和世球

懷王脫帖木兒即圖帖穆爾或作脫脫木兒

慶王表闕其名按輟畊錄有云今上之長公主之駙馬剛哈刺咱慶王因墜馬得一奇疾兩眼黑睛俱

無而舌出至胸豈即其人乎

高麗王大順以駙馬封案高麗傳未見有名大順者

金印獸紐此表金印獸紐有二條後一條當是駝紐之譌

河間王兀古帶至元二年封案宗室世系表有河間王忽察而無兀古帶

永寧王卜顏帖木兒宗室世系表作伯顏木兒又案中堂事紀云中統二年皇弟摩哥大王即末哥亦

世子昌童封永寧王改其父玉寶為金印製紐為駝作三臺文曰永寧王印則昌童已受永寧王之封

而表不及之表又有永寧王卯澤至順元年封則宗室表無其人考公主表有完者台公主適來□□

卯澤來疑永字之譌。當卽此永寧王也。

廣平王木刺忽駙馬。案木刺忽爲玉昔帖木兒之子。姓阿魯刺氏。兒刺阿元之同族。不當有尙主事。表稱駙馬。似誤也。元制勳臣封王爵者。不得賜印。如國王木華黎郡王帶孫。淇陽王月赤察兒。皆不列於諸王表。而廣平獨得與宗室駙馬並列。考文宗紀。天厯二年。毀廣平王木刺忽印。命哈班代之。更鑄印以賜。則廣平固有印矣。

建昌王。表不著其名。考中堂事紀。中統二年六月二日。詔賜不花大王駝紐金鍍銀印。其文曰建昌王印。時王見征戍大理諸部。建昌雲南之別稱也。

泰寧王買奴。至治二年封。泰定二年徙封宣靖王。案本紀。泰定元年三月。泰寧王買奴卒。以其子亦憐眞朵兒赤嗣。卽此買奴也。又泰定三年。封諸王買奴爲宣靖王。鎮益都。順帝至元二年。進封宣靖王。買奴爲益王。蓋同時有兩買奴。一爲泰寧王。一爲宣靖王。封宣靖者。蒼里眞官人之後。益都乃其分地。封泰寧者。未詳其世系。表誤合爲一人。因有徙封之說。

泰寧王亦進眞多兒加。進。當作連。卽亦憐眞朵兒赤。連憐音同也。

公主表

昌國公主火臣別吉。火臣亦作果眞。

昌武定王瑣兒哈。列傳。瑣作鎖。

昌武靖王札忽爾陳。列傳。作札忽兒臣。

昌忠宣王忽憐。列傳。作忽憐。

公主伯雅倫。傳作伯牙魯罕。

公主卜蘭奚。傳作不蘭奚。

公主益里海涯。傳作亦里哈牙。

拜哈弟鄒王聶古鯁。拜哈。即李要合也。上云趙武毅王李要合。下云拜哈子趙武襄王愛不花。又云李

蒼子趙忠襄王君不花。考本傳。君不花。愛不花。皆李要合之子。則李要合也。拜哈也。鄒蒼也。實一人也。

趙國大長公主忽蒼迭迷失。閻復撰高唐忠獻王碑。作忽蒼的美實。

公主愛牙迷失。傳作愛牙失里。碑作愛失里。

趙康禧王喬憐察。碑作邱憐察。

鄒忠襄王朮忽難。諸王表作拙忽難。又趙王朮安。尚晉王女阿刺的納八刺公主。亦應見於公主表。而

表獨遺之。

魯忠武王按噴那顏。案噴。亦作按陳。又作按真。劉伯林傳又作按只。成宗紀又作按赤。太宗紀

適幹陳男幹羅眞駙馬。幹羅眞卽幹羅陳也。據本傳。乃幹陳弟納陳之子。

公主南阿不刺。傳作喃哥不刺。

公主祥哥刺吉。亦作相哥刺吉。程鉅夫應昌寺碑。

彌阿不刺。仁宗紀。作刁幹八刺。程鉅夫應昌寺碑。作諱不刺。

阿里嘉實利。卽阿禮嘉世禮。仁宗紀。亦作阿里嘉室利。特穆禪傳。又作阿刺哥識里。文宗紀。又作阿里加失立。王

表又作阿禮嘉世立。程鉅夫碑。

幹可眞公主。傳作幹可珍。

也立可敦公主。傳作也立安敦。

公主忽都魯堅迷失。高麗傳。作忽都魯揭里迷失。

高麗王妃卜荅失利。傳作寶塔實憐。

火魯公主適哈荅駙馬。食貨志。有大雷公主。大雷作火卽火魯也。祕史作豁雷罕朮赤太子之女。哈荅姓幹

亦刺氏。脫亦列赤之兄也。

闊闞干公主。適脫亦列赤駙馬。案祕史。忽禿阿別吉之子亦納勒赤。尙扯扯亦堅公主。卽闊闞干也。

三公表一

和林廣記多載國初之事。內有太師阿海。太傅禿懷。太保明安之名。阿海、禿懷、皆耶律氏。禿懷、即禿花也。明安石抹氏。

至元二十六年。是年四月。以月兒魯爲太傅。卽玉昔帖木兒也。表於二十六年至三十年。俱不書月兒魯。

三十一年。是年成宗卽位。以月兒魯爲太師。伯顏爲太傅。月赤察兒爲太保。表皆失之。

大德八年。自是年至武宗至大初。太師月赤察兒尙無恙。表何以闕而不書。

十一年。太傅哈刺哈孫。太保塔刺海。案武宗紀。是年五月。加知樞密院事朶兒朶海爲太傅。右丞相哈

刺哈孫爲太保。六月。加左丞相塔刺海。太保。紀不書哈刺哈孫爲太傅之月日。當亦在六月也。

至大元年。案武宗紀。是年八月。特授伽頭太師。伽頭後賜名脫兒赤顏。卽月赤察兒之子。蓋父子同時

爲太師也。表于至大三年。始有脫兒赤顏名。未知其審。又據本紀。是年有太保乞台普濟。次年八月。乞

台普濟爲太傅。表皆失之。

三年。太師阿刺不花脫兒赤顏。案武宗紀。是年十一月。加脫虎脫太師。表亦不書。

四年。太傅帖可。卽鐵哥也。仁宗紀。是年三月。命月赤察兒依前太師。宣徽使鐵哥爲太傅。集賢大學士。

曲出爲太保。表止書帖可一人。

皇慶元年。太師阿撒罕。亦作阿思罕。

二年。案。是年四月。以伯忽爲太傅。表不書。

延祐六年。太師鐵木迭兒。案。是年四月。以鐵木迭兒爲太子太師。非太師也。至次年三月。始復除太師。

表於是年。已書鐵木迭兒。誤也。據本紀。是年閏八月。以伯忽爲太師。六月。以朶帶爲太傅。則表皆闕之。

七年。太傅朶帶。紀作朶帶。

至治三年。案。泰定紀。是年九月。以內史案蒼出爲太師。表失書。

泰定元年。太師伯忽。案。泰定紀。至治三年十二月。以前太師拜忽商議軍國重事。拜忽。卽伯忽也。其時

按蒼出卽按塔出見爲太師。而伯忽以前太師與議國政。非正授太師。不當書伯忽而略按蒼出也。

四年。太傅朶帶。太保秃忽魯。案。泰定紀。是年三月。以朶帶爲太師。秃忽魯爲太傅。伯蒼沙爲太保。表失

書。

天祿元年。是年十月。別不花爲太保。表失書。

至順三年。案三公宰相二表。俱闕至順三年。以紀考之。蓋太師燕鐵木兒。太傅伯蒼沙。太保伯顏也。

三公表二

元統二年。太保燕不隣。康里氏官遼陽行省平章政事。封興國公。追封興寧王。諡忠襄。伯撒里其弟也。

至元元年。太傅完者帖木兒。月赤察兒之孫。嗣淇陽王。

六年。太保按馬赤。紀作塔馬赤。

至正十五年。太保定住。案順帝朝。太保名定住者二人。前定住。由樞密知院除中書平章政事。加太保。
至元三年二月卒官。後定住。康里氏。至正十四年。由平章。遷左丞相。進右丞相。卽此定住也。

廿二史考異卷九十二

元史七

宰相年表

元初將相大臣年月疏闕簡牘未詳者則闕之。案太祖之時未有宰相太宗三年立中書省以邪律楚材爲中書令粘合重山爲左丞相鎮海爲右丞相表當始於此年何以闕而不書憲宗朝有右丞相字魯歡表亦失之。

中統元年左丞相禰禱。案世祖紀是年七月以禰禱行中書省事二年詔行中書省平章禰禱及王文統等率各路宣撫使赴闕是禰禱亦爲平章未有丞相之名表繫於右丞相之列恐誤。

二年右丞張。案世祖紀是年六月以張啓元爲中書右丞表逸其名又據本紀是年十月以右丞張啓元行中書省於平陽太原等路而表於三年四年至元元年二年俱有張字蓋元初行中書省卽以省臣爲之初未有內外之分商挺在中統間以參政行省陝西而表於二年三年四年至元元年並有商挺名亦此例。

左丞張文謙。案世祖紀中統元年四月以張文謙爲左丞五月中書左丞張文謙爲大名彰德等路宣

撫使表於二年始見文謙名疑有脫文也。文謙已出爲宣撫而表於二三年至元元年俱列文謙名。蓋以左丞行宣撫使也。

三年右丞相粘合左丞闊闊。案世祖紀中統二年八月以宣撫使粘合南合爲中書右丞闊闊爲中書左丞表書於三年又失書粘合之名。粘合女直姓南合則其名也又據本紀二年九月以粘合南合行中興府中書省而表於三年四年皆有粘合。

四年右丞相線眞。案元代政事之柄一出中書左右丞相非蒙古人不得授焉。世祖朝間用漢人成宗以後專用蒙古蓋甚重也。乃丞相之名見於表者五十九人。史爲立傳者不及其半。如世祖朝之線眞塔察兒忽都察兒和禮霍孫成宗朝之阿忽台武宗朝之蒼刺海塔思不花脫脫紀作脫脫乞台普濟三寶奴秦定朝之旭邁傑倒刺沙順帝朝之汪家奴伯撒里雖賢否不同不當逸其事迹。元明時代相接訪之故老徵之吏牘何難補綴成篇而任其湮沒。史臣之失職甚矣。且如脫脫三寶奴等不立傳則尙書省廢置之始末不明旭邁傑倒刺沙不立傳則秦定一朝之事迹不備。此豈可委爲無足重輕而略之乎。

至元元年平章政事。案世祖紀是年五月以中書右丞相粘合南合平章政事表失書。
右丞相阿剌伯。世祖紀作阿里。

二年左丞相忽都察兒。案世祖紀至元三年十一月以忽都蒼兒即忽都察兒爲中書左丞相表系之二年。

又以左爲右。

右丞相伯顏。世祖紀作左丞相。

平章政事阿合馬。案世祖紀阿合馬以前年十一月除平章政事。

平章政事賽合丁。世祖紀作寶合丁。

參知政事王。表逸其名。以世祖紀考之。蓋王晉也。晉以二月除參政。六月罷。表於次年仍有王字。

三年左丞張。以本紀考之。蓋張文謙也。紀於是年二月。書以中書右丞張易。同知制國用使司事。參知

政裏張惠爲制國用副使。表無此二人名。

四年。參知政事張惠。案是年六月。中書省臣例降。張文謙自左丞降。參知政事。表無文謙名。

七年。參知尙書省事李。以本紀考之。蓋李堯咨也。

參知尙書省事麥朮督丁。本紀作麥朮丁。

八年右丞趙。案世祖紀是年二月。以中書左丞東平等路行尙書省事趙璧。爲中書右丞。卽此人也。表

於上年。已有左丞趙。似誤。

九年。平章政事哈伯。案世祖紀。至元十年九月。以哈伯爲平章政事。卽哈伯也。表繫之九年。似誤。又考

是年正月。以阿合馬爲中書平章政事。表當去哈伯而增阿合馬。

右丞趙。案世祖紀是年十月以趙璧爲平章政事。十年趙璧卒。表於十年十一年十二年俱有左丞趙。似無遷平章之事。未審孰是。

十年左丞張。此左丞蓋張惠也。據世祖紀惠以九年正月除中書左丞。十年三月遷右丞。十九年五月罷。表於九年十三年失載惠名。而十年至十二年並在左丞之例。似俱失之。

十三年右丞。案世祖紀是年正月以昔班爲中書右丞。三月以中書右丞昔班爲戶部尙書。表不載昔班名。或除而未到任也。

十四年右丞張。此右丞蓋張惠也。

參知政事。案世祖紀是年十一月以別都魯丁參知政事。表不書。

十九年左丞相阿合馬。案阿合馬未爲丞相。此誤高一格。刊本之譌。

右丞札珊。世祖紀作扎散。

左丞張阿亦伯。案世祖紀是年十二月以中書左丞張文謙爲樞密副使。未見有名阿亦伯者。

參知政事張鵬舉。卽張雄飛也。

二十年參知政事。案世祖紀是年五月以邪律老哥爲中書參知政事。六月以王椅爲中書參知政事。表皆不書。

二十二年平章政事阿必失哈。世祖紀作合必赤合左丞史。以本紀考之。蓋史樞也。

參知政事廉。表失其名。考世祖紀二十一年十一月。以不魯迷失。海牙撒的迷失。並參知政事。則不魯迷失海牙必廉氏也。

二十三年左丞也速鐸兒。案此表。至元二十三年。有左丞也速鐸兒。二十四年至二十七年。有平章政

事帖木兒帖木兒。卽也速鐸兒也。至元三十年。三十一。元貞元年。大德元年。二年。三年。四年。五年。六

年。七年。有平章政事賽典赤。元貞二年。大德八年。九年。十年。有平章伯顏賽典赤。卽伯顏也。伯顏者賽典赤之孫故亦

賽典赤一人兩名。或可互見。若一卷之中。而稱名互異。續者必以爲兩人矣。據黃潛撰安慶忠襄

王碑云。也速鐸兒兀里養哈鐸氏。卽兀良合氏與速不台同族本名帖木兒。避成宗諱改。然則至元之世。當稱帖木

兒。元貞大德之際。當稱也速鐸兒。史官追改。未能畫一也。

參知政事楊。郭。表失書二人名。以本紀考之。蓋楊居寬。郭佑也。又紀載二十二年十一月。以禿魯歡

爲參知政事。依表例。當書於是年。表亦失之。

二十四年左丞。案世祖紀。是年正月。以參政程鵬飛爲中書右丞。阿里爲中書左丞。表皆不書。蓋征安

南時。權立行中書省。非中書省臣也。

二十五年平章政事伯蒼兒。案世祖紀二十六年二月以伯蒼兒爲中書平章政事表先書一年。右丞崔表失其名考世祖紀至元二十八年三月以崔曠爲中書右丞疑卽其人但表於二十五年二

十六年二十七年先有右丞崔而二十八年以後卻無崔字殊不可解。

參知政事何。以本紀考之蓋何榮祖也。

二十六年參知政事張吉甫。案世祖紀是年五月以張天祐爲中書參知政事蓋卽吉甫也。

二十八年平章政事。案世祖紀是年十月以雪雪的斤爲中書平章政事十二月以別都魯丁前以桑

哥專恣不肯仕命仍爲中書右丞表未見二人名。

參知政事杜。案世祖紀是年五月尙書參知政事賀勝高竊並參知中書政事表無高竊而有杜姓者未知其審。

二十九年平章政事帖可。紀作鐵哥。

平章政事刺眞。列傳作獵眞小雲石脫忽憐之孫。

參知政事梁暗都刺。卽梁德珪也。

三十年平章政事賽典赤。紀作伯顏回回人賽典赤瞻思丁之孫襲祖號仍稱賽典赤。

左丞張。卽張九思。

三十一年平章政事不忽朮。案成宗紀是年七月以陝西行省平章政事不忽朮爲中書平章政事。表於二十八年至三十一年俱有不忽朮名未審何時改任陝省也。紀又載是年八月以帖木而復爲平章政事。蓋卽也速鐔兒也。表卻不書。

參知政事何。以本紀考之蓋何偉也。

元貞元年左丞楊。以本紀考之蓋楊炎龍也。

二年平章政事段那海。卽段貞也。

參知政事呂。卽呂天麟也。刊本或作只誤。據成宗紀元貞元年二月以呂天麟爲中書參知政事。而表

書於次者據到任之日也。

大德元年右丞。案成宗紀是年二月以行徽政院副使王慶端爲中書右丞。二年十一月以中書右丞

王慶端爲平章政事。表皆不書。

參知政事張。六月至。案成宗紀是年正月以張斯立爲中書參知政事。卽其人也。紀書於正月而表云

六月者據到任之日言之。紀所書除授月日與表率差一兩月。或至數月。大約紀在前表在後。紀所據

者除授之日表所書者任事之日非有牴牾也。斯立濟南章邱人。

二年左丞八都馬辛。正月至。案成宗紀是年五月以湖廣左丞八都馬辛爲中書右丞。據表正月至六

月。八都馬辛尙在中書。而次年。右丞卽有八都馬辛名。中間似無改除湖廣事。當是紀誤。

四年。平章政事。案成宗紀。是年四月。以中書省斷事官不蘭奚爲平章政事。閏八月。以中書右丞賀仁傑爲平章政事。表皆不書。

六年。右丞。案成宗紀。是年七月。以江浙行省參知政事忽都不丁爲中書右丞。表不書。疑卽陞本省右丞。紀誤脫行省二字爾。

七年。右丞洪雙叔。紀作洪君祥。

參知政事朶解。紀作朶台。

參知政事張。張斯立也。

參知政事董。董士珍也。

八年。平章政事伯顏。伯顏卽賽典赤也。成宗紀。是年九月。以伯顏梁德珪復爲中書平章政事。表不見。梁暗都刺之名。考德珪傳。以大德八年九月卒於家。則是未聞命而卒也。

參知政事趙。趙仁榮也。

參知政事張。張祐也。考至元二十六年。表有參政張吉甫。紀作張天祐。與此張祐。未知卽一人否。十年。平章政事徹里。紀作闡里。

左丞章閻。紀作張閻。仁宗紀作張驢。

左丞杜。杜思敬也。又案成宗紀。是年二月。以月古不花爲中書左丞。表不書。

十一年。右丞相。案武宗紀。是年五月。以塔刺海爲中書左丞相。七月。以塔刺海爲中書右丞相。塔思不花爲中書左丞相。表皆失書。

右丞王。王壽也。紀作左丞。

右丞劉。劉正也。是年五月。除左丞。九月改右。

右丞郝。郝天挺也。紀作左丞。

左丞阿里伯。紀作阿里。

左丞幹羅思。紀作右丞。

參知政事劉。劉源也。紀作前年閏正月。

參知政事烏伯都刺。紀作兀伯都刺。

至大元年。平章政事察乃。畏吾氏刺真之子。又案武宗紀。是年正月。以中書左丞也罕的斤爲平章政事。表不書。

右丞扎忽兒解。案柳貫有扎忽兒台。謚忠肅。議釋其詞。蓋由中書右丞。改授四川行省平章政事者。紀

失載。

左丞何。表失其名。

參知政事伯都。太保曲出之子。

二年。平章政事阿散。紀作合散。

左丞脫脫。九月至十二月案是時有中書左丞相脫脫。有尙書左丞相脫脫。復有左丞脫脫。蓋同時有三脫脫

也。

尙書左丞相脫脫。紀作脫虎脫。

平章政事伯顏。秦王伯顏也。

平章政事樂實。高麗人。順帝初追諡武敏。武宗紀稱至大三年二月。以樂實爲尙書左丞相。表不列於

丞相者。蓋遙授之官。與正授有別。紀誤脫遙授二字。

三年。左丞幹只。紀作幹赤。

參知政事帖里脫歡。紀作鐵里脫歡。

參知政事賈。正月至十一月紀作賈鈞。與帖里脫歡。俱以去年十月除。

四年。平章政事完澤。畏吾氏葉仙籍之子。

左丞李士英也。

皇慶元年平章政事。案仁宗紀是年五月以江浙行省平章張驢爲中書平章政事。卽章閏也。計其到任。當在秋冬。又李孟以是年十二月致仕。表皆闕而不書。

參知政事許許思敬也。

二年參知政事薛薛居敬也。

延祐元年平章政事。案仁宗紀是年正月以中書右丞劉正爲中書平章政事。江浙行省左丞高昉爲

中書參知政事。表皆不書。

右丞拜住。蕭拜住也。與英宗朝丞相拜住各是一人。

二年參知政事曹曹從革也。見帖木迭兒傳。

參知政事郭郭貫也。

三年右丞阿里海牙。當作阿卜海牙。刊本之譌也。下一格同。

左丞王毅。六月至。王十二月至。案仁宗紀是年五月陞參政郭貫爲左丞。九月以左丞郭貫爲集賢大學

士。集賢大學士王毅爲中書左丞。然則表所云六月至八月者。當是郭貫。十月至十二月者。當是王毅。史文必有錯誤矣。

參知政事不花。兀速兒吉氏曷速之子。

四年參知政事煥住。紀作換住。

參知政事張。張思明也。

參知政事王。王桂也。

五年平章政事。案仁宗紀是年四月以干奴史弼爲中書平章政事。表不書。疑二人本除行省平章。

史有脫文爾。

參知政事燕只哥。紀作燕只干。又紀書九月以僉太常禮儀院事狗兒爲中書參知政事。表不書。

六年參知政事欽察兒。紀無兒字。

七年平章政事蒼失海牙。紀作塔失海牙。又案是年平章十一人。依除授先後。當以烏伯都刺亦列赤。

阿里海牙居首次禿滿迭兒。次赫驢。趙世榮。次拜住。次蒼失海牙。乃刺忽帖木兒脫。次廉米只兒海牙。

表所書殊失其次。

平章政事廉米只兒海牙。紀作廉恂。

平章政事赫驢。紀作黑驢。

平章政事趙。趙仁榮也。

至治元年參知政事辭。辭處敬也。與上文辭居敬未審卽一人否。

三年右丞相。案秦定帝紀是年九月以也先鐵木兒爲中書右丞相尋伏誅以旭邁傑爲中書右丞相表失書。

秦定二年參知政事馮不花。紀但作馮而失其名。

天曆元年。案是歲秦定皇帝致和元年七月帝崩九月懷王自立於大都改元天曆此表書年號雖依溫公通鑑之例以後改者爲定然九月以前右丞相塔失帖木兒左丞相倒刺沙平章政事烏伯都刺伯顏察兒左丞朶朶參知政事王士熙等豈容略而不書又秦定紀五月以嶺北行省平章政事塔失帖木兒爲中書平章政事此別是一人非右丞相塔失帖木兒也亦當列於表。

平章政事塔失海牙。紀作塔失海涯。

右丞月魯不花。紀作玥璐不花。

參知政事張友諒。字元朴章邱人斯立兄子。

參知政事月魯帖木兒十一月至十一月案文宗紀是年十二月以參知政事躍里帖木兒爲左丞卽月魯帖木兒也。

二年左丞相帖木兒不花。卽高昌王鐵木兒補花。

平章政事。案文宗紀是年正月以陝西行臺御史大夫阿不海牙為中書平章政事。次年二月又書以太禧宗禋使阿不海牙為中書平章政事。未審即一人否。表於至順元年有平章政事阿里海牙。即阿不海牙。而是年卻不書。

右丞撒迪左丞史惟良。案撒迪史惟良二人俱當列於至順元年。刊本誤移於前。撒迪紀或作撒的。

至順元年左丞相伯顏。案是年八月除伯顏知樞密院事罷左丞相不置。

二年參知政事。案文宗紀是年二月以陝西行臺中丞朵兒只班為中書參知政事。表失書。

三年。案表脫至順三年事。以紀表參考之。右丞相燕鐵木兒也。平章政事欽察台阿里海牙伯撒里禿兒哈帖木兒撒迪十月除也。右丞撒迪十月除也。左丞趙世安也。

宰相年表二

元統元年平章政事脫別歹。

即脫別台也。順帝紀二年正月以御史大夫脫別台為中書平章政事。而

表於元年已有脫別歹名。

至元元年參知政事普化。紀作不花。

二年左丞王懋德。紀作王德懋。

至正元年平章政事脫歡。札刺兒氏曹南王阿剌罕之子也。許有壬撰曹南忠宣王碑云脫歡。至元六

年拜中書平章政事。後除南臺大夫。

二年。右丞太平。卽賀惟一也。至正五年。除御史大夫。始改今名。表於二年三年四年五年。已書太平。蓋史臣追改之。

三年。參知政事伯顏。此又一伯顏。由參政遷右丞。再遷平章政事。疑是鐵哥之孫。

四年。左丞董守簡。文忠之孫。士珍之子。由御史中丞除。

五年。參知政事朶兒只班。紀作朶兒直班。

七年。右丞脫歡。此與至正元年平章政事脫歡。未審卽一人否。

參知政事遴童。當作道童。刊本之譌。

九月。參知政事撒馬篤。畏吾氏平章察乃之子。

參知政事玉樞虎兒吐華。康里氏鐵木兒塔識之弟。

十二年。右丞玉樞虎兒吐華。案。是年二月。與左丞韓元善分省彰德。表於分省或不書。亦疏漏。

參知政事帖里帖穆爾。紀作帖里帖木兒。是年二月。分省濟寧。

十三年。右丞哈麻。正月代玉樞虎兒吐華爲正。案。順帝紀。是年正月。以中書添設平章政事哈麻爲平章政事。據表。

哈麻以上年八月除添設右丞。本紀同。至是乃正授右丞耳。順帝紀。於執政除拜多漏略。當以表爲正。

十五年平章政事拜住。是年十二月分省濟寧。

右丞臧卜。是年四月與左丞烏古孫良楨分省彰德。十二月復以參知政事月倫失不花、陳敬伯分省

彰德。表惟載陳敬伯分省彰德。餘俱闕之。

十七年平章政事蒼蘭。十一月案百官志。十七年七月以平章蒼蘭參政。俺普、崔敬分省陵州。據表。蒼蘭

以十一月始除平章。崔敬亦以十一月除參政。亦不載有分省事。與志互異。

參知政事卜顏。卜顏下當有帖木兒三字。監本脫去。

十八年平章政事完不花。紀作完卜花。

右丞完者帖木兒。監本脫帖字。次行蒼失帖木兒。監本祇有木兒二字。

二十年平章政事達識帖木兒。此當是別兒怯不花之子。達世帖木兒。非康里氏也。

參知政事也先不花。札刺兒氏乃蠻台之子也。

二十二年平章政事擴廓帖木兒。案是年擴廓帖木兒、孛羅帖木兒、雖除平章。實未到省。而表列其名。

與見任等。乃二十一年十月以察罕帖木兒爲中書平章政事。表卻不書。

二十四年參知政事李國鳳。濟南人。至正十一年進士。見題名碑

二十七年平章政事伯顏帖木兒。字元臣。大都人。由進士出身。

平章政事哈刺章。蓋蔑兒吉姆氏脫脫之子。

平章政事蠻子。案百官志。是年八月。以樞密知院蠻子爲添設第三平章分省保定。表不書添設及分省事。亦漏也。

參知政事阿刺不花。是年九月。分省大同。表失書。

廿二史考異卷九十三

元史八

后妃傳一

太祖光獻翼聖皇后宏吉刺氏。特薛禪與其子案陳從太祖征伐有功，賜號國舅，封王爵，以統其部族。有旨生女爲后，生男尙公主，世世不絕。此文已見特薛禪傳。

世祖至元二年十二月，追諡光獻翼聖皇后。案后妃表，至元二年，追諡光獻皇后。至大二年，加諡光獻翼聖皇后，傳但書至元追諡，而不及至大之加諡，其所載諡冊，乃至大加諡之冊，而誤以爲至元之冊。又案祭祀志，至元三年十月，太廟成，命平章政事趙璧等集議，制尊諡廟號。世祖紀同定爲八室，是累代帝后之諡，皆定于至元之三年，而表與傳皆作二年，亦誤也。又案至元上諡，在三年十月，至大加諡，則在二年十二月，此云十二月，則爲至大之諡，號諡冊審矣。

定宗欽淑皇后。史失書其氏族。

至元二年，追諡欽淑皇后。當作三年。憲宗后同

憲宗貞節皇后宏吉刺氏。特薛禪孫忙哥陳之女。案特薛禪傳，以忙哥陳爲案陳從孫。

世祖昭睿順聖皇后吉宏刺氏。至元十年三月授冊寶。上尊號貞懿昭聖順天睿文光應皇后。案世祖紀。至元十二年十二月。中書右丞相忽都帶兒等請上皇后曰貞懿順聖昭天睿文光應皇后。不許。此云至元十年上尊號。與紀不合。所載尊號十字。先後亦微異。

南必皇后宏吉刺氏。有子一人。名鐵蔑赤。案宗室表。世祖十子。無鐵蔑赤名。

成宗貞慈靜懿皇后宏吉刺氏。大德三年十月立爲后。案后妃表。失憐蒼里元妃早薨。至大元年。追尊諡曰貞慈靜懿皇后。冊文云。先元妃宏吉刺氏。又云椒掖正名。莫際飛龍之會。是貞慈之薨。在成宗御極以前。成宗朝亦未加后諡。傳稱大德三年立爲后者。誤也。考成宗紀。大德三年。冊立爲皇后者。乃伯牙吾氏。非宏吉刺氏。

卜魯罕皇后伯岳吾氏。紀作伯牙吾氏。

大德十年。上文有大德三年。不應重書年號。

武宗速哥失里皇后。案陳哈兒只之女。案陳下脫從孫二字。

妃亦乞烈氏。生明宗天祿二年。追諡仁獻章聖皇后。案順帝紀。至正六年十二月。省臣改擬明宗母壽

童皇后徽號曰莊獻嗣聖皇后。傳既失載。改諡一節。其名壽童亦失書。

仁宗莊懿慈聖皇后宏吉刺氏。英宗卽位。上尊號皇太后。明日。受百官朝賀于興聖宮。至治二年崩。

案英宗紀延祐七年八月。附仁宗聖文欽孝皇帝莊懿慈聖皇后于太廟。英宗卽位之始。紀祇有尊太皇太后及太皇太后受朝賀于興聖宮事。別無尊皇太后之文。又其冊文云。爲天下母而養弗逮。知后之崩。當在仁宗朝。紀不書者。史失之也。此傳所云。上尊號受百官朝賀。及至治二年崩者。皆是太皇太后。順宗后宏吉刺氏。史誤以爲皇太后耳。所載冊文。疑是武宗朝追上尊號之冊也。又案英宗紀。至治二年九月。太皇太后崩。次年。附順宗廟。后妃傳及表。俱云。至治三年崩。蓋誤以升祔之年。爲后崩之年也。

泰定帝妃二人。堯王買住罕之女。此宏吉刺氏之買住罕。若宗室之買住罕。封堯王者。乃別是一人。明宗貞裕徽聖皇后名邁來迪。史失書其氏。據順帝紀。乃罕祿魯氏也。

文宗立。諡貞裕徽聖皇后。案順帝紀。至元二年二月。追尊帝生母曰貞裕徽聖皇后。此傳以爲文宗時

諡者。誤也。文宗方詔諭中外。謂順帝非明宗子。肯尊其生母爲后。且加美諡乎。

文宗卜蒼失里皇后。特薛禪傳。作不蒼失里。

母魯國公主桑哥吉刺。特薛禪傳。作祥哥刺吉。北人讀祥如相。相桑聲相近。吉刺當爲刺吉。

元統元年。尊爲太皇太后。案順帝紀。元統元年。尊爲皇太后。至元元年。尊皇太后爲太皇太后。此傳似

有脫誤。

順帝完者忽都皇后奇氏。案冊文。稱肅良合氏。元人稱高麗爲肅良合。肅良合氏者。高麗氏也。猶河西

人稱唐兀氏舉其部不舉其族。或謂改奇曰肅良合氏者。蓋未通于國語。

睿宗傳

世祖至元二年改諡景襄皇帝。案至大二年加諡景襄皇帝曰仁聖。本傳失書。

裕宗傳

十八年正月昭睿順聖皇后崩。案后妃傳后以至元十四年二月崩。

特薛禪傳

女曰孛兒台。太祖光獻翼聖皇后。后妃傳名旭真。表作孛兒台旭真。

賜號國舅案陳那顏。程鉅夫應昌報恩寺碑稱魯國忠武王案亦那演。即按陳也。

元貞元年追封濟寧王。案仁宗朝進封魯王。傳失書。

弟納陳。歲丁巳襲萬戶。案納陳尙太祖孫薛只于公主。程碑作薛赤干傳失書。

帖木兒至元十八年襲萬戶。二十四年以功封濟寧郡王。案世祖紀至元二十四年封駙馬帖木兒濟

寧郡王。而本傳不書帖木兒尙主事。考程鉅夫應昌報恩寺碑云。帖木兒尙帝季女囊加真公主。十四年帖木兒北征有大助。賜號按答兒圖那演。元貞元年封濟寧王。主爲皇姑。魯國大長公主碑爲奉敕經進之文。其紀事宜可信。監本公主表云。囊加真適納陳子帖木兒。再適帖木兒弟蠻子台新。刊本

改帖木兒爲幹羅陳。蓋欲合于本傳。今以表傳及碑文反覆參校。乃知幹羅陳兄弟三人。相繼尙囊加眞公主。傳不言帖木兒尙主。表不言主適幹羅陳。皆史家之缺漏。碑不言幹羅陳蠻子台之尙主。則以碑文爲帖木兒之子。諱不刺即瑯阿。而作故爲之諱也。傳稱成宗卽位。封皇姑魯國大長公主以金印。封蠻子台爲濟寧王。紀書于元貞元年。其時帖木兒已前卒矣。而碑隱蠻子台之名。悉歸之帖木兒。蓋諱言公主改適事。當以史文爲正。

帝賜名按察兒禿那顏。世祖紀作按蒼兒禿。程碑作按蒼兒圖。卽下文按蒼兒也。察字疑誤。阿里嘉室利。紀作阿禮嘉世禮。

是爲不只兒駙馬後。不只兒者。火忽之孫。特薛禪之曾孫也。

順宗昭獻元聖皇后諱蒼吉。大德十一年十一月。武宗册上皇太后云云。蒼吉。后妃表傳俱作蒼已。自大德十一年以下。敍累朝加上尊號。凡八十七字。此文一見于帝紀。再見后妃表。三見于后妃傳。并此四見矣。

此則宏吉刺氏之爲后者也。案后妃傳。仁宗莊懿慈聖皇后名阿納失失里。寧宗后蒼里也。忒迷失。皆宏吉刺氏。裕宗徽仁裕聖皇后。顯宗宣懿淑聖皇后。亦宏吉刺氏。此傳俱不載。

李禿傳

亦乞列思氏。張士觀駢馬昌王世德碑。作亦啓列氏。

太祖嘗潛遣木兒徹丹出使。木疑朮字之譌。木兒徹丹。卽朮赤台也。

旣而札赤刺歹、札朮哈脫也等。札朮哈。卽札木合。木朮兩字。易相濶也。札木合者。札蘭部人。札赤刺。卽

札蘭之轉。

鎖兒哈事太宗。與木華黎取嘉州。降其民。案。木華黎卒於太祖朝。亦無取嘉州事。嘉州。恐是葭州之譌。

太宗當爲太祖。

鎖兒哈。娶皇子幹赤女安禿公主。生女。是爲憲宗皇后。案。幹赤。卽太宗子闊出也。后妃傳。憲宗皇后無

亦乞列氏。恐誤。據世德碑。所尙公主名不海罕。與此異。傳失書鎖兒哈封諡。公主表稱爲昌武。定王碑

作忠定。

太宗命親王安赤台。卽濟南王按只吉歹。

月列台。娶皇子賽因主卜女。賽因主卜。未該何帝之子。宗室表無其名。

忽憐。尙憲宗女伯牙魯罕公主。世德碑。作忽鄰。所尙公主名伯牙倫。

阿失。尙成宗女亦里哈牙公主。世德碑。作益里海涯。

阿失。子八刺失里襲封昌王。案。世德碑。阿失子七人。曰失刺渾台。尙宗王木南子女亦勒翼公主。曰

蓋藏八刺。曰阿刺納失里。曰塔海。曰汝奴朵兒只。曰監藏朵兒只。未見有名八刺失里者。

阿刺兀思剔吉忽里傳

子朮安幼。本紀作注安。

詔以弟朮忽難襲高唐王。武宗紀。至大元年。中書省臣言。鄒王拙忽難。人戶散失。詔有司括索。拙忽難。

卽朮忽難也。其封鄒王。則傳失書。

遂得歸葬。案本傳。敘次趙國世系。自朮安而後。皆闕而不書。考仁宗紀。延祐元年。封阿魯朮爲趙王。英

宗紀。至治元年十月。置趙王馬札罕部錢糧總管府。諸王表。趙王馬札罕。泰定元年封。文宗紀。有趙王不魯納。又李晉

王影堂碑。立于至正十五年。碑文稱。今趙王八都帖木兒。此皆汪古部之嗣王者。宋景濂嘗仕元代。詎

無聞見。乃不能稽考。以成一代之信史。良可愧矣。使以危太朴領其事。當不至疏舛乃爾。

木華黎傳

札刺兒氏。案。元明善撰東平忠憲王碑云。札刺爾氏。親連天家。世不婚姻。則札刺兒氏亦元之同姓。

父孔溫窟哇。祕史。作古溫兀阿。元明善碑。作孔溫兀蒼。

其下拔台知之。太祖紀作把歹。食貨志作八蒼子。

金守將銀青。銀青。蓋舉其官名。謂銀青光祿大夫。非人姓名也。

以前鋒拓拔按察兒統蒙古軍。列傳第九卷有按扎兒姓拓跋氏卽其人也。

監國公主遣使來勞。案阿刺兀思剌吉忽里傳阿刺海公主明睿有智略車駕征伐四出嘗使留守軍

國大政諸稟而後行卽所謂監國公主也。

遣按赤將兵三千斷潼關。按赤卽按陳那顏也。

李魯。遣撤寒追及于紫金關。撤寒者肖乃台之弟。

子七人長塔思次速渾察次霸都魯。案元明善撰東平忠憲王安童碑稱霸都魯爲塔思之第二子安

童父霸都魯祖塔思曾祖字魯高祖木華黎故安童傳云木華黎四世孫此傳以霸都魯爲李魯之子

則少一世矣當是傳聞之誤黃潛撰鄆文忠王拜住碑云高祖字魯曾祖霸都魯亦誤以霸都魯爲李

魯子。

次阿里乞失。乃蠻台傳作阿禮吉失。

塔思。人汴京守臣劉甫置酒大慶殿。案楊惟中傳初滅金時以監河橋萬戶劉福爲河南道總管福

甫聲相近。

塔塔兒台孔溫窟哇第三子帶孫郡王之後。案帶孫爲木華黎之弟上文稱孔溫窟哇有子五人木華

黎其第三子此又以帶孫爲第三子前後必有一誤。

脫脫祖嗣國王速渾察。沈深有智略。嘗奉命征討。所向克捷。案速渾察事。已見上文。敘述幾三百言。此因脫脫而更及其祖。重複非體矣。

博爾朮傳

阿兒刺氏。祕史作阿魯刺。閻復撰廣平貞憲王碑。作阿爾刺。危素送彭公權序。稱阿魯圖爲阿刺納公。阿魯圖。卽博爾朮四世孫也。

始祖孛端察兒。以才武雄朔方。案博爾朮與元同姓。其始祖孛端察兒。卽太祖十世祖孛端叉兒也。書法宜與它傳不同。

及戰于大赤兀里。卽秦赤烏也。乃部族之名。非地名。

蔑里期之戰。卽蔑里乞。亦作滅里吉。

玉昔帖木兒。紀傳或作玉速帖木兒。

賜號月呂魯那演。月呂魯。或作玉呂魯。或作月呂祿。或作月魯。或作月兒魯。或作月兒呂。

次脫脫哈爲御史大夫。案仁宗紀。延祐六年。以御史中丞禿合爲御史大夫。諭之曰。御史大夫。職任至重。以卿助舊之裔。故特授汝。當思乃祖乃父。忠勤王室。仍以古名臣爲法。否則將墜汝家聲。損朕委任之意矣。英宗紀。延祐七年五月。有告御史大夫脫忒哈等謀廢立。命悉誅之。籍其家。六月。收脫忒哈

廣平王卽秃禿合脫忒哈。與此脫脫哈實一人也。圖復碑作禿土哈鐵木迭兒傳作禿忒哈脫脫哈被誅之後其王爵當以木刺忽襲之。文宗紀天厯二年毀廣平王木刺忽印命哈班代之更鑄印以賜順帝紀至正十三年以怯薛官廣平王咬咬征討慢功削王爵哈班咬咬二人蓋亦博爾朮之裔本傳皆闕而不書。

博爾忽傳

許兀慎氏元明善淇陽忠武王碑作許慎氏李朮魯獅河南淮北蒙古軍都萬戶府增修公廡碑作旭申氏。

事太祖爲第一千戶歿于敵案博爾忽爲四傑之一本傳敘其事甚略乃於從孫塔察兒傳內載博爾忽事凡六十餘言詳略可謂失當矣。

子月赤察兒案姚燧撰姚文獻公神道碑云以太師淇陽王之兄故丞相木土各兒爲太子伴讀木土各兒亦作土木各兒其爲丞相蓋在中統初而本紀表傳俱失之又案月赤察兒子七人曰塔刺海曰馬刺曰瓜頭趙孟頫集作歪頭後更名脫兒赤顏曰迭禿兒也不干曰也先鐵木兒曰奴刺丁曰伯都塔刺海官至中書右丞相太保贈淇陽王諡惠穆瓜頭官至太師錄軍國重事遙授中書右丞相淇陽王也先鐵木兒官至中書右丞相知樞密院事淇陽王馬刺之子完者鐵木兒官至御史大夫太傅淇陽王一門貴顯若此而傳皆闕而不書史臣之失職甚矣。

札八兒火者傳

太祖遵引去。從行者僅十九人。札八兒與焉。至班朱尼河。班朱尼河。或作班朮居河。或作辨屯河。是時

同飲河水者十有九人。其可考者。李徒。亦乞烈部人。即李禿也。札八兒。賽夷氏。鎮海。怯烈台氏。哈散納。怯烈亦氏。懷都。蒙古怯

紹古兒。麥里吉台氏。雪里堅那顏。徹兀台比。阿朮魯。幹魯納台氏。塔海拔都兒。遜都思氏。耶律禿花。耶律阿海。而哈撒兒父

子。當亦與焉。其餘未詳。

諸王哈扎兒。當即哈撒兒。

朮赤台傳

朮赤台。祕史作主兒扯歹。

其光刺真八都。以材武雄諸部。生子曰兀魯兀台。曰忙兀。案祕史。納臣把都兒子曰兀魯兀歹忙忽台。

後為兀魯兀歹氏。忙忽台氏。納臣者。李端察兒之曾孫。與元同姓。即此傳之刺真八都也。太祖紀。宗室

表。俱作納真。畏答兒傳。作刺真八都兒。忙忽台。即忙兀。



廿二史考異卷九十四

元史九

鎮海傳

怯烈台氏。案許有壬撰神道碑云。系出怯烈氏。或曰本田姓。至朔方始氏怯烈。長春西游記。亦稱爲田鎮海。

大會兀難河。卽幹難河。

從攻塔塔兒欽察唐兀。只溫、契丹、女直、河西諸國。案唐兀卽河西。吳海王氏家譜序云。元初得天下。惟河西累年不服。最後乃服。世祖以其人剛直守義嘉之。賜姓唐兀氏。傳有唐兀。又有河西。蓋史臣不通譯語。而誤重出耳。輟耕錄載漢人八種。有竹溫歹。疑卽傳所云只溫也。

肖乃台傳

遣監軍李伯祐詣國王軍前言狀。案木華黎以太祖癸未歲卒。此時嗣國王者孛魯也。

抹兀蒼兒。歲戊戌。從國王忽林赤行省于襄陽。木華黎傳作忽林池。

敗阿里不哥於失木禿之地。世祖紀作昔木土。腦兒朮赤台傳作石木溫都。特薛禪傳作失木魯。鐵邁

赤傳作失木士囊加歹傳作失門禿杭忽思傳作失木里禿朵羅台傳作失畝里禿

吾也而傳史天倪傳作烏野兒

珊竹氏一作珊竹帶又作散朮台鄭玉撰珊竹公遺愛碑云蒙古族珊竹臺亦曰散朮其先蓋與國

家同出視諸臣族爲最貴元祕史李端察兒之兄曰不合禿撒勒吉後爲撒勒只兀惕氏卽散朮台也

姚燧撰烏野而卽吾也制詞云展我同姓豈伊異人其撰紐鄰制詞云率土之臣莫如同姓紐鄰亦珊竹

氏也

太祖五年吾也而與折不剌演克金東京案太祖紀遮別卽折不剌克東京在七年

九年從太師木華黎取北京案太祖紀取北京在十年

二十年從木華黎圍益都案木華黎卒於太祖十八年此圍益都者木華黎之弟帶孫與其子孛魯也

傳誤

子四人嘗禮最有名姚燧撰江東宣慰使珊竹公碑作撒禮撒禮子拔八忽由同知北京轉運司事累

遷濮州尹平滌路總管江南浙西道提刑按察使改江北淮東道提刑按察使召爲刑部尙書統於江

東宣慰使而傳失書

曷思麥里傳

攻乃蠻克之斬其主曲出律。即屈出律也。

若可失哈兒押兒牽幹端諸城皆望風降附。

可失哈兒即合失合兒。今之哈爾押兒牽即鴉兒看。今之葉爾羌

幹端即于闐也。玉堂嘉話古于闐今日幹端

與其主札刺丁。即札闐丁。

次子密里吉。中堂事紀作蜜里吉。石刻祭濟瀆記作蜜里及。

速不台傳

太宗刊本作太祖誤即位以禿滅干公主妻之。公主表不見禿滅干名。蓋宗王之女。非帝女也。

壬寅太宗崩。案本紀太宗崩在辛丑年。

兀良合台。卒年七十二。案兀良合台贈太尉開府儀同三司。追封河南王。諡武毅。唐皆失書。

按竺邈傳

父顯公為金羣牧使。歲辛未驅所牧馬來歸太祖。終其官。案趙世延傳曾祖顯公為金羣牧使。太祖得

其所牧馬。顯公死之二傳互異。

攻鞏昌駐兵秦州。秦當作秦。

畏蒼兒傳

時太疇強盛。即薛徹大丑也。

博羅獻傳

蘇木曷之孫。瑣魯火都之子也。案吳文正公集。鐵木合。即曷贈太尉。追封泰安王。諡武毅。唆魯火都。即

魯火都贈太尉。追封泰安王。諡忠定。傳皆不書。

皇子雲南王愛哥赤。當作忽哥赤。

伯都。泰定元年。還京師卒。案伯都贈江浙行省左丞相。追封魯國公。諡元獻。病失書。

巴而朮阿而忒的斤傳

先世居畏兀兒之地。有和林山。二水出焉。曰禿忽刺。曰薛靈哥。案歐陽原功高昌僕氏家傳云。偉兀者。

回鶻之轉聲也。其地本在哈刺和林。即今之和寧路也。後徙居北庭。北庭者。今之別失八里城也。會高

昌國徽。乃併取高昌而有之。高昌者。今哈刺和綽也。和綽本漢言高昌。高之音近和。綽之音近昌。遂為

和綽也。哈刺黑也。其地有黑山也。今偉兀稱高昌地。則高昌人則回鶻也。歐陽所云偉兀。即元史之畏

兀。或作畏吾。要皆回鶻之轉音。唐時回鶻牙帳。本在中國之北。即元和林之地。唐末為黠戛斯所并。其

種人西遷。據有北庭高昌之地。其國王稱亦都護。即葉護之轉聲也。

又有山。曰天哥里干荅哈。言天靈山也。蒙古謂天曰騰格里。即天哥里也。

南有石山。曰胡力荅哈。言福山也。胡力。猶言胡圖里。蒙古語。福也。

居是者九百七十餘載。而至巴而朮阿而忒的斤。案。唐末至元太祖之興。僅三百餘年耳。傳云九百七十餘載者。誤也。巴而朮阿而忒之父曰月仙帖木兒。見哈刺亦哈赤北魯傳。

是時帝征太陽可汗。射其子脫脫。殺之。脫脫之子大都。當作火都。赤刺溫。焉札兒。焉當作馬。禿薛干四人。以不能歸

全屍。遂取其頭涉也兒的石河。案。太祖紀。太陽罕。汗可爲乃蠻之長。脫脫爲蔑里乞。即滅里吉。之長。本各

自一部。太陽罕爲元祖所殺。其子屈出律罕與脫脫同奔也里的石河。而傳乃以脫脫爲太陽之子。謬

之甚矣。土土哈傳。太祖征蔑里乞。其主火都奔欽察。速不台傳。大軍至蟾河。與滅里吉遇。一戰而獲其

二將。盡降其衆。其主霍都奔欽察。霍都。即火都也。蓋即脫脫之子矣。

與者必那演征罕勉力。鎖潭。回回諸國。罕勉力。即哈密力。明史所謂哈密也。鎖潭。即算灘。西域王號。

其弟鏡吉。乃以讓嗣爲亦都護高昌王。案。文宗紀。至順三年。高昌王藏吉薨。其弟太平奴襲位。藏吉。疑

卽鏡吉也。考虞集高昌王世助碑。紐林的斤止有二子。與本傳合。則太平奴似非紐林之子矣。又案順

帝紀。至正十三年。亦都護高昌王月魯帖木兒。薨于南陽軍中。命其子桑哥襲。亦都護高昌王爵。月魯

帖木兒。亦未審何人之子。

按札兒傳

歲壬午元帥石天應守河中府屯中條山金侯將軍率昆弟兵十餘萬夜襲河中天應遣偏裨吳權府率五百兵出東門伏兩谷閒諭之曰俟其半過卽翼擊之俾腹背受敵卽成禽矣吳醉敵至聲援弗繼城遂陷天應死焉此事已見木華黎傳侯將軍者侯七也金史作侯小叔吳權府者吳澤也予謂天應戒吳權府語當載於本傳若木華黎按札兒兩傳但以金兵陷河中府一語了之可矣

歲庚寅李魯由雲中圍絳州列本粹作稗誤金將武仙恐退保潞東十餘里原上李魯馳至泌南未立鼓乞石烈引兵襲其後李魯戰失利案李魯卒于戊子歲庚寅領兵者李魯之子塔思也李魯當作塔思泌當作沁塔思傳本作沁南

暨國王李魯李魯亦塔思之誤

國王速渾察之子拾得案木華黎傳速渾察子四人忽林池乃燕相威撒蠻別無名拾得者惟乃燕子名碩德當卽拾得若然則爲速渾察之孫非其子矣后妃傳云木華黎曾孫世德楊桓傳云木華黎曾孫碩德世碩聲相近考木華黎孫國王塔思之子有碩篤兒於木華黎爲曾孫聲亦相近然碩篤兒乃速渾察之兒子亦非其子也

雪不台傳

雪不台蒙古兀良罕氏雪不台卽速不台譯音無定字也朱錫鬯云元史既有速不台矣而又別出雪

不台既有完者都矣。而又別出完者拔都。既有石抹也先矣。而又別出石抹阿辛。以及阿塔赤。忽刺出兩人。既附書于杭忽思直脫兒之傳矣。而又爲立傳。至於作佛事。則本紀必書游皇城入之禮樂志。當祭祀志。皆乖謬之甚者。子案元史列傳之重複者。如第十卷也蒲甘卜傳。附見其子昂吉兒。而第十九卷又有昂吉兒傳。第十卷塔不已兒傳。附見其孫重喜。而第二十卷又有重喜傳。第十卷已有阿朮魯傳。而第十八卷懷都傳。又附書阿朮魯事。第五十四卷譚資榮傳。附見其子澄。而第七十八卷良吏傳。又有譚澄。皆朱氏所未及糾也。

遠祖捏里弼。即捏里必。

曾孫合飭酒。即合赤溫。

長虎魯渾。即忽魯渾。

取駭里畏吾特勒赤憫等部。駭里。即撒里。

討兀魯思部主野力班。即也烈班。

攻馬剌部。即馬札兒。

昔里鈴部傳

唐兀氏。昔里氏。王憚有大名路宜差李公神道碑。李公即昔里鈴部也。其文云。公諱益里山。其先係沙

陀貴種。以世故徙酒泉郡之沙州。遂爲河西人。又中堂事紀載。中統二年。黜大名路達魯花赤愛魯。河西人。小李鈴部之子也。小李譌爲昔里。

與速卜帶征西域。卽速不台。

贈其祖昔里鈴部太師諡貞獻。案昔里鈴部之父蒼加沙。仕其國爲必吉華。言宰相也。亦以教化貴。累

太傅魏國公諡康懿。史失書。

召烈台抄兀兒傳

召烈台抄兀兒。案蒙古色目人皆以名行。不繫以氏族。召烈台者抄兀兒之氏。當云抄兀兒召烈台氏。方合史例。太祖紀作抄吾兒。

闊闕不花傳

歲庚寅。太祖命太師木華黎伐金。分探馬赤軍爲五部。案太祖以丁亥歲殂。木華黎之卒更在其前。庚寅則太宗二年也。其時領兵者蓋木華黎之孫塔思。此傳誤。

阿朮魯傳

蒙古氏。當從懷都傳。作斡魯納台氏。

抄兒傳

世居汴梁陽武縣。從太祖收附諸國有功。案抄兒系出別速氏與元同姓。太祖之世汴梁未入版圖。抄兒何以得居之。蓋太宗滅金以後其子孫始居陽武。史家誤取後來誌狀之文書於篇首而不悟年代之僨到也。

趙阿哥潘傳

制必帖木兒王承制。即只必帖木兒。

純只海傳

贈溫國公諡忠襄。案鄭玉集稱純直海即純只海為定西王。

搭本傳

下平灤白霄諸城。霄當作霽。下同。

哈刺亦哈赤北魯傳

子八兒出阿兒忒亦都護年幼。即巴而朮阿而忒也。

岳璘帖穆爾傳

回鶻人畏兀國相。噉欲谷之裔也。案歐陽原功高昌僕氏家傳云。僕氏其先世曰噉欲谷。本突厥部。突厥亡其地入於回紇。噉欲谷之子孫世為其國相。當從其主居僕輩河。因以僕為氏。數世至克直普爾。

襲本國相。荅刺罕錫號阿大都督。遼主授以太師大丞相。總管內外藏事。國人稱之曰藏赤立。死子岳
弼襲。岳弼七子。曰達林。曰亞思弼。曰衢仙。曰博哥。曰博禮。曰合刺脫因。曰多和思。岳璘帖穆爾。則亞思
弼之次子也。

太祖即位。以中原多盜。太祖當作太宗。

速哥傳

昔使過醇州。醇人盜殺其良馬。至是兼以醇民賜之。案食貨志歲賜篇無速哥名。

忙哥撒兒傳

察哈札刺兒氏。曾祖赤老温愷赤。案祕史。札刺亦兒種人。帖格列禿伯顏三子。長古温兀阿。即札温次

赤刺温孩亦赤。蓋即赤老温愷赤也。

宗王八都罕大會宗親。即拔都大王也。

汝高祖赤老温愷赤。暨汝祖搠阿事。我成吉思皇帝。案上文。搠阿為忙哥撒兒之祖。此諭其子。當稱汝

曾祖。不當云汝祖也。

速孟思傳

子九人。多至大官。案程鉅夫撰武都智敏王述德碑。述其世系甚詳。孟速思子十一人。曰脫因。宣政院

使太府卿。曰帖木兒不花。翰林學士承旨。曰小雲者。安西路同知總管府事。曰也迭列。平梁府達魯花赤。曰買奴。大司徒章佩。翰林學士承旨。曰阿失帖木兒。由宿衛起家。以字學授成宗。晉王武宗。武宗卽位。以師傅恩。授大司徒。翰林學士承旨。領太常禮儀院事。卒。贈太師。追封武都王。諡忠簡。曰乞帶不花。曰叔丹。吉州路達魯花赤。曰月古不花。中書左丞。曰火你赤。雲南都元帥。曰唐兀帶。四川宣慰司副都元帥。脫因之子。曰察牙孫。四川行省左丞。曰僧家奴。行大司農少卿。曰本牙失里。同知澧州路事。曰五十。唐州達魯花赤。曰蒼納失里。帖木兒不花之子。曰黑哥。曰德福。曰脫烈不花。曰長壽。也迭列之子。曰阿思蘭。開成路達魯花赤。買奴之子。曰阿兒灘。曰朶兒吉班。翰林侍讀學士。阿失帖木兒之子。曰別帖木兒。廬州路達魯花赤。曰忽禿。真州達魯花赤。曰寬者。太常少卿。曰火你。宿衛士。月古不花之子。曰狗兒。檀州達魯花赤。曰長安。火你赤之子。曰善善不花。唐兀帶之子。曰朶兒只。曰教化。曰牙八古。曰長安。曰伯顏察兒。史但書子九人。又不列其名。

賽典赤瞻思丁傳

回回人。別庵伯爾之裔。史不言別庵伯爾爲何人。考劉郁西征記。報達之西馬行二十日。有天房。內有天使。神胡之祖葬所也。師名癖顏八兒。房中懸鐵絙。以手捫之。心誠可及。不誠者竟不得捫。經文甚多。皆癖顏八兒所作。癖顏八兒。卽別庵伯爾。彼國中聖人也。

其國言賽典赤猶華言貴族也。石刻濟瀆靈異碑作賽天知。中堂事紀作賽典只兒。瞻思丁之父。名苦

魯馬丁。後追封王爵。見濟瀆碑。

葬鄴闌北門。地理志作善闌。

納速刺丁。訥。或作納。

中書左丞相。封延安王。案濟瀆碑。納速刺丁。諡宣靖。

伯顏察兒。諡忠憲。順帝紀作忠宣。

安童傳

從太子北平王出鎮極邊。在邊十年。案世祖紀。至元十四年七月。諸王昔里吉。劫北平王于阿力麻里之地。械繫右丞相安童。誘脅諸王以叛。本傳諱而不言。

廉希憲傳

廉希憲。字善甫。案廉氏系出畏吾。雖讀儒書。立名字猶循國俗。以畏吾語小字行。史惟載希賢一名中

都海牙。子考之。它書乃知希憲一名忻都。其子恂。一名米只兒海牙。一作密知海牙

西土親王執畢帖木兒。即只必帖木兒。

西域人匿贊馬丁。憲宗紀作匿咎馬丁。

廿二史考異卷九十五

元史十

伯顏傳

蒙古八隣部人。案輟耕錄八隣爲蒙古七十二種之一。祕史李端察兒妻阿當罕生子曰巴阿里歹。後爲蔑年巴阿鄰氏。卽八鄰也。

曾祖述律哥圖。元明善撰淮安忠武王碑云。朮律哥圖贈太尉。追封淮安王。諡武定。阿刺贈太傅。追封淮安王。諡武康。曉古台贈太師。追封淮安王。諡武靖。

從宗王旭烈兀開西域。旭烈兀。睿宗第六子也。至元辨僞錄。今煦烈大王。卽旭烈兀。皇帝親弟。鎮守西域。在尋思千西南雪山之西。使命往還。來往不絕。

通判權州事趙昂發。昂。當作昂。或作卯。

乃命議事官張羽等。羽。字飛卿。秦中人。

調淮東都元帥李魯歡。卽博羅歡。

遣程鵬飛、洪雙壽等入宮。洪雙壽。卽洪雙叔也。

又令軍士有捕塔刺不歡之獸而食者。塔刺不歡。即塔刺不花獸名。狀如獾。見祭祀志。

阿朮傳

生擒其將趙范二統制。即趙文義、范興也。伯顏傳云。伯顏手殺文義。擒范興殺之。則文義非生擒矣。二

傳互異。

追封河南王。案。阿朮諡武定。其子不憐吉歹。官至河南行省左丞相。封河南王。傳皆失書。

土土哈傳

諸王脫脫木失烈吉叛。失烈吉。即河平王昔里吉也。脫脫木。或作脫帖木兒。見楚王牙忽都傳。考宗室表。睿宗

第十子。歲都哥大王之孫。有荆王脫脫木兒。疑即其人也。又睿宗第六子。旭烈兀大王之孫。亦有脫脫

木兒王。

又敢寬折哥等。伯荅兒傳。作寬赤哥思。

宗王乃顏叛。陰遣使來結也不干。勝刺哈。勝刺哈。即濟南王勝納合兒。或作勝納哈。見諸王表。亦作聲刺哈

兒。見學禿傳。也不干。或作也不堅。見楚王牙忽都傳。考宗室表。幹赤斤國王位下。闊列堅太子位下。合丹大王位下。

俱有也不干大王。今據世祖紀。至元廿四年七月。罷乃顏所署益都平滌。也不干河間分地。達魯花赤

及勝納合兒。濟南分地所署官也。不干分地在河間。則為闊列堅之曾孫無疑。

有詔進取乞里吉思。地理志作吉利吉思。

師至欠河。地理志作謙河。

身至玉龍罕界饋餉安集之。玉龍罕疑卽玉龍蒼失。憲宗第三子也。

導諸王岳木忽等入朝。卽藥木忽兒。

牀兀兒。命尙雅忽秃楚王公主察吉兒。雅忽秃卽牙忽都。

諸王都哇察八兒、明里帖木兒等。都哇或作朶瓦或作篤娃。明里帖木兒或作滅里鐵木。而宗室表中

未見此二人名。

蒼里襲封句容郡王。案文宗紀天祿二年正月以牀兀兒之子蒼鄰蒼里襲父封爲句容郡王十一月

以蒼鄰蒼里知行樞密院事卽此蒼里也。

紐璘傳

子也速蒼兒。世祖以屬行樞密院火都赤。案下文有行樞密副使忽敦疑卽一人。

長子南加台官至四川行省平章政事。卽囊加台也。文宗朝以拒命見誅。

阿剌罕傳

祖撥徹。案撥徹累贈司徒追封曹國公諡忠定。進封曹南王也。柳千贈中書右丞相追封曹國公諡桓

毅進封曹南王傳失書。

幼隸皇子岳里吉爲衛士。案宗室表太宗七子無岳里吉名。表又引憲宗紀太宗以子月良不材故不

立爲嗣。岳里吉豈卽月良之轉聲乎。

歲乙未從皇子闕出忽都禿南征。案忽都禿別自一人非皇子也。太宗紀作胡土虎。

四年春授上萬戶從都元帥阿朮伐宋。案阿刺罕從阿朮南伐乃至元四年事。此傳四年之上當有至

元字中統紀元止于四年。此有五年十年十一年十二年十三年十四年十八年皆至元之年也。

行至慶元卒于軍中。案阿刺罕贈太師追封曹國公諡宣武。虞集曹南王世德碑作武定進封曹南王諡忠宣傳俱

失書。

子拜降襲。案許有壬撰曹南王神道祠堂兩碑俱云子男二人長也速迭兒山東河北蒙古軍大都督

集賢大學士次脫歡中書平章政事江南行臺御史大夫無所謂拜降者。虞集曹南王世德碑云阿刺

罕旣歿子也速迭兒幼拜降也速迭兒之兄也襲世職爲萬戶總其軍然則拜降乃阿刺罕昆弟之子

非其子矣。史以拜降爲阿刺罕子誤。

李恆傳

其先姓於彌氏唐末賜姓李。世爲西夏國王。案西夏之先本拓跋氏於彌與拓跋音不相近。蓋元時國

俗之語。吳澄撰李世安即散墓誌云。公西夏賀蘭於彌部人也。

子散尤解。江西行省平章政事。據吳澄墓誌。知散尤解一名世安。囊加真。一名世雄。遜都台。一名世顯。誌稱世安子五人。長妃。翰林直學士嶼。懷遠大將軍。襲萬戶妃。疑即薛徹干。嶼。疑即薛徹禿也。元時唐兀畏吾人。往往有兩名。

徹里傳

燕只吉台氏。蘇天爵名臣事略云。衍只吉氏神道碑。作燕只吉臺氏。

九年。召入爲中書平章政事。十月。以疾薨。案成宗紀。大德十年閏正月。以江浙行省平章闊里爲中書平章政事。闊里。即徹里也。宰相表。亦於大德十年書徹里名。惟姚燧撰神道碑云。九年。召入平章中書。而名臣事略因之。蓋被召在九年。而入中書則在十年。俱未誤也。但碑文召入平章中書之下云。贊右丞相。專力一心。變和庶政。纔一寒暑。遂疾不出云云。而後云。十月八日薨。則徹里之卒。仍在大德十年。非九年矣。事略于九年入拜中書平章政事之下。即云是歲薨。蓋未細釋元文之故。傳又承事略之誤。而不知與表紀自相抵牾也。

不忽木傳

燕真未及大用而卒。案燕真。後贈太傅。河南行省左丞相。追封晉國公。諡忠獻。其父海蓋伯。亦追封河

東郡公史失書。

河東按察使阿合馬。此又一阿合馬。非姦臣傳之阿合馬也。

吐土哈求欽察之爲人奴者。卽土土哈。

帝每願侍臣稱塞陞旂之能。疑卽賽典赤。

上柱國魯國公諡文貞。案順帝時。又加贈太師。進封東平王。

完澤傳

父線真。中統初。從世祖北征。四年。拜中書丞相。丞相上脫右字。線真以宣徽使終。後贈太師。追封秦益

國公。諡忠獻。傳失書。

年五十八。完澤有子長壽。大德九年。任中書右丞。傳亦失載。

阿魯渾薩理傳

子三人。長岳柱。趙孟頫撰趙國文定公碑。作爻著。

子四人。長普達。次安僧。次仁壽。案岳柱子四人。傳惟載其三。考趙孟頫撰碑。稱阿魯渾薩理孫男四。曰

普達。蒼里麻。安僧。則傳所遺一人。當卽蒼里麻也。岳柱昆弟三人。買住旣早卒。久著。又以兄之子爲後。

皆必無嗣。則蒼里麻亦岳柱之子無疑矣。碑不載仁壽者。孟頫卒於至治初。撰碑之時。仁壽尙未生也。

囊加歹傳

祖合折兒。案趙孟頫集有殊詳院使執禮和台。封贈三代制。曾祖哈直兒。贈太保。追封梁國公。諡莊襄。即合折兒也。祖馬察。贈太傅。追封梁國公。諡桓武。即麻察也。父囊加。贈太師。追封浚都王。諡武忠。即囊加歹也。

忙兀台傳

祖塔思火兒赤。案傳失載忙兀台父名。今東平州有忙兀臺。公光昭先祖神道碑云。塔思子鐵里哥。襲父職。授行軍千戶。鐵里哥子曰札刺兒台。眞州達魯花赤。福建等處鹽課市舶都轉運使。曰雍乞刺台。曰亦乞里台。襲祖職。遷浙西道宣慰使。忙兀台。其季子也。

完者都傳

子十四人。皆仕。而帖木禿古思。別里怯都尤顯。案完者都十四子。曰帖木禿古思。襲高郵上萬戶府達魯花赤。遙授右丞。淮東西宣慰使。曰別里怯都。江浙行省左丞。燕南道廉訪使。曰插都。無錫州達魯花赤。曰不花。曰別里。長興州達魯花赤。曰徹里帖木兒。高郵打捕屯田提舉司達魯花赤。曰伯不花。曰幢合兒。曰出不昆。曰八刺。曰黑黑。曰潮潮。曰佛保。曰和尚。見程鉅夫所撰林國武宣公碑。

步魯合蒼傳

蒙古宏吉刺氏。案步魯合荅乃按竺邇之孫。系出雍古氏。非宏吉刺氏。雍古爲色目之一種。非蒙古史誤。

祖按主奴。卽按竺邇。

父車里。卽徹理。

次黑子。次帖木兒。黑子卽黑梓。一名國寶。帖木兒一名國安。黑子之子那懷卽世榮也。

昂吉兒傳

姓野蒲氏。世爲西夏將家。歲辛巳。父甘卜率衆歸太祖。卽也蒲甘卜也。也蒲甘卜傳。附書昂吉兒事。昂

吉兒傳。又追敘甘卜事。兩傳重出。而有餘簡之殊。當去彼存此。

分木華黎及阿朮所將河西兵。俾將之。此木華黎乃察罕之子萬戶木花里。非國王木華黎也。

翰林承旨和魯火孫。卽和禮霍孫。

哈刺解傳

哈魯氏。危素撰合魯公家傳云。合刺解公。系出合魯氏。合與哈。擊相近。父八合。賜名奧藥拔都。贈沿海翼管軍

萬戶。追封汝南郡侯。史失載其父名。

忽刺出傳

祖赤脫兒。卽直脫兒也。列傳第十卷。已爲立傳。并附及忽刺出事矣。此傳重複。當刪。

重喜傳

祖塔不已兒。此與第十卷塔不已兒傳重複。當刪。

完者拔都傳

欽察氏。其先彰德人。案欽察內附之後。有徙居彰德者。故完者拔都。有林國公之封。

孛蘭奚傳

雍吉烈氏。世居應昌。卽宏吉刺氏。

暗伯傳

乃客居於闐宗王阿魯忽之所。案宗室表。察合台之孫。有阿魯忽大王。

亦憐眞班。湖廣省左丞。亦憐眞班。有傳在第三十二卷。官至湖廣行省左丞相。終于江西行省左丞相。

非左丞也。

撒吉思傳

回鶻人。其國阿大都督多和思之次子也。案多和思。亦噉欲谷之裔。與亞思弼爲昆弟。

初爲太祖弟幹眞必闐赤。幹眞卽幹赤斤也。

幹眞薨。長子只不干蚤世。適孫塔察兒幼。庶兄脫迭狂恣。欲廢適自立。案宗室表。只不干大王之兄。尙有幹端大王。表亦無脫迭名。

月乃合傳

曾祖帖木爾越哥。仕金爲馬步軍指揮使。官名有馬。因以馬爲氏。案馬祖常傳云。高祖錫里吉思。金季爲鳳翔兵馬判官。子孫因其官以馬爲氏。祖常撰禮部尙書馬公神道碑云。公諱月合乃。即月乃合。又作月忽乃。父錫里吉思。仕金爲鳳翔兵馬判官。死節。官名有馬。因以立氏。與此傳互異。祖常爲月乃合之孫。敘其先世。似不應誤。今考金史忠義傳。馬慶祥。字瑞寧。本名習禮吉思。先世自西域入居臨洮狄道。以馬爲氏。習禮吉思。即昔里吉思也。亦作錫里吉思。史既系以馬姓。則以馬立氏。由來已久。昔里吉思。又以兵馬判官死節。子孫引以爲榮。故歸之昔里吉思耳。且昔里吉思父名。卽有馬字。若以己官命氏。又於父諱有嫌。故知馬氏之始。當以此傳爲正也。

祖把掃馬野禮屬。徙靜州之天山。案馬祖常傳作靖州。金史忠義傳作淨州。以金元二史地理志證之。當從淨爲是。

父昔里吉思。鳳翔府兵馬判官。死國事。贈恆州刺史。案元好問撰恆州刺史馬君神道碑云。子男三人。長三達。次鐸刺。次福海。不見月乃合之名。蓋金元之際。多一人而兩名也。

至仁宗朝。詔行科舉。曾孫祖常。博學能文章。鄉試會試皆爲舉首。案馬祖常既別爲立傳。此復附見六十餘言。贅矣。當云曾孫祖常自有傳。

鐵連傳

然必先詣拔都。蒙哥鐵木王所。二人皆朮赤太子之子。蒙哥鐵木宗室表。作忙哥帖木兒。

愛薛傳

西域弗林人。案世祖紀。至元十年。改回回愛薛所立京師醫藥院名廣惠司。則愛薛亦回回人。拂林。則其所居之地也。拂林。古大秦國。故有秦國公之封。

也里牙秦國公。文宗紀作野里牙。

腆合翰林學士承旨。文宗紀作典哈。

和尚傳

玉耳別里伯牙吾台氏。案伯牙吾台者。欽察之族。玉耳別里則欽察所居地名。玉里伯里也。然則和尚乃欽察人。

迦魯納荅思傳

是年八月卒。案。迦魯納荅思之後稱魯氏。子鐵柱。靖州路達魯花赤。孫重喜。崇仁縣達魯花赤。



廿二史考異卷九十六

元史十一

小雲石脫忽憐傳

獵真官至榮祿大夫中書省平章政事。案宰相表自至元二十九年。至大德三年。俱有平章政事。刺真。

即獵真也。

子察乃中書省平章政事。案宰相表至大元年閏十一月至四年。有平章政事察乃。泰定三年四年。又

有平章政事察乃。

察乃子十人。老章。知樞密院事。撒馬篤。中書省參知政事。按察乃十子。曰孛孛實。河東道宣慰使。曰老

漢。曰亦輩真。遼陽行省左丞。曰老章。知樞密院事。封和寧王。曰草地里。真定路達魯花赤。曰捏烈禿宮

傅。曰蒼刺海。曰羅羅。江東道廉訪使。曰撒馬篤。中書參知政事。曰伯顏帖木兒。光祿少卿。

也。先不花傳

與蒙哥撒兒密贊謀議。即忙哥撒兒。

禿魯。歷事四朝。三公宰相表。竝作禿忽魯。

追封廣陽王。案秃魯諡清獻。史失書。

子阿榮。由宿衛起家。當云阿榮自有傳。由宿衛起家以下三十七字。皆可刪。

鐵哥朮傳

曾祖父達釋。案下文云達釋之子野里朮。又云鐵哥朮野里朮之長子。則此云曾祖父者。誤也。

塔出傳

塔出布兀刺子也。案此傳不言其氏族。布兀刺亦不見於它傳。

阿荅赤傳

阿荅赤阿速氏。杭忽思傳作阿塔赤。

父昂和思。卽杭忽思。

阿里不哥叛。從也兒怯等征之。杭忽思傳作也里可。

哈刺哈孫傳

曾祖啓昔禮。始事王可汗脫斡璘。太祖紀汪罕名脫里脫斡璘。卽脫里。語有緩急爾。王可汗卽汪罕。王可汗與太祖約爲兄弟。案太祖紀曾汪罕爲父。蓋約爲父子。非約爲兄弟也。

賜號蒼刺罕。案啓昔禮子博理察孫囊加台皆襲蒼刺罕之號。劉敏中撰順德忠獻王碑云啓昔禮諡

忠武博理察諡忠毅。囊加台諡忠愍。三世皆贈太師。追封順德王。

祖宗之制。非親王不得加一字之封。案世祖之世。燕秦梁晉諸王。皆皇子也。自武宗嗣位。而越王禿剌。始以宗室得封。由是齊楚幽寧濟定以宗族。鄒魯以駙馬。皆得一字之封。皆自禿剌啓之。

阿沙不花傳

牙牙後封康國王。生六子。案牙牙子六人。曰李別舍兒。曰和者吉。贈太保。追封榮王。諡忠武。曰不別。遙授甘肅行省右丞。曰幹禿蠻。曰阿沙不花。曰脫脫。史有傳者。惟阿沙不花脫脫二人。和者吉之子四人。曰燕不鄰。遼陽行省平章政事。太保興國公。追封興寧王。諡忠襄。曰燕八思提。大司徒。曰別不花。嶺北行省平章政事。曰伯撒里。太師中書右丞相。永平王列傳。略不及之。

諸王迷里帖木兒。武宗紀作明里鐵木兒。

拜住傳

追封東平王。諡忠獻。至正初。改正仁孚道一德佐運功臣。餘如故。案至正中。進封鄆王。諡文忠。夫人安妥輝。諡貞靜。又進封安童魯王。兀都帶堯王。竝見黃潛所撰鄆文忠王碑。史惟載改賜功臣號。而不及封諡。亦討論之疏也。

子篤麟鐵穆爾。案黃潛碑。拜住子二人。長蒼刺麻碩理。泰定紀作蒼刺麻失里宗仁。蒙古衛親軍都指揮使。次因

牙納碩理。文宗時。賜名篤麟。鐵穆爾。襲職。環衛宗仁。蒙古衛親軍都指揮使。歷太宗正府。扎魯忽赤。宣徽使。知樞密院事。大司農。史惟載篤麟。鐵穆爾一人。又不著其官。宋景濂嘗受業於晉卿。豈於其師之文集。亦未寓目邪。總裁之失其職如此。曾脫脫之不若矣。

曲樞傳

曲樞。紀表皆作曲出。

祖阿達台。父質理花台。世贈功臣。追封王爵。案。阿達台。質理花台。俱追封祁連王。後以疾薨于位。案。曲出後贈太師。追封廣陽王。諡忠惠。子伯帖木兒。贈太傅。追封文安王。諡忠憲。

康里脫脫傳

武宗與大將朶兒荅哈語及之。土土哈玉哇失傳。作朶兒朶懷。世祖紀。作朶兒朶海牙。忽都傳。作朶兒朶哈。

時諸王禿剌等待。卽越王禿剌也。

尋召拜中書左丞相。至大三年。尙書省立。遷右丞相。四年正月。復爲中書左丞相。案。武宗紀。脫脫未嘗入尙書省。其爲尙書右丞相者。乃脫虎脫也。至大四年正月。武宗崩。仁宗命罷尙書省。以丞相脫虎脫等。變亂舊章。流毒百姓。命中書省臣參鞠。皆伏誅。安得有復爲中書左丞相之事乎。宰相表於至大元

年二年三年書中書左丞相脫脫。此康里脫脫也。又於至大二年書尙書左丞相脫脫。三年書尙書右丞相脫脫。此別是一人。本紀所云脫虎脫也。傳誤以爲一人。而賢否混淆矣。

時帖赤先爲大夫。卽鐵失。

燕鐵木兒傳

辛酉。以燕鐵木兒兼奎章閣大學士。領奎章閣學士院事。此事據文宗紀。在至順三年二月辛酉。傳繫于二年十一月。誤也。又據上文書十一月癸未。癸未至辛酉。三十九日。不得在一月之內。

伯顏傳

蔑兒吉姆氏。案。馬祖常太師秦王佐命元勳碑。作滅兒吉姆氏。危素送彭公權序。稱脫脫爲蔑里期公。曾大父探馬哈兒。案。馬祖常碑。探馬哈兒。贈太傅。追封梁國公。進封陽翟王。諡敬簡。加贈太師。追封淮陽王。諡忠靖。

太父稱海。案。稱海官領軍百戶。贈太師。追封梁國公。進封河南王。諡莊順。又進封淮王。諡忠襄。父謹只兒。案。謹只兒。贈太師。追封河南王。進封鄭王。諡忠懿。構陷鄭王徹徹篤。宗室諸王二表。脫脫傳。皆作徹徹禿。

馬札兒台傳

泰定四年拜陝西行臺治書侍御史。案文宗紀天厯元年河南行省召陝西行臺侍御史馬札兒台不至。二年八月以馬札兒台爲上都留守馬札兒台前爲陝西行臺侍御史坐塗毀詔書得罪以其兄伯顏有功故特官之傳不載其拒命獲罪又起爲上都留守一節諱之也然天厯起兵實爲畔逆西臺助上都起兵允合臣子之義元時史臣或未免曲筆明初修史諸人何亦昧於上下之分沒而不書乎若囊加台等有死無二元史竟不爲立傳何以勸忠義之士宋王兩公不獨無史才并無史識矣。

乃蠻台傳

木華黎五世孫。案乃蠻台之曾祖孛魯卽木華黎之子實止四世。

七年拜嶺北行省右丞。案此文在大德五年之下則是大德七年矣考大德十一年始置和林行省皇慶元年改爲嶺北省是大德以前未有嶺北行省傳文嘗有脫誤。

奉命送太宗皇帝舊符皇兄之寶於其後嗣燕只哥斛。案木亦察合台皆太宗之兄燕只哥斛必其後也而宗室世系表不著其名泰定紀泰定四年諸王燕只吉台襲位遣使來朝蓋卽其人。

朶兒只傳

木華黎六世孫。案朶兒只父脫脫祖撒蠻曾祖速渾察高祖孛魯距木華黎止五世。天厯元年朶羅台國王自上都領兵至古北口。案朶羅台爲乃蠻台之兄當亦忽速忽爾之子。

吳王朶爾赤。案宗室表哈赤温大王之後。有吳王朶列捏。吳王木喃子。未見朶爾赤名。

朶兒直班傳

木華黎七世孫。案朶兒直班。父別理哥帖木爾。祖碩德。曾祖乃燕。高祖速渾察。五世祖字魯。距木華黎止六世。

黜御史大夫懿憐真班。卽亦憐真班。

阿魯圖傳

父木忽刺。當作木刺忽。

太平傳

國王朶而只爲左丞相。卽朶兒只。

鐵本兒塔識傳

國王脫脫之子。案元時惟木華黎後裔。得襲國王之號。鐵本兒塔識。系出康里氏。其父脫脫。雖追封和寧王。不得蒙國王之稱也。

時修遼金宋三史。鐵本兒塔識爲總裁官。案遼史總裁官六人。中書平章政事鐵睦爾達世。中書平章政事賀惟一。翰林學士承旨張起巖。翰林學士歐陽元。集賢侍講學士兼國子祭酒呂思誠。翰林侍講

學士揭傒斯。金史總裁官八人。御史大夫帖睦爾達世。中書平章政事賀惟一。翰林學士承旨張起巖。翰林學士歐陽元。翰林侍講學士揭傒斯。治書侍御史李好文。崇文太監楊宗瑞。禮部尚書王沂。宋史總裁官七人。中書平章政事帖睦爾達世。御史大夫賀惟一。翰林學士承旨張起巖。翰林學士承旨歐陽元。治書侍御史李好文。禮部尚書王沂。崇文太監楊宗瑞。遼史進表。在至正四年三月。金史進表。在四年十一月。宋史進表。在五年十月。據宰相表。鐵木兒塔識。以至正五年七月爲御史大夫。太平即賀惟一亦以五年十月爲御史大夫。則表上金史之時。鐵木兒塔識尙爲平章。何以卽稱御史大夫。及次年宋史告成。已授御史大夫。何以轉稱平章。太平拜御史大夫時。當已改名。而表仍書賀惟一。皆可疑也。

龔夔傳

祖燕真。事世祖。從征有功。燕真事已見不忽木傳。此重出。

回回。擢中書右丞。力辭還第。案。宰相表。天厯元年九月至十一月。有右丞回回名。刊本作回。回四誤。蓋任事未久。卽辭位也。

以疾卒。案。回回子五人。祐童。濟寧路總管。帖木列思。江南行臺治書侍御史。於史例當附書。

自當傳

蒙古人也。案。自當爲別兒怯不花之兄。當云燕只吉姆氏。

會次三皇后殂。命工部撤行殿車帳。皆新作之。案順帝紀。至正七年。隆福宮三皇后安吉刺氏木納失里薨。疑卽此事。傳誤繫之泰定二年後耳。

帝欲加號太后。曰太皇太后。命朝堂議之。自當獨曰。太后稱太皇太后。於典禮不合。眾皆曰。英宗何以加皇太后曰太皇太后。自當曰。英宗孫也。今上子也。太皇太后之號。孫可以稱之。子不可以稱之也。議遂定。案傳書此事於文宗卽位之前。則亦在泰定朝也。考泰定初立時。母妃久已先歿。故紀書至治四年十二月。請皇考皇妣諡于南郊。尊皇妣晉王妃曰宣懿淑聖皇后。而后妃傳載泰定四年册文有云。仰徽音之如在。慨至養之莫加。是泰定帝未嘗加尊其母爲太后。安得有加號爲太皇太后之事乎。以太后爲太皇太后。惟見于順帝之世。使自當果有此議。當在順帝時。然議而不從。又不當云議遂定也。

秦不華傳

伯牙吾台氏。案伯牙吾台。欽察之氏。則兼善蓋欽察人也。傳又云。世居白野山。白野卽伯牙之轉。蓋蒙古諸部人。往往以所居地爲氏。

初名達普化。文宗賜以今名。予見至正三年松江府廟學記。題云。紹興路總管兼管內勸農事知渠堰事秦普華篆額。普華卽不華也。譯音無定字。達與秦。不過音之轉。普化與不華。北音亦無異。兼善登第時。榜書達普化。後來受制命。又作秦不華。故史以爲文宗賜名。然當時士大夫。多以達兼善稱之。或稱

爲達祕書兼善亦自題秦普華可見賜名之說未足深信。

年四十九時十二年三月庚子也。翁方綱云秦不華死台州本傳在壬辰三月而鐵厓挽詩注云辛卯

八月歿于南洋。

余闕傳

追封豳國公諡忠宣。案程國儒序青陽集云諡文忠追封夏國公張紳以爲初贈夏國公諡忠愍改贈

豳國公諡忠宣丁鶴年有過安慶追悼余文貞公詩宋景濂手定元史而集中余左丞傳亦作文忠未

審孰得其實。

蒼里麻傳

大父撒吉斯。卽撒吉思有傳在第二十一卷。

卜顏鐵木兒傳

唐兀吾密氏。案察罕傳稱唐兀烏密氏北人讀吾如烏蓋同族也李恆傳稱於彌氏與烏密聲亦相近。

星吉傳

會祖朶吉祖搠思吉朶而只父搠思吉。案朶吉贈河南行省平章政事追封秦國公改封雍王搠思吉

朶而只贈甘肅行省平章政事追封代國公改封涼王搠思吉贈陝西行省平章政事追封趙國公改

封邪吉王。

年五十七。案星吉贈江西行省丞相。追封威寧王。諡忠肅。

亦憐眞班傳

父俺伯。卽暗伯。

廉惠山海牙傳


預修遼宋金三史。今案遼史前列纂修官。有兵部尙書廉惠山海牙名。而金宋二史無之。其爲兵部尙書。又傳所失書也。

月魯不花傳

蒙古遜都思氏。案月魯不花。太祖功臣赤老溫之五世孫也。赤老溫子納圖兒。御位下必闌赤。納圖兒子察刺。隨州軍民達魯花赤。察刺子忽納。襲父職。官至江東廉訪使。追封陳畱郡侯。諡景桓。脫帖穆耳。則忽納次子也。以蘄縣萬戶府東平等處管軍上千戶。所達魯花赤分戍。自明而越。

達禮麻識理傳

廿四年。朝廷以前中書平章政事塔失帖木兒來爲留守。塔失帖木兒。蓋別兒怯不花之子。下文或云塔世帖木兒。或云達世帖木兒。其實一人也。



廿二史考異卷九十七

元史十二

耶律楚材傳

遼東丹王突欲八世孫。案列傳自第五卷特薛禪以下至第三十二卷皆蒙古色目人自第三十三卷耶律楚材以下至第七十五卷皆漢人南人也。耶律石抹系出契丹粘合與屯系出金源當時目爲漢人故在漢人南人之列。高智耀李恆李楨本西夏人國語謂之唐兀氏馬祖常本出雍古部皆色目也。太平漢人而賜姓蒙古氏故皆在蒙古色目之列。趙世延乃按竺邇之孫系出雍古楊朵兒只西夏人皆當入色目而誤與漢人同列此則史臣之失檢也。

父履以學行事金世宗特見親任終尙書右丞。金史有移刺履傳卽楚材之父也。移刺耶律聲本相近。陳旅述律復舊氏序稱金人改耶律爲曳刺述律爲石抹曳刺謂前馬之卒也。石抹謂臧獲也。經世大典序錄云守狴犴防囚徒者曰禁刺追呼保任逮捕者曰曳刺則曳刺非美名矣。食貨志歲賜篇有曳刺中書兀圖撒罕里。卽吾圖撒罕里也。謂楚材也。蓋元初猶沿金人之舊稱後來皆易耶律字矣。

粘合重山傳

金源貴族也。案金史百官志岡語解俱不載粘合氏。或云卽粘割之譌。金史列傳有粘合荆山。衛紹王紀有粘合合打。

楊惟中傳

初滅金時以監河橋萬戶劉福爲總管。福貪鄙殘酷。虐害遺民。二十餘年。惟中至。召福聽約束。福稱疾不至。惟中設大梃於坐。復召之。使謂福曰。汝不奉命。吾以軍法從事。福不得已。以數千人擁衛見惟中。惟中卽握大梃擊仆之。數日福死。案趙璧傳。河南劉萬戶貪淫暴戾。其黨董主簿尤恃勢爲虐。強取民女有色者三十餘人。璧至。案其罪立斬之。劉大驚。時天大雪。因詣璧相勞苦。且酌酒相賀曰。經略下車。誅鉏強猾。故雪爲瑞。應璧曰。如董主簿。比者尙有其人。俟盡誅之。瑞應將大至矣。劉屏氣不敢復出語。歸臥病而卒。時人以爲懼死。所云劉萬戶者卽劉福也。壬子歲。世祖立經略司於汴。以忙哥。史天澤。楊惟中。趙璧爲使。惟中久當樞軸。遇事能斷。而璧實助之。然兩傳言劉福事互異。

張柔傳

繼而道潤爲其副。賈瑀所殺。案金史。苗道潤之死。在興定二年。卽戊寅歲也。此傳先書道潤被殺。而後書戊寅。似未甚核。

金主敗走睢陽。案史臣紀事。不當用古地名。此傳金主走睢陽。金主走汝南。當時無此郡縣名也。

史天倪傳

乃以天倪爲萬戶。案劉黑馬傳太宗卽位始立三萬戶以黑馬爲首重喜史天澤次之姚燧撰邱澤神道碑云國初以二萬戶鎮撫中夏右則劉伯林軍秦左則粘合重山軍燕顧成謂太則益太尉史忠武公天澤爲真定河開濟南東平大名五路萬戶於中然則太祖之世漢軍萬戶祇有劉伯林粘合重山二人據此傳似史天倪在太祖時已有萬戶之名予嘗見史秉直神道碑及史氏慶源碑皆立於太宗朝其稱天倪但云河北西路兵馬都元帥是天倪未嘗授萬戶可以證此傳之誤。

實與蒲瓦兵遇於南門合達兵自北奄至實兵敗竟爲所執案嚴實兵敗被執得脫事不見於本傳。又徙河間卒案史權諡武穆權子燿官至大司農諡義襄傳俱失書。

史天祥傳

降其北京畱守銀荅忽。太祖紀作寅荅虎。

授蒙古漢軍兵馬都元帥總十二萬戶鎮河中。案此事在太祖癸未歲考太祖初置蒙古左右手及中軍萬戶以木華黎博爾朮納牙爲之漢軍則有劉伯林粘合重山二萬戶此十二萬戶未詳何時增置也。

董俊傳

文用。子八人。士貞、士亨、士楷、士英、士昌、士恆、士廉、士方。案列傳附載子孫必其人名位顯貴或才德

可稱。否則似家乘之文。非國史矣。董氏爲元世臣。士貞等八人。自當登名仕版。史家既失於稽考。而徒覲列其名。不已贅乎。至如文忠之子士珍。官至中書參知政事。御史中丞。贈太傅。追封趙國公。諡清獻。士恭官陝西行臺中丞。士珍子守節。官中書左丞。御史中丞。追封冀國公。諡忠肅。傳無一語及之。又何其疏也。又列傳敘述先代。亦必有功德可稱。方表而出之。王鶚之曾祖孫成。祖立。父琛。三世俱無所表見。又未出仕。史不應備書其名。此必采自誌狀。而不知其當刪也。

嚴實傳

子忠貞、忠濟、忠嗣、忠範、忠傑、忠裕、忠祐。案忠範以上四人。傳不書其事。考至元十二年。忠範以工部侍郎與廉希賢等。持國書使宋。爲張濡所殺。此事之大者。傳不應略而不言也。又實之孫度。官至甘肅行省左丞。諡貞憲。見柳貫集。史亦失書。

劉伯林傳

太傅耶律禿懷。卽耶律禿花。

黑馬。太宗卽位。始立三萬戶。以黑馬爲首。重喜。史天澤次之。案元史無重喜傳。不知其氏族。列傳第
二十卷有重喜。此以姚燧撰邱澤碑推之。疑是粘合重山之族。而重山傳不言授萬戶。別是一人。

石天應傳

子煥中知興中府事執中行軍千戶。案木華黎傳云以天應子幹可襲領其眾傳無幹可名蓋一人二名史家不能悉書也。

移刺捏兒傳

遼亡金以爲參議留守等官皆辭不受聞太祖舉兵私語所親曰爲國復讎此其時也。案遼亡之歲歲在乙巳即宋宣和七年至元太祖建號之年丙寅相距八十餘歲若遼亡時已能辭官則此時年近百歲必無能與攻戰之理史家以其系出耶律妄爲此說而不悟年歲之不符也。

致拒戰捏兒出奇兵掩擊斬致。案木華黎王珣傳俱云張致部將高益縛致出降獨此傳云掩擊斬致恐未足信。

復從木華黎攻益都。案太祖丙戌歲平益都其時木華黎已前卒矣領兵者木華黎之弟帶孫也。

何伯祥傳

追封易國公諡武昌。趙孟頫撰何璋神道碑云諡忠毅。

璋始襲父職。碑云璋字仲輿。

賽曲赤八都高等還自貶所。曲當作典此賽典赤謂伯顏也本賽典赤瞻思丁之孫襲祖號亦稱賽典赤八都高當爲八都馬辛。

改河南行尙書省平章政事卒。碑云年六十有六。子德嚴。順德路總管德溫保定翼副萬戶。

李守賢傳

弟守忠爲都元帥。守河東。朝廷以全晉爲要害之地。人心危疑未定。非守賢鎮撫之不可。今以李伯溫傳參考之。知守忠先爲河東南路都元帥。知平陽府事。鎮平陽。守溫亦以行平陽元帥府事。鎮青龍堡。丁亥歲。相繼陷沒。乃以守賢代之。傳失載守忠被執事。則人心危疑之語。太無著矣。

郝和尚拔都傳

太原人。案此傳云太原人。而其子天挺傳則云出於朵魯別族。自曾祖而上。居安肅州。父子各立傳。而所書籍貫互異。考王磐撰和上神道碑。亦云安肅州安肅縣人。則此傳云太原者。誤矣。

在郡王迄忒麾下。疑卽朮赤台之子怯台也。

子十二人。長天益。佩金符。太原路軍民萬戶都總管。案天益小字山哥。

天舉。大都路總管兼府尹。案天舉小字長安。

趙璿傳

中統元年。詔立十道宣慰司。以璿爲順天宣慰使。案中統元年。立十路宣撫司。璿不預使副之列。至三年。立十路宣慰司。乃以璿等爲使。傳云元年。誤也。

石抹明安傳

中都既平。加太傅。邵國公。案和林廣記。所稱太保明安。卽石抹明安也。此云太傅。恐誤。或由太保進太傅。則又漏太保一節矣。

子咸得不襲職。爲燕京行省。案耶律楚材傳。言燕薊留後長官。石抹咸得卜貪暴。殺人盈市。卽咸得不也。

次忽篤華。太宗時爲燕京等處行尙書省事。兼蒙古漢軍兵馬都元帥。案太宗紀。甲午。以胡土虎那顏爲中州斷事官。畏蒼兒傳。歲丙申。忽都忽大料漢民。分城邑以封功臣。食貨志。忽都虎官人五戶絲。壬子年查認過廣平等處四千戶。皆謂忽篤華也。譯音無定字。故紀志傳書名各異。

張榮傳

丙申。從諸王闕端。破宋棗陽仇城等三縣。案太宗紀。乙未歲。皇子闕端征秦。鞏皇子曲出。出。即闕。伐宋。十月。曲出圍棗陽。拔之。則榮所從者。當是闕出。非闕端也。仇城字疑有誤。

世祖卽位。封濟南公。致仕。案世祖紀。中統二年。封濟南路萬戶張榮。濟南公。傳不云授濟南路萬戶。史之闕也。下文云。長子邦傑襲爵。孫宏襲邦傑爵。所襲卽萬戶之職。非襲其公爵。

宏襲邦傑爵。改眞定路總管。案世祖紀。中統三年。李璫反。詔濟南路軍民萬戶張宏修城塹。盡發管內

民爲兵以備。至元二年，山東廉訪使言，真定路總管張宏，前在濟南，乘變盜用官物，詔以宏嘗告李瓊反，免死罪，罷其職，徵贓物償官。邳州萬戶張邦直等，違制販馬，並處死。此二事皆應載於本傳。

劉亨安傳

丙戌歲，金將移剌副樞攻絳州，城陷，死之。木華黎承制，命亨安領其衆。案，木華黎以癸未歲卒，子孛魯嗣爲國王，上文已書國王孛魯矣。此卻書木華黎，何其前後不檢照也。

趙迪傳

歲壬午，改葦城爲永安軍。案，王善傳，壬午陞葦城爲匡國軍。董俊傳，陞葦城縣爲永安州，號其軍爲匡國。永安乃州名，非軍名也。傳誤。

王善傳

追封冀國公，諡武靖。案，虞集撰太原郡伯王思義墓碑，稱善爲趙國武靖公，殆由冀而進封趙也。思義從征江西，廣東有功，官廣東兵馬招討使，兼領韶州路總管。善之從子也。史亦未見其名。

杜豐傳

從國王按察兒攻平陽。元初，惟木華黎之後稱國王，而太祖弟幹赤斤亦稱國王，幹赤斤之孫塔察兒，亦有國王之稱。此按察兒未詳何人也。下文又有國王阿察兒，阿按聲相近。

田雄傳

木華黎承制授雄隰吉州刺史兼鎮戎軍節度使行都元帥府事。案攸哈剌拔都傳云真定史天倪平陽李守忠隰州田雄皆失守矣。我又棄太原將何面目見主上及國王乎。傳不書隰州失守事蓋諱之。

張榮傳

歲甲戌從金太保明安降。案石抹明安仕金未嘗爲太保。此云金太保誤。

張晉亨傳

從國王孛羅征益都。卽孛魯。

張子良傳

歲戊戌率泗州西城二十五縣軍民十萬八千餘口。因元帥阿朮來歸。太宗命爲東路都總帥。案阿朮卒於至元二十四年。年五十四。太宗戊戌之歲。阿朮年止五歲耳。史家何不考至此。後讀虞集所撰張宣敏公神道碑云。歲戊戌。因大帥河南忠武王阿朮以歸國朝。始知傳所據者伯生之碑文。然伯生亦祇就其家所述行狀書之。未能考稽於國史也。考察罕傳云。歲戊戌。授馬步軍都元帥。率諸翼軍攻拔天長縣及滁壽泗等州。乃悟子良本因察罕以降。察罕亦封河南王。諡忠宣。後人誤以爲阿朮耳。七年罷元管戶隸諸郡縣。案此蒙上中統之文。然中統紀元止於四年。此傳云七年八年者。至元之七

年八年也。史脫至元二字。

石抹阿辛傳

石抹阿辛迪列紇氏。阿辛即也。先譯音偶異。史家遂分爲二人。各位一傳矣。石抹本述律氏。迪列紇即述律之異文。石抹宜孫傳作迪烈紇。

詰旦。木華黎解錦衣賞之。案石抹也。先傳子查刺。歲癸巳。從國王塔思征萬奴。癸巳。太宗之五年也。木華黎卒於癸未。歲距癸巳已十年矣。此傳云木華黎誤。

王楫傳

從三合拔都。太傅猛安。率兵南征。三合。太祖紀作三模合。拔都其號也。猛安即明安。紀所稱石抹明安也。

帝命闐里畢。與皇太弟國王。分撥諸侯王城邑。案博爾朮之弟曰幹闐烈闐里。必疑即傳之闐里畢也。皇太弟國王者。幹赤斤也。

賈居貞傳

子汝立嗣。案史稱某人嗣者。皆謂先世有封爵。以其人承襲也。賈氏無世職。不當云嗣。

洪福源傳

戊寅冬十二月太祖命哈赤吉孔刺將兵迎討。哈赤吉卽哈真也。孔當爲札茶邱。立高麗王禎親屬承化侯爲王。承化侯名溫。永寧公綽之母兄也。

鄭鼎傳

宋將余侍郎燒絕棧道以兵圍興元。余侍郎謂余玠也。玠以壬寅歲莅蜀。其出兵興元乃在辛亥歲。史繫之甲午歲誤矣。

庚戌從憲宗征大理國。自六盤山經臨洮。下西蕃諸城。抵雪山。山徑盤屈。舍騎徒步。嘗背負憲宗以行。案憲宗紀無征大理事。庚戌歲乃憲宗卽位之前一年。是時三歲無君。諸王大臣方議推戴憲宗而立之。遠征大理事所必無。其妄明矣。考世祖紀壬子歲奉命帥師征大理。癸丑八月師次臨洮。九月次武刺。分三道以進。帝由中道至滿陀城。十月過大渡河。經行山谷二千餘里。意者世祖征大理時。鼎實在行閒。史家誤以爲從憲宗耳。

乙未賜白金千兩。從世祖南伐。乙未當作己未。

制宜。子阿兒思蘭嗣。案武宗紀至大三年十一月尙書省臣以武衛親軍都指揮使鄭阿兒思蘭與兄鄭榮祖段叔仁等圖爲不軌。置獄鞫之。皆誣服。詔叔仁等十七人並正典刑。籍沒其家。此事當載於本傳。阿兒思蘭諡敬愍。傳亦失書。

鄭溫傳

賜名也可拔都。案鄭鼎與溫同時亦賜名也可拔都姓名俱同。

汪世顯傳

忠臣鞏昌便宜副總帥。案忠臣諡忠讓見姚燧撰神道碑。

廿二史考異卷九十八

元史十三

劉秉忠傳

其先瑞州人也。此遼金之瑞州，非宋之瑞州也。秉忠自曾祖以來，皆家邢州。足迹未抵江南，而江西之瑞州，本名筠州，宋末避理宗嫌名，始改筠爲瑞，已在金南渡之後矣。近人修江西通志，乃收秉忠入人物，何其謬乎。

自忽都那演斷事之後，差徭甚大。卽胡土虎那顏。

宜依合罕皇帝聖旨，謂太宗也。

移刺中丞，拘權鹽鐵諸產商賈酒醋貨殖諸事，以定宣課。移刺中丞，謂耶律楚材也。嘗云中書，不當云中丞。

張文謙傳

追封魏國公，證忠宣。案，文謙之大父字，贈大司徒魏國文愍公，父英，贈太保魏國簡懿公，見虞集張氏新塋記。

郝經傳

祖天挺。元裕嘗從之學。梁清遠曰。元史差譌不少。如郝經傳載其祖天挺。元裕嘗從之學。又云元裕每語之曰。子貌類汝祖。才器非常。元裕者。或卽元好問乎。好問字裕之。今乃不書其名而書其字。又去下一字。何也。裕之嘗師天挺。見所撰郝先生墓銘。文憲忠文。豈未見邪。至天挺傳。又言受業於遺山。元好問。更可笑矣。予案。梁氏譏史稱元裕爲誤。是矣。金元之際。有兩郝天挺。一字晉卿。澤州陵川人。卽經之大父。元裕之嘗從之學者也。一字繼先。安肅州人。郝和尙拔都之子。則學於元裕之者。梁氏誤以爲一人。非也。

塔察國王。與李行省肱臂相依。塔察。卽塔察兒幹赤斤之孫也。李行省謂李瓊。遣使召旭烈阿里不哥摩哥。旭烈。卽旭烈兀。摩哥。卽末哥。皆世祖之弟。

經還之歲。汴中民射雁金明池。得繫帛書詩云。霜落風高恣所如。歸期回首是春初。上林天子援弓繳。窮海纍臣有帛書。至元五年九月一日放雁。獲者勿殺。國信大使郝經。書於眞州忠勇軍營新館。案。輟畊錄載此事。本作中統十五年。蓋南北隔絕。經又被羈。未知至元之改元也。史稱伯顏奉詔南伐。帝遣使問執行人之罪。宋懼。以禮送經歸。伯顏南伐。在至元十一年。經之還在至元十二年。經繫帛書稱中統十五年。正伯顏南伐之歲。其明年。經始北還。傳稱至元五年。又稱經還之歲得之。皆誤。

姚樞傳

二年拜太子太師。案此傳敘事自世祖卽位以後書二年四年者中統之紀年也其下書十年十一年十三年十七年則至元之紀年也有年而無號史失之。

從子燧官至翰林學士承旨以文章大家知名諡曰文。當云從子燧自有傳餘皆應刪。

許衡傳

以泰和九年九月生。案蘇天爵名臣事略作大安己巳蓋泰和紀元止於八年其明年改元大安矣。傳誤。

國家自得中原用金大明曆。案此傳載衡領太史院修授時曆始末幾四百言文正於曆學非專家其創法皆出王恂郭守敬二人特假文正領其事以爲重耳。曆議已詳於本志又見郭守敬傳此傳但以一二語了之可矣。

子師可。案衡子師敬官至中書右丞傳竟不見其名。

李俊民傳

嘗令張仲一問以禎祥。張仲一名易史嘗書其名不應稱字。

趙良弼傳

脫兀脫以斷事官鎮邢。其屬要結罪廢者。交構嫌隙。動相沮撓。世祖時征雲南。良弼馳驛白其事。遂黜脫兀脫。罷其屬郡大治。案世祖紀。以脫兀脫及張耕爲邢州安撫使。劉肅爲商榷使。邢乃大治。張文謙傳。文謙與劉秉忠言。今民生困敝。莫邢爲甚。盜擇人往治之。乃選近侍脫兀脫。尙書劉肅。侍郎李簡往。三人至邢。協心爲治。洗滌蠹蔽。革除貪暴。流亡復歸。不期月。戶增十倍。據紀及彼傳。則脫兀脫治邢有績可稱。獨良弼傳乃言其短。此吳縝所謂予奪不常也。

執渾都海之黨元帥乞台不花。迷立火者誅之。案世祖紀。誅乞帶不花於東川。明里火者於西川。卽此二人也。

趙璧傳

自是牙老瓦亦不復用。案憲宗紀。元年。以瓦剌瓦赤不只兒等充燕京等處行尙書省事。世祖紀。憲宗令斷事官牙魯瓦赤與不只兒等。總天下財賦於燕。卽牙老瓦赤也。牙老瓦赤。在憲宗朝任用如故。傳云不復用者。誤。

贈大司徒。諡忠亮。案大德三年。追封冀國公。延祐三年。改諡文忠。

王磐傳

擢至大四年。經義進士第。至大。當作正大。

劉肅傳

邢國公諡文獻。案肅父深贈昭文館大學士邢國公諡康穆。

王思廉傳

帝幸白海。卽察罕腦兒也。

大德元年成宗卽位。案成宗卽位在至元三十一年。次年改元元貞。又二年始改大德。安得繫卽位於大德元年之後乎。梁德珪傳云。大德閒成宗卽位。亦同此失。

閻復傳

卒年七十七。諡文康。案袁桷撰神道碑云。追封永國公。曾祖衍。贈大司農永安郡公。諡懿德。祖和叔。贈昭文館大學士永安郡公。諡昭獻。父文忠。贈大司徒永國公。諡惠穆。

劉國傑傳

爲宗王幹臣必閣赤。幹當作幹。幹臣卽幹眞那顏。

李德輝傳

歲癸丑。憲宗封宗親。勸京兆隸世祖潛藩。立從宜府。以德輝與孛德乃爲使。時汪世顯宿兵利州。扼四川衿喉。以規進取。案世顯以癸卯歲卒。在癸丑之前十年。傳殆誤矣。考姚燧撰李忠宣公行狀云。時汪

忠烈公始宿兵利州。忠烈者田哥之諡，非世顯也。

至元十五年，再圍重慶，拔之。紹熙南平夔施思播諸山壁水欄皆下，而東川樞府懲前與西川相觀望，致敗惡相屬。願獨軍圍合州，德輝乃出合俘繫順慶獄者縱之，使歸語州將張珪，以我朝含宏，錄功忘過，能早自歸，必取卿相。與夏呂比又爲書以禮義禍福，反覆譬解之。珪未及報，而德輝還王邸，旣而合州遣李興、張邵十二人，訶事成都，皆獲之，釋不殺，復爲書縱歸，使諭其將王立。案此傳全取行狀之文，行狀於願獨軍圍合州之下云：初，公撫蜀徑東川歸，以爲重慶帥闔受圍，必徵諸屬州兵，盡銳拒守，合州宜虛誠使諜人持書曉之，兵隨其後，亦制合一奇也。卽出合俘繫順慶獄者縱之云云。蓋德輝以書招張珪，在至元十三年，撫蜀之日，其招降王立，則在十五年，拔重慶之後，兩事本不同時。行狀所載，乃追述前事，本傳刪去四十餘字，則誤以爲卽十五年事矣。不知德輝還王邸，在行院西川之前，旣還王邸，安得猶在成都？其文已相抵牾。且張珪以德祐二年，卽至元十三年自合州入重慶，至是年元兵拔重慶，珪走且被執矣。珪之去合州，已將兩載，安得有招珪之事乎？史家之恣疏如此。

十七年，置行中書省，以德輝爲安西行省左丞。案安西左丞之命，在招降羅施鬼國之後，未及受命而卒。本紀與行狀竝同，傳書於招降之前，非也。

張雄飛傳

琅邪臨沂人。案史家書籍貫宜用當時州縣之名。此傳云琅邪臨沂人。趙璿傳云雲中蔚州人。趙宏偉傳云甘陵人。熊朋來傳云豫章人。牟應龍傳云其先蜀人。後徙居吳興。宇文公諒傳云令爲吳興人。考元時無此郡縣名。史家失於討論也。

二十一年。盧世榮以言利進用。案上文已有二十一年。此重出也。虞集傳兩書泰定初。

張德輝傳

字輝卿。當作耀卿。

德輝舉魏瑤、元裕、李治等。元裕卽元裕之也。史當稱元好問。誤舉其字。又脫之字。傳又云與元裕北覲。又云與元裕、李治游封龍山。時人號爲龍山三老。

德輝請老。命舉任風憲者。疏烏古倫貞等二十人以聞。二十人謂烏古倫貞、張邦彥、徒單公履、張家、張肅、李槃、張昉、曹椿年、西方賓、周止、高逸民、王博文、劉郁、孫汝楫、王懌、胡祇適、周砥、李謙、魏初、鄭展也。

王恂傳

父良。金末爲中山府椽。案恂大父。順元時贈太常少卿。中山郡公。諡安定。父良。贈昭文館大學士。中山郡公。諡端愨。

十六年。授嘉議大夫太史令。此上脫至元二字。

郭守敬傳

徐昂造宣明厯。案宣明術非徐昂所造。

楊桓傳

有得玉璽於木華黎曾孫碩德家者。桓辨識其文曰。受天之命。既壽永昌。案崔彥獻傳國璽事。一見於成宗紀。再見於按札兒傳。三見於楊桓傳。四見於崔彥傳。而詳略小異。受天之命四字。紀與二傳俱作受命于天。當從之。

張禧傳

從宗王合五平定河南。合五當作合舟。

張萬家奴傳

張萬家奴。史失其里居。

楊賽因不花傳

宋隆濟及折節等叛。成宗紀作蛇節。

完顏石柱傳

完顏石柱。史失其里居。

軍龍化縣與宋兵戰有功。案宋無龍化縣。當是南平軍之隆化縣也。

羅璧傳

右丞阿里海牙領軍下江陵。璧從禩孫降。授管軍千戶。至元五年。從元帥張宏範定廣南。案朱禩孫之降。在至元十二年。不當書於五年之前。張宏範定廣南。則至元十五年事。非五年也。或疑五年上脫十字。然下文有至元十二年云云。則是傳文本誤。非脫字矣。

至元十二年。上文已有至元五年。則此至元字可省。

石高山傳

在昔太祖皇帝所集按察兒。李羅窟里台。李羅海拔都。闊闊不花。五部探馬赤軍。案闊闊不花傳。歲丙申。太宗命五部將分鎮中原。闊闊不花鎮益都濟南。按察兒鎮平陽太原。李羅鎮真定。肖乃台鎮大名。怯烈台鎮東平。怯烈台即窟里台也。此傳述五部將之名。有李羅海拔都。而無肖乃台。未知孰是。

孟德傳

丁巳。從伯顏攻襄樊。案伯顏以至元初自西域入朝。丁巳。乃憲宗之七年。伯顏尚未仕於朝也。

張立道傳

除忠慶路總管。忠當作中。

二十七年北京地陷。人民震驚。命立道爲本路總管。案至元二十五年。改北京爲武平路。傳繫以舊名。非也。世祖紀。至元二十八年。以武平路總管張立道爲禮部尙書。

張惠傳

丞相蒙速速愛而薦之。蒙速速疑卽孟速思。世祖時嘗命與安童竝爲丞相。固辭。故有丞相之稱。

呂域傳

呂域字伯充。域一名端善。許衡傳徵其弟子十二人爲伴讀。端善在十二人之數。卽域也。

譚資榮傳

子二人。曰澄。曰山阜。此傳附書澄事。凡二百二十餘言。而良吏篇又別爲澄立傳。其姓皆从言旁。考世

祖紀。至元十一年。副元帥覃澄。王惲中堂事紀。亦有懷孟總管覃澄。皆不作譚。予又見交城縣萬卦山

石刻。辛卯年中書省公據。後列交城縣長官覃資榮名。辛卯太宗三年也又濟源縣濟瀆廟。有中統元年祭濟

瀆碑。後列懷孟州總管覃澄名。又中統五年。濟祠投龍簡碑文。稱總管覃侯。後列宜授懷孟路總管覃

澄名。可證資榮父子本姓覃。而傳作譚者。誤也。

王惲傳

祖字仕金。官敦武校尉。父天鐸。金正大初。以律學中首選。案王字元。贈集賢侍讀學士。追封太原郡侯。

諡敏懿。天澤贈大司農。追封太原郡公。諡莊靖。

陳祐傳

歲癸丑。穆王府署祐爲其府尙書王。旣分土於陝洛。表祐爲河南府總管。案。睿宗子末哥大王。丁巳年。分撥河南府五千五百五十二戶。末哥一作穆哥。亦作摩哥。傳所云穆王者。卽穆哥也。依史例。當稱穆哥王府。傳蓋沿王惲所作神道碑文。而不知其非史法也。

天祥。萬戶鄭鼎臣爲宣慰使。卽鄭鼎也。

勅平章岳朶木。卽要朶木。

劉宜傳

時江浙行省丞相忙古臺。卽忙兀台。

何榮祖傳

追封趙國公。諡文憲。案。虞集有中書平章政事何榮祖。諡忠肅議。則榮祖嘗諡忠肅矣。

賀仁傑傳

德輝分守成都。獲王立鈔。卒張合。呂城傳作張師縱之。使諭立降。立復遣張合等奉蠟書告德輝。能自來卽降。德輝遂從五百騎至釣魚山。與東院同受立降。東院復奏誅立。并言德輝越境邀功。下立長安獄。西院從

事呂或即呂至都。以兵事告許衡。許衡告仁傑。仁傑爲言於帝。此事已見李德輝及呂域傳。惟張合。呂傳作郤。李傳作卻。則轉寫之誤。

賈昔刺傳

子丑妮子。虞集傳宣徽使賈公碑。作丑鈕子。

子虎林赤。碑作忽林赤。

子秃堅不花。碑作秃里堅不花。

如贈其曾祖昔刺。碑云大德八年。有詔褒贈行封。自其曾祖以下凡三等。而三世夫人。皆有號諡。當是時推恩之典未大行。獨二三世家得之。而夫人之諡尤異典也。據碑昔刺夫人諡孝節。丑妮子夫人毛氏。諡靖淑。忽林赤諡忠靖。夫人忽人察。封臨汾王夫人。傳皆失書。

石抹明里傳

石抹明里。契丹人。姓石抹。案遼金人皆繫姓於名。此傳既書石抹明里。又云姓石抹。重複非史法。

王伯勝傳

元貞元年。進階嘉議大夫。成宗即位。復進通議大夫。案成宗即位。在至元三十一年。次年乃改元元貞。傳書成宗即位於元貞元年之下。誤也。其下又書五年九年。則改元大德以後事。傳又脫大德字。

高源傳

子夢弼、良弼、公弼。案列傳附書子孫有名而無事狀者如覃澄孫男三人曰忠、曰質、曰文。楊湜孫貞、姚燧子燠、圻、城、孟祺子二人遵、遜、許楫子餘慶、重慶、崇慶。餘失其名。此類既不能稽其事迹徒費筆墨殊可省也。



廿二史考異卷九十九

元史十四

程鉅夫傳

叔父飛卿。案鉅夫曾祖子明諡安僖。祖德秀諡簡懿。皆追封楚郡公。父翔卿。追封郢國公。諡孝肅。進封楚國公。見危素撰神道碑。

丞相火禮霍孫。卽和禮霍孫。

又命爲御史中丞。臺臣言鉅夫南人。且年少。案元時有漢人南人之別。漢人謂中原之人。向屬金者。南人謂江淮以南。向屬宋者。世祖時。南人有入臺省者。成宗以後。省臺有漢人無南人。順帝時。南人入中書者。惟危素一人耳。

趙孟頫傳

帝嘗問葉李留夢炎優劣。案此事又見葉李傳。雖詳略不同。終不免重出之病。

鄧文原傳

父漳。徙錢塘。案漳父昭祖。追封南陽郡侯。漳。追封南陽郡公。

至順五年。案至順四年改元元統。至順無五年傳誤。

齊履謙傳

字伯恆。傳失書其里居。考蘇天爵撰履謙神道碑云。大名人。

燕公楠傳

公楠薦伯顏不灰閣里。不灰。卽不忽木。閣里。卽徹里。

姚燧傳

衡以國子祭酒教貴冑。奏召舊弟子十二人。燧自太原驛致館下。案姚燧撰白棟墓碣。稱魯齋先生。奏召舊弟子散居四方者。以故王梓自汴。韓思永。蘇郁自大名。耶律有尙自東平。孫安與高凝。燧自河內。劉季偉。呂端善。劉安中自秦。獨公自太原。十二人皆驛致館下。蓋燧由河內應召至闕下。所云公者。謂白棟也。傳謂燧自太原者。誤。

或謂世無知燧者。曰。豈惟知之。讀而能句句而得其意者。猶寡。燧曰。世固有厭空桑而思聞鼓缶者乎。然文章以道輕重。道以文章輕重。彼復有班孟堅者出。表古今人物九品中。必以一等置歐陽子。則爲去聖賢也。有級而不遠。其文雖無謝尹之知。不害於行後。豈有一言幾於古。而不聞之將來乎。案此文蓋取燧所撰送暢純甫序。而稍刪潤之。其序云。純甫自言。得余隻字一言。不棄而錄之。又言世無知公

者豈惟知之讀而能句句而得其意者猶寡。嗚呼。世固有厭空桑之瑟而思聞鼓缶者乎。然文章以道輕重。道以文章輕重。世復有班孟堅者出。表古今人物九品之中。必以一等置歐陽子。則爲去聖賢也。有級而不遠。其文雖無謝尹之知。不害於行後。猶以失之爲悲。下下之外。豈別有等置余爲哉。則爲去聖賢也。無級而絕遠。其文如風花之逐水。霜葉之委土。朝夕腐耳。豈有一言之幾於古。可聞之將來乎。純甫獨信之。自余不可不謂之知己。足爲百年之快。恐純甫由此而取四海不知言之非也。此序意謂歐陽文以道重。雖無謝尹之知。不害於行後而已。所謂文無一言幾於古。雖有純甫之知。恐四海不以爲知言。皆自謙之詞。而以謝希深。尹師魯比純甫。以歐陽自況。則言外之旨也。如傳所云。似謂言之幾於古者。可以聞之後來。不惟語拙。而於燧作序之旨。相去徑庭矣。史家述當時之言。小有刪易。固所不免。然汰其繁辭。要勿失其本旨。若乃句讀之不通。而妄加點竄。欲以備石室金匱之藏。與三史並列。毋乃不知量之甚乎。

劉廣傳

五世祖逸。以郡吏治獄有陰德。祖肅。爲右三部尙書。案列傳第四十七卷。已爲肅立傳。逸之陰德。當著

于肅傳。

郝天挺傳

父和上拔都魯。卽和尚拔都。

天拔與少保張閭等。卽章閭。

張珪傳

子六人。案文宗紀。天祿元年十月。紫荊關潰。卒。南走保定。因肆剽掠。同知路事阿里沙。及故平章張珪子。武昌萬戶景武等。率民持挺擊死數百人。也先捏以兵至保定。殺阿里沙及張景武兄弟五人。御史臺言也先捏不俟奏聞。擅殺官吏。珪父祖三世爲國勳臣。設使珪子有罪。珪之妻女。又何罪焉。今旣籍其家。又以其女妻也先捏。誠非國家待遇勳臣之意。帝曰。卿等言是。命中書革正之。此事當載於珪傳。

李孟傳

曾祖執金末舉進士。案孟之曾祖執。祖昌祚。父唐。三世皆贈韓國公。執諡康惠。昌祚諡文靖。唐諡忠獻。

曹伯啓傳

子六人。孫十人。皆顯仕。案曹鑑撰神道碑。子震亨、謙亨、泰亨皆前卒。而謙亨并未得官。則六人之中。已有三人不登顯仕者矣。碑稱孫八人。而傳云十人。則或有生於立碑之後者。

謝讓傳

二年。朝廷以吏多滯事。案此傳自仁宗卽位以後。書二年四年。不著年號。史脫文也。

趙帥魯傳

霸州文安縣人。縣字衍。

張思明傳

及拜住爲左丞相。與帖木迭兒各樹朋黨。賊害忠良。思明懼禍及。累表辭不獲。後竟誣以不支蒙古子女口糧。餓死四百人。遂廢於家。案拜住賢相。何至有賊害忠良之事。此史之誣也。考拜住傳。鐵木迭兒引參知政事張思明爲左丞以助己。思明爲盡力。忌拜住方正。每與其黨密語。謀中害之。二年七月。奏召思明詣上都。數其罪。杖而逐之。與此傳所云。正相矛盾。文宗紀。天厯三年。御史劾奏張思明。在仁宗朝。阿附權臣。鐵木迭兒。間諜兩宮。仁宗灼見其姦。旣行黜降。及英宗朝。鐵木迭兒再相。復授爲左丞。稔惡不悛。竟以罪廢。今又冒居是官。宜從黜罷。詔罷之。然則思明之爲人。大略可知。本傳多曲筆。未足深信。

吳元珪傳

至治元年英宗卽位。案英宗卽位在延祐四年。其明年改元至治。不當繫卽位于至治元年之下。王約傳亦

有至治元年英宗卽位之文。

追封趙國公諡忠簡。案元珪父鼎亦贈中書右丞壽國公諡憲穆。

陳顯傳

遂爲清州人。案顯曾祖課贈昭文館大學士趙郡公諡通憲祖某大司農卿趙郡公諡康靖父國瑞大司徒封趙國公見程鉅夫撰陳氏先德碑。

梁會傳

除知南陽府唐鄧二屬州爲襄陽府所奪會案圖經稽國制以聞事得復舊案地理志南陽府金爲申州至元八年升爲南陽府以唐鄧裕嵩汝五州隸焉無改隸襄陽之事。

劉敏中傳

濟南章邱人案敏中祖鼎贈禮部尙書彭城郡侯諡獻穆父景石濱州教授贈參知政事彭城郡公諡文靖見雪樓集。

王約傳

承旨火魯火孫以司徒開府卽和禮霍孫。

賀勝傳

初開平人張弼家富弼死其奴索錢民間弗得歐負錢者至死有治其獄者教奴引弼子并下之獄丞相鐵木迭兒受其賂六萬緡終不爲直勝聞弼事以語御史中丞楊朵兒只朵兒只以語御史玉龍帖木

兒徐元素遂劾奏丞相速治其左右。案鐵木迭兒傳云上都富人張弼殺人繫獄鐵木迭兒使家奴脅留守賀伯顏勝即賀使出之伯顏持正不可撓而朵兒只已廉得丞相所受張弼賂有顯徵乃與蕭拜住及伯顏奏之楊朵兒只傳與此傳互異彼云弼殺人繫獄此云弼家奴殺人而引其子彼云鐵木迭兒脅勝使出其獄不可又與楊朵兒只共奏之此云勝聞弼事以語朵兒只不與同奏又此傳云鐵木迭兒受賂六萬緡鐵木迭兒傳云受弼鈔五萬貫而楊朵兒只傳云受弼賊鉅萬萬皆其異也。

楊朵兒只傳

少孤與其兄皆幼。案朵兒只祖世刺贈夏國公諡忠定父式臘唐古台贈夏國公諡康靖兄教化湖北道廉訪使贈夏國公諡襄敏見道園學古錄。

耶律希亮傳

抵葉密里城乃定宗潛邸湯沐之邑也。案憲宗二年遷諸王脫脫於葉密立地即葉密里也。

定宗幼子大名王。案宗室表定室三子長忽察大王次腦忽太子次禾忽大王此大名王當即禾忽也。因其分地在大名即以爲王號猶只必帖木兒稱永昌王也。上文有宗王火忽疑即一人火禾音相近。

趙世延傳

其先雍古族人居雲中北邊曾祖顯公爲金羣牧使太祖得其所牧馬顯公死之祖案竺邇幼孤鞠於外

大父朮要甲。謚爲趙家。因氏爲趙。此文已見按竺邇傳。惟敘黜公事互異。

元明善傳

居清河者。至明善四世矣。案。明善父貞。追封清河郡公。諡孝靖。祖海。追封清河郡侯。諡貞惠。見吳澄集。

虞集傳

使貴近阿營。鹽礦傳旨。阿營。卽阿榮也。

奎章閣大學士忽都魯篤彌實。上文有大學士忽都魯都兒迷失。卽一人也。一篇之中。稱名互異。

揭傒斯傳

父來成。宋鄉貢進士。案。來成追封豫章郡公。賜號貞文先生。

宋本傳

旭滅傑奏釋之。卽旭邁傑。

謝端傳

史杠宣慰荆南。數加延禮。薦之姚樞。樞方以文章大名自負。少所許可。以所爲文。際端。端一讀卽能指擿。其用意所在。樞歎獎不已。案。姚樞。當是姚燧之謬。樞本不以文章自負。且樞卒於至元十七年。是時謝端甫生兩歲。無緣得見樞也。後讀蘇天爵所撰神道碑。正作文公燧。竊喜鄙見之不謬。

李好文傳

西蜀奉使。以私憾。撫拾廉訪使曾文博。僉事兀馬兒。王武事。文博死。兀馬兒誣服。武不屈。以輕侮抵罪。好文曰。奉使當問民疾苦。黜陟邪正。今行省以下。至於郡縣。未聞舉劾一人。獨風憲之司。無一免者。此豈正大之體乎。率御史力辨武等之枉。并言奉使不法者十餘事。案。此時奉使西蜀者。蒼爾麻失里王守誠也。守誠傳云。初。四川廉訪使某。與行省平章某不相能。誣宣使蘇伯延。行賄於平章某。瘦死獄中。至是。伯延親屬有愬。會茶鹽轉運司官。亦訟廉訪使累受金。廉訪使倉皇去官。至揚州死。副使以下。皆以事罷。憲史四人。奉差一人。籍其家而竄之。餘皆斥去。即好文所云。風憲之司。無一免者也。彼傳稱其風采聳動天下。論功爲諸道最。而此傳言其私憾。撫拾人罪。并諸不法事。褒貶互異如此。何以取信後世乎。

李朮魯神傳

從京兆蕭剡游。翰林學士承旨姚燧。以書抵剡曰。燧見人多矣。學問文章。無足與子輩比者。於是剡以女妻之。案。蘇天爵撰神道碑云。貞隱李先生。鄧名士也。公從學詩賦。同門莫及。復從翰林姚文公學古文。文公奇之。以書抵貞隱曰。子輩談論鋒出。其踐履一以仁議爲準。文章不待師傅而能後進。無是倫比。於是貞隱以女妻之。又云。公配李氏貞隱先生之女。然則神之妻實李氏。非蕭氏矣。神嘗從學於

麟無以女妻种之事傳誤。

王都中傳

俄以爲國信使宜諭日本。至其境。遇害於海上。案。積翁追封閩國公。謚敬愍。改諡忠愍。

呂思誠傳

吏部尙書傑哲篤。左司都事武祺等。建言更鈔法。案。思誠與傑哲篤論鈔法。已見食貨志。

汪澤民傳

徽之婺源州人。宋端明殿學士藻之七世孫也。案。宋景濂撰澤民神道碑。敘其里居世系甚悉。史稱藻

七世孫。據碑乃藻兄槃之七世孫。汪氏自五代初遷婺源之還珠里。傳十世至毅。又自婺源遷饒州德興之龍溪。卽槃與藻之父也。槃子慥。又自德興遷宜州之宣城。子孫遂爲宣城人。史舍宣城而繫以婺源。亦非也。澤民壽八十三。而傳作七十。追封譙郡公。而傳作譙國郡公。皆史之誤。澤民族子克寬。預修元史。宋景濂又爲總裁官。而史文舛誤如此。蓋官書不出於一手。而意在速成。往往有此失也。事連廣東廉訪副使麗珍。碑作劉安仁。

成遵傳

至正十七年。升中書左丞階資善大夫。分省彰德。案。順帝紀。至正十九年。詔中書右丞也先不花。御史

中丞成遵奉使宣撫彰德大名廣平東昌東平曹濮等處。獎勵將帥。百官志同是遵之往彰德。乃奉使宣撫。非分省也。又以宰相表百官志考之。是年有分省太原者矣。則平章臧卜也。有分省濟寧者矣。則右丞失烈門。參政賈魯也。有分省陵州者矣。則平章蒼蘭。參政俺普崔敬也。若彰德之有分省。則在至正十五年。其任分省者。前有右丞臧卜。左丞烏古孫良楨兩人。繼有參政月倫失不花。陳敬伯兩人。遵未嘗一日預分省之事也。遵以至正十七年拜左丞。紀表失載其月日。而由左丞除御史中丞。則表繫之九月。蓋以中丞奉使。使旋仍入中書。傳既漏除中丞一節。又誤書奉使爲分省。皆失之甚者也。凡以省官出鎮。謂之分省。遵既除中丞以行。則是臺官。非復省官。故知本傳所書分省者。傳聞之譌也。

曹鑑傳

秦定七年案。秦定無七年。七字誤。

劉哈刺不花傳

初。哈刺不花與信州人倪晦字孟晰同事秦不花。即上文所稱河南平章政事太不花也。前作太。後作秦。於例未畫一。

廿二史考異卷一百

元史十五

儒學傳一

許謙。其先京兆人。九世祖延壽。宋刑部尙書。八世祖仲容。太子洗馬。仲容之子。曰洗。曰洞。洞由進士起家。以文章政事知名於時。洗之子實。事海陵胡瑗。能以師法終始者也。由平江徙婺之金華。至謙。五世爲金華人。此傳敘述先世。凡八十言。乃誌狀之文。無當於國史。當盡刪之。但云婺州金華人。

甫能言。世母陶氏。口授孝經論語。案。黃潛撰墓誌云。考諱旣無子。以從父兄貢士日宣之次子嗣。卽先生也。先生甫能言。貢士君之夫人陶氏。授以孝經論語。則陶氏實謙之本生母。傳云世母者。考之未審爾。

同郡朱震亨。字彥修。案。彥修精於醫。而傳略不及之。雖云重儒學而輕方技。然舍其可傳。而錄其不必傳。亦通人之蔽也。

儒學傳二

程端學。登至治辛酉進士第。案。端學以泰定甲子登第。見歐陽原功所撰墓志。史誤。

陳旅。適御史中丞馬雍古祖常使泉南。雍古二字當刪。
宇文公諒。至順四年登進士第。卽元統癸酉歲也。

良吏傳一

譚澄。以其弟山代爲交城令。山下脫阜字。

以疾卒。年五十八。案山西通志。追封恆農郡公。諡忠宣。子克修。陝西漢中道提刑按察使。贈禮部尙書。
追封恆農郡侯。諡文憲。克思。中山知府。追封恆農郡侯。克修子忠。南康府判官。質兵部侍郎。文。河南宣
慰使。克思子敬。漢陽知府。

卜天璋。丞相順德王當國。嘗稱哈刺哈孫。

良吏傳二

段直。至元十一年。河北河東山東。盜賊充斥。直聚其鄉黨族屬。結壘自保。世祖命大將略地晉城。直以
其衆歸之。其後論功行賞。分土世守。命直佩金符爲澤州長官。今澤州鳳臺縣。有劉因所撰直墓碑。
文字完好。所書事迹。與傳略同。而傳所書年代。與碑大相刺謬。碑云。甲戌之秋。南北分裂。河北河東山
東。郡縣盡廢。甲戌者。元太祖之九年。金貞祐二年也。是歲。元兵圍中都。金宣宗遷汴。故有南北分裂之
語。而傳乃云至元十一年。河北河東山東。盜賊充斥。以其歲亦在甲戌也。曾不思至元之初。境內寧謐。

河北諸路安有寇盜充斥之患乎。碑又云：天子命太師以王爵領諸將來略地，公遂以衆歸之，謂太師、國王木華黎承制時也。而傳乃云：世祖命大將略地晉城，曾不思世祖時晉城久入版圖，安得有命將略地之事乎？碑作於世祖朝，其文云：今上在潛邸，命提舉本州學校，未拜而卒。然則直卒於憲宗朝，未嘗事世祖矣。蓋由史臣不學，誤切甲戌爲至元之甲戌，相差一甲子而不悟也。

林興祖。至治二年登進士第。案：至治二年壬戌，非科舉之歲，嘗有誤。

忠義傳一

李伯溫，守賢之孫，穀之子也。案：李守賢傳末亦云子穀，子十一人，伯溫見忠義傳，與此文合。及考其傳，首云：金大安初，守賢賢兄庭植弟守正守忠，從兄伯通、伯溫、歸款，則伯溫乃守賢之從兄，前後自相矛盾。今據此傳，稱伯溫長兄惟則，次伯通，歲甲戌，錦州張致判，國王木華黎命擊之，大戰城北，伯通死焉。若伯溫爲守賢之孫，伯通亦守賢孫矣，賢以甲午歲卒，年四十六，則甲戌歲年僅二十六，安得有孫，且能履行陳乎？穀卒於至元七年庚午，年四十九，溯其生年當在壬午，守忠以丁亥歲被執，伯溫亦失利死節，其時穀才六歲耳，而史以伯溫爲穀子，何其謬乎？推求其故，此傳之誤，實因於守賢傳，然彼傳云：伯溫見忠義傳者，因篇中有與從兄伯通、伯溫、歸款之文，牽連書之，非謂伯溫在穀子十一人之數也。

史家不諳文義，遂至謬妄，乃爾。

子守正，自幼時嘗質於木華黎。據李守賢傳，則守忠、守正與伯溫爲從昆弟，此傳旣云平陽已陷，弟守忠被執，伯溫謂左右曰：吾兄弟仗節擁旄，受方面之寄，吾弟已被執，我不可再辱，則亦以守忠爲伯溫弟矣。守忠爲守正之兄，則守正亦伯溫之弟，而此乃云子守正，竟似守正、守忠皆伯溫子，一篇之中，自相矛盾如此。

歲庚寅，上黨晉陽合兵攻汾州，將陷，守正以義赴援。案守忠死於丁亥四月，而守正之戰歿，更在其前，庚寅在丁亥後四年，守正死已久矣。此事有誤，或云當爲庚辰之譌。

平陽公胡景山，以青龍堡降。太祖紀，木華黎傳，俱作胡天祚，景山蓋其字也。

丁亥夏四月，金紇石烈真襲擊平陽，行營招討使權國王按察兒於洪洞。案金史，紇石烈牙吾塔傳，正

大四年，牙吾塔復取平陽，正大四年，卽丁亥歲也，真與牙吾塔殆一人而兩名乎。

石珪案，珪起於盜賊，背金歸宋，又背宋降元，雖死於非命，豈宜廁諸忠義之列。

耶律忒末，父丑哥，仕遼爲都統，遼亡不屈節，夫婦俱死焉。金主憫其忠義，授忒末都統。歲甲戌，國兵至金，遷於汴，忒末及子天祐，率衆三萬內附。案遼亡於乙巳歲，至元太祖甲戌，相距九十載，使忒末果於遼亡時授官，計其年當近百歲，豈復能從征，又閱十餘年而戰沒乎？此與移剌捏兒事蹟不同，而妄

誕相似。史臣於時代修短，且茫然不知，而任以筆削之職，欲其無失實難矣。

伯八兒合丹氏。案目錄以伯八兒標題，似合丹爲伯八兒之氏，今檢傳中兩舉伯八名，皆不連兒字，又元祕史載蒙力克額赤格事甚詳，卽此傳之明里也，赤哥也，祕史謂其族爲晃合壇氏，丹壇聲相近，則兒乃晃字之譌。

合刺普華。案文質子六人，僕玉立、僕直堅、僕哲篤、僕朝吾、僕列篋，皆第進士。案歐陽原功僕氏家傳云，僕氏先世嘗從其主居僕輩河，因以僕爲氏，僕玉立、官翰林待制，僕直堅、宿松縣達魯花赤，僕朝吾、同知濟州事，僕列篋、河南路經歷。

忠義傳二

李齊。廣平人。案元統元年進士錄，李齊貫保定路祁州蒲陰縣匠戶，此云廣平，恐誤。

郭嘉。祖昂，父惠，俱以戰功顯。案列傳第五十二卷有郭昂，官廣東宣慰使子惠，江西廉訪僉事，當卽嘉之祖與父也，彼傳稱彰德林州人，此云濮陽人，籍貫小異。

喜同。時有襄陽錄事司達魯花赤塔不台字彥輝者。案元統元年進士錄有塔不歹字彥輝，貫東昌路聊城縣唐兀氏，蓋卽其人也。

忠義傳三

伯顏不花的斤。駙馬都尉中書丞相。封高昌王。雪雪的斤之孫。駙馬都尉江浙行省丞相。封荆南王。朵爾的斤之子也。案諸王公主二表及巴而朮阿而忒的斤傳俱不載雪雪的斤朵爾的斤之名。葉盛水東日記引高昌王世助碑云。帖木兒補化有二子。長不蒼失里。嗣亦都護高昌王。次伯顏不花的斤。爲太常鮮于樞甥。官浙東宣慰使。如碑所言。似朵兒的斤與帖木兒補化。即是一人。今考元文類載虞集高昌王世助碑。不敘帖木兒補化之子。葉文莊所見。豈別一碑邪。

丑閻。字時中。蒙古氏。登元統元年進士第。案是榜有兩丑閻。第二甲第十二名。字時中。貫昔寶赤身。役唐兀氏。第三甲第三名。字益謙。貫河南淮北蒙古軍戶哈刺魯氏。此字時中者。乃唐兀氏。非蒙古氏。忠義傳四

迭里彌實。曰海魯丁者。官信州。案海魯丁事。見伯顏不花的斤傳。

孝友傳一

趙一德。拜請於其主鄭阿思蘭。即鄭阿兒思蘭也。

尹莘。汴梁洧川人。案文宗紀。至順元年五月。以汴梁尹華孝行旌其門。疑卽一人。字形相涉而譌。

孝友傳二

劉琦。岳州臨湘人。生二歲而母劉氏遭亂。陷於兵。案傳與曠有旌孝圖集序云。岳陽民張琦。生二歲而

失母於兵，長而求之，三十年不得而不倦。風雨往復，晨昏號呼，鬼神爲愁，行路相泣，卒能歸其母，使二親終壽於其室家。暮年，二親病臂，則子爲父冠帶，婦爲姑櫛洗，凡所順承，惟其志。既歿，葬祭情溢於禮，遠近莫不稱其孝焉。事聞，朝廷命有司旌其門，且復其家。與史所載劉琦事略同，而姓則互異。似當從傳，集張琦爲正。蓋琦母氏劉，同姓婚姻，世不常有也。

隱逸傳

張特立，案特立在金史循吏傳，然兩傳所載事迹不同，可以互相考證。

白撒訴於世宗，言特立所言事失實，世宗宥之。世宗當作哀宗，據金史稱白撒治特立，左遷邳州軍事，或作士譏判官，杖五十，則亦未嘗宥也。

列女傳一

元受命百餘年，女婦之能以行聞於朝者多矣，不能盡書。案仁宗紀，皇慶二年十月，旌表高州民蕭父妻趙氏貞節，免其家科差。延祐二年八月，旌表貴州達魯花赤相兀孫妻脫真死節，仍俾樹碑任所。文宗紀，天厯二年正月，衛輝安寅妻陳氏，河閒王成妻劉氏，冀寧李孝仁妻寇氏，濮州王義妻雷氏，南陽郡二妻張氏，懷慶阿魯輝妻翟氏，皆以貞節旌其門。至順元年五月，龍興張仕興妻鄒氏，奉元李郁妻崔氏，以志節旌其門。六月，旌表真定梁子益妻李氏等貞節。七月，大同李文實妻齊氏，河南閻遂妻

楊氏。大都潘居敬妻陳氏。王成妻高氏。以志節。順德馬奔妻胡潤奴。真定民妻周氏。冀寧民妻魏益紅。以夫死自縊殉葬。並旌其門。九月。辰州萬戶圖格里不花母石抹氏。以志節旌其門。十二月。冀寧路梁世明妻程氏。中興路伯顏妻阿迭的。以志節旌其門。二年正月。旌大都大興縣郭仲安妻李氏貞節。二月。旌鞏昌金州民杜祖隆妻張氏。大都民劉德仁妻王氏貞節。三月。旌同知大都府事忙兀秃魯迷失妻海迷失山。丹州郝榮妻李閏。故戶部主事趙野妻柳氏貞節。四月。甘州阿兒思蘭免古妻忽都的斤。以貞節旌其門。五月。旌濟南章邱縣馬萬妻晉氏志節。六月。旌大都右警巡院胡德妻曹氏貞節。七月。太寧和衆縣何千妻柏都賽兒。夫亡以身殉葬。旌其門。八月。旌揚州路呂天麟妻章氏貞節。三年二月。旌晉寧路沁州劉璋妻張氏志節。旌濟州任城縣王德妻秦氏。婺州路金華縣吳墳妻宋氏。廬州路高仁妻張氏。甘州路岳忽南妻失林。蓋州完顏帖哥住妻李氏志節。三月。旌大都良鄉縣章安妻張氏貞節。五月。旌探忒妻靈保賢孝。六月。旌歸德府永城縣民張氏孝節。皆傳所謂不能盡書者。然詳於紀而略於傳。更非體矣。

闕文與妻王氏。至順三年。事聞。贈文與侯爵。諡曰英烈。王氏曰貞烈夫人。案順帝紀。元統二年。贈文與英毅侯。王氏貞烈夫人。英烈英毅。諡號小異。

列女傳二

也先忽都蒙古欽察氏。案欽察是色目非蒙古。

釋老傳

帝師八思巴。世祖紀作八合思八。

乃以其弟亦憐真嗣焉。世祖紀作亦鄰真。又作亦憐吉。

蒼兒麻八刺乞列嗣。世祖紀作蒼耳麻八刺刺吉塔。

亦攝思連真嗣。世祖紀作亦攝思憐。

乞刺斯八斡節兒嗣。成宗紀作合刺思八斡節。而又作吃刺八思斡節兒。

都家班嗣。皇慶二年卒。相兒加思嗣。案成宗紀大德九年正月帝師輩真監藏卒。三月以吃刺八思斡

節兒姪相加班爲帝師。仁宗紀皇慶二年九月以相兒加思巴爲帝師。中閒不書相加班之卒。疑相兒

加思巴與相加班卽一人。

旺出兒監藏嗣。泰定二年卒。案泰定帝紀泰定四年一月帝師參馬亦思吉思卜長出亦思宅卜卒。疑

卽旺出兒監藏也。其卒在泰定四年。傳作二年誤。

公哥列思八冲納監藏班藏卜嗣。泰定紀八作巴。

以輩真吃刺失思嗣。文宗紀無失字。

姦臣傳

阿合馬。回紇人也。案。回紇唐時舊名。後稱回鶻。唐末失其土而遷於北庭。元時音轉爲畏兀。或作畏吾兒。與回回非一種。輟耕錄。載色目三十一種。有畏吾兀。又有回回。元史太祖紀。汪罕走河西。回鶻。回回三國。薛塔刺海傳。從征回回。河西。欽察。畏吾兒諸國。世祖紀。河西。回回。畏吾兒等。依各官品充萬戶府。達魯花赤。文宗紀。各道廉訪司官。用蒙古二人。畏兀。河西。回回。漢人各一人。明史哈密傳。其地種落雜居。一曰回回。一曰畏兀兒。一曰哈刺灰。其頭目不相統屬。又云。哈密故有回回。畏兀兒。哈刺灰三種。回紇與回回。不宜混而一之明矣。阿合馬。本出回回。故世祖言。回回人中。阿合馬才任宰相。而傳稱回紇人。蓋明初史臣。亦昧於回回回紇之有別也。

江淮行省平章阿里伯。阿里伯。元史無傳。爲阿合馬所譖死。後追諡忠節。見柳貫集。

右丞燕帖木兒。卽崔斌也。

擲思監。野先不花之孫。卽也先不花。

叛臣傳

太祖十六年。全叛宋。舉山東州郡歸附。太師國王李魯承制。拜全山東淮南楚州行省。案。李全之降。據太祖紀。在二十一年。丙戌。此誤。且木華黎以太祖十八年卒。而李魯嗣之。若云十六年。則李魯未爲國

王也。

阿魯輝帖木兒。曲春傳太平。太平傳帖木兒赤。而阿魯輝帖木兒襲其封。案諸王表。陽翟王太平。泰定元年襲封。曲春帖木兒赤。則失其封年。而承襲之次。則與此傳正合。宗室世系表。以太平爲曲春兒。帖木赤兒即帖木兒赤。爲曲春之子。至阿魯輝帖木兒。與其弟忽都帖木兒。則兩表不見其名。

高麗傳

太祖十三年。帝遣哈只吉剌刺等領兵征之。高麗王名闕。奉牛酒出迎王師。案太祖紀。稱高麗王噉降。請歲貢方物。考朝鮮史。太祖十三年。爲王噉即位之五年。傳乃闕其名。何邪。

皇太弟國王及元帥合臣。合臣。即哈只吉也。太祖紀及朝鮮史。俱作哈真。命撒禮塔征其國。洪福源傳。作撒里荅。

十月。噉入朝。案是年六月。噉親朝。此又云噉入朝。蓋以六月朝上都。十月入朝大都。非既還國而又入朝也。

立禩庶族承化侯爲王。承化侯名溫。見朝鮮史。

皇女忽都魯揭里迷失。下嫁於世子愷。公主表。作忽都魯堅迷失。

子靈。復襲王位。成宗初年。尙寶塔實憐公主。表作卜荅失利。本紀作普達實憐。又作寶荅失利。

生子燕，燕受遷位。以仁宗皇慶二年四月，封高麗國王。是年其弟嵩立爲世子。案本傳述授受事多疏舛。今據朝鮮史考之。蓋麗以至大三年封瀋王入朝。皇慶二年遣歸就國，乃請辭位，以其長子燕爲征東行省左丞相高麗王，而以姪延安君嵩爲世子。嵩爲瀋王世子，非爲高麗王世子也。

燕傳其弟嵩。案延祐三年，璋請傳瀋王位於世子嵩，許之。嵩所受者瀋王，非高麗王。又受於璋，非受於燕也。燕嗣高麗王，順帝至元五年薨，子禎嗣。至正三年薨，子昕嗣。八年薨，以禎庶子祗嗣。十一年，詔廢祗，立禎之母弟祺，其承襲之次，見於朝鮮史。班班可考。嵩雖有奪嫡之志，迫於衆議，終不得逞。而史乃云燕傳其弟嵩，何其謬乎。

靈則更名章云。章嘗作璋。高麗國王自尙主以後，子孫多以國語命名，故常有兩名。如璋曰益智禮普化，燕曰阿刺忒納失里。禎曰不荅失里。昕曰八禿麻朵兒只。祺曰伯顏帖木兒。又名顯古。史家不能盡載，今參取朝鮮史以博異聞。

謹案遼金元三朝人名、官名、地名，舊史頗多舛譌。由當時史臣未通繙譯，以至對音每有窒礙。且有一人而彼此互異者。現奉聖旨，飭令館臣逐一釐定，足洗向來沿襲之陋。是書成於乾隆庚子，所據係武英殿舊刊本。俟頒下定本到日，遵照改正。辛丑三月大昕書。